


Chijnie ndo Jesucristo



Popoloca, San Luís Temalacayuca: Chijnie ndo Jesucristo New
Testament

Chijnie ndo Jesucristo

Popoloca, San Luís Temalacayuca: Chijnie ndo Jesucristo New Testament

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source files dated 29 Jan 2022
ee37a138-f1b9-51ef-b60f-e89d6de4d06f

Contents

Mateo	1
Marcos	63
Lucas	101
Juan	165
Hechos	210
Romanos	264
1 Corintios	287
2 Corintios	310
Gálatas	324
Éfesios	332
Filipenses	340
Colosenses	346
1 Tesalonicenses	351
2 Tesalonicenses	356
1 Timoteo	359
2 Timoteo	366
Tito	371
Filemón	374
Hebreos	376
Santiago	395
1 Pedro	402
2 Pedro	409
1 Juan	413
2 Juan	419
3 Juan	420
Judas	421
Apocalipsis	423

Chijnie ndo Jesús chronga ndo Mateo

Sen kuachrjenixin ndo Jesús

(Lc. 3:23-38)

¹ Ji i sen kuachrjenixin ndo Jesucristo. Je e ndo kuachrjenixin ndo, ndo David ko ndo Abraham.

² Ndo Abraham ikjui ndotée ndo Isaac
ko ndo Isaac ikjui ndotée ndo Jacob
ko je e ndo ikjui ndotée ndo Judá
ko sen kichuu ndo.

³ Ko ndo Judá ikjui ndotée ndo Fares
ko ndo Zara ko janée sen ikjui jan Tamar.
Ndo Fares ikjui ndotée ndo Esrom
ko je e ndo Esrom ndotée ndo Aram.

⁴ Ndo Aram ikjui ndotée ndo Aminadab
ko je e ndo ndotée ndo Naasón
ko ndo Naasón ikjui ndotée ndo Salmón.

⁵ Ndo Salmón ikjui ndo ndotée ndo Booz ko janée ndo jan Rahab.
Ndo Booz ikjui ndotée ndo Obed ko janée ndo Obed jan Rut.
Ndo Obed ikjui ndo ndotée ndo Isaí.

⁶ Ko ndo Rey David, chjen en ndo Isaí,
ko jan Betsabé, jan ikjui janchri e ndo Urías, ko ndo Rey David, me e sen ikjui ndotée
ko janée ndo Salomón.

⁷ Ko ndo Salomón ikjui ndotée ndo Roboam
ko je e ndo ndotée ndo Abías
ko je e ndo Abías ikjui ndotée ndo Asa.

⁸ Ndo Asa ikjui ndotée ndo Josafat
ko ndo Josafat ikjui ndotée ndo Joram
ko ndo Joram ikjui ndotée ndo Uzías.

⁹ Ko ndo Uzías ikjui ndotée ndo Jotam
ko ndo Jotam ikjui ndotée ndo Acaz
ko ndo Acaz ndotée ndo Ezequías.

¹⁰ Ndo Ezequías ikjui ndotée ndo Manasés
ko ndo Manasés ikjui ndotée ndo Amón
ko ndo Amón ikjui ndotée ndo Josías.

¹¹ Ko ndo Josías ikjui ndotée ndo Jeconías ko kain xjan kichuu ndo.
Sen bake e nchakon sabikao nã sen israelita tjajna Babilonia, bikao nã sen xranchi
sen itji ndo achjiso ko nti a juinchenche e nã sen ixrã ko juenge a nã sen nã.

¹² Juexinja ti bije e nã sen nti a tjajna me e, tjume e ndo Jeconías ikjui ndotée ndo
Salatiel
ko ndo Salatiel ikjui ndotée ndo Zorobabel.

¹³ Ko ndo Zorobabel ikjui ndotée ndo Abiud
ko ndo Abiud ikjui ndotée ndo Eliaquim
ko ndo Eliaquim ikjui ndotée ndo Azor.

¹⁴ Ko ndo Azor ikjui ndotée ndo Sadoc
ko ndo Sadoc ikjui ndotée ndo Aquim
ko ndo Aquim ikjui ndotée ndo Eliud.

¹⁵ Ko ndo Eliud ikjui ndotée ndo Eleazar

ko ndo Eleazar ikjui ndotée ndo Matán
ko ndo Matán ikjui ndotée ndo Jacob.

¹⁶ Ko ndo Jacob ndotée ndo José
ko ndo José ndoxi e jan María
ko je e jan María janée ndo Jesús,
ndo Jesús, ndo nchekin in sen Cristo.

¹⁷ Itenoó sen xranchrjen kuachrjenixin ndo Abraham ko tjume e konoxin ndo David ko kaxon itenoó sen kuachrjenixin ndo David, ko tjume e ni tjajna Babilonia sabikao na sen israelita tjajnée na ko tjume e íjngo itenoó sen jongí e, tjume e jongí e ndo Cristo.

Xranchi jongí e ndo Jesucristo (Lc. 2:1-7)

¹⁸ *Ja in jongí e ndo Jesucristo: Jan María, jan xrokjui janée ndo Jesús, ó tsijanchia ndo José jan. Ko xratintekao a kichuu sen, ó jiyá jan ichjan ixi juachaxien Espíritue ndo Dio.

¹⁹ Ndo José, ndo tsoña ndoxi e jan María, je e ndo naa xi tsango jian, méxin, imao tjaun ndo xrokuintu e ndo jan ixi tjaun a ndo xrokono e chujni.

²⁰ Ko ó tsixraxaon ndo jaña, nchakon naa ndo ángel ne e Ncháina tsikonoxin en ndo ngaya kotáchrién ndo ko ja in nichja ndo ángel:

—José, ja a ti kuachrjenixian ndo David, xrakon a ixi tsaye é jan María xranchi janchri a ixi ichjan xrochóna jan, xjan me e ixi juachaxien Espíritue ndo Dio tsjongíexin xjan.

²¹ *Ko jan María sinchejongí e jan naa xjan xi ko sinchekei ian xjan Jesús; jaña tsin in xjan ixi je e xjan tsantsje xjan ijie chóna chujni.

²² Kain ji i kon en ixi jaña tsichronga ndo Dio ngajin sen kuanichja chijnie Ndo ó sa ó. Ja in tsindachro ndo:

²³ Naa nchrichajan tseyá nchrichan ichjan,
ko xrochóna nchrichan naa ichjan,
ko je e xjan ndatsin in xjan Emanuel.
Ji i xrondachro: ndo Dio steku una ndo.

²⁴ Hora xingame e ndo José kuitikaon ndo nge e ti ndachro ndo ángel ne e Ncháina* Dio ko kuayé e ndo jan María xranchi janchri e ndo.

²⁵ *Xra kuintejuakao a kichuu sen, je e jan juinchejongí e jan naa ichjan ko ndo José juinchekin in ndo xjan Jesús.

2

Sen nchekuanxin nchanotsé kuitsje e xa xjan Jesús

¹ Tjajna Belén tikinixin en Judea, nti a jongíexin ndo Jesús. Nchakon me e bake e naa xi rey bakin in Herodes, xi me e bakituan an nti a. Nchakon me e kuij kaxin sen tsango no e nchekuanxin nchanotsé. Sen me e kuixin sen ndatsjonxin chjuya.

² Ko juanchangi sen:

—¿Ti no jii xjan tsijongí e xjan rey tsetuen en ni judío? Ixi bikona nchanotsée xjan ndatsjonxin chjuya, ko jui ina ixi tsajonna juasaya* ngajin xjan.

³ Ko xi rey Herodes kuin en xa me e, juinche a xa juaxruxin ko kaxon kain ni tjajna Jerusalén.

⁴ Tjume e xi rey Herodes kuiye e xa sen taana ícha tetuan an ko kain ni tjako ley, ko juanchangi e xa na ixi no xrojongíexin ndo Cristo.

⁵ Je e na juatingíexin na:

—Je e xjan tsjongíexin xjan tjajna Belén tikinixin en Judea, jaña tsikjin sen kuanichjabin chijnie ndo Dio ó sa ó:

⁶ Ja a tjajna Belén nunte e Judá,
á je a ja a naa tjajna ícha nchíín
ngakjen en ikaxin tjajna ícha ijié,

ko nti i tsachrjexin naa ngisen ícha tsetuan an, ko je e ndo tsayakon en ndo tjanána Israel.

⁷ Tjume e xi Herodes imao kuiye e xa sen nchekuanxin nchanotsé ko juanchangi xa ngisa konoxin nchanotsé.

⁸ Ko tjume e ndachro xa:

—Itjinta Belén, nti a tjanchangínta ixi ichjan me e, ko ti no tsinchínta xjan, nchenónanta ixi jan an kaxon itsji ngajin xjan tsajon juasaya.

⁹ Ko sen nchekuanxin nchanotsé kuin en sen nge e ichro xi rey ko sakuinterkji sen ko nchanotsé bikon sen me e kuitao en sen nti a ko tjume e kuíxin nchanotsé ngata a ti no jii je e xjan.

¹⁰ Ko sen nchekuanxin nchanotsé tsango ché e sen ixi bikon sen no bake e nchanotsé.

¹¹ Ko hora kuixin in sen nchia ko bikon sen xjan jikao xjan jan María, janée xjan, bake exin ntatuchi in sen, kuajon sen juasaya ngajin xjan ko kuantje e sen ntábaúl tsikika o sen ko kuajon sen chika oro ko tsjo xraxe ko xroqan mirra.

¹² Ko tjume e koxienxin sen ixi íxrokjan i sen ti jii xi Rey Herodes. Méxin, kua sen inaa cha o, sakjui sen tjanée sen.

Sabinga sen tjajna Egipto

¹³ Ko nchakon sakuinterkji sen nchekuanxin nchanotsé, tjume e naa ndo ángel ne e Ncháina konoxin ngaya kotáchrién ndo José ko ndachro ndo ángel:

—Tingatjen, satiko a ichjan ko janée xjan, satjinta tjajna Egipto. Ko nti a tinteenta ti xrondachrjanjan jan an, ixi xi Herodes tjaun xa tsen en xjan.

¹⁴ Tjume e ndo José kuaya ndo ko sabikao ndo ichjan ko janée xjan, tiie me e kua sen cha o sakjui sen tjajna Egipto.

¹⁵ Nti a bake e sen, kuenjan xi Herodes. Jaña kon en ixi jaña tsichronga sen kuanichjabin ndo Dio: “Tjajna Egipto bake e chjan na ko jan an kuiya a xjan.”

Xi Herodes kuetuan an xa ixi tsen en ichjan

¹⁶ Hora kono e xi rey Herodes ixi sen nchekuanxin nchanotsé íkjan i sen xranchi kuetuen en xa sen, me e xi Herodes tsango koñaao xa ko kuetuan an xa ixi tsen en kain xjan xi, xjan xrachóna i yuu nano ste tjajna Belén ko xjan ste ngande e tjajna kaxon. Jaña kuetuan an xa ixi jixraxaon xa nge e ndachro sen nchekuanxin nchanotsé.

¹⁷ Ja in kon en ixi ti tsikjin ndo Jeremías, ndo kuanichja chijnie Dio, nchakon tsindachro ndo:

¹⁸ Ja in kuin en chujni téee naa sen nichjabin tjajna Ramá,
tsango kuyako sen ko tsango tsjanga sen.

Me e nchri Raquel jitsjangaxin chjen en nchra.

Ko tjaun a nchra ixi xrojan ngisen sinchecháxin nchra ixi ó tsikinteken en chjen en nchra.

Jaña jitaxin xroon.

Kjanxin sen tjajna Egipto

¹⁹ Nti a kuintee sen tjajna Egipto kuenjan xi Herodes ko naa ndo ángel ne e Ncháina konoxin ndo ngajin ndo José ngaya kotáchrién ndo ko ja in ndachro ndo:

²⁰ —Tingatjen ko satiko a ichjan ko janée xjan, ikjannta tjajna Israel ixi ó ndakuen en ni tjaun xrokóna xjan.

²¹ Ko tjume e ndo José kuaya ndo ko sabikao ndo xjan ko janée xjan tjajna Israel.

²² Ko kono e ndo José ixí xi Arquelao, chjen en xi Herodes, tetuan an xa nunte Judea, ti baketuan an ndotée xa, xronka ndo José ixí xrokjui ndo nti a. Ko ixí tsichronga ndo Dio ixí kotachrin, méxin sakjui sen nunte tikinixin en Galilea.

²³ *Ko tjanya ndatin in Nazaret, nti a kuintee sen. Jaña kon en ixí jaña tsichronga sen kuanichjixin ndo Dio ó sa ó ko tsindachro sen ixí ndo Jesús xrojuinchekin in nã ndo nazareno.

3

Ndo Juan Bautista nichja ndo chijnie ndo Dio

(Mr. 1:1-8; Lc. 3:1-9, 15-17; Jn. 1:19-28)

¹ Nchakon me e ndo Juan Bautista kuiji ndo ti jii ijnã nchese nunte Judea, nti a nichja ndo chijnie ndo Dio

² *ko ja in nichja ndo:

—Ikjan titikaonnta ndo Dio ixí ó tuinxin tsonoxin juachaxien ndo.

³ Ndo Juan, me e ndo tsindachro ndo Isaías:

Tée naa sen tuyako ti jii ijnã:

“Nchekonchjiannta cha o tsj xjn Ncháina

ko nchenataoxinnta cha o.”

⁴ Ko manta jitsáa ndo Juan Bautista tsikonchjianxin chjuen kucamello ko naa tjuã jingatoxin ndo. Ko ti bajine ndo jeoxón kuxru a ko tsjeen kunoa, kuntajie.

⁵ Ko bakiji chujni Jerusalén ko ni Judea ko kueya chujni tjanya ste ngande e inda Jordán ko baki en nã ti kuandachro ndo.

⁶ Ko kuachronga nã ti ndako a juinche e nã ngajin ndo Dio ko tjume e ndo Juan bikitée ndo nã ti jii ndajitinga ndatin in Jordán.

⁷ *Ko bikon ndo Juan ixí kueya xi fariseo ko xi saduceo kuiji xa ixí tjaun nã tsikitée xa kaxon, méxin, ndachro ndo:

—Ja anta tsikachrjenixinnta kunchee, ¿ngisen ntatjunta satsinge enta juañaue ndo Dio ti ó tuinxin tsij?

⁸ Xrokonda ixí nduaxin tsjakonta ixí ó ti jian rinche enta ko titikaonnta Ncháina.*

⁹ *Ko xrondachro anta ixí kuachrjenixinnta ndo Abraham ko jaña sinchejiénta asáanta ixí jan an ntatjunta ixí ixro ji i chao ndo Dio sinchéña ndo chujni tsachrjenixin ndo Abraham.

¹⁰ *Ko jacha ó jichón en jacha xrochrijinxin nue e ntayua ixí kain ntãã tajon a itu jian xrokonda xrochrijin ntãã ko xroche ntãã.

¹¹ Ko nduaxin tjakonta ixí juincheni anta ti ndako a juinche enta ko jan an inda bikitéexinta. Ko ícha tjume e tsij inaa ndo ícha tetuan an, ko jan an tikinixinna i tsiki an katée ndo, ko je e ndo tsikitéxinnta ndo Espíritue ndo Dio ko xro i.

¹² Ko je e ndo ó jitika o ndo kachrintue ndo tsjenduaxin ndo noatrigo ko tsinchexin ndo no ti xineno ko tsake e ndo noa ti jii ntane to ko xineno tsjaaka ndo xineno, ko xro i me e nai a tsanga xro i.

Xranchi bikitée ndo Jesús

(Mr. 1:9-11; Lc. 3:21-22)

¹³ Ndo Jesús kujxin ndo nunte Galilea ko kuiji ndo ti jii ndajitinga ndatin in Jordán ti jii ndo Juan Bautista ixí tsikitée ndo Jesús.

¹⁴ Ko ndo Juan tjaun a ndo tsikitée ndo ndo Jesús ko ja in ndachro ndo:

—Xrokonda ja anta tsikiténinta jan an, ko ja anta tji inta ngajin ixí jan an tsikitéenta.

¹⁵ Ko ndo Jesús juatingíexin ndo:

—Jaña xrokonda sinche ena jai, ixí jaña tsitikaonna kain ti kuetuan an ndo Dio.

Me e ndo Juan kuitikaon ndo.

¹⁶ Ko ndo Jesús bikitée ndo, tuinxin xenduaxin ndo inda ko me e xitje e ngajní† ko bikon ndo Espíritue ndo Dio xingajin xranchi naa kuntúá ko bake e ngata a ndo.

¹⁷ *Ko tuinxin kuin enni naa téé séen kujixin ngajní ko ndachro:

—Ji in chjan na tsango tjua a ko juaxruxin ritjén ngajin xjan.

4

Xixron anxrée tjaun xa tsakaon xa ndo Jesús

(Mr. 1:12-13; Lc. 4:1-13)

¹ *Tjume e Espíritue ndo Dio bikao ndo Jesús ngata a ijna nchese ko nti a Xixron anxrée tjaun xa tsakaon xa ndo Jesús.

² Bake e ndo ijna, ko yuukan nchakon ko tiie juinchekatse ñao ndo jinta, méxin kuen en ndo jinta.

³ Ko Xixron anxrée konchjiñe e xa ti jii ndo Jesús ixí tjaun xa tsakaon xa ndo, méxin ndachro xa:

—Siá nduaxin ja a Chjen en ndo Dio, ndache ixro me e xrokjan xro nutja.

⁴ Ko je e ndo juatingíexin ndo:

—Jitaxin xroon chijnie ndo Dio: “Je a je o nutja tsechónxin chujni. Kaxon kain chijnie ndo Dio, me e tsechónxin chujni.”

⁵ Tjume e Xixron anxrée bikao xa ndo Jesús tjajna tsango tjúá, tjajna Jerusalén, ko juinchengajin in xa ndo ti ícha nui ngata a ni ngo,

⁶ ko ndachro xa:

—Siá nduaxin ja a Chjen en ndo Dio, chrinka ti nunte ixí jitaxin xroon chijnie ndo Dio: Je e ndo tsetuen en ndo sen ángel tikinixin en ndo ixí xrotsengia sen ixí tsontengíxin a tutáa ixro.

⁷ Ko je e ndo Jesús juatingíexin ndo:

—Kaxon ndachro chijnie ndo Dio: “Tsaké a naa nge e ixí tsikuan á chao sinche e ndo Dio.”

⁸ Ko íjngo nchakon bikao xa ndo Jesús ngata a ijna ícha noi ko juako e xa ndo kain tjajna jii ngata a nunte xasintajni* ko kain nge e ti tjintee chónnda na.

⁹ Ko ndachro Xixron anxrée:

—Kain ji i xrotjá a siá ja a tsake exian ntatuchi ian ko xrochjánana juasiaa.

¹⁰ Tjume e je e ndo Jesús ndachro ndo:

—Satjia ja a Xixron anxrée, ixí ndachro xroon chijnie ndo Dio: “Je o Ncháa ndo Dio xrokonda xrochje é ndo juasaya ko je o ngajin je e ndo tsitikaon.”

¹¹ Ko Xixron anxrée ngaxiton xa ko tjume e kujii kaxin sen ángel ngajin ndo Jesús ko kuayakon en sen ndo.

Ndo Jesús juangíxin ndo xrée ndo nunte Galilea

(Mr. 1:14-15; Lc. 4:14-15)

¹² *Nchakon ndo Jesús kuin en ndo ixí ndo Juan xraxin in na ndo ndo achjiso, je e ndo ikjan ndo nunte Galilea.

¹³ *Ko kuitue a ndo tjajna Nazaret; sakjui ndo tjajna Capernaum, tjajna me e jii ngande e ndachaon tjenka nunte Zabulón ko Neftalí.

¹⁴ Ja in kon en xranchi ti tsikjin ndo Isaías chijnie ndo Dio. Ja in tsindachro ndo:

¹⁵ Nunte Zabulón ko nunte Neftalí ti jii cha o ngande e ndachaon tuenxin ndajitinga ndatin in Jordán, nunte Galilea ti ste ni chúxin a ndo Dio.

† **3:16 ngajní** cielo **3:17** Mt. 12:18; 17:5; Mr. 1:11; Lc. 9:35. **4:1** He. 2:18; 4:15. * **4:8 xasintajni** mundo
4:12 Mt. 14:3; Mr. 6:17; Lc. 3:19, 20. **4:13** Jn. 2:12.

¹⁶ Chujni tjanya ste naxixe e bikon na ijié xro i, ko ni ste ti jii tsa on ne e xichononte,[†] xro i bingasáñe e na.

¹⁷ *Ko nchakon me e kuaxi juako ndo Jesús ko kuandachro ndo:

—Tintu enta ti ndako a kuanche enta ixi juachaxien ndo Dio jii ngajní ó tjenkanta jii.

Ndo Jesús kuiye e ndo noó sen kuatse kucheę ti jii ndachaon

(Mr. 1:16-20; Lc. 5:1-11)

¹⁸ Ndo Jesús jitatsinga ndo ngande e ndachaon ndatin in Galilea, nti a bikon ndo yuu sen, sen me e kichuu sen, naa ndo ndatin in Simón ko kuanchekin in na ndo Pedro, ko ndo kichuu ndo ndatin in ndo Andrés. Je e sen stetánka sen nocha a ngangí inda, ko kuansengi sen kucheę ixi je e sen ixra me e kuanche e sen.

¹⁹ Ko ndo Jesús ndache ndo sen:

—Xrokuiinta rua naninta ko jan an sintakuan annta xronichje enta chujni me e tsitikaon na najan an, ko xrokjui xranchi xrotsénta kucheę.

²⁰ Ko tuinxin kuintu e sen nocha a ko rué e sen ndo.

²¹ Ko kuiji ndo Jesús ícha ndá a bikon ndo íjngo yuu sen, ko sen me e kaxon kichuu sen, naa ndo ndatin in Jacob ko inaa ndo ndatin in Juan, yui sen chjen en ndo Zebedeo ko yui sen stekao sen ndotée sen ngaxin in ntábarco ixi stetjaun sen nocha a tséxin sen kucheę. Tjume e ndo Jesús kuiye e ndo sen.

²² Ko je e sen tuinxin kuintu e sen ntábarco ko kuintu e sen ndotée sen ko rué e sen ndo Jesús.

Ndo Jesús nchekuen en ndo kueya chujni

(Lc. 6:17-19)

²³ *Ndo Jesús kuaji ndo nchijí nunte Galilea ko banhekuen en ndo chujni ngaxin in ningue ni israelita ngujngu tjanya ti bakiji ndo ko kuanchekuen en ndo na chijni natjúá ti tetuan an ndo Dio ko kuanchexruen en ndo kain ichin ko kain ti tiín na.

²⁴ Ko kain ti ixra jian kuanche e ndo, me e kono e ni ste nunte Siria ko bika o na kain ni kuachónnda ngixe i ichin ko ni chónnda espíritue Xixron anxrée, ni bakendáa, ko ni jua i itji, ko ndo Jesús juinchexruen en ndo na.

²⁵ Ko kueya chujni kuarue e na ndo Jesús, ni nunte Galilea ko ni tjanya Decápolis ko ni tjanya Jerusalén ko nunte Judea ko ni kuixin tuenxin ndajitinga ndatin in Jordán.

5

Ndo Jesús nichja ndo ngata a ijna

¹ Ndo Jesús bikon ndo ixi xejo kueya chujni, me e kuajin in ndo ngata a ijna ko nti a bake e ndo nunte. Ko kaxon sen teyuu kuarue e ndo, konchjiñe e sen ngajin ndo.

² Tjume e ndo Jesús kuaxi nichja ndo ko ja in ndachro ndo:

Sen chaxro tsake e

(Lc. 6:20-23)

³ —Juaxruxin tsake e sen xraxaon ixi nduaxin xrokonde e sen ndo Dio ixi sen me e tsayé e sen juachaxin tsintee sen ti tetuan an ndo Dio.

⁴ Juaxruxin tsake e kain sen stechíin ixi xrojan nge e ti ndako a kon en sen, ko je e ndo Dio tsajon ndo juachaxin ixi juaxruxin tsintee sen.

⁵ Juaxruxin tsake e sen nchejié a aséen ixi je e sen tsayé e sen nunte ti ó ndachro ndo Dio tsajon ndo.

⁶ Juaxruxin tsake e kain sen tjaun xranchi xrojuine o xrokui i chijnie ndo Dio ixi je e ndo Dio tsajon ndo ti jian ngaya aséen sen.

⁷ Juaxruxin tsake e sen tingijna sen kichuu, jaña ndo Dio kaxon tsikonóe e ndo sen.

[†] 4:16 *xichononte* muerte 4:17 Mt. 3:2. 4:23 Mt. 9:35; Mr. 1:39.

8'Juaxruxin tsake e sen kuitikaon ko juinchetjúá aséen ixi je e sen nduaxin tsikon sen ndo Dio.

9'Juaxruxin tsake e kain sen stetingijna ixi tsinteketō a chujni ko ndo Dio sinchekin in ndo sen chjen en ndo.

10*'Juaxruxin tsake e sen chinga nchekao na ixi titikaon sen nge e tjaun ndo Dio, me e je e sen tikinixin en sen ngajní ti tetuan an ndo Dio.

11 *'Juaxruxin take é ja anta ti chinga tuyaku anta na ko ningakon annta na ko tjangi anta na ixi kondanaxin jan an.

12*Chá anta ko juaxruxin take énta ixi ja anta tsaye enta naa nge e ícha jian jii ngajní. Ixi jaña juinчекao na sen sa ó, sen kuanichja chijnie ndo Dio.

*Ja anta xranchi xíjnta, ko xranchi xro i tingasáña
(Mr. 9:50; Lc. 14:34-35)*

13 *'Xranchi xíjnte e nunte xasintajni me e ja anta, ko siá xíjnta ijní a xíjnta, ¿xranchi tsojníxin xíjnta íjngo?, ko jaña íxro an tsonda xíjnta, tsintji xíjnta, ko tsingatjangi na xíjnta.

14*'Xro i tingasáñaxin nunte xasintajni me e ja anta. Naa tjajna jii ngata a naa ijna jua i tsemá tjajna.

15*Xro an ngisen sinchekakiin naa xro i ko tsake e sen xro i ngangí naa chikute. Na i, xro i take e xro i noi ngata a naa ntaa ixi sinchengasáña xro i kain chujni ste nchia.

16 *Jaña ja anta kaxon nchengasáñe enta kain chujni jii ngandajinnta, me e tsikon chujni ti jian nche enta, jaña je e na tsajon na juasaya ngajin Ndotáina jii ngajní.

Ndo Jesús tjako ndo ley kuetuan an Ncháina

17 'Ja anta xraxaon anta ixi jan an jui i ixi sintama a ley kuajon ndo Moisés ko ti nge e ndachro ikaxin sen nichja chijnie ndo Dio. Na i. Jan an jui i ixi tsitika on kain ti kuetuan an ndo Dio ko sintakuan annta nge e xrondachro chijni me e.

18 *Ko nduaxin xrontatjunta ixi xratsatsinga i ngajní ko nunte xasintajni, xro an ley kuetuan an ndo Dio tsoomé e, ko ní naa letra tsachrjende a. Na i, kain ti ndachro chijni, me e xrokonda tson en.

19 Ko ngisen tsitikaon a ko sinche a ti ndachro ley kuetuan an ndo Dio, maski naa ley nchíin tsitikaon a sen, ko jaña sinchekuen en sen chujni, kaxon nchion juasie ndo Dio tsayé e sen ti jii ngajní tetuan an ndo Dio. Ko siá ndako tsitikaon sen ley kuetuan an ndo Dio ko jaña sinchekuen en sen chujni, ijié juasie ndo Dio tsayé e sen nti a ti jitetuan an ndo Dio,

20 Méxin, jan an ntatjunta xrokonda tsango jian tsitikaonnta ndo Dio ícha ixi ni fariseo ko ni tjako ley kuetuan an ndo Dio, ko siá sinche anta ícha jian jua i tsixin innta ti tetuan an ndo Dio.

*Ndo Jesús juako ndo kondee juaña
(Lc. 12:57-59)*

21 'Ja anta ó kuin ennta ti kuituen en sen sa ó: "Jua i naatsóñaxónnta ni kichuunta, ixi ngisen sinche e jaña tsitsingata a sen ijié."

22 Ko jan an ndachrjan siá xrojan ngisen xraningakon en sen sen kichuu, sen me e tsitsingata a sen ijié. Ko ngisen tsenge e kichuu teka, sen me e, ni tetuan an tsjankata a na sen ijié. Ko ngisen xrondache sen kichuu ixi tsinchetjáña jaa sen, sen ndachro me e satsji sen ngangí xro i kain nchakon.

23 Méxin siá tsiku unta naa nge e tsajonxinnta juasianta ngajin ndo Dio ngaxin in ni ngo ko nti a xroxaxaonnta ixi xrojan sen kichuunta toña anta sen,

²⁴ nti ao tintu enta nge e ritikuunta ngata a altar, ko itjinta, tjaunnta sen ko tjanche enta sen juatitjáña kondeexin nge e kuętonta. Tjume e ikjannta ko tájonnta ti bikuunta ngajin ndo Dio.

²⁵ 'Siá xrojan ngisen kuichro ijie kontraanta, cháña tuinxin tjaunnta sen ko nchekonchjiannta ti stetoñaoxinnta ixi xraya onta cha o, ko xratjaso anta ti jii xi nchéña ijie ba tsituan an xa xi policia xroxraxon innta xa ndo achjiso.

²⁶ Ko nduaxin ntatjunta ixi tsachrxexin anta ndo achjiso tsjengajanta na kain ti tasinkanta.

Ndo Jesús juako ndo ijie tama ni chóna inaa nchri o inaa xi

²⁷ 'Ja anta kuin ennta chijni tsikitue en sen sa ó ja in ndachro: "Chonda inta inaa nchri, nchri je a nchrinchri anta o je a xixi anta."

²⁸ Ko jan an ndachrjan ngixe i naa xi xrotsje e xa inaa nchri ko tsingakuenxin xa nchra, me e ó juinche e xa ti ndako a ngaya aséen xa.

²⁹ *Méxin siá ikuan ndatsjonxin jian sintekateya ixi sinche e ti ndako a, cháña tantsjengia ko ndá a tjanka, ixi cháña tsitjáña tu o cuerpoa ko je a tsitjáña nchijí ja a ti jii xro i nai a tsanga.

³⁰ *Ko siá tjáa ndatsjonxin jian sintekateya ixi sinche e ti ndako a, cháña tonchrijian tjáa ko ndá a tjanka ixi cháña tsitjáña tu o cuerpoa ko je a tsitjáña nchijí ja a ti jii xro i nai a tsanga.

Ndo Jesús ko sen tsikute e

(Mt. 19:9; Mr. 10:11-12; Lc. 16:18)

³¹ *Kaxon kuituen en sen sa ó ixi ngisen ítjaun a janchri e, chao tsonchjian naa xroon tsintuexin kichuu sen.

³² *Ko jan an ndachrjan ixi ngixe i xi ítjaun a nchrinchri e xa, ko tjaun xa tsintu e xa nchra, chao, je o siá nchrinchri e xa juincheye e nchra xa ixi inaa xi. Siá na i, me e je e xa xranchi xrojuincheateya xa nchra sinche e nchra ti ndako a. Ko xi tsute e naa nchri, nchri tsikintu e xixi e, xi me e tsama xa ijie kaxon, xranchi naa xi kuejuakao inaa nchri.

Ndo Jesús juako ndo ixi jua i sincheyani ixi je e ndo

³³ 'Kaxon tsikin ennta ti kuetuen en sen sa ó: "Take anta ndo Dio xranchi nduaxin xrojuinche enta ti ndachronta ko nche anta; ja anta xrokonda sinche enta ti tsindachronta ngajin Ncháina."

³⁴ *Ko jan an ndachrjan ixi jua i tsakéenta ndo Dio ko nche anta ti ndachronta o ngixe i naa nge e ti jii ngajni ixi ngajni me e ntaxitueen ndo Dio, ti tetuanxin ndo.

³⁵ Ko kaxon jua i tsakéenta nunte xasintajni ko nduaxin a sinche enta ixi ngata a nunte nti i take e tutée ndo Dio, ko jua i xronichjxinnta ixi tjajna Jerusalén ixi tjajna me e tjajnee ndo Dio, ndo Rey tsango tetuan an.

³⁶ Ko kaxon jua i tsakéexinnta jáanta ko nduaxin a sinche enta ti ndachronta, ixi ja anta chonda inta juachaxin xronachronta ixi naa xrajaanta tsontjúá xra o tsontie xra.

³⁷ Méxin nchakon xronachronta jaán, jaán tson en, o siá xronachronta na i, na i tson en ixi kain ti ícha xronichjanta, me e nchekateyanta Xixron anxrée.

Ndo Jesús juako ndo ixi jua i tsjenge eni

(Lc. 6:29-30)

³⁸ 'Ó kuin ennta ixi kuandachro sen sa ó siá kuande ena iton ikonnta, ja anta kaxon tande enta iton ikon na. Ko siá iton kuantsjexin na nenonta, ja anta kaxon tande enta iton neno na.

³⁹ Ko jan an ndachrjan tetoko inta ni ña i, ko siá xrojan ni me e tsande e na itja na ngaya ikonnta, ndatsjonxin jian, takéenta ti ndatsjonxin ikjon kaxon.

⁴⁰ Siá xrojan ni ña i tsichro na ijie ixi tjaun na tsantsja anta na camisaanta, tájonnta kaxon chamaranta.

⁴¹ Ko siá xrojan ni tjaun tsamanta ti iye jitikao na naa kilómetro, ja anta tiku unta yuu kilómetro.

⁴² Siá xrojan ni tsjanchaka a ngajinnta, chje énta na, ko siá xrojan ngisen tjaun sinchekjennta na xrojan nge e, tájonnta.

Ndo Jesús juako ndo ixi xrotjue ena chujni ningakoina
(Lc. 6:27-28, 32-36)

⁴³ 'Ó kuin ennta kaxon ti kuandachro sen: "Tjue enta ni tjua anta ko ningakon ennta ni ningakon annta."

⁴⁴ Ko jan an ntatjunta ixi tjue enta ni ningakon annta, ko ndachenta ndo Dio sinchenchaon* ndo ni ndako a nichja anta, ko tingijnanta ni ningakon annta, ko ndachenta ndo Dio ixi sinchemé e ndo ti ndako a junta anta na ko ti chinga nichja na ixi ja anta ko ti benginta na.

⁴⁵ Me e ja anta xrokjannta chjen en Ndotáina jii ngajní, ndo tetuan an tsachrje chjiixro ngata a ni titikaon ndo ko ngata a ni ña i, ko kaxon nchekania ndo ichrin ngata a ni jian nche e ko ni ndako a nche e.

⁴⁶ Siá ja anta je o tjue enta ngisen tjua anta, ¿nge e tsjachanta ixi me e? Ixi ni tjejo tomi ne e xi tetuan an jaña nche e na kaxon.

⁴⁷ Siá je o jian nichje enta sen kichuunta, ¿á jian rinche enta, richronta? Jaña nche e ni chúxin a ndo Dio kaxon.

⁴⁸ Méxin tsango jian ko ndako nche enta kain nge e xranchi Ndotánta jii ngajní, jian nche e je e ndo ko jian ndo.

6

Ndo Jesús juako ndo kondee ti jian tsingijnani chujni

¹ *Tingijna inta ni xrokonde e ixi je o tjaunnta tsikon chujni ti jian rinche enta. Siá jaña sinche enta, Ndotánta jii ngajní tsajon a ndo nge e tsjachanta.

² Méxin nchakon tsingijnanta naa ni nóa, ndache anta ikaxin chujni nge e juinche enta. Nche anta xranchi nche e ni tjako inaa ikon. Nchakon ste na ngaya cha o o ni ngo, tingijna na ni nóa ixi tjaun na tsikon chujni nge e nche e na ixi jaña xrondachro chujni ixi tsango jian je e na. Ko jan an ndachrjan ixi ni me e ó kuayé e na ti tikinixin en na.

³ Ko ja anta nchakon tsingijnanta naa ni nóa, imao nche enta, ko sen ícha tjentonta tsonoe a sen.

⁴ Imao tingijnanta ni nóa ko ndotánta jii ngajní, ndo tsje e nge e nche enta imao, je e ndo tsajon ndo nge e tsjachanta ixi ti jian juinche enta.

Ndo Jesús juako ndo xranchi xronichjani ngajin ndo Dio
(Lc. 11:2-4)

⁵ *Ko nchakon ja anta xronichje enta ndo Dio, nche anta xranchi nche e ni tjako inaa ikon, ni me e nche e na juaxruxin siin na nichje e na ndo Dio ngaxin in ni ngo ko ngaya cha o, ixi jaña tsikon chujni nge e stenche e na. Ko jan an ndachrjan ixi ni me e ó chóna na nge e tikinixin en na.

⁶ Ko ja anta nchakon xronichje enta ndo Dio, tixin innta ndointa, tije enta ntachja ko nti a nichje enta ndo imao. Ko je e ndo ó jitsje e ndo nge e nche enta imao ko je e ndo tsajon ndo nge e jian tsaye enta.

⁷ Ko nchakon nichje enta ndo Dio, nichja inta xraje o ko xraje o chijni, xranchi nche e ni chúxin a ndo Dio, ixi je e na xraxaon na ixi siá itsjé xronichja na, me e tsin en ndo Dio.

* 5:44 *sinchenchaon* bendecir 6:1 Mt. 23:5. 6:5 Lc. 18:10-14.

⁸ Ja anta nichja inta xranchi nche e je e na ixi Ndotánta ó no e ndo nge e xrokonda anta maski xratjanche anta ndo.

⁹ Ja anta ja in nichje enta ndo Dio:

Ndotána, ja anta ritjennta ngajní, tsango tjúá ja anta.

¹⁰ Jan anna tja onna tsji inta tsetuan anna ngata a nunte nti i ko tson en xranchi xrondachro ja anta ngata a nunte nti i, jaña kaxon tson en ngajní.

¹¹ Tájonnta nutja sinena jai.

¹² Ko ja anta nchemé enta kain ti ndako a junta ana xranchi jan anna ntamá ana गया aséenana ti ndako a juinchenana ikaxin chujni.

¹³ Tintue anta ixi ti ndako a sinta ana,

ko tájon anta juachaxin ixi xrojan nge e sinchenana Xixron anxrée

ixi ja anta tituan anna kain nge e ko chondanta ijié juachaxin kain nchakon.

Jaña tson en.

¹⁴ *Ko siá ja anta sinchemé enta गया asáanta ti ndako a junta anta na, kaxon Ndotánta jii ngajní sinchemé e ndo ti ndako a juinche enta.

¹⁵ Ko siá ja anta sinchemé anta गया asáanta ti ndako a junta anta na, kaxon Ndotánta jii ngajní sinchemé a ndo ti ndako a juinche enta.

Ndo Jesús juako ndo kondee ti sinchekatse ñaoni jinta

¹⁶ 'Ja anta nchakon sinchekatse ñaonta jinta, nche anta xranchi nche e ni tjako yuu ikon, ixi je e na juichenchíín ikon na, me e jaña tsikon chujni ixi je e na jinchekatse ñao na jinta. Jan an nduaxin ntatjunta ixi ni me e ó kuayé e na ti tikinixin en na.

¹⁷ Ja anta nchakon rinchekatse ñaonta jinta, néma ikonnta ko jian tonchjiannta

¹⁸ ixi jaña tsonoe a chujni ixi ja anta rinchekatse ñaonta jinta. Je o Ndotánta jii ngajní tsono e ndo, ko je e ndo jitsje e ndo ti imao rinche enta, je e ndo tsajon ndo naa nge e tsjachanta.

Ngajní jii kain ti nduaxin tjintee

(Lc. 12:33-34)

¹⁹ *Tasintja inta ti tjintee jii ngata a nunte nti i, ixi nti i ti i kuchjii ko itjo kain nge e, ko xiche e chao tixin in xa ndointa ko tsee xa ti tjintee chondanta.

²⁰ Cháña ngajní tasintjanta kain ti tjintee ixi nti a kuchjii xro an nche e ba, ko nti a xro an nge e itjo, ko xiche e jua i tsee xa.

²¹ Ixi ti no jii ti tsango tjintee chondanta, nti a tsake e asáanta kaxon.

Xro i tingasáña anta

(Lc. 11:34-36)

²² 'Ikonnta me e nchengasáña anta. Méxin, siá jian ikonnta, jian tsingasáña nchijii ja anta.

²³ Ko siá ikonnta je a jian, kaxon nchijii ja anta naxixe e tsake enta. Ko siá xro i chondanta je a xro i jian tingasáña, tsango naxixe e tsake enta.

Ndo Dio ko tomi

(Lc. 16:13)

²⁴ 'Xro an ngisen jian sinche e ixra ngajin yuu nchéé; xroningakon en sen naa nchéé sen o xrotjue e sen inaa nchéé sen, kaxon tsango jian sinche e sen ixra ngajin naa nchéé sen ko ngajin inaa nchéé sen, na i. Jua i sinche eni ixra ngajin ndo Dio ko xrotjue eni tomi.

Ndo Dio tayakon en ndo chjen en ndo

(Lc. 12:22-31)

²⁵ 'Jan an ntatjunta: Ta inta juachjaon ixi nge e sintenta o nge e tsi inta o nge e tsaritsiinta. ¿Á ícha tjintee nge e ti sintenta ixi ti chondanta juachaxin tsarichonnta? Xraxaonnta ixi ícha tjintee asáanta ko ti chondanta juachaxin tsarichonnta ixi ti tsaritsiinta ko ti sintenta.

²⁶ Tsje enta kuxe, je e ba tenga i ba ko tandá i ba ko tatsin a ba ti sine ba, ko Ndotáina jii ngajní tajon ndo nge e sine ba. Ko ja anta ícha tjinteenta ixi naa kuxe.

²⁷ ¿Ko ngixe i ja anta ixi tsango taanta juachjaon, á me e ícha tsojinenta xranchi ngusinexin naa metro?

²⁸ ¿Ko sonda tsango taanta juachjaon ixi nge e tsaritsiinta? Tsje enta xranchi tangi itsjo. Itsjo me e nche a tsjo ixra ko tjaun a tsjo manta,

²⁹ ko jan an ntatjunta ixi xi rey Salomón, xi kuachónnda tsango itsjé nge e, kuitsa i xa xranchi itsjo me e.

³⁰ Ko siá ndo Dio jaña nchekitsáa ndo ika, ka jai jichón, ko ndúya xroche ka ngaya itja, ¿xranchi sinchekitsá inta ndo Dio ja anta ti chuntia inta ndo?

³¹ Méxin, ta inta juachjaon, ko ndachro anta ixi nge e sintenta o nge e tsi inta o nge e tsaritsiinta,

³² ixi chujni chúxin a ndo Dio tsango taa na juachjaon ixi me e. Ko Ndotáina jii ngajní, je e ndo ó no e ndo nge e xrokonda anta.

³³ Sa ó tjéenta juachaxien ndo Dio ko nche enta ti jian, ko tjume e je e ndo tsajon ndo kain nge e xrokonda anta.

³⁴ Ko ta inta juachjaon nge e tson en ndúya ixi nchakon ndúya, nchakon me e noa inta nge e juachjaon tsika o.

7

Tjankata inta ijie ngajin chujni

(Lc. 6:37-38, 41-42)

¹ Tjankata inta ijie ngajin ikaxin chujni ixi jaña ndo Dio kaxon tsjangata inta ndo ijie.

² *Ndo Dio tsjankata a ndo ijie ngajinnta xranchi ja anta tsjankata anta ijie ngajin ikaxin chujni. Ko xranchi sinche e ja anta jaña kaxon ndo Dio sinche e ndo ngajinnta.

³ Ja anta tikonnta naa xineno jingi ikon sen kichuunta ko tikon anta naa ntasiji jingi ikonnta.

⁴ Ko siá ja anta chondanta naa ntasiji jingi ikonnta, ¿xranchi xrondachenta sen kichuunta ixi ja anta tsantsjengínta xineno jingi ikon sen?

⁵ Ja anta ti yuu ikonnta nichjakuanta, sa ó tantsjengínta ntasiji jingi ikonnta ko tjume e chao tsikonnta tsantsjengínta xineno jingi ikon sen kichuunta.

⁶ 'Chje anta kunia kain ti tjúa tikinixin en ndo Dio ixi ba xrokjan ba ngajinnta ko sina anta ba ko naatsónaxónnta ba. Kaxon chje anta kuchinga ixro tjintee ndatin in perla ixi ba tsingatjangi ba ixro.

Tjanchianta ko tjéenta ko tinganta ntachja

(Lc. 11:9-13; 6:31)

⁷ Tjanchianta ko ndo Dio xrotjáanta ndo nge e tjaunnta. Tjéenta ko tsinchíinta. Tinganta ntachja ko xroxitje e ntachja.

⁸ Ixi ngisen tjanchia, tayé e sen, ko ngisen tjée, titja sen, ko ngisen tinga ntachja, xitje e ntachja.

⁹ ¿Á xrojan ja anta, xrochje énta chjan anta naa ixro sine xjan, siá jitjanchia xjan naa nutja?

¹⁰ O, ¿xrochje énta xjan naa kunchee sine xjan, siá juanchia anta xjan naa kuchee?

¹¹ Ko ja anta ña inta, ko no anta chje énta chjan anta nge e ti jian, Ndotáina jii ngajní ícha jian ndo, ko je e ndo tsajon ndo nge e ícha jian tsayé e sen tjanchia ngajin ndo.

12 *Ja anta nchekuunta chujni xranchi tjaunnta sinta anta na ixi jaña kuetuan an ley ne e ndo Moisés ko jaña ndachro xroon tsikjin sen kuachronga chijnie ndo Dio.

Ntachja tsango ijno

(Lc. 13:24)

13 Tixixinnta ntachja ijno. Ixi ntachja ko cha o tsitjáñaxin chujni, yui me e tsango iton ko kueya chujni nti a tixixin na.

14 Ntachja ko cha o tixixinni ngajni, me e tsango ijno ko tsje a sen tixixin ntachja me e.

Ti itu tajon ntaa, me e tjatsuanxinni ntaa

(Lc. 6:43-44)

15 Tsje enta jian ixi kueya ni ndachro ixi je e na nichja na chijnie ndo Dio ko nduaxin a. Je e na tetsaa na xranchi naa kutuchjon, ko ngaya aséen na nche e na xranchi naa kundanihra tsango jie e.

16 Ja anta jaiko tsichuxinnta na ixi ti nge e nche e na, xranchi ntacha a jua i tajon ntaa tu uva o tu higo.

17 Méxin, kain ntaa jian tajon ntaa itu jian, ko ntaa je a jian tajon ntaa itu xro an xrée.

18 Naa ntaa jian, ntaa me e jua i tsajon ntaa itu xro an xrée, ko ntaa je a jian, ntaa me e jua i tsajon ntaa itu jian.

19 *Kain ntaa tajon itu xro an xrée xrokonda xrochrijin ntaa ko xroche ntaa.

20 *Ko jaña tsichuxinnta chujni kaxon ixi ti nge e nche e chujni.

Kain a chujni tixin in ti tetuan an ndo Dio

(Lc. 13:25-27)

21 Kain a ni xrondachro: “Ja anta, Nchána”, tsixin in na ti tetuan an ndo Dio. Je o sen titikaon ti tetuan an Ndotána jii ngajni, tsixin in sen nti a.

22 Nchakon tsji ti tetuan an ndo Dio, itsje sen xrondachro sen: “Nchána, Nchána, jan anna nichjaxinna nombreanta ko nombreanta kuantsjexinna espíritue Xixron anxrée ko nombreanta juntaxinna kueya ixra ijié.”

23 Ko tjume e ndo Jesús xrondache ndo sen: “Jan an chuxin anta, ndá a itjinta, ja anta ti juinche anta ti ndako.”

Ndo Jesús nichjaxin ndo ixi nchia jita a itjao

(Lc. 6:47-49; Mr. 1:22)

24 Méxin ngisen tin en ko titikaon nge e ndachrjan, sen me e ste sen xranchi naa xi xraxaon jian ixi juinchekonchjian xa ndo a xa ngata a itjao*.

25 Kuania ichrin, ko koyeé inda tsaaka, ko soji kuji chrinto ngata a nchia me e, ko kuitsinga i nchia ixi ngata a ixro soji jita a nchia.

26 Ko ngisen tin en nge e ndachrjan ko titikaon a na sen, sen me e nche e sen xranchi naa xi ninta ixi juinchekonchjian ndo a xa ti jii nchese.

27 Ko tjume e kuji ichrin ko koyeé inda tsaaka, ko kuji chrinto ngata a nchia me e; méxin kuitsinga nchia, ko tsango ijié juachjaon kon en ixi ngata a nchese juinchekonchjian xa nchia.

28 *Ko hora juexin nichja ndo Jesús, chujni stetin en ndachro na ixi tsango ijié juachaxin chóna ndo ko chaxro juako ndo

29 ixi juako ndo xranchi naa ngisen tsango ijié tituan an ko juako a ndo xranchi ni tjako ley.

8

Ndo Jesús juinhexruen en ndo naa xi chóna chin lepra

(Mr. 1:40-45; Lc. 5:12-16)

¹ Hora xingajinxin ndo Jesús ijna, itsjé chujni rué e na ndo.

² Ko konchjiñe e naa xi ni e chónða xa ichin lepra ko bake exin ntatuchi in xa ngajin ndo Jesús ko ndachro xa:

—Nchána, siá tjaunnta chao sinchexruananinta —ichro xa.

³ Ko tjume e ndo Jesús bake e itja ndo ngata a xa ko ndachro ndo:

—Jaán tja on. Jai tsachrja a ichin ji in.

Ko juexin ndachro ndo jaña, je e xa tuinxin kuachrje e xa ichin me e.

⁴ Ko ndo Jesús ndache ndo xa:

—Xro an ngisen teki é ji in. Je o itjia ngajin xitaana ko tájuan juasiaa xranchi tsiketuan an ndo Moisés ixi jaña tsono e xitaana ixi ó koxruan an.

Ndo Jesús juinchexruen en ndo naa chajan

(Lc. 7:1-10)

⁵ Nchakon kuixin in ndo Jesús tjajna Capernaum, konchjiñe e naa xi capitán ne e Roma ko kuinóatée xa, ko ja in ndachro xa:

⁶ —Nchána, nía jii naa chán nchexrana ko je e chán níexin chán ichin jua i tontengini ko tsango tiín chán.

⁷ Me e ndo Jesús juatingíexin ndo:

—Jan an itsji syntaxruan an chán.

⁸ Ko xi capitán juatingíexin xa:

—Na i, Nchána, jan an tikinixinna i tsixin innta nía. Ja anta je o tetuen ennta ichin tsachrje ichin, ko je e chán tsoxrue en chán.

⁹ Jan an kaxon chonda ngisen tetuanna ko kaxon jan an chonda xi soldado tetuan an. Nchakon jan an tetuan an naa xi soldado ixi itsji xa xrojan no, je e xa titikaon xa. Ko jan an tetuan an inaa xa tsii xa nda i, ko je e xa tii xa. Ko kaxon tetuan an xi nchexrana xrojan nge e sinche e xa, ko je e xa nche e xa ti ndachrjan.

¹⁰ Ko kuin en ndo Jesús nge e ndachro xi capitán, tsango juinche e ndo juaxruxin nge e chro xa, ko ndache ndo chujni sterué e:

—Nduaxin xrontatjunta ixi xro an ngisen nchijíi nunte Israel kuin an ja in nichja ko tsango chuntia xranchi xi ji i.

¹¹ *Jan an ntatjunta ixi tsi kueya chujni, ni tsi xin chjuya ko ni tsi xin retuya sineka o na ndo Abraham ko ndo Isaac ko ndo Jacob ti jii nchia tetuan an ndo Dio ngajni.

¹² *Ko kueya sen tikinixin en xrobake e sen nchia ti tetuan an ndo Dio, sen me e tsachrjexin sen nti a, ko nduja tsake e sen ti naxixe e ko nti a xrotsjanga sen ko tseto neno sen ixi tsango xroxronka sen.

¹³ Tjume e ndo Jesús ndache ndo xi capitán:

—Itjia ndúya, ko tson en xranchi ja a kuitikaoan.

Ko chán nchexrée xi capitán hora me e koxruen en chán.

Ndo Jesús juinchexruen en ndo jachée ndo Pedro

(Mr. 1:29-31; Lc. 4:38-39)

¹⁴ Ndo Jesús ikjui ndo ndo a ndo Pedro ko nti a bikon ndo janchée ndo Pedro jitsinga jan ko tsango yaa jan súa.

¹⁵ Me e ndo Jesús itsé ndo itja jan ko tuinxin kuachrje e jan súa, ko jaiko bingatjen jan juinchekonchjian jan nge e sine sen.

Ndo Jesús juinchexruen en ndo kueya sen ni e

(Mr. 1:32-34; Lc. 4:40-41)

¹⁶ Ko tiie me e bikao e na ndo Jesús kueya chujni chónða espíritue xi ña i ko je e ndo naáko chijni nichja ndo ko tuinxin kuachrje e na espíritue xi ña i, ko kaxon juinchexruen en ndo ikaxin ni ni e.

17 Ji i kon en ixi jaña tsichronga ndo Isaías chijnie ndo Dio ó sée: “Je e ndo kuama ndo ichin chondana ko je e ndo kuama ndo ti tíinna ko ti soji ana.”

Sen tjaun xrorué e ndo Jesús

(Lc. 9:57-62)

18 Hora bikon ndo Jesús ixi kueya chujni xejo ngandajin ndo, kuetuan an ndo ixi tsatsingatu e sen ndalago.

19 Ko naa xi tjako ley kuetuan an ndo Dio konchjiñe e xa ngajin ndo Jesús ko ndachro xa:

—Maestro, jan an tja on xrorua anta ko itsji ti no itsjinta.

20 Ko juatingíexin ndo Jesús ko ndachro ndo:

—Kutuunta chónnda ba itjao* tejuaxin in ba, ko kuxe chónnda ba kakée ba. Ko Chjen en ndo Dio, xjan jongí e xranchi chujni, chónnda i xjan ti no tsjokéexin xjan.

21 Ko naa sen chrikao ndo, ndachro sen:

—Nchána, chjánanta juachaxin tsjabaja ndotána.

22 Ko ndo Jesús juatingíexin ndo:

—Tuinxin rua nana ja a. Tintu é ni tsiken en tsjabaa kichuu na.

Ndo Jesús nichje e ndo chrinto ko inda ko ndabake e nda

(Mr. 4:35-41; Lc. 8:22-25)

23 Ndo Jesús kuixin in ndo ntábarco ko sen teyuu chrikao ndo kaxon kuixin in sen.

24 Kuania ichrin ko kuij naa chrinto tsango soji ko ndachaon tsango soji jamangitaon nda. Ko ndo Jesús jijua ndo.

25 Tjume e sen teyuu chrikao ndo Jesús ikjui sen juinchexingame e sen ndo ko ndachro sen:

—Nchána, tingijnaninta ixi xrojamangi ntábarco.

26 Ko je e ndo ndachro ndo:

—¿Sonda stexronkanta, ja anta? ¿Á chuntia inta ndo Dio?

Tjume e bingatjen ndo ko kuyakutee ndo chrinto ko ndachaon ko tuinxin ndabake e nda.

27 Ko sen rué e ndo ndastetsjeko sen ixi nge e kon en, ko ndachro sen:

—¿Ngixe e xi ji in?, ixi nichje e xa chrinto ko ndachaon ko titikaon nda.

Xi chónnda espíritue Xixron anxrée ste tjajna Gadara

(Mr. 5:1-20; Lc. 8:26-39)

28 Hora ndo Jesús kuiji ndo tuenxin ndachaon ti jii nunte Gadara, kuachrje kuij yuu xi ste ti no xrabaa ni tsiken en. Xi me e chónnda xa espíritue Xixron anxrée ko tsango chinga nche e xa, me e xronka chujni, méxin tatsinga i na ti jii cha o me e.

29 Ko xi me e kuaxi kuyako xa ko ndachro xa:

—¿Sonda nchexronkana, Jesús, Chjen en ndo Dio? ¿Á ó jui ia ixi sinchexronkana maski xrati a nchakon sinchéña ijie ngajinna?

30 Tjenka nti a jii kueya kuchinga steneña ba.

31 Ko espíritue Xixron anxrée kuinóatée ngajin ndo Jesús ko ndachro:

—Siá tsantsjexianna nti i, tintunana tsixin inna kuchinga ste yá a.

32 Ko ndachro ndo Jesús:

—Chao tixin ia ngaxin in kuchinga.

Tjume e espíritue Xixron anxrée kuachrjexin xi me e ko kuixin in ngaxin in kain kuchinga. Ko kain kuchinga chrinka ba ti jii yaso e, ko kuitsingangi ba inda, ko nti a kjun en ba inda.

33 Ko ni stetsje e kuchinga xronka na ko sabinga na sakjui na tjajna ko beki e na chujni nge e kon en kuchinga ko nge e kon en xi kuachónnda espíritue Xixron anxrée.

* 8:20 itjao cueva

³⁴ Ko kain ni tjanya me e ikjui na ngajin ndo Jesús ko hora bikon na ndo kuinóatée na ngajin ndo ixi satsjixin ndo tjanya nti a.

9

Ndo Jesús juinchexruen en ndo naa xi tsiken en tutée

(Mr. 2:1-12; Lc. 5:17-26)

¹ Tjume e ndo Jesús kuixin in ndo ntábarco ko kuatsinga ndo tuenxin ndalago ko kuiji ndo tjanée ndo.

² Ko nti a kaxin chujni bikao e na ndo naa xi tsiken en tutée jitsingata a xa naa kania. Ko ndo Jesús bikon ndo ixi nduaxin chujni me e chuntia* na ngajin ndo, méxin nichje e ndo xi ni e ko ndachro ndo:

—Chjan na, take é juaxruxin, ixi kain ti ndako a juinche e, jan an ndachrjan ó komé e jáa.

³ Tjume e kaxin ni nchekuen en chujni chijnie ndo Dio stendachro na ngaya aséen na: —Xi ji i nichjangí e xa ndo Dio.

⁴ Ko ndo Jesús no e ndo nge e stexraxaon xa ngaya aséen xa, me e ndachro ndo:

—¿Sonda ndako a xraxaonnta ngaya asáanta?

⁵ ¿Nge e ícha tangi a xrondachroni: “Ti ndako a juinche e ó juntamá a”, o xrondacheni xi ji i: “Tingatjen ko tjasían ko taja”?

⁶ Méxin, sintano anta ixi Chjen en ndo Dio, xjan jongí e xranchi chujni, tsango tituan an xjan ngata a nunte nti i ixi sinchemé e xjan ti ndako a juinche e chujni.

Tjume e ndache ndo xi ni e:

—Tingatjen, tama kani a ko satjia ndúya.

⁷ Ko xi tsiken en tutée bingatjen xa ko sakjui xa ndo a xa.

⁸ Ko kain ni ste nti a bikon na naa ixra tsango ijié kon en, xronka na ko kuaxi na kuajon na juasaya ngajin ndo Dio ixi tsango ijié juachaxin tsikajon ndo ngajin chujni ste ngata a nunte xasintajni.

Ndo Jesús kuiye e ndo ndo Mateo

(Mr. 2:13-17; Lc. 5:27-32)

⁹ Hora sakujxin ndo Jesús nti a, tjume e bikon ndo naa xi ndatin in Mateo jitayé e xa tomi ne e xi tituan an. Me e ndachro ndo Jesús:

—Ja a rua nana.

Ko je e xi Mateo bingatjen xa ko rué e xa ndo Jesús.

¹⁰ *Nchakon me e ndo Jesús ko sen teyuu chrikao ndo ikjui sen ndo a xi Mateo bijine sen, ko nti a ste ikaxin xi tayé e tomie xi tituan an ko ikaxin ni ndako a nche e.

¹¹ Ko kaxin xi fariseo bikon xa ndo Jesús ngakjen en chujni me e, méxin juanchangi e xa sen teyuu chrikao ndo Jesús, ko ndachro xa:

—¿Sonda ndo ntakuan annta nekao ndo ni xenge e na tomie xi tituan an ko ni ndako a nche e?

¹² Ko ndo Jesús kuin en ndo nge e stendachro na, me e juatingíexin ndo:

—Je a sen chao ste xrokonde e xi nchexruan; sen ni e, me e sen xrokonde e xa.

¹³ *Itjinta ko tanginta nge e jitaxin xroon chijnie ndo Dio ti ndachro: “Jan an tja on ixi ja anta tsikonóe enta chujni; je a je o tson inta iko ko xroche jnié ba, me e tsayá a.” Ja in ndachro chijnie ndo Dio. Ixi jan an jui a nti i ixi tsiya a chujni jian nche e. Na i. Jan an jui i ixi tsiya a chujni ndako a nche e ko je e na tsintu e na ti ndako a nche e na.

Kaxin chujni juanchangi na ixi ti nchekatse ñaoni jinta

(Mr. 2:18-22; Lc. 5:33-39)

* **9:2 chuntia** tener fe **9:10** Lc. 15:1, 2. **9:13** Mt. 12:7.

14 Naa nchakon konchjiñe e sen chrikao ndo Juan Bautista ko juanchangi e sen ndo Jesús:

—Sonda jan anna ko ni fariseo nanaó ntekatse ñao o ña jinta, ko sen chrjiku unta, ¿sonda na i?

15 Tjume e juatingíexin ndo Jesús:

—Sen tsikiye e xi tsute e ko sen ste kiée xa, ¿á chao xrotsjanga sen siá je e xa xrají xa ngajin sen? Ko tsii nchakon satsjikao ña xi tsute e, nchakon me e tsaxi sinchekatse ñao sen jinta.

16 'Xro an ngisen tjaon mantée ti tsikichje ko take e tu o manta natjúá ixi nchakon tsijma manta tsixe e ti natjúá ko ícha tsinchje ti ntaxi.

17 Ko jua i tsikia ndée tu uva ti nandá tsikoña ixran ngaya naa tjuanxran ntaxi ixi xroxruji xran ko tsinchje xran tjuanxran ntaxi ko íxro an tsonda tjuanxran ko kaxon tsintji xran. Méxin, xran natjúá xrokonda tsikia xran tjuanxran natjúá, jaña yui jian tsonda.

Ndo Jesús juinchexechón ndo naa ichjan ko juinchexruen en ndo naa nchri

(Mr. 5:21-43; Lc. 8:40-56)

18 Ko xrajinchja ndo Jesús, kuji naa xi tituen en sen tjajna judío bake exin ntatuchi in xa ngajin ndo ko kuinóatée xa:

—Nchrichajan na nandákua juexin kuen en nchrichan. Ko siá suixinnta itsjinta ko tsakée tjáanta ngata a nchrichan, je e nchrichan xroxechón nchrichan.

19 Ko ndo Jesús bingatjen ndo ko sabikao ndo sen kuarue e ndo.

20 Kaxon konchjiñe e naa nchri, ó teyuu nano níexin nchra jnié nchra ko imao konchjiñe e nchra tuenxin ndo Jesús ko itsé nchra ngande e manta jitsáa ndo.

21 Ixi je e nchra jaña tsixraxaon nchra:

—Maski ngande e manta jitsáa ndo Jesús xrotse, me e tsoxruanna.

22 Ndo Jesús tuinxin ngatjia ndo ko bikon ndo nchra, ko ndachro ndo:

—Chjan na, take é juaxruxin ja a ixi ti chuntiana me e juintaxruan an.

Ko je e nchra koxruen en nchra hora me e.

23 Ko hora kuiji ndo Jesús ndo a xi tituen en ni judío, bikon ndo ixi ó tsikiji ni tanoa ntaxro ixi itsji ña tsijabaa ña nchrichajan. Ko chujni ste nti a stetsjanga ña.

24 Me e ndachro ndo Jesús:

—Tachrjexinnta nti i ixi xjan ji i tsiken a xjan; je o jijua xjan.

Ko je e ña kuaxi juanoa ña ndo.

25 Ko hora kuachrje chujni ste nti a, ndo Jesús kuixin in ndo ko itsé ndo itjáa xjanchrhjan tsiken en ko je e xjan xechón xjan ko tuinxin bingatjen xjan.

26 Ko tsango ijié ixra juinche e ndo Jesús, nchijí nunte me e kono e ña.

Ndo Jesús juinchexruen en ndo yuu ni tikon a

27 Tjume e sajuixin ndo Jesús nti a ko yuu chujni tikon a jirué e ña ndo, ko ja in stetoyako ña:

—Tikonóa nananta, ja anta ti tsikachrjexinnta ndo David.

28 Ko kuixin in ndo Jesús naa nchia, tjume e konchjiñe e ni tikon a, ko ndo Jesús juanchangi e ndo ña ko ndachro ndo:

—¿Á titikaonnta ixi jan an nduaxin syntaxruan annta?

Ko je e ña juatingíexin ña:

—Jaán, Nchána, jan anna chuntiana ngajinnta.

29 Tjume e ndo Jesús bake e ndo itjáa ndo ngata a ikon ña ko ndachro ndo:

—Ja anta tsoxruan annta ixi chuntianta ngajin.

30 Ko tuinxin ó chao bikon ña. Ko ndo Jesús kuetuan an ndo:

—Xro an ngisen teki énta ji in.

³¹ Ko je e na kuachrjexón na nti a, tuinxin beki ena kain chujni kuetan na ko nchijí nunte me e kono e na nge e jian juinche e ndo Jesús.

Ndo Jesús juinchexruen en ndo naa xi nosin

³² Ko hora sakjui ni bakikon a, kaxin chujni bika o na naa xi nosin ko chóna xa espíritue Xixron anxrée.

³³ Ko hora kuantsje ndo espíritue Xixron anxrée, xi nosin chao kuaxi nichja xa. Ko kain chujni ste nti a xronka na ixi kain nge e tsango ijié kon en nti a ko ndachro na:

—Xro an nge e tsango ijié bakon en nchijí nunte Israel xranchi ti kon en jaí.

³⁴ *Ko ni fariseo stendachro na:

—Xi ji i tantsje xa espíritue Xixron anxrée ixi Xixron anxrée tsikajon xa juachaxin ngajin xi ji in.

Ndo Jesús bikonóe e ndo chujni

³⁵ *Ndo Jesús kuaji ndo itsjé tjajna, tjajna ijié ko tjajna nchínchín banchekuen en ndo chujni Israel ngaxin in ningue na, ko chronga ndo ti juachaxin jian bikaoxin ndo ti tetuan an ndo Dio. Ko juinchexruen en ndo kain chujni kuachóna ichin ko kain ti tiín na.

³⁶ *Ko bikon ndo ixi itsjé chujni kuiji nti a, ko tsango bikonóe e ndo na ixi ichrji na xranchi kutuchjon chóna i ngisen tsje e ba.

³⁷ *Tjume e ndache ndo sen teyuu chrikao ndo:

—Tsango itsjé nge e jii tsandáani, ko kueya i sen nche e ixra ji i.

³⁸ Méxin tjanche enta nchéé nunte ji i xroxruan an ndo itsjé sen nchexra, sen tsandáa.

10

Ndo Jesús xruan an ndo sen teyuu chrikao ndo

(Mr. 3:13-19; Lc. 6:12-16)

¹ Ndo Jesús kuiye e ndo sen teyuu chrikao ndo ko chjée ndo sen ijié juachaxin ixi tsantsje sen espíritue Xixron anxrée jitetuen en aséen chujni ko sinchexrjuen en sen kain ichin chóna chujni ko kain ti tiín na.

² Ja in kuin in ti teyuu sen kuinche e ndo Jesús, sen rué e ndo: sa ó ndo Simón, ndo juinchekin in sen Pedro, ko ndo kichuu ndo, ndo Andrés, kao ndo Jacobo ko ndo kichuu ndo ndatin in Juan, chjen en ndo Zebedeo.

³ Ko ndo Felipe, ndo Bartolomé, ndo Tomás, ndo Mateo, ndo kuaxenge e na ti bajanchia xi tetuan an, ko ndo Jacobo, chjen en ndo Alfeo, ko ndo Lebeo, ndo tsikake e na Tadeo.

⁴ Kaxon ndo Simón, ndo barué e ni cananista, ko xi Judas Iscariote, xi juinchejki ndo Jesús.

Ndo Jesús kuajon ndo ixra ngajin sen teyuu

(Mr. 6:7-13; Lc. 9:1-6)

⁵ Ndo Jesús xruan an ndo sen teyuu ko ja in ndache ndo sen:

—Tji anta ngajin chujni je a judío ko tixin anta tjajna Samaria.

⁶ Ja anta itjinta ngajin chujni bingachrue xranchi kutuchjon, sen tikinixin en tjajna Israel.

⁷ Itjinta ko nchekuen ennta chujni ko ja in nichje enta na: “Juachaxien ndo Dio jii ngajni ó tuinxin tsji.”

⁸ Sinchexruen ennta chujni nie ko ni chóna ichin lepra ko nchengatjennta ni tsiken en, tantsjenta espíritue Xixron anxrée ko ti juachaxin kuito annta kaxon nchikiton ennta chujni.

⁹ Tiku inta tomi chika oro, plata o cobre,

10 *ko nchakon tsaanta cha o tiku inta nge e sintenta, ko nge e taritsínta, tiku inta kaxon inaa kate xrochjanganta, ko tiku inta ntakuto ixi sen nche e ixrā tikinixin tsayé e sen ti sine sen.

11 *Nchakon tsjasonta naa tjajna ijié o naa tjajna nchíín, tjéenta naa ngisen nche e jian ko nti a tituan anta ndo a sen ti satsjixinjanta nti a.

12 Hora tsixin innta naa ndo a sen, ja in tájonnta juajna: “Juaxruxin xrochónnda ngisen jii nchia ji i.”

13 Ko sen ndo a siá nduaxin jian aséen sen tsayé e sen juaxruxin, ko siá na i, satiku unta juaxruxin me e.

14 *Ko siá xrojan ngisen chro a tsitu anta ndo a sen ko chro a sen tsin en sen nge e nichjanta, tachrjexinnta tjajna o nchia me e ko tontsjenganta tutáanta, jaña tsintji inche ixi jaña tsjakoxinnta ixi je e na chro a na kuayé e na nge e ichronta.

15 *Ko nduaxin ndachrjan ixi nchakon tsoñā ijié ti tsjexinja kain nge e, ni tjajna Sodoma ko Gomorra tanto a tangi tson en na xranchi ni tjajna tjaun a na kuin en na ti ndachronta.

Chujni xraningakon en sen titikaon ndo Cristo

16 *Jai jan an xroxruan annta xranchi kutuchjon ngakjen en kundanaxra. Méxin jaiko ko jian tsje enta xranchi kunchee ko kaxon nche enta xranchi kuntúá, nchejié a asáanta.

17 *Jian tsje enta ixi kaxin chujni xrotsénta na ko tsiku unta na ngajin ni tetuan an, ko ngaxin in ningue na, nti a tsikaonxinnta.

18 Ko tsikaannta na ngajin xi tetuan an ko ngajin xi rey ixi chuntianta ngajin. Ko nti a xronichjanta ixi titikaonninta, tsin en ni me e ko tsin en kaxon ni chúxin a ndo Dio.

19 Ko nchakon tsikaannta na ti ste xi tetuan an, ta inta juachjaon ixi nge e xron-dachronta o nge e xronichjanta ixi hora me e ndo Dio tsajon ndo nge e xronichjanta,

20 ixi je a ja anta xronichjanta; Espíritue Ndotáanta xronichjaxin ixi ja anta.

21 *Chujni kichuu tsajon na juachaxin ixi tsen en ni kichuu na ko ndotata tsajon ndo chjen en ndo ixi tsóña na xjan. Ko ichjan xraningakon en xjan sen ndo a xjan ko tsajon xjan sen ixi tsen en sen.

22 *Ko kaxon itsjé chujni xroningakon annta ixi chuntianinta. Ko kain sen tsokuaxi en kain ji i ti tsjexinja kain nge e jii ngata a xasintajni, sen me e tsayé e sen juachaxin tsechón sen kain nchakon.

23 Ko nchakon tsengixinnta na tjajna ji i, satinganta inaa tjajna. Ko nduaxin xrontatjunta xratsjexin a satsjinta ngujngu tjajna tikinixin en Israel, Chjen en ndo Dio, xjan jongí e xranchi chujni, xrokjan xjan tsii xjan nti i.

24 *Naa ndo tjako ícha tjintee ndo ixi sen nchekuen en ndo, ko kaxon sen chónnda ni nchexrā, ícha tetuan an je e sen ixi ni nchexrée sen.

25 *Ko ngisen jitangi xroxraxaon sen ixi je o tjintee sen xranchi ndo nchekuen en sen, ko ni nchexrā xroxraxaon na ixi je o tsituan an na xranchi nchée na. Ixi siá ndotata juinchekin in na ndo Xixron anxrée, sen rué e ndo ícha jaiko sinchekin in na sen jaña.

Ngisen chao xroxrakon ennta

(Lc. 12:2-9)

26 *Ja anta xro an ngisen xrakon enta, ixi kain ti jixratja xrokonda tsonoxin, ko kain ti jimá xrokonda tsono eni nge e me e.

27 Ko siá xrontatjunta xrojan nge e imao, ja anta séen nichjanta tsin en kain chujni. Ko siá tseki anta naa nge e ngaya ndatsjonnta, ja anta séen teki énta chujni.

²⁸ Xrakuen anta chujni tsóña ntau eni xixi ni me e jua i tsóña na aséenni. Ja anta xroxrakon ennta ngisen chao xroxruan an asáanta ko ntau anta ti jiche xro i.

²⁹ ¿Á tuchji a yuu kuxechjan xixi naa tomi nchíin? Ko maski tjinte a ba, ninaa ba ten a ba siá Ndotáanta Dio tsajon a Ndo juachaxin.

³⁰ Ko kaxon ndo Dio no e ndo ngijan in xrajaanta chondanta.

³¹ Méxin, ja anta xrakon anta xixi ja anta ícha tjinteenta xixi kain kuxe.

Sen tosue a xixi je e sen xrondachro sen xixi titikaon sen ndo Cristo

(Lc. 12:8-9)

³² Ko siá ja anta xrondachronta xixi titikaonninta tsin en chujni, kaxon jan an xrontatjan Ndotána jii ngajni xixi nduaxin me e.

³³ *Ko ngisen xrondache chujni xixi jan an chuxin ana sen, jan an kaxon xrontatjan Ndotána jii ngajni xixi jan an chuxin a sen.

Kondeexin ndo Jesús tse to na

(Lc. 12:51-53; 14:26-27)

³⁴ Xraxaon anta xixi jan an bikian juaxruxin ngata a nunte xasintajni. Na i. Jan an bikian ti tse to na.

³⁵ Kondanaxin jan an tsinteke to chujni; xi tse to xa ngajin ndotée xa, ko nchrichajan tse to nchrichan ngajin janée nchrichan, nchritakinda tse to nchra ngajin jachée nchra.

³⁶ Ko sen kichuunta, sen me e ícha xroningakon annta sen.

³⁷ Ko ngisen ícha tjue e ndotée o janée, kaxon sen tjue e ícha xitsi e o nchrichje en sen, sen me e tikinixien a sen xorrua na sen.

³⁸ *Ko ngisen tsama i ntacru, ko xorruana i sen, sen me e tikinixien a sen tsin in sen chujnina.

³⁹ *Ngisen tjaun a tsen en, sen me e tsen en sen, ko ngisen tsen en xixi jan an, ngajin sen me e jan an tsajon juachaxin tsechón sen kain nchakon.

Ngisen tsjacha tsayé e naa nge e tsango jian

(Mr. 9:41)

⁴⁰ *Ko nchakon xrojan ngisen xrondachro xixi chao tsatsinganta ngaxin in ndo a sen, sen me e xranchi xrokuayé e sen najan an, ko siá jan an tsayé ena sen kaxon Ndotána Dio, ndo xruan anna, tsayé e ndo sen.

⁴¹ Ngisen tsayé e ngaxin in ndo a naa sen nichja chijnie ndo Dio, sen me e tsayé e sen naa nge e tsango jian jii ngajni xranchi ti tsayé e sen nichja chijnie ndo Dio. Ko ngisen tsayé e naa chujni jian, chujni ndako nche e, sen me e kaxon tsayé e sen naa nge e jian jii ngajni xranchi ti tsayé e sen jian ko ndako nche e.

⁴² Ko ngisen tsajon nchíin ndakin tsi i naa chujni titikaonna, jan an xrotjá a sen me e naa nge e tsango tjintee tsayé e sen.

11

Sen bikao chijnie Ndo Juan Bautista

(Lc. 7:18-35)

¹ Ndo Jesús juexin ndache ndo sen teyuu chrikao ndo nge e sinche e sen, tjume e sakjui ndo kaxin tjajna bijako ndo chijnie ndo Dio, tjajna tikinixin en Israel.

² Ndo Juan Bautista jije e ndo ndo achjiso, kuin en ndo xixi ndo Cristo jinche xruen en ndo chujni ko jinche e ndo kaxin ixra ícha ijié, méxin ndo Juan xruan an ndo yuu sen chrikao ndo xixi tsjanchangí e sen ndo Jesús.

³ Tjume e sakjui sen bijanchiangí e sen ndo ko ndachro sen:

—¿Á suixinnta ngisen ti ndachro ndo Dio xroxruan an ndo ngajinna o xrochon anna inaa sen?

⁴ Ko ja in juatingíexin ndo Jesús:

—Itjinta ko ndachenta ndo Juan nge e bikonta ko nge e kuin ennta.

⁵ Teki énta ndo ixi sen tikon a, ó tikon sen, sen ntarengo ó ichrji sen ko sen kuachónnda ichin lepra ó koxruen en sen, sen ntakuxro, tin en sen; kaxon sen tsiken en xechón sen ko sen nóa stetin en sen chijnie ndo Dio.

⁶ Ndo Dio sintanchaonnta ndo ti nduaxin rua naninta ko tintuna ininta.

⁷ Hora sakjui sen xruan an ndo Juan, ndo Jesús kuaxi ndache ndo chujni ngisen ndo Juan ko ndachro ndo:

—¿Ngisen kuitsje enta ti jii ijna? ¿Á kuitsje enta naa xi jixrato o xranchi naa ntatji tsijato o chrinto?

⁸ Siá na i, ¿nge e kuitsje enta? ¿Á bikonta naa xi jitsáa jeoxón manta tjintee? Xraxaonnta ixi chujni stetsáa manta tjintee, ni me e je o ste na nchiando a xi rey.

⁹ ¿Ngisen kuitsje enta tjume e? ¿Á bikonta naa xi jichrónga chijnie ndo Dio? Jaán nduaxin, ko jan an ntatjunta ixi ndo Juan ícha tjintee ndo ixi sen kuachronga chijnie ndo Dio ó sa ó.

¹⁰ Ji i ndo xroxruan an ndo Dio xranchi jichrónga xroon chijnie ndo ó sa ó: Jan an xroxruan an naa ngisen tsitaon nti a tsikao sen chijnina, ko sinchenataonxin sen cha o.

¹¹ Ko jan an nduaxin ndachrjan ixi kain sen jongí e ko bake e ngataon nunte nti i, ni naa sen tjinte a sen xranchi tjintee ndo Juan tikitée chujni. Ko naa sen ícha tjinte a jii ti tetuan an ndo Dio, sen me e ícha tetuan an sen ixi ndo Juan.

¹² *Nchakon kuaxi nichja ndo Juan Bautista chijnie ndo Dio, nchakon me e ko ti jai, tsango tangi stetayé e sen chijnie ndo Dio ko ti tetuan an ndo, ko je o sen xronka i, sen me e tsjacha tsayé e juachaxien ndo Dio.

¹³ Itsjé sen kuanichja chijnie ndo Dio ko kaxon chijni tsiketuan an ndo Moisés ndachro kain ti xrokon en ti xrokuíjia ndo Juan.

¹⁴ *¿Á tsitikaonnta o na i?, ixi nchakon tsindachro ndo Dio ixi xroxruan an ndo ndo Elías, ji i jinichja ixi ndo Juan tikitée chujni.

¹⁵ Ko ngisen chónnda ndatsjon, sen me e chao tsin en sen ji i.

¹⁶ ¿Xranchi tsjako anta ti nche e chujni jichón jai? Nche e na xranchi nche e kaxin ichjan stesondaon ti jii ntaasin, ko ja in stetoyako xjan:

¹⁷ “Kuanoana ntaxro ko ja anta té anta. Itsjena sóen chujni tsiken en ko ja anta tsjanga inta.”

¹⁸ Ixi kuij ndo Juan juine a ndo ko kui a ndo ixi juinchekatsé ñao ndo jinta, ko ja anta ndachronta ixi espíritue Xixron anxrée chónnda ndo.

¹⁹ Ko jui i jan an, Chjen en ndo Dio, xjan jongí e xranchi chujni, juiné ko kui i, ko ndachronta ixi tsango itsjé iné ko tsango yee ti i ko tjento ni tjáka tomie xi tetuan an ko ni ndako a nche e. Ko jian xraxaonnta ixi ti ixra jian ton en me e tjako ixi ndo Dio tsango no e ndo.

Tsango tangi tson en tjajna titikaon a
(Lc. 10:13-15)

²⁰ Tjume e ndo Jesús kuaxi kuyakutee ndo chujni ste nti a ixi tjajna me e juinchexruen en ndo kueya chujni ko ikaxin ixra ijié juinche e ndo ko chujni me e kuitikaon a na ko kuindoxin a na ti ndako a kuanche e na.

²¹ Tjume e ndachro ndo:

—¡Ja anta ti stenta tjajna Corazín ko ja anta ti stenta tjajna Betsaida, tsango tangi tson annta!, ixi siá xrokoxruen en kain ni ni e ko xrokon en kain ti jian ngajin tjajna Tiro

ko tjanya Sidón xranchi ti kon en nti i, je e ni me e xrokuindoxin na ti ndako a kuanche e na ko xrokuitsáa na manta tiie ko xrokuintjítee na ntesoki i jaa na ixi jaña xrojuako na nduaxin tjaun na ísinche a na ti ndako a.

²² Méxin nduaxin xrontatjunta ixi nchakon tsoña ijie, ni tjanya Tiro ko ni tjanya Sidón, ícha tangi a tson en na xranchi ja anta.

²³ Ko ja anta chujni tjanya Capernaum, á xraxaonnta ixi ti jii ngajni tsajjinnta. Na i, ja anta xroxingajinnta ti ste ni tsiken en, ixi siá tjanya Sodoma xrokoxruen en chujni ko xrokon en kain ti ixra ijié kon en ngajin tjanánta, tjanya me e xraxrobake e tjanya ngata a nunte jai.

²⁴ *Méxin nchakon tsjexin kain nge e, ndo Dio sinchéña ndo ijie ko ícha tangi tson annta ja anta ixi chujni tjanya Sodoma.

Xrokuiinta ngajin, me e tsjoka anta

(Lc. 10:21-22)

²⁵ Hora me e ndo Jesús nichja ndo ngajin Ndotée ndo ko ja in ndachro ndo:

—Ndotána, tjá anta juasiana, Nchée ngajni ko nunte xasintajni, ixi ja anta kuemé enta chujni tsango no e ko ni tsango tsikangi xroon, ko juinche kuen kain ji i ngajin sen nchejié a aséen.

²⁶ Ndotána, jaña kon en ixi ja anta jaña fiaonnta.

²⁷ *Ko ndache ndo ni ste nti a:

—Kain nge e chjána Ndotána ko je o je e ndo chuxinna ndo jan an, Chjen en ndo, ko kaxon xro an ngisen chúxin je e ndo, je o Chjen en ndo, ko jan an, Chjen en ndo, nichja a chujni ixi jaña je e na tsichuxin na Ndotána.

²⁸ Ja anta ti richondanta juachjaon ko konchrjenta, Xrokuiinta ngajin jan an ko jan an tsajon juaxruxin tsjoka anta.

²⁹ Titikaonnta ti ndachrjan ko toña anta ko nchejié a asáanta xranchi jan an ntajie a aséenna, me e jaña chao juaxruxin tsinteenta.

³⁰ Ko ti ndachrjan sinche enta tangi a ko ixra tajon sinche enta, ixra me e tangi a xra.

12

Sen chrjikao ndo Jesús kuantsjengi sen trigo nchakon tjoké e na

(Mr. 2:23-28; Lc. 6:1-5)

¹ Naa nchakon tjoké e sen judío, ndo Jesús ko sen teyuu chrikao ndo kuatsinga sen ti jii naa nunte tsikinga noatrigo; sen teyuu chrikao ndo kuen en sen jinta, méxin kuaxi sen kuantsjengi sen trigo ko juine sen noa.

² Ko ni fariseo bikon na nge e stenche e sen teyuu chrikao ndo Jesús ko ndachro na:

—¿Á ritsje e nge e stenche e ni chrjiko a ixi jai nchakon tjoké eni?, jua i sinche e ni jaña.

³ Ko je e ndo juatingéxin ndo:

—¿Á noa inta nge e jitaxin xroon ti juinche e ndo rey David ko sen chrikao ndo, hora kuen en sen jinta?

⁴ Kuixin in sen ndo a ndo Dio ko juine sen nutja tikinixin en ndo, ko je e ndo David ko sen rué e ndo, je e sen tikinixin a sen xrojuine sen nutja me e; je o sen taana.

⁵ Kaxon, ¿á bikon anta xroon tsikjin ndo Moisés ti ndachro ixi ndotaana chao nche e ndo ixra ngaxin in ni ngo nchakon tjoké eni ko xro an ijie kuama ndotaana?

⁶ Ko nduaxin xrontatjunta ixi ngisen jinichja anta jai ícha tetuan an ixi ni ngo.

⁷ *Ko ja anta tienxin anta ti ndachro xroon chijnie ndo Dio: “Jan an ndo Dio tjaun a tson inta iko ko tsjaakanta jnie ba tsayá a jan an. Jan an tja on tsingijnanta ko xrotjue e kichuunta”, siá xrokuienxinnta chijni ji i, xrojuankata inta ijie ngata a chujni xro an nge e sínká.

⁸ Ko Chjen en ndo Dio, xjan jongí e xranchi chujni, chónða xjan ijié juachaxin ngata a nchakon tjoké eni —ichro ndo Jesús.

Ndo Jesús juinchexruen en ndo naa xi tsixema itja
(Mr. 3:1-6; Lc. 6:6-11)

⁹ Ndo Jesús sakjuixin ndo nti a ko tjume e kuixin in ndo naa ningue ni judío.

¹⁰ Ko nti a jii naa xi tsixema naa itja ko nti a kaxon ste kaxin xi fariseo ko tjaun xa tsjankata a xa ijié ngajin ndo Jesús, méxin juanchangi e xa ndo:

—¿Á chao tsoxrue en naa sen ni e nchakon tjoké eni?

¹¹ *Ko ndo Jesús ndachro ndo:

—¿Á xrojan ja anta chondanta naa kutuchjon ko iko me e xrokuitsingaya ba naa tuye nchakon tjoké eni, á xrokjui anta ko xrokuantsjenta ba?

¹² Naa chujni ícha tjintee ixi naa kutuchjon. Méxin, chao sinche eni ti jian maski nchakon tjoké eni.

¹³ Tjume e ndache ndo xi ni e:

—Tinxe tjáa.

Ko je e xa kuinxe itja xa ko itja xi me e tuinxin koxruen en.

¹⁴ Tjume e xi fariseo kuachrjexin xa ni ngo ko stetoñao xa ko stexraxaon xa xranchi sinche e xa ixi tsóña xa ndo Jesús.

Ndo Jesús, ndo tsikinche e ndo Dio

¹⁵ Ndo Jesús kono e ndo ixi nge e stexraxaon xi fariseo, me e sakjuixin ndo nti a ko kueya chujni rué e ndo ko juinchexruen en ndo kain chujni ni e,

¹⁶ ko kuetuen en ndo chujni rué e ndo ixi xrochronga i na ngisen je e ndo.

¹⁷ Ja in kon en ixi ó sée tsichronga ndo Isaías chijnie ndo Dio:

¹⁸ Ndo kuincha a, nti i jii ndo ngajinnta, ndo sinche e ixra ngajin, jan an tsango tjua a ndo ko je e ndo tsango nchexruxin en ndo aséenna, ko jan an tsakée espíritu na ngata a ndo

ixi je e ndo xrochronga ndo chijnina ngajin kain tjajna jii ngata a nunte xasintajni, ko chijnina me e tsóñaxin ijié ngata a kain chujni tsitikaon ana.

¹⁹ Tsjakaxin a ndo ko xro an ngisen tsuyaku e ndo, méxin tsien a na téé ndo ngaya cha o.

²⁰ Ko ísincheníe a ndo sen ó tsikoni e, ko jua i naatsóñaxón ndo sen ó jite en.

Na i.

Je e ndo sinchesoji ndo aséen sen soji a

ko je e ndo sinche e ndo ixra tsija nchakon je e ndo sinchéña ndo ijié.

²¹ Ko kain chujni nunte xasintajni xrochuntia na ngajin ndo.

Jaña tsichronga ndo Dio ó seno.

Ni fariseo tjangi e na ndo Jesús

(Mr. 3:19-30; Lc. 11:14-23; 12:10)

²² Kaxin chujni bika o na naa xi ni e ixi ndo Jesús sinchexrjuen en ndo xa. Xi me e tikon a xa ko nichja i xa ixi chónða xa espíritu Xixron anxrée. Ko ndo Jesús juinchexruen en ndo xa ko tuinxin nichja xa ko bikon xa.

²³ Ko kain chujni ste nti a xronka na ko tjanchangí e kichuu na:

—¿Á je a ji i ndo Jesús, ndo xroxruan an ndo Dio tsikachrjenixin ndo David?

²⁴ *Ko kuin en xi fariseo ixi jaña stenichja na, méxin ndachro xa:

—Xi Jesús ji i tantsje xa espíritu ña i ixi chónða xa juachaxien Xixron anxrée, xi tsango ña i, xi tetuen en kain espíritu me e.

²⁵ Ko je e ndo no e ndo nge e stexraxaon xa, me e ndachro ndo:

—Xro an nación jii, ixi je o na tsinteketoka o kichuu na, ko siá jaña sinche e na, nación me e tsjexin. Ko naa tjajna ti tinteketoka o kichuu na, kaxon tuinxin ni me e xrochjeke e na ko tjajna me e tsitjáña tjajna. Kaxon naa ndo tata ko chjen en ndo, siá je o sen tsinteketoka o kichuu sen, sen nchia me e xrochjeke e sen ko tsitjáña sen.

²⁶ Ko siá Xixron anxrée je o xa tsantsje xa naa espíritu tikinixin en xa jixin in ngaxin in naa chujni, je o xa tsonchjejin xa ti tituan an xa.

²⁷ Ko ja anta ndachronta ixi jan an tantsje espíritu tikinixin en Xixron anxrée ixi je e xa chjana xa juachaxin. Siá nduaxin me e, ¿ngisen tajon juachaxin ngajin ni rua anta ixi je e na tantsje na kaxon espíritue Xixron anxrée? Ni rua anta me e tjakoxin na ixi ja anta noa inta nge e nichjanta.

²⁸ Ko siá jan an ixi espíritue ndo Dio tantsjexin espíritu tikinixin en Xixron anxrée chónða chujni, me e xrondachro ixi juachaxien ndo Dio ó kujj ti ste ja anta.

²⁹ Xranchi xrojan chujni tee tjaun tixin in ndo a naa xi tsango soji ko tjaun tsee nge e jii ndo a xi me e, ¿á je a sa ó xrokonda tsitee xi ndo a ko tjume e tsantsje kain nge e jii ngaxin in ndo a xa?

³⁰ *Ngisen titikaon a najan an, sen me e ningakonna sen, ko ngisen tingijna i ixra nta a, sen me e tingakon en sen.

³¹ Méxin jan an ntatjunta chao tsumé e kain ti ndako a ko ti nichjangí chujni ngajin ndo Dio. Ko ngisen xronichjangí e Espíritue ndo Dio, sen me e jua i tsumé e ti ndako a nichja sen.

³² *Ko siá xrojan ngisen xronichjangí e Chjen en ndo Dio, xjan jongí e xranchi chujni, tsumé e kain ti nichjangí na ko ti ndako a juinche e na. Ko ngisen xronichjangí e Espíritue ndo Dio, nai a tsumé e ti ndako a nichja na.

*Ntaq tajon tu jian ko ntaq tajon tu xro an xrée
(Lc. 6:43-45)*

³³ *Naa ntaq jian tajon ntaq itu jian ko naa ntaq xro an xrée kaxon xro an xrée tu tajon ntaq. Méxin, naa ntaq tajon itu, itu tsichuxixinni ntaq.

³⁴ *Ja anta tsikachrjenixinnta kunchee, ¿méxin, xranchi xronichjanta ti jian siá ja anta je a jiannta? Ixi chujni jian, nichja ti jian ko chujni ndako a nche e, nichja ti ndako a. Ixi ti nichja ro ani me e ti xin aséenni.

³⁵ Naa chujni jian nichja nge e ti jian ixi jian aséen. Ko chujni jian i, ti ndako a nichja na, ixi ti ndako a jiá aséen na.

³⁶ Ko jan an ntatjunta ixi tsji nchakon tsjexin kain nge e, nchakon me e sinchéña ndo Dio ijię ngajin chujni tsinichja nge e ndako a.

³⁷ Ndo Dio sinchéña ndo ijię ngajin ngujngu chujni, ngisen tsinichja jian, sen me e tsumé e ti ndako a juinche e sen ko sen ndako a tsinichja, sen me e tangi tson en sen.

*Ni ndako a nche e, tjaun na ixi ndo Jesús tsjako ndo naa ixra ijié
(Mr. 8:12; Lc. 11:29-32)*

³⁸ *Tjume e kaxin xi fariseo ko ni tjako chijnie ndo Dio ndache na ndo Jesús:

—Ja anta ti tjakonta, tja onna tsjako naninta naa nge e xrochronga á nduaxin ndo Dio xruan annta.

³⁹ *Ko je e ndo Jesús juatingíexin ndo:

—Ja anta chujni ña i, ti chuntia inta ngajin ndo Dio, tjanchianta tsjako naa nge e xrochronga á nduaxin ndo Dio xruan anna ndo, ko jan an je o xrontatjunta nge e kon en ndo Jonás, ndo kuachronga chijnie ndo Dio ó sa ó.

⁴⁰ Ndo Jonás bake e ndo ngaya tse e naa kuballena níi nchakon ko níi tiie, jaña kaxon Chjen en ndo Dio, xjan jongí e xranchi chujni, xrokonda xroxraaba xjan níi nchakon ko níi tiie.

⁴¹ Nchakon tsjexin kain nge e ko tsoña ijie, ni tjajna Nínive tsingatjen na ko tsjangi anta na ko ndo Dio tsjankata anta ndo ijie, ixi ni me e, ni tjajna Nínive, tuinxin kuindoxin na ti ndako a kuanche e na nchakon kuin en na chijnie ndo Dio tsichronga ndo Jonás. Ko ja anta tin ennta chijnina ko tindoxin anta ti ndako a nche enta ko jan an ícha tjinteena ixi ndo Jonás.

⁴² Kaxon nchri reina tsiki xin no Níjin, naa tjajna tsango ikjín, kuij nchra kuin en nchra chijni kuanichja ndo Salomón, nchri me e tsjankata anta nchra ijie nchakon tsoña ijie, ixi ja anta titikaon anta ti nichja maski jan an ícha tjinteena ixi ndo Salomón.

Espíritue Xixron anxrée ikjan

(Lc. 11:24-26)

⁴³ 'Nchakon tachrxjexin naa chujni naa espíritue Xixron anxrée ko ichrji ti jii nunte xema ko titja i inaa chujni no tixin in ixi tsjoké e, me e ndachro:

⁴⁴ “Cháña xrokjanna nía ti kuachrxjexin ko tsixin in nti a íjngo.” Ko ti ikjan espíritu ña i nchia me e, xro an ngisen jixin in nchia ko tjúá nchia.

⁴⁵ Tjume e itji espíritu ña i ko tikao íjngo yaato espíritu nche e ixra ngajin Xixron anxrée ícha ña i. Ko kain espíritu ña i tixin in ngaxin in chujni me e, ko chujni me e ícha chjinga tson en ixi ti nchakon kuachóna naakua espíritu ña i. Jaña tson en kain chujni ndako a nche e jai.

Janée ndo Jesús ko sen kichuu ndo

(Mr. 3:31-35; Lc. 8:19-21)

⁴⁶ Ko ndo Jesús xrajnichja ndo ngajin chujni ste nti a, janée ndo ko sen kichuu ndo kuiji sen ti jii ndo ko stechón en sen nduja ixi tjaun sen xronichje e sen ndo.

⁴⁷ Ko naa sen jii nti a ndache sen ndo Jesús:

—Janáanta ko sen kichuunta stechón en sen nduja ixi tjaun sen xronichja anta sen.

⁴⁸ Ko je e ndo Jesús ndachro ndo:

—¿Ngisen nduaxin janána ko sen kichian?

⁴⁹ Tjume e juakoxin itja ndo ngajin sen teyuu chrikao ndo ko ndachro ndo:

—Sen ji i me e janána ko sen kichian,

⁵⁰ ixi sen nche e nge e tjaun Ndotána jii ngajní, sen me e janána ko sen kichian.

13

Ndo Jesús juakoxin ndo chijni tinga ngaya chjaka

(Mr. 4:1-9; Lc. 8:4-8)

¹ Nchakon me e ndo Jesús kuachrxjexin ndo nchia jii ndo, tjume e sakjui ndo ngande e ndachaon* ko nti a bake e ndo nunte ixi sinchekuen en ndo chujni.

² *Ko tsango kueya chujni konchjiñe e ixi tjaun na tsin en na nge e xronichja ndo. Méxin ndo Jesús kuajin in ndo naa ntábarco ko nti a bake e ndo nunte ko chujni kuiji na ti jii nchese ngande e inda.

³ Ko kueya chijni beki e ndo na ixi jaña tsienxin chujni nge e xronachro ti nichja ndo, Ko kuaxi beki ndo naa chijni ko ndachro ndo:

—Sakjui naa xi bikenga xa,

⁴ ko hora jitenga xa, kaxin noatrigo kuintjí noa ngatja cha o ko kuij kuxe juine ba noa.

⁵ Ko kaxin noa kuintjí ngakjen en ixro ti ko a itsjé inche, ko noa me e tuinxin kuachrje no ixi tjín a inche.

⁶ Ko hora kuachrje chjiixro, katrigo me e xe nte ka ko xema ka ixi yasoe a jii nue e ka.

* **13:1 ndachaon** mar **13:2** Lc. 5:1-3.

⁷ Ko kaxin noa kuintj́ ngakjen en nt̄acha a ko hora kuangi no, nt̄acha a me e kuintue a nt̄acha kuangi no.

⁸ Ko kaxin noa kuintj́ noa ti jii inche jian, méxin tsango jian kóña noa. Ko kaxin katrigo kuachón̄da naa ciento noa, ko kaxin katrigo kuachón̄da ní ti ikán† noa, ko kaxin katrigo kuachón̄da ikánte noa.

⁹ Sen chao tin en, xrokonda tsin en sen ji i.

Sonda ndo Jesús nichjaxin ndo chijni

(Mr. 4:10-12; Lc. 8:9-10)

¹⁰ Tjume e sen teyuu chrikao ndo Jesús konchjiñe e sen ngajin ndo ko juanchangi e sen ndo:

—¿Sonda je o chijni tjakoexinnta chujni?

¹¹ Ko je e ndo Jesús ja in juatingíexin ndo:

—Jan an beki anta kain chijni jimá kondee ti tetuan an ndo Dio, ko ngajin ni kaxin xrontatjan i na.

¹² *Ngisen no e ícha jian chijni ne e ndo Dio, ndo Dio ícha sinchekuen en ndo sen. Ko ni tjaun a tsienxin chijni ti tetuan an ndo Dio, ndo Dio sinchemé e ndo ti nchion no e na.

¹³ Méxin jan an ntakuan ana ixi chijni, ixi ni tikon, jua i tsichuxin na ti tikon na, ko ni tin en, ti tin en na, tsienxin a na.

¹⁴ Jaña tson en ixi nge e tsichronga ndo Isaías, ndo kuanichja chijnie ndo Dio ó sa ó: Chujni ji in maski ícha tsin en na,

je e na tsienxin a na,

ko maski stetsje e na,

je e na tsikon a na.

¹⁵ Ixi aséen chujni ji i tsango tsikoncha

ko ndatsjon na jije e

ko steje e ikon na ixi jaña jua i tsikon na

ko jua i tsin en na,

méxin, jua i sintama a ti ndako a nche e na

ko jua i sintaxruan an na.

¹⁶ *Tjume e ndachro ndo Jesús:

—Ja anta ti rua naninta, tsango juaxruxin tinteenta ixi ndo Dio kuajon ndo juachaxin chao tikonnta ko tienxinnta ti nichja.

¹⁷ Ko nduaxin xrontatjunta ixi itsjé sen kuachronga chijnie ndo Dio ko ikaxin chujni tjúa aséen, xrojueña sen xrobikon sen ti tikon ja anta, ko bikon a sen ko kuien a sen.

Chronga ndo Jesús xranchi xrondachro ti chijni

(Mr. 4:13-20; Lc. 8:11-15)

¹⁸ 'Jai tin ennta nge e xrondachro ti xi ikjui bikenga chjaka.

¹⁹ Ngisen tin en chijni chronga xranchi tetuan an ndo Dio ko tienxin a sen ti kuin en sen, me e tji Xixron anxrée nchetjáñajin xa sen, méxin tjáñe e sen ti kuin en sen, me e xrondachro ti noa kuintj́ ngande e cha o.

²⁰ Ko noa kuitsinga ti jii ixro me e xrondachro ngisen kuin en chijni chronga xranchi tetuan an ndo Dio ko sen me e juinche e sen juaxruxin ti kuin en sen.

²¹ Ko kuienxin a sen ndako nge e xrondachro ti chijnie ndo Dio, méxin juaxruxin kuachón̄da sen tuinxin juexin ixi kuij juachjaon kondeexin ti kuitikaon sen ndo Dio, méxin kuachrjendáa sen.

²² Ko noa kuitsinga ti jii nt̄acha a me e xrondachro ngisen tin en chijnie ndo Dio ko tindoxin a sen ti ndako a nche e sen ko ícha nche e sen juaxruxin tomi ko kain ti tjintee jii ngata a nunte. Me e nche a sen ti jian.

† 13:8 ikán veinte 13:12 Mt. 25:29; Mr. 4:25; Lc. 8:18; 19:26. 13:16 Lc. 10:23, 24.

²³ Ko noa kuitsinga ngata a inche jian me e xrondachro ngisen tin en chijnie ndo Dio ko tienxin sen ko taxi nche e sen ti tetuan an ndo Dio. Sen me e nche e sen xranchi kaxin katrigo tajon ka ngujngu ciento noa ko kaxin ka tajon ka níikán noa ko ikaxin ka tajon ikánte noa.

Ndo Jesús juakoxin ndo chijnie ka ña i kuangika o ka noa trigo

²⁴ Tjume e ndo Jesús juakoxin ndo inaa chijni ndachro ja in:

—Ti tetuan an ndo Dio ton en xranchi naa ngisen kuenga jian nunte e.

²⁵ Ko hora juexin nchakon, kain sen sakuíntejua sen ko naa xi ningakon en sen, ikjui xa bikenga xa ngakjen en trigo naa tsee kaña i ndatin in cizaña, ko sakjui xa.

²⁶ Ko nchakon kuachrje ka trigo ko kuaxi kuajon ka tién ka, sen nchexra bikon sen ixi kaxon ika ña i tsikangi ka.

²⁷ Ko kuichronga sen ngajin nchée sen ko ndachro sen: “Nchána siá ja anta kuenganta noa trigo, noa jian, ¿ti no tsiki xin ika ña i tsikangika o noa jian?”

²⁸ Ko nchée sen juatingíexin: “Naa xi ningakonna tsijinche e ña.” Tjume e sen nchexra ndachro sen: “¿Á tjaunnta itsjina tsikantsjengina kaña i?”

²⁹ Ko ndachro nchée sen: “Na i, ixi hora tsantsjengínta ka ña i, ba tsantsjengínta ka trigo ixi naxraje o tsje e ka.

³⁰ Nchakon xroxero noa, me e tsichuxinni noa trigo ko kaña i. Tintu enta ka tsangika o kichuu ka tsija nchakon xroxero tsee. Me e tsetuan an sen nchexra sa ó tsjejo sen kaña i, ko tsjasintja sen kichuu ka ko tsjaaka sen ka ixi xro i, ko tjume e xroxraka noatrigo ko itsji noa ti tsasin inni noa.”

Ndo Jesús juakoxin ndo chijnie tsee mostaza

(Mr. 4:30-32; Lc. 13:18-19)

³¹ Ndo Jesús juakoxin ndo naa chijni ndachro ja in:

—Nchijíi ti tetuan an ndo Dio ton en xranchi naa tsee ntaa mostaza tsikenga naa xi ngata a nunte e xa.

³² Ko tsee me e tsango nchíin tsee ko nchakon tsangi ntaa mostaza, ntaa me e ntaa ícha ijíe ixi ikaxin ntaa ko kuxe nchéña ba kakée ba ngata a chaan ntaa.

Ndo Jesús juako ndo chijnie ti nchetja in chu u

(Lc. 13:20-21)

³³ Ndo Jesús juakoxin ndo inaa chijni:

—Nchijíi ti tetuan an ndo Dio ton en xranchi naa nchri itsé nchra nchíin chu u nchetja in itsjé chue nutja, ko nchion chu u me e nchetsjé chue nutja.

Ndo Jesús juinche e ndo ti tsindachro naa ndo kuachronga chijnie ndo Dio ó sa ó

(Mr. 4:33-34)

³⁴ Ndo Jesús juincheken en ndo chujni itsjé nge e ixi bakeki e ndo na ixi chijni; ko je o chijni banchekuenxin ndo na.

³⁵ Jaña ndo Jesús juinche e ndo nge e ndachro naa sen tsichronga chijnie Dio ó sa ó: Jan an xronichja a chujni ixi chijni ko tseki a na nge e ti jimá kuachóna ndo Dio, ti tsixrangíxixion juinchéña ndo nunte xasintajni.

Kaña i ko katrigo

³⁶ Juexin nichje e ndo Jesús chujni ste nti a, tjume e kuixin in ndo nchia, ko konchjiñe e sen teyuu chrikao ndo ko ndachro sen:

—Ndachijininta nge e xrondachro ti ika ña i bangika o ka trigo.

³⁷ Ko ndo Jesús ndachro ndo:

—Sen bengá noatrigo me e Chjen en ndo Dio, xjan jongí e xranchi chujni.

³⁸ Ko chjaka xrondachro chujni ste ngata a nunte xasintajni. Ko noatje xrondachro chujni kuayé e juachaxin tsin in chjen en ndo Dio ko tsitikaon ti tetuan an je e ndo. Ko ika ña i me e chujni nche e xrée Xixron anxrée.

³⁹ Ko xi toñaao, xi kuenga kaña i me e Xixron anxrée. Ko ti tsandáani me e xrondachro nchakon tsoña kain ijié ko tsjexin kain nge e. Ko sen tsandáa me e sen ángel ne e ndo Dio.

⁴⁰ Ko kaxon ti xroxexo kaña i ko tsixintja kichuu ka ko xroche ka, me e xrondachro ti tsoña ijié nchakon tsjexin kain nge e.

⁴¹ Ko Chjen en ndo Dio, xjan jongí e xranchi chujni, tsetuen en xjan sen ángel ne e xjan itsji sen nchijí ti tetuan an ndo Dio, ko tsejo sen chujni ndako a nche e ko ni nchekateya ikaxin chujni sinche e ti ndako a.

⁴² Ko sen ángel me e tsjankaya sen chujni ña i ti jii xro i xranchi naa itja; nti a xrotsjanga chujni me e ko tse to neno na.

⁴³ Ko kain sen juinche e ti jian, sen me e tsongixin sen xranchi chjiixro ti tetuan an ndo Dio. Méxin siá chondanta ndatsjonnta, jian tienxinnta ji in.

Tomi jimá

⁴⁴ 'Ti jii no tetuanxin ndo Dio ton en xranchi tomi tsango tjintee jixrabaa. Ko naa ngisen kuitja tomi me e ko sen me e íjngo juabaa sen tomi. Ko tsango ché e sen, méxin sakjui sen kuinchekji sen kain ti chóna sen ko tomi tsjejo sen me e tse naxin sen nunte ti no jixrabaa tomi kuitja sen.

Naa ixro tsango tjintee.

⁴⁵ Kaxon ndo Jesús ndachro ndo:

—Ti jii ti tetuanxin Dio kaxon ton en xranchi naa xi tachríi ixro tsango chaxro.

⁴⁶ Ko nchakon kuitja xa naa ixro tsango tjintee, sakjui xa kuinchekji xa kain ti nge e tjintee kuachóna xa ko ikjan xa ko kue na xa ixro me e.

Ndo Jesús juakoxin ndo ixi naa nocha a tséxin na kucheé

⁴⁷ Tjume e ndachro ndo Jesús:

—Ti jii ti tetuan an ndo Dio jii xranchi naa nocha a, ko sen itsé kucheé tjanka ngi sen nocha a me e ixi xrotsé sen ngixe i kucheé jingi inda.

⁴⁸ Ko hora kaon nocha a, tantsjengi sen nocha a ngande e inda ko nti a tsinche e sen kucheé jian ko tenga sen ba ngaya ntaxra. Ko kucheé xro an xrée tjanka sen ba.

⁴⁹ Jaña tson en nchakon tsjexin kain nge e ngata a nunte xasintajni. Itsji sen ángel tsinche e sen chujni jian ko chujni ndako a nche e.

⁵⁰ Ko tsjánkaxin in sen ni ndako a nche e ti jii xro i nai a tanga ko nti a xrotsjanga na ko tse to neno na ixi tsango ijié juachjaon jii nti a.

Nge e natjúá ko nge e ó ntaxi

⁵¹ Ndo Jesús juanchangi ndo:

—¿Á tienxinnta kain ti rintakuan annta?

Ko je e sen juatingíexin sen:

—Jaán, Nchána, tianxinna.

⁵² Ko ndachro ndo:

—Kain sen tjako ley ne e ndo Dio ko taxi tienxin sen nge e xrondachro ti juachaxin tetuan an ndo Dio, sen me e nche e sen xranchi naa xi chóna itsjé nge e ngaxin in naa nchia ijié, ko nti a tantsjexin xa ti natjúá ko ti ntaxi.

Ndo Jesús ikjui ndo tjajna Nazaret

(Mr. 6:1-6; Lc. 4:16-30)

⁵³ Ko hora juexin juincheken en ndo na kaxin chijni, ndo Jesús sakjuixin ndo nti a,

⁵⁴ ko kuiji ndo tjajnéé ndo, tjajna Nazaret. Kuaxi ndo juincheken en ndo chujni ngaxin in ningue ni Israel. Ko chujni me e xronka na ko stendachro na:

—Xi ji i, ¿ti no tsikitjaxin xa kain ti nichja xa ko xranchi nche e xa kain ixra ijié?

⁵⁵ Ko ikaxin na stendachro na:

—¿Á je a ji i chjen en ndo José, ndo tame e ntaa, ko janée xa jan María ko xi kichuu xa, xi Santiago, José, Simón ko xi Judas?

⁵⁶ Ko tjajna nti i ste kaxin nchri kichuu xa. ¿Xranchi no e xa kain ji in ko xranchi nche e xa kain ti ixra ijié?

⁵⁷ *Ko ninaa ni ste nti a kuitikaon a na nge e juako ndo Jesús. Méxin ja in ndachro ndo:

—Kain tjajna chujni tajon na juasie na ngajin naa ndo chronga chijnie ndo Dio. Ko ni tajnée ndo, na i, ko kaxon ni ndo a ndo tjaun a na tajon na juasie na.

⁵⁸ Ko ixi titikaon a ni tajnée ndo, méxin tsjé a chujni juinchexruen en ndo nti a.

14

Xranchi kuen en ndo Juan bikitée chujni

(Mr. 6:14-29; Lc. 9:7-9)

¹ Nchakon me e xi ndatin in Herodes Antipas, xi tituen en nunte Galilea, kuin en xa ti kuanichja chujni nge e jian kuanche e ndo Jesús.

² Ko naa nchakon ndache xa ni nchexrée xa:

—Xi Jesús me e xi Juan Bautista ko jai tsixechón xa. Méxin chóna xa ijié juachaxin nchexruen en xa chujni.

³ *Xi Herodes tsixraxin in xa ndo Juan, ngaxin in ndo a chjiso ko nti a tsikintee xa ndo ixi chika cadena kondeexin nchri Herodías, nchrinchri e xi Felipe, xi kichuu xi Herodes

⁴ ixi tsindache ndo xa:

—Ndako a juinche e ja a ixi kuantsje e xi kichuu, Felipe, nchrinchri e xa, nchri Herodías, ko kuta a nchra.

⁵ Xi Herodes tjaun xa naaxrokóñaxón xa ndo Juan, ko jua i ixi kuaxrakon en xa chujni ixi kain ni tjajna me e titikaon na ixi je e ndo Juan me e naa ngisen nduaxin tjako chijnie ndo Dio.

⁶ Ko nchakon kuitja xa nano, juinchéña xa kiée xa, ko nchrixajo en xa, nchrichje en nchri Herodías, chaxro ité nchrichan ko bikon kain ni ikjui kiée xa. Ko tsango juinche e xa juaxruxin xranchi ité nchrichan,

⁷ méxin ndache xa nchrichan ko nichjaxin xa ngatoxin ndo Dio ixi nduaxin tsajon xa ngajin nchrichan ngixe i nge e xrojuanchia nchrichan.

⁸ Ko nchri Herodías juinchekateya nchra nchrichje en nchra, méxin ja in ndachro nchrichan:

—Chjánana ngaya naa laato jaa xi Juan tikitée chujni.

⁹ Ko xi rey Herodes tsango koni e aséen xa ixi ti juanchia nchrichan ixi je e xa tsindachro xa ixi nduaxin xrokuajon xa ti xrojuanchia nchrichan ko ixi kain ni ste nti a kuin en na, méxin kuituan an xa tson en xranchi ndachro nchrichan.

¹⁰ Ko kuetuan an xa ixi tsonchrijin na jaa xi Juan ngaxin in ndo achjiso.

¹¹ Ko tjume e bika o na jaa xi Juan ngaya naa laato ko kuayé e nchrichan, ko je e nchrichan kuajon nchrichan jaa xa ngajin janée nchrichan.

¹² Ko kuin en sen chrikao ndo Juan ixi jaña tsikon en, me e juirue e sen ndo ko juabaa sen ndo, ko tjume e kuichronga sen ngajin ndo Jesús nge e kon en.

Ndo Jesús kuajon ndo juine na ó mil chujni

(Mr. 6:30-44; Lc. 9:10-17; Jn. 6:1-14)

¹³ Ko hora kuin en ndo Jesús ixi jaña tsikon en ndo Juan, kuixin in ndo ngaxin in naa ntábarco ko sakjui ndo ti xro an chujni jii ixi je o ndo tjaun ndo tsake e ndo. Ko kain chujni kuin en ixi sakjui ndo ko kueya na kuachrjexin na tajnée na ko tutée na ruexin na ndo.

¹⁴ Ko hora kuachrjexin ndo Jesús ntabarco, bikon ndo ixi tsango itsjé chujni jii nti a, bikonóe e ndo na ko juinchexruen en ndo kain ni ni e tsikika o na.

¹⁵ Ko ó jitondaya nunte ko sen teyuu chrikao ndo Jesús konchjiñe e sen ngajin ndo, ko ndachro sen:

—Ó jitóndó ko nti i xro an nge e jii sinena. Cháña ndachenta na satsji na naa tjajna tsijée na naa nge e sine na.

¹⁶ Ko je e ndo Jesús ja in juatingíexin ndo:

—Na i. Xrokonda i satsji na. Ja anta chje énta na nge e sine na.

¹⁷ Ko je e sen juatingíexin sen:

—Xro an nge e chondana, je o na ó nutja ko yuu kucheę.

¹⁸ Ko je e ndo Jesús ndachro ndo:

—Kuaxinta nti i nge e chondanta.

¹⁹ Ko kuetuan an ndo chujni tsjoké e na ngata a kayua ko itsé ndo ti na ó nutja ko ti yuu kucheę ko tsje e ndo ngajni ko kuajon ndo juasie ndo ngajin ndo Dio. Tjume e konchrinjin ndo nu ko kuajon ndo nu ngajin sen teyuu chrikao ndo ko kao kucheę tsonchjeye e sen chujni.

²⁰ Ko kain na juine na jian, ko kaon na. Ko juexin juine kain chujni, sen teyuu chrikao ndo Jesús juejo sen ti xe e, teyuu ntaxra.

²¹ Ko ni juine xranchi na ó mil je o chujni xi, ko beki a sen sen nchri ko ichjan.

Ndo Jesús itji ndo ngataon inda

(Mr. 6:45-52; Jn. 6:16-21)

²² Ko tjume e kuituen en ndo Jesús sen teyuu chrikao ndo ko ndachro ndo:

—Tajiinta ntabarco ko tatsingato enta ndachaon. Jan an tsituna nti i xrontatjan chujni satsji na ko banchixon xrorua anta.

²³ Ko juexin chjeke e chujni, ndo Jesús sakjui ndo naa ijna je o ndo ixi nti a xronichje e ndo ndo Dio. Ko nti a je o ndo bake e ndo ko ó tiie.

²⁴ Ko ntabarco ó kuiji ntaa ngusine ndachaon ko kuaxi binga naa chrinto tsango soji ko inda jijamangitaon nda ko tjaun nda tsonjamangi nda ntabarco, ko ícha jitosoji chrinto.

²⁵ Ko ndúyo xranaxixe e ndo Jesús konchjiñe e ndo ti jii ntabarco ko jitixin tutée ndo ngata a nda.

²⁶ Ko sen teyuu chrikao ndo bikon sen naa ngisen jitixin tutée ngata a nda ko juatsuan i sen ndo, méxin tsango xronka sen ko kuyako sen séen:

—¡Naa ntacha an, naa ntacha an!

²⁷ Ko ndo Jesús tuinxin nichje e ndo sen:

—Xrakon anta ixi jan an jui i.

²⁸ Ko ndo Pedro juatingíexin ndo ko ndachro ndo:

—Nchána, siá nduaxin ja anta, tituan annta ixi jan an kaxon tsjixin tutéena ngata a inda ko tsjaso ti ritjennta.

²⁹ Ko ndo Jesús ndachro ndo:

—Xrokuia.

Ko tuinxin ndo Pedro xingajinxin ndo ntabarco ko kuaxi juixin tutée ndo ngata a nda ti no jii ndo Jesús.

³⁰ Ko chrinto soji juinchexronka ndo Pedro ko jitaxin jitenunte ndo chringi inda ko kuyako ndo:

—Nchána, ¡tingijnaninta!

³¹ Ko ndo Jesús tuinxin koka itja ndo ko itsé ndo ndo Pedro ko ndachro ndo:

—Pedro, ¿sonda tsango nchion chuntiana ko sonda xronka?

³² Ko tjume e yui sen kuajin in sen ntabarco ko tuinxin kuixin chrinto.

³³ Ko sen stexin in ntabarco bake exin ntatuchi in sen ngajin ndo Jesús ko ndachro sen:

—¡Nduaxin Chjen en ndo Dio ja anta!

*Ndo Jesús juinchexruen en chujni ni e nunte Genesaret
(Mr. 6:53-56)*

³⁴ Tjume e juexin kuatsingatu e sen ndachaon ko kuiji sen nunte Genesaret.

³⁵ Ko chujni tjajna me e kuichúxin n̄a ndo Jesús, ko juincheno e n̄a kainxin tjajna ste nunte me e ixi ndo Jesús nti a jii ndo ko chujni me e bika o n̄a kain ni ni e.

³⁶ Ko kuinóatée ni ni e ixi maski ngande e mantée ndo xrotsé n̄a, ko nduaxin kain ni itsé mantée ndo, koxruen en n̄a.

15

*Ti nchekateya chujni ixi ti ndako a sinche e
(Mr. 7:1-23)*

¹ Tjume e konchjiñe e kaxin xi fariseo ko kaxin xi tjako chijnie ndo Dio tsiki x̄in tjajna Jerusalén ko juanchangi e xa ndo:

² —¿Sonda sen chrjiku unta nche a sen nge e kuanche e sen tachrí ina ixi xrokonda sa ó sinéma itja sen ko tjume e sine sen?

³ Ko ndo Jesús juanchangi ndo:

—¿Sonda ja anta rue énta nge e kuanche e n̄a ko jaña ndá a tintu enta nge e tsiketuan an ndo Dio?

⁴ Ixi ndo Dio ndachro ndo: “Chonde enta juasaya ndotánta ko janáanta ko tayakon ennta sen”, ko “Ngisen ndako a nichja ngajin ndotée sen ko janée sen, xrokonda tsen en sen.”

⁵ Ko ja anta ndachenta chujni ixi chao xronache n̄a ndotée n̄a ko janée n̄a: “Jan an jua i tsingijnanta ixi kain nge e chonda, ó ntatjan ndo Dio ixi je e ndo tsayé e ndo.”

⁶ Ko ngixe i chujni xronachro jaña, íxrokonda i tsingijna ndotée ko janée. Ko ixi ja anta tjakonta jaña, méxin juinchemé enta nge e kuituan an ndo Dio ko ja anta nche enta nge e tsikitan an sen xranchrjen.

⁷ Ja anta ti tjako yuu ikonnta. Nduaxin ti tsindachro ndo Isaías, ndo kuachronga chijnie ndo Dio ó sa ó:

⁸ Chujni tjajna ji i ndachro n̄a ixi tajon n̄a juasaya ngajin je o ixi ro a n̄a, me e ti nichja n̄a ko je a nduaxin, ko गया aséen n̄a titikaon a n̄a.

⁹ Méxin, xro an tjintee ti chjána n̄a juasaya ixi je o tjako n̄a nge e tetuan an chujni.

¹⁰ Ko ndo Jesús kuiye e ndo chujni ste nti a ko ndachro ndo:

—Tin ennta ti ntatjunta ko tienxinnta.

¹¹ Je a ti ine chujni me e sinchekitja aséen. Na i, ti nichja n̄a ko ti nichjangí n̄a me e ti nchekitja aséen n̄a.

¹² Tjume e sen teyuu chrikao ndo Jesús konchjiñe e sen ngajin ndo ko ndachro sen:

—Xi fariseo koñao xa ixi nge e ndachronta.

¹³ Ko ndo Jesús juatingíexin ndo:

—Kain ika, ka benga i Ndotána jii ngajní, kain ka me e xrokonda tsachrjengíxin nue e ka.

¹⁴ *Ta inta juachjaon ixi xi fariseo ña, ntakutsin xa ko ni rué e xa kaxon ntakutsin n̄a. Ko siá naa xi ntakutsin tikao inaa xi ntakutsin, yui xa tsitsingaya xa naa tuye.

¹⁵ Ndo Pedro ndache ndo ndo Jesús:

—Ndachijininta nge e xronachro chijni ji i.

¹⁶ Ndo Jesús ndachro ndo:

—¿Á kaxon ja anta tienxin anta?

¹⁷ ¿Á tienxin anta ixi kain nge e ti ineni itji गया tse eni ko tjume e tachrje?

18 *Ko ti ndako a nichja chujni ti x̄in ngaya aséen, ko me e nchekit̄ja aséen na.

19 Ixi aséen chujni tachrjexin ti jian i ko kain ti ndako a xraxaon na, ti naatsóñaxón naa chujni, ko ti tsekao na inaa nchri, nchri je a nchrinchri e na, ko je o xraxaon na xrochóna itsjé nchri, ko ti tjaun na tsee na, ko ti ncheya na ko ti tenge e kichuu na teka.

20 Kain ji i me e nchekit̄ja aséen chujni, ko maski tsitikaon a na ixi sinéma itja na hora sine na, je a me e tsamaxin na ijie.

Naa nchri tjajna Canaán chuntia nchra ndo Jesús

(Mr. 7:24-30)

21 Tjume e ndo Jesús kuachrjexin ndo tjajna Jerusalén ko sakjui ndo tjajna Tiro ko tjajna Sidón.

22 Ko naa nchri cananea jii ndo a nchra no nunte me e, kuij nchra ngajin ndo Jesús ko séen jitoyako nchra:

—Nchána, Chjen en ndo David, tikonóananinta ixi xjanchrichjan na chóna xjan naa espíritue Xixron anxrée ko tsango tangi jii xjan.

23 Ndo Jesús juatengíexin a ndo. Ko sen teyuu chrikao ndo konchjiñe e sen ngajin ndo ko ndache sen ndo:

—Nchána, ndachenta nchra satsji nchra ixi tsango tuyako nchra ko jirua ina nchra.

24 Ko ndo Jesús ndachro ndo:

—Ndo Dio xruan anna ndo tsingijna sen tjajnána Israel ixi je e sen tsingachrue sen xranchi kutuchjon.

25 Ko je e nchri cananea konchjiñe e nchra ko bake exin ntatuchi in nchra ngajin ndo Jesús, ko ndachro nchra:

—Nchána, ¡tingijnaninta!

26 Ko ndo Jesús ndachro ndo:

—Ndako a jii tsantsje eni chjen enni nutja ko xrochjéeni kunia sine ba.

27 Ko je e nchra ndachro nchra:

—Nchána, nduaxin me e. Ko kaxon kunia ine ba nutja tutu o titsingaxin ti neta a nchéé ba.

28 Tjume e ndachro ndo Jesús:

—Nduaxin ja a tsango chuntiana. Tson en xranchi ja a tjauan.

Ko hora me e chjen en nchra tuinxin koxruen en xjan.

Ndo Jesús juinchexruen en ndo itsjé chujni ni e

29 Ko ndo Jesús sakjuixin ndo nti a ko kuiji ndo ngande e ndachaon ndatin in Galilea. Tjume e kuiji ndo naa ijna ko nti a bake e ndo nunte.

30 Ko itsjé chujni konchjiñe e na ngajin ndo ko bika o na chujni ntarengo ko ni tikon a ko ni nosin ko chujni ntamango ko ikaxin ni ni e bake e na tjenka tutée ndo Jesús ko je e ndo juinchexruen en ndo ni ni e me e.

31 Ko kain chujni ste nti a tsango xronka na ixi bikon na ixi ni nosin ó chao nichja na ko ni ntamango chao koxruen en na ko ni ntarengo ó chao itji na ko ni ntakutsin chao tikon na. Ko tjume e kuaxi na kuajon na juasie na ngajin ndo Dio ne e ni tjajna Israel.

Ndo Jesús kuajon ndo juine noó mil chujni

(Mr. 8:1-10)

32 Tjume e ndo Jesús kuiye e ndo sen teyuu chrikao ndo ko ndachro ndo:

—Tsango tikonóa a kain chujni ji i ixi ó níi nchakon ste na ngajin ko chóna i na nge e sine na. Ko tjaun a xrontatjan na satsji na ndo a na ba tsjejeñao na ixi jinta ngatja cha o.

33 Ko sen teyuu chrikao ndo juatingíexin sen:

—Nti i ti stena, xro an ngisen jii, ¿ti no tsanchiana nge e sine na ixi tsango kueya na?

34 Ko ndo Jesús juatingíexin ndo:

—¿Ngijan in nutja chondanta?

Ko je e sen ndachro sen:

—Yaato nutja ko kaxin kuchee nchínchín.

³⁵ Ko ndo Jesús kuituen en ndo kain chujni tsjoké e na ngata a nunte.

³⁶ Ko itsé ndo ti yaato nutja ko kuchee ichjan ko kuajon ndo juasie ndo ngajin ndo Dio. Ko kuaxi konchrinjin ndo nutja ko chjée ndo sen teyuu chrikao ndo ko je e sen konchjeya sen nutja ko kuchee ngajin chujni ste nti a.

³⁷ Kain na juine na jian ko kaon na, ko xra xejo yaato ntaxra nutja tutu o ti tsikonchrijin ndo.

³⁸ Ko ni juine nchakon me e noó mil chujni xi. Ko beki a sen chujni nchri ko ichjan.

³⁹ Tjume e ndo Jesús chjée ndo na juajna ko sakjui na ko je e ndo kuajin in ndo ntabarco ko sakjui ndo no nunte Magdala.

16

Xi fariseo ko xi saduceo tjanche e xa ndo Jesús naa ixra ijié

(Mr. 8:11-13; Lc. 12:54-56)

¹ *Kaxin xi fariseo ko kaxin xi saduceo ikjui xa ngajin ndo Jesús ixi tjaun xa ndako a xronichja je e ndo, méxin ndachro xa ixi ndo Jesús xrojuakoxin ndo naa ixra ijié, me e xrokuitikaon xa ixi nduaxin je e ndo kujxin ndo ixi juachaxien ndo Dio.

² Je e ndo Jesús juatingíexin ndo ndachro ndo:

—Ó kóndo ko ja anta tsje enta ngajni ko ndachronta: “Chaxro sinche e nchakon ixi játse ngajni.”

³ Ko ndúyo tsje enta ngajni ko ndachronta: “Jai chaxro a sinche e nchakon ixi játse ngajni ko tsango jii itjui tiie.” Ja anta tsango jian tienxinnta ngixranchi sinche e nchakon, ¿sonda tienxin anta nge e ixra nta a jan an ixi ji in ti xin ixi juachaxien ndo Dio?

⁴ *Ja anta ña inta ko tjanchianta naa ixra ijié* tson en tsikonnta. Ko tsikon anta tson en ixra ijié me e, je o tsikonnta xranchi kon en ndo Jonás, ndo kuanichja chijnie ndo Dio ó sa ó.

Tjume e ndo Jesús sakjui ndo ko kuintu e ndo ni ste nti a.

Ti tjakoxin ni fariseo

(Mr. 8:14-21)

⁵ Ndo Jesús ko sen teyuu chrikao kuatsingatu e sen ndachaon ndatin in Galilea ko sen teyuu chrikao ndo tsitjáñe e sen nutja.

⁶ *Me e ndachro ndo Jesús:

—Jian tsje enta nge e xrondachro ti chu u nchetja in nutjée xi fariseo ko xi saduceo.

⁷ Ko sen teyuu chrikao ndo Jesús ndache kichuu sen:

—Ja in ichro ndo ixi tjáñaina nutja.

⁸ Ko ndo Jesús kono e ndo nge e stendachro sen, méxin ndachro ndo:

—¿Sonda ndachronta ixi chonda inta nutja? Ja anta chuntia ininta, méxin nichjanta jaña.

⁹ *¿Á xraxaon anta o tienxin anta ti na ó nutja chjeye e na ó mil chujni juine na ko ngijan in ntaxra nutja xejo ti tsixe e?

¹⁰ *Ko, ¿á sintaxi añaonta ixi yaato nutja konchjeye enta noó mil chujni juine ko ngijan in ntaxra juejonta ti nutja tsixe e?

¹¹ ¿Á kuienxin anta ixi jan an je a nutja rindachrjan hora ntatjunta ixi jian tsje enta nge e tjako xi fariseo ko xi saduceo?

¹² Tjume e kuienxin sen teyuu chrikao ndo Jesús ixi je a kondee chu u nchetja in nutja jinichja ndo. Na i. Je e ndo jindachro ndo ixi ti nge e tjako xi fariseo ko xi saduceo me e jian xrotsje e sen ixi ti nichja xa ndako a jii.

Chronga ndo Pedro ixi ndo Jesús me e ndo Cristo

(Mr. 8:27-30; Lc. 9:18-21)

¹³ Hora kuiji ndo Jesús nunte tjajna Cesarea de Filipo me e ndache ndo sen teyuu chrikao ndo:

—¿Nge e ndachro ni tjajna ixi Chjen en ndo Dio, xjan jongí e xranchi chujni?

¹⁴ *Ko je e sen ndachro sen:

—Kaxin nã ndachro nã ixi ja anta ndo Juan batikitée chujni ko ikaxin nã ndachro nã ixi ja anta ndo Elías ko ste ikaxin nã ndachro nã ixi ja anta ndo Jeremías o ngixe i inaa sen kuachronga chijnie ndo Dio ó sa ó.

¹⁵ Tjume e juanchangi ndo Jesús:

—¿Ko ja anta nge e chronta, ngisen jan an?

¹⁶ *Ko ndo Simón Pedro juatingíexin ndo ko ndachro ndo:

—Ja anta ndo Cristo, Chjen en ndo Dio, ndo jichón.

¹⁷ Ko ndo Jesús ndachro ndo:

—Juaxruxin take é ja a Simón, chjen en ndo Jonás, ixi xro an chujni juntano a ji in. Je e Ndotána jii ngajní juntano a.

¹⁸ Ko jan an sintaki ian ixro me e xrondachro Pedro, ko ngata a ixro ijié ji in tsakée ningona ko maski tsii juachjaon tsenxin chujni jua i tsitjáña ningona.

¹⁹ *Ko xrotjá a chika xitjeexin ntachja ti tetuan an ndo Dio ko ja a tsayé e juachaxin chao kain tsintee nti i ngata a nunte xasintajni ko ti jii ngajní kaxon jua i xroxindanga; ko kain nge e xroxindanga nti i ngata a nunte xasintajni, jii juachaxin ixi ngajní chao xroxindanga.

²⁰ Tjume e ndo Jesús kuetuen en ndo sen teyuu chrikao ndo ixi tseki a sen ixi je e ndo, ndo Cristo.

Ndo Jesús chronga ndo ixi xrokonda tsen en ndo

(Mr. 8:31–9:1; Lc. 9:22-27)

²¹ Nchakon me e kuaxi ndo Jesús ndache ndo sen teyuu chrikao ndo ixi xrokonda satsji ndo tjajna Jerusalén ko nti a xi tetuan an ni ngo ko xitaana ko xi tjako ley ne e ndo Dio tsango sincheni e xa ndo ko naatsóñaxón xa ndo, ko nchakon nínxin xroxechón ndo.

²² Ko ndo Pedro kuantsjendáa ndo ndo Jesús ko kuaxi kuyakutee ndo ndo ko ndachro ndo:

—Nchána ndo Dio tsajon a juachaxin tson en me e, ko ja anta xro an nge e tson annta.

²³ Tjume e ndo Jesús ngatjia ndo ko ndache ndo ndo Pedro:

—Ndá a satjia ja a, Xixron anxrée. Tingakonna ia ti nge e tsónna ixi ja a tienxin a xranchi xraxaon ndo Dio. Ja a xraxaon xranchi xraxaon chujni.

²⁴ *Tjume e ndo Jesús nichje e ndo sen teyuu chrikao ndo, ko ndachro ndo:

—Siá xrojan ja anta tjaunnta xorua naninta, xrokonda tsintu enta kain nge e tjakuenxin asáanta, ko tamanta ntacru ko rua naninta.

²⁵ *Ixi ngisen tjaun a tsen en, sen me e tsen en sen. Ko ngisen tsen en ixi kondanaxin jan an, sen me e tsitjáña i sen ko xrochónnda sen juachaxin tsechón sen kain nchakon.

²⁶ Ixi, ¿nge e tsjacha naa sen siá tsetuen en sen nchijí nunte xasintajni ko xrochónnda sen itsjé tomi, ko sinchetjáña aséen sen? Ixi tomi me e jua i tsjengaxin sen nã ixi tsechón aséen sen.

²⁷ *Ko Chjen en Dio, xjan jongí e xranchi chujni, tsika o xjan ijié juachaxin ko ijié chjiixro ne e Ndotée xjan, ndo Dio, ko kaxon tsika o xjan sen ángel ne e ndo ko tjume e tsjenge e xjan nã ngujngu chujni ixrã juinche e ngata a nunte nti i.

²⁸ Ko nduaxin ntatjunta ixi kaxinnta ti stenta nti i xratsen anta ko tsikonnta xranchi tsij Chjen en ndo Dio, xjan jongí e xranchi chujni, tsika o xjan ijié juachaxin ko tsituan an xjan nti i.

17

Kuindoxin xranchi tsje eni ndo Jesús

(Mr. 9:2-13; Lc. 9:28-36)

¹ Kuatsingaja ikjaon nchakon ndo Jesús sabikao ndo ndo Pedro ko ndo Jacobo ko ndo Juan, ndo kichuu ndo Jacobo; je o sen ikjui sen naa ijnã tsango noi.

² Nti a ste sen ko tuinxin bikon sen ixi kuindoxin ndo Jesús. Ikon ndo jitóngíxin xranchi chjiixro ko manta jitsáa ndo tjuá manta xranchi naa xro i tóngíxin.

³ Ko kaxon bikon sen nti a jii ndo Moisés ko ndo Elías stetjao sen ndo Jesús.

⁴ Tjume e ndo Pedro ndache ndo ndo Jesús:

—Nchána, chao ndatsojuna nti i. Ko siá tjaunnta sintáñana ní nchia, naa nchia ja anta ko naa nchia ndo Moisés ko naa nchia ndo Elías.

⁵ *Ko xrajnichja ndo Pedro, naa itjuí tsango jitóngíxin kuitsía sen ko ngakjen en itjuí me e kuin en sen naa téé inaa sen nichja ko ndachro sen ja in:

—Ji in chjan na tsango tjua a* ko tsango juaxruxin ritjén ixi ixrã jinche e je e xjan. Titikaonnta nge e nichja xjan.

⁶ Hora kuin en sen chrikao ndo Jesús, tuinxin bake exin ntatuchi in sen ko bake e ikon sen ngata a inche ixi tsango xronka sen.

⁷ Tjume e ndo Jesús konchjiñe e ndo ngajin sen, bake e itja ndo ngata a sen ko ndachro ndo:

—Tingatjennta ko xrakon anta.

⁸ Ko tuinxin ikjan tsje e sen ti no jii ndo Jesús ko xro an ngisen bikon sen jikao ndo.

⁹ Ko hora xingajinxin sen ijnã, ndo Jesús kuetuen en ndo sen:

—Xro an ngisen teki énta nge e bikonta jai, hasta ti xroxechónjan Chjen en ndo Dio, xjan jongí e xranchi chujni.

¹⁰ Ko sen teyuu chrikao ndo Jesús juanchangi e sen ndo:

—¿Sonda ndachro sen tjako ley kuituan an ndo Dio, ixi sa ó tsij ndo Elías ko tjume e tsij ngisen tsajon juachaxin tsechón chujni kain nchakon?

¹¹ Ko ndo Jesús juatingíexin ndo:

—Nduaxin me e, sa ó tsij ndo Elías ixi je e ndo sinchekonchjian ndo kain nge e.

¹² *Ko jan an nduaxin xrontatjunta ixi ndo Elías ó kujj ndo, ko chujni kuichúxin a nã ndo, méxin chinga juinchekaon nã ndo. Ko jan an Chjen en ndo Dio, xjan jongí e xranchi chujni, jaña sinchenana kaxon ko tsango sinchenína nã.

¹³ Me e sen teyuu chrikao ndo Jesús kuienxin sen ixi je e ndo jinichja ndo ixi ndo Juan bikitée chujni.

Ndo Jesús juinchexruen en ndo naa chjan chóna naa espíritu ña i

(Mr. 9:14-29; Lc. 9:37-43)

¹⁴ Ko naa nchakon kuiji sen ti jii tsango itsjé chujni, me e konchjiñe e naa xi, xi me e bake exin ntatuchi in xa ngajin ndo Jesús ko ndachro xa:

¹⁵ —Nchána, tikonóe énta chjan na ixi je e xjan chonda xjan ichin tendaa ko tsango tangi ton en xjan. Nanaunka titsinga xjan ngata a xro i ko ngangí inda.

¹⁶ Bikian xjan nti i ko sen chrjiku unta jua i juinchexruen en sen xjan.

¹⁷ Ko ndo Jesús ndache ndo sen teyuu chrikao ndo:

—Ja anta chujni ndako a xraxaon ko titikaon aninta jan an. ¿Ti ngisa xrokonda tsake e ngajinnta?, ko, ¿ti ngisa tsokuaxinna nge e nche enta? Kuaxinta xjan nda i.

¹⁸ Ko tjume e ndo Jesús kuyakutee ndo espíritue xi ña i ko tuinxin espíritu me e kuachrjexin xjan ko ndakoxruen en xjan.

¹⁹ Tjume e sen teyuu chrikao ndo Jesús ndá a kuiye e sen ndo ko juanchangi e sen ndo:

—¿Sonda jan anna jua i kuantsjena espíritu ña i?

²⁰ *Me e ndo Jesús juatingíexin ndo:

—Ja anta chuntia ininta. Ko jan an nduaxin ntatjunta siá ja anta je o xrochuntianinta naanchion xranchi naa tsee ntamostaza tsango nchíin tsee, me e chao xrondachenta jna ji in: “Ndá a tjia”; ko jaña xrokon en ixi ijna xrokuitikaon jna. Ko siá nduaxin xrochuntianinta, chao sinche enta kain ixra tsetuan annta.

²¹ Ixi kain espíritu kichuu ña je o tachrjexin siá nduaxin xronichja naninta kain nchakon ko sinchekatse ñaonta jinta.

Íjngo chronga ndo Jesús ixi tsen en ndo

(Mr. 9:30-32; Lc. 9:43-45)

²² Xrasteyáa sen cha o nunte Galilea, ndo Jesús ndachro ndo ixi je e ndo Chjen en ndo Dio, xjan jongí e xranchi chujni, xrotsé na ndo ko tsikao na ndo ngajin ni tetuan an,

²³ ko naatsóñaxón na ndo. Ko nchakon nínxin xrokonda xroxechón ndo. Ko ti ndachro je e ndo tsango juincheni e aséen sen teyuu chrikao ndo.

Ndo Jesús juenga ndo na ti juanchia na kondee ni ngo

²⁴ Nchakon ndo Jesús ko sen teyuu chrikao ndo kuiji sen tjajna Capernaum, ni xenge e na ne e ni ngo kuitsje e na ndo Pedro ko juanchangi e na ndo:

—Ndo ntakuan annta, ¿á tjenga ndo na tomi ne e ni ngo?

²⁵ Ko ndo Pedro juatingíexin ndo:

—Jaán, tjenga ndo na.

Ko hora ndo Pedro kuixin in ndo nchia ti ste kain sen, ndo Jesús sa ó nichja ndo ko ndachro ndo:

—Ndachijiana, Pedro, xi tetuan an ngata a nunte nti i, ¿ngisen tjanche e xa ixi xrokonda tsjenga na na? ¿Á ni tjajnée xa o ni tsiki xin inaa tjajna?

²⁶ Ko ja in juatingíexin ndo Pedro:

—Ni tsiki xin inaa tjajna.

Ko ndachro ndo Jesús:

—Sen tjajnée xrokonda i tsjenga sen na.

²⁷ Ko ixi tjaun a tsoñao na, itjia ti jii ndachaon ko tjanka ngia chika tséxinni kuchee ko kuchee sa ó xrotsé, tantje e ro a ba, ko tsinchia naa tomi ko tomi me e tjenga na ti tikinixin jan an ko ja a.

18

¿Ngisen ícha tjintee ti jii ngajní?

(Mr. 9:33-37; Lc. 9:46-48)

¹ *Nchakon me e sen teyuu chrikao ndo Jesús konchjiñe e sen ngajin ndo ko juanchangi e sen ndo:

—¿Ngisen ícha tsitee ngajní ti tetuan an ndo Dio?

² Tjume e ndo Jesús kuiye e ndo naa chjan, ko bake e ndo xjan ngusine ti ste sen,

³ *ko ndachro ndo:

—Nduaxin ntatjunta ixi siá tjaunnta tsixin innta ti tetuan an ndo Dio, xrokonda tsindoxinnta ko tsaxi sinche enta xranchi nche e naa xjan nchíin.

⁴ Ixi ti tetuan an ndo Dio, sen ícha tjintee, nchejié a aséen sen xranchi naa chjan ji i.

⁵ Ko ngisen xrotjue e ko tsayé e sen naa chjan nchíin xranchi xjan ji i, me e nduaxin titikaonna sen, ko xrokjui xranchi xrokuaye ena sen jan an.

Chujni nchekateya ixi sinche e na ndako a

(Mr. 9:42-48; Lc. 17:1-2)

⁶ Siá xrojan naa xjan nchíin titikaonna jan an, ko kondeexin xrojan chujni, xjan me e xrojuinche e xjan ti ndako a, ni me e cháña xrotsé na naa ixro ijié ti tontsingaxin ko xrokuintee na ixro tusin na, ko xrokuitsingangi na ndachaon ti yaso e.

⁷ Lastu nunte xasintajni ixi jii nge e sinchengachrue chujni ixi tsitikaon a na chijnie ndo Dio, ko lastu ni sinchekateya chujni ixi sinche e na ti ndako a.

⁸ *Méxin siá kondeexin tjáanta o tutáanta, ja anta sinche enta ti ndako a, cháña tonchrijinnta ko ndá a tjankanta, ixi maski xrochonda inta naa tjáanta o naa tutáanta tsarichonnta kain nchakon, ko xrochondanta yui tjáanta ko yui tutáanta ko jaña nchijíinta itsjinta ti jiche xro i kain nchakon.

⁹ *Ko siá ti tsikon ikonnta, kondeexin me e nche enta ti ndako a, cháña tantsjengi ikonnta ko ndá a tjankanta, ixi maski ntakutsinnta, ja anta tsarichonnta kain nchakon. Ko yuxin ikonnta xrochondanta, jaña satsjinta ngangi xro i ko nti a tsake enta kain nchakon.

Chijnie naa kutuchjon

(Lc. 15:3-7)

¹⁰ *Ndachro anta ixi tjinte a kaxin xjanchínchín ji in, ixi xjan ji in, sen ángel ne e xjan, sen ste ngajní ti jii Ndotána, je e sen tjanchia sen ixi je e xjan.

¹¹ Ixi Chjen en ndo Dio, xjan jongí e xranchi chujni, kuij xjan bijée xjan chujni kuitjáña ko sinchemé e xjan jíee sen.

¹² ¿Nge e chronta? Siá naa xi chóna naa ciento kutuchjon ko siá kuitjáña naa ba, ¿á tsintue a xa nti a ti noventa y nueve ba ti jii ijna ko tjume e tsijée xa iko kuitjáña?

¹³ Ko siá tsitja xa kutuchjon me e, á je a ícha tsake e xa juaxruxin ixi kuitja xa iko kuitjáña ixi kain iko kuitjáña i.

¹⁴ Jaña kaxon Ndotána jii ngajní tjaun a ndo tsitjáña ninna xjanchín ji i.

Xranchi xrotjaña ananta ti ndako a junta anta naa sen kichuunta

(Lc. 17:3)

¹⁵ *Siá naa sen kichuunta xrojan ti ndako a junta anta sen, ja anta ko sen me e nichje e kichuunta ti ja onta stenta, ixi ti ndako a junta anta sen. Siá kuitikaon sen nge e ndachronta, ja anta juachanta naa sen kichuunta.

¹⁶ Ko siá sen me e kuitikaon a sen, tiye enta naa o yuu sen kichuunta ixi sen me e tsin en sen nge e tsjaonta ko nge e sinchekonchjiannta.

¹⁷ Ko sen ningakon annta, siá tsitikaon a sen sen kuiye enta, tjume e ndachenta sen ni ngo, ko siá tsitikaon a sen kaxon, tjume e índachro anta ixi sen me e kichuunta sen, sen me e ó ikjan sen xranchi naa chujni tjáka tomie xi Roma ko chúxin a na ndo Dio.

¹⁸ *Ko nduaxin ndachrjan ixi siá tsajon anta juachaxin xroxindanga ijie yama naa chujni nti i ngata a nunte xasintajni, kaxon ngajní ti jii ndo Dio, je e ndo tsajon a ndo juachaxin tsomé e ijie me e, ko kain ti tsajonnta juachaxin ixi tsomé e ti ndako a junta anta na nti i ngata a nunte xasintajni, kaxon ndo Dio sinchemé e ndo ijie chóna na.

¹⁹ Kaxon ntatjunta ixi siá yuu ja anta ngata a nunte nti i ndako xronichje e kichuunta ixi xrojan nge e tsjanche enta Ndotána jii ngajní, Ndotána jii ngajní, je e ndo tsajon ndo nge e tsjanchianta.

²⁰ Ixi ti no ste yuu o ní sen titikaonna, nti a tsake e jan an ngusine ti ste sen.

21 *Tjume e konchjiñe e ndo Pedro ko juanchangi e ndo ndo Jesús:

—Nchána, ¿ngijan in sintama a ngaya aséenna nge e ti ndako a juinchena sen kichian? ¿Á je o jaña yaato vez?

22 Me e juatingíexin ndo Jesús ko ndachro ndo:

—Na i, je a je o yaato. Jan an ndachrjan ní ti kán ko naa ti te tsomé e ngaya asáan ti junta a sen.

Chijnie yuu ni sínká

23 "Ti no tituan an ndo Dio me e xranchi naa nunte ijié tetuan an naa xi rey ko tjaun xa sinchéñaka o xa xinhexrée xa cuenta.

24 Ko kuaxi xa nchéña xa cuenta ko hora me e bika o na naa xi tsango itsjé sínká.

25 Ko xi sínká me e chóna i xa tomi tsjengaxin xa na ti sínká xa, méxin xi rey kuetuan an xa ixi tsochji xi sínká ko janchri e xa ko chjen en xa ngajin ni te na chujni ko ti tjintee chóna xa tsochji kaxon xroxengaxin na ti sínká xa.

26 Ko xi sínká bake exin ntatuchi in xa ngajin xi rey, ko kuinóatée xa ko ndachro xa: "Chonantina ko jan an tsjenga anta na kain ti tasinka anta."

27 Ko xi rey bikonóe e xa xi sínká ko juinchemé e xa kain ti sínká xi me e, ko kuituan an xa tsajanda na xa ixi ó komé e ti sínká xa.

28 Ko sakjui xa ko hora me e kuetan xa inaa xi nchekao xa ixra, ko xi me e tsjé a sínká xa ngajin xi komé e ti kuasínká xa ngajin xi rey. Ko xi komé e ti sínká, soji itsé xa tusin xi sinke e xa ko ndachro xa: "¡Tjénganana na ti tasinkanana!"

29 Ko xi nchekao xa xra bake exin ntatuchi in xa ngajin xi komé e ti sínká ko kuinóatée xa: "Tikonánana ko jan an tsjenga a na kain ti tjasínká a."

30 Ko xi komé e ti sínká chro a xa ko kuetuan an xa ixi tsije e xi sinke e xa ngaxin in ndo achjiso ko tsachrjexin a xa nti a hasta ti tsjengaja xa na kain ti sínká xa.

31 Ko ikaxin xi nchekao xa ixra bikon xa nge e juinche e xi komé e ti sínká, me e tsango juincheni e aséen xa, méxin kuintekji xa ngajin xi rey ko chronga xa nge e juinche e xi komé e ti sínká.

32 Tjume e xi rey kuetuan an xa tsixrakua xi komé e ti sínká ko ja in ndachro xa: "Ja a ti kuanche e xrana, tsango ña ia ja a, ixi jan an juntamá a kain ti kuasínká nana ixi ja a kuinóatáa ngajin.

33 Kaxon ja a xrobikonué é xi kuanchekua ixra xranchi jan an bikonóa a ja a."

34 Tjume e xi rey kuetuan an xa tsikaon xi ña i ko tsjengaja xa na kain ti sínká xa. Jaña ichro xi rey ixi tsango koña xa.

35 Ndo Jesús juexin kueki ndo chijni ji i, me e ndachro ndo:

—Jaña kaxon Ndotána jii ngajni sinta anta ndo ngujngu ja anta siá je a nduaxin sinchemé enta ngaya asáanta ti ndako a junta anta sen kichuunta.

19

Ndo Jesús nichja ndo kondee ni tsikute e ko tintu e kichuu na

(Mr. 10:1-12; Lc. 16:18)

1 Juexin nichja ndo Jesús kain ji i, tjume e sakjui ndo nunte Galilea ko kuiji ndo tjajna Judea, nunte jii chjuya ti jii indajitinga ndatin in Jordán.

2 Nti a kueya chujni rué e ndo ko itsjé ni ni e juinhexruen en ndo.

3 Ko tjume e kaxin xi fariseo konchjiñe e xa ngajin ndo Jesús ko juanchangi e xa ndo ixi tjaun xa ndako a xrojuatingíexin ndo, ko ja in ndachro xa:

—¿Á chao jaña naa xi tsintu e xa nchrinchri e xa maski nchrinchri e xa xro an nge e ti ndako a juinche e nchra?

4 Ko ndo Jesús ja in juatingíexin ndo:

—¿Á kuangi anta nge e ndachro xroon chijnie ndo Dio?, ixi “je e ndo juinchéña ndo kain chujni, xi ko nchri juinchéña ndo.”

⁵ Ko kaxon ndachro ndo: “Méxin chujni xi tsintu e xa ndotée xa ko janée xa ko tsute e xa nchrinchri e xa ko yui je e na í je a yuu na, ixi ó xranchi xrokjui naakua naa chujni.”

⁶ Méxin í je a yuu na. Na i. Jai ó xranchi naakua naa chujni, méxin xro an chujni tsonchjeya ni kute e, ni chjée ndo Dio juachaxin tsekao kichuu na.

⁷*Ko xi fariseo juanchangi e xa ndo:

—¿Sonda tjume e ndo Moisés kuajon ndo juachaxin tsoña naa xroon ko xroon me e xronichja ixi chao tsintu e kichuu na?

⁸ Ko ndo Jesús ndachro ndo:

—Ndo Moisés kuajon ndo juachaxin tsonchjian xroon xrochjeyaxin xi ko nchri, ni stekao kichuu, ixi chujni tsango icha aséen na ko tjaun a na tsitikaon na chijnie ndo Dio. Ko ti nchakon xrangixixión kain nge e, kuanche a na jaña.

⁹*Méxin, jan an ndachrjan siá xrojan ja anta tjaunnta tsintu enta janchri anta ko siá janchri anta juitéxin a jan inaa xi, ja anta jua i tsintu enta jan ko chonda inta juachaxin ixi tsuta anta inaa nchri. Ko siá sinche enta jaña, ja anta tsamanta ijie. Kaxon ngixe i naa xi tsute e naa nchri, nchri kuayé e xroon chjeyaxin chujni, xi me e tsama xa ijie kaxon.

¹⁰ Tjume e sen teyuu chrikao ndo Jesús ndachro sen:

—Siá ni tintekute e jaña nche e na, cháña tsute ani.

¹¹ Méxin ndo Jesús ndachro ndo:

—Chijni ji i kain a sen tienxin sen chijni. Je o tienxin sen chjée ndo Dio juachaxin ixi tsute a sen.

¹² Nduaxin ji i, kaxin xi jua i tsute e xa, ixi ti xratsijongíexión xa jua i tsute e xa. Ikaxin xa juincheni e na xa, méxin jua i tsute e xa, ko jii ikaxin sen tjaun a sen tsute e sen ixi tjaun sen sinche e sen ixra ngajin ndo Dio, méxin ti rintakuan annta jai je o tsienxin sen tjaun sinche e jaña.

Ndo Jesús juinchenchaon ndo kaxin chjan

(Mr. 10:13-16; Lc. 18:15-17)

¹³ Tjume e bika o na kaxin ichjan ixi tjaun na tsake e itja ndo Jesús ngata a xjan ko xronichje e ndo ndo Dio ixi je e xjan. Ko sen teyuu chrikao ndo Jesús kuyakutee sen ni bika o xjan.

¹⁴ Ko je e ndo Jesús ndachro ndo:

—Tintu enta ichjan tsij xjan ngajin ko tingakuen anta xjan ixi sen sinche e xranchi nche e naa ichjan, sen me e tikinixin en sen tixin in sen ngajni ti tetuan an ndo Dio.

¹⁵ Juexin bake e itja ndo ngata a xjan, sakjuixin ndo nti a.

Naa chán chóna itsjé tomi nichje e chán ndo Jesús

(Mr. 10:17-31; Lc. 18:18-30)

¹⁶ Naa chajan kujj chán kuitsje e chán ndo Jesús ko juanchangi e chán ndo:

—Ja anta ti nchekuen ennta chujni tsango jiannta, ¿nge e xrokonda sinta a ixi tsayá a juachaxin tsarichón kain nchakon?

¹⁷ Ko je e ndo ja in juatingíexin ndo:

—¿Sonda ndachrua ixi jan an jianna? Je o ndo Dio, je e ndo jian ndo. Ko siá tjaun nduaxin tsarichuan, xrokonda tsitikaoan chijnie ndo Dio.

¹⁸ Ko je e chán ndachro chán:

—¿Ngixe e chijni me e?

Ko ndo Jesús ndachro ndo:

—Ko a juachaxin naatsónaxuan naa chujni, ko a juachaxin tsixintexian naa nchri chóna xixi e, ko a juachaxin ixi tse e, jua i sincheya ixi sincheni e inaa chujni.

¹⁹ Chónde e juasaya ndotáa ko janáa, kaxon tjue é chujni xranchi tjue e asáan.

²⁰ Ko je e chán ndachro chán:

—Kain chijni ji in kuitika on xrachiona. ¿Nge e ícha titjáña sinta a?

²¹ Ko ndo Jesús juatingíexin ndo:

—Siá nduaxin tjauan sinchetjúá asáan, nchekjia kain nge e tjintee chonda, ko tonchjiye e sen nóa kain tomia. Ko me e xrochónda ti tjintee jii ngajní. Tjume e tsji ia ko xrokjan ja a naa sen rua na.

²² Ko kuin en chán jaña, tsango koni e aséen chán, sakjui chán ixi tsango itsjé nge e ti tjintee chónda chán.

²³ Tjume e ndo Jesús ndache ndo sen teyuu chrikao ndo:

—Nduaxin xrontatjunta ixi tsango tangi tsixin in ngajní ti tetuan an ndo Dio, naa chujni chónda itsjé tomi.

²⁴ Ko nduaxin ntatjunta ixi ícha tangi a tsixin in naa kucamello ikon naa ntachika, ixi naa chujni chónda itsjé tomi tixin in ti tetuan an ndo Dio.

²⁵ Ko sen teyuu chrikao ndo kuin en sen nge e nichja ndo, tsango kuiye e ñao sen, ko juanchangi e kichuu sen:

—¿Ngisen tsjacha tsechón kain nchakon tjume e?

²⁶ Ko ndo Jesús jitsje e ndo sen, me e ndachro ndo:

—Chujni jua i tsechón na kain nchakon. Je o ndo Dio tajon ndo juachaxin tsechón chujni.

²⁷ Tjume e ndo Pedro ndachro ndo:

—Nhána, jan anna kuintu ana kain ti kuachondana ko rua ananta. ¿Jan anna nge e tsjachana?

²⁸ *Ko ndo Jesús juatingíexin ndo:

—Nduaxin ntatjunta nchakon tsii tsoña natjúá kain nge e, nchakon Chjen en ndo Dio, xjan tsijongi e xranchi chujni, tsake e xjan nunte ngata a ntaxitaon ti tsetuanxin xjan ko tsjako xjan ti ijié juachaxin chonda xjan, tjume e kaxon ja anta ti rue énta xjan xrochondanta teyuu ntaxitaon tsituanxinnta ko sinchéñaxinnta ijié ngajin ti teyuu tjajna ne e Israel.

²⁹ Ko kain sen kuintu e ndo a, ko sen kuintu e ndo kichuu ko jan kichuu, ndotée o janée, janchri e o chjen en o nunte e ixi kuitikaonna sen ko rua na sen jan an, sen me e tsango itsjé nge e tsayé e sen ko kaxon tsechón sen kain nchakon.

³⁰ *Ko kueya sen jai tsango tetuan an sen, nchakon me e ítsetuan i sen. Ko kueya sen tjinte a jai, nchakon me e je e sen ícha tsetuan an sen.

20

Ndo Jesús juakoxin ndo kondee sen nche e ixra ngataon ijngi

¹ Ngajní tetuanxin ndo Dio me e tonoxin xranchi naa xi chónda naa ijngi tsango ijié ko ndúyo kuachrje xa bijée xa kaxin xinhexra ixi tsikonchrijin xa tu uva.

² Ko kuitja xa xinhexra ko konchjianska o kichuu xa ko xroxenge e xa na naa tomi ndatin in denario ngujngu nchakon ko tjume e xruan an xa xinhexra ngataon ijngi.

³ Ko kuachrje xa hora naa ne e nchakon ko bikon xa ikaxin chujni jii ngusine tjajna ko chónda i na ixra.

⁴ Ko ndache xa na: “Itjinta tikonchrijinnta tu uva ko jian tsjenga anta na.” Ko je e na ikjui na.

⁵ Tjume e ngusine nchakon bijée xa ikaxin xinhexra, ko kaxon ti hora nínxin ne e nchakon kuachrje xa juée xa xinhexra.

⁶ Ko kóndo kaxon kuachrje xa hora na ó, ikjui xa ngusine tjajna ko kuitja xa ikaxin ninchexra, ni xro an stanche e ko ndachro xa: “¿Sonda stenta nti i nguixin nchakon ko xro an ixra stanche enta?”

⁷ Ko je e na ndachro na: “Ixi xro an ngisen chjánana ixra, méxin nti i stena.” Ko je e xa ndachro xa: “Itjinta nche enta xra na ko jian tsjenga anta na.”

⁸ Ko ó kontie ko xi chjakée ndache xa xi tetuen en xinchexra: “Tiye é xinchexra ko tjenge é xa na, tjangíxinxian tjenge é na xi kjui ó kóndo ko tsjexixin xi kjui ndúyo.”

⁹ Ko sa ó konchjiñe e xi kuixin in xra hora na ó ko ngujngu xa kuayé e xa naa tomi denario.

¹⁰ Tjume e konchjiñe e xi kuaxi xra ndúyo ko xraxaon xa ixi je e xa xrojuacha xa ícha itsjé tomi, ko xraje o kuayé e xa naakua tomi denario.

¹¹ Ko hora kuayé e xa tomi, bake a xa juaxruxin ti juacha xa.

¹² Ko ndachro xa: “Ni kuji ó kóndo naakua hora juinche e na xra ko kaxon xenge e na na xraje o xranchi juacha jan ana ti junta ana ixra nchiji nchakon ngataon súa.”

¹³ Ko xi xree ja in juatingíexin xa: “Jan an ndako rinta a, joina ixi xrojuenga anta na naa denario ko jaña kuaye enta.

¹⁴ Itsenta tomianta ko satjinta. Jan an tja on xrotjá a xi kuji ó kóndo xraje o xranchi ja anta.

¹⁵ Jan an, ¿á chonda i juachaxin ixi xrotjá a ngisen tja on tomina? O, ¿jitochjuya anta ixi ti jian rinta a jan an?”

¹⁶ *Méxin, ja in xrondachro chijni ji in: ni kuji ícha tjume e, ni me e ícha sa ó tsayé e na ti jian, ko ni kuji ícha sa ó, ni me e ícha tjume e tsayé e na ti jian tsajon ndo Dio ixi itsjé ni tsonchjiñe e ko kaxion ni tsinche e ndo.

Íjngo chronga ndo Jesús tsen en ndo

(Mr. 10:32-34; Lc. 18:31-34)

¹⁷ Hora sakjui ndo Jesús tjajna Jerusalén, kuachrendaxin ndo ti ste chujni, je e ndo ko sen teyuu chrikao ndo ko ndache ndo sen:

¹⁸ —Jai stetajin ina tjajna Jerusalén ko nti a xrotsé na Chjen en ndo Dio, xjan jongí e xranchi chujni, ko tsajon na xjan ngajin xitaana tetuan an ko xi tjako ley ne e ndo Dio, ko tsjankata a na xjan iji ko xrondachro na tsen en xjan.

¹⁹ Ko tsajon na xjan ngajin xi kuixin inaa tjajna ko ni me e tsjanao na xjan ko tsikaon xjan ko tsasintjian na xjan ko nti a tsen en xjan ko nchakon nínxin xroxechón xjan.

Ti juanchia janée ndo Jacobo ko ndo Juan

(Mr. 10:35-45)

²⁰ Tjume e janée ndo Jacob ko ndo Juan, chjen en ndo Zebedeo, je e jan ko yui chjen en jan konchjiñe e sen ngajin ndo Jesús ko bake exin jan ntatuchi in jan ngajin ndo Jesús ko kuinóatée jan ngajin ndo.

²¹ Ko ndo Jesús juanchangi ndo:

—¿Nge e tjauan?

Je e jan ndachro jan:

—Tja on ixi nchakon tsake enta nunte ngata a ntaxitaunnta ko tsjakonta ijié juachaxin, tájonnta juachaxin ixi yui chjan na tsake e xjan ti tsake e ja anta, naa xjan ndatsjonxin jian ko naa xjan ndatsjonxin ikjon.

²² Tjume e ndo Jesús ndachro ndo:

—Ja anta noa inta nge e tjanchianta. ¿Á chao ja anta tsi inta ti tsango itsjá tsi i jan an ko ti itsjá me e xrondachro ti chinga sinchenana ko tsintji jnina ko tsen enna?

Tjume e sen teyuu chrikao ndo ndachro sen:

—Jaán, chao.

²³ Tjume e ndachro ndo Jesús:

—Jaán, nduaxin ja anta tsango chinga sinta anta na xranchi sinchenana jan an, ko ti tsake enta ndatsjonxin jian o ndatsjonxin ikjon, je o Ndotána tikinixin en ndo xrondachro ndo ngisen tsayé e juachaxin me e.

²⁴ Ko hora kuin en sen ite chrjikao ndo Jesús, koñaao sen ngajin ndo Jacobo ko ndo Juan.

²⁵ *Tjume e ndo Jesús kuiye e ndo kain sen chrikao ndo ko ndachro ndo:

—Ja anta no anta ixi xi tetuan an tjajna, je e xa tituen en xa chujni ko xro an nge e nche e chujni siá xi tituan an tsajon a xa juachaxin ko xi tsango tituan an chujni xrokonda tsitikaon na nge e tituan an xa.

²⁶ *Ko ja anta jua i sinche enta jaña xranchi nche e je e na. Na i. Siá xrojan ja anta tjaunnta tsituan annta ícha, sa ó xrokonda tsitikaonnta nge e tsetuan annta sen kichuunta.

²⁷ Ko ngixe i ja anta ti tjaunnta ícha tsetuan annta, xrokonda tayakon ennta sen kichuunta ko xro an nge e tsjachanta.

²⁸ Jaña kaxon Chjen en Dio, xjan jongí e xranchi chujni, kui a xjan ixi chujni sinche e ixra ngajin xjan. Na i. Je e xjan kuíi xjan ixi tayakon en xjan chujni ko tsen en xjan ixi jaña tsantsjengí e xjan ijie chóna chujni.

*Ndo Jesús juinchexruen en ndo yuu ni tikon a
(Mr. 10:46-52; Lc. 18:35-43)*

²⁹ Ko kuachrjexin sen tjajna Jericó, itsjé chujni rué e ndo Jesús.

³⁰ Ko yuu ni tikon a ste na nunte ngande e cha o ko kuin en na ixi jitatsinga ndo Jesús, me e kuaxi kuyako na:

—Nchána, xjan kuachrjenixin ndo David, tikonóa naninta.

³¹ Ko chujni kuyakutee na ni tikon a ixi xrotenko na ko je e na ícha séen kuyako na:

—Nchána, xjan kuachrjenixin ndo David, tikonóa naninta.

³² Tjume e ndo Jesús kuixin ndo, ko kuiye e ndo ni tikon a ko juanchangi e ndo na:

—¿Nge e tjaunnta sinta a?

³³ Ko je e na juate e na:

—Nchána, tja onna tsikonna.

³⁴ Ko ndo Jesús bikonóe e ndo na ko bake e itja ndo ngata a ikon na. Ko tuinxin bikon na ko kaxon je e na rué e na ndo.

21

*Ndo Jesús kuixin in ndo tjajna Jerusalén
(Mr. 11:1-11; Lc. 19:28-40; Jn. 12:12-19)*

¹ Ndo Jesús ko sen teyuu chrikao ndo kuíi sen ó tjenka tjajna Jerusalén, naa tjajna Betfagé, nti a jii ijna ndatin in Olivo, ko ndo Jesús kuetuen en ndo yuu sen chrikao ndo,

² ko ndachro ndo:

—Itjinta tjajna ji a, nti a tsinchíinta naa kuntajno, kunchri, jichroá ba ko naa kuntajnochjan jikao ba. Tonxindange enta ba ko tsikuunta yui ba.

³ Ko siá xrojan ngisen tsjanchangi anta sonda satiku unta ba, ja anta ndachronta: “Nchána xrokonde e ba ko tsjexin tsonde e ndo ba, je e ndo tsituan an ndo tsikianna ba.”

⁴ Jaña kon en ixi jaña ó tsikjin naa ndo kuachronga chijnie ndo Dio ó sa ó, ko ja in tsindachro ndo:

⁵ Ndachenta chujni tjajna Sión:

“Tsje enta ndo rey na anta ó kuíi ndo ngajinnta,

ko je e ndo nchejié a aséen ndo,

naa kuntajno jita a ndo,

naa kuntajnochjan, chjen en naa kuntajno, ko tama.”

Jaña jitaxin xroon chijnie ndo Dio ó sa ó.

⁶ Ko sen chrikao ndo, ikjui sen, juinche e sen ti kuetuan an ndo Jesús.

⁷ Ko bika o sen kuntajno ko chjen en ba, ko bake e sen manta jitsáa sen ngata a ba, tjume e je e ndo kueta a ndo ba.

⁸ Ko tsango itsjé chujni ste nti a ko kuingo nā manta stetsáa nā ngata a cha o ko ikaxin nā konchrinjin nā chaan ntaā yua ko bingó nā ngatja cha o kaxon.

⁹ Ko kaxin chujni stetaon ko chujni sterué e nā ndo Jesús ko ja in stetoyako nā:

—Ijié juachaxin tikinixin en xjan kuachrjenixin ndo David. Tsango jian ndo kuixin ixi juachaxien Ndotáina jii ngajní. Ijié juachaxin tsayé e ndo.

¹⁰ Hora kuixin in ndo Jesús tjajna Jerusalén, kain chujni ste nti a xronka nā ko ndachro nā:

—¿Ngisen ji in?

¹¹ Ko itsjé nā ndachro nā:

—Ji i ndo Jesús chronga chijnie ndo Dio, ndo tjajna Nazaret tikinixin en nunte Galilea.

Ndo Jesús juinchetjúá ndo ni ngo

(Mr. 11:15-19; Lc. 19:45-48; Jn. 2:13-22)

¹² Ko ndo Jesús kuixin in ndo ningue ndo Dio ko kuantsje ndo kain ni stenchekji ko ni te na ngaxin in ni ngo. Ko konjamangi ndo ntaā jita a nge e nchekji nā ko ti tasingixin nā tomi ko ntaxitauen ni nchekji kuntúá.

¹³ Ko ndo Jesús ndachro ndo:

—Ja in ndachro xroon chijnie ndo Dio tsikjin sen kuachronga ó sa ó: “Nchanía, nchia nichjaxin chujni ngajin ndo Dio.” Jaña ndatin in nchia, ko ja anta juinchéñanta nchia tjaue xiche e.

¹⁴ Ko ngaxin in ni ngo konchjiñe e ni ntakutsin, ni ntarengo ngajin ndo Jesús ko je e ndo juinchexruen en ndo nā.

¹⁵ Ko kaxin xitaana tetuan an ko xi tjako chijnie ndo Dio bikon xa kain ni juinchexruen en ndo ko nge e juinche e ndo ko kuin en xa kaxin ichjan stetsje xjan ngaxin in ni ngo, ko ja in ichro ti stetsje xjan: “Ijié juachaxin tikinixin en ndo kuachrjenixin ndo rey David.” Ko xi stetin en tsango koñao xa

¹⁶ ko ja in ndache xa ndo:

—¿Á ritin én nge e stetsje xjan ji in?

Ko je e ndo ndachro ndo:

—Jaán, ¿ja anta á noa inta nge e ndachro xroon chijnie ndo Dio? Ko ja in ndachro xroon:

Ro a xjan nchínchín ko xjan stetaki bakéenta ti juasaya jian xrotsje xjan.

¹⁷ Tjume e je e ndo kuachrxixin ndo tjajna Jerusalén sakjui ndo tjajna Betania ko nti a joke e ndo tiie me e.

Ndo Jesús ko ntaā tajon tu higo

(Mr. 11:12-14, 20-26)

¹⁸ Ndúyo kua sen cha o ko ikjan sen tjajna Jerusalén ko ndo Jesús kuen en ndo jinta.

¹⁹ Ko bikon ndo naa ntaā tu higo ngande e cha o ko konchjiñe e ndo ti jii ntaā, ko xro an itu kuitja ndo, je o ika chónnda ntaā. Méxin ndache ndo ntaā:

—Kaínko nchakon xro an itu xrochónnda.

Ko ntaā tu higo tuinxin xema ntaā.

²⁰ Ko sen teyuu chrikao ndo Jesús bikon sen nge e kon en ntaā, me e xronka sen ko juanchangi e sen ndo:

—¿Sonda tuinxin xema ntaā tu higo?

²¹ *Ko ndo Jesús ndachro ndo:

—Nduaxin ntatjunta siá nduaxin xrochuntianta ko xro an nge e sinchengachrue asáanta, je a je o xranchi kon en ntāa tu higo, chao sinche enta. Ja anta chao xronichje enta ijnā ji in ko ja in xrondachenta jnā: “Satjixian nti i ko taritsinga ngia ndachaon”, ko jaña tson en.

²² Ko kain nge e tjaunnta, siá xronichje enta ndo Dio ko nduaxin xrochuntianta ngajin ndo, nduaxin tsaye enta nge e tsjanchianta.

Ijié juachaxin chónnda ndo Jesús

(Mr. 11:27-33; Lc. 20:1-8)

²³ Tjume e ndo Jesús kuixin in ndo ni ngo, ko juinchekuen en ndo chujni, me e konchjiñe e kaxin xitaana tetuan an ko kaxon kaxin xi judío, xi ícha tetuan an, ko juanchangi e xa ndo:

—¿Nge e juachaxin chonda ja a ixi ja in nche e ko ngisen tjáa juachaxin?

²⁴ Ko ja in juate e ndo Jesús:

—Kaxon jan an tsjanchangi anta naa nge e ko siá tsjatingíexinnta nge e tsjanchangi anta, jan an kaxon xrontatjunta ngisen chjána juachaxin.

²⁵ Ndo Juan ti kuikitée chujni, ¿no kuixin juachaxin me e? ¿Á ngajni o chujni kuituan an?

Tjume e jitjakaxin kichuu xa ko stendachro xa:

—Siá xrondachrona ixi ndo Dio tsiketuen en xi Juan, xrondachro xi ji i: “¿Sonda kuitikaon anta ti ndachro xi Juan?”

²⁶ Ko siá xrondachrona ixi chujni, kain ni tjajna tsoñao nā ixi xi Juan ndachro nā nichja xa chijnie ndo Dio.

²⁷ Tjume e juatingíexin xa:

—Nóna ina ngisen.

Ko ndo Jesús ndachro ndo:

—Jan an kaxon xrontatju inta ngisen chjána juachaxin rinta a ji i.

Ndo Jesús juakoxin ndo chijnie yuu xichájan

²⁸ Tjume e ndachro ndo Jesús:

—¿Nge e ndachronta ixi ti tseki anta? Bake e naa xi ko xi me e chónnda xa yuu cháje en xa, ko sa ó konchjiñe e xa ngajin naa cháje en xa ko ndachro xa: “Itjia nche é ixrā chjaka ti jii ntāa tu uva.”

²⁹ Ko juate e chán: “Na i, tjaun a itsji”, ichro chán. Ko tjume e kuindoxin chán ti jixraxaon chán ko kuitikaon chán ti ndachro ndotée chán.

³⁰ Ko tjume e kuitsje e xa inaa cháje en xa ko xraje o kuetuen en xa chán itsji chán ngataon ijngi ti jii ntāa tu uva ko juate e chán: “Jan an chao itsji”, ichro chán. Ko jui a chán.

³¹ Tjume e juanchangi ndo Jesús:

—¿Ngixe e ti yuu chajan kuitikaon chán nge e kuetuan an ndotée chán?

Ko je e sen ndachro sen:

—Chán sa ó kuituen en.

Ko ndo Jesús ndache ndo sen:

—Ko nduaxin xrontatjunta ixi chujni tjanchia tomi xroxrajon ngajin xi tetuan an ko nchri chónnda kueya xi, ni me e ícha sa ó tsixin in nā ti tetuan an ndo Dio ko tjume e ja anta.

³² *Ixi ndo Juan tikitée chujni, kuji ndo ko ja anta kuitikaon anta ti chronga ndo, ko ni xenge e nā ko nchri chónnda kueya xi, ni me e kuitikaon nā ti ndachro ndo. Ko ja anta maski bikonta jaña, kuindoxin anta ko kuitikaon anta.

*Xinche e xra ña i**(Mr. 12:1-12; Lc. 20:9-19)*³³ Ndo Jesús ndachro ndo:

—Tseki anta inaa chijni. Xranchi naa xi kuenga itsjé ntāa tu uva ngaya chjakée xa. Ko juinchéñe e xa ntāa tu uva naa korra, ko inge xa ti no tsáñaxin ndée tu uva. Kaxon juinçekonchjian xa naa ntāa ijié ti no xrotsjéxin xa nchijí jngi e xa.

'Ko tjume e juatoya xa nunte me e ngajin kaxin ni nche e ixra ko nchakon xroxexo tu uva je e na tsajon na ti tikinixin en xa ko tjume e sakjui xa ikjín.

³⁴ Ko nchakon kuaxi xexo tu uva, xi nunte e xruan an xa kaxin ni nchexrée xa tsjirué e na tu uva ti tikinixin en xa.

³⁵ Ko ni kuitu e ijngi chonda ntāa tu uva, ndako a juinche e na ixi itsé na xi nchexrée xi nunte e, naa xa bikaon xa, inaa xa naakóñaxón na xa, ko inaa xa kuaxi na xa ixro ko xro an nge e kuajon na.

³⁶ Tjume e xi nunte e xruan an xa ikaxin xi nchexrée xa ko xraje o juinçekao na ni me e.

³⁷ 'Ko tjume e xruan an xa cháje en xa ixi xraxaon xa xrochónde e na chán juasaya.

³⁸ Ko hora bikon na cháchjen en xi nunte e, ja in kuintejao na: “Chán ña tsitue e chán kain nge e chónnda ndotée chán. Cháña naatsóñaxónna chán ixi jaña tsitueina kain nge e tikinixin en chán.”

³⁹ Tjume e itsé na cháchjen en xi nunte e ko kuantsjexin na chán chjaka ko naakóñaxón na chán.

⁴⁰ Tjume e ndo Jesús juanchangi e ndo sen ste nti a:

—Nchakon tsij Nchée chjaka, ¿nge e sinçekao xa ni nchexra ña i?

⁴¹ Ko je e sen juatingíexin sen:

—Nchakon tsij nchée ijngi me e tsikonóe a xa ni ña i ko naatsóñaxón xa na, ko tsjée xa ikaxin xinçexra tsitue e chjaka ko ni me e tsajon na itu tikinixin en xa.

⁴² Ko ndachro ndo Jesús:

—¿Á juinçekuanxin anta xroon chijnie ndo Dio tsikjin sen kuachronga ó sa ó?

Ixro chaxro jueñao a ni ti te nchia,
ko jai ixro me e, ixro ícha tjintee tsiki texin nchia.

Ko ndo Dio jaña juinchéña ndo,
me e ti chaxro stetikonna jai.

Jaña ichro chijnie ndo Dio.

⁴³ 'Méxin xrontatjunta juachaxien ndo Dio tsachrja a ja anta ko tsayé e ikaxin chujni juachaxin me e ko je e ni me e jian tsitikaon na ixi tsajon na nge e tikinixin en Ndo Dio.

⁴⁴ Ko ngisen tsitsingata a ixro me e naatsenxón sen, ko siá ixro me e tsitsingata a ixro naa chujni, naa tsontsingaxon chujni.

⁴⁵ Ko xitaana tetuan an ko xi fariseo kuin en xa chijni juakoxin ndo Jesús, me e kuienxin xa ixi kondeexin je e xa ti ndachro ndo.

⁴⁶ Me e tjaun xa xrotsé xa ndo Jesús ixi tsije e xa ndo, ko jua i juinche e xa ixi ni tjajna ndachro na ixi je e ndo Jesús nichja ndo chijnie ndo Dio.

22*Kia kute e sen*

¹ Íjngo ndo Jesús kuaxi juako ndo ixi chijni ko ndachro ndo:

² —Ti no tetuan an ndo Dio me e xranchi naa chijni nichja ixi naa ndo rey juinchéña ndo naa kia ixi tsute e chjen en ndo.

³ Ko xruan an ndo xi nchexrée ndo tsikiye e xa chujni tsij na kia; ko ni me e chro a na kuij na.

⁴ Ko íjngo kuetuen en ndo xi nchexrée ndo ko ndachro ndo: “Ndachenta nã ixi ó konchjian ti sine nã, kain iko juntao ó kuen en ba ko kain nge e ó chao jii tsintekii nã kia”, jaña kuetuan an ndo rey.

⁵ Ko ni kuiye e ndo kia kuitikaon a nã. Naa xi kuiye e ndo sakjui xa chjakée xa ko inaa xa sakjui xa kuitsje e xa ixra chóna xa.

⁶ Ko ikaxin nã itsé nã xi bikao juajnée ndo rey ko bikaon xa ko naakóñaxón nã xa.

⁷ Tjume e ndo rey kuin en ndo nge e juinchekao nã xi xruan an ndo, me e tsango koñao ndo ko kuetuen en ndo xi soldadoe ndo ko naakóñaxón xi soldado ni ña i me e ko juaaka xa tjajnée nã.

⁸ Tjume e ndache ndo ni nchexrée ndo: “Kain nge e ó konchjian ixi sen tsute e ko ni kuiya a tsi a nã ixi tikinixien a nã tsii nã kia.”

⁹ Méxin, itjinta cha o tachrxexin chujni tjajna ko ndachenta ngixe i chujni tsii nã kia.”

¹⁰ Ko ni nchexra sakjui nã ko juejo nã itsjé chujni, ni jian ko ni ña i, ko kia me e tsango itsjé chujni xejo.

¹¹ ‘Hora kuixin in ndo rey ti ste ni kuji kia, bikon ndo naa xi jitsá i manta take e ni itji kia.

¹² Me e ndachro ndo: “Ja a, ¿sonda kuixi ian nti i ko tsikake a manta tetsáa ni itji kia ngajin sen tsute e?” Ko xi me e xro an nge e juatingíexin xa.

¹³ *Tjume e ndo rey kuiye e ndo ni stetaya ti sine chujni ko ndachro ndo: “Itsenta xi ña ko tinteenta tutée xa ko itja xa ko tjankanta xa nduja ti naxixe e; nti a xrotsjanga xa ko tse to neno xa.”

¹⁴ Tjume e ndachro ndo Jesús:

—Ja in ton en ixi kueya ni tjaun tixin in ti tetuan an ndo Dio ko je e ndo tsjé a sen tsinche e ndo.

Ti tsjengani nã ngajin xi tetuan an

(Mr. 12:13-17; Lc. 20:20-26)

¹⁵ Tjume e xi fariseo sakuntekji xa ko juao kichuu xa xranchi sinche e xa ixi ndo Jesús ndako a xronichja ndo naa nge e ixi jaña chao tsjankata a xa ndo ijie.

¹⁶ Méxin xruan an xa kaxin xi nchekuen en xa ko kaxin xi nchexrée xi Herodes ixi tsjanchangí e xa ndo Jesús ja in:

—Maestro, konónana ixi ja anta je o ti nduaxin nichjanta, ko ndako tjakonta chijnie ndo Dio, ko ja anta ta inta juachjaon nge e nichja chujni, ixi ja anta tsje enta aséen chujni.

¹⁷ Méxin nge e chronta, ¿á chao tsjenge eni nã xi tetuan an kuji xin tjajna Roma?

¹⁸ Ko ndo Jesús no e ndo ixi ndako a stexraxaon xa, me e ndachro ndo:

—Ja anta ndako a xraxaonnta. ¿Sonda tjaunnta ixi jan an ndako a xronichja?

¹⁹ Chjánanta naa tomi xengaxin nã.

Ko je e nã kuajon nã naa tomi ndatin in denario.

²⁰ Tjume e ndo Jesús juanchangi e ndo xa:

—¿Xranchi ndatin in ko ngisen ikon jinito tomi ji i?

²¹ Ko je e nã juatingíexin nã:

—Xi César tetuan an Roma, me e xi ikon.

Ko je e ndo ndachro ndo:

—Chje énta xi César nge e tjanchia xa ko chje énta ndo Dio nge e tikinixin en ndo.

²² Ko kuin en nã ja in, me e xraxaon nã:

—Xi ji in tsango no e xa.

Tjume e sakuintekji nã.

¿Á nduaxin xroxechónni?

(Mr. 12:18-27; Lc. 20:27-40)

²³ *Ko xraje o nchakon me e, kuntekii kaxin xi ndatin in saduceo, xi titikaon a ixi

xroxechón chujni, ko juanchangi e xa ndo Jesús:

²⁴ —Ja anta ti nchekuen ennta chujni, nge e chronta ti tsindachro ndo Moisés ixi siá naa xi tsen en xa ko tsintue a xa chjan ngajin janchri e xa, xi kichuu xa xrokonda tsute e xa nchrinchri e xi kuen en, ko siá xroxchónnda na ichjan, ichjan me e xrokjui xranchi chjen en xi kuen en.

²⁵ Bake e ngakjen en jan anna yaato xi, ko xi me e kichuu xa. Ko xi sa ó kute e xa ko kuen en xa ko kuichónnda i janchri e xa ichjan, me e xi kichuu xa kute e xa nchrinchri e xi kuen en.

²⁶ Ko jaña kon en xi yuxin, kaxon xi nínxin, ko kain yaato xa.

²⁷ Ko kain xa kuen en xa ko kaxon je e nchra kuen en nchra.

²⁸ Nchakon xroxechón kain chujni tsiken en, ¿ngixe e ti yaato xa tsoña ndoxi e nchra ixi kain xa kute e xa nchra?

²⁹ Tjume e ndo Jesús juatingíexin ndo:

—Ja anta, ¿á tsango noa inta nge e ichro xroon chijnie ndo Dio ko á chuxin anta juachaxien ndo?

³⁰ Ixi nchakon xroxechón kain chujni, xro an ngisen tsute e nti a, ko xro an sen xroxrajon ixi tsute e sen, ixi sen xroxechón tsintee sen xranchi sen ángel ne e ndo Dio ste ngajní.

³¹ Chijni nichja ixi xroxechón ni tsiken en, ja anta, ¿á juinchekuanxin anta nge e ndachro chijnie ndo Dio? Ixi je e ndo ja in ndachro ndo:

³² “Jan an ndo Dio, ndo titikaon ndo Abraham ko ndo Isaac ko ndo Jacob.” Ndo Dio je a ne e ni tsiken en. Na i. Je e ndo ndo Dio ne e ni stechón.

³³ Ko ni kuin en nge e nichja ndo xraxaon na ixi je e ndo tsango no e ndo ko jian nichja ndo.

Chijnie ndo Dio, chijni ícha tetuan an

(Mr. 12:28-34)

³⁴ Kain xi fariseo kono e xa ixi ndo Jesús jian juatingíexin ndo ngajin xi saduceo ko juinchekita ndo xa, méxin juejo kichuu xi fariseo

³⁵ ko naa xi fariseo, naa xi ícha no e ko tjako xa chijnie ndo Dio, juanchangi e xa ndo Jesús ixi tjaun xa ndako a xrojuatingíexin ndo:

³⁶ —Maestro, ¿ngixe e chijnie ndo Dio ti ícha tetuan an?

³⁷ Ndo Jesús ndachro ndo:

—“Ja anta xrotjue enta ndo Dio ixi nchijíi asáanta ko ti xraxaonxinnta.”

³⁸ Ji in chijni sa ó ko ícha tjintee kuetuan an ndo Dio.

³⁹ Ko chijni yuxin xraje o ndachro chijni: “Xrotjue enta ni kichuunta xranchi tjue enta asáanta.”

⁴⁰ *Yui chijni ji in ti kuetuan an ndo Dio kuachrjenixin kain ti kuetuan an ndo, ti juako ndo Moisés, ko kain ti juako sen kuachronga chijnie ndo Dio ó sa ó.

¿Ngisen kuachrjenixin ndo Cristo?

(Mr. 12:35-37; Lc. 20:41-44)

⁴¹ Ko xra ste kain xi fariseo, ndo Jesús juanchangi e ndo xa

⁴² ko ja in juanchangi ndo:

—¿Nge e xraxaonnta ixi ndo Cristo? ¿Ngisen kuachrjenixin ndo?

Ko je e xa ndachro xa:

—Ndo Cristo tsikachrjenixin ndo ndo David.

⁴³ Tjume e ndo Jesús ndachro ndo:

—Ndo David nichjaxin ndo ixi Espíritue ndo Dio ko ndachro ndo: “Nchána”,

⁴⁴ Me e ja in nichja Nchána Dio ngajin Nchána:

“Take énta ndatsjonxin jian ti ritjén jan an,

ko chon éntta ti tsakeja kain ni ningakon annta ngangí tutáanta.”

⁴⁵ ¿Xranchi ndo Cristo xrokuachrjenixin ndo ndo David ko je e ndo David ndachro ndo ixi Nchéé ndo ndo Cristo?

⁴⁶ Ko jua i juate e nináa xi ste nti a ti juanchangi ndo Jesús ko ti hora me e kuaxi í xro an nge e juanchangi e xa ndo.

23

Ndo Jesús juangí e ndo xi tjako ley ko xi fariseo

(Mr. 12:38-40; Lc. 11:37-54; 20:45-47)

¹ Ko kuaxi ndo Jesús nichje e ndo chujni kao sen teyuu chrikao ndo, ko ja in ndachro ndo:

² —Xi tjako ley chijnie ndo Dio ko xi fariseo xraxaon xa ixi je e xa ícha jian no e xa chijni juako ndo Moisés.

³ Méxin, kain nge e tsituan an xa titikaonnta ko nche enta me e, ko nche anta xranchi nche e je e xa ixi je e xa ndachro xa naa nge e ko je e xa nche a xa ti ndachro xa.

⁴ Ixi je e xa tetuan an xa ti tsango tangi sinche e chujni, ko je e xa titikaon a xa naa nchichjaon ko tingijna i xa chujni ixi tsitikaon na kaxon.

⁵ *Ko kain ti jian nche e xa tjaun xa tsikon chujni ko nche e xa juaxruxin take e xa nganito ntatjen xa ko ntachaan xa kaxin chajua iton, nti a tsikjin xa chijnie ndo Dio ko manta tetsáa xa tsikake e xa kueya chajua ícha jié ixi ti tetsáa ikaxin chujni.

⁶ Ko nchakon itji xa ni ngo o xrojan kia tjaun xa ixi chujni jian sinchesaye e na xa.

⁷ Ko ngataon ndasin ko ngaya cha o tjaun xa ixi chujni tsajon na juajna ko xrochónde e na xa juasaya* ko sinchekin in na xa xi tjako chijnie ndo Dio.

⁸ Ko ja anta tjancha inta ixi chujni xrontatjunta na sen nchekuen en chujni ja anta, ixi ja anta naakua naa ndo nchekuan annta me e ndo Cristo ko kain ja anta kichuunta.

⁹ Ko xro an ngisen ndachenta ndotánta ngata a nunte nti i ixi naakua naa Ndotánta chondanta, ndo jii ngajní.

¹⁰ Ko ndachro anta ixi ja anta ritaun enta chujni ixi je o ndo Cristo me e ndo jitaon en chujni.

¹¹ *Ngisen ícha tjaun tsituan an, sen me e xrokonda xrokjan sen chujni nche e xráanta.

¹² *Ixi ngisen ícha sinchejié aséen, sen me e ícha nunte tsintee sen, ko sen nchejié a aséen, sen me e ícha tsetuan an sen.

¹³ Ko lastu ja anta ti nchekuen ennta chujni ko ja anta fariseo, ti tjako yuu ikonnta, ti tije enta ntachja ti tetuan an ndo Dio ixi tsixin a chujni ko ja anta tixin anta ko tintue anta tixin in ikaxin chujni tjaun tixin in.

¹⁴ Ko lastu ja anta ti nchekuen ennta chujni ko ja anta chujni fariseo, ti tjako yuu ikonnta, ko tantsje enta nchri ka an ndo a nchra, ko tjaunnta tsikon chujni ixi tsango nichje enta ndo Dio. Méxin ja anta ícha tangi tson annta.

¹⁵ Lastu ja anta ti nchekuen ennta chujni ko ja anta chujni fariseo, ti tjako yuu ikonnta, ko tatsinganta ndachaon ko tsango ichrjinta ixi tsjachanta naa chujni tsitikaon ti tjakonta, ko nchakon juachanta chujni me e, tsango chinga nchekuen ennta na, ko chujni me e ícha ndako a nche e chujni ko chujni me e ícha tixinixin en chujni xrochexin xro i ixi ja anta.

¹⁶ Lastu ja anta ixi tjakonta ko ja anta ndakútsínnta. Ndachro ja anta nchakon xrojan chujni xrondachro ixi sinche e xrojan nge e ko ni ngo xronichjixin sen ko ndachro ja anta ixi tjinte a me e. Ko siá chika oro jii ngaxin in ni ngo xronichjixin sen, ja anta ndachronta ixi chijni me e tjintee ko nduaxin xroxenga na.

^{23:5} Mt. 6:1. * ^{23:7} juasaya respeto, honor ^{23:11} Mt. 20:26, 27; Mr. 9:35; 10:43, 44; Lc. 22:26. ^{23:12} Lc. 14:11; 18:14.

¹⁷ Tsango ninta ja anta ko ntakutsinnta. ¿Á tsango tjintee chika oro o á tsango tjintee ni ngo juinchetjúáxin chika oro?

¹⁸ Kaxon ndachro ja anta: “Xrojan chujni xrondachro ixi sinche e xrojan nge e ko xronichjaxin sen altar ko ja anta ndachronta ixi tjinte a me e. Ko siá xrondachro sen ixi sinche e sen xrojan nge e ko xronichjaxin sen nge e chjée sen ndo Dio ngata a altar me e ti tjintee ichro ja anta ko me e xrondachro ixi nduaxin xroxenga na.”

¹⁹ Tsango ninta ja anta ko ntakutsinnta. ¿Á tsango tjintee nge e xrochje énta ndo Dio?, o, ¿á ícha tsango tjintee altar ti tontjúáxin nge e tsajonnta?

²⁰ Ixi ngisen xrondachro ixi sinche e xrojan nge e ko xronichjaxin sen altar, je a nichjaxin sen je o altar. Na i. Kaxon nichjaxin sen kain nge e jii ngata a nti a.

²¹ Me e ngisen xrondachro ixi sinche e sen xrojan nge e ko xronichjaxin sen ni ngo, je a nichjaxin sen je o ni ngo. Na i. Kaxon nichjaxin sen ndo Dio jii nti a.

²² *Méxin, ngisen xronichjaxin sen ngajní, me e kaxon nichjaxin sen trono ne e ndo Dio ko ngisen jitetuan an nti a.

²³ Lastu ja anta ti tjakonta ley ko ja anta chujni fariseo. Ja anta ndako a xraxaonnta. Ja anta chje énta ndo Dio ti ite nge e tikinixin tsajonnta ne e kamenta ko anís ko comino. Ko titikaon anta ti nge e tjako ley: ti jian xrokonda sinche enta ko ti xrokonda tsikonóe enta sen kichuunta ko ti xrochuntianta ndo Dio. Kain ji i xrokonda sinche enta ko kaxon ti nge e tikinixin en ndo Dio tsajonnta.

²⁴ Ja anta ntakutsinnta, ti nchekangi enta kuchjisen nchíín ixi tsinga inta ba, ko ja anta tinganta naa kucamello tsango ijié.

²⁵ Lastu ja anta ti tjakonta ley ko ja anta chujni fariseo. Ja anta ndako a xraxaonnta. Ja anta tsango nchetjúánta tuenxin vaso ko laato, ko ngaxin in tsango kitja ixi xraxaonnta xrotsénta nge e je a tikinixin anta.

²⁶ Ja anta chujni fariseo tsango ntakutsinnta. Sa ó xronchetjúánta ngaxin in vaso ko laato ko me e tsontjúá tuenxin.

²⁷ *Lastu ja anta ti tjakonta ley ko ja anta fariseo. Ndako a xraxaonnta. Ja anta stenta xranchi naa tuye tsixrabaa chujni, tsango chaxro tsje e nduja, ko ngaxin in jikaon nte e chujni tsiken en ko kain nge e tjúa i.

²⁸ Jaña ja anta tjaunnta chujni tsikon na ixi ja anta tsango jiannta, ko ngaxin in asáanta ndako a xraxaonnta ko ña inta.

²⁹ Lastunta ti tjakonta ley ko ja anta fariseo. Ja anta ndako a xraxaonnta. Ja anta ti juincheñanta lápida ti tsixrabaa sen kuanichja chijnie ndo Dio ó sa ó ko chaxro nchetsojinnta ixro jita a tuye ne e sen tjúa aséen.

³⁰ Ko ja anta ndachronta siá xrobake enta nchakon bake e sen tachrí anta xrobingi-jna inta sen kóña sen juako chijnie ndo Dio.

³¹ Ko jaña ja onta ndachronta ixi nduaxin ja anta tsikachrxjinnta sen kóña sen kuanichja chijnie ndo Dio ó sa ó.

³² Méxin, jai ja anta tjaunnta sinchejxinnta ti kuanche e sen tachrí anta.

³³ *Ja anta ti tsikachrxjinnta kunchee! ¿Xranchi satsinge enta nchakon xrochexinnta xro i?

³⁴ Méxin, jan an xroxruan an chujni xrochronga chijnie ndo Dio ko chujni tsango no e ko chujni nduaxin tjako chijnie ndo. Ko ja anta naatsóñaxónnta sen ko tankanitonta sen ntacru ko ikaxin sen tson inta sen ngaxin in ni ngo ko tsenginta sen tjajna ko tjajna.

³⁵ Ko méxin, ja anta tsamanta ijié ti ne e sen jian kuenxin ngata a nunte ó sa ó. Ko tsamanta ijié ixi ti kuaxi kuen en sen jian xrangíxixín ndo Abel, ndo jian, ko kain sen hasta ti ndo Zacarías, chjen en ndo Berequías, kóñaxinnta tjenka altar ni ngo.

³⁶ Ko nduaxin ntatjunta ixi kain ijié me e tsama chujni jii jai.

*Tsjanga ndo Jesús**(Lc. 13:34-35)*³⁷ Tjume e ndachro ndo Jesús:

—Jerusalén, Jerusalén, ja anta ti ton innta sen tjako chijnie ndo Dio ko tóñaxinnta ixro sen xruan an ndo Dio ngajinnta. Jan an tsango tja on xrojuejunta xranchi naa kuchika tejo chjen en ba chringi nene e ba ko ja anta tjaun anta.

³⁸ Ko jai ndo Dio tsintu anta ndo.

³⁹ Ko jan an ntatjunta ixi í tsikon aninta jan an íjngo tsitjaja nchakon xrondachronta: “Tsango jian ngisen kuji ixi juachaxien Ncháina.”†

24*Ndo Jesús chronga ndo ixi xrojamangi ni ngo**(Mr. 13:1-2; Lc. 21:5-6)*

¹ Hora kuachrjexin ndo Jesús ni ngo, konchjiñe e sen teyuu chrikao ndo ixi tsanchangí e sen ndo Jesús xranchi tsikonchjian ni ngo.

² Tjume e ndo Jesús ndachro ndo:

—¿Á stetsje enta nchijií tjatu o ji in? Ko jan an nduaxin ntatjunta ixi kain ji in xrochjejin, ko xro an ixro tsake e ngata a inaa ixro, kain xrochjejin.

*Nge e tson en nchakon tsjexin kain nge e**(Mr. 13:3-23; Lc. 21:7-24; 17:22-24)*

³ Tjume e ikjui sen ti jii ijna Olivo ko nti a ndo Jesús bake e ndo nunte ko sen chrikao ndo konchjiñe e sen ko ja in ndachro sen:

—Ndachronta ngisa xrojamangi ni ngo ko, ¿nge e tson en nchakon tsji inta íjngo, ko nchakon tsjexin kain nge e jii ngata a nunte xasintajni?

⁴ Ko ja in juate e ndo Jesús:

—Jian tsje enta ixi xro an ngisen sintaya anta.

⁵ Ixi tsii kueya chujni xronichja na xranchi jan an ko ja in xrondachro na: “Jan an ndo Cristo.” Ko sincheye e na kueya chujni.

⁶ Ko tsin ennta steteto kaxin tjajna ko kaxon tsin ennta ixi tsaxi tse to ikaxin tjajna, ja anta xrakon anta ixi kain ji i xrokonda tson en ko xra je a tsjexin kain nge e ngata a nunte.

⁷ Naa tjajna tse to ngajin inaa tjajna ko naa xi tituan an tse to xa ngajin inaa xi tituan an. Ko tsango itsjé chujni tsoni e na ko tsango tsatse na jinta ko tsango tsontengi nunte ngixe i tjajna.

⁸ Kain ji i je o nandá xrangíxixín ti ijié juachjaon tson en chujni.

^{9*} Ko nchakon me e xrotsénta na ixi tsikaonnta ko kaxinnta naatsóñaxónnta na ko itsjé chujni xroningakon annta kondanaxin jan an.

¹⁰ Ko nchakon me e itsjé sen íxrochuntia ina sen ko je o sen tsjangí e kichuu sen ixi tsango xrochónde e kichuu sen juañao.

¹¹ Ko kueya xi xrondachro xa ixi je e xa nichja xa chijnie ndo Dio ko jaña sincheye e xa kueya chujni.

¹² Ko ixi tsango tsonkueya ni ndako a nche e, méxin kaxon sen titikaonna íxrotjue a kichuu sen.

^{13*} Ko kain sen xrochuntiana jan an ko tsokuaxi en sen ti chinga sinchekaon na sen, sen me e tsjacha sen tsehón sen kain nchakon.

¹⁴ Ko chijni ji i ti tjako jan an tsono e kain chujni jii ngata a nunte xasintajni, ixi jaña kain tjajna, je e na tsono e na ngisen jan an, tjume e tsjexin kain nge e.

† 23:39 *Ncháina* Señor *Ncháina* Jesús o *Ncháina* Dio 24:9 Mt. 10:22. 24:13 Mt. 10:22.

15 'Nchakon tsikonnta tsii xi tsango ndako a nche e ko tsake e xa ngaxin in ni ngo tsango tjúá, ji in ti ó tsichronga ndo Daniel jitaxin chijnie ndo Dio. Méxin ngisen nchekuanxin xroon ji in xrokonda tsienxin sen.

16 Nchakon me e sen ste nunte Judea xrokonda tsinga sen ti jii ijna.

17 *Ko ngisen jii ngata a nchando a, xroxingajin a sen tsjirué e sen xrojan nge e.

18 Ko sen ste ngataon ijngi, íxrokjan i sen ixi tsikao sen ti tsetsáa sen.

19 Ko lastu sen nchri, sen steyá chjen en ko sen stenchekaki ichjan nchakon me e.

20 Nichje enta ndo Dio ixi nchakon tsinge enta ti chinga tson en, je a nchakon tania ichrin o je a nchakon tjoké e chujni.

21 *Ixi tsake e ijié juachjaon ngata a chujni, xranchi bake a xra ti xrangíxixión nunte xasintajni, ko tsoen a ícha tjume e.

22 Ndo Dio tsango tjue e ndo sen kuinche e ndo, méxin nchakon tsii ijié juachjaon, tsonchrjen a juachjaon me e, ixi siá na i, kain sen tsen en sen.

23 'Méxin siá xrojan ngisen xrondachro: "Tsje enta nti i jii ndo Cristo", o "Tsje enta noyá a jii ndo", titikaon anta na.

24 Ixi tsonoxin kaxin xi xrondachro xa je e xa ndo Cristo ko kaxin xa xrondachro xa ixi je e xa nichja xa chijnie ndo Dio ko tsjako xa ijié juachxin ko ijié ixra sinche e xa, jaña tjaun xa sincheye e xa chujni tsikinche e ndo Dio.

25 Ó sa ó ntatjunta nge e tson en.

26 *Méxin, siá xrontatjunta na: "Tsje enta ti jii ntajie, nti a jii ndo Cristo", tji anta. O xrondachro na: "Jii ndo ngaxin in nchia", titikaon anta.

27 Ixi xranchi tachrxjexin xro i tóngíxin ndatsjonxin chuya ko ti jii xro i ti tetaonxin nchakon, jaña tsikon chujni nchakon tsii Chjen en ndo Dio, xjan jongí e xranchi chujni.

28 *Ixi ti no jitsinga ti tsiken en, nti a xroxexo kuntachrjen.

Nchakon xrokjan Chjen en ndo Dio

(Mr. 13:24-37; Lc. 21:25-33; 17:26-30, 34-36)

29 *'Ko tsatsinga ti chinga tson en chujni, nchakon me e chjiixro ítsingasáña i chjiixro ko tsonaxixe e. Ko nchanitjao ítsajon a chjixrue, ko nchanotsé tsitsingaxin nchanotsé ngajní ko kain nge e jii ngajní tsontengi.

30 *Ko tjume e tsonoxin ti jii ngajní naa nge e xrochronga ixi ikjan Chjen en ndo Dio, xjan jongí e xranchi chujni. Ko kain chujni jii ngata a nunte tsango xroxronka na ixi tsikon na Chjen en ndo Dio tsii xjan ngakjen en itjuj ko tsika o xjan ijié juachxin ixi tsango tituan an xjan.

31 Ko xroxruan an xjan sen ángel ne e xjan ixi séen tsanoa sen tjao e sen, me e xroxexo kain chujnie xjan tsj xín nganoó lado nunte xasintajni.

32 'Tanginta chijnie naa ntaa tu higo: nchakon taxi xechji ntaa, ko tajon ntaa kayua me e xrondachro ixi ó tsaxi tsii ichrin.

33 Jaña nche e ja anta kaxon, nchakon tsikonnta tsatsinga kain ji i, me e tsono anta ixi Ncháina ó tuinxin tsii ndo.

34 Ko nduaxin ntatjunta ixi kain ji i sa ó xrokonda tson en, ko chujni jichón jai xratsen a na.

35 Ngajní ko nunte xasintajni tsitjáña. Ko chijni nichja jan an, nai a tsitjáña chijni.

36 'Ko ngiora ko ngixe e nchakon tsii ndo xro an ngisen no e, ni sen ángel ste ngajní noe a sen, ni jan an, Chjen en ndo Dio, nóna i. Je o Ndotána, me e ndo no e.

37 'Ko xranchi kon en nchakon bake e ndo Noé jaña tson en nchakon tsii Chjen en ndo Dio, xjan jongí e xranchi chujni.

38 Ixi nchakon xra chrete a chujni inda, je e na bajine na ko baki i na, bakute e na ko bakajon kichuu na ixi tsute e na, ko kujj nchakon kuixin in ndo Noé ntabarco,

³⁹ ko kuienxin a n̄a nge e xrokon en, kuija ichrin ko inda sabikao n̄a ko kjun en na inda. Jaña tson en nchakon tsij Chjen en ndo Dio, xjan jongí e xranchi chujni.

⁴⁰ Ko xranchi nchakon me e jaña tsake e yuu xi ngataon ijngi, naa xa satsikao ndo xa ko í naa xa tsitu e xa.

⁴¹ Yuu nchri jita o nchra, naa nchra satsikao ndo nchra ko inaa nchra tsitu e nchra.

⁴² Jian tsje enta ixi noa inta ngiora tsi i Ncháina.

⁴³ *Ja anta xrokuienxinnta ji in ixi nchéé naa nchia, siá xrokono e xa ngiora tiie tsij naa xiche e ixi tsee xa, je e nchéé nchia xrokuejua i xa ixi tsintue a xa xiche e tsixin in xa ko tsee xa.

⁴⁴ Méxin, ja anta tarichrin anta ixi Chjen en ndo Dio, xjan jongí e xranchi chujni, tsij xjan hora ja anta xraxaon anta.

*Xinhexra titikaon ko xinhexra titikaon a
(Lc. 12:41-48)*

⁴⁵ 'Naa xinhexra, xi jian titikaon, xi me e tituen en xa xinhexrée nchéé xa ko tsajon xa nge e sine ni nhexra hora xrokonda sine n̄a.

⁴⁶ Juaxruxin tsake e xinhexra, xi titikaon, ixi nchakon tsij nchéé xa tsitja ndo xa ixi jinche e xa nge e kuituen en xa.

⁴⁷ Ko nduaxin xinhexra me e tsayé e xa ijié juachaxin tsituan an xa ngata a kain ti tjintee chóna nchéé xa.

⁴⁸ Ko siá xinhexra ña i xroxraxaon xa ixi nchéé xa tsonchrjen en tsij

⁴⁹ ko tsaxi xa tsóña xa xinhekao xa xra ko tjume e tsaxi xa tsi ikao ko sinekao xa ni tsikuan,

⁵⁰ ko nchakon tsij nchéé xi nhexra ña i, ngiora ko nchakon ti je e xa noe a xa

⁵¹ ko nchéé xa tsituan an ixi tsikaon xa ko xroxruan an xa ti ste kain ni ña i ko nti a xrotsjanga xa ko tse to neno xa ixi tsango xroxronka xa.

25

Ndo Jesús juakoxin ndo ixi ite nchrichajan

¹ *Ndo Jesús ndachro ndo:

—Ti tetuan an ndo Dio tson en xranchi kon en ti ite nchrichajan, nchrichan ikjui ti kute e chujni, ko kain je e nchrichan itsé nchrichan ti tikia ndaxi e ko kuachrje nchrichan kuichón en nchrichan ndo tsute e.

² Na ó nchrichan me e tsango jian titikaon nchrichan ko na ó nchrichan tsango se e nchrichan.

³ Ko nchrichan se e bikao nchrichan ti no tikia ndaxi e ko tsikikao a nchrichan yee ndaxi e xrohexin xro i.

⁴ Ko nchrichan jian titikaon bikao nchrichan ti no tikia ndaxi e ko kaxon bikao nchrichan ícha ndaxi e ixi tsanga i xroie nchrichan.

⁵ Ko konchrjen en ndo tsute e, ko je e nchrichan itja jaa nchrichan ko kuejua nchrichan.

⁶ Ko ngusine tiie kuin en nchrichan nichja kaxin chujni: “Ó kuij ndo tsute e, tachrjenta ixi ó kuij ndo.”

⁷ Me e kain nchrichajan bingatjen nchrichan ko kuaxi bikia nchrichan ndaxi e.

⁸ Ko na ó nchrichan se e, juanchia nchrichan ndaxi e ngajin na ó nchrichan jian titikaon: “Chjánananta nchíin ndaxi e ixi jitanga xroinana.”

⁹ Ko nchrichan jian titikaon ndachro nchrichan: “Na i, ixi batsitjáña ina ndaxi e jan anna ko ja anta. Cháña itjinta tike nanta ndaxi e ti no nchekji n̄a nda.”

¹⁰ Ko na ó nchrichan se e, nandá kuachrje nchrichan bike na nchrichan ndaxi e, ko je e ndo tsute e kuij ndo. Ko nchrichan na ó, jian titikaon, kuixinkao nchrichan ndo tsute e, ko bije e ntachja.

11 *Ko tjume e kuij na ó nchrichan se e, ko kuaxi ndachro nchrichan: “Ja anta ti tsuta anta, tantje enta ntächja ixi tsixin inna.”

12 Ko je e ndo ja in juatingíexin ndo: “Jan an nduaxin ntatjunta ixi chuxin anta.”

13 Ko ndo Jesús ndachro ndo:

—Tarichrin anta ko jian tsje enta ixi noa inta ngixe e nchakon ko ngiora tsii Chjen en ndo Dio, xjan jongí e xranchi chujni.

Ndo Jesús juakoxin ndo ixi tomi

14 *Tjume e ndachro ndo Jesús:

—Ti no tituan an ndo Dio tson en xranchi naa xi satsji xa ikjín, me e kuiye e xa xinchexrée xa ko bake e xa ngaya itja xinchexrée xa kain ti tjintee chónnda xa ixi xinchexrée xa sinchenche e xa tomi xra.

15 'Ko naa xinchexrée xa kuayé e xa na ó mil tomi, ko inaa xinchexrée xa kuayé e xa yuu mil tomi, ko xi nínxin kuayé e xa naa mil tomi. Ko xi tomie kuajon xa tomi ngajin xinchexrée xa xranchi bikon xa chjakon en xinchexrée xa. Ko juexin kuajon xa tomi, tjume e sakjui xa ikjín.

16 Ko xi kuayé e na ó mil tomi juinchenche e xa tomi xra ko juacha xa íjngo na ó mil tomi.

17 Jaña kaxon xi kuayé e yuu mil tomi juacha xa íjngo yuu mil tomi.

18 Ko xi kuayé e naa mil tomi ikjui xa ko juinchéña xa naa tuye ko juabaa xa tomie nchée xa.

19 'Ko kuatsinga itsjé nano ikjan nchée xinchexra me e, ko juinchéñaka o kichuu xa kuenta.

20 Ko sa ó kuij xi kuayé e na ó mil tomi ko chjée xa nchée xa íjngo na ó mil tomi ti juacha xa ko ndachro xa: “Ja anta chjánanta na ó mil tomianta ko jan an juacha íjngo na ó mil tomi.”

21 Tjume e nchée xinchexra me e ndachro: “Chao jian juinche e ja a, xinchexráana, ixi jian kuitikaoan. Ti kueya i tomi tjá a ko jian juinche e, ko jai ícha kueya tsaye é. Take é juaxruxin ja a.”

22 Tjume e kuij xi kuayé e yuu mil tomi ko ndachro xa: Yuu mil tomi chjánanta ko nti i jii íjngo yuu mil tomi juacha.

23 Tjume e nchée xa ndachro: “Chao juinche e ja a, xinchexráana, ixi ja a jian kuitikaoan. Ko maski tsjé a kuayé e, jian juinchenche e tomi xra, ko jai ícha itsjé tsaye é. Tatsinga ko juaxruxin tsojuna.”

24 Tjume e kuij xi kuayé e naa mil ko ndachro xa: “Nchána jan an nóna ixi ja a chujni tsango jintá ixi taye é nge e tikinixian ia ko tjejua ti no benga ia.

25 Méxin, xronkana ko ikjui juabaa tomia, taye é tomia. Nti i jii tomi.”

26 Tjume e juate e nchée xinchexra me e ko ndachro xa: “Ja a xinchexra tsango ña ia ko tsango sa a. Siá no a ixi jan an tsango jintana ko tandáa ti no benga i ko tjejo ti no kuintjía tsee,

27 cháña xrokuajuan tomina ngajin ninchexra banco. Nti a xrojuinchenche e na tomina xra, ko nchakon xrojui i jan an xrokuaya a chjen en tomina.”

28 Kaxon ja in ndachro xa: “Tantsje enta xi ji in tomi chónnda xa ko chjé énta xi chónnda ite mil tomi

29 *ixi ngisen chónnda itsjé tomi, je e sen tsayé e sen ícha, ko ngisen tsjé a chónnda, ti tsjé a chónnda sen kaxon ti me e tsachrje e sen.

30 *Ko xinchexra ña i, xi se e, tjankanta xa nduja ti naxixe e, nti a xrotsjanga xa ko tse to neno xa.”

Tsoñe e ijje chujni ste nunte xasintajni

31 *Nchakon xrokjan Chjen en ndo Dio, xjan jongí e xranchi chujni, tsika o xjan ijié juachaxin ixi tsango tsituan an xjan ko tsii kain sen ángel ko tjume e tseta a xjan ntaxitaon ko xrochóna xjan ijié juachaxin.

32 Ko nti a xroxajo kain chujni ne e kain tjajna nunte xasintajni, nti a tsantsjendexin xjan ngujngu chujni, xranchi nche e sen tingatjia kutuchjon, tantsjendáa sen kutuchjon ko nango tsake e kubito.

33 Ko tsake e xjan kutuchjon ndatsjonxin jian ko kubito ndatsjonxin ikjon.

34 Tjume e ndo rey xronache ndo sen ste ndatsjonxin jian: “Xrokuijnta ti juinchenchaonnta Ndotána ixi tsaye enta ti juntakiton annta ndo, ti juinchéña ndo nchakon xrangixixión kóna nunte xasintajni,

35 ixi kuen enna jinta ko ja anta chjánanta juiné, ko kuen enna inda ko kuajonnta nge e kui i, kuaji xranchi naa chujni kuixin ikjín ko ja anta kuajonnta ti no jokéna.

36 Ko chonda i nge e tsaria ko ja anta juincheckitsiininta, ko konína ko ja anta juasotsjenaninta, ko ndo achjiso bake é ko juasonta bikitsjenanta.”

37 Ko tjume e sen nche e jian ndachro sen: “Nchána, ¿ngisa bikona kuen ennta jinta ko kuajonna nge e juntenta?, ko, ¿ngisa bikona ixi kuen ennta inda ko kuajonna nge e kui inta?

38 ¿Ko ngisa biconanta xranchi naa ni kuixin ikjín ko kuajonna ti no joká anta? ¿Ko ngisa bikona ixi chonda inta nge e tsarianta ko jan anna juntakitsananta?

39 ¿Ko ngisa bikona koni anta o bake enta ndo achjiso ko juasotsja ananta?”

40 Ko ndo Rey xronachro ndo: “Nduaxin ntatjunta nchakon bingijnanta naa sen kichuunta, sen ícha nóa, me e xranchi xrobingijnaninta jan an.”

41 Tjume e ndo Rey kaxon xronache ndo ni ste ndatsjonxin ikjon: “Ja anta ti yamanta ijié, satjixinnta ti ritjén jan an ko itjinta ti jii xro i nai a tsanga jichón en xrohexin Xixron anxrée ko kain ni ángel ne e xa.

42 Ixi kuen enna jinta ko ja anta kuajon anta juiné ko kuen enna inda ko kuajon anta inda kui i.

43 Kuaji xranchi naa ni kuixin ikjín ko ja anta kuajon anta ti no xrojukéna ko kua-chonda i manta tsaria ko ja anta xro an nge e chjánanta tsaritsa a, konína ko bake é ndo achjiso ko ja anta juaso anta tsjenanta.”

44 Tjume e je e nā kaxon xronachro nā: “Nchána, ¿ngisa bikona ixi kuen ennta jinta ko kuen ennta inda ko tja inanta, ko xranchi ni kuixin ikjín ko chonda inta nge e tsarianta ko ni anta ko jija anta ndo achjiso ko jan anna bingina inanta?”

45 Tjume e Ndo Rey ja in tsjate e ndo: “Nduaxin ntatjunta ixi siá bingijna inta naa chujni kichuunta, naa ni ícha nóa, me e xranchi jan an xrojuinchenaninta.”

46 Ko ni ña i satsji nā ti no tsikaon nā kain nchakon. Ko sen jian nche e itsji sen ti tsechón sen kain nchakon —jaña chronga ndo Jesús.

26

*Ni ningakon en ndo Jesús juao nā xranchi naatsóñaxón nā ndo
(Mr. 14:1-2; Lc. 22:1-2; Jn. 11:45-53)*

1 Juexin chronga ndo Jesús kain ji i, tjume e nichje e ndo sen teyuu chrikao ndo, ko ndachro ndo:

2 —Ja anta no anta ixi titjáña yuu nchakon tsaxi kia pascua ko Chjen en ndo Dio, xjan jongí e xranchi chujni, tsajon nā xjan ixi tsenito nā xjan ntacru.

3 Tjume e kain xitaana ícha tetuan an ko xi tjako ley ne e ndo Dio ko xi tachrí tetuan an tjajna judío, jua o kichuu xa ti ntasien ndo a xitaana ícha tetuan an ndatin in Caifás.

4 Ko nti a juao nā xranchi sincheye e nā ndo Jesús ko xrotsé nā ndo ixi tjaun nā naatsóñaxón nā ndo.

⁵ Ko kaxon ndachro na:

—Kain nchakon tsonchrjen en kia, xro an nge e sinchekuuna xi Jesús ixi batsoñao chujni tjajna.

Naa nchri bingamá nchra ndo Jesús inda chaxro xraxe

(Mr. 14:3-9; Jn. 12:1-8)

⁶ Ndo Jesús jii ndo tjajna Betania ndo a ndo Simón, ndo kuachóna chinlepra.

⁷ *Me e konchjiñe e naa nchri ngajin ndo Jesús, ko bika o nchra naa xroxrao jitjiá inda chaxro xraxe, nda me e tsango tjintee nda. Tjume e je e nchra bingamá nchra nda ngata a jaa ndo.

⁸ Ko sen teyuu chrikao ndo Jesús, hora bikon sen nge e juinche e nchra, tsango koñao e sen nchra ko ndachro sen:

—¿Sonda juinche xenxian inda xraxe ña?

⁹ Cháña xrokúchji nda ko kueya tomi xrokuajon na ixi je e nda ko tomi me e xrochjeye e ni nóa.

¹⁰ Ndo Jesús kuin en ndo nge e stendache sen nchra, me e ndachro ndo:

—¿Sonda toñao enta nchra? Ti juinche e nchra ngajin, me e naa ixra tsango jian.

¹¹ Sen nóa kain nchakon xrochondanta sen, ko jan an íse a tsake e ngajinnta.

¹² Ixi ti bingamána nchra inda chaxro xraxe, me e xrondachro juinchekonchjianna nchra ixi xroxraabaana.

¹³ Ko nduaxin ntatjunta ixi nchakon tsin en chujni chijnina nguixin ngata a nunte xasintajni, kaxon xroxraxaon na ixi je e nchra bingamána nchra nda chaxro xraxe.

Xi Judas juinche kji xa ndo Jesús

(Mr. 14:10-11; Lc. 22:3-6)

¹⁴ Tjume e naa xi teyuu chrikao ndo Jesús, ndatin in xa Judas Iscariote, ikjui xa kuitsje e xa xitaana ícha tetuan an

¹⁵ ko ndachro xa:

—¿Ngijan in xrochjánana ko jan an tsingijna xrotséna ndo Jesús?

Ko xitaana tetuan an juenga xa na ngajin xi Judas, ní ite* tomi chika plata.

¹⁶ Ko nchakon me e kuaxi xi Judas tjée xa ngiora tsajon xa ndo Jesús ngajin na.

Ndo Jesús ko sen teyuu chrikao ndo juine sen kónkjín me e

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Nchakon xrangixixín kia ne e nutja chonda i nge e tjainxin nio, sen teyuu chrikao ndo Jesús konchjiñe e sen ngajin ndo ko ndachro sen:

—Ndachronta, ¿no tjaunnta tsonchjian sinexinna nutja kia Pascua?

¹⁸ Tjume e je e ndo ndachro ndo:

—Itjinta tjajna ijié, ndo a naa xi ko ja in ndachenta xa: “Ndachro ndo nchekuannana: Íse a tsake e ngata a nunte xasintajni, méxin nchanduya tja on sineki an sen ntakuan an ti nutja kia Pascua.”

¹⁹ Ko sen teyuu chrikao ndo Jesús juinchekonchjian sen ti sine sen kia Pascua xranchi je e ndo kuituan an ndo.

²⁰ Hora kontie ndo Jesús bake ekao ndo sen teyuu ti jii mesa,

²¹ ko xra stene sen, je e ndo ndachro ndo:

—Nduaxin xrontatjunta ixi naa ja anta tsajonninta ngajin ni ningakonna.

²² Ko me e juincheni e aséen sen ko ngujngu sen teyuu chrikao ndo kuaxi ndachro sen:

—Nchána, ¿á jan an sinta a jaña?

²³ Ko je e ndo juatingíexin ndo:

—Ngisen nekian ngaya latona, me e sen sinchekjina.

²⁴ Ko nduaxin Chjen en ndo Dio, xjan jongí e xranchi chujni, tsen en xjan xranchi nichja xroon chijnie ndo Dio, ko lastu xi sinchekji xjan. Cháña xi me e xrojongíe a xa ngata a nunte xasintajni.

²⁵ Ko ndachro xi Judas, xi sinchekji ndo Jesús:

—Ja anta ti nchekuannaninta, ¿á jan an sintakjinta?

Ko ndachro ndo Jesús:

—Ja a ndachrua.

²⁶ Ko xrastene sen, ndo Jesús itsé ndo naa nutja ko kuajon ndo juasaya ngajin ndo Dio. Tjume e konchrinjin ndo nio ko konchjeya ndo nio ngajin sen chrikao ndo ko ndachro ndo:

—Itsenta nutja ko intenta nio, ixi nutja ji in xranchi xrokjui cuerpona.

²⁷ Tjume e itsé ndo naa vaso jitjiá ndée tu uva ko kuajon ndo juasaya ngajin ndo Dio ko chjée ndo sen ko ndachro ndo:

—Tin innta kainnta

²⁸ ixi ji in ndée tu uva me e xrokjui xranchi jnina, jni konchjianxin ley natjúá, ko tsintji jni kondeexin itsjé chujni ko jaña tsooméxin ti ndako a juinche e na.

²⁹ Ko jai ntatjunta ixi ítsi a ndée tu uva íjngo, ti tsijija nchakon tsojuna ti jii juachaxin tetuan an ndo Dio. Ko nchakon me e tsi i ndée tu uva natjúá íjngo.

Ndo Pedro xrondachro ndo chúxin a ndo ndo Jesús

(Mr. 14:26-31; Lc. 22:31-34; Jn. 13:36-38)

³⁰ Ko juexin itsje sen naa soon, tjume e sakuintekji sen ijna Olivo.

³¹ Nti a ndachro ndo Jesús:

—Tiie jai kain ja anta íxrochuntia ininta ixi ndachro xroon chijnie ndo Dio: “Sintani a ndo tingatjia kutuchjon ko kutuchjon xrochjeke e ba.”

³² *Ko nchakon xroxechónna tsitao annta itsjina nunte Galilea.

³³ Ko ndo Pedro ndachro ndo:

—Maski kain sen tsintu anta sen, jan an na i.

³⁴ Ko ndo Jesús juatingíexin ndo:

—Nduaxin xrontatjua ja a tiie jai, xraxrotsje a kuntaxichíká ní vez, ja a xrondachrora ixi chuxin ana.

³⁵ Ko ndachro ndo Pedro:

—Maski naatsónaxónna na, jan an xrondachrjan i chuxin anta.

Ko kain sen chrikao ndo jaña ndachro sen kaxon.

Ndo Jesús nichje e ndo Ndotée ndo ti jii ijngi Getsemaní

(Mr. 14:32-42; Lc. 22:39-46)

³⁶ Tjume e kuiji ndo Jesús ko sen chrikao ndo ti jii naa huerto ndatin in Getsemaní ko ndache ndo sen:

—Nti i tinteenta ko jan an itsji xronichja a Ndotána.

³⁷ Tjume e sabikao ndo ndo Pedro ko yui chjen en ndo Zebedeo ko tsango kuaxi koni e aséen ndo.

³⁸ Ko ndache ndo sen:

—Tsango jitoni e aséenna xranchi ti xrokue enna. Ja anta nti i tituan anta ko tarichrin anta.

³⁹ Ko sakjui ndo ícha kjínxin ko bake exin ntatuchi in ndo ko kuisée ndo ti ngata a inche ko ja in nichje e ndo ndotée ndo:

—Ndotána, siá chao, tájonnta juachaxin ixi tsi a ti tsango itsjá jitjiá copa ji i. Ko ntatjunta ixi tsoen a xranchi jan an tja on. Na i. Ja anta nche enta xranchi ja anta tjaunnta.

⁴⁰ Ko tjume e ikjan ndo Jesús ti no kuintu e ndo sen ko je e sen stejua sen. Ko ja in ndache ndo ndo Pedro:

—¿Á jua i kuarichonnta naa hora?

⁴¹ Nichje enta ndo Dio ko tarichrin anta ixi jaña sinchengachrue a Xixron anxrée asáanta ixi espírituanta tjée ndo Dio ko ntau anta tjaun a.

⁴² Tjume e sakjui ndo íjngo ko ó yuxin kuinóatée ndo ngajin Ndotée ndo, ko ndachro ndo:

—Ndotána, siá xrokonda tsi i ti itsjá jitjiá copa ji i ko jaña tjaun ja anta, jan an tsitika on.

⁴³ Ko ikjan ndo ti no ste sen ko je e sen stejua sen ixi tsango chjé e sen kotachrin.

⁴⁴ Ko sakjui ndo íjngo ko nínxin nichje e ndo Ndotée ndo ko xraje o kuinóatée ndo.

⁴⁵ Tjume e ikjan ndo ti ste sen chrikao ndo ko ndachro ndo:

—¿Á xrarichrinnta ko stetjoka anta? Ó kuitja hora Chjen en ndo Dio, xjan jongí e xranchi chujni, tsajon nā xjan ngaya itja chujni ña i.

⁴⁶ Tingatjennta sachjina ixi ó kuii xi sinchekjina ko jai tsajonna xa.

Xraxin in nā ndo Jesús ndo achjiso

(Mr. 14:43-50; Lc. 22:47-53; Jn. 18:2-11)

⁴⁷ Ko xrajnichjao ndo Jesús, kuii xi Judas, naa xi teyuxin chrikao ndo, ko tsango itsjé chujni bika o xa, ni steyá ntaā ko chika espada, ni me e tsixrua an xitaana tsango tetuan an ko ni tachríi ne e tjajna judío.

⁴⁸ Ko xi Judas, xi juinchekji ndo Jesús, ja in tsindache xa nā:

—Xi tsetoxin jan an, me e xi xrotsénta.

⁴⁹ Tjume e konchjiñe e xa ngajin ndo Jesús ko ndachro xa:

—¿Á chao ritjennta, ja anta ti nchekuannaninta?

Ko kuētoxin xa ndo.

⁵⁰ Ko ndo Jesús ndachro ndo:

—¿Nge e tjauan ja a, xi tjento jan an?

Ko tjume e konchjiñe e nā itsé nā ndo.

⁵¹ Ko naa sen teyuu chrikao ndo Jesús kuantsje xa chika espada ko konchrinjin xa ndatsjon naa xinchexrée xitaana tetuan an.

⁵² Ko tjume e ndachro ndo Jesús:

—Xraxi ian chika ñā ngaya tjue é chika, ixi kain sen tjayaxin chika espada, chika espada tsenxin sen kaxon.

⁵³ ¿Nge e chrua ja a, á jua i tsjánchá a Ndotána ko je e ndo xroxruanna ndo teyuu ejército sen ángel?

⁵⁴ Ko siá xrokuii sen ángel, jaña íxrokuen a ti nichja xroon chijnie ndo Dio ó seno.

⁵⁵ *Tjume e ndo Jesús ndache ndo ni kuii itsé ndo:

—Ja anta ya anta ntaā ko chika espada xranchi xrotsénta naa xiche e. Ngujngu nchakon bake e ngaxin in ni ngo ixi ntakuan annta ko tsé aninta.

⁵⁶ Ko kain ji i jaña xrokonda tson en, ixi jaña chronga sen tsikjin xroon chijnie ndo Dio ó sa ó.

Tjume e kain sen chrikao ndo Jesús sabinga sen ko je o ndo kuitu e ndo.

Bikao nā ndo Jesús ngajin ni nchéña ijie

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Tjume e ni tsé ndo Jesús bikao nā ndo ngajin xitaana ícha tetuan an ndatin in Caifás, ko nti a ste kain ni tjako ley ne e ndo Dio ko xi tetuan an ni ngo.

⁵⁸ Ko ndo Pedro imao jirué e ndo ko kuiji ndo ti ntasien ndo a xitaana tetuan an ko hora kuixin in ndo nti a, bake e ndo tjenka ti ste xi stendáa nti a ixi tjaun ndo xrotsje e ndo nge e tson en.

⁵⁹ Ko xitaana ícha tetuan an ko xi tachríi, ni me e tjaun nā tsjankata a nā ndo Jesús ijie maski nduaxin a ti ndachro nā ixi tjaun nā naatsóñaxón nā ndo.

⁶⁰ Ko xro an ti ndako a kuitja na, maski kuiji kueya chujni juangí e na ndo. Ko ni me e ncheya na, ko tjume e kuij íjngo yuu ni nduaxin a nichja,

⁶¹ *ko ndachro na:

—Xi Jesús ji i kuin anna ndachro xa: “Jan an chao tsonchjejin ningue ndo Dio, ko je o níi nchakon sintakonchjianxin ni ngo íjngo.”

⁶² Ko xitaana ícha tetuan an bingatjen xa ko juanchangi e xa ndo Jesús:

—¿Á tsjatee a ti nge e ichro ni tjangi a?

⁶³ Ko ndo Jesús nichja i ndo. Ko ndachro xitaana ícha tetuan an:

—Jan an tituan an ixi nombrée ndo Dio, ndo jichón, ixi xrondachijiana, ¿á ja a ndo Cristo, Chjen en ndo Dio?

⁶⁴ Ko ndo Jesús ja in juatingíexin ndo:

—Ja a ndachijiana jaña. Ko jan an kaxon xrontatjua ixi jai tsaxi tsikonnta Chjen en ndo Dio, xjan jongí e xranchi chujni, tsake e xjan ndatsjonxin jian ti jii ndo Dio, ndo tsango tituan an, ko tsikonnta xjan tsí xín xjan ngajní ngakjen en itjuí.

⁶⁵ Ko xitaana ícha tetuan an, tsango koñao xa ko kuinchje xa manta jitsáa xa ko ndachro xa:

—Xi i tsango nichjangí e xa ndo Dio. ¿Nge e ícha tjaunnta tsin ennta? Íxrokonda i xi tangi. Ti kuin enna nichjangí e xa ndo Dio, ixi me ó.

⁶⁶ ¿Nge e ichro ja anta?

Ko ni kaxin ja in juate e na:

—Xi i chóna xa ijie, xrokonda tsen en xa.

⁶⁷ Tjume e kuaxi na bikitée na ndo ndatée na ngaya ikon ndo ko ikaxin na kuande e na iton ikon ndo.

⁶⁸ Ko ndachro na:

—Siá nduaxin ja a ndo Cristo, ndachrua ngisen kuanda a iton.

Ndo Pedro ndachro ndo ixi chúxin a ndo ndo Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Ko ndo Pedro jii ndo ti jii ntasien nchia, ko konchjiñe e naa nchri nche e ixra nti a ko ndachro nchra:

—Ja a kaxon kuajiku a xi Jesús, xi nunte Galilea.

⁷⁰ Ko kain ni ste nti a kuin en na nge e juate e ndo Pedro:

—Jan an chuxin a xi ña.

⁷¹ Tjume e ndo Pedro kuachrje ndo nduja ko tjenga ntachja inaa nchri bikon nchra ndo ko ndache nchra kain ni ste nti a:

—Xi ji i kaxon chrikao xa xi Jesús ne e tjajna Nazaret.

⁷² Tjume e ndo Pedro ndachro ndo íjngo ixi je e ndo chúxin a ndo ndo Jesús:

—Ndo Dio no e ndo ixi jan an chuxin a xi ña.

⁷³ Ko nchion tjume e ni ste nti a, konchjiñe e na ti jii ndo Pedro ko ja in ndachro na:

—Ja a nduaxin kuajiku a xi Jesús ixi kaxon nichja xranchi je e xa.

⁷⁴ Ko ndo Pedro kuaxi benganda teka ko ndachro ndo:

—Jan an chúxin a xi ña.

Ko hora me e itsje kuntaxichíká.

⁷⁵ Ko ndo Pedro xraxaon ndo ti nichja ndo Jesús: “Ko xraxrotsje a kuntaxichíká níi vez, ja a xrondachrua ixi chuxin ana.” Tjume e ndo Pedro kuachrje ndo nduja ko tsango tsjanga ndo.

27

Bikao na ndo Jesús ngajin xi Pilato

(Mr. 15:1; Lc. 23:1-2; Jn. 18:28-32)

¹ Ko ngasáña, kain xitaana tetuan an ko xi tachríi tetuan an tjajna judío juao kichuu xa xranchi sinche e xa ixí naatsóñaxón xa ndo Jesús.

² Ko kuintexin nã ndo Jesús ino ko bikao nã ndo ngajin xi Poncio Pilato, xi tetuan an kuixín tjajna Roma.

Kuen en xi Judas

³ *Tjume e xi Judas, xi tsijinckekji ndo Jesús, bikon xa ixí naatsóñaxón nã ndo, me e juincheni e aséen xa, ko ikjui xa bijinckekjan xa ti níite tomi chika plata tsikayé e xa, ti kuajon xitaana tsango tetuan an ko ni tachríi.

⁴ Ko ndachro xa:

—Jan an ndako a junta a ixí juentakji naa xi tsango jian.

Ko je e nã juate e nã:

—Jan anna kondana ina me e. Ja a no a nge e nche e.

⁵ Tjume e xi Judas juanka xa tomi chika plata ngaxin in ni ngo ko sakjui xa kuisin-tjianxin xa ixí ino tusin xa.

⁶ Ko xitaana tetuan an juejo xa tomi ko ndachro xa:

—Tomi ji i jua i tsaké e nã tomi ngaya ti tinga ofrenda, ixí tomi ji in yaa tomi jnié chujni.

⁷ Ko juao nã kondee tomi, tjume e kue na nã naa ijngi ndatin in Nunte xi Nchéña Ichi ixí nti a tsjabaa nã chujni tsiki xín inaa tjajna.

⁸ Ko nchakon jai jaña tin in nunte me e: Nunte Chóna Ijñi.

⁹ Jaña kon en nge e tsikjin ndo Jeremías, ndo kuachronga chijnie ndo Dio ó sa ó: “Kua nã ní ite tomi chika plata, tomi xengaxin nã ixí xi kuen en, (ñã ti tsindachro ni tjajna Israel tjintee xa),

¹⁰ tomi me e kuenaxin nã nunte ndatin in xi Nchéña Ichi, ixí jaña kuituanna Ncháina.”*

Xi Pilato juanchangi e xa ndo Jesús

(Mr. 15:2-5; Lc. 23:3-5; Jn. 18:33-38)

¹¹ Ndo Jesús jii ndo ngajin xi ícha tetuan an ko ja in juanchangi e xa ndo:

—¿Á ja a Rey ne e ni judío?

Ko ndo Jesús ndachro ndo:

—Ja a ndachrua.

¹² Ko kain xitaana tetuan an ko xi tachríi tetuan an tjankata a nã ndo ijié ko je e ndo Jesús xro an nge e juate e ndo.

¹³ Tjume e xi Pilato juanchangi xa:

—¿Á kuin en kain nge e ichro nã, juinche e?

¹⁴ Ko ndo Jesús xro an nge e juatingíexin ndo, méxin xi tetuan an xronka xa ko noe a xa nge e sinche e xa.

Stetoyako nã ixí tsen en ndo Jesús

(Mr. 15:6-20; Lc. 23:13-25; Jn. 18:38–19:16)

¹⁵ Ko kia Pascua xi tetuan an ngujngu nano bakajanda xa naa xi jixin in ndo achjiso, naa xi tjaun chujni tsachrje.

¹⁶ Ko xi jii ngaxin in ndo achjiso, naa xi tsango ña i, ndatin in Barrabás.

¹⁷ Ko nti a ste itsjé chujni, tjume e xi Pilato juanchangi e xa nã:

—¿Ngisen tjaunnta tsajanda, á xi Barrabás o xi Jesús nchekin innta Cristo?

¹⁸ Ko xi Pilato no e xa ixí tsango tochjuye e nã ngajin ndo Jesús, méxin tjaun nã tsen en ndo.

¹⁹ Ko xi Pilato jita a xa xitaon ti no tonchjianxin ijié ko nchrinchri e xa tsixrua an nchra naa juajna ngajin xa:

—Xro an nge e nchekua ndo Jesús ixí tsango tjúá aséen ndo ixí nakonkjin tsango chinga kuxinaxin kondee je e ndo.

²⁰ Ko xitaana tetuan an ko ni tachríi tetuan an juinchekateya nã chujni ixí tsjanche e nã xi Pilato tsajanda xa xi Barrabás ko naatsóñaxón nã ndo Jesús.

²¹ Ko tjume e xi Pilato íjngo nichje e xa kain chujni ste nti a ko ndachro xa:

—¿Ngisen tjaunnta tsajanda?

Ko je e nã juatingíexin nã:

—Tajanda xi Barrabás.

²² Tjume e xi Pilato juanchangi xa:

—¿Nge e sintakian xi Jesús, xi nchekin innta Cristo?

Ko kain nã kuyako nã:

—¡Tjankanítua xa ntãcru!

²³ Tjume e xi Pilato ndachro xa:

—¿Me nge e junta anta xi ji in?

Ko je e nã ícha séen kuyako nã ko ndachro nã:

—¡Tjankanítua xa ntãcru!

²⁴ Ko xi Pilato bikon xa ixí chujni ítitikaon a nã nge e ichro je e xa ixí je e nã ícha kuyako nã, méxin juanchia xa inda ko juné ma itja xa ko kain me e stetikon chujni ste nti a ko ndachro xa:

—Jan an tsama i ijie ti tsen en xi ji i, ixí xro an nge e sínká xa. Ja anta ti tsamanta ti tsen en xa.

²⁵ Ko kain chujni ste nti a ja in juatingíexin nã:

—Jan anna ko chjan nãna tsamana ijie ko jnié xi ñã.

²⁶ Ko tjume e xi Pilato kuantsje xa xi Barrabás ko kuetuan an xa ixí tsikaon ndo Jesús ko tjume e tsjankanito nã ndo ntãcru.

²⁷ Ko xi soldadoe xi Pilato bikao nã ndo Jesús ti jii ntasién nchia tituanxin nã ko nti a xejo kain xi soldado.

²⁸ Tjume e kuantsje e nã ndo manta jíá ndo ko juinchekake e nã ndo naa manta jãtsetié.

²⁹ Ko bãkẽ e nã ngata a jaa ndo naa corona tsikonchjianxin ntãcha a ko bãkẽ e nã ngaya itja ndo ti ndatsjonxin jian naa ntakuto. Ko tjume e take exin ntatuchi in nã ko tjanoa nã ndo ko ndachro nã:

—Kain nchakon tsake e, ndo rey tituen en ni judío.

³⁰ Ko tikitée nã ndatée nã ngaya ikon ndo ko itsé nã ntãã jíá itja ndo, me e tande e nã ntãã jaa ndo.

³¹ Ko juexin juano nã, tjume e kuantsje e nã ndo manta jãtsetié ko juinchekitsa nã ndo mantée ndo. Tjume e bikao nã ndo ixí tsenito nã ndo ntãcru.

Kuasintjian nã ndo Jesús ko nti a kuen en ndo

(Mr. 15:21-32; Lc. 23:26-43; Jn. 19:17-27)

³² Ko hora stetachrjeka o nã ndo Jesús, nti a jii naa xi tjajna Cirene, ndatin in xa Simón, ko kuetuen en nã xa tsama xa ntãcru ti no tsake e nã ndo Jesús.

³³ Ko ti kuiji nã ti no ndatin in Gólgota, (me e xrondachro Ntajaa ni tsiken en).

³⁴ Nti a chjée nã ndo Jesús tsi i ndo nchíin vinagre tsikintekjanxin xroãñ tsjá ko je e ndo tsjexion ndo xroãñ me e, ko kui a ndo.

³⁵ Hora juexin bãkẽ e xi soldado ndo Jesús nganito ntãcru, tjume e sondaonxin xa ixro ixí jaña tsono e xa ngisen tsjacha tsitue e manta jíá ndo ixí jaña tson en xranchi tsinichja sen kuachronga chijnie ndo Dio ó sa ó, ko ja in tsindachro sen: “Chjeye e nã mantána ko sondaonxin nã ixro ngata a manta.”

³⁶ Tjume e xi soldado nti a kuitu e xa ixí tsendáa xa ndo Jesús.

³⁷ Ko bãkẽ e nã naa ntãã ícha noixin ti jii jaa ndo, nti a jitaxin nge e kondeexin kóña nã ndo:

“Ndo Jesús, ndo Rey tikinixin en ni judío.”

³⁸ Kaxon kuenito na yuu xiche e nganito ntacru, naa xa ndatsjonxin jian ko í naa xa ndatsjonxin ikjon ti jii je e ndo.

³⁹ Ko ni stetatsinga nti a chinga ndache na ndo ko nchetengi jaa na,

⁴⁰ *ko ndachro na:

—Ja a ndachrua ixi tsonjamangia ni ngo ko níko nchakon sinchekonchjian ni ngo íjngo, cháña xingajinxian ntaa ña siá nduaxin ja a Chjen en ndo Dio.

⁴¹ Kaxon xitaana tetuan an ko xi tjako ley ko xi fariseo ko ni tetuan an tjajna, kain na juanoa na ndo Jesús, ko stetjao na:

⁴² —Ikaxin na bingijna xi ña ko je e xa jua i xingajinxin xa ntacru. Siá je e xa Rey ne e ni Israel, ko siá xroxingajinxin xa ntacru, me e tsitika onna xa.

⁴³ Je e xa chúntia xa ngajin ndo Dio, je e ndo tsingijna ndo xa siá nduaxin je e ndo Dio tjue e ndo xa ixi je e xa ndachro xa: “Jan an Chjen en ndo Dio.”

⁴⁴ Kaxon xiche e stenito ntacru chinga ndache xa ndo Jesús.

Kuen en ndo Jesús

(Mr. 15:33-41; Lc. 23:44-49; Jn. 19:28-30)

⁴⁵ Ko xrangusine nchakon ko kuiji hora nínxin konaxixe e ngata a nunte xasintajni.

⁴⁶ Ko hora me e ndo Jesús séen ndachro ndo:

—Elí, Elí, ¿lama sabactani? —ji i xrondachro: Ndotána, Ndotána, ¿sonda jan on kuintunaninta?

⁴⁷ Ko kaxin ni ste nti a kuin en na nge e ichro ndo, me e ndachro na:

—Ndo kuanichjixin chijnie ndo Dio, ndo Elías jitiye e xi Jesús.

⁴⁸ Ko naa xi jii nti a itsé xa naa manta ko juinchetjao xa vinagre ko baje e xa ikon naa ntasé ko chjee xa ndo Jesús xrokui i ndo.

⁴⁹ Ko ikaxin ni ste nti a ndachro na:

—Chon én, tsikonna á tsii ndo Elías tsingijna ndo xi Jesús.

⁵⁰ Tjume e ndo Jesús séen kuyako ndo íjngo, ko me e juexin kuen en ndo.

⁵¹ Ko hora me e kaxon velo jii ngaxin in ni ngo ti jingakuenxin luga tsango tjúa, chrinjin ngusinexin xrangíxixión noi hasta ti nunte. Ko hora me e kontengí nunte ko chjenga ixro.

⁵² Ko xitje e tuye ti xrabaa chujni ko itsjé sen tsikitikaon ndo Dio, sen tjúa aséen, xechón sen.

⁵³ Nchakon xechón ndo Jesús, tjume e sen xechón, kuij sen tjajna Jerusalén, tjajna tjúa, ko nti a itsjé chujni bikon ixi je e sen tsixechón sen.

⁵⁴ Ko xi centurión ko xi soldado jindaa ndo Jesús, bikon xa ixi kontengí nunte ko kain nge e kon en, tsango xronka xa, ko ndachro xa:

—Xi ji i nduaxin Chjen en ndo Dio.

⁵⁵ *Ko kínxin stetsje e kueya nchri, nchri tsirue e ndo Jesús tsiki xin tjajna Galilea, nchri me e kuayakon en ndo hora bika o na ndo.

⁵⁶ Ngakjen en ni ste nti a jii jan María Magdalena ko jan María, janée ndo Jacobo ko ndo José, ko janée chjen en ndo Zebedeo.

Ndo Jesús xrabaa ndo

(Mr. 15:42-47; Lc. 23:50-56; Jn. 19:38-42)

⁵⁷ Hora kontie, kuij naa xi chóna tsango itsjé tomi, kuixin tjajna Arimatea, xi me e ndatin in xa José. Kaxon xi me e juinhekuen en ndo Jesús xa.

⁵⁸ Ko xi José ikjui xa ngajin xi Pilato, bijanchia xa cuerpoe ndo Jesús ko xi Pilato kuajon xa juachaxin.

⁵⁹ Tjume e xi José ikjui xa ko kuajin xa ndo Jesús ko kuintsía xa ndo naa manta tjúa.

⁶⁰ Ko bākē e xa cuerpoe ndo ngaya naa tuye natjúá tsikoña nganito naa itjao ko kuincheka xa naa ixro ijié bijeexin itjao ko tjume e sakjui xa.

⁶¹ Ko nti a jii jan María Magdalena ko inaa jan María, ste sen nunte ti jii tuye.

Xi soldado jindaa tuye jixrabaa ndo Jesús

⁶² Ko ndúyaxin ti nchakon tjoké e sen tjajna Israel, xitaana tetuan an ko xi fariseo kuitsje e nā xi Pilato

⁶³ *ko ndachro nā:

—Jan anna stexraxa onna ixi xi Jesús, xi kuancheya, ti xra jichón xa ndachro xa: “Nchakon tsen enna, jan an xroxechónna nchakon nínxin.”

⁶⁴ Méxin, xruan an xi soldado tsendáa xa tuye kaní nchakon, ixi bā tiie tsii ni bajikao xi Jesús ko tsee nā cuerpoe xa ko tjume e xronache nā chujni tjajna ixi xechón xa. Ko me e ícha tsitikaon nā xi Jesús.

⁶⁵ Tjume e ndachro xi Pilato:

—Ñā ste xi soldado. Ja anta itjinta ko jian tije enta tuye ti tsijabaa nā xi Jesús.

⁶⁶ Ko je e nā ikjui nā ko bākē e nā naa ixro ijié bijeexin tuye ko bākē e nā naa seña ngata a ixro ko nti a kuintu e nā kaxin xi soldado ixi tsendáa xa tuye.

28

Ndo Jesús xechón ndo

(Mr. 16:1-8; Lc. 24:1-12; Jn. 20:1-10)

¹ Kuatsinga nchakon tjoké e sen tjajna judío. Xratingasáña i nchakon xrangíxixín semana, kuji jan María Magdalena ko inaa jan María kuitsje e sen ti tsixrabaa ndo Jesús.

² Ko hora me e kontengí nunte ixi naa ndo ángel ne e ndo Dio xingajinxin ngajní ko je e ndo kuintjian ndo ixro jijeexin itjao ko bake e ndo ngata a ixro me e.

³ Ko ndo ángel me e tóngíxin ndo ko manta jiá ndo tsango tjúá xranchi chrinta.

⁴ Ko xi soldado ste nti a, hora bikon xa ndo ángel, tsango xranga xa ko tjaun xrokuin-
teken en xa ixi tsango xronka xa.

⁵ Ko ndo ángel me e ja in nichje e ndo sen nchri:

—Ja anta sen nchri, xrakon anta. Jan an nóna ixi tjéenta ndo Jesús, ndo kuenxin nganito ntacru.

⁶ Ko a ndo nti i, ixi je e ndo ó xechón ndo xranchi chronga ndo ó sa ó. Xrokuiinta ko tsje enta ti no bākē e nā ndo.

⁷ Ko tuinxin satjinta tindachenta sen bajikao ndo ixi je e ndo ó xechón ndo ko je e ndo ó sakuitaon ndo tjajna Galilea. Nti a tsikonnta ndo. Me e ntano anta.

⁸ Ko sen nchri kuachrxexin sen ti no tsixrabaa ndo Jesús, ko stexronka sen ko steché e sen. Tjume e nteeto sakjui sen kuichronga sen ngajin sen chrikao ndo Jesús.

⁹ Ko je e ndo Jesús konoxin ndo ko kuajon ndo juajna ngajin sen nchri. Ko je e sen konchjiñe e sen ngajin ndo ko joa sen tutée ndo, ko kuajon sen juasie sen.

¹⁰ Tjume e je e ndo ndachro ndo:

—Xrakon anta, ko satjinta tikeki enta sen kichuuna ko itsji sen tjajna Galilea, nti a tsikonxin sen.

Ti chronga xi soldado

¹¹ Ko hora sakjui sen nchri, kaxin xi soldado jindaa ti tsixrabaa ndo Jesús sakjui xa tjajna Jerusalén kuichronga xa ngajin xitaana tetuan an kain nge e kon en.

¹² Tjume e xitaana tetuan an nichje e xa xi tetuan an tjajna ko juao nā ixi xrochjée nā kueya tomi xi soldado.

¹³ Ko ndache nā xi soldado:

—Ja anta ndachronta ixi ó tiie me e itsenta kotachrin ko stechrinnta, me e kuii ni chrikao xi Jesús, ko kuee nã cuerpoe xa, jaña chronta.

¹⁴ Ko siá tsono e xi tetuan an nunte Israel, jan anna xronichja ana xa ixi tsoñao a xa ngajinnta.

¹⁵ Ko xi soldado kuayé e xa tomi ko juinche e xa xranchi kuituan an xitaana. Ko ti kon en nchakon me e ni tjajna Israel jaña teki nã hasta ti nchakon jai.

Ti kuetuan an ndo Jesús

(Mr. 16:14-18; Lc. 24:36-49; Jn. 20:19-23)

¹⁶*Ko ti tenaá sen chrikao ndo Jesús sakjui sen ijnã nunte Galilea ixi jaña tsiketuan an ndo.

¹⁷ Ko hora bikon sen ndo, kuajon sen juasaya ngajin ndo ko kaxin sen xratitikaon a sen ixi á je e ndo o na i.

¹⁸ Ko ndo Jesús konchjiñe e ndo ko ndachro ndo:

—Ijié juachaxin chjána ndo Dio ngajni ko ngata a nunte xasintajni,

¹⁹*méxin, itjinta kain tjajna jii ngata a nunte xasintajni ko nchekuen ennta kain chujni chijnina ixi jaña tsitikaonna nã kaxon. Ko ni tsitikaon, tikitéenta nã ixi juachaxien Ndotána ko nombrée Chjen en ndo ko Espíritue ndo.

²⁰ Ko nchekuen ennta sen ixi tsitikaon sen kain nge e kuetuan an. Ko jan an tsake e ngajinnta kain nchakon hasta tsjexinja nunte xasintajni. Jaña tson en.

Chijnie ndo Jesús chronga ndo Marcos

Nichja ndo Juan Bautista chijnie ndo Dio ngata a ijna

(Mt. 3:1-12; Lc. 3:1-9, 15-17; Jn. 1:19-28)

¹ Ja in xrangixín chijni jian ne e ndo Jesucristo, chjen en ndo Dio.

² Xranchi jitaxin xroon tsikjin ndo profeta Isaías, ndo tsichronga chijnie ndo Dio ó sa ó, ko ja in ndachro xroon:

Jan an xroxruan an naa ngisen xrochronga chijnina, ndo me e tsitao an nti a ixi sinchekonchjian an ndo cha o.

³ Ko tsin ennta naa té sen tsake e ntajie, ko tsuyako sen ko xrondachro:

“Nchekonchjiannta cha o tsixin in Ncháina, tantje enta naa cha o nao.”

⁴ Ji i kon en nchakon kuij ndo Juan Bautista, bake e ndo ntajie bikitée ndo chujni. Juinçekuen en ndo na ixi xrokonda tsindoxin na ti ndako a kuanche e na ko xrobikitée na ixi jaña xrokomé e ijie chóna na.

⁵ Kueya na kuixin na nunte Judea ko tjajna Jerusalén kuij na ti bake e ndo Juan ixi tsin en na nge e ndachro ndo ko chronga na nge e ndako a juinche e na, ko ndo Juan bikitéexin ndo na ndajitinga ndatin in Jordán.

⁶ Mantée ndo Juan tsikoña ixi chjuen kucamello ko tjuá jingatoxin ndo kaxon tsikoña tjue é iku. Ko bajine ndo kuchjua ko tsjeen kunoa jii ntajie.

⁷ Ko ndo Juan juinçekuen en ndo na chijnie ndo Dio ko ndachro ndo:

—Tuenxinna jan an jirué e naa ngisen chóna ícha ijié juachaxin ixi najan an. Ixi jan an chonda i juachaxin tsoxindanga a tjué katée ndo.

⁸ Jan an bikitéexinta inda ko je e ndo tsij ndo tsikitéxinnta ndo Espíritue ndo Dio.

Ndo Juan bikitée ndo ndo Jesús

(Mt. 3:13-17; Lc. 3:21-22)

⁹ Nchakon me e ndo Jesús kuachrjexin ndo tjajna Nazaret nunte Galilea ko ndo Juan bikitéexin ndo ndo Jesús ndajitinga ndatin in Jordán.

¹⁰ Ko hora kuachrjengixin ndo Jesús inda, tuinxin bikon ndo xitje e ngajni ko espíritue ndo Dio xingajin xranchi naa kuntúá ko bake e ngata a jaa ndo Jesús.

¹¹ *Ko kuin en na nichja naa té sen kuixin ngajni, ndachro:

—Ja a chjan na ko jan an tsango tjua anta. Ko jan an juaxruxin ritjén ixi ja a.

Xixron anxrée tjaun xa xrojuincheye e xa ndo Jesús

(Mt. 4:1-11; Lc. 4:1-13)

¹² Ko tjume e Espíritue ndo Dio bikao ndo Jesús ngata a ijna.

¹³ Nti a bake e ndo Jesús yuu ikán nchakon ko nti a jii iku jie e ko Xixron anxrée tjaun xa xrojuincheye e xa ndo. Ko tjume e sen ángel kuij sen kuayakon en ndo Jesús.

Ndo Jesús tjangixin ndo nchekuen en ndo chujni

(Mt. 4:12-17; Lc. 4:14-15)

¹⁴ Juexinja xraxin in na ndo Juan ndo achjiso, tjume e ndo Jesús sakjui ndo nunte Galilea ko juinçekuen en ndo na chijni jian xranchi jii ti no tetuan an ndo Dio.

¹⁵ *Ko ndachro ndo:

—Ó kuij nchakon, tsij juachaxien ndo Dio. Méxin tintu enta nge e ndako a xraxaonnta ko titikaonnta chijni jian.

Ndo Jesús kuiye e ndo noó sen itsé kuchee
(Mt. 4:18-22; Lc. 5:1-11)

¹⁶ Ndo Jesús jitji ndo ngande e inda nunte Galilea ko bikon ndo ndo Simón ko ndo kichuu ndo Simón ndatin in Andrés. Je e sen stetsé sen kuchee ko stetjánka sen nocha a chringi inda.

¹⁷ Ko ndachro ndo Jesús:

—Rua naninta, ko xrotjá anta ixrã xrotsénta chujni ixi tsitikaonna na.

¹⁸ Ko tuinxin kuintu e sen nocha a tséxin sen kuchee ko rué e sen ndo Jesús.

¹⁹ Ko kjín a kuiji ndo Jesús ko bikon ndo ndo Jacobo ko ndo kichuu ndo, Juan, chjen en ndo Zebedeo. Je e sen ko ndotée sen steyá sen naa ntábarco stenchekonchjian sen nocha a ti tséxin sen kuchee.

²⁰ Ko tjume e ndo Jesús kuiye e ndo sen kaxon. Ko tuinxin kuintu e sen ndotée sen, ndo Zebedeo, ko je e ndo kuituekao ndo xinhexrã ko ntábarco. Ko ndo Jacobo ko ndo Juan rué e sen ndo Jesús.

Naa xi bachóna espíritue Xixron anxrée
(Lc. 4:31-37)

²¹ Ko tjume e kuiji sen tjajna Capernaum ko nchakon sábado, nchakon tjoké e na, kuixin in ndo Jesús ningue Israel ko kuaxi ndo juinchekuen en ndo chujni nti a.

²² *Ko ni ste nti a xronka na xranchi tjako ndo ixi chijnie ndo chóna ijié juachaxin ko je a xranchi nichja ni tjako ley.

²³ Ko ngaxin in ni ngo me e jii naa xi chóna espíritue Xixron anxrée ko séen kuyako xa ko ndachro xa:

²⁴ —Tintunana, Jesús tjajna Nazaret. ¿Á jui ia ixi sinchetjáñana? Jan an chuxian ko nóna ixi ja a naa ngisen ícha tjúa tsixrúa an ndo Dio.

²⁵ Ko ndo Jesús kuyakutee ndo espíritue xi ña i, ko ndachro ndo:

—Tenkua, ko tachrxexian aséen xi ña.

²⁶ Ko espíritue Xixron anxrée juanka xi me e nunte ko kuyako xa séen ko kuachrje espíritue mé e.

²⁷ Ko kain na xronka na ko ndache kichuu na:

—¿Ngisen ji í? ¿Nge e chijni natjúá nichja xa? Je e xa chóna xa ijié juachaxin ko tetuen en xa espíritue Xixron anxrée ko titikaon espíritue.

²⁸ Ko nchijí nunte Galilea kono e na xranchi nchexruen en ndo Jesús chujni ko xranchi nichja ndo.

Ndo Jesús juinchexruen en ndo jachée ndo Simón Pedro
(Mt. 8:14-15; Lc. 4:38-39)

²⁹ Tjume e ndo Jesús kuachrxexin ndo ni ngo, ko sakjui ndo ndo a ndo Simón ko ndo Andrés, ko sabikao ndo ndo Jacobo ko ndo Juan.

³⁰ Ko jachée ndo Simón jitsinga jan, níxin jan súa, ko ndache sen ndo Jesús nge e chóna jan.

³¹ Ko ndo Jesús konchjiñe e ndo ti jitsinga jan ko itsé ndo itja jan ko juinchengatjen ndo jan. Ko tuinxin kuachrje e jan súa ko kuajon jan juine sen.

Ndo Jesús juinchexruen en ndo kueya ni ni e
(Mt. 8:16-17; Lc. 4:40-41)

³² Ko ó kuitaon nchakon ko kontie, ko bikao na ni ni e ko ni chóna espíritue Xixron anxrée ti jii ndo Jesús

³³ ko nchijí tjajna xra o na ngandangi nduja nchia ti jii ndo.

³⁴ Ko ndo Jesús juinchexruen en ndo kain ni ni e, ni chónnda ngixe i ichin ko kuantsje ndo itsjé espíritue Xixron anxrée. Ko kuintue a ndo xronichja xa ixi je e xa no e xa ngisen je e ndo.

*Ndo Jesús juinchekuen en ndo ni ste nunte Galilea
(Lc. 4:42-44)*

³⁵ Ko nandá jitingasáña kuaya ndo Jesús, kuachrjexin ndo tjajna me e, sakjui ndo naa nunte xro an ngisen ste, nti a xronichje e ndo ndotée ndo jii ngajní.

³⁶ Ko tjume e ndo Simón ko sen chrikao ndo juée sen ndo

³⁷ ko hora kuitja sen ndo ndachro sen:

—Kain nã stetjéenanta.

³⁸ Ko ndachro ndo Jesús:

—Sachjina ikaxin tjajna tjenka nti i ixi kaxon nti a xronichja chijni jian, ixi me ó juixin jan an.

³⁹ *Ko jaña nchijíi nunte Galilea kuaji ndo kain ni ngo ko chronga ndo chijnie ndo Dio ko kuantsje ndo espíritue Xixron anxrée chónnda chujni.

*Ndo Jesús juinchexruen en ndo naa xi níexin chinlepra
(Mt. 8:1-4; Lc. 5:12-16)*

⁴⁰ Ko naa xi níexin chinlepra konchjiñe e xa ngajin ndo Jesús ko bake exin ntatuchi in xa ko kuinóatée xa ngajin ndo, ko ndachro xa:

—Siá tjaunnta, chao nchexruannanta.

⁴¹ Ko ndo Jesús bikonóe e ndo xa ko bake e ndo itja ndo ngata a jaa xa ko ndachro ndo: —Jaán tja on; toxruan an.

⁴² Ko jaña ndachro ndo ko tuinxin koxruen en xa.

⁴³ Ko ndo Jesús kuetuen en ndo xa ixi satsji xa ko ndachro ndo:

⁴⁴ —Xro an ngisen teki é ixi koxruan an. Itjia ngajin xitaana ixi ó koxruan an ko tájuan ti tikinixin kuituan an ndo Moisés, ko jaña tsikon kueya nã ixi koxruan an.

⁴⁵ Ko xi koxruen en sakjui xa ko kuaxi beki e xa kain nã xranchi koxruen en xa. Méxin, ndo Jesús imao bakixin in ndo kain tjajna ko bakitu e ndo ti xro an ngisen jii ko itsjé nã bajée nã ndo.

2

*Ndo Jesús juinchexruen en ndo naa xi jua i itji
(Mt. 9:1-8; Lc. 5:17-26)*

¹ Ko kuatsinga ikaxin nchakon ko tjume e ndo Jesús ikjan ndo tjajna Capernaum. Ko kono e nã ixi bake e ndo naa nchia nti a.

² Ko kueya chujni konchjiñe e ngajin ndo Jesús ko kuitja i nchia kuixin in nã ko kaxon tsango tsjé chujni jii nduja nchia. Ko ndo Jesús banchekuen en ndo nã chijnie ndo Dio.

³ Ko tjume e kuuí noó xi bikao xa naa xi jua i nchetengi tutée.

⁴ Méxin, jua i konchjiñe e xa ti jii ndo Jesús ixi kueya nã ste nti a. Ko kuajin in xa ngata a nchia ko konxrato xa ngata a nchia ko nti a juinchexingajinxin xa xi ni e jita a kania.

⁵ Ko ndo Jesús bikon ndo ixi xi me e tsango chuntia xa ko ndache ndo xi ni e:

—Chjan na, ó tjáñana kain ti ndako a juinche e.

⁶ Ko kaxin xi tjako ley ste xa nti a, stexraxaon xa:

⁷ “¿Sonda jaña nichja xi ji i? Nichjangí e xa ndo Dio. Ixi xro an ngisen sinchemé e ijie; je o ndo Dio chao sinchemé e ndo ijie chónnda chujni”, jaña stexraxaon xa.

⁸ Ko ndo Jesús ó no e ndo nge e stexraxaon xa, méxin ndachro ndo:

—¿Sonda jaña xraxaonnta?

⁹ ¿Nge e ti ícha tangi a xrontatjan xi ni e? ¿Á ícha tangi a xrontatjan xa ixi komé e ti ndako a juinche e xa, o tsingatjen xa ko xrotsé xa kanie e xa ko tsaxi tsaji xa?

¹⁰ Méxin, jai tsjako anta ixi jan an Chjen en ndo Dio, xjan jongí e xranchi chujni, chonda xjan juachaxin ngata a inche ko tsantsje xjan ijié chóna chujni.

Ko ndo Jesús ndache ndo xi ni e:

¹¹ —Jan an ntatjua tingatjen ko itsé kania a ko satjia ndúya.

¹² Ko stetsje e kain nã ixi tuinxin bingatjen xi ni e ko itsé xa kanie e xa ko kuachrxjin xa nchia, ko sakjui xa. Ko kain ni ste nti a xronka nã ko kaxin nã kuajon nã juasie nã ngajin ndo Dio ko ndachro nã:

—Nai a bikona jaña kon en.

Ndo Jesús kuiye e ndo ndo Mateo

(Mt. 9:9-13; Lc. 5:27-32)

¹³ Ko tjume e ndo Jesús sakjui ndo ngande e inda ko itsjé chujni konchjiñe e nã ti jii ndo ko je e ndo juincheken en ndo nã.

¹⁴ Ko jitatsinga ndo nti a, bikon ndo ndo Mateo, chjen en ndo Alfeo, jii ndo ti xengaxin i nã tomi tayé e xi tjajna Roma ko ndo Jesús ndachro ndo:

—Rua nãna.

Ko ndo Mateo bingatjen ndo ko tuinxin rué e ndo ndo Jesús.

¹⁵ Ko tjume e ndo Jesús bake e ndo ndo a ndo Mateo, ko kuajon sen nge e sine ndo. Ko kaxon ste kueya xi xenge e nã ko ikaxin ni chóna ijié ko juinekao nã ndo Jesús ko kao sen teyuu chrikao ndo.

¹⁶ Ko kaxin xi tjako ley ko xi fariseo bikon xa ixi ndo Jesús jinekao ndo kain xi xenge e nã ko ikaxin ni chóna ijié, ko juanchangi e xa sen teyuu chrikao ndo Jesús, ko ndachro xa:

—¿Sonda xi tjako anta nekao xa ko tikao xa xi xenge e nã ko ni chóna ijié?

¹⁷ Ko ndo Jesús kuin en ndo nge e ndache xa sen teyuu chrikao ndo me e ndachro ndo:

—Ni níe a xrokonde a nã xinhexruan. Je o ni ni e xrokonde e nã xinhexruan. Jui a jan an ixi tsiya a ni ndako nche e. Jui i ixi tsiya a ni chóna ijié.

Juanchangi e sen ndo Jesús naa nge e

(Mt. 9:14-17; Lc. 5:33-39)

¹⁸ Naa nchakon sen chrikao ndo Juan Bautista ko xi fariseo juinchekatse ñao nã jinta nguixin nchakon, ko kuji kaxin nã nichje e nã ndo Jesús ko ndachro nã:

—¿Sonda ni chrikao ndo Juan ko ni fariseo nchekatse ñao nã jinta ko ni chrjiko a ja a, na i?

¹⁹ Ko ja in juatingíexin ndo Jesús:

—¿Á xrojuinchekatsé ñao nã jinta, ni tsikiye e xi kute e nchakon tsikii nã kiée xa? Na i ixi xrastekao nã xa.

²⁰ Ko tsii nchakon xrotsé nã xi tsikute e, satsikao nã xa, ko tjume e ni kuiye e xa sinchekatse ñao nã jinta.

²¹ Xro an ngisen tonchrijin tu o manta natjúá ko take e nã ti manta tsitje. Siá jaña sinche e nã, tsichje manta tsitje ko í xro an tsona manta natjúá.

²² Kaxon jua i tsikia xran vino natjúá ngaya tjuaxran ntaxi, ixi siá jaña tson en, tsichje tjuaxran me e, ko ixran ko tjuaxran ndatsitjáña. Méxin, xran natjúá xrokonda tsikia xran naa tjuaxran natjúá, ko jaña kayui nge e tsitjáña i.

Konchrinjin sen noatrigo naa nchakon tjoké e ni judío

(Mt. 12:1-8; Lc. 6:1-5)

²³ Naa nchakon sábado tjoké e ni judío, ndo Jesús ko sen teyuu chrikao ndo kuatsinga sen tjenka naa ijngi tsikenga nã noatrigo ko sen teyuu chrikao ndo kuaxi sen konchrinjin sen kaxin itin trigo.

²⁴ Ko kaxin xi fariseo juanchangi e xa ndo Jesús:

—¿Sonda sen chrijiko a stenche e sen naa ixrā tikinixin a sinche eni nchakon tjoké eni?

²⁵ Ko ndachro ndo Jesús:

—¿Á noa inta ti ndachro xroon jitaxin chijnie ndo Dio chronga xranchi juinche e ndo David ko sen bikao ndo, naa nchakon kuen en sen jinta?

²⁶ Méxin, nchakon bake e xi Abiatar, xitaana tetuan an, je e ndo David kuixin in ndo ndo a ndo Dio ko juine ndo nutja tikinixin en ndo Dio ko kaxon kuajon ndo nio juine kain sen bikao ndo. Ko nutja me e je o xitaana chóna xa juachaxin sine xa nio.

²⁷ Kaxon ndachro ndo Jesús:

—Kóña nchakon tjoké eni ixi xrokonda tsjoké e chujni, je a ixi xrokuajonni juasieni ngajin nchakon me e.

²⁸ Ko jan an Chjen en ndo Dio, xjan jongí e xranchi chujni, chóna juachaxin tsetuan an nge e tson en nchakon tjoké eni.

3

Ndo Jesús juinchexruen en ndo naa xi tsixema itja

(Mt. 12:9-14; Lc. 6:6-11)

¹ Ko tjume e ndo Jesús kuixin in ndo ndo a ndo Dio íjngo. Ko nti a bake e naa xi tsixema naa itja.

² Ko konchjiñe e kaxin xi stetsaya xa ndo Jesús ixi tsikon xa á sinchexruen en ndo xi me e, nchakon tjoké e nā ixi jaña tsjankata a xa ndo Jesús ijie.

³ Ko ndo Jesús ndache ndo xi tsixema itja:

—Tingatjen ko take é ngusine nti i.

⁴ Ko juanchangi e ndo Jesús ni ste nti a, ko ndachro ndo:

—Nchakon tjoké eni, ¿á chao sinche eni ti jian, o á chao sinche eni ti ndako a? ¿Á chao tsingijnani naa ngisen?, o, ¿á naatsóñaxónni naa chujni?

Ko je e nā tenko nā.

⁵ Ko ndo Jesús koña ndo, ko bikon ndo kain ni ste nti a, me e koni e aséen ndo ixi tsango ícha aséen nā. Ko ndache ndo xi ni e:

—Tinxe tjáa.

Ko je e xa kuinxe itja xa, ko hora me e koxruen en itja xa.

⁶ Ko xi fariseo kuachrjexin xa nti a ko ikjui xa ti ste ni tjento xi Herodes ko juao kichuu xa xranchi naatsóñaxón xa ndo Jesús.

Kueya nā ste nā ngande e inda

⁷ Ko ndo Jesús ko sen teyuu chrikao ndo sakjui sen ngande e inda. Ko kueya nā jirué e nā sen, ni tsikī x̄in nunte Galilea ko kaxon nunte Judea

⁸ ko tjajna Jerusalén ko nunte Idumea ko ikaxin nā tsikī x̄in nā ton en inda jitinga ndatin in Jordán ko kaxon ni tsikī x̄in no tjajna Tiro ko tjajna Sidón. Ko kain nā tsikin en nā ixrā ijie juinche e ndo Jesús ko kaxon tjaun nā tsikon nā me e.

⁹*Tjume e kuituen en ndo sen teyuu chrikao ndo ixi nti ao xrochon en naa ntábarco. Ko hora tsango xrokuixintja nā ndo xrokuixin in ndo ntábarco

¹⁰ ixi kueya nā tsijinchexruen en ndo, ko kain ni ni e kuixintja nā ndo ixi tjaun nā xrotsé nā ndo.

¹¹ Ko kaxin nā chóna nā espíritue Xixron anxrée ko hora bikon nā ndo Jesús bake exin nā ntatuchi in nā ngajin ndo. Ko kuyako espíritue Xixron anxrée ko ndachro:

—Ja a chjen en ndo Dio.

¹² Ko ndo Jesús kuyakutee ndo espíritue Xixron anxrée ko ndachro ndo ixi xrochronga i xa ngisen je e ndo.

Ndo Jesús juéé ndo teyuu sen tsajikao ndo
(Mt. 10:1-4; Lc. 6:12-16)

¹³ Tjume e kuajin in ndo Jesús naa ijna, ko nti a kuiye e ndo sen tjaun ndo xrokuajikao ndo ko konchjiñe e sen ngajin ndo.

¹⁴ Ko kuinche e ndo teyuu sen tsajikao ndo ixi tsetuen en ndo sen satsji sen xrochronga sen chijni jian.

¹⁵ Ko kuajon ndo juachaxin sinchexrjuen en sen ni ni e ko tsantsje sen espíritue Xixron anxrée chóna na.

¹⁶ Ko sen teyuu kuinche e ndo ja in ndatin in sen: ndo Simón, ndo juinchekin in ndo Jesús Pedro;

¹⁷ ko ndo Jacobo ko ndo kichuu ndo, ndo Juan, sen me e chjen en ndo Zebedeo. Kaxon sen me e juinchekin in ndo Jesús Boanerges me e xrondachro chjen en ti Tjateé.

¹⁸ Ko ndo Andrés, ndo Felipe, ndo Bartolomé, ndo Mateo, ndo Tomás, ndo Jacobo, chjen en ndo Alfeo, ko ndo Tadeo ko inaa ndo Simón, ndo tikinixin naa partido romano ndatin in cananista,

¹⁹ ko xi Judas Iscariote, xi juinchekji ndo Jesús.

Ndachro na ixi ndo Jesús chóna ndo juachaxien Xixron anxrée
(Mt. 12:22-32; Lc. 11:14-23; 12:10)

²⁰ Ko tjume e ndo Jesús ko sen teyuu chrikao ndo kuixin in sen naa nchia. Ko íjngo kueya na xra o na nti a ko jua i juine ndo Jesús ko sen teyuu chrikao ndo.

²¹ Ko kono e sen ndo a ndo Jesús ixi nti a jii ndo ko kujj sen ixi satsikao sen ndo ixi ndachro sen je e ndo tsinchetjáña jaa ndo.

²² *Ko kaxon kujj kaxin xi tjako ley tsiki xin tjajna Jerusalén ko ndachro xa:

—Xi ji i chóna xa juachaxien Beelzebú, Xixron anxrée, xi tetuen en kain espíritue ña i, méxin, chao tantsje xa espíritue Xixron anxrée.

²³ Ko ndo Jesús kuiye e ndo xi ndachro me e ko ja in juakoxin ndo:

—¿Xranchi Xixron anxrée je o xa tsantsje xa espíritue xa?

²⁴ Siá naa tjajna, je o na tsetoka o kichuu na, jua i tsintekao kichuu na jian.

²⁵ Ko ni stekao kichuu naakua nchia, siá ningakon en kichuu na, kaxon jua i tsekao kichuu na ndako.

²⁶ Ko kaxon jaña siá Xixron anxrée tsetoka o xa juachaxin chóna xa, ndatsitjáña juachaxin me e.

²⁷ 'Xro an ngisen chao tixin in ndo a naa xi soji ixi tsee na nge e chóna xa. Sa ó xrokonda xrokuintee na xi soji ixi chao tsee na nge e chóna xa.

²⁸ 'Nduaxin ntatjunta ixi ndo Dio chao sinchemé e ndo kain ijié chóna chujni ko kain nge e ndako a tsinichja na.

²⁹ *Ko ngisen xronichja ndako a ixi Espíritue ndo Dio jua i tsumé e ijié me e, ni xronichja me e, kain nchakon tsama na ijié.

³⁰ Jaña ichro ndo Jesús ixi ni me e tsindachro na ixi je e ndo chóna ndo espíritue Xixron anxrée.

Janée ndo Jesús ko xi kichuu ndo
(Mt. 12:46-50; Lc. 8:19-21)

³¹ Ko tjume e janée ndo Jesús ko xi kichuu ndo kuiji sen ti jii ndo Jesús ko nduja nchia ste sen, kuituen en sen naa xi tsikiye e xa ndo Jesús.

³² Ko sen ste ngajin ndo Jesús, ndache sen ndo:

—Janáanta ko xi kichuunta ste sen nduja ko nichja anta sen.

³³ Ko ndo Jesús ndachro ndo:

—¿Ngisen janána ko ngisen sen kichian?

³⁴ Ko jitsje e ndo kain ni ste nti a ko ndachro ndo:

—Sen ji i me e sen janána ko sen kichian.

³⁵ Kain sen nche e nge e tjaun ndo Dio, sen me e sen kichian ko janána.

4

Ndo Jesús juako ndo kondee xi bikenga

(Mt. 13:1-9; Lc. 8:4-8)

¹ *Tjume e ndo Jesús íjngo juangíxin ndo juinchekuen en ndo nã ngande e ndalago. Ko nti a xra o itsjé chujni ti jii ndo. Ko je e ndo kuixin in ndo naa ntãbarco jita a inda, ko nti a bake e ndo nunte. Ko kain nã kuitu e nã ngande e inda.

² Ko itsjé nge e juinchekuen en ndo nã. Ko ndachro ndo:

³ —Tin ennta ji i: Naa xi kuikenga tsee,

⁴ ko kaxin tsee kuenga xa kuitsinga tsee ngande e cha o. Ko kuij kuxe juine ba tsee.

⁵ Ikaxin tsee kuitsinga tsee ti jii kueya ixro, ti ko a itsjé inche, ko taka kuachrje ika ixi tjín a inche,

⁶ ko nchakon kuachrje chjiixro ichján ka ko xema ka ixi yasoe a jii nue e ka.

⁷ Ko kaxin tsee kuitsinga tsee ti jii ntãcha a. Ko ntãcha a ícha kuangi ntãã. Me e xrabaatja ka ko ndakuangi a ka.

⁸ Ko ícha tsee kuitsinga ngata a inche jian, me e tsee chaxro kuangi ka. Ko tsango kueya tsee kuajon ika me e; naa kuajon ikánte tsee, ko inaa ka kuajon níikán tsee, ko inaa kuajon naa ciento tsee.

⁹ Ko ndachro ndo Jesús:

—Ngisen tjaun tsin en, tsin en sen jian.

Ndo Jesús chronga ndo nge e xrondachro ti nichja ndo

(Mt. 13:10-17; Lc. 8:9-10)

¹⁰ Ko nchakon kuitu e ndo Jesús je o ndo, sen ste tjenka ndo ko sen teyuu chrikao ndo juanchangi e sen ndo nge e xrondachro nge e beki ndo.

¹¹ Ko je e ndo Jesús ndachro ndo:

—Ndotána tjaun ndo tsienxinnta ti noa inta ti tetuan an je e ndo. Ko ni kaxin tsekiexinni nã xranchi tekini naa chijni,

¹² ixi maski tikon nã ko tin en nã ko jaña tsienxin a nã ixi tsindoxin a nã ti ndako a nche e nã, xrokjan i nã ngajin ndo Dio ko jaña je e ndo tsantsje a ndo ijie chóna nã.

Ndo Jesús ndachro ndo nge e xrondachro ti xi bengá noatrigo

(Mt. 13:18-23; Lc. 8:11-15)

¹³ Ko tjume e ndache ndo sen:

—¿Á tienxin anta xranchi xrondachro nge e beki anta? Siá na i, ¿xranchi tsienxinnta ikaxin nge e tseki anta?

¹⁴ Sen kuikenga tsee me e jii xranchi naa ngisen juinchekue enni chijnie ndo Dio.

¹⁵ Ko kaxin sen me e xranchi tsee kuitsinga ngande e cha o, ixi kuin en sen chijnie ndo Dio, ko tjume e kuij Xixron anxrée ko nchetjáñajin xa sen.

¹⁶ Ikaxin tsee kuitsinga ti jii ixro, me e sen kuin en chijnie ndo Dio ko juaxruxin bake e sen,

¹⁷ ko sé a kuitikaon sen ixi kuij juachjaon ngata a sen ko koñao e nã sen ixi kuitikaon sen chijnie ndo Dio, méxin kuintu e sen ti kuitikaon sen ndo.

¹⁸ Ko tsee kuitsinga ngakjen en ntãcha a me e sen tin en chijnie ndo Dio,

¹⁹ ko ícha nche e sen tjée sen tomi ko ícha rué e sen ti jii juaxruxin. Kain ji i tingakon en ixi tsin en sen chijnie ndo Dio, ko nche a sen ti tjaun ndo.

²⁰ Ko tsee kuitsinga ti jii inche jian, sen me e tayé e sen chijnie ndo Dio ko titikaon sen kain ti ndachro ndo ko jian nche e sen ngajin ndo Dio. Sen me e ste sen xranchi tsee kuajon ikánte tsee, ko ikaxin sen xranchi tsee kuajon níkán tsee, ko ikaxin sen xranchi tsee kuajon naa ciento tsee.

Ndo Jesús juako ndo no take e naa xro i tingasáña
(Lc. 8:16-18)

²¹ *Ko kaxon ndachro ndo Jesús:

—¿Á xrochóndani naa xro i ko xro i me e á tsemáni xro i ngangí naa ntacajón o tsake eni xro i ngangí naa ntaa tejuata ani? Na i, je a me e sinche eni. Xrokonda nui tsake eni xro i me e ixi chao tsingasáña xro i.

²² *Méxin, xro an nge e ti jimá tsonoxin a ko xro an nge e imao tsonoe a na xrojan nchakon ixi kain nge e tsonoxin ixi xro i.

²³ Ko ngisen tjaun tsin en, tsin en sen jian.

²⁴ *Ko kaxon ndachro ndo:

—Méxin, ja anta tin ennta jian. Xranchi ja anta tájonnta nge e ngajin ikaxin na, jaña ndo Dio xrotjáanta ndo kaxon, ko ícha itsjé xrotjáanta ndo.

²⁵ *Ni itsjé chónða, ndo Dio tsingijna ndo xrochónða na ícha. Ko ni xro an nge e chónða, ndo Dio tsantsje e ndo na ti nge e chónða na.

Ndo Jesús juako ndo xranchi tsangi tsee

²⁶ Ko kaxon ndachro ndo Jesús:

—Ti juachaxin tetuanxin ndo Dio jii xranchi naa ngisen tikenga nunte.

²⁷ Ko maski tejuata sen ko taya sen ko tatsinga kaxin nchakon ko kaxin tiie, tsee kuenga sen tachrje tsee ko tangi tsee. Ko sen kuenga noe a sen xranchi kon en ji i.

²⁸ Ixi inche je o nche juinche e ixra. Sa ó tachrje chaan no, ko tjume e ntée, ko tjume e ticha ko tóna tsee.

²⁹ Ko nchakon ticha tsee me e xrokonda xrochrijin tsee.

Ndo Jesús juako ndo chijnie ti tsee mostaza
(Mt. 13:31-32; Lc. 13:18-19)

³⁰ Ko kaxon ndachro ndo Jesús:

—¿Nge e xrondachro ti juachaxin tetuan an ndo Dio?

³¹ Naxre o xranchi naa tsee ndatin in mostaza tsikenga naa xi jngi e xa. Ji i naa tsee ícha nchín ixi kain tsee jii xasintajni.

³² Ko ti tsikinga tsee, tangi ka ko ikjan naa ntaa ícha ijié ixi ikaxin ntaa jii ngata a nunte. Ko kaxon chaan ntaa tangi ícha noi, ko kuxe tjanga ba ko chao nchéña ba kakée ba chringi tsauen ntaa.

Nge e xrondachro ti juako ndo Jesús
(Mt. 13:34-35)

³³ Jaña ndo Jesús juinçekuen en ndo kain na, ko beki ndo kueya nge e xranchi chao xrokuienxin na.

³⁴ Ko kainxin nge e juinçekuen en ndo na beki ndo xranchi naa chijni. Ko juexin juinçekuen en ndo na, tjume e ndache ndo sen teyuu chrikao ndo xranchi xrondachro kain ti beki ndo.

Ndo Jesús kuetuen en ndo chrinto ko inda
(Mt. 8:23-27; Lc. 8:22-25)

³⁵ Ko nchakon me e ó kónða ndache ndo Jesús sen teyuu chrikao ndo:

—Tsatsingatu ena ndalago.

³⁶ Ko tjume e kuintu e sen kain ni ste nti a ko sabikao sen ndo Jesús ngaxin in ntábarco ko kaxon ikaxin ntábarco sakjui ntáa.

³⁷ Ko tuinxin kuij naa chrinto soji ko tsango juinchetengi inda ko ntábarco kuaxi bikia ntáa inda ko kuaxi konuntengi ntábarco.

³⁸ Ko ndo Jesús ndakuejua ndo ícha ndá a ngaxin in ntábarco ko jikjón ndo naa noxra. Ko juinchexingame e sen ndo, ko ndachro sen:

—¡Maestro! ¿Á ta inta juachjaon ixi xrokjuina inda?

³⁹ Ko je e ndo bingatjen ndo, ko kuyakutee ndo chrinto ko inda ko ndachro ndo:

—Tenkua ko ndatake e.

Ko tuinxin je e inda ndabake e inda ko chrinto kaxon.

⁴⁰ Ko ndache ndo je e sen:

—¿Sonda xrakonnta? ¿Á xrachuntia antana jan an?

⁴¹ Ko je e sen xronka sen ko ndache kichuu sen:

—¿Ngixe i xi ji in ixi tituen en xa chrinto soji ko inda ko kayui titikaon ngajin xa?

5

Naa xi jii nunte Gadara chóna kueba espíritu Xixron anxrée
(Mt. 8:28-34; Lc. 8:26-39)

¹ Ko tjume e kuatsingatu e sen ndalago, ko kuiji sen nunte Gadara.

² Ko ndo Jesús xingajinxin ndo ntábarco ko tuinxin naa xi konchjiñe e xa ngajin ndo ko kuixi xa ti jii itjaq* ti tsixrabaa chujni ko chóna xa espíritu Xixron anxrée.

³ Xi me e bake e xa ti ste itjaq ti tsixrabaa chujni tsiken en, ko xro an ngisen chao tokuaxin en itsé xa ko jua i tsitexin xa nochika.

⁴ Ko itsjé vez bakichruaxin na tutée xa ko itja xa ixi nochika, ko je e xa bakonchrindaon xa chika. Ko xro an ngisen tjacha tjintee xa.

⁵ Bakaji xa tiie ko nchakon ti jii ijna ko ti tsixrabaa chujni ko nti a kuyako xa ko ixro tande e xa ntakuin xa.

⁶ Ko ikjín bikon xa ndo Jesús ko binga xa konchjiñe e xa ko bake exin ntatuchi in xa ngajin ndo

⁷ ko séen kuyako xa:

—¿Sonda nchexronkana Jesús, chjen en ndo Dio jii ngajní? Jan an tjaun a sinchexronkana.

⁸ Jaña ndachro xa ixi tsindachro ndo Jesús:

—Ja a espíritu ña i, tachrxexian xi ña.

⁹ Ko ndo Jesús juanchangi e ndo espíritu me e:

—¿Xranchi ti ian?

Ko je e espíritu me e ja in juatingíexin:

—Jan anna ndatin inna Legión ixi tsango itsjé jan anna.

¹⁰ Ko kain espíritu Xixron anxrée kuinóatée ngajin ndo Jesús ixi xroxruan i ndo espíritu satsji ikjín.

¹¹ Ko tjenka nti a jii naa ijna steneña itsjé kuchinga.

¹² Ko kuinóatée kain espíritu Xixron anxrée ko ndachro:

—Tituan an satsjina ti ste kuchinga, ko tájuan juachaxin tsixin inna ngaxin in ba.

¹³ Ko tuinxin ndo Jesús kuajon ndo juachaxin. Ko kain ti espíritu Xixron anxrée kuachrxexin xi me e, ko kuixin in espíritu ngaxin in kuchinga. Ko kain ko ste nti a xranchi yuu mil ba. Ko kain ba binga ba ko kuitsingangi ba ti yaso e jii ndalago ko kjun en ba inda.

* 5:2 itjaq cueva

14 Ko tjume e xi stetsje e kuchinga xrakon xa ko binga xa kuindache xa ni tjajna nge e kon en ko kaxon kuindache xa ni ste ngataon ijngi nge e kon en. Ko tjume e itsjé nā kuitsje e nā nge e kon en nti a.

15 Ko hora kuiji nā ti jii ndo Jesús, bikon nā xixi nti a jii xi kuachóna kain espíritue Xixron anxrée ko jii xa nunte ko jiá xa manta ko ó ndako xraxaon xa, ko bikon nā me e xronka nā.

16 Ko kain ni bikon nge e kon en, kueki nā xranchi kon en xi kuachóna espíritue Xixron anxrée ko nge e tsikon en kuchinga.

17 Ko kuaxi nā kuinóatée nā ngajin ndo Jesús xixi satsjixin ndo nti a.

18 Ko ndo Jesús kuajin in ndo ntábarco ko ti xi kuachóna espíritue Xixron anxrée kuinóatée xa xixi kao xa xrokjui xa.

19 Ko ndo Jesús kuajon a ndo juachaxin xixi kao xa itsji xa ko ndachro ndo:

—Satjia ko teki é kain sen ndúya kain nge e juinche e ndo Dio ngajian ko xranchi bikonóa a ndo.

20 Ko xi me e sakjui xa ko kuaxi beki e xa kain ni tjajna tikinixin en Decápolis kain nge e juinche e ndo Jesús ngajin xa. Ko kain ni kuin en tsango xronka nā.

Koxruen en naa xjanchrichjan ko naa nchri

(Mt. 9:18-26; Lc. 8:40-56)

21 Íjngo ndo Jesús kuixin in ndo ntábarco ko sakjui ndo tuenxin ndalago, ko nti a kueya nā konchjiñe e nā ngajin ndo ko je e ndo ndi ao kuitu e ndo ngande e nda.

22 Ko tjume e kuiji naa xi baketuan an naa ni ngo judío, xi me e ndatin in xa Jairo. Ko hora bikon xa ndo Jesús, bake exin ntatuchi in xa ngajin ndo,

23 ko ja in kuinóatée xa:

—Xjanchrichjan na jite en xjan. Ixudio ichjina nía, takée tjáanta ngata a xjan xixi tsoxrue en xjan.

24 Ko tjume e ndo Jesús sabikao ndo xa ko tsango itsjé nā rué e nā ko kuixintja nā ndo Jesús.

25 Ko ngakjen en kain ni me e konchjiñe e naa nchri ni e, ó teyuu nano níexin nchra jnié nchra.

26 Ko je e nchri me e juinchexienxin nchra ngajin xinchexruan kain ti bachóna nchra, ko ninaa xinchexruan jua i juinchexruen en xa nchra ko ícha bakoni e nchra.

27 Ko ó tsikin en nchra nge e beki nā ti juinche e ndo Jesús, me e je e nchra kuiji nchra ko tuenxin nā konchjiñexin nchra ko itsé nchra mantée ndo Jesús

28 xixi ndachro nchra: “Siá je o xrotse ngande e mantée ndo, me e tsoxrueana.”

29 Ko tuinxin kuíxin jnié nchra, me e kono e nchra xixi ó koxruen en nchra.

30 Ko ndo Jesús kono e ndo xixi juachaxien ndo koxruenxin naa ngisen, me e ngatjia ndo ko juanchangi e ndo ni ste nti a:

—¿Ngisen itséna?

31 Ko je e sen juatingíexin sen ko ndachro sen:

—Maestro, kueya nā jii ngandajinnta ko tonchekanta nā, ¿sonda tjanchangínta ngisen itsé mantoanta?

32 Tjume e bingatjia ndo ko tsje e ndo nguixin xixi tsono e ndo ngisen itsé mantée ndo.

33 Ko je e nchra xronka nchra ko jixranga nchra xixi koxruen en nchra, ko konchjiñe e nchra ti jii ndo ko bake exin ntatuchi in nchra ngajin ndo ko chronga nchra kain nge e kon en nchra.

34 Ko ndachro ndo Jesús:

—Chjan na, ja a koxruan an xixi chuntiana. Jai juaxruxin satjia xixi ó koxruan an.

35 Ko xrajinchja ndo Jesús, kuiji kaxin ni kuixin ndo a xi Jairo, xi baketuan an ni ngo ko ndache nā xa:

—Xjannchrichja anta ó kuen en xjan; í chje anta ndo maestro ixra.

³⁶ Ko je e ndo Jesús kuin en ndo nge e ndachro nã, ko ndache ndo xi tetuan an ni ngo: —Xrakon a ja a, je o titikáoanna.

³⁷ Ko kuajon a ndo juachaxin ixi kain sen itsji sen, je o ndo Pedro ko ndo Jacobo ko ndo Juan, ndo kichuu ndo Jacobo, me e sen bikao ndo.

³⁸ Ko hora kuiji sen ndo a xi tetuan an ni ngo, bikon sen ixi stetsjanga nã ko stetaxin nã xjan juachjaon ko stetoyako nã.

³⁹ Ko kuixin in ndo Jesús nchia, ko ndachro ndo:

—¿Sonda tuyakonta ko tsjanganta? Je e xjan tsiken a xjan; je o jijua xjan.

⁴⁰ Ko je e nã juanoa nã ndo, méxin kuetuan an ndo ixi kain nã satsji nã nduja ko je o kuituekao ndo ndotée xjan ko janée xjan ko sen níi, sen chrikao ndo, ko je e sen kuixin in sen ti jii xjan.

⁴¹ Ko ndo Jesús itsé ndo itja xjan ko ngigüe e ndo nichjexin ndo xjan, ko ndachro ndo: —Talita, cumi —me e xrondachro: Xjanchrichjan, tingatjen.

⁴² Ko xjan me e tuinxin bingatjen xjan ko kuaji xjan ixi xjan me e kuachóna xjan teyuu nano, ko kain ni jii nti a tsango xronka nã.

⁴³ Ko ndo Jesús kuetuan an ndo ixi xro an ngisen tseki e nã nge e kon en. Ko kaxon kuetuan an ndo xrochjée nã xjan nge e sine xjan.

6

Ndo Jesús bake e ndo tjajna Nazaret

(Mt. 13:53-58; Lc. 4:16-30)

¹ Ko tjume e ndo Jesús kuachrjexin ndo tjajna nti a ko sakjui ndo tjajnée ndo tjajna Nazaret ko kaxon rué e sen teyuu chrikao ndo.

² Ko kuiji sábado, nchakon tjoké e nã, ko kuaxi ndo juinçekuen en ndo nã ngaxin in ningue ni israelita nti a. Ko kueya nã kuin en nã nge e tjako ndo, me e xronka nã ko ndachro nã:

—¿No kuitjaxin xi ji i nge e tjako xa?, ko, ¿ngisen juinçekuen en xa ti nichja xa ko ixra ijié nche e xa?

³ ¿Á je a ji i xi carpintero ko janée xa ndatin in María, ko xi kichuu xa xi Jacobo, ko xi José, ko xi Judas, ko xi Simón? ¿Á stekui ana nchrikichuu xa nti i?

Méxin, kuitikaon a nã nge e ichro ndo.

⁴*Ko ndachro ndo Jesús:

—Kain tjajna kain chujni tajon nã juasaya ngajin naa ndo nichja chijnie ndo Dio; ko sen tjajnée ndo, na i, ko kaxon sen ndo a ndo tajon a sen juasaya ngajin ndo.

⁵ Méxin, nti a xro an ixra jian juinche e ndo, je o bake e itja ndo ngata a jaa kaxin ni ni e ko juinçexruen en ndo nã.

⁶ Ko tsango xronka ndo ixi kuitikaon a nã. Ko tjume e sakjui ndo kaxin tjajna nchínchín ste tjenka nti a ko juinçekuen en ndo nã.

Ndo Jesús xruan an ndo teyuu sen

(Mt. 10:5-15; Lc. 9:1-6)

⁷ Ko tjume e ndo Jesús kuiye e ndo sen teyuu sen chrikao ndo ko kuaxi kuetuan an ndo ixi yuyu sen itsji sen ko kaxon kuajon ndo juachaxin ixi chao tsantsje sen kain espíritue Xixron anxrée chóna chujni.

⁸ Ko kuetuen en ndo sen ixi xro an nge e tsikao sen ti tsa sen cha o. Je o naa ntakuto tsjixin sen ko me ó tsikao sen. Ko tsikau a sen ti tsinga nge e ko nge e sine sen ko tsikau a sen tomi.

⁹ Ko je o kate jichjanga sen ko je o manta jiá sen tsikao sen.

¹⁰ Ko kaxon ndachro ndo:

—Nchakon tsixin innta naa nchia nti ao tsitu anta hasta tsachrjexinjanta tjajna me e.

11 *Ko siá tsjasonta xrojan tjajna ko tsajon a na juachaxin tsitu anta nti a ko xrochro a na tsin en na nge e tjakonta, ja anta tachrjexinnta tjajna me e ko tontsjenganta inche yaa kateanta, me e tsjakoxinnta ixi ndako a juinche e na ngajinnta. Ko nduaxin ndachrjan ixi nchakon sinchéña ndo Dio ije ngajin chujni, ícha tangi tson en ni tjajna me e, ixi ni tjajna Sodoma ko ni tjajna Gomorra.

12 Ko sakjui sen ko ndache sen na ixi xrokonda tsindoxin na nge e nche e na ko tsintu e na ti ndako a nche e na.

13 *Ko kaxon kuantsje sen itsje espíritu Xixron anxrée kuachóna kaxin na. Ko ngata a jaa itsje ni ni e bake e sen ndaxi e ko jaña koxruen en na.

Kuen en ndo Juan Bautista

(Mt. 14:1-12; Lc. 9:7-9)

14 *Ko xi rey Herodes kuin en xa kain nge e jian kuanche e ndo Jesús ixi kain na teki na xranchi ije juachaxin chóna ndo, me e ndachro xa:

—Ndo Juan Bautista ó tsixechón ndo ixi xraje o juachaxin chóna xi ji i.

15 Ko kaxin na ndachro na:

—Ji i ndo Elías kuachronga chijnie ndo Dio.

Ko ikaxin na ndachro na:

—Ji i naa ndo kuachronga chijnie ndo Dio ó sa ó.

16 Ko kuin en xi Herodes ko ndachro xa:

—Ji in ndo Juan, ndo kuetuan an konchrijin na jaa ndo, ndo me e ó tsixechón ndo.

17 *Ko xi Herodes tsiketuan an xa ixi tsitexin ndo Juan ixi nochika ko tsixraxin in na ndo ndo achjiso ixi jaña tsijanchia nchri Herodías. Je e nchri Herodías, nchrinchri e xi Felipe xikichuu xi Herodes, ko je e xi Herodes kua xa nchri me e xranchi xrokjui nchrinchri e je e xa.

18 Ko ndo Juan ja in tsindache ndo xi Herodes:

—Xro an juachaxin jii ixi ja a xrochóna nchrinchri e xi kichuua.

19 Méxin nchri Herodías tsango koña e nchra ndo Juan ko tjaun nchra xrokóna nchra ndo, ko jua i juinche e nchra me e

20 ixi xi Herodes xrakon en xa ndo Juan ixi kuan e xa ixi ndo Juan naa ngisen tsango jian ko tjúa aséen. Méxin, chro a xa tsajon xa juachaxin ixi je e nchri tsjaya nchra. Ko maski xi Herodes tienxin a xa jian kain ti kuandachro ndo Juan, tjaun xa ícha xrokuin en xa ti nge e juako ndo.

21 Ko nchri Herodías juacha nchra nchakon kiée xi Herodes. Tsikiye e xa ni tetuan an tjajna ko ni tetuen en xi soldado ko ikaxin ni tetuan an nunte Galilea ixi tsii na kiée xa.

22 Ko nchrhje en nchri Herodías kuixin in nchrichan ti ste na, ko ité nchrichan, ko tsango juaxruxin bake e xi Herodes ko kain ni stenekao xa nti a. Ko je e xi Rey Herodes ndache xa nchrichan me e:

—Tjanchiana nge e tjauan ko jan an xrotja á.

23 Ko je e xa nichjixin ngatoxin ndo Dio ixi nduaxin tsajon xa ngixe i nge e tsjanchia nchrichan maski ngusine tjajna tetuan an xa.

24 Ko je e nchrichan kuachrje nchrichan ko ndache nchrichan janée nchrichan:

—¿Nge e tsjanchia?

Ko janée nchrichan ndachro jan:

—Tjanchia jaa xi Juan Bautista.

25 Ko je e nchrichajan jaiko ikjan nchrichan ti jii xi rey, ko ndachro nchrichan:

—Jan an tja on xrochjána jaa xi Juan Bautista ngaya naa laato.

26 Ko je e xi rey tsango koni e aséen xa ixi jaña juanchia nchrichan ixi tsíndáchro xa ngatoxin ndo Dio tsajon xa kain ti tjanchia nchrichan ko tsikin en kain ni ste nti a, méxin, íjua i xrondachro xa na i.

²⁷ Ko tuinxin kuetuen en xa naa xi soldado ixi tsjikao xa jaa ndo Juan.

²⁸ Ko xi soldado sakjui xa ndo achjiso ko konchrinjin xa jaa ndo Juan ko juankaya xa naa laato jaa ndo ko chjée xa nchrichajan ko je e nchrichan biken en nchrichan janée nchrichan.

²⁹ Ko kuin en kain sen chrikao ndo Juan ixi jaña tsikon en, me e juirue e sen cuerpoe ndo ko juabaa sen ndo.

*Ndo Jesús kuajon ndo nge e juine na ó mil chujni xi
(Mt. 14:13-21; Lc. 9:10-17; Jn. 6:1-14)*

³⁰ Ko tjume e sen tsixrua an ndo Jesús ikjan sen ti jii ndo ko beki sen kain ti juinche e sen ko kain ti nichja sen.

³¹ Ko ndachro ndo Jesús:

—Tsachrjendáana sachjina ntajie ti xro an ngisen ste ko nti a tsjokajina nchíín.

Jaña ndachro ndo ixi kueya na itji na ko tii na ko ko a tiempo sine sen.

³² Ko ndo Jesús ko sen teyuu chrikao ndo, je o sen kuixin in sen naa ntábarco sakjui sen naa nunte xro an nge e jii.

³³ Ko kueya na bikon na ixi sakjui sen ko ndo Jesús nti a kaxon jitji ndo, me e kuachrjexin na tjajnee na ko binga na, méxin sa ó kuiji na ngande e ndalago ko nti a stechón en na ndo Jesús.

³⁴*Ko hora kuachrjexin ndo ntábarco, bikon ndo ixi kueya na jichón en na nti a, méxin bikonóe e ndo na ixi ste na xranchi kutuchjon chóna i ngisen tsje e ba. Ko juangíxin ndo juincheckuen en ndo na kueya nge e.

³⁵ Ko ó kóndo ko sen teyuu chrikao ndo Jesús konchjiñe e sen ngajin ndo, ko ndachro sen:

—Ó kóndo ko xro an nge e jii nti i.

³⁶ Ndachenta na ixi satsji na naa nchia o naa tjajna kjín a ste, ko tse na na nge e sine na ixi xro an nge e chóna na.

³⁷ Ko ndo Jesús juatingíexin ndo:

—Ja anta tájonnta nge e sine na.

Ko je e sen ndachro sen:

¿Á tjaunnta tse nana yuu ciento denario nutja ixi tsajonna sine na?

³⁸ Ko ndo Jesús juanchangi ndo:

—Titsje enta ngijan in nutja chondanta.

Ko kuitsje e sen ko ndachro sen:

—Jii na ó nutja ko yuu kuchee.

³⁹ Ko kuetuan an ndo ixi kain na xrobake e na nunte ngata a kayua.

⁴⁰ Ko jaña xrochjeya na tsachrjendáa ngujngu ciento na ko ngujngu cincuenta na.

⁴¹ Ko ndo Jesús kua ndo ti na ó nutja ko yuu kuchee ko tsje e ndo ngajni ko kuajon ndo juasie ndo ngajin ndo Dio ko konchrinjin ndo nutja ko chjée ndo sen teyuu chrikao ndo ixi tsonchjeya sen sine kain ni ste nti a; kaxon konchrinjin ndo ti yuu kuchee ko konchjeya sen ixi sine kain na.

⁴² Ko kain na juine na ko konkje e na.

⁴³ Ko juexin juine na ko sen teyuu chrikao ndo Jesús juejo sen tutu o nutja ko kuchee tsixe e ko juincheckaon sen teyuu ntaxra ti nutja ko kuchee.

⁴⁴ Ni juine me e xranchi na ó mil xi.

*Ndo Jesús itji ndo ngataon ndalago
(Mt. 14:22-27; Jn. 6:16-21)*

⁴⁵ Ko tuinxin ndache ndo Jesús sen teyuu chrikao ndo ixi tixin in sen ntabarco ko tsatsingatu e sen ndalago no jii tjajna Betsaida. Ko je e ndo xrakuitu e ndo nichje e ndo kain ni ste nti a.

⁴⁶ Ko juexin nichje e ndo nã, sakjui ndo naa ijnã ixi tsinichje e ndo ndo Dio.

⁴⁷ Ko ó kóndo ko kontie ko ntabarco me e kuiji ntãã ngusine ndalago, ko je e ndo Jesús je o ndo kuintu e ndo nunte nti a.

⁴⁸ Ko bikon ndo ixi tsango tangi tikao sen ntãã ixi tsango soji jitinga chrinto ko me e rué e ndo sen. Ko tutée ndo jitixin ndo ngata a nda ko konchjiñe e ndo ti ste sen ko juinche e ndo xranchi xrokuitaon ndo.

⁴⁹ Ko hora bikon sen jitji ndo ngata a inda, tsango xraxaon sen ixi bikon sen naa chrinto chujni tsiken en, ko kuyako sen

⁵⁰ ixi kain sen bikon sen ndo ko ícha xronka sen. Ko je e ndo nichja ndo, ko ndache ndo sen:

—Xronka inta, jan an jui i.

⁵¹ Ko je e ndo kuixin in ndo ntabarco ti ste sen, ko chrinto tuinxin ndabake e chrinto. Ko je e sen ícha xronka sen ixi jaña kon en

⁵² ixi tsikienxin a sen ti juinche e ndo Jesús nchakon kuajon ndo itsjé nutja ixi xracha aséen sen me e kuitikaon a sen ndo.

*Ndo Jesús juinchexruen en ndo naa xi ni e nunte Genesaret
(Mt. 14:34-36)*

⁵³ Ko kuatsingatu e sen ndalago ko kuiji sen nunte Genesaret ko nti a kuenchrúa sen ntabarco ngande e inda.

⁵⁴ Ko tuinxin ti kuachrxexin sen inda, ni ste nti a kuichúxin nã ndo Jesús.

⁵⁵ Ko je e nã kuichronga nã nchijí nunte nti a, méxin kuaxi nã bikao nã itsjé ni ni e, ni jitsingata a kania ko bikao nã ti jii ndo Jesús.

⁵⁶ Ko kain ti no ikjui ndo, tjajna nchíin ko tjajna ijié, o ngaya chjaka me e bika o nã kain ni ni e ko bake e nã ngande e cha o. Ko ni ni e tinóatée nã ngajin ndo Jesús ixi je o xrotsé nã ngande e mantée ndo me e koxruen en nã.

7

*Nge e nchekitja aséen chujni
(Mt. 15:1-20)*

¹ Tjume e kaxin ni fariseo ko kaxin ni bajako chijnie ndo Dio kuixin nã tjajna Jerusalén konchjiñe e nã ti jii ndo Jesús.

² Je e nã bikon nã ixi kaxin sen chrikao ndo Jesús junéma i itja sen, jaña juine sen, méxin kuaxi nã juankata a nã sen ijie.

³ (Ixi xi fariseo ko kain ni judío kuanéma tja nã xranchi kuanche e ni tachrí e nã, ni xranchrjen, ixi sa ó banéma nã itja nã ko tjume e ine nã.

⁴ Ko hora kjanxin nã ndasin, sa ó xrokonda néma nã itja nã ko tjume e sine nã. Ko kaxon banéma nã vaso ko ichi ko cazuela chika ko kuajonta a nã cama, jaña kuanche e nã ko kaxon ikaxin nge e ixi jaña kuituan an ni tachrí e nã xranchrjen.)

⁵ Méxin, xi fariseo ko xi tjako chijnie ndo Dio ja in juanchangi e xa ndo Jesús:

—¿Sonda sen chrjiko a nche a sen nge e kuanche e sen tachrí ina xranchrjen ó sa ó? Sen chrjiko a ja a, néma i sen itja sen hora ine sen.

⁶ Ko juatingíexin ndo Jesús ko ndachro ndo:

—Nduaxin ti tsindachro ndo profeta Isaías ixi ja anta ndako a xraxaonnta, ko ja in ndachro xroon tsikjin ndo:

Ni tjajna ji i je o ro a nã nichjanaxin nã ngajin, je a nduaxin ixi aséen nã xraxaon nã.

⁷ Méxin, xro an tjintee juasaya* tajon n̄ ngajin, ixi je o tjako n̄ nge e tetuan an chujni.

⁸ Ko ja anta tsikintu enta nge e tsiketuan an ndo Dio ko rue énta nge e kuanche e n̄, méxin né manta ichi, ko vaso t̄j x̄innta, ko kaxon ikaxin nge e nche enta.

⁹ Ko kaxon ndachro ndo Jesús:

—Ja anta rue énta nge e kuanche e n̄ ko jaña ndá a tintu enta nge e tsiketuan an ndo Dio.

¹⁰ Ndachro chijnie ndo Dio tsikjin ndo Moisés: “Xrochonde enta juasaya ndotánta ko janáanta”, ko kaxon tsindachro ndo “Ngisen ndako a nichja ngajin ndotée o janée xrokonda tsen en sen.”

¹¹ Ko ja anta ndachenta chujni ixi chao xrondache n̄ ndotée n̄ ko janée n̄: “Ndotána, janána, jua i tsingijnananta ixi kain nge e chondana me e kóña corbán”, (me e xrondachro ixi kain tomina ó tjá a ndo Dio).

¹² Ko siá xrondachronta jaña, ja anta ndachronta xrokonda i tsingijnanta ndotánta o janáanta.

¹³ Ko jaña titikaon anta nge e tsiketuan an ndo Dio ko ja anta titikaonnta nge e kuanche e n̄ sa ó. Ko kaxon nche enta ikaxin nge e ndako a.

¹⁴ Ko íjngo kuiye e ndo Jesús chujni ste nti a, ko ndachro ndo:

—Tin ennta kainnta ti ntatjunta ko tienxinnta ji i.

¹⁵ Je a ti ineni nchek̄it̄ja aséenni. Ti tachrjexin aséenni me e nchek̄it̄jani.

¹⁶ Ti tjaunnta tsin ennta, tin ennta.

¹⁷ Ko ndo Jesús kuintu e ndo kain n̄, ko je e ndo ko sen teyuu chrikao ndo kuixin in sen nchia. Ko juanchangi e sen ndo nge e xrondachro ti juinchekuen en ndo n̄.

¹⁸ Ko ndachro ndo Jesús:

—¿Á kaxon ja anta tienxin anta? ¿Á noa inta ixi ti nge e ineni je a me e nchek̄it̄ja aséenni?

¹⁹ Ixi ti ineni tji a ngaya aséenni. Me e satsji ngaya tse eni ko tjume e tachrje.

Me e xrondachro ixi ti nge e ineni, nchek̄it̄ja i aséenni.

²⁰ Ko ndachro ndo Jesús:

—Ko ti nge e tachrjenixin aséen chujni me e nchek̄it̄ja aséen.

²¹ Kain ji i tachrjenixin aséen chujni: ti ndako a xraxaon n̄, ti chóna n̄ inaa ngisen je a janchri e n̄ o ndoxi e n̄, ti tjaun n̄ tsitexin n̄ inaa ngisen, ti naatsóñaxón kichuu n̄,

²² ti tee n̄, ti tochjuye e n̄ nge e chóna inaa chujni, ti ndako a nchekao kichuu n̄, ti ncheya n̄, ti tsango chjinga nche e n̄, ti tochjio n̄, ti nchejié aséen n̄, ko ti ndakua i xraxaon n̄.

²³ Kain ti ndako a me e tachrjenixin ngaya aséen n̄, ko me e ti nchek̄it̄ja aséen chujni.

Naa nchri kuix̄in ikj̄in chuntia† nchra ndo Jesús

(Mt. 15:21-28)

²⁴ Ko tjume e ndo Jesús kuachrjexin ndo nti a ko sakjui ndo nunte tjajna Tiro ko tjajna Sidón. Ko kuixin in ndo naa nchia ixi tjaun a ndo xrokono e n̄ ixi nti a jii ndo. Ko jua i kuemá ndo.

²⁵ Ko tjume e janée naa nchrichajan, chóna nchrichan espíritue Xixron anxrée kuin en jan ixi nti a jii ndo Jesús, ko tuinxin kuiji jan ko bake exin jan ntatuchi in jan tutée ndo Jesús.

²⁶ Jan me e ikj̄in kuix̄in jan, nunte Sirofenicia, ko kuinóatée jan ngajin ndo Jesús ixi xrokuantsje ndo espíritue Xixron anxrée chóna nchrichajen en jan.

²⁷ Ko ndo Jesús ndachro ndo:

* **7:7 juasaya** respeto, honor † **7:23 chuntia** tener fe

—Sa ó tintu enta ichjan sine xjan. Ndako a jii xrokuantsje eni xjan nutja ko xrochjéeni kunia sine ba.

²⁸ Ko je e jan juatingíexin jan:

—Nduaxin me e, Nchána. Ko kunia jingi ba mesa ine ba nutja titu o ti tintjí ichjan.

²⁹ Ko ndachro ndo Jesús:

—Chao ndachrua. Satjia ixi espíritue Xixron anxrée ó kuachrjexin nchrichajan an.

³⁰ Ko hora kuiji jan ndo a jan, bikon jan ixi nchrichajen en jan ó jian jitsingata a xjan ti jijua xjan ixi ó tsikachrje espíritue Xixron anxrée.

Ndo Jesús juinchexruen en ndo naa xi tien a ko nichja i

³¹ Ko tjume e ndo Jesús kuachrjexin ndo tjajna Tiro ko kuatsinga ndo tjajna Sidón ko kaxin tjajna tikinixin nunte Decápolis ko kuiji ndo ti ndalago Galilea.

³² Ko nti a bikao nā naa xi tien a ko jua i nichja xa. Ko kuinóatée nā ngajin ndo Jesús ixi tsake e itja ndo ngata a jaa xa me e tsoxrue en xa.

³³ Ko tjume e ndo Jesús kuachrjendaka o ndo je e xi tien a ti xro an ngisen ste. Ko dedue itja ndo Jesús xraxin in ndo ndatsjon xi tien a. Ko kaxon dedue itja ndo bikitée ndo ndatée ndo ko bake e ndo dedue ngata a nejen xi nichja i.

³⁴ Ko tjume e tsje e ndo nui ngajní ko kuabaa ndo ko nichje e ndo xi tien a, ko ndachro ndo:

—¡Efata! —me e ngigue e sen xrondachro: ¡Xitje e!

³⁵ Ko tuinxin xitje e ndatsjon xi tien a ko kuin en xa ko koxruen en nejen xa, ko jian nichja xa.

³⁶ Ko ndo Jesús kuetuan an ndo ixi xro an ngisen xrobe ki nge e ti kon en. Ko maski jaña kuetuan an ndo, je e nā ícha beki nā.

³⁷ Ko me e tsango xronka kain nā ko ndachro nā:

—Tsango jian kain nge e nche e ndo. Ni tien a, tin en nā ko ni nichja i, nichja nā.

8

Ndo Jesús kuajon ndo juine noó mil chujni

(Mt. 15:32-39)

¹ Ko nchakon me e kueya nā konchjiñe e nā ngajin ndo Jesús. Ko chóna i nā nge e sine nā. Ko ndo Jesús kuiye e ndo sen teyuu chrikao ndo, ko ndachro ndo:

² —Tsango tikonóa a kain ni ste nti i ixi ó ní nchakon ste nā ngajin ko chóna i nā nge e sine nā.

³ Ko siá tsétuan an nā satsji nā ndo a nā ko xrane a nā, ngatja cha o tsjejeñao nā ixi xrane a nā ixi kaxin nā tsango ikjín tsiki x̄in nā.

⁴ Ko juatingíexin sen chrikao ndo:

—¿No ts̄i x̄in nge e xrojuine kain ni ji i ixi xro an nchia jii nti i?

⁵ Ko juanchangi e ndo Jesús:

—¿Ngijan in nutja chondanta?

Ko je e sen juatingíexin sen:

—Yaato nutja chondana.

⁶ Ko ndo Jesús kuetuen en ndo kain nā ixi tsake e nā nunte. Ko kua ndo ti yaato nutja ko kuajon ndo juasaya ngajin ndo Dio ko konchrinjin ndo nio ko chjée ndo sen teyuu chrikao ndo ixi tsonchjeya sen ngajin kain ni ste nti a.

⁷ Ko kaxon kaxin kuche e nchínchín chóna sen. Ko ndo Jesús kuajon ndo juasaya ko kuetuan an ndo tsonchjeya sen kuche e kaxon.

⁸ Ko kain nā juine nā ko konkje e nā. Ko juejo sen tutu o nge e tsixe e ko juinchekaon sen yaato ntaxra.

⁹ Ko noó mil nā juine nā. Ko tjume e ndo Jesús ndache ndo nā ixi satsji nā.

¹⁰ Ko je e ndo ko sen teyuu chrikao ndo kuixin in sen naa ntábarco ko sakjui sen no nunte Dalmanuta.

Xi fariseo tjanchia xa ixi ndo Jesús sinche e ndo naa ixra ijié
(Mt. 16:1-4; Lc. 12:54-56)

¹¹ *Ko kuij kaxin xi fariseo ko kuaxi xa juao xa ndo Jesús ko juanchia xa ixi xrojuakoxin ndo naa ixra ijié* tsj xjn ngajní ixi tjaun nā tsono e nā á nduaxin chao sinche e ndo.

¹² *Ko ndo Jesús kuabaa ndo ko ndachro ndo:

—¿Sonda ni ji i tjanchia nā sinta a naa nge e ijié? Nduaxin ndachrjan ixi xro an nge e sinta a tsikon nā.

¹³ Ko kuintu e ndo nā nti a, ko kuixin in ndo ntábarco ko sakjui ndo tuenxin ndalago.

Nge e nchetja in nutjée xi fariseo
(Mt. 16:5-12)

¹⁴ Ko tjañe e sen tsikikao a sen nge e sine sen. Naakua nutja chóna sen ngaxin in ntábarco.

¹⁵ *Ko ndo Jesús kuetuen en ndo sen:

—Jian tsje enta ixi nge e nchetja in nutjée xi fariseo ko nutjée xi Herodes.

¹⁶ Ko sen teyuu chrikao ndo ndache kichuu sen:

—Jaña ichro ndo ixi tsikiko ina nutja.

¹⁷ Ko je e ndo no e ndo nge e tjao kichuu sen ko ndachro ndo:

—¿Sonda tjao kichuunta ixi chonda inta nutja? ¿Á noa inta ko xratiénxin anta? ¿Á icha asáanta méxin titikaon anta ndo Dio?

¹⁸ *¿Á tikonxin a ikonnta?, ko, ¿á tienxin a ndatsjonnta? ¿Á sintaxi añaonta?

¹⁹ Nchakon konchrinjin na ó nutja juine na ó mil chujni, ¿ngijan in ntaxra ti tutu o nutja xejo?

Ko je e sen juatingíexin sen:

—Teyuu ntaxra.

²⁰ Ko íjngo ndachro ndo Jesús:

—Ko nchakon konchrinjin yaato nutja juine noó mil chujni, ¿ngijan in ntaxra ti tutu o nutja xejo?

Ko ndachro sen:

—Yaato ntaxra.

²¹ Ko ndo Jesús ndachro ndo:

—Méxin, ¿á xratiénxin anta?

Ndo Jesús juinchexruen en ndo naa xi tikon a

²² Ko kuij sen tjajna Betsaida, ko kuij kaxin nā bika o nā naa xi tikon a. Ko kuinóatée nā ngajin ndo Jesús ixi xrojuinchexruen en ndo xa.

²³ Ko ndo Jesús itsé ndo itja je e xi tikon a ko kuachrjendaka o ndo xa ngande e tjajna. Ko bikitée ndo ndatée ndo ikon xi me e ko bake e itja ndo ngata a xa ko juanchangi e ndo xa:

—¿Á ó tikuan nchíin?

²⁴ Ko ndachro je e xi tikon a:

—Tikon chujni, ko tikon nā xranchi naa ntayua ichrji.

²⁵ Ko ndo Jesús bake e itja ndo íjngo ngata a ikon xa. Ko je e xa tsje e xa ko koxruen en xa ko chao bikon xa kain nge e.

²⁶ Ko ndo Jesús kuetuan an ndo ixi satsji xa ndo a xa, ko ndachro ndo:

—Ikjan ia tjajna íjngo ko xro an ngisen teki é ji in.

Ndo Pedro ndachro ndo ixi ndo Jesús, ndo Cristo

(Mt. 16:13-20; Lc. 9:18-21)

²⁷ Ko tjume e ndo Jesús ko sen teyuu chrikao ndo sakjui sen tjajna nchíín tjenka tjajna Cesarea de Filipino. Ko ngatja cha o juanchangi e ndo Jesús sen chrikao ndo ko ndachro ndo:

—¿Nge e ichro na, ngisen jan an?

²⁸ *Ko je e sen ndachro sen:

—Kaxin na ndachro na ixi ja anta ndo Juan Bautista ko ikaxin na ndachro na ixi ja anta ndo profeta Elías ko ikaxin na ndachro na ixi ja anta naa sen profeta kuachronga chijnie ndo Dio ó sa ó.

²⁹ *Ko tjume e ndo Jesús juanchangi e ndo sen:

—Ko ja anta, ¿nge e ndachronta, ngisen jan an?

Ko juatingíexin ndo Pedro ko ndachro ndo:

—Ja anta ndo Cristo tsixrua an ndo Dio.

³⁰ Ko kuetuan an ndo Jesús ixi xro an ngisen tseki e sen ji i.

Ndo Jesús ndachro ndo ixi ó tsen en ndo

(Mt. 16:21-28; Lc. 9:22-27)

³¹ Ko juangíxin ndo Jesús ndache ndo sen ixi je e ndo chjen en ndo Dio, xjan jongí e xranchi chujni, xrokonda tsango tangi tson en ndo ko kain xi tetuan an ni ngo ko kain xitaana tetuan an ko kain ni tjako ley tsoñao e na ndo. Ko ni me e naatsóñaxón na ndo ko nchakon nínxin xroxechón ndo.

³² Kain ji i jian chronga ndo. Ko tjume e ndo Pedro kuantsjendáa ndo ndo Jesús ko kuyakutee ndo ndo.

³³ Ko ngatjia ndo Jesús tsje e ndo kain sen chrikao ndo ko kuyakutee ndo ndo Pedro, ko ndachro ndo:

—¡Satjixian nti i, Xixron anxrée! Ja a xraxaon a xranchi xraxaon ndo Dio. Ja a xraxaon xranchi xraxaon chujni.

³⁴ *Ko ndo Jesús kuiye e ndo sen teyuu chrikao ndo ko sen tsikonchjiñe e ngajin ndo ko ndachro ndo:

—Siá xrojan ngisen tjaun xorrua na, xrokonda xrotjáñe e sen kain nge e ícha tjaun sen ko xorrua na sen kain nchakon, maski tangi tson en sen.

³⁵ *Ni tjaun tsitjáña i, ni me e nduaxin tsen en na; ko ni tsen en ixi titikaonna na jan an ko chijni jian nichja, ni me e tsechón na kain nchakon.

³⁶ ¿Nge e tsjacha naa ngisen xrochóna kain nge e jii ngata a nunte nti i ko ndatsitjáña aséen sen?

³⁷ ¿Ngijan in tsjenga sen na ixi tsechón sen?

³⁸ Ixi sen tsosue e ixi titikaonna sen ko kao chijni nichja, stetikon ni ndako a nche e ko ni chóna ijié, kaxon chjen en ndo Dio, xjan jongí e xranchi chujni, tsosue e xjan ko xrondachro xjan ixi chúxin a xjan sen nchakon tsetuan an xjan ti jii juachaxin ijié chóna Ndotée xjan ko kain sen ángel.

9

¹ Ko kaxon ndachro ndo Jesús:

—Nduaxin rintatjonta ixi kaxin ni ste nti i xratsen a na, tsikonja na tsii juachaxien ndo Dio.

Ndo Jesús kuindoxin ikon ndo

(Mt. 17:1-13; Lc. 9:28-36)

² *Kuatsinga ikjaon nchakon ko tjume e ndo Jesús sabikao ndo ndo Pedro, ndo Jacobo ko ndo Juan kuajin in sen naa ijna nui. Ko nti a bikon sen kuindoxin ikon ndo Jesús.

³ Ko manta jáa ndo ikjan tsango tjúá, ko ngata a nunte nti i xro an ngisen xrojuinéma manta jaña ixi tsango tjúá bikoni.

⁴ Ko bikon sen nti a jii ndo Elías ko ndo Moisés stetjao sen ndo Jesús.

⁵ Ko ndo Pedro ndache ndo ndo Jesús:

—Maestro, chao stena nti i. Sintakonchjianna ní tsa on; naa tsa on ja anta ko naa tsa on ndo Moisés ko naa tsa on ndo Elías.

⁶ Jaña ichro ndo ixi kain sen tsango xronka sen, ko ndo Pedro noe a ndo nge e nichja ndo.

⁷ *Ko tuinxin kuji naa itjuj bake e ngata a ti ste sen. Ko ngakjen en itjuj me e kuin en sen naa té naa ngisen nichja:

—Ji in chjan na tsango tjua a.* Tin ennta nge e xrondachro xjan.

⁸ Ko ikjan tsje e sen ko xro an ngisen bikon sen; je o ndo Jesús jii nti a.

⁹ Ko tjume e xingajinxin sen ijna me e, ko kuetuan an ndo Jesús ixi tsekie a sen ikaxin chujni nge e bikon sen tsijija nchakon xroxechón je e ndo chjen en ndo Dio, xjan jongí e xranchi chujni.

¹⁰ Méxin, je o sen no e sen ji i ko beki a sen nge e bikon sen ko stetjao sen nge e xrondachro ti xroxechón ndo íjngo.

¹¹ *Ko juanchangi e sen ndo Jesús:

—¿Sonda ndachro ni tjako ley ixi sa ó xrokui ndo Elías ko tjume e xrokui ndo Cristo?

¹² Ko ndachro ndo Jesús:

—Nduaxin tsij ndo Elías sa ó ko sinchekonchjian ndo kain nge e. ¿Ko nge e xrondachro xroon jitaxin chijnie ndo Dio?, ixi tsango tangi tson en chjen en ndo Dio, xjan jongí e xranchi chujni, ko tsitikaon a na xjan.

¹³ Ko ntatjunta ixi nduaxin ó kuji ndo Elías, ko tangi juinçekao na ndo xranchi je e na tjaun na, jaña jitaxin xroon chijnie ndo Dio ixi jaña tson en.

Ndo Jesús juinçekruen en ndo naa chajan

(Mt. 17:14-21; Lc. 9:37-43)

¹⁴ Ko hora kjan sen ti kuitu e kaxin sen chrikao ndo Jesús, bikon sen ixi kueya na ste na ngandajin sen. Ko kaxon kaxin ni tjako ley stetjao na sen.

¹⁵ Ko tuinxin hora bikon na ndo Jesús kain na xronka na, ko binga na ikjui na ti jii ndo, ko kuajon na juajna.

¹⁶ Ko ndo Jesús juanchangi e ndo na ko ndachro ndo:

—¿Nge e stetjaunnta sen chrjiki an?

¹⁷ Ko naa xi jingakjen en ni ste nti a juatingíexin xa:

—Maestro, nti i bikian chjan na chóna xjan espíritue Xixron anxrée tintue a xjan nichja xjan.

¹⁸ Ko ti no jii xjan, espíritue Xixron anxrée itsé xjan ko tjanka xjan nunte, ko tuchrjo ti xin ro a xjan ko ndachro neno xjan ko tsango toncha xjan. Ko jan an kuinóatáana ngajin sen chrjiku unta xrokuantsje sen espíritue Xixron anxrée ko jua i juinche e sen.

¹⁹ Ko ndo Jesús juatingíexin ndo:

—Ja anta titikaon anta jian ndo Dio. ¿Ti ngisa xrokonda tsake e ngajinnta? ¿Ngisa chao tsaxinta sinche enta ixra? Tikuunantana chán nti i.

²⁰ Ko bika o sen chán. Ko hora bikon espíritue Xixron anxrée ndo Jesús kuaxi kontsjenga espíritue chán, ko juanka espíritue chán ngata a inche ko jamangitaon chán ko kuachrje tuchrjo ro a chán.

²¹ Ko ndo Jesús juanchangi e ndo ndotée chán:

—¿Á ó sée jaña ton en chán?

Ko ndachro ndotée chán:

—Xranchio chán bakon en chán jaña.

²² Ko nanaó espíritue Xixron anxrée tjanka chán ti jii xro i ko tjanka chán ti jii inda ixi tjaun espíritu naatsóñaxón chán. Ko ixudio tikonóa nananta ko tingijnananta.

²³ Ko ndachro ndo Jesús:

—¿Á chao titikaonnta ndo Dio? Siá titikaonnta ndo Dio, chao tson en kain nge e.

²⁴ Ko tuinxin séen nichja ndotée chán, ko ndachro:

—Jan an titika on. Tingijnana ixi jaña ícha tsitika on.

²⁵ Ko tjume e bikon ndo Jesús ixi kueya na konchjiñe e na. Ko kuyakutee ndo espíritue Xixron anxrée chónða chán me e, ko ndachro ndo:

—Ja a espíritue ti tintue a nichja na ko ti tintue a tin en na. Jai jan an ntatjua tachrxexian chajan ji i ko tintu é chán ko íkjan ia.

²⁶ Ko je e espíritue Xixron anxrée kuyako ko kontsjenga espíritu chán íjngo, ko kuachrje espíritu. Ko je e chán ndako naa ni tsiken en kuitu e chán, ko kueya na ndachro na ixi ó kuen en chán.

²⁷ Ko ndo Jesús itsé ndo itja chán ko juinchengatjen ndo chán.

²⁸ Ko ndo Jesús ko sen teyuu chrikao ndo kuixin in sen naa nchia ko je e sen juanchangi e sen ndo:

—¿Sonda jua i kuantsjena espíritue Xixron anxrée?

²⁹ Ko ndachro ndo Jesús:

—Espíritu je o tachrxexin ixi xronichje enta Ndotána ko sinchekatse ñaonta jinta.

Íjngo ndachro ndo Jesús ixi tsen en ndo

(Mt. 17:22-23; Lc. 9:43-45)

³⁰ Hora sajuixin sen nti a, kuatsinga sen no nunte Galilea. Ko ndo Jesús tjaun ndo ixi xro an ngisen tsono e ste sen nti a

³¹ ixi tjaun ndo sinchekuen en ndo sen chrikao ndo. Ko ndache ndo sen:

—Jan an chjen en ndo Dio, xjan jongí e xranchi chujni, xrotséna na ko tsikaanna na ngajin ni tituan an ko naatsóñaxónna na. Ko nchakon nínxin xroxechónna.

³² Ko je e sen kuienxin a sen nge e ti ndachro ndo ko noe a sen á chao xrojuanchangí e sen ndo nge e xrondachro ji i.

¿Ngisen ícha tjintee?

(Mt. 18:1-5; Lc. 9:46-48)

³³ Ko tjume e kuiji sen tjajna Capernaum; ko hora ste sen nchia nti a, ndo Jesús juanchangi e ndo sen:

—¿Nge e stetjao kichuunta ti steyána cha o?

³⁴ *Ko je e sen tenko sen ixi ngatja cha o stetjao sen ixi ngisen ícha tjintee.

³⁵ *Ko tjume e ndo Jesús bake e ndo nunte ko kuiye e ndo ti teyuu sen chrikao ndo, ko ndache ndo sen:

—Siá xrojan ja anta tjaunnta ícha tjinteenta, xrokonda sinchenchiin asáanta ko tsingijnanta kain chujni.

³⁶ Ko tjume e kuiye e ndo naa chjan ko bake e ndo xjan ngusine ti ste sen, ko ndachro ndo:

³⁷ *—Ngisen tjue e naa ichjan xranchi xjan ji i ixi titikaonna sen, sen me e kaxon tjue e sen najan an, ko sen tjue e najan an, tjue e sen ngisen xruan anna jui i.

Ni je a ningakoína, ni me e tingijnana na

(Lc. 9:49-50; Mt. 10:42)

³⁸ Ko ndo Juan ndachro ndo:

—Maestro, bikona naa ngisen tantsje espíritue Xixron anxrée ixi juachaxiannta. Ko ntatjanna sen me e í sinche a sen jaña ixi je e sen chrjikui ana sen.

³⁹ Ko ndo Jesús ndachro ndo:

—Tingakuen anta sen me e ixi xro an ngisen, sen nche e naa ixra jian ixi juachaxinna, sen me e jua i ndako a xronichja sen ixi jan an.

⁴⁰ *Sen ningakoña ina, sen me e chao tsingijnana.

⁴¹ *Ko ngisen xrotjáanta naa vaso inda ixi nduaxin titikaonntana, nduaxin ndachrjan ixi tsayé e sen nge e jian.

Jian tsje enta ixi sinche anta ti ndako a

(Mt. 18:6-9; Lc. 17:1-2)

⁴² 'Ko ngisen sinchekateya naa ichjan titikaonna jan an sinche e xjan ti ndako a, ni me e cháña xrokuintexin na tusin na naa xrochri ijié ko xrokuitsingangi na ndachaon.

⁴³ *Ko siá tjáanta sinchexinnta ti ndako a, cháña xrokonchrijinnta tjáanta ixi cháña naakua tjáanta xrokuixin innta ti tsechónni kain nchakon ixi xrochondanta yui tjáanta ko saxrokjuinta ti jii xro i nai a tsanga,

⁴⁴ ti jii kutsindo ten a ko ti jiche xro i tsanga i.

⁴⁵ Ko kaxon tutáanta xrojuinchexinnta ti ndako a, xrokonchrijinnta tutáanta ixi cháña naakua tutáanta xrokuixixinnta ti tsechónni kain nchakon ixi siá xrochondanta yui tutáanta ko saxrokjuinta ti jii xro i nai a tsanga,

⁴⁶ ti jii kutsindo ten a ko ti jiche xro i tsanga i.

⁴⁷ *Ko siá ikonnta sinchexinnta ti ndako a, cháña xrokuantsjengínta ikonnta ixi naakua ikonnta xrochondanta ko jaña xrokuixin innta ti tetuan an ndo Dio ti tsechónni kain nchakon ixi yui ikonnta saxrokjuinta ti jiche xro i nai a tsanga,†

⁴⁸ ti jii kutsindo ten a ko ti jiche xro i tanga i.

⁴⁹ 'Ko kain chujni xrokonda tangi tson en sen ixi me e tsingijna sen, xranchi xíjnta tingijna tsojnínin nge e sineni.

⁵⁰ *Xíjnta jian xíjnta. Ko siá xíjnta ijní a xíjnta, jua i tsonda xíjnta. Ja anta xranchi xíjnta tinteenta, méxin juaxruxin tsariku unta kain chujni.

10

Ndo Jesús ndachro tsintue a na janchri e na

(Mt. 19:1-12; Lc. 16:18)

¹ Tjume e ndo Jesús kuachrjexin ndo tjajna Capernaum, sakjui ndo nunte Judea nangoxin ndajitinga Jordán. Ko kueya na xra o na ti jii ndo ko je e ndo juinchekuen en ndo na ixi me e kuanche e ndo.

² Ko kaxin xi fariseo konchjiñe e xa ngajin ndo ko juanchangi e xa ndo ixi tjaun xa ndako a xrojuatingíexin ndo. Ko juanchangi xa á chao tsintu eni janchri eni.

³ Ko ndo Jesús juatingíexin ndo, ko ndachro ndo:

—¿Nge e kuetuan an ndo Moisés?

⁴ *Ko ndachro xa:

—Ndo Moisés kuajon ndo juachaxin ixi tsoña naa xroon tsayé e nchri ixi chao tsintu e xa nchra.

⁵ Ko ndo Jesús ndachro ndo:

—Jaña kuetuan an ndo Moisés ixi ja anta ícha asáanta ko titikaon anta.

⁶ Ko ti xraxrangíxixión juinchéña ndo Dio kain nge e, juinchéña ndo naa xi ko naa nchri

⁷ ixi xi tsintu e xa ndotée xa ko janée xa ko tsekao xa janchri e xa.

⁸ Ko tjume e yui sen tsoña sen xranchi naakua naa chujni. Méxin, í je a yuu sen, ó naakua sen jai.

⁹ Ko jaña siá juachaxien ndo Dio ikjan sen naakua chujni, méxin inaa chujni jua i xrondachro ixi xrochjeya sen.

¹⁰ Ko hora ste sen nchia, sen teyuu chrikao ndo íjngo juanchangi e sen ndo nge e xrondachro ji i.

¹¹ *Ko ndo Jesús ndachro ndo:

—Siá naa xi tsintu e xa janchri e xa ko xrochóna xa inaa nchri, xi me e ndako a jinche e xa ixi ó tsikute e xa nchrinchri e xa.

¹² Ko kaxon siá naa nchri tsintu e nchra ndoxi e nchra ko xrochóna nchra inaa xi, kaxon je e nchra índako a jinche e nchra.

Ndo Jesús bake e ndo itja ndo ngata a kaxin ichjan

(Mt. 19:13-15; Lc. 18:15-17)

¹³ Kaxin na bika o na ichjan nchínchín ixi tsake e ndo Jesús itja ndo ngata a jaa xjan. Ko sen chrikao ndo Jesús kuyakutee sen ni bika o ichjan me e.

¹⁴ Ko bikon ndo Jesús jaña stenche e sen, méxin, koñao ndo ko ndachro ndo:

—Tintu enta ichjan tsii xjan ngajin ko tingakuen anta xjan, ixi ti no tetuan an ndo Dio tsikinixin en sen nche e xranchi ichjan.

¹⁵ *Ko xrontatjunta ixi ngisen xrokjan i xranchi naa ichjan nchín jua i tixin in sen ti tetuan an ndo Dio.

¹⁶ Ko tjume e joa ndo kain ichjan ko bake e itja ndo ngata a jaa xjan ko juinchenchaon ndo xjan.

Naa xi chóna kueya ti tjintee nichja xa ngajin ndo Jesús

(Mt. 19:16-30; Lc. 18:18-30)

¹⁷ Ko hora sakjui ndo Jesús, jitinga naa xi kujj xa ko bake exin xa ntatuchi in xa ngajin ndo Jesús, ko juanchangi xa:

—Maestro jian ja a, ¿nge e sinta a jan an ixi tsarichónna kain nchakon?

¹⁸ Ko tjume e ndo Jesús ndachro ndo:

—¿Sonda ndachrua ixi jianna jan an? Naakua ngisen jian, je o ndo Dio jian ndo.

¹⁹ Ja a ó no a kain ti kuetuan an ndo Dio: “Ncheye a nchrinchri a, tóñai a chujni, tema ia, tjangie a chujni siá jinche e ti jian, ncheye a na ko tájuan juasiaa ngajin ndotáa ko janáa.”

²⁰ Ko je e xi me e ndachro xa:

—Maestro, kain ji i ó juinta a xranchiona.

²¹ Ko ndo Jesús tsje e ndo xa ko tsango tjue e ndo xa. Ko ndachro ndo:

—Xra titjáña naakua nge e sinche e. Satjia ko nchekjia kain nge e chonda ko tonchjeye e ni nóa tomi me e. Jaña xrochonda nge e ícha tjintee ngajni. Ko tjume e tsji ia ko rua nana.

²² Ko kuin en xa jaña ko tsango kuechín xa ko sakjui xa, ixi tsango kueya nge e kuachóna xa.

²³ Ko ndo Jesús tsje e ndo ni ste nti a, ko ndache ndo sen teyuu chrikao ndo:

—Tsango tangi tixin in ni chóna itsjé nge e ti tetuan an ndo Dio.

²⁴ Ko xronka sen chrikao ndo Jesús ixi jaña ndachro ndo. Ko ndachro ndo íjngo:

—Ni chuntia ti nge e chóna, tsango tangi tixin in na ti tetuan an ndo Dio.

²⁵ Ícha tangi a ixi tsatsingatuxin naa ko camello ikon ntachika ixi naa ni chóna kueya nge e xrokuixin in na ti tetuan an ndo Dio.

²⁶ Ko je e sen kuin en sen jaña ko tsango xronka sen. Ko juanchangi e kichuu sen:

—¿Ngisen chao tixin in ti tetuan an ndo Dio?

²⁷ Ko ndo Jesús tsje e ndo sen, ko ndachro ndo:

—Ti nge e jua i sinche e chujni, ndo Dio chao sinche e ndo kain nge e.

²⁸ Ko ndo Pedro ndachro ndo:

—Kainna kuintu ana kain nge e chondana ixi rua ananta.

²⁹ Ko ndo Jesús ndachro ndo:

—Nduaxin ntatjunta ixi xrojan ngisen tintu e ndo a o xi kichuu, o nchri kichuu, o ndotée, o janée, o janchri e, o chjen en, o nunte e, ixi kuitikaonna sen jan an ko titikaon sen chijni ndachrjan,

³⁰ sen me e ícha itsjé nge e tsayé e sen nti i ko xrochónnda sen inaa ciento ícha itsjé nge e. Kueya nchia xrochónnda sen ko tsikon sen itsjé chujni xranchi ni kichuu sen ko xranchi janée sen ko xranchi chjen en sen ko tsayé e sen itsjé nunte. Ko maski tangi tson en sen ngata a nche nti i, tjume e ngajni tsechón sen kain nchakon.

³¹ *Ko kueya ni tituan an jai, nchakon tsjexin kain nge e ítsituan i na. Ko itsjé ni tjinte a jai, nchakon me e ícha tsetuan an na.

Nínxin chronga ndo Jesús ixi tsen en ndo

(Mt. 20:17-19; Lc. 18:31-34)

³² Tjume e yaa sen cha o satji sen tjajna Jerusalén ko ndo Jesús kuitaon ndo nti a. Ko sen chrikao ndo stexronka sen sterué e sen. Ko ndo Jesús kuiye e ndo je o sen teyuu, ko kuaxi ndo ndache ndo sen xranchi tson en ndo.

³³ Ko ja in ndachro ndo:

—Jai satsjina tjajna Jerusalén. Ko tjume e jan an, chjen en ndo Dio, xjan jongí e xranchi chujni, xrotséna na tsikaanna na ngajin xitaana tetuan an ko xi tjako ley. Ko ni tetuan an tsajon na juachaxin ixi tsikaon na. Tjume e tsikaanna na ngajin ni je a judío

³⁴ ko je e na tsjanoana na, tsande ena itja na ikon, tsikitéena na ndatée na ko naat-sónaxónna na. Ko nchakon nínxin xroxechónna íjngo.

Ndo Jacobo ko ndo Juan tjanchia sen naa nge e

(Mt. 20:20-28)

³⁵ Ko tjume e ndo Jacobo ko ndo Juan, chjen en ndo Zebedeo, konchjiñe e sen ngajin ndo Jesús ko ndachro sen:

—Maestro, tjancha ananta naa nge e.

³⁶ Ko juanchangi ndo Jesús:

—¿Nge e tjaunnta?

³⁷ Ko ndachro sen:

—Nchakon tsake enta ti tetuan an, tájonnta juachaxin ixi naa jan anna tsake ena ndatsjonxin jian ti tsake enta ja anta ko inaa jan anna tsake ena ndatsjonxin ikjon.

³⁸ *Ko tjume e ndo Jesús ndache ndo sen:

—Ja anta noa inta nge e tjanchianta. ¿Á chao tsikixin annta ti tangi tsónna jan an?

³⁹ Ko je e sen juatingíexin sen:

—Jaán chao tsikixinnana.

Ko ndo Jesús ndache ndo sen:

—Nduaxin tangi tson an ja anta xranchi tangi sinchena na jan an.

⁴⁰ Ko jan an jua i xrontatjunta ixi naa ja anta tsake enta ti ndatsjonxin jian ko inaanta tsake enta ti ndatsjonxin ikjon ti tsake e jan an ixi ó sa ó jitaxin ngisen tsake e nti a.

⁴¹ Ko ikaxin sen ite,* sen chrikao ndo Jesús, kuin en sen ixi jaña tjanchia ndo Jacobo ko ndo Juan ko kuaxi sen koña sen ngajin sen yuu.

⁴² *Ko tjume e kuiye e ndo Jesús kain sen ko ndache ndo sen:

—Ó no anta ixi ni tetuan an xasintajni† tsango tetuen en na kain chujni ko kain ni tsango tetuan an, ni me e tsango nchejié aséen na ko chjinga nchekao na chujni.

⁴³ *Ko ja anta sinche anta jaña. Na í. Siá xrojannta tjaunnta tsituan annta xrokonda tsingijnanta ni kichuunta.

⁴⁴ Ko xrojannta tjaunnta ícha xrochondanta juachaxin, me e xrokonda tsitikaonnta nge e tsituan annta ikaxin chujni.

10:31 Mt. 20:16; Lc. 13:30. **10:38** Lc. 12:50. * **10:41** ite diez **10:42** Lc. 22:25, 26. † **10:42** xasintajni mundo **10:43** Mt. 23:11; Mr. 9:35; Lc. 22:26.

⁴⁵ Ixi chjen en ndo Dio, xjan jongí e xranchi chujni, kui a xjan ixi chujni sinche e xra ngajin xjan. Na i. Je e xjan kuii xjan ixi sinche e xjan ixra ngajin chujni ko tsen en xjan ixi kain chujni tsehón sen.

Ndo Jesús juinchexruen en ndo xi Bartimeo

(Mt. 20:29-34; Lc. 18:35-43)

⁴⁶ Ko tjume e kuiji sen tjajna Jericó. Ko ndo Jesús ko sen chrikao ndo ko kueya na kuachrjexin na tjajna nti a. Ko nti a jii naa xi jua i tikon ndatin in xa Bartimeo ko ndotée xa ndatin in Timeo. Take e xa ngande e cha o ko tjanchiaka a xa.

⁴⁷ Ko je e xa kuin en xa ixi ó jitonchjiñe e ndo Jesús tjajna Nazaret, ko kuaxi xa kuyako xa ko ndachro xa:

—Jesús, ndo kuachrjenixin ndo David, tikonóa nanta.

⁴⁸ Ko kueya na kuyakutee na xa ko ndache na xa xrotenko xa. Ko je e xa ícha séen kuyako xa ko ndachro xa:

—Ja anta, ndo kuachrjenixinnta ndo David, tikonóa nanta.

⁴⁹ Ko chón en ndo Jesús ko kuetuen en ndo na:

—Tiye enta xi me e.

Ko tjume e kuiye e na je e xi tikon a ko ndache na xa:

—Xrakon a, tingatjen ixi jitiya a ndo Jesús.

⁵⁰ Ko nango kuintu e xa ti jitsáa xa ko chrinka xa bingatjen xa ko konchjiñe e xa ti jii ndo Jesús.

⁵¹ Ko ndo Jesús juanchangi e ndo xa:

—¿Nge e tjauan sinta a ixi ja a?

Ko xi tikon a ndachro xa:

—Maestro, tja on tsikon.

⁵² Ko ndo Jesús ndache ndo xa:

—Jai chao satjia. Ó koxruan an ixi chuntiana.

Ko je e xi tikon a tuinxin chao bikon xa ko rué e xa ndo Jesús.

11

Ndo Jesús kuixin in ndo tjajna Jerusalén

(Mt. 21:1-11; Lc. 19:28-40; Jn. 12:12-19)

¹ Hora jitonchjiñe e sen tjajna Jerusalén, tjenka tjajna Betfagé ko tjajna Betania tjenka jinā ndatin in olivo, ndo Jesús kuetuen en ndo yuu sen chrikao ndo,

² ko ndachro ndo:

—Itjinta tjajna jii yá a ko hora tsjasonta nti a tsinchíinta naa kuntajno jichroá ba ko me e xra xro an ngisen teta a ba. Toxindange enta ba ko tsikuunta ba.

³ Ko siá xrojan ngisen tsjanchangi anta sonda tonxindange enta ba, ndachenta sen: “Nchéeni xrokonde e ndo ba ko tjume e tsonkjanna ba.”

⁴ Ko je e sen ikjui sen ko kuitja sen kuntajno jichroá ba tjenka nchia ko konxindange e sen ba.

⁵ Ko kaxin ni ste nti a juanchangi na:

—¿Sonda tonxindange enta kuntajno ña?

⁶ Ko je e sen juatingíexin sen xranchi ndachro ndo Jesús. Ko je e na kuajon na juachaxin tsikao sen ba.

⁷ Ko tjume e sabikao sen kuntajno me e ti jii ndo Jesús ko kuake e sen manta ngata a ba manta stetsáa sen ko ndo Jesús kueta a ndo ba.

⁸ Ko kaxon itsjé na kuantsje na manta stetsáa na ko bingó na manta ngaya cha o ti tsatsinga ndo Jesús. Ko ikaxin na konchrinjin na chaan ntayua ko bingó na ngaya cha o.

⁹ Ko ni jititaon cha o ko ni sterué e kuaxi na kuyako na ixi tsango ché e na ko ndachro na:

—Juasaya tayé e ndo Dio. ¡Tsango jian ngisen jitii xixi juachaxien ndo Dio!

¹⁰ Tsango jian ngisen jitii juachaxien ndo Dio xixi je e ndo jitika o ndo juachaxin bakituan an ndo xrachreina David. Juasie ndo Dio jii ngajni.

¹¹ Ko ndo Jesús kuiji ndo tjanya Jerusalén ko kuixin in ndo ni ngo ícha tetuan an ko tsje e ndo nguixin ngaxin in nti a. Ko ó kóndo ko ndo Jesús ko sen teyuu chrikao ndo sakjui sen tjanya Betania.

Ndo Jesús koñao e ndo ntaq higo xixi tajon a ntaq itu

(Mt. 21:18-19)

¹² Tjume e ndúyaxin kjanxin sen tjanya Betania ko ndo Jesús kuen en ndo jinta.

¹³ Ko bikon ndo ikjin jii naa ntaq higo chóna kayua ko kuitsje e ndo á chóna ntaq itu. Ko bikon ndo xixi xro an tu chóna ntaq, je o ika xixi je a nchakuen itu.

¹⁴ Ko ndo Jesús nichje e ndo ntaq me e:

—Í xro an ngisen sine itu tsajuan.

Ko sen teyuu chrikao ndo kuin en sen jaña ndachro ndo.

Ndo Jesús juinchetjúa ndo ni ngo

(Mt. 21:12-17; Lc. 19:45-48; Jn. 2:13-22)

¹⁵ Ko kuiji sen tjanya Jerusalén ko ndo Jesús kuixin in ndo ni ngo ko juangixin ndo kuantsje ndo kain ni stenchekji ko kain ni stete na. Ko juanka ndo mesa tjasingixixin na tomi ko ntaxitauen ni stenchekji kuntúa,

¹⁶ ko kuintue a ndo ni ste nti a tsatsingaka o na nge e ngaxin in ni ngo.

¹⁷ Ko juinchekuen en ndo na, ko ja in ndachro ndo:

—Jitaxin xroon chijnie ndo Dio: “Nía ji i ndatin in nchia xronichjaxin chujni kain tjanya ngajin jan an”, ko ja anta juinchekjannta nchia itjaq ne e xiche e.

¹⁸ Ko xitaana tetuan an ko ni tjako ley kuin en na ji i, ko kuaxi xraxaon na xranchi naatsónaxón na ndo Jesús, ko xrakon na xixi itsje chujni juinche e na juaxruxin xixi nge e juinchekuen en ndo na.

¹⁹ Ko ó kóndo kuachrxixin ndo nti a ko sakjui ndo.

Tsixema ntaq tajon tu higo

(Mt. 21:20-22)

²⁰ Ko kuatsinga sen ti jii ntaq tajon tu higo ko bikon sen xixi ó tsixema ntaq xixi nue e ntaq.

²¹ Ko ndo Pedro sintaxiñao ndo ti ndache ndo Jesús ntaq higo ko ndachro ndo:

—Maestro, tsje enta ntaq tu higo koyakutéenta najna ko jai ó tsixema ntaq.

²² Ko ndo Jesús juatingíexin ndo:

—Chuntianta ndo Dio.

²³ *Nduaxin ntatjunta xixi siá xrojan ja anta xrondachenta ijna ji i: “Satjixian nti i ko titsinga ngia ndachaon”, ko xixi nchiji asáanta xrochuntianta ngajin ndo Dio ko tson en ti tjanchianta.

²⁴ Méxin, jaña ntatjunta xixi kain nge e tsjanche enta ndo Dio, siá nduaxin xrochuntianta xixi tsaye enta me e, jaña tson en ko nduaxin tsaye enta.

²⁵ *Ko hora nichje enta ndo Dio ko xroxaxaonnta xixi ningakon ennta xrojan ngisen, cháña jian xrotjáña anta nge e junta anta na xixi jaña ndotánta jii ngajni kaxon xrotjáña e ndo ijie chondanta.

²⁶ Ko siá xrotjáña inta ijie chóna na, ndotánta jii ngajni kaxon xrotjáña a ndo ti ijie chondanta.

Tjanchangí e na ndo Jesús nge e juachaxin chóna ndo

(Mt. 21:23-27; Lc. 20:1-8)

²⁷ Ko tjume e ikjan sen tjajna Jerusalén íjngo. Ko ndo Jesús kuaji ndo ngaxin in ni ngo, ko konchjiñe e xitaana tetuan an ko xi tjako ley ko xi tetuan an ni ngo,

²⁸ ko je e xa juanchangi e xa ndo Jesús:

—¿Nge e juachaxin chonda ixi nche e ji i? ¿Ngisen tjáa juachaxin ixi jaña nche e?

²⁹ Ko ndo Jesús juatingíexin ndo ko ndachro ndo:

—Kaxon jan an tsjanchangi anta naa nge e, siá tsjatingíexinnta nge e, xrontatjunta nge e juachaxin chóna jan an.

³⁰ ¿Ngisen xruan an ndo Juan ixi tsikitée ndo chujni? ¿Á ndo Dio?, o, ¿á chujni? Tjate enta.

³¹ Ko je o xa juao kichuu xa:

—Siá xrondachrona ixi ndo Dio tsixrúa an xi Juan, tjume e tsjanchangi xi ji i sonda kuitikaon ana xi Juan.

³² ¿Ko siá xrondachrona ixi chujni tsixrúa an xi Juan, já tsoñao na?

Ko xrakon en xa ni tjajna ixi kain na kuitikaon na ixi ndo Juan nduaxin kuanichja ndo chijnie ndo Dio.

³³ Ko tjume e ndache xa ndo Jesús:

—Nóna ina.

Ko ndachro ndo Jesús:

—Ko kaxon jan an xrondachrjan i ngisen chjana juachaxin ixi nta a ixra ji i.

12

Ndo Jesús juako ndo xranchi kaxin xi nche a xa ixra jian

(Mt. 21:33-46; Lc. 20:9-19)

¹ Tjume e ndo Jesús ijngo beki ndo naa chijni, ko ndachro ndo:

—Bake e naa xi, kuenga xa jngi e xa nta tu uva ko juinchéñe e xa naa korra ko inge xa naa tuye no tsóñaxin xran vino. Kaxon juinchéña xa naa tjatu o nui, nti a tsajin in na tsendáa na jngi e xa.

Tjume e kuajon xa ijngi ngajin ikaxin na ixi sinche e na ixra ko sakjui xa ikjin.

² Ko kuij nchakon tsaxi tsandáa na itu, ko je e xa xruan an xa naa sen nche e xrée xa itsji sen tsjanchia sen itu tikinixin en xa.

³ Ko ni juinche e ixra ijngi itsé na sen tsixrúa an xi jngi e, ko juaya na ngajin sen, ko xro an itu chjée na sen ko bengi na sen.

⁴ Ko tjume e xi nunte e xruan an xa inaa sen nche e xrée xa ngajin na. Ko kuiji sen nti a ko ni chóna ijngi kuaxi na sen ixro ko juincheni e na jaa sen ko kuyakutee na sen.

⁵ Ko tjume e xi nunte e xruan an xa inaa ngisen kuitsje e nti a. Ko sen me e kuiji sen nti a ko naakóñaxón na sen me e. Ko íjngo xruan an xa ikaxin sen nche e xrée xa, kuitsje e sen, ko juaya na ngajin kaxin sen ko ikaxin sen naakóñaxón na sen.

⁶ Ko xi nunte e chóna xa naakua chjen en xa, tsango tjue e xa xjan. Ko xruan an xa chjen en xa ikjui xjan kuitsje e xjan nunte ixi xraxaon xa: “Chjan na, jaán ícha tsitikaon na xjan.”

⁷ Ko ni chóna ijngi juao kichuu na: “Xjan ji i tsitu e xjan kain nge e. Naatsóñaxónna xjan, ko jaina tsituina kain nge e.”

⁸ Ko jaña itsé na xjan, naakóñaxón na xjan ko kuantsjexin na xjan ngataon ijngi.

⁹ Ko juanchangi ndo Jesús ko ndachro ndo:

—¿Nge e sinche e xi nunte e? Tsij xa ko naatsóñaxón xa ni chóna nunte e xa, tjume e tsajon xa jngi e xa ngajin inaa ngisen sinche e ixra.

¹⁰ ¿Á juinchekuanxin anta ti jitaxin xroon chijnie ndo Dio? Ndachro:

Ixro jueña a ni juinchekonchjian tjatu o, jai xro me e ikjan xro, ixro ícha tetuan an.

¹¹ Jaña juinche e Ncháina ndo Dio,

ko ji i tsango chaxro tikonni.

¹² Ko ni tituan an tjaun n̄a xrotsé n̄a ndo Jesús ixi kuienxin n̄a ixi kain ti ndachro ndo nichja ndo ixi je e n̄a me e. Ko xro an nge e juinche e n̄a ixi xrakon en n̄a ni tjajna ko kuintu e n̄a ndo ko sakjui n̄a.

Á chao xroxenge e n̄a ni tituan an

(Mt. 22:15-22; Lc. 20:20-26)

¹³ Tjume e xruan an n̄a ikaxin ni fariseo ko ni nche e xrée xi Herodes ixi tsjanchangí e n̄a ndo Jesús kaxin nge e ixi tjaun n̄a ndako a tsjatingíexin ndo ko jaña tsjankata a n̄a ndo ijje.

¹⁴ Ko kuiji n̄a ti jii ndo ko ndachro n̄a:

—Maestro, nónana ixi ja a nichja ti nduaxin ko ta ia juachjaon ixi nge e xroxaxaon chujni ixi nduaxin nchekuen é n̄a chijnie ndo Dio. Méxin, ndachijiana, ¿á chao tsjengana n̄a ngajin xi tetuan an, tomi tjanchia xa, o na i?

¹⁵ Ko ndo Jesús no e ndo jian nge e stexraxaon xa, ko ndachro ndo:

—¿Sonda tjaunnta ndakua i tsjatengiixin? Tikuunta naa tomi xrotsja a.

¹⁶ Ko je e n̄a chjée n̄a ndo naa tomi ixi xrotsje e ndo. Ko juanchangi ndo:

—¿Ngisen ikon jinito tomi ji i ko ngisen jitaxin tomi?

Ko je e n̄a juatingíexin n̄a:

—Xi tetuan an, xi César.

¹⁷ Ko juate e ndo Jesús ko ndachro ndo:

—Chje énta xi tetuan an nge e tikinixin en xa; ko chje énta ndo Dio nge e tikinixin en ndo.

Ko xrakon xa ixi jaña juate e ndo Jesús.

Juanchangi n̄a á nduaxin xroxechón chujni tsiken en

(Mt. 22:23-33; Lc. 20:27-40)

¹⁸ *Ko tjume e xi saduceo kuitsje e xa ndo Jesús ixi je e xa xraxaon xa nduaxin a xroxechón ni tsiken en ko ja in juanchangi e xa ndo Jesús:

¹⁹ —Maestro, ndo Moisés tsikjin ndo xroon ó sa ó ndachro siá tsen en naa xi ko kuintu e janchri e xa, ko xro an ichjan kuachóndaka o xa janchri e xa, xi kichuu xi kuen en xrokonda tsute e xa nchri ka an, ko ichjan xrochóndaka o xa nchrikan an xrokjan xranchi chjen en xi kuen en.

²⁰ Ko bake e yāāto xi kichuu xa. Ko xi sa ó kute e xa janchri e xa. Tjume e kuen en xa, ko xro an ichjan kuachónda xa.

²¹ Ko tjume e xi yuxin kute e xa nchri ka an, ko kaxon kuen en xa. Ko xro an ichjan kuichónda xa. Ko tjume e xi nínxin kute e xa nchri ka an ko jaña xraje o kon en.

²² Ko jaña kon en ngajin kain xi yāāto. Kain xa ndakuen en xa ko xro an ichjan kuintu e xa. Ko kaxon je e nchra ndakuen en nchra.

²³ Méxin, nchakon xroxechón kain chujni tsiken en, ¿ngisen kuanduá ndoxi e nchra ixi kain yāāto xi kute e nchra?

²⁴ Ko juate e ndo Jesús:

—Ndako a xraxaonnta ixi tienxin anta nge e ndachro xroon chijnie ndo Dio ko chuxin anta juachaxien ndo.

²⁵ Nchakon xroxechón chujni tsiken en, sen me e tsute a sen ko tsajon a sen chjen en sen ixi tsute e xjan ixi chujni tsiken en xranchi sen ángel tsintee sen ngajní.*

²⁶ Ko ti xroxechón chujni tsiken en, ¿á tsje anta nge e ichro xroon tsikjin ndo Moisés ti chronga xranchi nichjaxin ndo Dio ti n̄aa yua yaa xro i? Ko ja in kuin en ndo Moisés: “Jan an ndo Dio titikaon ndo Abraham ko ndo Isaac ko ndo Jacob.”

²⁷ Méxin, ndo Dio je a naa ndo Dioe ni tsiken en. Na i. Ndo Dio me e ndo Dioe sen jichón. Ko ja anta tienxin anta ko ndako a xraxaonnta.

Nge e ícha tjintee kuetuan an ndo Dio
(Mt. 22:34-40)

²⁸ Tjume e kuij naa xi tjako ley ko kuin en xa xranchi stetjao na ndo Jesús ko kuin en xa jian juate e ndo. Ko juanchangi xa ko ndachro xa:

—¿Nge e ti ícha tjintee tsiketuan an ndo Dio?

²⁹ Ko ndo Jesús juatingíexin ndo:

—Ti ícha tjintee tsiketuan an ndo Dio ja in ndachro: “Tin ennta kainnta ni Israel ixi Ncháina[†] ndo Dio naáko ndo jii ko ko a inaa ngisen.

³⁰ Ko ixi nchijí asáanta ko ti xraxaonnta xrotjuexinnta ndo Dio.” Me e ti ícha tjintee tsiketuan an ndo Dio.

³¹ Ko ti chijni yuxin tsiketuan an ndo Dio ja in ndachro: “Xrotjue enta kichuunta xranchi tjue enta asáanta.” Ko a inaa nge e ícha tjintee ti tsiketuan an ndo Dio.

³² Tjume e juate e xi tjako ley, ko ndachro xa:

—Ndako ndachrua, Maestro, nduaxin naakua ndo Dio jii ko ko a inaa ngisen.

³³ Nóna ixi nchijí aséenni ko ixi ti xraxaonni ko ixi nchijí je eni xrotjuexinni ndo Dio ko xrotjue eni ni kichuuni xranchi tjue eni aséenni. Me e ícha tjintee ixi kain iko xrokóñani xrokuayé e ndo Dio.

³⁴ *Ko bikon ndo Jesús ixi jian juate e xa, ndachro ndo:

—Ja a íkjín a ritjén ti jii juachaxien ndo Dio.

Ko kain na xronka na ko íxro an ngisen juanchangi e ndo ícha nge e.

¿Ngisen kuachrjenixin ndo Cristo?
(Mt. 22:41-46; Lc. 20:41-44)

³⁵ Tjume e ndo Jesús bake e ndo ni ngo juinchekuen en ndo chujni. Ko juanchangi ndo ko ndachro ndo:

—¿Sonda ni tjako ley ndachro na ixi ndo Cristo naa xjantié ndo David?

³⁶ Ixi Espíritue ndo Dio bingijna ndo David ko ndachro ndo:

Ndo Dio ndache ndo Nchána:

“Take é ndatsjonxin jian ti no tituan an jan an, tsjexinja tsitjáña kain ni ningakon an.”

³⁷ ¿Xranchi ndo Cristo xrokjui xjantié ndo David?, ko ndo David ndachro ndo ixi ndo Cristo Nchée je e ndo.

Ko kain chujni juaxruxin bake e na ti kuin en na ti beki ndo Jesús.

Ndo Jesús chronga ndo xranchi nche e ni tjako ley
(Mt. 23:1-36; Lc. 11:37-54; 20:45-47)

³⁸ Tjume e ndo Jesús nichja ndo ko ndachro ndo:

—Tsje enta xranchi nche e ni tjako ley ixi je e na nche e na juaxruxin ixi steyá na manta ícha jine ko tjaun na ixi kain ni tjajna tsajon na juasie ngajin je e na nchakon ichrji na ngataon ndasin.

³⁹ Je e na tjée na ntaxitaon ícha jian tseta a na ngaxin in ni ngo. Ko kaxon nchakon itji na kia tjaun na tsake e na ti no ícha jian.

⁴⁰ Ko tantsje e na nchri ka an ndo a nchra. Ko tjume e séen nichje e na ndo Dio ixi tsin en chujni nge e ndachro na ko jaña xroxraxaon chujni ixi je e na jian na. Ni me e ícha tangi tson en na.

Tomi kuajon naa nchri ka an
(Lc. 21:1-4)

[†] 12:29 Ncháina Señor Ncháina Jesús o Ncháina Dio 12:34 Lc. 10:25-28.

⁴¹ Naa nchakon ndo Jesús bake e ndo ngaxin in ni ngo tjenka ti tingachjian tomi. Ko jitsje e ndo take e n̄a tomi ngaya n̄a. Ko ni chón̄da itsjé tomi kuajon n̄a tsjé tomi.

⁴² Ko kaxon kujj naa nchri ka an nóa ko kuajon nchra yuu tomi nchínchín, tomi tjinte a.

⁴³ Ko tjume e ndo Jesús kuiye e ndo sen chrikao ndo, ko ndachro ndo:

—Nduaxin ntatjunta ixi nchri ka an, nchri nóa ícha tjintee bikon ndo Dio tomi ti kuajon nchra ixi ti kuajon ikaxin n̄a,

⁴⁴ ixi ni kaxin je o tomi tsixe e kuajon n̄a. Ko je e nchri nóa kuajon nchra kain tomi chonda nchra xrojuinexin nchra.

13

Ndo Jesús chronga ndo tsitjáña ni ngo

(Mt. 24:1-2; Lc. 21:5-6)

¹ Tjume e nchakon kuachrxexin ndo Jesús ni ngo ijié, ndachro sen chrikao ndo:

—Maestro, tsango chaxro ixro ko chaxro nchia tsikonchjian.

² Ko juate e ndo Jesús ko ndachro ndo:

—¿Á tikuan nchia ijié tsikonchjian? Tsiji nchakon ninaa ixro tsitue a ngata a inaa ixro, kain tsitjáña.

Nge e tson en ti tsjexixin nunte xasintajni

(Mt. 24:3-28; Lc. 21:7-24; 17:22-24)

³ Ko tjume e sakjui sen ngata a ijna Olivo jna jii ngajinxin* ni ngo. Nti a bake e ndo Jesús, ndo Pedro, ndo Jacobo, ndo Juan, ko ndo Andrés ko juanchangi e sen ndo, ko ndachro sen:

⁴ —Ndachijinjanta ngisa tson en kain ji in ko nge e tsonoxin ixi jaña tsonónana.

⁵ Ko ndo Jesús juate e ndo ko ndachro ndo:

—Tsje enta jian ixi xro an ngisen sintaya anta.

⁶ Kueya n̄a tsij n̄a xrondachro n̄a ixi je e n̄a ndo Cristo. Ko jaña sincheye e n̄a kueya chujni.

⁷ Ko nchakon tsin ennta ixi tseto naa tjajna ngajin inaa tjajna ko tsóña kichuu n̄a, ja anta xronka inta ixi xrokonda tson en me e. Ko xratsitjáña i xasintajni.

⁸ Naa tjajna tsetoka o inaa tjajna ko xi tetuan an tjajna tsinteke to xa. Ko itsjé no tsonengi nunte ko kueya tjajna tsatse n̄a jinta. Ji i ti xrangíxixín tsij ijié juachjaon.

⁹ *Ko ja anta soji take énta ixi tsiku unta n̄a ti jii xi tetuan an ko ngaxin in ni ngo nti a tsjaya n̄a ngajinnta. Kaxon tsikaannta n̄a ti jii xi gobernador ko xi rey ixi chuntianta ngajin jan an; ko jaña tsjakoxinnta ngajin je e n̄a ixi titikaonninta jan an.

¹⁰ Ko xratsitjáña i xasintajni, xrokonda tsin en kain tjajna chijni jian tsantsje ijie.

¹¹ Hora tsiku unta n̄a ti jii xi tetuan an, ta inta juachjaon nge e tsjate enta. Ja anta xronichjanta nge e tsajon ndo Dio nchakon me e, ixi je a ja anta xronichjanta. Espíritue ndo Dio xronichjatin ixi ja anta.

¹² Kaxin chujni tsikaan n̄a ni kichuu n̄a ixi tsóña n̄a n̄a. Ko jaña kaxin n̄a tsikaan n̄a chjen en n̄a ixi tsóña n̄a xjan ko íkaxin n̄a xraningakon en n̄a ndotée n̄a ko janée n̄a ko tsikaan n̄a n̄a ixi tsen en n̄a.

¹³ *Kainko ni xasintajni xroningakon annta n̄a ixi titikaonninta. Ko sen nduaxin titikaonna jan an ko tsoguaxi en sen ti tsijija nchakon tsjexin kain nge e, sen me e tsayé e juachaxin tsehón sen kain nchakon.

¹⁴ Sen sinchekuanxin xroon chijnie ndo Dio xrokonda tsienxin sen jian ji i: nchakon tsikonnta tsake e naa xi tsango ña i ti no tikinixin a xrobake e xa, xranchi tsindachro ndo profeta Daniel, ko ni jii nunte Judea nchakon tsikon n̄a me e, satsinga n̄a ijna tsikemá n̄a.

* 13:3 ngajinxin delante de 13:9 Mt. 10:17-20; Lc. 12:11, 12. 13:13 Mt. 10:22.

15 *Ko ni jii ngata a nchia íxroxingajin a na, tixin in na nchia tsantsje na xrojan nge e.

16 Ko ni jii ngataon ijngi íxrokjan i na xrotsé na nge e tsetsáa na.

17 Ko nchakon me e lastu nchri yaa ichjan ko nchri stenchekaki chjen en.

18 Xrojuinche enta ndo Dio ixi je a nchakuen ikin xrokon en ji i.

19 *Ko nchakon me e ijié juachjaon tson en na, xranchi nai a tsikon en ti juangíxixín ndo Dio juinchéña ndo xasintajni ko tsoen a jaña íjngo.

20 Ko siá Ncháina ndo Dio xrokuajon a ndo juachaxin ixi sé a tsonchrjen en ji i, íxro an ngisen xrokuechón. Ko tjue e ndo sen tsikinche e ndo, méxin xro an itsjé nchakon tsochrje en ji i.

21 'Ko siá xrojan ngisen xrontatjunta: “Tsje enta, nti i jii ndo Cristo”, o xrondachro na: “Tsje enta, nda a jii ndo”, titikaon anta na.

22 Ixi tsii kaxin na xrondachro na ixi je e na ndo Cristo ko kaxon kaxin na ndako a tsjako na ko tsjakoxin na naa ixra ijié ixi tjaun na sincheye e na chujni ko kaxon ngajin sen titikaon ndo Dio.

23 Ko ja anta tsje enta jian ixi ó ntatjunta sa ó nge e tson en.

Tsii Chjen en ndo Dio, xjan jongí e xranchi chujni

(Mt. 24:29-35, 42-44; Lc. 21:25-36)

24 *Nchakon tsatsinga juachjaon, chjiixro tsonaxixe e, ko nchanitjao ítsingasáña i.

25 *Ko kaxin nchanotsé tsitsingaxin ngajni ko kain juachaxin jii ngajni xroxranga.

26 *Tjume e tsikonnta tsii Chjen en ndo Dio, xjan jongí e xranchi chujni, ngakjen en itjui ko tsjako ndo ijié juachaxin chónnda ndo.

27 Ko tsetuen en ndo sen ángel satsji sen nchijí ngata a nche ixi tsja o sen kain sen tsikinche e ndo Dio.

28 'Xraxaonnta nge e beki anta ixi nta tu higo. Nchakon tachrje ika chaan nta, ó no anta ixi íse a tsii nchakon súa,

29 jaña kaxon nchakon tsikonnta jiton en kain ji i, me e ó no anta ixi ó kuji nchakon tsjexin xasintajni.

30 Méxin, nduaxin ntatjunta ixi kain ji i sa ó tson en, ko xratsen a ni jii ngata a nunte.

31 Ko ngajni ko xasintajni tsitjáña ko chijnina tsitjáña i, nduaxin jaña tson en.

32 *Ko nchakon ko hora tson en ji i, xro an ngisen no e, ni sen ángel jii ngajni ni kaxon Chjen en ndo Dio, xjan jongí e xranchi chujni, noe a sen nchakon tson en ji i. Je o Ndotána no e ndo.

33 'Méxin tsje enta jian ko xronichje enta ndo Dio ixi noa inta ngisa ko ngiora tson en kain ji i.

34 *Xranchi naa ngisen satsji ikjín, tintu e sen ndo a sen, sa ó tetuan an sen ngujngu ixra sinche e ni nche e xrée sen. Ko kuetuen en sen naa xi tsendáa xa nchia ko kain nge e.

35 Méxin, ja anta tarichrin anta ixi noa inta ngisa xrokjan nchée nchia, á naa tsondo o á naa tiie o á ngusine tiie o hora itsje kuntaxichíká o á tsingasáña,

36 ko banchexin tuinxin tsii sen ndo a tsitjanta sen stechrinnta.

37 Ti ntatjunta, jaña kain na ixi xrotsje e na jian xranchi tsake e na.

14

Tjao na xranchi xrotsé na ndo Jesús

(Mt. 26:1-5; Lc. 22:1-2; Jn. 11:45-53)

1 Xratitjáña yuu nchakon tsaxi kia pascua ti sine na nutja chónnda i ti tja in nutja.

Tjume e xitaana tetuan an ko ni tjako ley xraxaon na xranchi sincheya na ixi xrotsé na ndo Jesús ko naatsóñaxón na ndo.

2 Ko ndachro na:

—Je a nchakon kia sintu una ji i xixi batsoñao kain chujni.

*Naa nchri bikitée nchra aceite chaxro xraxé jaa ndo Jesús
(Mt. 26:6-13; Jn. 12:1-8)*

³ *Tjume e ndo Jesús bake e ndo tjajna Betania ndo a ndo Simón, ndo kuachónnda chinlepra. Ko hora jine ndo Jesús, tuinxin kuij naa nchri bika o nchra naa xroxrao jitjiá nda chaxro xraxé tsjo nardo, tsango tjintee. Ko nchri me e kuantje e nchra xro ko bikitée nchra jaa ndo Jesús nda me e.

⁴ Ko sen ste nti a koñao e sen nchra ko ndachro sen:

—¿Sonda juinhexienxin nchra inda chaxro xraxé?

⁵ Cháña xrojuinçekji nchra nda me e, xixi ní ciento tomi denario, ko tjume e xrojuinçekitun en nchra ni nóa.

⁶ Ko ndachro ndo Jesús:

—Tintu enta nchra, ¿sonda tuyakutéenta nchra? Je e nchra juinche e nchra naa nge e jian ngajin.

⁷ Ni nóa kain nchakon tsariku unta na, ko chao tsingijnanta na xrojan nchakon. Ko jan an kain a nchakon tsake e ngajinnta.

⁸ Ko je e nchra ó juinche e nchra nge e ti xrokonda xrojuinche e nchra. Sa ó bingamána nchra xrojan xixi xroxrabaana.

⁹ Nduaxin ndachrjan xixi kain ti no tsin en na chijni jian, nchijí ngata a nche tsin en na kaxon nge e juinche e nchri ji i, ko xroxraon na nchra xixi jaña juinche e nchra.

*Xi Judas juinçekji xa ndo Jesús
(Mt. 26:14-16; Lc. 22:3-6)*

¹⁰ Tjume e xi Judas Iscariote, naa xi teyuu sen chrikao ndo Jesús, kuitsje e xa xitaana tetuan an xixi xrochronga xa xranchi xrotsé na ndo Jesús.

¹¹ Ko je e na bake e na juaxruxin xixi kuin en na nge e ndachro xi Judas ko ndachro na tsajon na tomi tsayé e xa. Ko tjume e kuaxi xraxaon xa xranchi sinche e xa xixi xrotsé na ndo Jesús.

*Juinekao sen ndo Jesús
(Mt. 26:17-29; Lc. 22:7-23; Jn. 13:21-30; 1Co. 11:23-26)*

¹² Nchakon xrangixixín kia sine na nutja chónnda i ti tja in nio, nchakon me e tóña na kutuchjon sine na kia pascua. Ko sen teyuu chrikao ndo Jesús juanchangi e sen ndo:

—¿Ti no tjaunnta sintakonchjianxinna ti sinena kia pascua?

¹³ Tjume e kuetuen en ndo yuu sen chrikao ndo, ko ndachro ndo:

—Itjinta tjajna Jerusalén ko nti a tsetannta naa xi yama nchixran jitjiá inda. Rue énta xa

¹⁴ ti nchia tixin in xa, ko ndachenta xi ndo a: “Kuetuan an ndo nchekuannana: ¿Ti no jii nchia sinexin ndo kia pascua ko sen teyuu chrikao ndo?”

¹⁵ Ko tjume e je e xa tsajon xa naa nchia yuxin jii noi ko nti a ó jii kain nge e. Nti a nchekonchjianxinnta ti sinena.

¹⁶ Tjume e je e sen sakjui sen tjajna Jerusalén ko kuitja sen xranchi tsindachro ndo Jesús. Ko nti a juinçekonchjianxin sen ti sine sen kia pascua.

¹⁷ Tjume e ó kóndo kuiji ndo Jesús ko sen teyuu chrikao ndo.

¹⁸ Ko hora stene sen, ndachro ndo Jesús:

—Nduaxin ndachrjan xixi naa ja anta rineki an nti i sinçekjininta.

¹⁹ Ko je e sen kochín sen. Ko kuaxi ngujngu sen juanchangi e sen ndo:

—¿Á jan an ngisen sinche e me e?

²⁰ Ko juate e ndo Jesús ko ndachro ndo:

—Xi me e naa sen teyuu rineki an गया latona.

²¹ Chjen en ndo Dio, xjan jongí e xranchi chujni, tson en xjan xranchi nichja xroon chijnie ndo Dio. Ko lastu xi sinchekji ndo ixi ícha jian xrojongíe a xi me e.

²² Ko stene sen, ndo Jesús kua ndo naa nutja, ko kuajon ndo juasaya ngajin ndo Dio. Ko tjume e konchrinjin ndo nutja ko konchjeye e ndo sen. Ko ndachro ndo:

—Intenta, ji i cuerpona.

²³ Ko kaxon kua ndo naa vaso ko kuajon ndo juasaya ngajin ndo Dio ko chjée ndo sen ko kain sen kui i sen.

²⁴ Tjume e ndachro ndo:

—Ji i jnina chronga ixi nduaxin tsaxi tsituan an naa ley natjúá ícha tjintee, jnina tsintji jni ixi tsitjáñaxin ijié chóna kain chujni.

²⁵ Nduaxin ndachrjan ixi ítsi a jan an ndée tu uva íjngo, hasta ti tsijija nchakon tsojuna ti tetuan an ndo Dio. Ko nchakon me e tsi i ndée tu uva natjúá.

Ndo Jesús chronga ndo ixi ndo Pedro xrondachro ndo chúxin a ndo ndo Jesús (Mt. 26:30-35; Lc. 22:31-34; Jn. 13:36-38)

²⁶ Ko juexin itsje sen naa soon ngajin ndo Dio, tjume e sakjui sen ijna Olivo.

²⁷ Ko ndo Jesús ndachro ndo:

—Tiie jai kainnta tsintunaninta ko tson en xranchi ndachro xroon chijnie ndo Dio: “Naatsóñaxón na sen tingatjia kutuchjon, ko je e ba xrochjeke e ba.”

²⁸ *Ko nchakon xroxechónna, jan an tsitao annta cha o itji nunte Galilea.

²⁹ Ko ndachro ndo Pedro:

—Maski kain sen tsintu anta sen, jan an tsintua inta.

³⁰ Ko ndachro ndo Jesús:

—Nduaxin xrontatjua ixi jai tiie xraje a yuu xrotsje kuntaxichíká, ja a ní xrondachrua ixi chuxin ana.

³¹ Ko séen juate e ndo Pedro ko ndachro ndo:

—Maski tsen enna, xrondachrjan i chuxin anta.

Ko jaña ndachro kain sen.

Ndo Jesús nichja ndo ngajin ndo Dio ti huerto Getsemaní (Mt. 26:36-46; Lc. 22:39-46)

³² Tjume e kuiji sen naa huerto ndatin in Getsemaní. Ko kuetuen en ndo Jesús sen chrikao ndo:

—Tituan anta nti i, jan an itsji xronichja a ndo Dio.

³³ Tjume e ndo Jesús sabikao ndo ndo Pedro ko ndo Jacobo ko ndo Juan. Ko kuaxi tsango koni e aséen ndo xranchi ndaxrokuen en ndo.

³⁴ Ko ndache ndo sen:

—Tsango koni e aséenna ixi kain nge e tsónna. Nti ó tituan anta, tarichrin anta.

³⁵ Ko tjume e sakjui ndo ícha kjínxin ko bake exin ndo ntatuchi in ndo ko kuaxi kuinóatée ndo ngajin ndo Dio ixi xrokuajon ndo Dio juachaxin ixi xrokuatsinga i ndo juachjaon me e.

³⁶ Ko ndachro ndo:

—Ja anta Ndotána. Ja anta chondanta kain juachaxin ko tjancha anta ixi tsatsinga i jan an juachjaon ji i. Ko tsoen a xranchi jan an tja on. Na i, tson en xranchi ja anta tjaunnta.

³⁷ Ko tjume e ikjan ndo ti kuintu e ndo sen ko kuitja ndo sen stejua sen. Ko ndache ndo ndo Pedro:

—Simón Pedro, ¿á richrian? ¿Á jua i kuarichuan maski naa hora?

³⁸ Jai xingama anta ko nichje enta ndo Dio ixi tsajon a ndo juachaxin ixi Xixron anxrée sintaya anta xa. Espirituanta tjée ndo Dio ko ntau anta soji a.

³⁹ Tjume e sakjui ndo íjngo kuinóatée ndo ngajin ndo Dio. Ko xraje o nichja ndo.

⁴⁰ Tjume e ikjan ndo ko kuitja ndo sen stejua sen íjngo ko jua i tantje e ikon sen ixi tsango chjée sen kotachrin. Ko noe a sen nge e tsjate e sen.

⁴¹ Ko nínxin sakjui ndo ko ikjan ndo ko ndachro ndo:

—¿Á xrastechrinnta ko stetjoka anta? Jai ó kuíi hora ixi Chjen en ndo Dio, xjan jongí e xranchi chujni, tsajon na xjan ngajin ni ña i.

⁴² Tingatjennta sachjina ixi ó jitíi ngisen sinchekjina.

Itsé na ndo Jesús

(Mt. 26:47-56; Lc. 22:47-53; Jn. 18:2-11)

⁴³ Xrajinichja ndo Jesús, tuinxin kuíi xi Judas, naa xi teyuu chrikao ndo. Ko kueya na bijikao xa steýa na chika espada ko ntáa. Ni me e tsixrua an xitaana tetuan an ko xi tjako ley ko xi tetuan an ni ngo.

⁴⁴ Ko xi Judas, xi juinchekji ndo, tsindachro xa:

—Xi tsetoxin, xi me e itsenta ko satiku unta.

⁴⁵ Tjume e kuíi xi Judas ko tuinxin konchjiñe e xa ngajin ndo Jesús ko ndachro xa:

—Maestro, Maestro.

Ko kuitoxin xa ndo.

⁴⁶ Ko ni kuijikao xa itsé na ndo Jesús, sabikao na ndo.

⁴⁷ Ko naa sen jii nti a kuantsje chika espada konchrinjin sen ndatsjon naa xi nche e xrée xitaana tetuan an.

⁴⁸ Ko ndo Jesús ndachro ndo:

—¿Sonda bikuunta chika yao ko ntáa xrotséxinninta xranchi xrokjui naa xiche e?

⁴⁹ *Kain nchakon bake e ngajinnta ti jii ni ngo juentakuan annta, ko, ¿sonda tsé aninta nti a? Ko xrokonda jaña tson en xranchi nichja xroon chijnie ndo Dio.

⁵⁰ Ko kain sen chrikao ndo Jesús kuintu e sen ndo ko sakjui sen.

Naa chajan sabinga chán

⁵¹ Naa chajan kaxon jirué e chán nti a, ko je o naa manta jitsía chán, ko itsé na chán.

⁵² Ko je o mantée chán tsitsé na ko turuchu chán sabinga chán.

Ndo Jesús konchjiñe e ndo ti jii ni tetuan an

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Tjume e sabikao na ndo Jesús ndo a xitaana tsango tetuan an. Nti a tsixra o kain xitaana tetuan an ko ni tachríi tetuan an ni ngo ko ni tjako ley.

⁵⁴ Ko ndo Pedro ikjín jiruéexin ndo ko kuíi ndo ti ntasien ndo a xitaana tsango tetuan an. Nti a jiche xro i. Ko xi policía stendajin xa xro i jixraxru e xa, ko kaxon ndo Pedro jixraxru e ndo.

⁵⁵ Ko xi tetuen en xitaana ko kain xi ícha tetuan an juée na ngisen xrojuankata a ijie ngajin ndo Jesús ixi jaña naatsóñaxón na ndo. Ko kuitja i xa ijie ngajin ndo

⁵⁶ ixi itsjé na ndachro na ti nduaxin a ko tjankata a na ndo ijie ko je a xraje o nge e ndachro na.

⁵⁷ Ko bingatjen kaxin ni juankata a ndo ijie ko ndachro na:

⁵⁸ *—Jan anna kuín an ixi ndachro xi Jesús tsonchjejin xa ni ngo tsijinchekonchjian chujni, ko nchakon nínxin sinchekonchjian xa ni ngo íjngo ko je a chujni sinchekonchjian.

⁵⁹ Maski jaña ndachro na ko je a xraje o kuanichja kain na.

⁶⁰ Ko xi tetuen en xitaana bingatjen xa ti ste kain na ko juanchangi e xa ndo Jesús:

—¿Á xro an tsjatengíexian ja a ti ijie tjankata a na?

⁶¹ Ko ndo Jesús tenko ndo, xro an nge e juate e ndo. Ko xitaana tetuan an ndachro xa íjngo:

—¿Á ja a ndo Cristo, Chjen en ndo Dio tsango tjúá?

⁶² Ko ndachro ndo Jesús:

—Jaán, jan an. Ko naa nchakon ja anta tsikonnta Chjen en ndo Dio, xjan jongí e xranchi chujni, tsake e xjan ndatsjonxin jian ti jii ndo Dio, ndo chóna ijié juachaxin ko je e xjan tsj xin ndo ngajni ngakjen en itjuj.

⁶³ Ko xitaana tetuan an kuinchje xa ti jitsáa xa ixi tsango koñaao xa ko ndachro xa:

—Íxrokonda i ixi ikaxin na xrochronga na ti ndakua i nche e xi ji i.

⁶⁴ Ja anta ó kuin ennta ixi nichjangí e xa ndo Dio. ¿Nge e ndachronta?

Ko kain na juatingíexin na, xrokonda tsen en ndo.

⁶⁵ Tjume e ikaxin na kuaxi na bikitée na ndo ndatée na. Ko kuaxi na bije e na ikon ndo ko kuande e na ndo itja na ko juanchangi e na ndo:

—Ndachrua ngisen juaya ngajian.

Tjume e xi policia kondee ni ngo kuande e xa itja xa ngaya ikon ndo Jesús.

Ndo Pedro ndachro ndo ixi chúxin a ndo ndo Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Ko ndo Pedro jii ndo ti jii ndasin. Ko tjume e kuij naa nchri nche e ixra ngajin xitaana tetuan an.

⁶⁷ Ko bikon nchra jixraxru e ndo Pedro ngande e xro i nti a. Ko jian jitsje e nchra ndo ko ndachro nchra:

—Ja a kaxon chrjiko a xi Jesús kuixin tjajna Nazaret.

⁶⁸ Ko ndo Pedro ndachro ndo:

—Na i. Jan an chúxin a xi me e. Nóna i nge e ndachrua.

Tjume e kuachrxexin ndo nti a sakjui ndo nduja. Ko tuinxin itsje naa kuntaxichíká.

⁶⁹ Ko íjngo bikon nchra ndo ko ndache nchra ni ste nti a:

—Xi me e naa xi chrikao xi Jesús.

⁷⁰ Ko ndachro ndo Pedro íjngo:

—Na i.

Ko ícha tjume e ni ste nti a ndache na ndo Pedro:

—Nduaxin ja a kaxon tsikjixian tjajna Galilea ixi ja a nichja xranchi nichja ni tjajna me e.

⁷¹ Ko ndo Pedro kuaxi ndo bengana ndo teka ko ndachro ndo:

—Chúxin a xi ndachronta.

⁷² Ko tuinxin ndo Pedro kuin en ndo yuxin itsje kuntaxichíká. Ko xraxaon ndo xranchi tsindachro ndo Jesús: “Xraje a yuu xrotsje kuntaxichíká, ja a nínxin xrondachrua chuxin ana.” Me e xraxaon ndo ko tsjanga ndo ixi ndako a juinche e ndo.

15

Ndo Jesús kuiji ndo ngajin xi Pilato

(Mt. 27:1-2, 11-14; Lc. 23:1-5; Jn. 18:28-38)

¹ Tjume e ó bingasáña ko xitaana tetuan an kao ni tachríi, ko ni tjako ley ko kain ni tetuan an ni ngo, xra o kain na juintejaao kichuu xa ko juexin itsé na ndo Jesús sabikao na ndo ngajin xi Pilato.

² Ko xi Pilato juanchangi e xa ndo Jesús ko ndachro xa:

—¿Á ja a Rey tetuan an ni judío?

Ko ja in juatingíexin ndo Jesús:

—Ja a ndachrua.

³ Tjume e xitaana tetuan an bankata a xa ndo ijié.

⁴ Ko xi Pilato juanchangi xa íjngo, ko ndachro xa:

—¿Ja a, sonda xro an nge e tjatengíexian? Itsjé ijié tjankata a na.

⁵ Ko ndo Jesús xro an nge e juatingíexin ndo. Tjume e xi Pilato noe a xa nge e sinche e xa.

*Ndo Jesús xrokonda tsen en ndo
(Mt. 27:15-31; Lc. 23:13-25; Jn. 18:38–19:16)*

⁶ Ko kia me e xi Pilato xrokonda tsajanda xa naa xi jii ngaxin in ndo achjiso, ngixe i xi tsjanchia chujni tjajna.

⁷ Ko ngaxin in ndo achjiso jii naa xi ndatin in Barrabás, ko ikaxin ni ña i tsikitikaon a xi tetuan an ko naatsikóñaxón xa kaxin chujni.

⁸ Ko kuji kueya na juanche e na xi Pilato ixi xrojuinche e xa xranchi ton en kain nano.

⁹ Ko juatingíexin xi Pilato:

—¿Á tjaunnta tsajanda satsji xi Rey tetuen en ni judío?

¹⁰ Jaña ichro xa ixi je e xa no e xa ixi xitaana tetuan an tochjuye e xa ngajin ndo Jesús, méxin tsitsé na ndo.

¹¹ Ko xitaana tetuan an juinchekeya xa kain chujni jii nti a, ko ndache xa na ixi tsjanchia na ngajin xi Pilato ixi xrokuajanda xa xi Barrabás.

¹² Tjume e xi Pilato juanchangi xa, ko ndachro xa:

—Ko xi nchekin innta Rey tetuen en ni judío, ¿nge e tjaunnta tson en xa?

¹³ Ko je e na juatingíexin na, ko stetoyako na:

—¡Tjankanitua xa ntacru!

¹⁴ Ko xi Pilato juanchangi e xa na:

—¿Nge e ndakua i juinche e xi ji in?

Ko ícha séen kuyako na tjanchia na:

—¡Tjankanitua xa ntacru!

¹⁵ Ko xi Pilato tjaun xa sinche e xa nge e tjaun na, ko kuajon xa juachaxin tsajanda na xi Barrabás ko kuetuan an xa ixi xrojuaya na ngajin ndo Jesús ko kuajon xa juachaxin ixi xi soldado satsikao xa ndo Jesús tsenito xa ndo ntacru.

¹⁶ Tjume e xi soldado sabikao xa ndo Jesús ngaxin in ntasien nchatituan an. Nti a rejuxin kain xi soldado.

¹⁷ Ko nti a juinchekeya e na ndo Jesús naa manta játsetié ko bake e na ngata a jaa ndo naa corona tsikóñaxin ntacha a.

¹⁸ Tjume e juangíxin kuyako xi soldado, ko ndachro xa:

—Kain nchakon tsechón Rey tituen en ni judío.

¹⁹ Ko ixi naa ntasé tande e xa jaa ndo Jesús, ko ndaté e xa bikité e xa ndo. Ko bake exin ntatuchi in xa ko nchexin xa xranchi xrokuajon xa juasaya* ngajin ndo.

²⁰ Ko juexin juanoa xa ndo kuantsje e xa ndo manta játsetié jiá ndo ko juinchekeya xa ndo manté e ndo íjngo. Ko kuantsjexin xa ndo nti a sabikao xa ndo ixi tsenito xa ndo ntacru.

*Kuenito xa ndo Jesús ntacru
(Mt. 27:32-44; Lc. 23:26-43; Jn. 19:17-27)*

²¹ *Ko nchakon me e naa xi tsiki xin tjajna Cirene, ndatin in xa Simón, xi ji in ndoté e xi Alejandro ko xi Rufo, xi me e jiti xin xa chjaka, ko kuatsinga xa nti a. Ko xi soldado juinchekeya xa xi me e ntacru, ntaa yama ndo Jesús.

²² Tjume e sabikao xa ndo Jesús ijna ndatin in Gólgota, ko Gólgota xrondachro ngigue e na ntajaa chujni.

²³ Ko nti a chjé e na ndo vino tsijinchentekjan na xroan mirra xrokui i ndo Jesús, ko je e ndo kui a ndo.

²⁴ Tjume e xi soldado kuenito xa ndo Jesús nganito ntacru. Ko juexin ji i, sondaonxin xa ixro ixi jaña tsono e xa ngisen tsjacha tsitu e ngujngu manta jiá ndo.

²⁵ Ko ó las nueve ti kuasintjian xa ndo nganito ntacru.

* **15:19 juasaya** respeto, honor **15:21** Ro. 16:13.

²⁶ Ko nganito ntāa jii ndo Jesús tsikake e na naa ntāa nchíin tsikjin na kondeexin ti tsen en ndo ko ja in ndachro:

“Xi i Rey tetuen en ni judío.”

²⁷ Ko kaxon kuasintjian na nganito ntācru yuu xiche e, naa xi bake e na ndatsjonxin jian ti jii ndo Jesús ko inaa xa bake e na xa ndatsjonxin ikjon ti jii ndo.

²⁸ Jaña kon en xranchi jitaxin xroon chijnie ndo Dio ti ndachro: “Xranchi naa ni chóna ijié juinchekao na ndo.”

²⁹ *Ko ni stetatsinga nti a juanoa na ndo ko nichjangí e na ndo ko tingatjia jaa na ko ndachro na:

—Ja a ndachrua tsonchejia ni ngo, ko níiko nchakon sinchekonchjianxian ni ngo íjngo.

³⁰ Siá nduaxin sinche e me e, xingajinxian ntācru.

³¹ Ko xitaana tetuan an ko xi tjako ley juanoa xa ndo, ko ja in juao kichuu xa:

—Inaa na bingijna xi ji in ko je e xa jua i tingijna aséen xa.

³² Siá nduaxin je e xa ndo Cristo, Rey tetuen en tjajna Israel, tsikonna xroxingajinxin xa ntācru ko jaña tsitikaonna xa.

Ko kaxon xi ste nganito ntācru nichjangí e xa ndo.

Kuen en ndo Jesús

(Mt. 27:45-56; Lc. 23:44-49; Jn. 19:28-30)

³³ Tjume e ngusine nchakon konaxixe e nchijíi nunte xasintajni ti kuijija hora nínxin kóndo.

³⁴ Ko hora me e séen ndachro ndo Jesús:

—Eloi, Eloi, ¿lama sabactani? —ngigue e na xrondachro: Ndotána, Ndotána, ¿sonda kuintunantana?

³⁵ Ko kaxin ni ste nti a kuin en na nge e ndachro ndo, me e ndachro na:

—Tin ennta, jitiye e xa ndo Elías, ndo kuachronga chijnie ndo Dio ó sa ó.

³⁶ Tjume e naa xi jii nti a binga xa kua xa tu o manta ko juinchetjao xa ixi vinagre, ko ixi naa ntāa ijié kokaxin xa manta ti jii ro a ndo Jesús ixi xrokui i ndo me e. Ko ndachro xa:

—Xrochon enna á nduaxin tsij ndo Elías sinchexingajin ndo xa.

³⁷ Ko ndo Jesús séen kuyako ndo ko kuen en ndo.

³⁸ Ko velo jijeexin ni ngo kuinchje nui hasta ti nunte.

³⁹ Ko xi capitán romano jindaa xa ti jii ndo Jesús, bikon xa juexin kuen en ndo ko ndachro xa:

—Nduaxin xi ji i Chjen en ndo Dio.

⁴⁰ *Kaxon nti a ste kaxin nchri, ikjín stetsjexin nchra, nchri me e: jan María Magdalena, jan María, janée ndo ndatin in Jacobo, ndo chjaxon, ko ndo José. Ko kaxon jan Salomé.

⁴¹ Ko sen nchri me e rué e sen ndo Jesús ko kuayakon en sen ndo nchakon bake e ndo tjajna Galilea ko nti a jii ikaxin nchra, nchri rué e ndo ti sakjui ndo tjajna Jerusalén.

Xrabaa ndo Jesús

(Mt. 27:57-61; Lc. 23:50-56; Jn. 19:38-42)

⁴² Tjume e ó kóndo nchakon xrangíxixín nchakon tjoké e na,

⁴³ kuij naa ndo ndatin in José, tjajnée ndo ndatin in Arimatea. Ndo me e kaxon tetuan an ndo ti tjajnée ni judío. Je e ndo me e jichón en ndo tsij juachaxien ndo Dio ko xrakon a ndo kuitsje e ndo xi Pilato ko juanchia ndo satsikao ndo cuerpoe ndo Jesús.

⁴⁴ Ko xi Pilato xronka xa ixi ó juexin tsiken en ndo Jesús, méxin, kuiye e xa xi capitán ko juanchangí e xa xi me e á nduaxin tsiken en ndo.

⁴⁵ Ko chronga xi capitán ixi nduaxin ó juexin kuen en ndo Jesús. Ko kuin en xi Pilato jaña, ko kuajon xa juachaxin ixi tsikao ndo José cuerpoe ndo Jesús.

⁴⁶ Tjume e ndo José tsike na ndo manta chaxro ko ikjui ndo juinchexingajin ndo cuerpoe ndo Jesús, ko kuintsía ndo ndo Jesús manta. Tjume e bake e ndo cuerpoe ndo Jesús ti no tsinge na ngaxin in naa itjaõ. Ko naa ixro ijié bijeexin ndo itjaõ me e.

⁴⁷ Ko jan María Magdalena ko jan María, janée ndo José, bikon sen no bake e na cuerpoe ndo Jesús.

16

Xechón ndo Jesús

(Mt. 28:1-10; Lc. 24:1-12; Jn. 20:1-10)

¹ Tjume e kuatsinga nchakon tjoké e na, jan María Magdalena ko jan María, janée ndo Jacobo, ko jan Salomé kue na sen xroan chaxro xraxé ixi tsingamá sen cuerpoe ndo Jesús.

² Ko, nchakon xrangíxixín semana sakjui sen ti no tsixrabaa ndo.

³ Ko je e sen nchri stetjao kichuu sen:

—¿Ngisen tsingijnana tsintjian ixro jijeexin itjaõ?

⁴ Ko ti kuiji sen nchri bikon sen ixi ixro ijié jijeexin itjaõ*, ó tsikontengi ixro.

⁵ Ko je e sen nchri kuixin in sen itjaõ me e, ko bikon sen naa chajan jii chán nunte ndatsjonxin jian ko jiá chán manta jine ko tjúá, ko je e sen nchri xronka sen.

⁶ Ko je e chán ndachro chán:

—Xronka inta. ¿Á tjéenta ndo Jesús, ndo tsiki xin tjajna Nazaret, ndo kuenito na ntacru? Je e ndo ó xechón ndo, í ko a ndo nti i. Tsje enta ti no bake e na ndo.

⁷ *Satjinta, ndachenta sen bajikao ndo ko kao ndo Pedro ixi ndo Jesús sakuitaon ndo nunte Galilea ko nti a tsikonnta ndo xranchi tsintatjunta ndo.

⁸ Ko sen nchri sajuixin sen ti no tsixrabaa ndo Jesús, stexronka sen ko stexranga sen. Ko xro an ngisen ndache sen nchri ti nge e tsikikon sen ixi tsango xronka sen.

Ndo Jesús konoxin ndo ngajin jan María Magdalena

(Jn. 20:11-18)

⁹ Nchakon xechón ndo Jesús, nchakon xrangíxixín semana sa ó konoxin ndo ngajin jan María Magdalena, jan tsikantsjexin ndo yaatõ espíritue Xixron anxrée.

¹⁰ Ko je e jan sakjui jan, beki e jan sen chrikao ndo ixi je e sen jitoni e aséen sen ko stetsjanga sen.

¹¹ Ko kuin en sen ixi jaña tsikikon jan ko kuitikaon a sen ti ndachro jan.

Ndo Jesús konoxin ndo ngajin yuu sen kuachrjikao ndo

(Lc. 24:13-35)

¹² Ko tjume e yuu sen bikon ndo Jesús, ko jéexin bikon sen ndo. Sen me e jitji sen cha o itji chjaka.

¹³ Ko je e sen kuichronga sen ngajin sen kaxin; ko kaxon je e sen kuitikaon a sen.

Ndo Jesús kuetuen en ndo sen kuajikao ndo, ixra sinche e sen

(Mt. 28:16-20; Lc. 24:36-49; Jn. 20:19-23)

¹⁴ Tjume e konoxin ndo ngajin sen tenaá kuajikao ndo ti stene sen. Ko nichje e ndo sen sonda tsikitikaon a sen nge e chronga sen tsikikon ndo ixi je e ndo ó tsixechón ndo.

¹⁵ *Ko ndache ndo sen:

—Itjinta nchijí nunte xasintajni nchekuen ennta kain na chijni jian ixi tsayé e na juachaxin tsechón na kain nchakon.

¹⁶ Sen tsitikaon ko tsikitée, sen me e tsitjáña i sen. Ko ni tsitikaon a, ni me e tangi tson en na.

* **16:4** itjaõ cueva **16:7** Mt. 26:32; Mr. 14:28. **16:15** Hch. 1:8.

¹⁷ Ko sen tsitikaonna jan an, sen me e chao sinche e sen naa ixra jian, ixi tsayé e sen juachaxin tsantsje sen espíritu Xixron anxrée chóna kaxin na ko kaxon xronichja sen jée ngigua.

¹⁸ Maski kunchee xrotsé sen, xro an nge e tson en sen, ko maski xrokui i sen xroan yua, tsen a sen. Kaxon tsake e itja sen ngata a jaa ni ni e ko ni ni e tsoxrue en na.

Ndo Jesús kuajin in ndo ngajni
(Lc. 24:50-53)

¹⁹*Tjume e juexin nichja Ncháina Jesús ngajin sen, je e ndo kuajin in ndo ngajni. Ko nti a bake e ndo ndatsjonxin jian ti jii ndo Dio.

²⁰ Ko sakjui sen ko juako sen chijni jian, chijni nchemé e ijie chóna chujni. Ko Ncháina† Jesús bingijna ndo sen ko juachaxien ndo juinchexin sen ixra jian, ixi jaña tsonoexin chujni ixi nduaxin chijnie ndo Dio nchekuen en sen na. Jaña tson en.

Chijnie ndo Jesús chronga ndo Lucas

Xrangíxin xroon ji i

¹ Kueya na tjaun na ndako xrokjin na kain nge e nduaxin kon en nchakon bake e ndo Jesús ngajinna

² xranchi juinchekuaína sen, sen xrangíxixión bikonxin ikon sen kain nge e juinche e ndo Jesús ko kuaxi sen chronga sen ti nichja ndo.

³ Jan an kaxon juanchangi jian kain nge e tsikon en xrangíxixión bake e ndo Jesús. Ko jai xrokjin annta, Teófilo, kain nge e xranchi tsikon en naa ko naa,

⁴ ixi tsichuxinnta jian kain nge e tsijinckekuan annta sen.

Naa ndo ángel kuii ndo chronga ndo ixi tsjongí e ndo Juan Bautista

⁵ Nchakon bake e xi Herodes baketuen en xa nunte Judea, nti a bake e naa ndotaana bakin in Zacarías, kuachrenixin ndo xitaana bakin in Abías. Ko janchri e ndo Zacarías bakin in jan Elisabet, ndotáchri e jan kaxon xranchrjen ndotaana Aarón.

⁶ Yui sen jian kuanche e sen xranchi tjaun ndo Dio ko baktikaon sen kain ti nge e kuetuan an ndo. Méxin, xro an ngisen chao xrondachro ixi je e sen chóna sen ije.

⁷ Ko xro an chjan kuachóna sen ixi jan Elisabet kuituen a jan xrochóna jan chjan, ko je e sen ó tachríi sen.

⁸ Ko tjume e naa nchakon ndo Zacarías ko xitaana, sen nche e ixra xranchi je e ndo, kuetuen en sen tsajon sen juasie sen ngajin ndo Dio.

⁹ Xranchi kuanche e xitaana nchakon me e, ndo Zacarías kuayé e ndo ixra tixin in ndo ngaxin in nchia tjúa ndo a ndo Dio ixi tsjaaka ndo tsjoxraxé.

¹⁰ Nchakon juaaka ndo tsjoxraxé ngaxin in ndo a ndo Dio, kain ni ste nduja nichje e na ndo Dio.

¹¹ Ko tuinxin ndo Zacarías bikon ndo naa ndo ángel xruan an ndo Dio ko siin ndo ángel nangoxin jian tjenka altar ti iche tsjoxraxé.

¹² Hora bikon ndo Zacarías ndo ángel me e, je e ndo chrinkaxrakon ndo.

¹³ Ko ndo ángel nichja ndo ko ndachro ndo:

—Zacarías xrakon a, ixi ndo Dio kuin en ndo nge e juanchia, méxin, janchri a Elisabet sinchejongí e jan naa xjan xi ko ja a sincheki ian xjan Juan.

¹⁴ Ko ja a xrochóna juaxruxin ko kueya na xroché e na ixi tsjongí e xjan me e.

¹⁵ Ko chjan an ijié tsake e xjan ngajinxin ndo Dio. Ko xro an vino ko ninaa xran tsi a xjan, ko tsango xrochóna xjan Espíritue ndo Dio ti xrajíyá xjan ngaya tse e janée xjan.

¹⁶ Ko je e xjan sinchekuen en xjan ni tjajna Israel, ko kueya na xrokjan na tsitikaon na ndo Dio.

¹⁷ Je e ndo Juan tsitaon ndo tsjendue e ndo cha o tsj xin Ncháina, ko xrochóna ndo xraje o juachaxin xranchi kuachóna ndo profeta Elías, ko xronichje e ndo aséen ndotée ichjan tsoñao a na ngajin chjen en na, ko kain ni titikaon a ndo Dio tsono e na xranchi tsitikaon na ndo ko jian sinche e na ixi tsii Ncháina Cristo.

¹⁸ Ko je e ndo Zacarías juanchangi e ndo ndo ángel ko ndachro ndo:

—¿Xranchi tsonóna ixi tson en ti ndachronta? Ixi jan an ó tsango tachríina ko kaxon janchri na ó nachríi jan.

¹⁹ Ko je e ndo ángel juatingíexin ndo:

—Jan an Gabriela, ko nta a kain nge e tetuan an ndo Dio. Ko kuetuanna ndo tsji i ko xrontatjua nge e jian tson en.

²⁰ Ko ixi kuitikaon a ti ndachrjan, méxin, tsonosian ko jua i xronichja xroxetjaja nchakon tson en me e.

21 Ko kain ni stechón en nduja ndo a ndo Dio ixi tsachrje ndo Zacarías, stexraxaon na sonda jitonchrjen en ndo ngaxin in ndo a ndo Dio.

22 Ko hora kuachrje ndo, í jua i nichja ndo. Ko xraxaon na ixi xrojan nge e bikon ndo Zacarías ngaxin in ndo a ndo Dio. Ko je e ndo ixi je o itja ndo tjakoxin ndo nge e tjaun ndo ixi nosin ndo.

23 Ko juexin xetja nchakon juinche e ndo Zacarías ixra ngaxin in ndo a ndo Dio, sakjui ndo ndo e ndo.

24 Ko tjume e jan Elisabet, janchri e ndo Zacarías, yaa jan chjan. Ko íkuachrjexin a jan ndo e jan na ó nchanitjao, ko jixraxaon jan:

25 “Jaña ndo Dio kuajon ndo juachaxin ixi xrochóna chjan ko ítsjanao ina na jai.”

Ndo ángel chronga ndo ixi tsjongí e xjan Jesús

26 Kuatsinga ikjaon nchanitjao ko ndo Dio xruan an ndo ndo ángel Gabriel itsji ndo naa tjajnée tjajna Galilea ndatin in Nazaret

27 *ixi nti a xronichje e ndo naa nchrichajan ndatin in María ko je e nchrichan xrachuxin a nchrichan ninaa xi. Je e nchrichan tsijate e nchrichan tsute e nchrichan naa xi ndatin in José, kuachrjenixin xa ndo rey David.

28 Ko ndo ángel me e kuixin in ndo ndo a jan María, ko ndachro ndo:

—Jan an jui i tjá anta juajna ixi ndo Dio ícha tjua anta ndo ko Ncháina Dio jii ngajinnta, ícha juintanchaonnta ndo ixi ikaxin nchri!

29 Ko xronka je e nchrichajan ko íkuienxin a nchrichan nge e juajna kuajon ndo ángel.

30 Ko je e ndo ángel ndachro ndo:

—María, xrakon anta, ixi ndo Dio ícha tjua anta ndo.

31 *Ko jai tseyá naa chjan ngaya tseenta ko sinchejongíenta naa xjan xi ko sinchekin innta xjan Jesús.

32 Ko je e xjan tsango tsetuan an xjan, ko tsin in xjan chjen en ndo Dio jii ngajní. Ko je e Ncháina ndo Dio xrochjée xjan juachaxin tsetuan an xjan xranchi baketuan an ndotáchri e xjan xranchrjen, ndo David.

33 Ko je e xjan tsetuan an xjan tjajna Israel kain nchakon ko ti tsetuan an xjan ítsjexin a.

34 Ko jan María juanchangi e jan ndo ángel, ndachro jan:

—¿Xranchi tson en ji i, ixi jan an rikian i xi?

35 Ko juatingíexin ndo ángel, ndachro ndo:

—Espíritue ndo Dio tsii ngajinnta ko juachaxien ndo sinchekitsáanta ndo xranchi naa tsa on. Ko xjan tsjongí e xrochóna i xjan ijie, ko ndatsin in xjan chjen en ndo Dio.

36 Ko kaxon jan kichuunta Elisabet yaa jan chjan maski ó nachríi jan. Ko jai, nchri bandachro na jua i xrochóna chjan, jai ó ikjaon nchanitjao yaa jan xjan.

37 Méxin juachaxien ndo Dio, chao tson en kain nge e.

38 Ko ndachro jan María:

—Jan an nta a xrée Ncháina Dio; méxin jan an tsitika on kain nge e kuetuanna ndo xranchi ja anta ndachronta.

Ko juexin nichja ndo ángel, sakjui ndo.

Jan María kuitsje e jan jan Elisabet

39 Kaxon nchakon me e, jan María nteeto sakjui jan naa tjajna ngata a ijna nunte Judea.

40 Ko kuiji jan tjajna nti a kuixin in jan ndo a ndo Zacarías ko jan Elisabet ko kuajon jan juajna ngajin jan Elisabet.

41 Hora kuin en jan Elisabet juajna, xjan yaa jan chrinka xjan ngaya tse e jan, ko je e jan Elisabet tsango kuayé e jan juachaxien Espíritue ndo Dio.

42 Ko tjume e jan Elisabet séen nichja jan ko ndachro jan:

—Ndo Dio juinchenchaoan ndo ícha ixi ikaxin nchri, ko kaxon juinchenchaoan ndo chjan an.

⁴³ ¿Ngisen jan an ixi jui a kuitsjena ja a, janée Nchána?

⁴⁴ Ixi hora kuin an juajnáa, chrinka chjan na ngaya tse e ixi ché e xjan.

⁴⁵ Ijié juaxruxin chonda ixi kuitikaoan nge e tson en, xranchi ndachro ndo Dio.

⁴⁶ Ko tjume e jan María ndachro jan:

Aséenna tajon juasaya ngajin Ndotána Dio.

⁴⁷ Ko juaxruxin ritjén ixi ndo Dio kuantjsjena ndo ijié.

⁴⁸ Ndo Dio xraxaon ndo sinche e ndo jian ngajin,

jan an naa nchri nóa nche e ixra ngajin ndo.

Ko jai tsaxi xrondachijina na ndo Dio juinchechaoan ndo.

⁴⁹ Ndo Dio chónnda ndo kain juachaxin,

ko juinche e ndo ijié nge e ngajin

ixi je e ndo tsango tjúa ndo.

⁵⁰ Ko je e ndo kain nchakon tikonóe e ndo kain ni tajon juasie ngajin je e ndo.

⁵¹ Je e ndo soji ndo ixi juinche e ndo kain nge e

ko kuantjsje e ndo juachaxin chónnda kain ni nchejié aséen.

⁵² Ko kuantjsje e ndo kain juachaxin chónnda ni tetuan an

ko juinchejié ndo kain ni nóa ixi je e na xrochónnda na juachaxin.

⁵³ Ko kuajon ndo kain nge e jian kuayé e ni chónnda i

ko xro an nge e kuajon ndo ngajin ngisen kueya chónnda.

⁵⁴ Je e ndo bingijna ndo ni tjajna Israel, ni nche e xrée ndo;

ko bikonóe e ndo na,

⁵⁵ ixi jaña ndache ndo sen tachrí e na xranchrjen, ndo Abraham ko kain ni tsachrjenixin ndo.

⁵⁶ Ko jan María kuitu e jan ndo a jan Elisabet ní nchanitjao, ko tjume e ikjan jan ndo a jan.

Jongí e ndo Juan Bautista

⁵⁷ Ko kuij nchakon sinchejongí e jan Elisabet chjen en jan, ko juinchejongí e jan naa xjan xi.

⁵⁸ Méxin, ni ste tjenka ndo a jan ko ni nchando a jan, ikjui na kuitsje e na jan ko kuintee na juaxruxin ngajin jan ixi kono e na ixi ndo Dio tsango bikonóe e ndo jan.

⁵⁹ Kuitja ijní nchakon, kuij na ixi tsayé e ichjan chji e ni judío, ko tjaun na xrokuin in xjan Zacarías xranchi tin in ndotée xjan.

⁶⁰ Ko ndachro janée xjan:

—Na i. Xrokonda tsin in xjan Juan.

⁶¹ Ko je e na juatingíexin na:

—¿Sonda tsin in xjan jaña? Xro an sen ndúya tin in na jaña.

⁶² Tjume e itja na juanchangíexin na ndotée xjan xranchi tjaun ndo tsin in xjan.

⁶³ Ko je e ndo juanchia ndo tu o ntáa ko ikjin ndo: “Je e xjan tsin in xjan Juan.” Ko kain ni ste nti a xronka na.

⁶⁴ Ko tuinxin íjngo kuaxi nichja ndo Zacarías, ko kuaxi kuajon ndo juasie ndo ngajin ndo Dio.

⁶⁵ Kain ni ste tjenka nchando a sen xronka na, ko kain tjajna ngata a ijna Judea kuin en na nge e kon en.

⁶⁶ Ko kain ni kuin en nge e kon en, xraxaon na ko ndachro na:

—¿Nge e ixra sinche e ichjan ña?

Ko nduaxin ndo Dio tsango jii ndo ngajin xjan.

Ndo Zacarías itsje ndo

⁶⁷ Ko ndotée xjan ndo Zacarías me e ícha kuayé e ndo juachaxien Espíritue ndo Dio ko nichja ndo chijnie ndo Dio ko ndachro ndo:

⁶⁸ Juasie Ndotáina Dio titikaon ni tjajna Israel
ixi je e ndo kuij ndo tsingijna ndo tjajnéé ndo.

⁶⁹ Ko je e ndo xruan an ndo ngisen ícha soji tsingijna tsachrjengíexin ije chóna chujni,
naa sen kuachrjenixin ndo David, ngisen juinche e ixra ngajin ndo Dio.

⁷⁰ Jaña nichja ndo Dio nichjaxin ndo sen chronga chijnie ndo Dio ó sa ó

⁷¹ ndache ndo sen ixi tsingijna ndo tsantsje e ndo juachaxin kain ni ningakoina.

⁷² Ko tsikonóe e ndo sen tachrí ina kuintee sa ó,
ko xraxaon ndo ti juao ndo sen tjajnéé ndo ó sa ó.

⁷³ Ko ji i tsindache ndo Dio ndo tachrí ina xranchrjen, ndo Abraham

⁷⁴ ixi tsingijnana ndo ixi tsitua i xi ningakoina,

ko chao sinche ena ixra ngajin ndo Dio ko xroxrakon ana,

⁷⁵ ixi ícha tjuá tsake e aséeina ko jian tsitikaonna chijnie ndo Dio,
ko tsojuna ngajin ndo Dio kain nchakon.

⁷⁶ Ko ja a, chjan na, ja a xrokjan naa ngisen xronichja chijnie ndo Dio jii noi,

ko ja a sa ó tsitaon en Ncháina,*

ko ja a sinchenataonxian chaoé ndo,

⁷⁷ ixi tsono e ni tjajnéé ndo ixi sinchemé e ndo kain ije chóna na

ko tsajon ndo juachaxin tsitjáña i na.

⁷⁸ Ixi je e Ndotáina Dio tsango tjaunna ndo ko tsango tikonóa ina ndo,

ko je e ndo tsajon ndo xro i tsingasáña ina kain nchakon,

⁷⁹ ko tsajon ndo xro i tsingasáñaxin kain ni jii ti tsango naxixe e.

Ko je e ndo tsake e ndo tutéina ngata a cha o tajon juaxruxin.

⁸⁰ Ko je e xjan bangi xjan ko konsoji aséen xjan. Ko bake e xjan ngataon ijngi ti xro an
ngisen ste, xetjaja nchakon konoxin xjan ngajin ni tjajna Israel.

2

Jongí e xjan Jesús

(Mt. 1:18-25)

¹ Nchakon me e bake e naa xi ícha baketuan an ko bakin in xa Augusto César, ko je e xa
kuetuan an xa ixi tsixintaxin kain na ixi tsono e xa ngijan in chujni chóna kain tjajna.

² Méxin, ti sa ó kuixintaxin chujni xi Cirenio baketuan an xa nunte Siria.

³ Ko kuetuen en na kain na satsji na tjajna tikinixin en na ixi nti a tsixintaxin na.

⁴ Méxin, ndo José kuachrjexin ndo tjajna Nazaret tikinixin en Galilea, ko sakjui ndo
tjajna Belén nunte Judea ti tsijongíexin ndo David, ixi ndo José kuachrjenixin ndo ndo
tachrí e ndo xranchrjen, ndo David.

⁵ Méxin sakjui ndo José tjajna Belén, je e ndo ko janchri e ndo jan María. Ko je e jan
María ó yaa jan ichjan.

⁶ Ko nchakon jii sen tjajna Belén, kuitja nchakon tsjongí e chjen en jan María.

⁷ Ko nti a kuixin in sen naa nchia ti tejua iko ixi kuitja i sen nchia no tsitu e sen. Méxin,
nti a jongíexin chjen en jan María, xjan sa ó, ko je e jan kuintsía jan xjan manta ko baje e
jan xjan ngaya ti nexin iko.

Sen ángel ko ni stendáa kutuchjon

⁸ Tiie me e tjenka tjajna Belén kaxin na stendáa na kutuchjoen na ngataon ijngi.

⁹ Me e tuinxin konoxin naa ndo ángel xruan an ndo Dio, ko bika o ndo chjiixrué ndo
Dio juinchengasáña nguixin ngandajin na; ko je e na tsango xronka na.

¹⁰ Ko je e ndo ángel ndache ndo na:

* **1:76** Ncháina Señor Ncháina Jesús o Ncháina Dio

—Xrakon anta ixi jan an bikian juajna jian, méxin, xrochondanta juaxruxin ko kain ni tjajna kaxon.

¹¹ Tjajnéé ndo David jai jongíexin naa chjan, xjan me e sinchemé e xjan kain ijie chóna chujni, ko je e xjan Ncháina Cristo.

¹² Itjinta tjajna, nti a tsinchíinta xjan jitsjía xjan manta ko jii xjan ti no nexin iko.

¹³ Xrajíi ndo ángel, tuinxin konoxin ícha kueya sen ángel kuixin sen ngajní,* ko itsje sen ko kuajon sen juasaya ngajin ndo Dio jii ngajní, ko ndachro sen:

¹⁴ Juasie ndo Dio jii ngajní ixi tsango chóna ndo juachaxin!

Ko juaxruxin tsintee kain ni ste ngata a nunte, kain ni titikaon ndo.

¹⁵ Ko tjume e kain sen ángel sakjui sen ngajní, ko ni stetsje e kutuchjoen ndache kichuu na:

—Ichjina tjajna Belén, tsitsje ena nge e kon en nti a xranchi ndachro ndo ángel xruan an ndo Dio.

¹⁶ Ko nteeto sakjui na bikitsje e na jan María ko ndo José, ko ichjan jii xjan ti tejua iko.

¹⁷ Hora bikon na xjan, beki na kain ti ndachro ndo ángel kondee je e xjan

¹⁸ ko tsango xronka kain chujni kuin en ti ndachro na.

¹⁹ Ko je e jan María jixraxaon jan गया aséen jan kain nge e kon en.

²⁰ Ni stetsje e kutuchjoen ikjan na ti kuintu e na kuée na, ko kuajon na juasaya ngajin ndo Dio ixi kain nge e kuin en na ko bikon na, kain nge e kon en xranchi ndachro ndo ángel.

Ndotée xjan Jesús bikao sen xjan tjajna Jerusalén

²¹ *Nchakon kuitja xjan Jesús ijní nchakon, chjée sen xjan chji e ni tjajnéé xjan ko juinche kin in sen xjan Jesús, xranchi kuetuan an ndo ángel ngajin jan María nchakon xrayá i jan xjan.

²² Kuitja nchakon chao jii jan María xranchi tsiketuan an ley tsikjin ndo Moisés, ko tjume e je e jan ko ndo José sabikao sen xjan tjajna Jerusalén ixi ndo Dio sinchenchaon† ndo xjan.

²³ Ko jaña juinche e sen xranchi jitaxin xroon kuituan an ndo Dio: “Kain xjan xi, xjan kóña sa ó, tikinixin en xjan ndo Dio.”

²⁴ Méxin, jan María ko ndo José sakjui sen ndo a ndo Dio ixi bikao sen iko tsen en nti a xranchi jitaxin xroon tsituan an ndo Dio tson en, méxin xrokuajon sen yuu kuntúá najni o yuu kuxenta.

²⁵ Nchakon me e tjajna Jerusalén bake e naa ndo tachríi ndatin in Simeón. Je e ndo tsango jian ndo, ko bakajon ndo juasaya ngajin ndo Dio, ko chón en ndo xroxruan an ndo Dio ngisen tsingijna tjajna Israel. Méxin Espíritue ndo Dio jii ngajin ndo Simeón

²⁶ ko Espíritue ndo Dio juincheno e ndo Simeón ixi xratsen a ndo tsikonja ndo ndo Cristo, ndo xroxruan an ndo Dio.

²⁷ Ko tjume e Espíritue ndo Dio juinhexraxaon ndo Simeón xrokjui ndo ndo a ndo Dio. Ko nchakon me e kuij jan María ko ndo José bikao sen xjan Jesús ngaxin in ndo a ndo Dio ixi kuitikaon sen xranchi tsiketuan an ley.

²⁸ Ko tjume e ndo Simeón joa ndo xjan Jesús ko kuajon ndo juasaya ngajin ndo Dio ko ndachro ndo:

²⁹ Jai, Ncháina, ó kuitja ti ndachronta.

Jai chao tájonnta juachaxin juaxruxin tsen en na,

³⁰ ixi ó bikon ngisen kuij tsantsje kain ijie chondana,

³¹ ko ja anta tsixruan annta xjan

ko kain tjajna tsichuxin na xjan.

³² Je e xjan xro i tsingasáña ngajin kain tjajna, ni je a tjajna Israel,

ko tsajon na juasaya ngajin tjajnánta Israel ixi nti a konoxin xjan Jesús.

* 2:13 ngajní cielo 2:21 Lc. 1:31. † 2:22 sinchenchaon bendecir

³³ Ko ndo José ko jan María, janée xjan Jesús, xronka sen ixi jaña ndachro ndo Simeón xranchi sinche e xjan Jesús.

³⁴ Ko tjume e ndo Simeón juinchenchaon ndo sen ko nichje e ndo jan María, janée xjan ko ndachro ndo:

—Chjan an me e tsika o itsjé nge e tangi tsikonni. Méxin, kueya ni tjajna Israel, kaxin na tsitikaon a na ko ikaxin na tsitikaon na chijnie xjan ko jian tsake e na.

³⁵ Ko jaña tsonoxin xranchi xraxaon ngujngu aséen na. Ko kain nge e tson en sintani a xranchi naa chika yao tsatsingatu u asáan ja a, María.

³⁶ Ko kaxon nti a bake e naa janachri profeta, nichja jan chijnie ndo Dio ko ndatin in jan Ana. Ndotée jan bakin in ndo Fanuel, ko je e ndo, ndo tachrí e ndo xranchrjen, ndo Aser. Je e jan Ana ó tsango nachrí jan, ko xranchrichájan jan tsikute e jan ko bekao jan ndoxi e jan je o yaato nano.

³⁷ Ko jai ó ka an jan ko noókán ko noó nano chóna jan. Ko tachrjexin a jan ni ngo ndo a ndo Dio; ko ndi ao bake e jan tiie ko nchakon bakajon jan juasaya ngajin ndo Dio; ko kaxin nchakon bajine a jan ixi nichje e jan ndo Dio.

³⁸ Ko nchakon me e jan Ana konchjiñe e jan kojuangíxin jan kuajon jan juasie jan ngajin ndo Dio, ko kuaxi jan nichja jan ixi xjan Jesús, nichje e jan kain ni stechón en nchakon xroxruan an ndo Dio ngisen tsingijna ni tjajna Jerusalén.

Ndotée xjan Jesús kjanka o sen xjan tjajna Nazaret

³⁹ *Nchakon juexin juinche e jan María ko ndo José kain nge e ndachro chijnie ndo Dio, ikjan sen tjajnee sen Nazaret, nunte Galilea.

⁴⁰ Ko xjan Jesús ícha bangi xjan, ko ícha konsoji xjan, ko ícha no e xjan jian kain nge e ixi ndo Dio bakajon ndo juachaxin ngajin xjan.

Kuitja sen xjan Jesús ngaxin in ni ngo

⁴¹ Ndo José ko jan María, janée xjan Jesús, bakji sen tjajna Jerusalén kain nano ixi tsake e sen nti a ti kia pascua.

⁴² Ko nchakon kuitja xjan Jesús teyuu nano, je e sen ko je e xjan sakjui sen tjajna Jerusalén xranchi kuituen en sen ixi kia pascua.

⁴³ Nchakon juexin kia pascua, kua sen cha o itji tjajnee sen. Ko xjan Jesús tsikitu e xjan nti a tjajna Jerusalén, ko ndo José ko jan María, janée xjan, konoe a sen tsikitu e xjan.

⁴⁴ Je e sen xraxaon sen ixi xjan Jesús jitji xjan ngakjen en sen kaxin, ko sakjui sen nchijí naa nchakon. Ko tjume e juée sen xjan ngajin ni kichuu sen ko ni chúxin sen.

⁴⁵ Ko kuitja i sen xjan, méxin ikjan sen tjajna Jerusalén ko juée sen xjan nti a.

⁴⁶ Ko nchakon nínxin kuitja sen xjan ngaxin in ni ngo ndo a ndo Dio. Nti a jii xjan nunte ngusine kain sen tjako chijnie ndo Dio ko jitin en xjan ti ndachro sen, ko jítjanchiangí e xjan sen.

⁴⁷ Ko kain chujni jitin en ti ndachro xjan, xronka na ixi tsango jian no e xjan ko jian tjate e xjan kain nge e tjanchangí e sen xjan.

⁴⁸ Ko xronka ndo José ko janée xjan hora bikon sen ti jii xjan ngusine sen no e. Ko janée xjan ndachro jan:

—Chjan na, ¿sonda jaña juinche e? Ndotáa ko jan an yaana juachjaon chritjéena ja a.

⁴⁹ Ko juatingíexin xjan Jesús:

—¿Sonda tjéeninta? ¿Á noa inta ixi jan an xrokonda sinta a xrée Ndotána?

⁵⁰ Ko je e sen kuienxin a sen nge e ndachro xjan.

⁵¹ Ko tjume e sabikao sen xjan Jesús tjajnee sen, tjajna Nazaret, ko xjan Jesús baktikaon xjan sen. Ko jan María, janée xjan, ngaya aséen jan xraxaon jan kain nge e kon en.

⁵² Ko ícha bangi xjan ko ícha kono e xjan, ko ijié juachaxin kuajon ndo Dio ngajin xjan, ko kain na tsango tjue e na xjan.

3

*Ndo Juan bake e ndo ngata a jna
(Mt. 3:1-12; Mr. 1:1-8; Jn. 1:19-28)*

¹ Ó chóna tena ó nano baketuan an xi Tiberio César, ko xi Poncio Pilato baketuan an xa nunte Judea, ko xi Herodes baketuan an xa nunte Galilea, ko xi kichuu xi Herodes ndatin in Felipe baketuan an xa nunte Iturea ko nunte Traconite, ko xi Lisantias baketuan an xa nunte Abilinia.

² Ko xi Anás ko xi Caifás xitaana ícha tetuan an. Nchakon me e ndo Dio, nichje e ndo ndo Juan, chjen en ndo Zacarías, xjan bake e ntajie.

³ Ko ndo Juan ikjui ndo kain tjajna ngande e inda jitinga ndatin in Jordán ko ndache ndo kain na ixi xrokonda tsintu e na ti ndako a nche e na ko tsikitée na ixi ndo Dio jaña sinchemé e ndo kain ijie chóna na.

⁴ Jaña jitaxin xroon tsikjin ndo profeta Isaías ndachro:
Naa té sen nichja ntajie tuyako ko ndachro:

“Nchekonchjiannta cha o tsaji Ncháina,
tantje enta naa cha o nao itji.

⁵ Ko kain tsaaka tsingachjian inche,
ko kain jna ko kain ngande e jna, jian tsonataunxin;
ko kain cha o nango itji, xroxendue e cha o
ko kain cha o nataonxin a, tsonataunxin cha o.

⁶ Méxin, kain ni ste ngata a nunte nti i tsono e na ngisen xruan an ndo Dio,
tsantsje ndo ijie chóna chujni.”

⁷ *Nchakon me e kueya na bakonchjiñe e na ixi ndo Juan tsikitée ndo na, ko je e ndo ndache ndo na:

—Ja anta tsikachrjenixinnta kunchee! ¿Ngisen ntatjunta satsinge enta juañaue ndo Dio ti ó tuinxin tsij?

⁸ *Xrokonda tsindoxinnta ti ndako a nche enta ko jian titikaonnta ti tetuan an ndo Dio. Ko Ndachro anta: “Jan anna ícha jianna ixi kuachrjenixinna ndo Abraham.” Ko jan an nduaxin ntatjunta ixi ndo Dio chao sinchéña ndo ixro ji i xrokjan xjantié ndo Abraham.

⁹ *Méxin, ó jichón en chika jacha xrochrijinxin ntaa, nue e ntaa xrochrijinxin ntaa. Méxin kain ntaa tajon a itu cháña tsjánka na ntaa ko tsaa ntaa xro i.

¹⁰ Ko tjume e juanchangi e na ndo Juan ko ndachro na:

—¿Nge e xrokonda sinta ana?

¹¹ Ko juatingíexin ndo Juan ko ndachro ndo:

—Ngisen chóna yuu manta xrochjée sen naa manta ni xro an nge e chóna. Ko ngisen chóna nge e sine xrochjée sen ni chóna i.

¹² *Ko konchjiñe e kaxin ni xenge e i na tomi tjanchia xi tetuan an ko kaxon tjaun na tsikitée na, méxin, juanchangi e na ndo Juan:

—Maestro, ¿nge e xrokonda sinta ana jan anna?

¹³ Ko je e ndo ndachro ndo:

—Je o tjanchianta ti nduaxin sínká na.

¹⁴ Ko kaxon kaxin xisoldado juanchangi e xa ndo Juan:

—Kaxon jan anna, ¿nge e sinta ana?

Ko je e ndo juatingíexin ndo:

—Tantsje anta chujni nge e chóna na, ko nchexronka inta na ixi nge e juinche a na, ko take énta juaxruxin ixi je o tomi tjachanta.

¹⁵ Kain ni ste nti a tjao na ixi je e ndo Juan á ndo Cristo ndo.

¹⁶ Ko ndo Juan ndache ndo kain na:

—Jan an nduaxin ntatjunta ixi jan an tikitéxinnta inda, ko tsii naa ngisen tsikitéxinnta ndo ixi Espíritue ndo Dio ko xro i. Ko je e ndo ícha ijíé juachaxin chónnda ndo ixi juachaxin chonda jan an. Jan an tikinixinna i tsoxindanga a tjuée katée ndo.

¹⁷ Ko je e ndo ó bika o ndo naa kachrintu ixi tsjenduaxin ndo noatrigo ixi tsachrjekje en xineno. Tsjatsi in ndo kain noatrigo ti tikinixin tsji in no, ko kain xineno tsjánka ndo ti xro i jua i tsanga.

¹⁸ Jaña ndachro ndo Juan ko ndache ndo na ikaxin nge e ko chronga ndo chijni jian.

¹⁹ *Ko kaxon kuyakutee ndo Juan xi Herodes, xi tetuan an, ixi jikao xa nchri Herodías, nchrinchri e xikichuu xa, xi ndatin in Felipe, ko kaxon ndo Juan koñao ndo ngajin xi Herodes ixi ícha nge e ndako a juinche e xa.

²⁰ Ko xi Herodes kuitikaon a xa, ko ícha chinga juinche e xa ko kaxon bije e xa ndo Juan ndo achjiso.

Bikitée ndo Jesús

(Mt. 3:13-17; Mr. 1:9-11)

²¹ Ko nchakon xrajitikitée ndo Juan kueya na, kaxon kuji ndo Jesús bikitée ndo. Ko hora jinichja ndo Jesús ngajin ndo Dio xitje e ngajni

²² *ko Espíritue ndo Dio xingajin xranchi naa kuntúá ko bake e ba ngata a jaa ndo Jesús ko kuin enni nichja naa ngisen jii ngajni ndachro:

—Ja a chjan na ko tsango tjua a. * Ko jan an ritjén juaxruxin ngajian.

Kain ndotáchri e xranchrjen ndo Jesús

(Mt. 1:1-17)

²³ Ndo Jesús kuachónnda ndo xranchi ikánte nano nchakon ti juangíxin ndo xrée ndo. Ko kain na xraxaon na ixi je e ndo Jesús chjen en ndo José.

Ko ndo José chjen en ndo Elí,

²⁴ ko ndo Elí chjen en ndo Matat,

ko ndo Matat chjen en ndo Leví,

ko ndo Leví chjen en ndo Melqui,

ko ndo Melqui chjen en ndo Jana,

ko ndo Jana chjen en ndo José.

²⁵ Ko ndo José chjen en ndo Matatías,

ko ndo Matatías chjen en ndo Amós,

ko ndo Amós chjen en ndo Nahum,

ko ndo Nahum chjen en ndo Esli,

ko ndo Esli chjen en ndo Nagai,

²⁶ ko ndo Nagai chjen en ndo Maat,

ko ndo Maat chjen en ndo Matatías,

ko ndo Matatías chjen en ndo Semei,

ko ndo Semei chjen en ndo José,

ko ndo José chjen en ndo Judá.

²⁷ Ko ndo Judá chjen en ndo Juana,

ko ndo Juana chjen en ndo Resa,

ko ndo Resa chjen en ndo Zorobabel,

ko ndo Zorobabel chjen en ndo Salatíel,

ko ndo Salatíel chjen en ndo Neri.

²⁸ Ko ndo Neri chjen en ndo Melqui,

ko ndo Melqui chjen en ndo Adi,

ko ndo Adi chjen en ndo Cosam,

ko ndo Cosam chjen en ndo Elmodam,

ko ndo Elmodam chjen en ndo Er.

²⁹ Ko ndo Er chjen en ndo Josué,
ko ndo Josué chjen en ndo Eliezer,
ko ndo Eliezer chjen en ndo Jorim,
ko ndo Jorim chjen en ndo Matat.

³⁰ Ndo Matat chjen en ndo Leví,
ko ndo Leví chjen en ndo Simeón,
ko ndo Simeón chjen en ndo Judá,
ko ndo Judá chjen en ndo José,
ko ndo José chjen en ndo Jonán,
ko ndo Jonán chjen en ndo Eliaquim.

³¹ Ndo Eliaquim chjen en ndo Melea,
ko ndo Melea chjen en ndo Mainán,
ko ndo Mainán chjen en ndo Matata,
ko ndo Matata chjen en ndo Natán.

³² Ndo Natán chjen en ndo David,
ko ndo David chjen en ndo Isaí,
ko ndo Isaí chjen en ndo Obed,
ko ndo Obed chjen en ndo Booz,
ko ndo Booz chjen en ndo Salmón,
ko ndo Salmón chjen en ndo Naasón.

³³ Ndo Naasón chjen en ndo Aminadab,
ko ndo Aminadab chjen en ndo Aram,
ko ndo Aram chjen en ndo Esrom,
ko ndo Esrom chjen en ndo Fares,
ko ndo Fares chjen en ndo Judá.

³⁴ Ko ndo Judá chjen en ndo Jacob,
ko ndo Jacob chjen en ndo Isaac,
ko ndo Isaac chjen en ndo Abraham,
ko ndo Abraham chjen en ndo Taré,
ko ndo Taré chjen en ndo Nacor.

³⁵ Ndo Nacor chjen en ndo Serug,
ko ndo Serug chjen en ndo Ragao,
ko ndo Ragao chjen en ndo Peleg,
ko ndotée ndo Peleg me e ndo Heber,
ko ndo Heber chjen en ndo Sala.

³⁶ Ndo Sala chjen en ndo Cainán,
ko ndo Cainán chjen en ndo Arfaxad,
ko ndo Arfaxad chjen en ndo Sem,
ko ndo Sem chjen en ndo Noé,
ko ndo Noé chjen en ndo Lamec.

³⁷ Ndo Lamec chjen en ndo Matusalén,
ko ndo Matusalén chjen en ndo Enoc,
ko ndo Enoc chjen en ndo Jared,
ko ndo Jared chjen en ndo Mahalaleel,
ko ndo Mahalaleel chjen en ndo Cainán.

³⁸ Ndo Cainán chjen en ndo Enós,
ko ndo Enós chjen en ndo Set,
ko ndo Set chjen en ndo Adán,
ko ndo Adán chjen en ndo Dio.

4

Xixron anxrée tjaun xa xrojuincheye e xa ndo Jesús (Mt. 4:1-11; Mr. 1:12-13)

¹ Ndo Jesús tsango chónḁa ndo juachaxien Espíritue ndo Dio, ko tjume e kjanxin ndo ti jii inda jitinga ndatin in Jordán. Ko Espíritue ndo Dio bikao ndo ntajie.

² Nti a bake e ndo yuu ikán nchakon, ko kain nchakon me e juine a ndo, ko tjume e kuen en ndo jinta ko Xixron anxrée tjaun xa xrojuincheye e xa ndo.

³ Ko je e Xixron anxrée ndache xa ndo Jesús:

—Siá nduaxin ja a chjen en ndo Dio, ndache ixro ji i xrokjan ixro nutja.

⁴ Ko juatingíexin ndo Jesús ko ndachro ndo:

—Ndachro xroon jitaxin chijnie ndo Dio: “Je a je o nutja tsechónxin chujni. Kaxon ixi chijnie ndo Dio tsechónxin na.”

⁵ Ko tjume e Xixron anxrée bikao xa ndo Jesús ngata a naa ijna ícha nui ko juako e xa ndo kain tjajna jii ngata a nunte.

⁶ Ko ndachro Xixron anxrée:

—Jan an xrotjá a juachaxin ko kain ti tjintee chónḁa kain tjajna ixi jan an kuayá a kain ji i, ko chao xrotjá a kain ji i ngajin ngisen jan an tja on.

⁷ Méxin siá ja a tsake exian ntatuchi ian ko xrochjana juasaya, kain ji i tsaye é.

⁸ Ko juatingíexin ndo Jesús ko ndachro ndo:

—Tingaxintuan satjia, Xixron anxrée ja a. Ndachro chijnie ndo Dio: “Tsájuan juasaya ngajin Ncháa ndo Dio, ko je o ngajin je e ndo sinche é ixra.”

⁹ Ko tjume e Xixron anxrée bikao xa ndo Jesús tjajna Jerusalén, ko juinçekajin in xa ndo ti ícha nui ngata a ni ngo ko ndachro xa:

—Siá nduaxin ja a chjen en ndo Dio, chrinka ti nunte;

¹⁰ ixi ndachro chijnie ndo Dio:

Ndo Dio tsetuen en ndo sen ángel ixi xrotsengia sen,

¹¹ ko ngaya itja sen tsake e, ixi tsontengíxin a tutáa ixro.

¹² Ko ndo Jesús juatingíexin ndo ndachro ndo:

—Kaxon ndachro chijnie ndo Dio: “Tsaké a naa nge e ixi tsikuan á chao sinche e ndo.”

¹³ Ko Xixron anxrée jua i juincheye e xa ndo Jesús, ko je e xa sajuixin xa ti ndo Jesús kaxin nchakon.

Juangíxin Ndo Jesús juinçekuen en ndo chujni nunte Galilea (Mt. 4:12-17; Mr. 1:14-15)

¹⁴ Ko tjume e Ndo Jesús ikjan ndo nunte Galilea ko tsango chónḁa ndo juachaxien Espíritue ndo Dio. Ko kain ni nti a teki na kain ti juinche e ndo Jesús.

¹⁵ Ko je e ndo juinçekuen en ndo chujni chijnie ndo Dio ngaxin in ni ngo ste kain tjajna nti a, ko kain na kuajon na juasaya* ngajin ndo.

Ndo Jesús bake e ndo tjajna Nazaret (Mt. 13:53-58; Mr. 6:1-6)

¹⁶ Ko tjume e ndo Jesús sakjui ndo tjajna Nazaret, ti no bangíxin ndo. Ko nchakon sábado tjoké e na, kuixin in ndo ningue ni israelita ixi jaña kuanche e ndo. Ko bingatjen ndo Jesús ixi sinçekuanxin ndo ti jitaxin xroon chijnie ndo Dio.

¹⁷ Ko chjée na ndo xroon tsikjin ndo kuanichjaxin chijnie ndo Dio ó sa ó, ndo Isaías. Ko je e ndo kuantje e ndo xroon ko juée ndo ti jitaxin ja in:

¹⁸ Espíritue ndo Dio jii ngata ana,

ko kuayá a juachaxin xronichja chijnie ndo tsayé e ni nóa.

Xruan anna ndo ixi syntaxruan an ni tangi ste,

ko tsantsje jíee ni steje e,

* 4:15 *juasaya* respeto, honor

ko sintaxruan an ni tikon a;
ko tsingijna ni stechrua,

¹⁹ ko xrontatjan n̄a ixi kuj̄i nchakon tsingijna n̄a ndo Dio ko tsantsje ndo ijié chón̄da n̄a.

²⁰ Ko tjume e ndo Jesús bibe e ndo xroon, ko kuajon ndo xroon ngajin xi jinche e ixra ni ngo, ko je e ndo bake e ndo nunte. Ko kain ni ste nti a jian stetsje e n̄a ndo.

²¹ Ko kuaxi nichja ndo:

—Jai kuitja nchakon ndachro chijnie ndo Dio, chijni kuin ennta.

²² Ko kain n̄a stetjao kichuu n̄a kondee xranchi jian jinichja ndo, ko xraxaon n̄a tsango chaxro ti nge e nichja ndo. Ko juanchangi e kichuu n̄a:

—¿Á je a xi ji i chjen en ndo José?

²³ Ko ndo Jesús ndache ndo n̄a:

—Nduaxin xrondachijintana chijni ji i: “Ja a xi nchexruan, ja ua toxruan an.” Ko kaxon xrondachijintana: “Ti kuin anna juinche e tjajna Capernaum, jaña nche e kaxon nti i tjajnáa.”

²⁴ *Ko xrajnichja ndo, ko ndachro ndo:

—Nduaxin xrontatjunta xro an sen profeta nichja chijnie ndo Dio, tsitikaon n̄a ndo ni tjajné e ndo.

²⁵ Ko jan an nduaxin ntatjunta ixi bake e itsjé nchri ka an nunte Israel nchakon bake e ndo profeta Elías, naa ndo kuanichja chijnie ndo Dio ó sa ó, nchakon me e kui a ichrin ní nano kutu o ko tsango bake e jinta nchijíi tjajna nti a.

²⁶ Ko ndo Dio xruan i ndo ndo Elías xrokuitsje e ndo ngixe i nchri ka an tjajna Israel. Na i. Xruan an ndo ndo Elías itsji ndo ngajin naa nchri ka an bake e tjajna Sarepta, tjenka tjajna Sidón ixi tsingijna ndo nchra.

²⁷ Kaxon nunte Israel kuintee kueya chujni níexin ichin lepra nchakon bake e ndo profeta Eliseo, ko xruan i ndo Dio ndo Eliseo ngisen xrokuitsje e ndo ngixe i chujni níexin ichin lepra nti a. Je o ndo Naamán kuix̄in tjajna Siria, me e ndo koxruen en.

²⁸ Ko kain ni ste ngaxin in ni ngo kuin en n̄a jaña, ko tsango koñao n̄a.

²⁹ Bingatjen n̄a ko kuantsjexin n̄a ndo Jesús nti a, ko bikao n̄a ndo ngande e tjajna ngata a ti ijn̄a ícha nui ixi tjaun n̄a xrojuinchengandatjen n̄a ndo ijn̄a me e.

³⁰ Ko je e ndo Jesús kuatsinga ndo ngakjen en n̄a ko sakjui ndo.

Naa xi bachón̄da xa espíritue Xixron anxrée

(Mr. 1:21-28)

³¹ Ko tjume e ndo Jesús sakjui ndo tjajna Capernaum, naa tjajna tikinixin en tjajna Galilea ko kain sábadó nchakon tjoké e n̄a nchekuen en ndo ni ste nti a.

³² *Ko ni stetin en juinche e n̄a juaxruxin xranchi kuanchekuen en ndo n̄a ixi chijnie ndo chón̄da ijié juachaxin.

³³ Ko ngaxin in ni ngo nti a jii naa xi chón̄da espíritue Xixron anxrée ko séen kuyako xa ko ndachro xa:

³⁴ —Tintun̄ana, Jesús tjajna Nazaret. ¿Á jui ia ixi sinchetjáñana? Jan an chuxian ixi ja a naa ngisen ícha tjúá xruan an ndo Dio.

³⁵ Tjume e ndo Jesús kuyakutee ndo espíritue Xixron anxrée, ko ndachro ndo:

—¡Tenkua, ko tachrxexian xi ña!

Tjume e je e espíritue Xixron anxrée juanka xi me e nunte ngatoxin ikon kain ni ste nti a. Ko tjume e kuachrje espíritue Xixron anxrée ko juinchenie a xa xi me e.

³⁶ Kainko n̄a xronka n̄a, ko ndache kichuu n̄a:

—¿Nge e chijni jian nichja ndo Jesús? Ixi je e ndo chón̄da ndo ijié juachaxin ko tetuen en ndo espíritue Xixron anxrée ko titikaon, tachrje ko satji espíritu.

³⁷ Ko kain tjajna nti a binga chijni xranchi nchexruen en ndo Jesús kain n̄ ko xranchi nichja ndo.

Ndo Jesús juinchexruen en ndo jachée ndo Simón Pedro
(Mt. 8:14-15; Mr. 1:29-31)

³⁸ Tjume e ndo Jesús kuachrjexin ndo ni ngo ko sakjui ndo ndo a ndo Simón Pedro. Ko jachée ndo Pedro tsango níexin jan súa. Méxin, kuinóatée sen ngajin ndo Jesús ixi sinchexrjuen en ndo jan.

³⁹ Ko ndo Jesús kuisée ndo ti jitsinga jan, ko kuyakutee ndo súa ko je e súa kuachrje súa. Ko tuinxin bingatjen jan ko kuajon jan juine sen.

Ndo Jesús juinchexruen en ndo kueya ni ni e
(Mt. 8:16-17; Mr. 1:32-34)

⁴⁰ Ko kuitaon nchakon, kain ni chóna ni ni e, níexin n̄ ngixe i ichin, bikao n̄ n̄ ti jii ndo Jesús; ko je e ndo bake e ndo itja ndo ngata a ngujngu n̄, ko koxruen en kain n̄.

⁴¹ Ko itsjé ni ni e kuantsjexin ndo espíritue Xixron anxrée ko hora tachrje espíritu tuyako ko ndachro:

—Ja a chjen en ndo Dio.

Ko ndo Jesús kuyakutee ndo espíritue Xixron anxrée ko kuintue a ndo xronichja xa ixi je e xa no e xa ixi je e ndo Jesús, ndo Cristo.

Ndo Jesús juinchekuen en ndo ni ste nunte Galilea
(Mr. 1:35-39)

⁴² Ko ó bingasáña je e ndo Jesús kuachrjexin ndo tjajna me e, ko sakjui ndo nunte xro an chujni ste. Ko je e n̄ juée n̄ ndo ko ikjui n̄ ti no jii ndo. Ko tingakon en n̄ ndo ixi tjaun a n̄ satsji ndo inaa tjajna.

⁴³ A je e ndo Jesús ndachro ndo:

—Jan an xrokonda itsji ikaxin tjajna ixi xrontatjan n̄ xranchi tsayé e n̄ ti tetuan an ndo Dio ixi me e juixin jan an.

⁴⁴ Ko jaña kuaji ndo Jesús kain ni ngo tikinixin en nunte Galilea ko ndache ndo n̄ chijnie ndo Dio.

5

Kueya kucheē itsé sen
(Mt. 4:18-22; Mr. 1:16-20)

¹*Naa nchakon ndo Jesús jii ndo ngande e ndalago ndatin in Genesaret ko kueya n̄ kuixintja kichuu n̄ ixi tjaun n̄ tsin en n̄ chijnie ndo Dio.

² Ko bikon ndo jii ngande e inda yuu nt̄abarco tsikintu e ni itsé kucheē ko je e n̄ stenéma n̄ nocha a tséxin n̄ ba.

³ Ko je e ndo bajin in ndo naa nt̄abarcoe naa xi ndatin in Simón, ko ndo Jesús ndache ndo xa ixi tsoncheka xa nt̄aa ícha ngusine inda. Ko bake e ndo nunte ngata a nt̄abarco ko kuaxi ndo juinchekuen en ndo kain ni ste nti a.

⁴ Ko juexin juinchekuen en ndo n̄, tjume e ndache ndo xi Simón:

—Tiku a nt̄abarco ti ícha yaso e inda, ko tjankanta nocha a chringi inda ixi xrotsénta kucheē.

⁵*Ko ndo Simón juatingíexin ndo:

—Maestro, nguixin tiie stenta ana ixr̄a ko xro an kucheē itséna. Ko siá ja anta ndachronta, jaña sinta ana.

⁶*Ko je e sen kuitikaon sen nge e ichro ndo Jesús. Ko tsango kueya kucheē bingachjian nocha a ko jitaxin jichrindaon no.

⁷ Ko tjakaxin kichuu sen ste yá inaa ntabarco ixi tsonchjiñe e sen tsingijna kichuu sen. Ko kuji sen ko juinchekaon sen yui ntabarco ko je e ntaa kuechjen en ntaa ko ó xrojamangi ntaa ixi kueya kuama ntaa.

⁸ Ko bikon ndo Simón Pedro nge e kon en, bake exin ndo ntatuchi in ndo ko ndachro ndo:

—Tingaxintuan, Nchána Jesús, ixi jan an tjúa i aséenna.

⁹ Méxin, ndo Simón ko sen ste ngajin ndo xronka sen ixi kueya kuchee itsé sen.

¹⁰ Kaxon xronka ndo Jacobo ko ndo Juan, chjen en ndo Zebedeo, sen me e tingijna ndo Simón nche e sen ixra. Ko ndo Jesús ndachro ndo:

—Xronka ia, sa ó kuatse kuchee ko jai tsaxia xronichje e chujni kondeena jan an.

¹¹ Ko bikao sen ntabarco ngande e inda. Ko kuintu e sen ntaa ko kain nge e kuachóna sen ko sakjui sen rué e sen ndo Jesús.

Ndo Jesús juinchexrue en ndo naa xi níxin ichin lepra

(Mt. 8:1-4; Mr. 1:40-45)

¹² Naa nchakon bake e ndo Jesús naa tjajna, kuji naa xi níxin xa ichin lepra. Ko bikon xa ndo Jesús, méxin, konchjiñe e xa ko bake exin ntatuchi in xa ko kuiséya xa ngata a nunte ko kuinóatée xa ko ndachro xa:

—Ja anta nchexruannanta siá jaña tjaunnta.

¹³ Ko ndo Jesús bake e ndo itja ndo ngata a xa ko ndachro ndo:

—Jaán tja on; syntaxruan an.

Ko tuinxin koxruen en xa.

¹⁴ Ko je e ndo kuetuan an ndo ngajin xa:

—Xro an ngisen teki é ixi ó koxruan an. Itjia ngajin xitaana ixi ó koxruan an ko tájuan ti tikinixin kuituan an ndo Moisés ko jaña tsikon kueya na ixi koxruan an.

¹⁵ Ko kono e kain tjajna chijnie ndo Jesús, ko kueya na konchjiñe e na ngajin ndo ixi tsin en na nge e ndachro ndo, ko sinchexrjue en ndo chin en na.

¹⁶ Ko je e ndo Jesús bakachrjendáa ndo nanaó ti xro an chujni jii ixi kuanichje e ndo ndotée ndo jii ngajni.

Ndo Jesús juinchexrue en ndo naa xi jua i itji

(Mt. 9:1-8; Mr. 2:1-12)

¹⁷ Naa nchakon ndo Jesús juinchekuen en ndo chujni ko nti a ste kaxin xi fariseo ko kaxin xi tjako ley, tsiki xin xa kain tjajna nunte Galilea ko nunte Judea ko tjajna Jerusalén. Ko ndo Jesús juako ndo juachaxien ndo Dio ixi juinchexrue en ndo itsjé chujni ni e.

¹⁸ Nchakon me e kuji kaxin na bika o na naa xi jitsingata a kania, xi me e jua i nchetengi tutée xa. Ko tjaun na xrokuixin in na kao xi ni e ngaxin in nchia ixi xrobake e na xa ngajin ndo Jesús.

¹⁹ Ko jua i kuixin in na ixi kueya na ste na ngaxin in nchia. Ko tjume e bajin in na ngata a nchia ko konxrato xa ngata a nchia, ko nti a juinchexingajinxin na xi ni e jiá kania ngusine kain ni ste tjenka ndo Jesús.

²⁰ Ko ndo Jesús bikon ndo ixi chujni me e tsango chuntia na ko ndache ndo xi ni e:

—Jan an ó juitemá a kain ti ndako a juinche e.

²¹ Ko tjume e kain xi tjako ley ko xi fariseo kuaxi xraxaon xa: “¿Ngisen xi ji i, ixi ndako a nichja xa ko nichjangí e xa ndo Dio? Ixi xro an chujni tsantsje ijie; je o ndo Dio chao tsantsje ndo ijie chóna na.”

²² Ko ndo Jesús ó no e ndo nge e stexraxaon xa, méxin, ndachro ndo:

—¿Sonda jaña xraxaonnta?

²³ ¿Nge e ícha tangi a xrontatjan xi ni e? ¿Á ícha tangi a xrontatjan xa ixi ó komé e ti ndako a juinche e xa?, o, ¿á tsingatjen xa ko tsajixin xa tutée xa?

²⁴ Méxin, jai tsjako anta ixi jan an, chjen en ndo Dio, xjan jongí e xranchi chujni, chonda juachaxin ngata a nunte tsantsje ijie chónða chujni.

Ko tjume e ndo Jesús ndache ndo xi ni e:

—Jan an ntatjua ja a tingatjen ko itsé kania a ko satsjia ndúya.

²⁵ Ko tuinxin bingatjen xi jua i itji ko stetsje e kain nã, ko itsé xa kanie e xa ti baketa a xa ko sakjui xa ndo a xa ko jitajon xa juasaya ngajin ndo Dio.

²⁶ Ko kain ni ste nti a xronka nã ko kaxon kuajon nã juasaya ngajin ndo Dio, ko xrakon nã stendachro nã:

—Jai bikona naa nge e ícha jié juinche e ndo Dio.

Ndo Jesús kuiye e ndo ndo Mateo

(Mt. 9:9-13; Mr. 2:13-17)

²⁷ Ko tjume e ndo Jesús kuachrjexin ndo nchia, ko bikon ndo naa xi xenge e i nã ndatin in Mateo, jii xa ti xengaxin i nã ko ndo Jesús ndache ndo xa:

—Xrokuia, ichjina.

²⁸ Ko xi Mateo, bingatjen xa ko kuintu e xa kain nge e, ko rué e xa ndo Jesús.

²⁹ Ko tjume e xi Mateo bake e xa naa kia ijie ndo a xa ixi tsajon xa juasie xa ngajin ndo Jesús. Ko kaxon ste kueya xi xenge e i nã ko ikaxin chujni chónða ijie ko juinekao nã ndo Jesús.

³⁰ *Ko itsjé xi fariseo ko xi tjako ley kuaxi xa nichjangí e xa ti ni chrikao ndo Jesús, ko ndachro xa:

—¿Sonda rinteku unta ko tiku unta xi xenge e i nã ko ni chónða ijie?

³¹ Ko juatingíexin ndo Jesús ko ndachro ndo:

—Ngisen nie a xrokonde a xinchexruan; ni ni e ícha xrokonde e nã xa.

³² Jui a ixi tsiya a ni jian. Jui i ixi tsiya a ni chónða ijie, ko tsitikaon nã ndo Dio.

Sonda sen chrjikao ndo Juan nchekatseñao sen jinta

(Mt. 9:14-17; Mr. 2:18-22)

³³ Ko tjume e je e nã juanchangi e nã ndo Jesús ko ndachro nã:

—Sen chrikao ndo Juan ko xi fariseo ne a sen nchakon nichja sen ngajin ndo Dio ko, ¿sonda sen chrjiko a ja a kain nchakon ine sen ko ti i sen?

³⁴ Ko ndachro ndo Jesús:

—¿Á xrojuine a ni tsikiye e xi kute e, ni kuji kiée xa? Já jaán ixi xrastekao nã xa.

³⁵ Ko tsij naa nchakon satsikao nã xi tsikute e, ko tjume e je e sen sine a sen.

³⁶ Kaxon juako ndo naa nge e, ko ndachro ndo:

—Xro an ngisen tonchrijin tu o manta natjúá ko tjaun ti tsikichje manta ntaxi. Siá jaña sinche e nã, tsitjáña manta natjúá; ko kaxon manta natjúá ndako a sikonni manta ti manta ntaxi.

³⁷ Kaxon jua i tsikia xran vino natjúá tjuanxran ntaxi, ixi tsichje tjuanxran, ko ixran ko tjuanxran ndatsitjáña.

³⁸ Méxin, xran natjúá xrokonda tsikia xran tjuanxran natjúá, ko jaña kayui tsitjáña i.

³⁹ Ko kaxon xro an ngisen tsi i xran ntaxi, ko tjume e tsi i nã xran natjúá, ixi xron-dachro nã: “Ícha jian xran ntaxi.”

6

Sen chrikao ndo Jesús tonchrinjin sen trigo

(Mt. 12:1-8; Mr. 2:23-28)

¹ Naa nchakon sábadó tjoké e ni judío, ndo Jesús ko sen teyuu chrikao ndo kuatsinga sen tjenka kaxin ijngi tsikenga nã trigo, ko sen teyuu chrikao ndo konchrinjin sen kaxin tin trigo, ko konte nga sen trigo ixi itja sen ko juine sen.

² Ko kaxin xi fariseo juanchangi xa ndachro xa:

—¿Sonda stenche enta ti tikinixin a sinche eni nchakon tjoké eni?

³ Ko ndachro ndo Jesús:

—¿Á juinçekuanxin anta nge e ndachro xroon jitaxin chijnie ndo Dio, xranchi juinche e ndo David ko kain xi bikao ndo naa nchakon tsango kuen en sen jinta?

⁴ Ndo David kuixin in ndo ndo a ndo Dio ko itsé ndo nutja ti tikinixin en ndo Dio ko juine ndo nio, ko kaxon kuajon ndo nio juine kain xi bikao ndo. Ko nutja me e je o xitaana chóna xa juachaxin sine xa nio.

⁵ Ko kaxon ndachro ndo Jesús:

—Chjen en ndo Dio, xjan jongí e xranchi chujni, chóna ndo juachaxin tsetuen en ndo xranchi tson en nchakon tjoké eni.

Naa xi jua i nchetengi itja xa

(Mt. 12:9-14; Mr. 3:1-6)

⁶ Inaa sábadó nchakon tjoké e ni judío, kuixin in ndo Jesús ningue ndo Dio ko kuaxi ndo juinçekuen en ndo na chijnie ndo Dio. Ko nti a jii naa xi jua i nchetengi itja xa ti jian.

⁷ Ko xi tjako ley ko xi fariseo stetsjaya xa ndo Jesús ixi tjaun xa tsikon xa á sinchexrjuen en ndo xi me e nchakon sábadó tjoké e na, ixi jaña tsjankata a xa ndo Jesús ijie.

⁸ Ko ndo Jesús ó no e ndo nge e stexraxaon aséen xa, méxin, ndache ndo xi ni e itja:

—Tingatjen ko take é ngusine nti i.

Ko tjume e bingatjen xi me e ko bake e xa ngusine ti ste kain na.

⁹ Ko je e ndo Jesús ndache ndo ikaxin na:

—Jan an tsjanchangi anta, ¿nge e chao sinche eni nchakon tjoké eni, á sinche eni jian o sinche eni ndako a? ¿Á tsingijnani chujni o á tsóñani chujni?

¹⁰ Ko tjume e ndo Jesús tsje e ndo kain ni ste nti a ko ndache ndo xi ni e:

—Tinxe tjáa.

Ko je e xa kuinxe itja xa, ko hora me e koxruen en itja xa.

¹¹ Ko ikaxin na tsango koña o na ko stetjao kichuu na xranchi xrotsé na ndo Jesús.

Ndo Jesús kuinche e ndo teyuu sen tsajikao ndo

(Mt. 10:1-4; Mr. 3:13-19)

¹² Ikaxin nchakon tjume e ndo Jesús ikjui ndo ti jii naa ijna ixi nti a xronichjexin ndo ndo Dio, ko nchiji tiie juao ndo ndotée ndo.

¹³ Ko ti bingasáña nichje e ndo sen rué e ndo, ko kuinche e ndo teyuu sen, sen me e ikjan apóstol tsajikao ndo.

¹⁴ Ko sen me e ja in ndatin in sen: ndo Simón, me e ndo Jesús juinçekin in ndo Pedro; ko xikichuu ndo ndatin in Andrés; ndo Jacobo, ndo Juan, ndo Felipe ndo Bartolomé,

¹⁵ ndo Mateo, ndo Tomás, ndo Jacobo, chjen en ndo Alfeo, ndo Simón, bançekin in na Zelote,

¹⁶ ndo Judas chjen en ndo Jacobo ko ndo Judas Iscariote, ndo juinçekji ndo Jesús.

Ndo Jesús juinçekuen en ndo kueya na chijnie ndo Dio

(Mt. 4:23-25)

¹⁷ Ko ndo Jesús ko ti teyuu sen xingajinxin sen ngata a jna ko kuij sen ngataon naa ijngi, ko nti a ste ikaxin sen rué e ndo. Ko kaxon kueya na konchjiñe e na, kuixin na kueya tjajna nunte Judea ko tjajna Jerusalén ko nguixin ngande e ndalago ti jii tjajna Tiro ko tjajna Sidón. Kain na kuij na ixi tsin en na ti nichja ndo Jesús ko tsoxrúenxin na ichin chóna na.

¹⁸ Ko ni chóna espíritue Xixron anxrée kaxon koxruen en na.

¹⁹ Ko kain na tjaun na xrotsé na ndo Jesús ixi no e na juachaxin tachrjexin je e ndo chao sinchexrjuen en kain na.

Juaxruxin ko juachjaon
(Mt. 5:1-12)

²⁰ Ko tjume e ndo Jesús xendua ndo tsje e ndo sen teyuu chrikao ndo ko ndachro ndo: —Juaxruxin tsake enta ti nóanta ixi tsaye enta juachaxin tsixin innta ti tetuan an ndo Dio.

²¹ Juaxruxin tsake enta ti jai chonda inta nge e sintenta, ko tjume e xrochondanta ti jian.

'Juaxruxin tsake enta ti jai tsjanganta, ixi tjume e xrocha anta.

²² *'Juaxruxin tsake enta ti jai ningakon annta na ko tsjanoanta na, chinga xrontatjunta na, ko xrondachro na ixi ña inta ixi titikaonntana jan an, Chjen en Ndo Dio, xjan jongi e xranchi chujni.

²³ *Nchakon tson en kain juachjaon me e, tsango juaxruxin ko chaxro tsake enta, ixi tsaye enta naa nge e ícha jian jii ngajni. Jaña juinche e sen tachrí anta ngajin sen kuachronga chijnie ndo Dio.

²⁴ 'Lastunta ja anta ti kueya chondanta ixi ó juexin ti juaxruxin bake enta.

²⁵ 'Lastunta ti chondanta kueya nge e sintenta ixi tsii nchakon tsatsenta jinta.

'Ko lastunta ti jai tjanonta ko chá anta ixi tsii nchakon xrotsjanganta ixi tsaye enta ijié juachjaon.

²⁶ 'Lastunta ja anta ixi jai kain chujni chaxro nichja anta na ixi jaña kaxon kuanichje e ni tachrí anta chujni ndako a bajako chijnie ndo Dio.

Xrokonda xrotjaunnta ngisen ningakon annta
(Mt. 5:38-48; 7:12)

²⁷ 'Ko ja anta ti tin ennta ti ntatjunta: Tjue enta ngisen tjaun anta, ko nche enta jian ngajin ni ningakon annta.

²⁸ Tjanche enta ndo Dio ixi chaxro tsintee ngisen chinga nichja anta, ko tjanche enta ndo Dio ixi ni ndako a nche e ngajinnta.

²⁹ Siá xrojan ngisen tsande e na tja na ikonnta, tintu enta tsande e na naa nango. Ko siá xrojan ngisen tsantsja anta chamaranta, kaxon tájonnta camisáanta.

³⁰ Ko siá xrojan ngisen tsjanča anta nge e chondanta, tájonnta; ko siá xrojan nge e tsantsja anta na, íncheni axin anta.

³¹ *Ja anta nche enta ngajin na xranchi tjaunnta sinche e na ngajinnta.

³² 'Siá ja anta je o tjue enta ngisen chaxro nichja anta, ndo Dio nche a ndo juaxruxin me e, ixi kain ni chúxin a ndo Dio ko ni ndako a nche e, jaña nche e na.

³³ Ko siá je o nche enta ti jian ngajin ngisen nche e jian ngajinnta, ndo Dio nche a ndo juaxruxin me e, ixi kain ni chúxin a ndo Dio jaña nche e na kaxon.

³⁴ Ko siá nchekjennta na xrojan nge e chondanta je o ngajin ngisen chao xrokjan annta nge e juinčekjennta, ndo Dio nche a ndo juaxruxin me e ixi kaxon ni chúxin a ndo Dio nchekjen kichuu na xrojan nge e ko jaña tjaun na xrokjen en na kaxon.

³⁵ Ko ja anta xrotjue enta ngisen ningakon annta, ko sinche enta jian ngajin ni tjaun anta. Kaxon sinčekjennta na naa nge e, ko xro an nge e xrochon énta tsaye enta. Jaña ja anta tsaye enta naa nge e jian ixi ja anta xrokjannta chjen en ndo Dio jii ngajni, ixi je e ndo Dio kaxon jaña nche e ndo, tajon ndo kueya nge e ngajin ni tajon a juasaya ko ni ndako a nche e.

³⁶ Tikonóe énta chujni, xranchi Ndotáina jii ngajni tikonóe e ndo chujni.

Tjankata inta ijié inaa chujni
(Mt. 7:1-5)

³⁷ 'Tjankata inta ijié ngajin na, me e kaxon ndo Dio tsjangata inta ndo ijié ngajinnta. Nche anta ixi tangi tson en naa chujni ko jaña kaxon ndo Dio tsetuan i ndo ixi tangi

tson annta. Tjáña anta nge e ndako a junta anta na, jaña kaxon ndo Dio xrotjáñe e ndo ti ndako a juinche enta.

³⁸ Ko tájonnta nge e xrokonde e ikaxin na, ko ndo Dio xrotjáanta ndo kain ti xrokonda anta. Ko sinchekaon ndo costáanta jian, tsonteto costa jian, tsontsjenga ndo ko jian xrokaon ixi ícha xrotjáanta ndo. Méxin siá juaxruxin kuajonnta, jaña tsaye enta kaxon.

³⁹ *Ko ndo Jesús kaxon juako ndo ja in:

—¿Á chao naa ngisen tikon a xrotsé e itja inaa ni tikon a? ¿Á je a tsandatjen yui na ngaya tuye?

⁴⁰ *Méxin, naa ngisen rué e, je a ícha no e sen ixi ti ndo nchekuen en sen. Ko nchakon tsitja sen jian, me e tsake e sen xranchi ndo juinchekuen en sen.

⁴¹ '¿Sonda tsje enta xineno jii ngangí ikon sen kichuunta ko tsje anta ntaa ti chóna ikonnta?

⁴² Siá tikon anta ntaa jii ngangí ikonnta, ¿sonda xrondachenta sen kichuunta: “Chon én tsantsjengi xineno jii ngangí ikuan”? ¿Ko ja anta ndako a xraxaonnta! Cháña sa ó tantsjenginta ntaa jii ngangí ikonnta, ko jaña chao tsikonnta jian tsantsjenginta xineno jii ngangí ikon sen kichuunta.

Ntaa tajon tu tatsuanxinni ntaa ixi itu tsajon ntaa
(Mt. 7:17-20; 12:33-35)

⁴³ 'Ko xro an ntaa jian tsajon naa itu xro an xrée, ko ntaa xro an xrée jua i tsajon ntaa naa itu jian.

⁴⁴ *Nanaá ntaa tatsuanxinni ntaa ixi itu tajon ntaa. Ixi ntacha a jua i tsajon ntaa tu higo, ko kachá a jua i tsajon ka tu uva.

⁴⁵ *Ni jian nichja na nge e jian jii ngaya aséen na; ko ni ña i ndako a nichja na ixi nichja na ti chóna na ngaya aséen na. Ixi kain nge e chóna na ngaya aséen na me e nichja ro a na.

Nchia kui te ngata a itjao ko nchia kui te ngata a nchese
(Mt. 7:24-27)

⁴⁶ 'Ko ja anta, ¿sonda ndachronta ixi jan an Ncháanta ko titikaon anta nge e tetuan annta?

⁴⁷ Kain chujni tonchjiñe e na ngajin jan an, ko tin en na ti ntatjan na ko titikaon na,

⁴⁸ ni me e ste na xranchi naa xi tsijinchekonchjian naa nchia ko sa ó inge xa ixi ngata a itjao tsi te xa nchia. Ko nchakon koyeé inda, ko soji kuincheka o inda nchia me e, ko xro an kon en nchia ixi soji jii nchia ngata a itjao.

⁴⁹ Ko ni tin en ti ndachrjan ko titikaon a na, ni me e ste na xranchi naa xi juinchekonchjian naa nchia ngata a nchese. Ko nchakon koyeé inda, ko soji kuincheka o inda nchia me e, jamangi. Ko jaña chjenjin nchia me e.

7

Ndo Jesús juinchexruen en ndo xi nchexrée capitán romano
(Mt. 8:5-13)

¹ Ko juexin nichja ndo Jesús, ikjan ndo tjajna Capernaum.

² Nti a bake e naa xi capitán romano bachóna xa naa xi nchexra ko tsango tjaun xa xi me e. Ko je e xi nchexra ni e xa ko ó jite en xa.

³ Ko xi capitán kuin en xa nichja na nge e jian juinche e ndo Jesús, ko tjume e xro an xa kaxin ni judío tetuan an tsijée na ndo Jesús, tsinóatée na ixi xrokuji ndo ko xrojuinchexruen en ndo xi nchexrée xi capitán.

4 Ko je e na konchjiñe e na ngajin ndo Jesús ko kuaxi kuinóatée na ngajin ndo ko ndachro na:

—Tsango jian xi capitán ko ja anta chao xrobingijnanta xa,

5 ixi je e xa tjaun xa tjañanana, tjañée ni judío, ko kuetuan an xa konchjian ningonana.

6 Ko ndo Jesús ikjui ndo ko ó jitonchjiñe e sen ndo a xi capitán, ko tjume e xi capitán kuetuan an xa ngajin kaxin na itsji na tsindache na ndo Jesús:

—Xi capitán tjaun a xa xrotjáanta xa ixra, ko ndachro xa ixi tikinixin a xa tsixin innta ndo a xa

7 ko kaxon tikinixin a tsii xa xronichja anta xa. Méxin, je o tájonnta juachaxin ixi xi nchexrée xa tsoxrue en xa.

8 Je e xa kaxon xrokonda tsitikaon xa ngisen tetuen en xa, ko kaxon chóna xa juachaxin tetuan an xa ngajin kain xisoldadoe xa. Ko nchakon tetuen en xa naa xisoldadoe xa satsji xa, je e xa itji xa. Ko nchakon tetuan an xa ixi tsii naa xi soldado je e xa tii xa. Ko nchakon tetuen en xa naa xi nchexra, je e xa titikaon xa.

9 Ko kuin en ndo Jesús, ko xronka ndo ixi jaña ndachro xa, ko je e ndo konkjan tsje e ndo ti sen sterué e ndo, ko ndachro ndo:

—Nduaxin ntatjunta, xro an ni israelita kuitja chuntiana xranchi xi capitán ji i.

10 Ko tjume e ni nche e ixra ngajin xi capitán ikjan na nchia, ko bikon na xi ni e ko ó tsikoxrue en xa ko íxro an ichin chóna xa.

Ndo Jesús nchexchón ndo xitsi e naa nchri ka an

11 Ko tjume e ndo Jesús sakjui ndo naa tjaña ndatin in Naín, bikao ndo sen teyuu chrikao ndo ko kueya ni konchjiñe e ngajin ndo.

12 Ko nchakon kuiji sen ngande e tjaña me e, ndo Jesús bikon ndo jitika o na naa chujni tsiken en xroxraa, chán me e naa chjen en naa nchri ka an, naakua xjan me e bachóna nchra. Ko tsango itsje ni tjaña jitikao na nchra tsixraa chán.

13 Hora bikon ndo Jesús nchri me e, bikonóe e ndo nchra ko ndachro ndo:

—Ítsjanga ia.

14 Ko tjume e ndo Jesús konchjiñe e ndo ko bake e ndo itja ndo ngata a ntaa jáa chán, ko ni jitikao ntaa chón en na. Ko ndo Jesús ndache ndo chán tsiken en:

—Jan an ntatjua: ¡Chajan tingatjen!

15 Ko tjume e chán tsiken en xendua chán ko bake e chán kojuangínin chán nichja chán, ko jaña ndo Jesús kuajon ndo chán ngajin janée chán.

16 Ko nchakon bikon na jaña kon en, kain na tsango xronka na kojuangínin na kuajon na juasie na ngajin ndo Dio ko ndachro na:

—Ndo Dio xruan an ndo naa ndo nichja chijnie ndo, ndo me e tsango chóna ndo juachaxin.

Ko kaxon ndachro na:

—Ndo Dio kuii ndo tsingijna ndo tjañée ndo.

17 Ko nguixin nunte Judea ko kain tjaña jii ngandajin nunte Judea kono e na nge e jian juinche e ndo Jesús.

Sen xruan an ndo Juan

(Mt. 11:2-19)

18 Sen chrikao ndo Juan beki e sen ndo kain nge e juinche e ndo Jesús ko tjume e kuiye e ndo yuu sen chrikao ndo,

19 ko xruan an ndo sen tsitsje e sen ndo Jesús tsjanchangí e sen ndo á je e ndo ngisen tsii, o á xrochon en sen tsii inaa ngisen.

20 Ko sen xruan an ndo Juan konchjiñe e sen ngajin ndo Jesús, ko ndachro sen:

—Ndo Juan xruan anna ndo tsjanchangi ananta á ja anta ndo Cristo tsii, o xraxrochon anna inaa ngisen tsii.

²¹ Ko nchakon kuiji sen, ndo Jesús juinchexruen en ndo tsango itsjé ni chónnda ichin, ko kuantsje ndo espíritue Xixron anxrée chónnda kaxin na, ko kaxon juinchexruen en ndo itsjé ni tikon a.

²² Méxin, ndo Jesús ndache ndo sen xruan an ndo Juan:

—Itjinta, tindachenta ndo Juan ti bikonta ko ti kuin ennta: ni tikon a, chao tikon na, ko ni ntarengo chao ichrji na, ko ni kuachónnda ichin lepra, jai íxro an ichin chónnda na, ko ni bakien a, chao tin en na, ko ni kuen en, jai xechón na, ko ni nóa kuin en na chijni jian ixi tsachrje ijie chónnda na.

²³ Ko sen xrotjáñe a xrochuntiana, sen me e juaxruxin tsintee sen.

²⁴ Nchakon sakjui sen tsixrua an ndo Juan, ndo Jesús kuaxi ndo ndache ndo kain ni kuitu e nti a kondee ndo Juan, ko ndachro ndo:

—Nchakon ikjuinta ntajie kuitsje enta ndo Juan, ¿xranchi xraxaonnta xrobikonnta ndo? ¿Á bikonta ndo xranchi naa ntatji tjatu o chrinto?

²⁵ ¿Na i, nge e xrobikonnta? ¿Á xrobikonnta naa xi jiá manta tsango tjintee? ¡Na i, je a me e! Ja anta ó no anta ixi ngisen jiá manta tjintee ko chónnda itsjé nge e, ni me e ste na ndo a naa xi rey tetuan an.

²⁶ Méxin, ¿nge e kuitsje enta? ¿Á xrobikonnta naa ngisen chronga chijnie ndo Dio? ¡Jaán, nduaxin me e, ko xi me e ícha chónnda juachaxin ixi sen banichja chijnie ndo Dio sa ó!

²⁷ Ndo Juan me e ngisen kuij xranchi jitaxin xroon chijnie ndo Dio sa ó:
Jan an xroxruan an naa ngisen xrochronga chijnina
ko je e ndo sinchenataonxin ndo cha o,
ko sinchekonchjian ndo cha o ngajinnta.

²⁸ Jan an rintatjonta ixi kain ni kuij sa ó chronga chijnie ndo Dio, xro an ngisen kuachónnda juachaxin xranchi juachaxin chónnda ndo Juan Bautista. Ko maski, ngisen chónnda i itsjé juachaxin ti tetuan an ndo Dio, ícha ijie sen ixi ndo Juan.

²⁹ *Nchakon kuin en na ji i, kain na ko kain xi xenge e i na tsikikite ndo Juan kuitikaon na ixi ndo Dio tsango jian ndo.

³⁰ Ko xi fariseo ko xi tjako ley chro a xa ixi ndo Juan xrobikitée ndo xa, tjaun a xa ti ndo Dio xrobingijna ndo xa.

³¹ Ko ndo Jesús ndachro ndo:

—¿Xranchi tsjakoxin chujni ste jai? ¿Ste na xranchi tsjakoxinni ti nche e chujni?

³² Ste na xranchi ichjan nchínchín take e xjan nunte sondaon xjan ngataon ndasin ko tuyaku e kichuu xjan ko ndachro xjan: “Jan anna kuanoana ntaxro ko ja anta té anta, jan anna itsjena soon ti chónndani juachjaon ko ja anta tsjanga inta.”

³³ Ko kuij ndo Juan Bautista, ko juine a ndo nutja ko kui a ndo xran vino, ko ja anta ndachronta ixi je e ndo chónnda ndo naa espíritue Xixron anxrée.

³⁴ Ko tjume e jui i jan an, Chjen en ndo Dio, xjan jongí e xranchi chujni, ko iné ko ti í, ko ja anta ndachronta ixi jan an tsango iné ko tsango ti í ko tjento kain ni ndako a nche e ko kain xi xenge e i na.

³⁵ Ko ti tsango no e ndo Dio me e tjakoxin chjen en ndo Dio.

Ndo Jesús jii ndo ndo a naa xi fariseo tin in Simón

³⁶ Naa xi fariseo ndache xa ndo Jesús itsji ndo ndo a xa sinekao ndo xa. Ko ndo Jesús ikjui ndo nti a ko bake e ndo ti jii mesa.

³⁷ *Ko tjajna me e jii naa nchri, nchri me e tsango kueya ijie kuachónnda nchra. Ko kono e nchra ixi ndo Jesús kuij ndo sine ndo ndo a xi fariseo me e, ko je e nchra ikjui nchra nti a ko bikao nchra naa xroxrao jichre inda chaxro xraxe tjintee.

³⁸ Ko konchjiñe e nchra ti jii tutée ndo Jesús ko bake exin nchra ntatuchi in nchra ko tsjanga nchra. Méxin, quintjé ndakon nchra tutée ndo Jesús, ko tjume e xrajaa nchra juinchexemaxin nchra tutée ndo, ko kuitoxin nchra tutée ndo, ko tjume e bingamá nchra inda chaxro xraxe tutée ndo.

³⁹ Ko bikon xi fariseo tsikiye e ndo Jesús, ko je e xa xraxaon xa: “Á nduaxin ndo ji i naa ndo chronga chijnie ndo Dio, siá nduaxin me e, je e ndo xrokono e ndo ngisen jinéma ixi ndakon tutée ndo, ko ngisen nchri ji i; xrokono e ndo ixi nchri ji i tsango ndako a nche e nchra.”

⁴⁰ Ko tjume e ndo Jesús ndache ndo xi fariseo:

—Simón, jan an xrontatjua naa nge e.

Ko xi fariseo juate e xa:

—Ndachijiana, Maestro.

⁴¹ Ko ndo Jesús ndachro ndo:

—Bake e yuu xi sínká tomi ngajin naa xi tjatuya tomi. Naa xi sínká na ó ciento tomi, ko naa xi sínká tu o ciento tomi.

⁴² Ko jua i kuintejuenga xa nã. Ko xi tjatuya tomi juinchemé e xa ti sínká kayui xi me e. Ndachro ndo Jesús:

—Jai ndachijiana ja a, ¿ngixe e xi ícha tjue e xi tjatuya tomi?

⁴³ Ko juate e xi Simón ndachro xa:

—Jan an xraxa on ixi xi ícha bikonóe e xa, xi sínká ícha tomi.

Ko ndo Jesús ndachro ndo:

—Jaán, nduaxin.

⁴⁴ Ko ndo Jesús tsje e ndo nchri me e ko ndache ndo xi Simón:

—Tsje é nchri ji i. Jan an kuixin in ndúya ko chjána iana inda tsijmaxin tutéena; ko nchri ji i juinéma nchra tutéena ixi ndakon nchra, ko juinchexemaxin nchra xrajaa nchra.

⁴⁵ Ja a kuitoxin ana ti jui i ndúya, ko je e nchra, xrakuixi in ndúya jititoxin nchra tutéena.

⁴⁶ Ja a bake a ndaxi e ngata a jáana; ko je e nchra bake e nchra inda chaxro xraxe tutéena.

⁴⁷ Méxin, jan an ntatjua ixi ti kueya sínká nchra ó komé e, ko méxin, ícha tjaunna nchra; ko ngisen sinka i ijie, kaxon je a ícha tjaunna nã.

⁴⁸ Ko tjume e ndo Jesús ndache ndo nchri me e:

—Kain ti ndako a juinche e ó komé e.

⁴⁹ Ko kain nã tsikonchjiñe e ti jii ndo Jesús tjenka mesa kuaxi nã ndache kichuu nã:

—¿Ngisen ji i, ixi nchemé e xa ti ijie chóna nã?

⁵⁰ Ko tjume e ndo Jesús ndache ndo nchra:

—Ja a chuntiana ko kuitikaonna, méxin ijie kuachonda komé e ijie; méxin, jai juaxruxin satjia.

8

Nchri bakingijna ndo Jesús

¹ Ko tjume e, ndo Jesús kuaji ndo itsjé tjajna ijié ko itsjé tjajna nchíin kuachronga ndo ixi kuji juachaxien ndo Dio. Ko chrikao ndo sen teyuu kuinche e ndo.

² *Ko kaxon nti a sterué e kaxin nchri tsikantsje e ndo espíritue Xixron anxrée kuachóna nchra ko tsikantsje ndo kain ichin kuachóna nchra. Ko naa nchri me e ndatin in María Magdalena, nchri me e kuantsjexin ndo yaatō espíritue Xixron anxrée.

³ Ko kaxon nti a bake e nchri Juana, janchri e naa xi ndatin in Chuza, xi me e kuanche e xa xrée xi Herodes; ko kaxon nti a bake e nchri Susana ko ikaxin nchri bakingijna nchra ndo Jesús ko kuajon nchra nge e juine sen.

Ndo Jesús tjako ndo xranchi naa xi bikenga trigo ngataon ijngi

(Mt. 13:1-9; Mr. 4:1-9)

⁴ Ko xejo kueya na, kui xin na kueya tjajna ko konchjiñe e na ngajin ndo Jesús. Me e je e ndo beki ndo naa chijni:

⁵ —Naa xi bikenga tsee, ko kaxin tsee kuitsinga ngande e cha o. Ko kuatsinga chujni ko ngatjangi na tsee. Ko kuii kuxe juine ba tsee.

⁶ Ko kaxin tsee kuitsinga ngakjen en ixro ko kuachrje ka, ko bangi a ka ixi xro an itjao* ko inche chóna nue e ka.

⁷ Ko kaxin tsee kuitsinga ti jii ntacha a. Ko ntacha a ícha bangi ntaa. Me e xrabaatja ka ko bangi a tsee.

⁸ Ko ícha tsee kuitsinga ngata a inche jian, me e bangi ka ko itsjé tsee kuajon ka, xranchi naa ciento tsee kuajon ngujngu ka.

Jaña nichja ndo Jesús, ko tjume e séen ndachro ndo:

—Ngisen chao tin en, tsin en sen jian.

Ndo Jesús chronga ndo sonda juako ndo chijni

(Mt. 13:10-17; Mr. 4:10-12)

⁹ Ko sen teyuu chrikao ndo Jesús juanchangi sen:

—¿Nge e xrondachro chijni juako ndo?

¹⁰ Ko je e ndo Jesús ndachro ndo:

—Ja anta kuaye enta juachaxin tsienxinnta ti noa inta, ti tetuan an ndo Dio. Ko chujni kaxin, na i. Méxin, jan an nichjaxin naa chijni, ixi maski tsikon na ko tsin en na, tsienxin a na.

Ndo Jesús ndachro ndo nge e xrondachro ti binga tsee

(Mt. 13:18-23; Mr. 4:13-20)

¹¹ Ko ji i xrondachro chijni ntatjunta: Ti tsee me e chijnie ndo Dio.

¹² Tsee kuitsinga ngande e cha o me e xrondachro ngisen tin en chijnie ndo Dio. Ko Xixron anxrée nchetjáñajin xa na ko titikaon a na, méxin, tsitjáña na.

¹³ Tsee kuitsinga ti jii ixro me e xrondachro ngisen kuin en chijnie ndo Dio ko bake e na juaxruxin, ko sé a kuitikaon na ixi kuii juachjaon ko ngaxiton na.

¹⁴ Tsee kuitsinga ngata a ntacha a me e xrondachro ngisen tin en chijnie ndo Dio ko hora satji na tjáñe e na nge e kuin en na ixi yaa na juachjauen tomi ko ícha tjue e na ti juaxruxin, ko nche a na ti tjaun ndo Dio.

¹⁵ Ko tsee kuitsinga ti inche indá xrondachro ngisen tayé e chijnie ndo Dio ngaxin in aséen na ko titikaon na ti ndachro ndo ko soji tjintee na.

Ndo Jesús juako ndo no tsake e xro i

(Mr. 4:21-25)

¹⁶ *Xro an ngisen tsjaaka naa xro i ko tsake e na xro i chringi naa ichi o chringi ntaa tejuata a na. Xrokonda tsake e na xro i noi ixi kain ni tixin in nchia chao tsikon na ti tingasáña.

¹⁷ *Xro an nge e jimá tsonoxin a, ko xro an nge e imao tsonoa ani inaa nchakon ixi kain nge e tsonoxin ixi xro i.

¹⁸ *Méxin, ja anta tin ennta jian; ngisen ó no e naa nchín, ndo Dio tsingijna ndo tsono e sen ícha, ko ti ngisen xro an no e, ti jixraxaon na ixi no e na kaxon me e tsachrje e na.

Janée ndo Jesús ko xi kichuu ndo

(Mt. 12:46-50; Mr. 3:31-35)

* **8:6** itjao humedad **8:16** Mt. 5:15; Lc. 11:33. **8:17** Mt. 10:26; Lc. 12:2. **8:18** Mt. 25:29; Lc. 19:26.

¹⁹ Tjume e janée ndo Jesús ko kaxin xi kichuu ndo kuiji sen ti jii ndo Jesús, ko jua i konchjiñe e sen ixi tsango itsjé chujni ste nti a.

²⁰ Ko tjume e naa xi kuindache xa ndo Jesús:

—Janáanta ko xi kichuunta ste sen nduja, ko nichja anta sen.

²¹ Ko ndo Jesús ndachro ndo:

—Sen tin en chijnie ndo Dio ko titikaon, sen me e janána ko sen kichian.

Ndo Jesús ícha tituan an ndo

(Mt. 8:23-27; Mr. 4:35-41)

²² Naa nchakon ndo Jesús kuajin in ndo naa ntábarco ko ndache ndo sen teyuu chrikao ndo:

—Tsatsingato ena ndalago.

Ko tjume e sakjui sen.

²³ Ko jitji sen ngataon inda, ko je e ndo kuejua ndo. Ko tuinxin kuji naa chrinto soji ko ntábarco steyá sen kuaxi bikia ntáa inda ko tjaun ntáa xrojамangi ntáa.

²⁴ Ko konchjiñe e sen ti jii ndo ko juinchexingame e sen ndo ko ndache sen ndo:

—¡Maestro, Maestro! ¡Tsen enna ixi xrojамangi ntáa steyána ko xrokjoinna inda!

Ko je e ndo bingatjen ndo ko kuyakutee ndo chrinto ko inda ko tuinxin ndabake e nda.

²⁵ Ko ndo Jesús ndache ndo sen:

—¿Sonda chuntia intana?

Ko je e sen xronka sen ko ndastetsjeko sen ko stendache kichuu sen:

—¿Ngisen ji i ixi tetuen en ndo chrinto soji ko inda, ko je e inda ko chrinto titikaon?

Naa xi jii nunte Gadara

(Mt. 8:28-34; Mr. 5:1-20)

²⁶ Tjume e kuiji sen nunte ndatin in Gadara ti jii tuenxin ndalago ngajinxin nunte Galilea.

²⁷ Ko ndo Jesús xingajinxin ndo ntábarco ko tuinxin naa xi kuachrjexin tjajna nti a konchjiñe e xa ngajin ndo Jesús. Ko xi me e tsango sée kuachóna xa espíritue Xixron anxrée. Ko xro an manta jiá xa, ko je a nchia bake e xa; bake e xa ngakjen en itjao ti bajabaa na ni tsiken en.

²⁸ Hora bikon xa ndo Jesús, bake exin xa ntatuchi in xa ngajin ndo ko kuyako xa ko ndachro xa:

—Jesús, chjen en ndo Dio, ¿sonda nchexronkana? Tjanča ana xro an nchenana.

²⁹ Jaña ndachro xa ixi ndo Jesús tsiketuen en ndo espíritue Xixron anxrée tsachrjexin xa xi me e. Ko ó sée espíritue Xixron anxrée baketuen en xa xi me e ko bakichruaxin na tutée xa ko itja xa ixi nochika, ko je e xa bakonchrindaon xa nochika ko espíritue Xixron anxrée banchekinga xa chrika a ijna ti xro an chujni ste.

³⁰ Ko tjume e ndo Jesús juanchangi e ndo xi me e:

—¿Xranchi ti ian?

Ko je e xi ndachro xa:

—Jan anna ndatin inna Legión.

Jaña ndachro xa ixi tsango itsjé espíritue Xixron anxrée bake e ngaxin in aséen xa.

³¹ Ko kain espíritue Xixron anxrée juanche e ndo Jesús ixi xroxruan a ndo satsji espíritu ti tuye yaso e.

³² Ko ijna nti a steneña itsjé kuchinga, ko kain espíritue Xixron anxrée juanchia ngajin ndo Jesús ixi je e ndo tsajon ndo juachaxin tixin in kain espíritu me e ngaxin in kuchinga. Ko ndo Jesús kuajon ndo juachaxin.

³³ Ko kain espíritue Xixron anxrée kuachrjexin xi me e ko kuixin in ngaxin in kuchinga. Ko kain kuchinga binga ba ko kuitsingangi ba ti yaso e jii ndalago ko kjun en ba inda.

³⁴ Ko kain xi stetsje e xa kuchinga, bikon xa jaña kon en ba, ko je e xa tsango xronka xa ko binga xa kuindache xa ni tjajna nge e kon en ko kaxon kuindache xa ni ste ngataon ijngi.

³⁵ Ko kain ni me e kuij nā kuitsje e nā nge e kon en nti a. Ko hora kuiji nā ti jii ndo Jesús, bikon nā nti a jii xi kuachrjexin kain espíritue Xixron anxrée. Jii xa tjenka tutée ndo Jesús, ko ó jiá xa manta, ko ndako xraxaon xa, ko kain nā xronka nā.

³⁶ Ko kain nā bikon nā nge e kon en nti a ko chronga nā xranchi koxruen en xi bachónda espíritue Xixron anxrée.

³⁷ Méxin, kain ni nunte Gadara juanche e nā ndo Jesús ixi satsjixin ndo nti a, ixi je e nā tsango xronka nā. Méxin, ndo Jesús kuajin in ndo ntabarco ko sakjui ndo.

³⁸ Ko xi kuachrjexin kain espíritue Xixron anxrée kuinóatée xa ixi xrokuajon ndo juachaxin tsikao ndo xa. Ko ndo Jesús kuetuen en ndo xa tsitu e xa, ko ndachro ndo:

³⁹ —Ikjan ndúya, ko teki é nā kain nge e juinche e ndo Dio ngajian.

Ko xi me e sakjui xa ko beki e xa kain nā nguixin tjajna ti juinche e ndo Jesús ngajin xa.

Koxruen en naa xjan nchrichjan ndo ko naa nchri

(Mt. 9:18-26; Mr. 5:21-43)

⁴⁰ Nchakon ikjan ndo Jesús tuenxin ndalago, kain ni ste nti a tsango ché e nā ixi kuiji ndo Jesús, ixi kain nā stechón en nā ndo.

⁴¹ Ko tjume e kuij naa xi ndatin in Jairo, xi me e baketuan an xa ni ngo judío nti a. Bake exin xa ntatuchi in xa ngajin ndo Jesús ko kuinóatée xa ngajin ndo ixi xrokjui ndo ndo a xa

⁴² ixi xjanrichje en xa, xjan naakuaxon chónnda xa, chónnda xjan teyuu nano ko jite en xjan. Ko tjume e ndo Jesús sakjui ndo ndo a xi Jairo ko tsango itsjé nā rué e nā ndo ko kuixintja nā ndo Jesús.

⁴³ Ko ngakjen en kain chujni me e nti a konchjiñe e naa nchri bani e nchra, teyuu nano níexin nchra jnié nchra, ko juinchexienxin nchra kain ti bachónnda nchra ngajin xi nchexruan, ko ninaa xinhexruan jua i juinchexruen en nchra.

⁴⁴ Nchri me e konchjiñe e nchra tuenxin ndo Jesús ko itsé nchra ngande e mantoe ndo ko tuinxin kuíxin jnié nchra.

⁴⁵ Ko ndo Jesús juanchangi ndo:

—¿Ngisen itséna?

Ko kain nā ndachro nā ixi xro an ngisen itsé ndo. Méxin, ndo Pedro ko kain sen jitikao ndo ndachro sen:

—Maestro, kueya nā ste nā ngandajian ko sinteeto nā, méxin, ¿sonda tjanchangia ngisen itsé?

⁴⁶ Ko ndo Jesús ndachro ndo:

—Xrojan ngisen itséna, ixi konóna juachaxin kuachrjexinna ixi koxruenxin naa ngisen.

⁴⁷ Ko nchri me e bikon nchra kono e ndo Jesús, ko konchjiñe e nchra ti jii ndo ko jixranga nchra ko xrakon nchra, ko bake exin ntatuchi in nchra tutée ndo Jesús. Ko ngatoxin[†] ikon kain ni ste nti a ndachro nchra xranchi itsé nchra mantoe ndo Jesús ko xranchi tuinxin koxruen en nchra.

⁴⁸ Ko tjume e ndo Jesús ndache ndo nchra:

—Ja a koxruan an ixi chuntiana. Jai juaxruxin satjia.

⁴⁹ Xrajnichja ndo Jesús, kuij naa ngisen kuixin ndo a xi Jairo, xi baketuan an ni ngo nti a; ko ndache nā xa:

—Chjan an ó kuen en xjan; ítajon a ixra ngajin ndo maestro.

⁵⁰ Ko tjume e kuin en ndo Jesús, ko ndache ndo xi Jairo:

—Xronka ia; je o titikáoanna, chjan an tsoxrue en xjan.

[†] 8:47 *ngatoxin* delante de

⁵¹ Ko ti kuiji sen ndo a xi Jairo, ndo Jesús kuachrendaka o ndo, ndo Pedro ko ndo Jacobo, ko ndo Juan, kuixin in sen nchia ko kao ndotée ko janée xjanchrichjan.

⁵² Ko kain ni ste nti a stetsjanga n̄ ko yaxin n̄ xjan juachjaon. Ko ndo Jesús ndache ndo n̄:

—Tsjanga inta; xjanchrichjan tsiken a xjan; je o jijua xjan.

⁵³ Ko je e n̄ juanoa n̄ ndo Jesús, ixi kain n̄ no e n̄ kuen en xjan.

⁵⁴ Ko tjume e ndo Jesús itsé ndo itja xjan ko séen ndachro ndo:

—Ja a xjanchrichjan, tingatjen.

⁵⁵ Ko je e xjan xechón xjan íjngo, ko tuinxin bingatjen xjan. Ko ndo Jesús kuetuan an ndo xrochjée sen xjan sine xjan.

⁵⁶ Ko janée xjan ko ndotée xjan tsango xrakon sen, ko ndo Jesús kuetuen en ndo n̄ ixi xro an ngisen tseki e n̄ jaña kon en.

9

Ndo Jesús xruan an ndo teyuu sen chrikao ndo ixi itsji sen xrochronga sen chijnie ndo Dio

(Mt. 10:5-15; Mr. 6:7-13)

¹ Ko tjume e ndo Jesús kuetuan an ndo tsonchjiñe e sen teyuu chrikao ndo, ko kuajon ndo juachaxin ixi chao tsantsje sen kain espíritue Xixron anxrée chóna n̄, ko sinchexrjuen en sen ni ni e.

² Ko kuetuan an ndo satsji sen sinchekuen en sen n̄ kondee juachaxin tetuan an ndo Dio ko sinchexrjuen en sen ni ni e.

³ Ko ndachro ndo:

—Xro an nge e tiku unta ti tsaanta cha o, tiku inta ntakuto, tiku inta puxa, nutja, tomi ko tiku inta yuu manta, je o manta rianta.

⁴ Ko nchakon tsjasonta xrojan nchia tsixin innta ko tsitu anta nti a tsijija nchakon satsjixinnta tjajna me e.

⁵*Siá tsjasonta xrojan tjajna ko tsajon a n̄ juachaxin tsinteenta nti a, ja anta tachrjexinnta tjajna me e, ko tontsjenganta inche yaa tutáanta, me e tsjakoxinnta ixi ndo Dio tsjankata a ndo ijie ngajin ni tjajna me e.

⁶ Ko tjume e sakjui sen kain tjajna nchínchín, ko ndache sen n̄ chijni jian xranchi ndo Dio tsantsje ijie chóna n̄ ko juinchexruen en sen ni ni e.

Kuen en ndo Juan Bautista

(Mt. 14:1-12; Mr. 6:14-29)

⁷*Xi Herodes, xi kuetuan an nti a, kono e xa kain nge e jian banche e ndo Jesús, ko je e xa tsango xronka xa, noe a xa nge e xraxaon xa ixi kaxin n̄ ndachro n̄ ixi ó tsixechón xi Juan Bautista.

⁸ Ko ikaxin n̄ ndachro n̄ ixi ndo kuachronga chijnie ndo Dio ó sa ó, ndo Elías, konoxin íjngo, ko ikaxin n̄ ndachro n̄ ixi inaa ndo kuachronga chijnie ndo Dio kuij ícha sa ó, ko jai xechón ndo íjngo.

⁹ Ko ndachro xi Herodes:

—Jan an kuetuan an chrinjin jaa xi Juan; méxin, ¿ngisen xi ji i ixi kuin an tsango itsjé nge e jian nche e xa?

Ko xi Herodes tsango tjaun xa xrokuitsje e xa ndo Jesús.

Ndo Jesús kuajon ndo nge e juine na ó mil xi

(Mt. 14:13-21; Mr. 6:30-44; Jn. 6:1-14)

¹⁰ Ko tjume e ikjan sen xruan an ndo Jesús ko beki e sen ndo kain ti juinche e sen. Ko tjume e ndo Jesús sabikao ndo sen ti xro an ngisen ste, tjenka tjajna Betsaida.

¹¹ Ko hora kono e na no jii ndo ko je e na rué e na ndo, ko ndo Jesús kuajon ndo juachaxin kuitu e na nti a. Ko chronga ndo kondee juachaxin tetuan an ndo Dio ko juinchexruen en ndo kain ni ni e.

¹² Ko ó kóndo, konchjiñe e sen teyuu chrikao ndo, ko ndachro sen:

—Ndachenta kain na ixi satsji na kaxin tjanya tjenka nti i, tse na na ti sine na ko tsjoké e na ixi nti i xro an nge e jii.

¹³ Ko ndo Jesús ndache ndo sen:

—Ja anta tájonnta nge e sine na.

Ko je e sen ndachro sen:

—Xro an nge e chondana, je o chondana na ó nutja ko yuu kuchee, ¿á tjaunnta ixi tsike nana nge e sine kain na?

¹⁴ Ixi kain ni me e, je o ni xi xranchi na ó mil chujni. Ko ndache ndo Jesús sen teyuu chrikao ndo:

—Ndachenta na tsintee na nunte, ngujngu yuukante na.

¹⁵ Ko jaña juinche e sen ko kuintee na nunte kain na.

¹⁶ Ko tjume e ndo Jesús kua ndo na ó nutja ko yuu kuchee ko tsje e ndo ngajní, ko kuajon ndo juasie ndo ngajin ndo Dio. Ko konchrijin ndo nutja ko kuchee ko chjée ndo sen teyuu chrikao ndo. Ko je e sen konchjeya sen nutja ko kuchee, kuayé e kain ni ste nti a.

¹⁷ Ko kain na juine na ko kaon na jian, ko juexin juine kain na, sen teyuu chrikao ndo Jesús juejo sen teyuu ntaxra tutu o nutja tsixe e.

Ndo Pedro ndachro ndo ixi ndo Jesús ndo Cristo

(Mt. 16:13-19; Mr. 8:27-29)

¹⁸ Naa nchakon ndo Jesús tsikachrjendáa ndo ko kuinichje e ndo ndo Dio, ko jikao ndo sen teyuu chrikao ndo, ko je e ndo juanchangi e ndo sen:

—¿Nge e ndachro chujni, ngisen jan an?

¹⁹ *Ko je e sen ndachro sen:

—Kaxin na ndachro na ixi ja anta ndo Juan Bautista; ko ikaxin na ndachro na ixi ja anta ndo profeta Elías; ko ícha na ndachro na ixi ja anta naa sen profeta tsixechón.

²⁰ *Ko tjume e ndo Jesús juanchangi e ndo sen:

—Ko ja anta, ¿nge e ndachronta, ngisen jan an?

Ko ndo Pedro ndachro ndo:

—Ja anta ndo Cristo, chjen en ndo Dio.

Ndo Jesús ndachro ndo ixi je e ndo tsen en ndo

(Mt. 16:20-28; Mr. 8:30–9:1)

²¹ Ko ndo Jesús tsango kuetuen en ndo sen ixi xro an chujni xrondache sen ngisen je e ndo.

²² Ko tjume e ndo Jesús ndache ndo sen:

—Jan an, chjen en ndo Dio, xjan jongí e xranchi chujni, xrokonda tsango tangi sinchena na, ko kain xi tetuan an ni ngo, ko kain xitaana tetuan an ko kain xi tjako ley, tsoñaona na. Ko naatsóñaxónna na, ko nchakon nínxin xroxechónna íjngo.

²³ *Juexin ndachro ndo ji i, ndache ndo kain ni ste nti a:

—Síá xrojan ngisen xorrua na, xrokonda tsintu e sen ti ícha tjue e sen ko xorrua na sen kain nchakon, maski tangi tson en sen.

²⁴ *Ko ni tjaun xro an tson en, sinchetjáña aséen na; ko ngisen tsen en ixi titikaonna sen, sen me e tsechón sen kain nchakon.

²⁵ ¿Nge e tsjacha na síá xrochónna na kain nge e jii ngata a nunte ko sinchetjáña na aséen na?

²⁶ Méxin, ngisen tosue e ixi titikaonna sen ko chijni nichja, kaxon jan an, Chjen en ndo Dio, xjan jongí e xranchi chujni, xrondachrjan ixi chúxin a sen nchakon tsikian ijié juachaxin ko chjiixro chóna Ndotána ko kain ángel ne e ndo.

²⁷ Nduaxin ntatjunta ixi kaxin ni ste nti i jai, xratsen a na tsikonja na juachaxien ndo Dio.

Kuindoxin xranchi tsje e ndo Jesús

(Mt. 17:1-8; Mr. 9:2-8)

²⁸ Kuatsinga ijní nchakon ti ndachro ndo Jesús kain ji i, ko tjume e je e ndo kuajin in ndo naa ijna ixi xronichje e ndo ndo Dio ko bikao ndo ndo Pedro ko ndo Jacobo ko ndo Juan.

²⁹ Ko hora jinichje e ndo Jesús ndo Dio, ngayakon ndo Jesús kuindoxin ko ti jitsáa ndo ikjan xranchi chjiixro ixi tsango tóngixin.

³⁰ Ko tjume e konoxin yuu sen stetjao ndo Jesús, ko sen me e ndo Moisés ko ndo Elías.

³¹ Ko nguixin ngandajin ti ste sen tsango chaxro bingasáña ko stetjao sen xranchi tson en ndo Jesús ko xranchi tsen en ndo tajna Jerusalén.

³² Ko maski ndo Pedro ko sen stekao ndo tsango chjée sen kotachrin, je e sen stetsje e sen ko bikon sen juachaxin chóna ndo Jesús, ko bikon sen sen yuu jikao ndo.

³³ Ko hora saxrokjui sen, ndo Pedro ndache ndo ndo Jesús:

—Maestro, jian stena nti i. Sintáñana ní tsa on nchíin; naa tsa on ja anta, ko naa tsa on ndo Moisés, ko naa tsa on ndo Elías.

Ko ndo Pedro noe a ndo nge e ndachro ndo.

³⁴ Ko xrajnichja ndo kuii naa itjui kuitsía sen ko xrakon sen ixi kuitu e sen ngakjen en itjui.

³⁵ *Ko tjume e ngakjen en itjui me e kuin en sen naa ngisen ndachro:

—Ji i chjan na tsango tjua a. Tin ennta ti ndachro xjan.

³⁶ Juexin nichja ndo Dio, bikon sen ndo Jesús je o ndo jii ndo nti a. Ko je e sen tenko sen, ko xro an ngisen beki e sen nge e bikon sen.

Ndo Jesús juinchexruen en ndo naa chajan

(Mt. 17:14-21; Mr. 9:14-29)

³⁷ Ndúyaxin ti xingajinxin sen ijna, tsango itsjé na jichón en na ndo Jesús ngatja cha o.

³⁸ Ko naa xi jii ngakjen en ni me e nichja xa ko ndache xa ndo Jesús:

—Maestro, tinóatána ixi tikitsje enta chjan na ixi naakua xjan chonda ko ni e xjan.

³⁹ Chóna xjan espíritue Xixron anxrée ko itsé xa xjan ko nchekoyako xa xjan, ko titsinga xjan ko tuchrjo ti xin ro a xjan. Tsango ncheni e xa xjan ko tsango chrjen tajanda xa xjan.

⁴⁰ Jan an ó kuinóatána ngajin sen chrjiku unta ixi xrokuantsje sen espíritu, ko jua i kuantsje sen.

⁴¹ Ko ndo Jesús ndachro ndo:

—Ja anta chuntia intana ko titikaon anta! ¿Ti ngisa xrokonda tsake e ngajinnta ko sintakuan annta? Tikuunta chán nti i.

⁴² Ti konchjiñe e chán ti jii ndo Jesús, espíritue Xixron anxrée me e juinchekuendaa chán, ko juanka chán ngata a nunte. Ko ndo Jesús kuyakutee ndo espíritu, ko me e kuachrje espíritu ña i ko koxruen en chán ko ndo Jesús kuajon ndo chán ngajin ndotée chán.

⁴³ Ko kain ni ste nti a tsango xronka na ixi bikon na juachaxin ijié chóna ndo Dio.

Ndo Jesús íjngo chronga ndo tsen en ndo

(Mt. 17:22-23; Mr. 9:30-32)

Kain na xrastexronka na ixi ixra ijié juinche e ndo Jesús, ko tjume e je e ndo ndache ndo sen teyuu chrikao ndo:

⁴⁴ —Tin ennta jian ti xrontatjunta, ko tjáña inta. Chujni xrotséna na jan an, chjen en ndo Dio, xjan jongí e xranchi chujni, tsikaanna na ti jii xi ña i.

⁴⁵ Ko je e sen kuienxin a sen nge e ndachro ndo, ixi xrakuajon a ndo Dio juachaxin xrokuienxin sen. Ko je e sen xrakon sen ko í juanchangíe a sen ndo nge e xrondachro ti ndachro ndo.

¿Ngisen ícha tetuan an?

(Mt. 18:1-5; Mr. 9:33-37)

⁴⁶ *Ko tjume e sen teyuu chrikao ndo Jesús, juangíxin sen juao kichuu sen ixi ngisen ti je e sen ícha tetuan an.

⁴⁷ Ko ndo Jesús kono e ndo nge e xraxaon sen. Ko tjume e joa ndo naa chjan ko bake e ndo xjan tjenka ndo,

⁴⁸ *ko ndache ndo sen:

—Ngisen tsayé e ichjan ji i ixi titikaonna sen; sen me e tayé e sen jan an kaxon. Ko ngisen tsayé ena jan an, kaxon tsayé e ngisen xruan anna. Méxin, ngisen ícha tjinte a ngakjen ennta, sen me e ícha tjintee sen ti tetuan an ndo Dio.

Chujni je a ningakoína, ni me e tsingijnana ixra ntu una

(Mr. 9:38-40)

⁴⁹ Ko tjume e ndo Juan ndache ndo ndo Jesús:

—Maestro, jan anna bikona naa xi ixi juachaxiannta jitantsje xa espíritue Xixron anxrée; ko jan anna ntatjanna xa ixi ísinche a xa jaña, ixi je e xa chrjiko iana xa.

⁵⁰ Ko ndachro ndo Jesús:

—Tingakuen anta ni me e, ixi ni ningakona ina, je e na tsingijnanta na.

Ndo Jesús kuyakutee ndo ndo Jacobo ko ndo Juan

⁵¹ Ko tjume e konchjiñe e nchakon satsji ndo Jesús nio ti jii ndotée ndo, ko xraxaon ndo itsji ndo tjajna Jerusalén.

⁵² Je e ndo xruan an ndo kaxin sen kuitaonxin sen cha o sa ó, ko sen me e ikjui sen naa tjajna nunte Samaria bijée sen naa nchia ti tsjoké e ndo Jesús ko kao je e sen.

⁵³ Ko ni samaritano jua i kuajon na juachaxin nti a ixi ó no e na ixi ndo Jesús satji ndo tjajna Jerusalén.

⁵⁴ Hora kono e ndo Jacobo ko ndo Juan ixi ni samaritano jua i tsajon na juachaxin, je e sen ndache sen ndo Jesús:

—¿Nchána, á tjaunnta ixi tsjanchiana xroxingajinxin xro i ngajní sinchetjáña kain ni me e xranchi juinche e ndo profeta Elías ó sa ó?

⁵⁵ Ko tjume e ndo Jesús ngatjia tsje e ndo sen, ko kuyakutee ndo sen, ko ndachro ndo:

—Ja anta noa inta ngixe e espíritu chondanta.

⁵⁶ Ixi jan an, chjen en ndo Dio, xjan jongí e xranchi chujni, jui a ixi sintatjáña chujni. Na i. Jan an jui i ixi tsantsjen ijié chóna na ixi tsehón na kain nchakon.

Ko tjume e sakjui sen inaa tjajna.

Ngisen tjaun xrorué e ndo Jesús

(Mt. 8:19-22)

⁵⁷ Nchakon stetji sen ngatja cha o, naa xi ndache xa ndo Jesús:

—Jan an tja on xrorua anta nguixin ti no satsjinta.

⁵⁸ Ko ndo Jesús ndache ndo xi me e:

—Kain kutuunta chóna ba tjaue tixin in ba, ko kain kuxe chóna ba kakée ba, ko jan an, chjen en ndo Dio, xjan jongí e xranchi chujni, chonda i ti no tsarichrin.

⁵⁹ Ko íjngo ndo Jesús ndache ndo xi me e:

—Ja a rua nana.

Ko xi me e juate e xa ndachro xa:

—Tájonnta juachaxin tsijabaja ndotána.

⁶⁰ Ko juatingíexin ndo Jesús ndachro ndo:

—Tintu enta chujni tsiken en tsjabaa kichuu na; ko ja anta itjia ko ndachenta chujni xranchi jii juachaxin tetuan an ndo Dio.

⁶¹ Ko tjume e inaa xi ndache xa ndo Jesús:

—Jan an tja on xrorua anta; tintunanta xrontatjan sen nía.

⁶² Ko ndachro ndo Jesús:

—Ngisen teka ninge, ko ikjan sen tsje e sen, sen me e jua i sinche e ixra ti tetuan an ndo Dio.

10

Ndo Jesús xruan an ndo setenta chujni

¹ Tjume e ndo Jesús kuinche e ndo níkán ko te chujni, ko je e ndo xruan an ndo sen, yuyu sen, tsitaon sen satsji sen kain tjajna ko nguixin ti no tjaun ndo xrokjui ndo.

² *Ko ndachro ndo:

—Nduaxin ntatjunta, ícha tsikoña noa jai, ko sen sinche e ixra tsje a sen. Méxin tinóatáanta ngajin nchée nunte xroxruan an ndo itsje sen sinche e ixra.

³ *Satjinta ixi jan an xruan annta itsjinta xranchi kutuchjon ngakjen en kundanaxra.

⁴ Tiku inta bolsa, tomi, kate ko xro an ngisen chje énta juajna ngatja cha o.

⁵ Ti tsjasonta naa nchia, sa ó tájonnta juajna ko ndachronta: “Juaxruxin tsake e ni ste nchia ji i.”

⁶ Ko siá xrojan ni nchia tikinixin tsayé e na juaxruxin, me e ícha juaxruxin tsayé e na xranchi ndachronta; ko siá na i, juaxruxin me e xrokjan ngajinnta.

⁷ *Ti tsjasonta naa tjajna, tituan anta je o naakua nchia ko intenta ko tin innta ti xrotjáanta ni nchia me e, ixi ngisen nche e ixra tikinixin xroxenge e na i na. Ko tji anta naa ko inaa nchia.

⁸ Ti tsjasonta naa tjajna ko ni ste nti a jian tsiya anta na, intenta kain nge e xrotjáanta na.

⁹ Nchexrue ennta ni ni e ste tjajna me e, ko ndachenta na: “Í kjín a jitij juachaxin tsetuan an ndo Dio.”

¹⁰ *Ko siá tsjasonta naa tjajna ko tsaya inta na jian, ja anta tachrjenta cha o ko ndachronta:

¹¹ *Inche tjajnánta itsé tuténana, tontsjengana ixi tsjakoxinna ixi ja anta ko jan anna chonda ina nge e xrotsje ena ixi ja anta kuitikaon anta ndo. Ko tono anta ixi juachaxin tetuanxin ndo Dio ó kjín a jii juachaxin.”

¹² *Jan an ntatjunta nchakon tsjexin nunte xasintajni ícha tangi tson en ni tjajna me e ixi nge e kon en ni tjajna Sodoma ó sée.

Kaxin tjajna kuitikaon a

(Mt. 11:20-24)

¹³ 'iTsango tangi tson annta ja anta ni tjajna Corazín! iKo tsango tangi tson annta ja anta, ni tjajna Betsaida! Ixi siá ti ijié nge e junta a ngajinnta nti i xrokon en ngajin ni tjajna Tiro ko tjajna Sidón, ni me e ó sée xrokuindoxin na ti ndako a juinche e na ko xrotsjanga na. Ko xrokueya na manta tiie ko xrobake e na ntesoki i ngata a jaa na.

¹⁴ Méxin nchakon tsjexin nunte nti i, ícha tangi tson annta ja anta ixi ti tson en ni tjajna Tiro ko tjajna Sidón.

15 Ko ja anta tjajna Capernaum, ¿á xraxaonnta itsjinta ti jii ndo Dio? Na i, je a jaña tson en, ja anta xroxingajinnta ti jii xro i xrochexin chujni titikaon a.

16 *Ko ndachro ndo Jesús:

—Ngisen tsitikaon ti xrondachro ja anta, kaxon tsitikaonna na jan an. Ko ngisen tsitikaon a ti xrondachrona, kaxon tsitikaon ana na. Ko chujni tsitikaon a na jan an, kaxon tsitikaon a na ngisen xruan anna jui i.

Ikjan sen setenta

17 Tjume e ikjan sen níkan ko te chujni ko tsango juaxruxin ste sen, ko ndachro sen:

—Ncháanana, kain espíritue Xixron anxrée titikaonna hora nichjana ixi juachaxiannta.

18 Ko ndachro ndo Jesús:

—Jaán, jan an bikon xranchi xingajinxin Xixron anxrée ngajní xranchi naa tóngíxin.

19 Jan an tjá anta juachaxin tsingatanginta kunchee ko kulantajoon, ko tsixinte anta ti ña i, ko xro an nge e tson annta.

20 Ko take anta juaxruxin ixi espíritue Xixron anxrée titikaon ngajinnta. Ícha juaxruxin tinteenta ixi xranchi tin innta ó jitaxin ngajní.

Ndo Jesús nichja ndo ngajin ndotée ndo jii ngajní

(Mt. 11:25-27; 13:16-17)

21 Ko hora me e Espíritue ndo Dio kuajon ngajin ndo Jesús juaxruxin ko ché e ndo nichje e ndo ndotée ndo jii ngajní ko ndachro ndo:

—Tajon juasaya ngajin ja anta Ndotána, Nchée nunte ko ngajní, ixi kuajonnta juachaxin ixi ngisen noe a xrokuienxin na nge e kondee ngajní ko juinchenoe anta ni tsango no e ko ni tsango tienxin. Jaña, juinche e ja anta Ndotána ixi jaña tjaunnta.

22 *Ko nichje e ndo sen nti a ko ndachro ndo:

—Ndotána chjána juachaxin ixi tetuan an kain nge e. Xro an ngisen no e ngisen chjen en je e ndo. Je o Ndotána chúxin ndo ngisen chjen en ndo. Ko xro an ngisen chúxin ngisen je e ndo, je o chjen en ndo, ko jan an tincha a ngisen tjaun xrochuxin Ndotána.

23 Ko tjume e ndo Jesús tsje e ndo sen teyuu chrikao ndo ko je o sen ndache ndo sen:

—Juaxruxin ste ni bikonxin ixi ikon nge e bikon ja anta.

24 Ntatjunta ixi itsjé sen kuanichja sen chijnie ndo Dio ko itsjé sen rey tjaun sen xrobikon sen ti bikonta, ko bikon a sen. Ko tjaun sen xrokuin en sen xranchi ritin ennta jai, ko kuien a sen.

Ndo Jesús tjako ndo ti junche e xi tjajna Samaria

25 *Ko tjume e naa xi tjako ley tjajna Israel bingatjen xa nichje e xa ndo Jesús ixi tjaun xa tsono e xa á nduaxin no e ndo Jesús, ko juanchangi xa ndachro xa:

—Maestro, ¿inge e sinta a jan an ixi tsarichón kain nchakon?

26 Ko ndachro ndo Jesús:

—¿Nge e jitaxin chijnie ndo Dio? ¿Nge e tienxian?

27 Ko je e xa ndachro xa:

—Ley ndachro: “Tjue enta Ncháanta ndo Dio ixi nchijí asáanta, ko nchijí ja anta ko nchijí ti xraxaonxinnta; ko tjue enta ni kichuunta xranchi tjue enta asáanta.”

28 Ko tjume e ndo Jesús ndachro ndo:

—Chao ndachrua. Siá ja a sinche e ji i, tsechón asáan kain nchakon.

29 Ko xi tjako ley tjaun xa xrojuakoxin xa ixi ícha jian no e xa, méxin ndache xa ndo Jesús íjngo:

—¿Ngisen ni kichuuna?

30 Ko tjume e ndachro ndo Jesús:

—Naa xi kuixin xa tjajna Jerusalén jitji xa tjajna Jericó, ko ngatja cha o bingakon en xa kaxin xiche e, ko kue e na xa kain nge e chóna xa ko kain ti jitsáa xa, ko juaya na ngajin xa, xranaáxrokónaxón na xa. Ko tjume e sakjui na.

³¹ Ko tjume e naa xitaana judío jitji xa xraje o cha o, ko bikon xa jitsinga xi me e, ko xitaana konchjino xa ko sakjui xa.

³² Ko kaxon no nti a jitatsinga naa xi levita, ko bikon xa xi jitsinga, ko kaxon konchjino xa.

³³ Ko kaxon nti a jitji naa xi kuixin nunte Samaria, ko bikon xa jitsinga xi judío, ko je e xa bikonóe e xa xi me e.

³⁴ Ko konchjiñe e xa tjenka xa, ko juinhexruen en xa ixí aceite ko vino kain ti no tsikoni e xa, ko kuetsía xa jian ti no tsikoni e. Ko tjume e juinheketa a xa xi kuntajnoé xa ko sabikao xa xi ni e naa nchia tjokéexin na, ko nti a je e xa kuayakon en xa xi ni e.

³⁵ Ko nchakon sakjui xa, kuantsje xa yuu tomi ko juenga xa i na ngajin xi ndo a, ko ndachro xa: “Tayakon én xi ji i, ko siá sinchexienxian ícha tomi ixí je e xa, jan an tsjenga a na nchakon xrokjanna.”

³⁶ Méxin ndachijiana, ¿ngisen ti ní xi ji i nduaxin tjue e xa xi juincheni e xiche e?

³⁷ Ko xi tjako ley ndachro xa:

—Xi bikonóe e xi ni e.

Ko tjume e ndachro ndo Jesús:

—Méxin ja a kaxon itjia ko nche e jaña.

Ndo Jesús ikjui ndo ndo a jan Marta ko jan María

³⁸ *Tjume e ndo Jesús sakjui ndo, ko kuiji ndo naa tjajna nchíin. Nti a jii naa jan ndatin in Marta ko kuajon jan juachaxin kuitu e ndo ndo a jan.

³⁹ Ko je e jan Marta chóna jan naa jan kichuu jan ndatin in María. Ko je e jan María bake e jan tjenka tutée ndo Jesús stetin en jan nge e jindachro ndo.

⁴⁰ Ko jan Marta tsango xraxaon jan sinchekonchjian jan nge e sine sen ko chóna jan itsjé xra, méxin konchjiñe e jan ngajin ndo Jesús ko ndachro jan:

—¿Nchána, á xraxaon a ixí jan kichuuna tintuna jan jan on rinta a kain ixra? Ndache jan tsingijnana jan.

⁴¹ Ko ndo Jesús ndache ndo jan Marta:

—Marta, Marta, ja anta tsango yaanta juachjaon ixí kain ixra chondanta,

⁴² ko jii naakua nge e tsango tjintee. Ko jan María kuitja jan nge e ícha jian, ko xro an ngisen tsantsje e jan ji i.

11

Ndo Jesús juako ndo xranchi xronichje eni ndo Dio

(Mt. 6:9-15; 7:7-11)

¹ Naa nchakon ndo Jesús jinichje e ndo ndotée ndo, ndo Dio, ko juexin nichja ndo, tjume e naa sen chrikao ndo ndachro sen:

—Nchána, nchekuannaninta xranchi xronichja ana ndo Dio xranchi ndo Juan juako e ndo chujnie ndo.

² Ko ndachro ndo Jesús:

—Nchakon nichje enta ndo Dio, ndachronta:

Ndotáina Dio ritjennta ngajní,
tsango tjúá ja anta.

Ja anta tetuan annta ngajinna.

Nche enta xranchi tjaunnta ngata a nunte nti i, xranchi nche enta ngajní.

³ Ko ja anta tájonnta nutja sinena kain nchakon.

⁴ Ko nchemé enta kain ti ndako a nta ana,

xranchi jan anna tjáñanana ti ndako a juinchenana na.

Tájon anta juachaxin ngajin Xixron anxrée ixi sinche e xa tsitexinna ti ndako a.

⁵ Ko kaxon ndachro ndo Jesús:

—Take kona ixi naa ja anta chondanta naa xi tjentonta, ko ngusine tiie xrokjuinta ndo a xa ko xrondachenta xa: “Amigo, nchekjenna níi nutja,

⁶ ixi kuij naa xi chúxin, kuixin xa ikjín, ko kuiji xa nía ko jan an xro an chonda xrotjá a xa.”

⁷ Ko siá tsjate e xi jii ngaxin in nchia xrondachro xa: “Chjánai ana ixra; ó jije e nchia ko chjan na ko jan an ó tsintehrina; jua i tsaya xrotjá a nge e.”

⁸ Ko ntatjunta siá chro a xa tsaya xa xrotjáanta xa nge e tjaunnta maski tjentonta xa, tsaya xa xrotjáanta xa kain nge e xrokonda anta ixi ítjaun a xa ícha xrokuiye enta xa.

⁹ Méxin, jan an ntatjunta: Tjanchianta ko ndo Dio tsajon ndo; tjéenta nge e ko tsinchíinta; tinganta ntachja, ko tsantje e ndo.

¹⁰ Ixi ngisen tjanchia nge e, tsayé e sen; ko ngisen tjée, sen me e tsitja sen; ko ngisen tinga ntachja, xitje e ntachja.

¹¹ ¿Á xrojan ja anta chondanta chjan anta ko tjanchia xjan nutja, á xrochje énta xjan naa ixro? O, ¿tjanchia xjan kuche e ko xrochje énta xjan naa kunchee?

¹² ¿O tjanchia xjan joja ko xrochje énta xjan naa kuntanchia?

¹³ Méxin, siá ja anta maski jian inta no anta chje énta chjan anta nge e jian, ícha Ndotáina ndo Dio jii ngajní tsajon ndo Espíritue ndo ngajin sen tsjanche e ndo!

Ndachro na ixi ndo Jesús chóna ndo juachaxien Xixron anxrée

(Mt. 12:22-30; Mr. 3:19-27)

¹⁴ Naa nchakon ndo Jesús kuantsje ndo naa espíritue Xixron anxrée tsijinchenosin naa xi. Ko hora kuachrje espíritue Xixron anxrée, je e xi chao nichja xa. Tjume e kueya ni ste nti a xronka na ixi jaña juinche e ndo Jesús.

¹⁵ *Ko kaxin na ndachro na:

—Xi ji in tantsje xa espíritue Xixron anxrée ixi chóna xa juachaxien Beelzebú, me e Xixron anxrée, xi tetuen en kain espíritu ña i.

¹⁶ *Ko ikaxin na tjaunna na xrotsje e na á nduaxin no e ndo Jesús, méxin juanche e na ndo xrojuinche e ndo naa ixra ijié ixi juachaxien ndo Dio jii ngajní.

¹⁷ Ko je e ndo no e ndo nge e stexraxaon na, ko ndachro ndo:

—Xrojan tjajna je a naxraje o xraxaon ni tjajna me e ko tē tō kichuu na, ndatsitjáña, ko ni ste naa nchia, siá je a naxraje o xraxaon na, kaxon jua i tsintee na.

¹⁸ Jaña kaxon, siá Xixron anxrée tetōka o xa ni kichuu xa, tsitjáña juachaxin chóna xa. Ja in ndachrjan, ixi ja anta ndachronta ixi jan an tantsjexin espíritue Xixron anxrée ixi juachaxien xa.

¹⁹ Ko siá jaña xrokjui, ¿ngisen chjée ni chrjiku u ja anta juachaxin tsantsje na espíritu ña i? Méxin, je e na xrondachro na ndako a jii nge e stexraxaonnta.

²⁰ Ko siá jan an tantsjexin espíritue Xixron anxrée juachaxien ndo Dio, me e xrondachro ixi ti tetuan an ndo Dio ó kuij ngajinnta.

²¹ Nchakon naa xi tsanga yaa xa ntatjo ko jindaa xa ndo a xa, xro an nge e tsitjáña.

²² Ko nchakon tij inaa xi ícha tsanga ko tsetōka o xa xi nchée nchia ko tsjacha xa, ko tsantsje e xa kain chika yama xi ndo a, ko satsjikao xa kain nge e chóna xi ndo a ko tsonchjeya ngajin ni chúxin xa.

²³ *Ngisen titikaon ana jan an, ni me e ningakonna; ko ngisen tingijna i ixra nta a, ni me e tingakon enna.

Naa espíritue Xixron anxrée íjngo ikjan

(Mt. 12:43-45)

²⁴ 'Ko naa espíritue Xixron anxrée kuachrjexin aséen naa chujni, satji ti jii nunte xema tijée no tsjoké e. Ko kuitja i ti no tsjokéexin, je e espíritu jixraxaon: "Jan an xrokjanna nía ti kuachrjexin."

²⁵ Ko nchakon ikjan espíritue Xixron anxrée, tjume e tixin in aséen chujni ti kuachrjexin, ixi bikon xa ni me e ste n̄ xranchi naa nchia tsikajon n̄ ko chaxro tsje e.

²⁶ Ko tjume e espíritue Xixron anxrée tirué e yaṭo espíritu ícha ña i, ko kain espíritu tixin in ngaxin in aséen ni me e. Ko tjume e ícha tangi ton en n̄ ixi sa ó.

Ngisen nduaxin juaxruxin jii

²⁷ Ko ndo Jesús jinichja ndo kain ji i, ko tjume e naa nchri ste ngakjen en n̄ nti a, nichja nchra ndachro nchra séen:

—¡Tsango juaxruxin jii nchri juantajongí a ko juentakangia!

²⁸ Ko ndachro ndo Jesús:

—¡Ícha juaxruxin tsintee chujni tin en nge e ndachro ndo Dio ko titikaon!

Ni ndako a xraxaon juanchia n̄ naa nge e ijie

(Mt. 12:38-42; Mr. 8:12)

²⁹ *Tjume e itsjé n̄ konkueya n̄ ngandajin ndo Jesús, ko je e ndo juangíxin nichja ndo ko ndachro ndo:

—Kain ni ste jai, je e n̄ ña i n̄ ko tjanchia n̄ tsikon n̄ naa nge e ijie; ko xro an nge e sinta a; je o nge e kon en ndo profeta Jonás, ndo kuachronga chijnie ndo Dio sa ó.

³⁰ Xranchi konoxin ndo Jonás ngajin ni kuintee tjajna Nínive ixi xrokuienxin n̄, jaña kaxon konoxinna jan an, Chjen en ndo Dio, xjan jongí e xranchi chujni, ixi tsikon kain ni jii jai.

³¹ Nchakon tsoña ijíe kain ni ste jai, nchri reina tsiki x̄in naa nunte ícha níjin tsingatjen nchra ko tsjankata a nchra ijie ni ste jai ixi nchri reina me e tsiki x̄in tsango ikjín ixi xrokuin en nchra ti juako ndo Salomón. Ko jai nti i ritjén jan an ngajinnta ko ícha chonda juachaxin ixi juachaxin kuachóna ndo Salomón.

³² Ko ni kuintee tjajna Nínive kaxon tsingatjen n̄ nchakon tsoña ijie ngajin kain chujni, ko tsjankata a n̄ ijie ni ste jai ixi kain ni tjajna Nínive kuindoxin n̄ ko kuintu e n̄ ijie kuachóna n̄ nchakon kuin en n̄ chijnie ndo Dio tsichronga ndo Jonás ó sée. Ko jai nti i ritjén jan an ngajinnta ko ícha chonda juachaxin ixi juachaxin kuachóna ndo Jonás.

Ikonni, me e xro i tingasáña cuerpoeni

(Mt. 5:15; 6:22-23)

³³ *Xro an ngisen tjaaka naa xro i ko tsemá sen xro i me e, ko kaxon take a n̄ xro i ngaxin in naa n̄tā. Noi take e n̄ xro i ixi kain ni tixin in nchia tsikon n̄ ti tingasáña.

³⁴ Jaña ikonni xranchi naa xro i tingasáña cuerpoeni. Méxin, siá jian ikonnta, kaxon nguixin cuerpoanta tingasáña. Ko siá na i, jian a ikonnta, kaxon nguixin cuerpoanta naxixe e jii.

³⁵ Tsje enta jian ixi á chao jii xro i chondanta, á je a ti naxixe e stenta.

³⁶ Méxin, siá nchiji cuerpoanta chóna ti tingasáña, ko je a tu o chóna naxixe e, jaña nchijínta jian tingasáña xranchi xrochondanta naa xro i chaxro tingasáña.

Ndo Jesús tuyakuté ndo xi fariseo ko xi tjako ley

(Mt. 23:1-36; Mr. 12:38-40; Lc. 20:45-47)

³⁷ Ndo Jesús juexin ndachro ndo kain ji i, tjume e naa xi fariseo kuinóatée xa ngajin ndo Jesús ixi itsji ndo ndo a xa sineka o xa ndo. Tjume e ikjui ndo Jesús ndo a xa ko kuixin in ndo ko bake e ndo ti jii mesa.

³⁸ Ko je e xi fariseo xrakon xa ixi bikon xa ixi ndo Jesús bake e ndo juine ndo ko konti a ndo inda itja ndo xranchi kuanche e kain ni judío.

³⁹ Ko ndo Jesús ndachro ndo:

—Ja anta xi fariseo nchetjúanta tuenxin vaso ko laato, ko ti ngaya asáanta jikaon kain ti chjuya anta ko ña inta.

⁴⁰ ¡Ja anta nintanta! ¿Á noa inta ixi ngisen juinchekonchjian cuerpo, kaxon juinchekonchjian ngaxin in cuerpo?

⁴¹ Siá ixi nchijí asáanta chje énta ni nóa nge e chondanta, kaxon jaña nchijí asáanta tsontjúá.

⁴² ¡Tsango tangi tson annta ja anta fariseonta! Ixi ja anta chje énta ndo Dio ti texin parte ka menta ko kain kaxroan, ika ko itu ineni ko nche anta nge e jian xrojuinche enta ko tjao anta ndo Dio, méxin chao xrochje énta ndo Dio nge e chondanta ko kaxon xrotjáña inta sinche enta kain nge e jian.

⁴³ ¡Tsango tangi tson annta, ja anta fariseonta! Ja anta tjaunnta tsaye enta xitaon ícha chaxro ngaxin in ni ngo, ko tjaunnta ixi kain ña xrotjáanta juajna ngatja cha o.

⁴⁴ ¡Tsango tangi tson annta ja anta xratjakonta ley ko ja anta fariseonta ixi ja anta nche anta xranchi ndachronta! Ixi ja anta xranchi tuye tsixrabaa ni tsiken en stenta ko tikon a ña tuye me e ko ta tu ña tuye ko noe a ña ixi nti a tsixrabaa chujni.

⁴⁵ Ko tjume e naa xi tjako ley ndache xa ndo Jesús:

—Maestro, ti ndachronta jaña, xranchi jan anna tuyakutéentana.

⁴⁶ Ko ndachro ndo Jesús:

—¡Kaxon ja anta tsango tangi tson annta, ja anta xro tjakonta ley! Ixi ja anta tetuen ennta ña sinche e ña nge e tsango tangi ko jua i sinche e ña me e. Ko ja anta tingijna inta ña sinche e ña kain ti tetuan annta.

⁴⁷ ¡Tsango tangi tson annta xi ja anta nchekonchjiannta tjatu o tsango chaxro ngata a ti jixrabaa kain sen profeta tsichronga chijnie ndo Dio sa ó, ko me e ni ndotáchri anta xranchrjen tsikoña ña sen!

⁴⁸ Ko jaña ja anta tjakonta ixi chao ti tsijinche e ndotáchri anta xranchrjen sa ó, ixi je e ña tsikoña ña sen profeta ko jai ja anta nchekonchjiannta tjatu o chaxro ngata a ti jixrabaa sen me e.

⁴⁹ 'Ko ndo Dio tsango jian no e ndo, méxin, ndachro ndo: “Xroxruan annta ngisen xrochronga chijnina ko ngisen tsjako ngajinnta, ko ja anta naatsóñaxónnta sen ko ikaxin sen chinga sinchekuunta sen.”

⁵⁰ Méxin, ndo Dio tsjankata a ndo ijie ngajin ni jii jai ixi kain sen profeta kuinteken en ko kuintjíníe sen, ti xra xrangixixión konchjian nunte ko ti nchakon jai;

⁵¹ xranchakon kuen en ndo Abel ko hasta ti kuen en ndo Zacarías, ndo kóñaxin ña ngusine ti jii altar ko ni ngo. Méxin, ntatjunta, ndo Dio tsjankata a ndo ijie ngajin ni sté jai ixi xranchi kuen en kain sen sa ó.

⁵² ¡Tsango tangi tson annta ja anta xro tjakonta ley! Ixi ja anta chondanta xroon jitaxin kain ti tetuan an ndo Dio ko ja anta tjaun anta titikaonnta, ko tingijna inta ni tjaun tsitikaon.

⁵³ Juexin ndachro ndo Jesús kain ji i, tjume e xi tjako ley ko xi fariseo tsango koñao xa ngajin ndo Jesús, ko tjume e juanchangi e xa ndo Jesús tsango itsjé nge e,

⁵⁴ ixi xrobikon xa siá je e ndo xronichja ndo naa nge e ndako a ixi chao xrobankata a xa ijie ngajin ndo.

12

Ndo Jesús ndachro ndo nge e tson en ni fariseo

¹*Tjume e xejo kueya na, tsango kueya na stetateyá kichuu na. Ko je e ndo Jesús kuaxi nichja ndo sa ó ngajin sen teyuu chrikao ndo ko ndachro ndo:

—Nche anta xranchi nche e xi fariseo, ixi ndachro xa ko nichja xa jian ko ti ndachro xa, nche a xa.

²*Ixi xro an nge e nche e chujni tsemá, kain nge e ti nche e chujni ti jimá, kain me e naa nchakon tsonoxin.

³Méxin, kain ti imao tsinichjanta, tsij nchakon tsonoxin; ko kain ti tsinichjanta imao ngaxin in nchia, tsajin in na nchia tsuyako na tsin en kain chujni.

Ngisen xroxrakon enni

(Mt. 10:28-31)

⁴'Jan an ntatjunta ixi tjento kichuuna, xrakuen anta ngisen naatóñaxón cuerpoeni ixi me ó chao sinche e na.

⁵ Jan an xrontatjunta ngisen xroxrakon ennta: xrakon ennta ndo nduaxin tsantsja anta asáanta ko chónnda ndo juachaxin xroxruan annta ndo ti xro i xrochexin kain ni ndako a nche e. Je o ngajin je e ndo xroxrankana.

⁶'¿Á tuchji a na ó kuxechjan ixi yuu tomi nchínchín? Ko je e ndo Dio tjáñe a ndo ninaa ba.

⁷ Ko ngujngu ja anta Ndotáina Dio je e ndo no e ndo ngijan in xrajaanta chondanta; je e ndo beki ndo naa ko naa ka. Méxin, ja anta xrakon anta, ixi ja anta ícha tjinteenta ixi kueya kuxechjan.

Ngisen tsosue a xrondachro chuxinna ngatoxin ikon chujni

(Mt. 10:32-33; 12:32; 10:19-20)

⁸'Jan an ntatjunta ixi kain sen xrondachro chuxinna ngatoxin ikon chujni, kaxon jan an, chjen en ndo Dio, xjan jongí e xranchi chujni, xrontatjan kain sen angéel ndo Dio ixi jan an kaxon chuxin sen.

⁹ Ko ni xrondachro chuxin ana na ngatoxin ikon chujni, jan an kaxon xrondachrjan ngajin sen angéel kondee ndo Dio ixi chúxin a sen kaxon.

¹⁰*'Ko xrojan ni xronichja ndako a kondee najan an, chjen en ndo Dio, xjan jongí e xranchi chujni, xrachao tsumé e jíee ni me e; ko ni xronichja ndako a kondee espíritue ndo Dio, ni me e tsango tangi tson en na ko tsumé a jíeena na.

¹¹*'Ko nchakon tsiku unta na ngajin ni ste ni ngo, o ngajin xi sinchéña ijié, o naa xi tetuan an, ta inta juachjaon ixi nge e tsjatingíexinnta o nge e xrondachrona,

¹² ixi Espíritue ndo Dio sintakuan annta ko xrondachro nge e tsjatingíexinnta.

Ti ndakua i xraxaon naa ni chónnda tomi

¹³ Tjume e naa xi jii ngakjen en kueya na ndache xa ndo Jesús:

—Nchána, ndache xi kichian xrochjána xa ngusinexin ti kuintu e sen nía.

¹⁴ Ko je e ndo Jesús ndache ndo xa:

—¿Ngisen ndachro ixi jan an sintaña ijié ngajinnta ko tsonchjeya anta ti kuintu e ni ndúinta?

¹⁵ Ko kaxon ndache ndo kain ni stetin en:

—Ko xroxraon anta ixi xrochondanta itsjé nge e ko itsjé tomi. Ixi je a ti itsjé xrochondanta, me e xrotjáanta juaxruxin.

¹⁶ Ko kaxon ndo Jesús beki e ndo na naa chijni:

—Bake e naa xi kuachónnda xa itsjé nge e. Ko chjakée xa kóna kueya trigo, méxin, kueya juatsi in xa.

¹⁷ Ko je e xa jixraxaon xa: “¿Nge e sinta a ixi íko a no tsengachjian kain trigo juaka?”

¹⁸ Ko ndachro xa: “Ó nóna nge e sinta a. Tsonjamangi kain nchia nchín ko sintaña kaxin nchia ícha ijié ko nti a tsjatsiin kain trigo kóna.”

¹⁹ Ko xrontatjan aséenna: “Kueya nge e kuatsían ko chonda itsjé nge e tsarichonxian itsjé nano. Inte ko ti ia, tjoka a ko take é juaxruxin.”

²⁰ Ko je e ndo Dio ndache ndo xa: “Ja a ndako a xraxaoan ko tienxin a, ixi tiie jai tsen én ko tsitjáña asáan ko, ¿ngisen tsonde e kain ti kuatsían?”

²¹ Ko jaña tson en kain ni ícha tjaun xrochóna tomi ko kain nge e jii ngata a nunte ko xro an nge e chóna na ngajin ndo Dio.

Ndo Dio tayakon en ndo kain chjen en ndo

(Mt. 6:25-34)

²² Ko tjume e ndache ndo Jesús sen teyuu chrikao ndo:

—Jan an ntatjunta ta inta juachjaon ixi nge e sintenta ko nge e tsaritsiinta.

²³ Ícha tjintee ti tsechónni ixi nge e sineni, ko cuerpoeni ícha tjintee ixi manta tsetsáni.

²⁴ Tsje enta xranchi jii kunta a. Tenga i ba ko xro an noa tatsi in ba, ko chóna i ba no tsechjianxin no, ko ndo Dio tajon ndo nge e ine ba. ¿Á je a ícha tjinteenta ja anta ixi kuxe?

²⁵ Maski ja anta, ícha taanta juachjaon, jua i tsarichonnta ícha nchakon.

²⁶ 'Siá jua i nche enta nge e ícha tangi a, ¿sonda yaanta juachjaon ixi ti ícha tangi?

²⁷ 'Tsje enta xranchi tangi itsjo, tsjo me e nche a tsjo ixra ni tjaun a tsjo manta. Ko jan an ntatjunta ixi ndo rey Salomón, maski ícha chaxro kuetsaa ndo, kuetsa i ndo xranchi naa itsjo me e.

²⁸ Siá ndo Dio nchekitsáa ndo ika, maski jai jichón ka ngataon ijngi ko ndúya ó xroche ka, ko á je a ícha chaxro sinchekitsáanta ndo ja anta ti chuntia inta ndo.

²⁹ Méxin, ja anta ta inta juachjaon ixi nge e sintenta o nge e tsi inta.

³⁰ Ixi ngisen chúxin a ndo Dio ícha tjaun na xrochóna na kain nge e. Ko ja anta chondanta Ndotánta jii ngajní, ko je e ndo ó no e ndo kain nge e xrokonda anta.

³¹ Ko ja anta cháña sa ó tjéenta ti tetuan an ndo Dio, ko je e ndo tsajon ndo kain nge e xrokonda anta.

Tsango tjintee nge e xrochondana ngajní

(Mt. 6:19-21)

³² 'Kutuchjonna xrakon anta. Maski kueya inta, Ndotánta jii ngajní, tjaun ndo tsake enta ngajin ndo.

³³ Nchekjinta ti chondanta ko chje énta tomi ni nóa; ko tjume e nchekonchjiannta puxa tichje a, ixi jaña xrochondanta ti ícha tjintee ngajní, ko me e kain nchakon tsake e ko tsjexin a. Ixi nti a jua i tixin in xiche e ko ti a kuchji.

³⁴ Ixi ti no tsake enta ti tjintee chondanta, nti a tsake e asáanta kaxon.

Xrotjá inta kotachrin, tsarichonnta

³⁵ *'Kainko nchakon jian xrotsje enta ko nchekanga inta xro i jii ngaya asáanta.

³⁶ *Ja anta take énta xranchi naa xi nche e ixra, xi jichón en xa xrokjan nchéé xa, ndo tsj xin ti tsikute e na. Ixi hora tsji nchéé xa ko tseya ndo, je e xa tuinxin tsantje e xa ntachja tixin in ndo.

³⁷ Tsango juaxruxin tsintee kain ngisen nche e ixra nchakon xrokjan nchéé na ko tsitja ndo na stechón na, tsikejua i na. Ko jan an ntatjunta, ixi je e ndo tsajon ndo juachxin tsake e na ti jii ntachaon* ko tsajon ndo nge e sine na.

³⁸ Ijié juaxruxin tsintee na maski tsji ndo ngusine tiie o tsingasáñaaja ixi stechón en na ndo ko tsikejua i na.

³⁹ *Ko tienxinnta ji i: siá xi nchéé naa nchia xrokono e xa nge e hora tsji xiche e, je e xa xrokuejua i xa hora me e, ko xrokuintue a xa tsee xiche e ndo a xa.

⁴⁰ Ja anta kaxon tarichrin anta; ixi jan an, chjen en ndo Dio, xjan jongí e xranchi chujni, tsji i naa nchakon ko ja anta noa inta ngixe e nchakon ko ngixe i hora tsji i.

*Yuu xi nche e xra, naa xi jian, ko naa xiña i
(Mt. 24:45-51)*

⁴¹ Ko tjume e ndo Pedro juanchangi e ndo ndo Jesús:

—Ncháina Jesús, ti ndachronta ji i, ¿á tsienxin kain na o jan onna tsianxinna?

⁴² Ko juatingéxin ndo Jesús:

—Naa xi jian tetuan an ni nche e ixra, me e xrondachro ixi je e xa xrotsje e xa nchia ko tsajon xa sine kain ni ste nchia me e.

⁴³ Chaxro tsono e aséen xi me e nchakon tsii nchéé xa ko tsichuexin xa ixi jinche e xa ti kuituen en xa.

⁴⁴ Jan an ntatjunta ixi ndo tetuen en nchia tsake e ndo xi kuitikaon ixi je e xa tsetuan an xa kain ixra ko kain nge e chóna ndo ndo a.

⁴⁵ Ko siá xi sinche e kain ixra me e xroxraxaon xa ixi nchéé xa tsonchrjen en tsii ndo, ko tsaa xa ndako a sinchekao xa ni nchexra, ni nchri ko ni xi tituen en xa, ko je e xa take e xa sine xa ko tsi i xa ko xrokoan xa,

⁴⁶ ko nchakon ko hora xraxaon a xa tsii nchéé xa, ndo tetuen en nchia, tjume e je e ndo tsoñao ndo ngajin xa ko tsikaon xa ko tsengi ndo xa. Xranchi tson en xi me e, jaña tson en kain ni titikaon a ndo Dio.

⁴⁷ Xi nche e ixra, siá no e xa nge e tjaun nchéé xa sinche e xa ko je e xa titikaon a xa ti kuituen en xa, xi me e tsanga tsikaon xa.

⁴⁸ Ko xi noe a ixi ti ndako a jinche e xa, xi me e ícha tsikaon a xa. Méxin, ngisen ícha kueya kuayé e, sen me e ícha kueya xrokonda tsajon sen. Ko sen ícha kueya no e, sen me e ícha kueya xroxranche e sen.

*Je a naxraje o xraxaon na kondee ti juako ndo Jesús
(Mt. 10:34-36)*

⁴⁹ Jan an jui i ixi sintakakiin xro i ngata a nunte nti i. ¡Ko jan an ó tja on xrojuaa xro i jai!

⁵⁰ *Xrokonda nge e tsango tangi sinchena na, ko jai jitoni e aséenna tsijija nchakon tson en me e.

⁵¹ Siá ja anta xraxaonnta ixi jan an bikian juaxruxin ngata a nunte nti i, ntatjunta na i. Méxin jée xroxraxaon nguungunta.

⁵² Ixi nchakon xrangixixín jai ko kaxin nchakon tsii, na ó ni ste naa nchia, ni me e xrochjeya na. Nii na tsoñao e na ni yuu ko ni yuu tsoñao e na ni ní.

⁵³ Ko ndotata xraningakon en ndo chjen en ndo, ko ichjan xraningakon en xjan ndotée xjan. Ko janáana xraningakon en jan nchrichje en jan, ko nchrichje en jan xraningakon en xjan janée xjan. Jancha a xraningakon en jan nchritakinde e jan ko nchritakinda xraningakon en nchra jachée nchra.

*Ngajni tjakoxin xranchi tson en nchakon tsii
(Mt. 16:1-4; Mr. 8:11-13)*

⁵⁴ Ndo Jesús kaxon ndache ndo na:

—Ko nchakon tikonnta tsonchjian itjuj ti no tetaonxin nchakon, ja anta ndachronta ixi ó tsii chrin, ko jaña ton en.

⁵⁵ Ko nchakon chrinto ti xin no níjin, ja anta ndachronta tsania súa, ko jaña ton en.

⁵⁶ ¡Ja anta ndako a xraxaonnta! Ja anta ó no anta ko chuxinnta nge e ton en ngajni ko ngataon ijngi, ko ja anta noa inta ko tienxin anta nge e jiton en nchakon stenta.

*Tetokui anta ni kichuunta
(Mt. 5:25-26)*

⁵⁷ ¿Sonda nchekonchjian inta ja onta ti nchekuu kichuunta?

⁵⁸ Siá xrojan ngisen tsjankata anta ijie ko xrokonda itsjinta ngajin xi nchekonchjian ijie, cháña naa tjaxon kichuunta ti xrayáanta cha o ko xratjaso anta ti jii xi tetuan an. Ixi siá tsjasonta nti a, xi nchéña ijie xroxraxin innta xa ndo achjiso.

⁵⁹ Ko jan an ntatjunta ixi tsachrjexin anta nti a tsjengajanta kain tomi chondanta.

13

Xrokonda tsindoxin na ko sinche e na ti jian

¹ Nchakon me e konchjiñe e kaxin na ngajin ndo Jesús ko beki e na ndo xranchi juinche e xi Pilato ixi tsiketuan an xa kuen en kaxin xi tsiki xin nunte Galilea. Ko jnie xa tsikintji ti no chexin jnie iko ti bakajonxin na juasaya ngajin ndo Dio.

² Ko ndo Jesús juatingíexin ndo:

—¿Á xraxaonnta ixi je e xa ícha kueya ijie sínká xa ixi kain ni tjajnee xa ni Galilea, méxin jaña kon en xa?

³ Jan an ntatjunta ixi na i. Ko siá ja anta tsindoxin anta xranchi nche enta ko xranchi xraxaonnta, kainnta jaña tsinteken ennta kaxon.

⁴ Q, ¿á xraxaonnta kaxon ni itejní kuen en, ni xratja torre Siloé? ¿Á ni me e ícha ijie kuachónnda na ixi ikaxin ni bake e tjajna Jerusalén?

⁵ Jan an ntatjunta na i. Ko siá ja anta tsitikaon anta ti tetuan an ndo Dio, ja anta jaña tsinteken ennta kaxon.

Ntaa tu higo tajon a ntaa itu

⁶ Tjume e ndo Jesús beki e ndo sen:

—Naa xi kuachónnda xa naa ntaa tu higo ngataon ijngi. Ko ikjui xa kuitsje e xa ntaa á chónnda ntaa itu, ko xro an itu kuitja xa.

⁷ Ko tjume e ndache xa xi tsje e jngi e xa: “Ó chónnda ní nano titsja a ntaa ji i ko xro an itu titja. Méxin cháña tonchrijian ntaa, xruenxon jita a ntaa ngata a nunte na.”

⁸ Ko xi tsje e ijngi ndachro xa: “Ja anta, tintu enta ntaa nano ji i; jan an sintandá inche tutée ntaa ko tsjanka a ntaa xineno tsitjo.

⁹ Ko xrotsje ena á tsajon ntaa itu. Ko siá na i, me e ché xrochrijin ntaa.”

Ndo Jesús nchexruen en ndo naa nchri jisée

¹⁰ Naa nchakon tjoké e ni judío, ndo Jesús juincheckuen en ndo na chijnie ndo Dio ngaxin in naa nchando e ndo Dio.

¹¹ Ko nti a jii naa nchri ni e itejní nano. Espíritue Xixron anxrée tsijatu o nchra, méxin jisée nchra, ko jua i xendua nchra.

¹² Ndo Jesús bikon ndo nchra, ko kuiye e ndo nchra ko ndachro ndo:

—Ja a nchri jai kuachrje ichin kuachonda.

¹³ Ko tjume e je e ndo bake e ndo itja ndo ngata a nchra, ko tuinxin je e nchra xendua nchra ko kuaxi nchra kuajon nchra juasaya ngajin ndo Dio.

¹⁴ Ko xi tetuan an ni ngo koñao xa ixi ndo Jesús juincheckruen en ndo nchra nchakon tjoké e na. Méxin je e xa ndache xa kain ni ste nti a:

—Jii ikjaon nchakon tikinixin tson en ixra; nchakon me e tsji inta tsoxruan annta, ko jai nchakon tjoké eni tikinixin a tson en ji i.

¹⁵ Ko tjume e ndo Jesús ndache ndo xa:

—Ncheye a asáanta. ¿Á toxindange anta kuxinta anta o kuntajnoanta ko tiku unta ba tsi i ba inda nchakon tjoké eni?

¹⁶ Ko nchri ji i xjantié ndo Abraham, Xixron anxrée tsikintexin xa nchra ixi ichin tejni nano ko, ¿á tikinixin a tsoxrueen en nchra nchakon tjoké eni?

¹⁷ Jaña ndachro ndo Jesús, méxin kaxin na ningakon en na ndo ixi juinchesue e ndo na; ko ni ste nti a tsango juaxruxin ste na ixi bikon na tsango nge e ijie juinche e ndo.

*Ndo Jesús juako ndo kondee naa tsee mostaza
(Mt. 13:31-32; Mr. 4:30-32)*

¹⁸ Ko tjume e ndachro ndo Jesús:

—¿Xranchi jii ti tetuan an ndo Dio?

¹⁹ Me e jii ndako naa tsee mostaza. Naa xi bengá tsee me e jngi e xa. Ko bangi ka ko kóña naa ntáa ijié ko kuxe juinchéña ba kakée ba ngata a chaan ntáa me e.

*Ndo Jesús juako ndo kondee ti tja in nutja
(Mt. 13:33)*

²⁰ Ko kaxon ndachro ndo Jesús:

—¿Nge e chao tsikonxinni ti tetuan an ndo Dio?

²¹ Me e xranchi ti nchetja in nutja ní medida ikuen tsitsé naa nchri ko jaña jua in chu u.

*Ntachja ijno
(Mt. 7:13-14, 21-23)*

²² Sakjui ndo Jesús no tjajna Jerusalén, ko kuatsinga ndo itsjé tjajna ijié ko tjajna nchiín ko juinchekuen en ndo na chijnie ndo Dio.

²³ Ko bake e naa xi juanchangi e xa ndo Jesús ko ndachro xa:

—¿Á kain a chujni xrochóna juachaxin tsechón kain nchakon?

Ko ndo Jesús ndachro ndo:

²⁴ —Xakon annta tsixixinnta ixi ntachja ijno, ixi ntatjunta itsjé na tjaun na tixin in na nti a ko jua i tixin in na.

²⁵ Ko tjume e ndo ndo a tsingatjen ndo ko tsije e ndo ntachja ko ja anta tsitu anta nduja, tsinganta ntachja ko xrondachrona: “Tantje enta ntachja.” Ko je e ndo xrondachro ndo: “Jan an nóna i no juixin ja anta.”

²⁶ Ko tjume e ja anta tsjangixinnta xrondachrona: “Jan anna kui ina ko juinena ngajinnta, ko ja anta juinchekuannanta chijnie ndo Dio ngatja cha o tjajnanana.”

²⁷ Ko je e ndo xrondachro ndo: “Jan an ó ntatjunta nóna i no juixinnta. Satjixinnta ti ritjén jan an, ja anta ndako a nche enta.”

²⁸ *Nti a ja anta xrotsjanganta ko tseto nenonta nchakon tsikonnta ndo Abraham, ko ndo Isaac, ko ndo Jacob, ko kain sen profeta bake e sa ó, ste sen ngajni ti tetuan an ndo Dio, ko ja anta tsake enta nduja.

²⁹ Ixi tsi xin chujni kain nunte; chuya, retuya, ku e ko no níjin ko tsake e na sine na ti tetuan an ndo Dio.

³⁰ *Méxin itsjé na jai xro an juachaxin chóna na, ko je e ni me e ícha ijié juachaxin xrochóna na; ko kaxin na jai tsango ijié juachaxin chóna na, ko ni me e íxro an juachaxin xrochóna na.

*Ndo Jesús tsjanga ndo ixi tjajna Jerusalén
(Mt. 23:37-39)*

³¹ Nchakon me e ikjui kaxin xi fariseo ko ndache xa ndo Jesús:

—Satjixinnta nti i, ixi xi rey Herodes tjaun xa naatsónaxónnta xa.

³² Ko ndo Jesús ndachro ndo:

—Satjinta ko ndachenta xi me e, xi ndako a nche e: “Jai ko ndúya xratsantsje espíritu Xixron anxrée chóna chujni, ko sintaxruan an ni ni e, ko níxin nchakon ó sintajexin xrana.”

³³ Ko xrokonda xratsaji jan an jai ko ndúya ko tjenki, ixi kain sen profeta chronga chijnie ndo Dio xrokonda tsenxin sen tjajna Jerusalén.

³⁴ ¡Ja anta tjanya Jerusalén, ja anta tóñanta kain sen chronga chijnie ndo Dio ko taxinta ixro sen xruan an ndo Dio kuij xrobingijnanta! ¡Jan an nanaunka fia on xroxra unta xranchi naa kuchika tja o ba chjen en ba ngangine e ba, ko ja anta chro anta!

³⁵ Méxin xrokono anta ixi nchianduinta je o ncha tsitu e ncha; ko xrontatjunta í tsikon antana tsija nchakon ja anta xrondachronta: “Tsango jian ngisen kuixin juachaxien ndo Dio.”

14

Ndo Jesús juinchexruen en ndo naa xi tsikatjuya

¹ Naa sábadó nchakon tjoké e na, ndo Jesús ikjui ndo ndo a naa xi fariseo tetuan an, ko nti a chjée na ndo juine ndo. Ko nti a ste ícha xi fariseo stetsjaya xa ndo Jesús.

² Kaxon nti a jii naa xi tsikatjuya xa.

³ Ko ndo Jesús juanchangi e ndo xi tjako chijnie ndo Dio ko xi fariseo:

—¿Á jii juachaxin sinchexruen enni naa ni ni e nchakon tjoké eni?

⁴ Ko je e xa tenko xa. Tjume e ndo Jesús itsé ndo itja xi ni e, ko juinchexruen en ndo xa ko ndache ndo xa chao satsji xa.

⁵ *Tjume e ndo Jesús ndache ndo xi fariseo:

—¿Ngixe e ja anta, siá naa kuntajnoanta o naa kuxinta anta tsitsingaya ba naa tuye, á tsantsje anta ba maski nchakon tjoké eni?

⁶ Ko xi fariseo jua i juatingíexin xa nge e ndachro ndo Jesús.

Chujni tsikiye e na tsij na kiée ni tute e

⁷ Ndo Jesús jitsje e ndo ixi kain ni konchjiñe e ti kiée na, juée na ntaxitaon jian jii ti mesé ni tsikute e, ko tjume e je e ndo ndachro ndo:

⁸ —Nchakon itsjinta naa kiée ni tsute e, tjé anta ntaxitaon jii ícha tjenka ni tsikute e, ixi nchéxin tsij naa ngisen ícha tetuan an ko ni me e xrokonda tsake e na nti a.

⁹ Ko ngisen kuiya anta ikjuinta kia xrontatjunta na: “Tingatjénxinnta ti ntaxitaon rita anta ixi ña tsake e naa ngisen ji i.” Ko tjume e ja anta tsingatjennta ko tsake enta ti ntaxitaon jii ícha no ndá a ko tsosua anta.

¹⁰ Méxin naa ngisen xrondachro tsji inta naa kiée na, ja anta cháña take énta ntaxitaon ícha no ndá a, ixi jaña ni ntatjunta jui inta kia xrontatjunta na: “Ja anta tatsinganta ti ntaxitaon jii ícha tjenka ni kute e.” Jaña ja anta tsaye enta ícha juasaya ngajinxin* kain ni ste nti a.

¹¹ *Ixi ni ícha sinchejié aséen, ni me e tjinte a na ko tsayé a na juachaxin tsetuan an na; ko ngisen nchejié a aséen, sen me e ícha tsayé e sen juachaxin tsetuan an sen.

¹² Ko ndo Jesús ndache ndo xi tsikiye e ndo tsij ndo kiée xa:

—Ja anta nchakon sinchéñanta naa kia, tiye anta chujni tjentonta, sen ndointa, sen kichuunta, sen ste tjenka ndointa chónnda itsjé tomi, ixi sen me e chao sinchéña sen inaa kia ko tsiya anta sen itsjinta sinteku unta sen, ko jaña je e sen sinchekjan sen ti juine sen ndointa.

¹³ Méxin, nchakon ja anta sinchéñanta naa kia, tiye enta ni nóa, ni jua i itji, ni jua i tontengi je o, ko ni ntakutsin.

¹⁴ Ko jaña ícha juaxruxin xrochondanta asáanta, ixi maski ni me e jua i tsjenga anta na na. Nchakon xroxechón kain ni jian juinche e, ndo Dio tsjenga anta ndo na nge e jian juinche enta ngajin ni nóa.

Ndo Jesús juakoxin ndo xranchi kon en naa kia ijié

¹⁵ Kuin en naa xi jii tjenka mesa ko ndache xa ndo Jesús:

—Tsango juaxruxin tsake e ni sine ti tsake e kia ti tetuan an ndo Dio.

¹⁶ Ko ndo Jesús ndache ndo xi me e:

—Naa xi bake e xa naa kia ijié, ko kuiye e xa itsjé na tsii na sine na.

¹⁷ Ko kuij hora sine na, ko xi me e xruan an xa naa xi nchexrée xa tsjirué e xa kain ni ndache xa tsii ixi ó chao jii kain nge e.

¹⁸ Ko kain ni me e kuaxi na ndache na xi kuetuan an xa kueya ko ndachro na ixi jua i tsii na. Xi sa ó ndachro xa: “Jan an kue na naa nunte, ko xrokonda tsitsja a nunte; toñao anta ixi tsji a.”

¹⁹ Ko ndachro inaa xa: “Jan an kue na na ó yuntee kuxinta, ko xrokonda xrotsja a á chao nche e ba ixra; méxin, ndachrjan toñao anta ixi tsji a.”

²⁰ Ko inaa xa ndachro xa: “Jan an nandá kuténa, méxin, jua i itsji.”

²¹ Ko xi nchexra ikjan xa ngajin xi tsixrua an xa tsjirué e xa na ko chronga xa kain ji i. Ko je e xa kuin en xa nge e tsichro ni xrokui sine, ko koñao xa ko ndache xa xi nchexrée xa: “Jaiko itjia kain cha o ko kain ndasin chóna tjanya ji i, ko tikua nti i kain ni nóa ko ni jua i itji, ko ni jua i tontengi je o, ko ni tikon a.”

²² Tjume e je e xi nchexra ndachro xa: “Ó juanta a xranchi kuetuannanta, ko xrají no tsintee ícha chujni.”

²³ Ko tjume e je e xi tetuan an ndache xa xi nchexra: “Itjia kain cha o ko kain cha o tatu ka ngande e tjanya, ko nchekateya na tsii na, ixi jaña xrokaon nía.

²⁴ Jan an ndachrjan tjaun a tixin in ninna ni kuiya a ícha sa ó tsii na sine na.”

Tangi rué eni ndo Jesucristo

²⁵ Tsango itsjé na rué e na ndo Jesús ko je e ndo ngatjia ndo ko ndache ndo na:

²⁶ *—Siá xrojan ja anta tjaunnta xroruénanta, xrokonda ícha xrotjaunnanta jan an ixi ndotánta, o janánta, o janchri anta, o chjan anta, o nchrikichuunta o xi kichuunta, ko kaxon je a ícha xrotjue enta asánta. Ko siá ícha xrotjaunanta jan an, chao xrokjannta sen chujnina.

²⁷ *Ko ngisen tsatsinga i juachjaon tsatsinga jan an ti tsen en na nganito ntacru, ni me e jua i xrokjan na sen chujnina.

²⁸ Siá xrojannta tjaunnta sinchekonchjiannta naa tjatu o tsango noi, ¿á tsake anta sa ó xroxraonnta ngijan in tomi xrokonda tsonchjianxin tjatu o me e?, ko, ¿á chondanta kain tomi xrokonda tsjexixin tsonchjian tjatu o?

²⁹ Ixi siá na i, je o kuitenta ixro tseta a tjatu o ko juexin tomi, ko í juexin a juinçekonchjiannta tjatu o me e, ko kain ni tsikon tsjanoanta na ixi juexin a kuitenta tjatu o.

³⁰ Ko ni me e xrondachro na: “Xi ji ijuangín xa juinçekonchjian xa tjatué xa ko jue a xa kuite xa tjatu o.”

³¹ O naa xi rey xrokonda itsji xa ko tse to xa ngajin inaa xi rey, ¿á je a sa ó xroxraon xa ixi á chao ixi ite mil xi soldado chóna xa, tse to xa ngajin xi rey chóna ikán mil xi soldado?

³² Xi rey me e xraon xa ixi jua i tsjacha xa ngajin xi rey ti kueya xi soldado chóna xa, méxin xroxruan an xa kaxin na sikao na juajna ngajin xi rey chóna kueya xi soldado ixi xrají xa ikjín, ko jaña tseto a xa.

³³ Jaña, ja anta kaxon siá tsintue anta kain ti chondanta, jua i xrokjannta chujnina.

Nchakon xíjnta tojní a xíjnta

(Mt. 5:13; Mr. 9:50)

³⁴ Xíjnta tsango jian xíjnta tojnínin ti ineni ko nchakon sinchejní a xíjnta, ¿nge e tsojnínin ti sineni?

³⁵ Méxin nchakon tsojní a xíjnta ninge o tsonda xíjnta, tsintjini xíjnta ixi íxro anxrée xíjnta. Ngisen tin en, tsin en sen jian.

15

Juako ndo Jesús naa chijni kondee naa kutuchjon tsikitjáña (Mt. 18:10-14)

¹*Konchjiñe e xi xenge e i na tomi ti tjanchia xi tetuan an, ko kaxon kueya ni ndako a nche e konchjiñe e na ngajin ndo Jesús ixi tsin en na ti ndachro ndo.

²Tjume e xi fariseo ko xi tjako chijni kuetuan an ndo Dio nichjangí e na ndo Jesús, ko ndachro na:

—Xi Jesús tjento xa kain ni ndako a nche e ko nekao xa na.

³Méxin ndo Jesús juako ndo naa chijni ngajin na:

⁴—Ngixe e ja anta, chondanta naa ciento kutuchjon, ko sinchetjáñanta naa ba, ¿á tsintue anta ko noventa y nueve ngataon ijngi ko itsjinta tsijéenta iko kuitjáña ko tsinchíjanta ba?

⁵Ko nchakon tsinchíinta ba, ja anta tsake enta juaxruxin ko tsamanta ba ngata a ntachaannta,

⁶ko nchakon tsjasonta ndointa, tsiye enta ni tjentonta ko kain ni ste tjenka ndointa ko xrondachenta na: “Jai tsojuna juaxruxin ixi ó kuitja kutuchjonna, iko kuitjáña.”

⁷Jan an ntatjunta, xraje o jaña Ndotáina jii ngajni ko kain sen ángel tsango ché e sen ixi naa ngisen ndako a juinche e ó titikaon sen chijnie ndo Dio ixi ni noventa y nueve jian nche e, íxrokonda i tsindoxin na.

Ndo Jesús juako ndo naa chijni kondee naa nchri

⁸Ko kaxon ndachro ndo Jesús:

—Naa nchri chónnda nchra ite tomi ko juinchetjáña nchra naa tomi, je e nchra sinchekakiin nchra xro i ixi tsjée nchra tomi juinchetjáña nchra ko tsajon nchra nguixin ngaxin in nchia tsitjaja nchra tomi juinchetjáña nchra.

⁹Ko hora tsitja nchra tomi, tsiye e nchra kain nchri tjento nchra ko kain ni ste tjenka ndo a nchra ko xrondache nchra kain na: “Tújuna juaxruxin ixi ó kuitja tomi jintatjáña.”

¹⁰Jan an ntatjunta kaxon ngajni kain sen ángel ne e ndo Dio ste sen juaxruxin nchakon naa ngisen ndako a juinche e tindoxin sen ko ikjan sen ngajin ndo Dio ko titikaon sen chijnie ndo.

Ndo Jesús juako ndo kondee naa chajan

¹¹Ko kaxon ndachro ndo Jesús:

—Naa xi kuachónnda xa yuu chajan.

¹²Ko chán yuxin ndache chán ndotée chán: “Tata, chjánanta tomi ko nge e tikinixin tsayá a jan an.” Ko tjume e je e ndo konchjeya ndo yui cháje en ndo ti tikinixin en chán.

¹³Tsjé a nchakon kuatsinga, je e chán juinчекji chán ti kuayé e chán ko juejo chán kain tomi, ko tjume e sakjui chán inaa tjajna ikjín ko juinche e chán kain ti ndako a, ko juinchexienxin chán kain tomi kuayé e chán.

¹⁴Ko jue e chán juinchexienxin chán kain tomi, ko tjume e kuij nchakon kain ni tjajna me e tsango kuatse na jinta ko je e chán tsango tangi kuatsinga chán kaxon.

¹⁵Ko tjume e ikjui chán bijanchia chán ixra ngajin naa xi tjajna nti a. Ko xi me e kotuen en xa chán itsji chán ngataon jngi e xa xrotsje e chán kuchinga.

¹⁶Ko je e chán tsango baken en chán jinta, ixi xro an nge e jii sineni ko tjaun chán xrojuine chán tjaja bajine kuchinga.

¹⁷Méxin bake e chán xraxaon chán ko ndachro chán: “¡Itsje ni nchexra ste na ndo a ndotána! ¡Ko je e na chónnda na itsje nge e sine na, ko jan an nti i jiteenxinna jinta!

¹⁸Tsingatjen ko satsji ti jii ndotána ko xrontatjan ndo: Tata, jan an junta a ti ndako a ngajin ndo Dio jii ngajni ko ngajinnta kaxon.

¹⁹ Ítikinixin a tsin inna chja annta; je o xrokjanna xranchi naa xi nchexráanta, naa xi xro an tjintee.”

²⁰ Tjume e kua chán cha o ikjan chán ndo a ndotée chán. Ko xrakjín jitiji chán, ndotée chán bikon ndo chán ko bikonóe e ndo chán ko binga ndo ti no jitii chán ko joa ndo chán ko kuetoixin ndo chán.

²¹ Ko tjume e je e chán ndache chán ndotée chán: “Tata, jan an junta a ti ndako a ngajin ndo Dio jii ngajní ko ngajinnta kaxon. Méxin, ítikinixin a tsin inna chjan anta.”

²² Ko je e ndotée chán ndache ndo ni nchexrée ndo: “Taka tikuunta manta ícha jian ko tjintee ko nchekitsáanta chjan na; ko kaxon tsikuunta kuchaningo tseyá itja xjan, ko take énta xjan kate ícha tjintee.

²³ ;Tsikuunta kuxinta ícha ntao ko to inta ba sintena ko sinchéñana kia!

²⁴ Ixi chjan na ji i xranchi xrokuen en xjan ko jai xechón xjan. Je e xjan kuitjáña xjan ko jai ikjan xjan. Nchéñana kia ko tújúna juaxruxin.”

²⁵ ‘Ko chán sa ó ngataon ijngi jinche e chán ixra. Ko hora ikjan chán konchjiñe e chán nchia, kuin en chán jii soon ko steté na.

²⁶ Me e kuiye e chán naa xi nchexra ko juanchangi e chán xa: “¿Sonda jii kia?”

²⁷ Ko xi nchexra me e ndachro xa: “Ikjan chán kichuunta, ko ndotánta kuetuan an ndo kuen en kuxinta ícha ntao ixi ikjan chán ko xro an nge e tsikon en chán.”

²⁸ Ko chán sa ó tsango koñao chán, ko chro a chán tixin in chán nchia. Ko je e ndotée chán kuachrje ndo ko juinchetsen en ndo ñao chán ixi tixin in chán nchia.

²⁹ Ko je e chán ndache chán ndotée chán: “Ja anta no anta ngijan in nano rinta a ixra ngajinnta ko nai a nichjangí anta, ko ja anta ninaa kubitochjan chjána inta xro-juineki an xi tjento.

³⁰ Ko jai kuii chjan anta ji i, xjan ndako a juinchexienxin kain tomi ko kain nge e chje énta xjan, juinchexienxin xjan kain tomi kuayé e xjan ngajin nchri ndako a nche e, ko ja anta kon inta kuxinta ícha ntao ko juinchéñe enta xjan kia.”

³¹ Tjume e je e ndo ndache ndo chán sa ó: “Chjan na, ja a kain nchakon ritjén ngajin, ko kain ti chonda jan an, ja a tikinixin an.

³² Ko jai xrokonda tsojuna juaxruxin ko sinchéñana kia ixi xjan kichuua xrokjui xranchi ó kuen en xjan, ko jai xechón xjan ko je e xjan kuitjáña xjan, ko jai kuichuee xjan.”

16

Ndo Jesús juako ndo naa chijni kondee naa xi nche a jian

¹ Ndo Jesús beki e ndo sen teyuu chrikao ndo:

—Bake e naa xi chónnda itsjé tomi, ko xi me e kuachónnda xa naa xi bakeki kain tomi ko kain nge e kuachónnda xa. Ko naa nchakon ikjui kaxin na kuindache na xi tomie ixi xi nchexrée xa tsango nchexienxin xa tomi ko nge e bake e ngaya itja xa.

² Ko tjume e xi tomie kuiye e xa xi nchexrée xa ko ndache kichuu xa: “¿Á nduaxin nche e xranchi bekinana jan an, nchexienxinkua tomina ko nge e chonda jan an? Jai ndachijiana nge e juinche e ixi kain nge e bakée ngaya tjáa ko tomi bake kia ixi ja a ísinche a ixra ngajin.”

³ Ko tjume e xi bakeki tomi bake e xa xraxaon xa: “¿Nge e sinta a jai ixi je e nchána tsantsjena xa ixra? Jan an ísoji ina sinta a ixra ngataon ijngi, ko tsosua na tsjanchaka a.

⁴ Ó nóna nge e sinta a nchakon i xrochonda ixra ixi ni sinke e nchána tsiya na na ndo a na.”

⁵ Ko tjume e kuiye e xa nguñgu ni sinke e xi nchée xa. Ko je e xa juanchangi e xa xi kuii sa ó: “Ja a, ¿ngijan in tasinka ngajin nchána?”

⁶ Ko je e xa juatingíexin xa: “Jan an tasinka cien barril tikia ndaxi e ko tasinka ndaxi e me e.” Ko je e xi teki tomi ndachro xa: “Itsé xroon ti jitaxin ti tasinka ko nchéñana tuinxin inaa xroon xrondachro je o tasinka cincuenta ntābarril.”

⁷ Tjume e xi teki tomi juanchangi e xa inaa xi sínká: “Ja a, ¿ngijan in tasinka?” Xi me e juatingíexin xa: “Cien costa noatrigo.” Ko tjume e je e xi teki tomi ndachro xa: “Itsé xroon ti jitaxin nge e tasinka ko tasintaxian je o tasinka noó ikán* costa.”

⁸ Tjume e xi tomie kono e xa nge e juinche e xi nchexrée xa, xi teki tomi, ko ndachro xa ixi xi ji i jaiko xraxaon xa nge e sinche e xa ixi kain ni ngata a nunte, ni chúxin a chijnie ndo Dio, ícha ña i nā ixi tsingijna nā ni naxraje o ndakua i nche e xranchi je e nā ko sen titikaon chijnie ndo Dio, na i.

⁹ Jan an ntatjunta chijni ji i: tonda anta kain tomi ko kain nge e richondanta ngata a nunte nti i, ko tomi me e tsjachaxinnta chujni tsjentonta, ixi nchakon tsjexin kain nge e ko kain tomi, ja anta tsaye enta nchia jii ngajni tsarixi inta kain nchakon.

¹⁰ Ngisen tayakon en ti kueya i chónnda sen, kaxon chao tayakon en sen ti kueya xrochónnda sen, ko ngisen jua i tayakon en ti kueya i, kaxon jua i tayakon en sen ti kueya.

¹¹ Méxin siá jua i xrotsje enta jian tomi ko kain nge e jii ngata a nunte nti i, ¿ngisen tsake e ngaya tjáanta tomi nduaxin tjintee?

¹² Ko siá jua i xrotsje enta jian tomie inaa chujni, ¿ngisen xrotjá anta tomi nduaxin tikinixin annta?

¹³ *Ni nchexra jua i xrochónnda nā yuu sen tituen en nā, ixi xraningakon en nā naa xi tituen en nā ko xrotjue e nā inaa xa, o chaxro tsitikaon nā ngajin naa xa ko xronichjangí e nā xi yuxin. Jaña kaxon jua i sinche e nā ixra ngajin ndo Dio ko kaxon ícha xrotjue e nā tomi.

¹⁴ Ko xi fariseo tsango tjue e xa tomi, méxin juanoa xa ndo Jesús ixi nge e ndachro ndo.

¹⁵ Ko ndo Jesús ndachro ndo:

—Ja anta tjaunnta tsono e nā ixi jian ja anta ko je a nduaxin me e, ixi ndo Dio chúxin ndo asáanta. Méxin nge e tsango tjue e chujni, ndo Dio nche a ndo juaxruxin.

Ícha jian tsitikaonni chijnie ndo Dio

¹⁶ *Chijni kuayé e ndo Moisés ko kain ti tsindachro kain sen profeta me e chijnie ndo Dio. Chijni me e baketuan an ko kuachronga kain sen nche e xrée Ndo Dio kuijija nchakon kuij ndo Juan, ndo bikitée nā. Ko jan an tjá anta chijni jian chronga xranchi jii ngajni ti tetua an Ndo Dio. Méxin kain ni kuayé e chijni ji i tsango nche e nā nge e ixi tixin in nā ti no tetuan an ndo Dio.

¹⁷ *Ko jan an ntatjunta ixi ícha tangi a tsitjáña ngajni ko nunte nti i ixi tsitjáña naa letrée chijnie Ndo Dio.

Ndo Jesús juako ndo ixi chujni tsikute e jua i tsintu e kichuu nā (Mt. 19:1-12; Mr. 10:1-12)

¹⁸ *Siá naa xi tsikute e naa nchri ko tsij nchakon tsintu e xa janchri e xa ko tsute e xa inaa nchri, xi me e ndakua i jinche e xa ixi kuitikaon a xa ley kuetuan an ndo Dio. Kaxon, xi tsute e naa nchri tsikintu e ndoxi e nchra, xi me e kaxon ndakua i jinche e xa.

Xi chónnda itsjé tomi ko xi Lázaro, xi nóa

¹⁹ Bake e naa xi chónnda itsjé tomi ko teya xa manta tjintee, ko kain nchakon take e xa kia.

²⁰ Ko nduja ndo a xi me e bake e naa xi nóa bakin in Lázaro; xi me e tsango ni e xa, ko nchijí ntau e xa jirenga.

²¹ Ko kunia tonchjiñe e ba tuni ba ntau e xi nóa. Ko je e xa tjaun xa sine xa kain ti tsixe e ine xi chónnda itsjé tomi.

* **16:7** ikán veinte **16:13** Mt. 6:24. **16:16** Mt. 11:12, 13. **16:17** Mt. 5:18. **16:18** Mt. 5:32; 1Co. 7:10, 11.

²² Ko tjume e naa nchakon xi nóa kuen en xa ko sen ángel sabikao sen xa ti juaxruxin ti jii ndo Abraham, ti jii kain sen jian. Ko kaxon xi chóna itsjé tomi kuen en xa ko juabaa na xa.

²³ Ko xi kuachóna itsjé tomi kaxon ikjui xa ti ste ni tsiken en ko tsango tangi ste na nti a. Je e xa tsje e xa noi ko ikjín bikon xa ti jii ndo Abraham ko xi Lázaro.

²⁴ Tjume e kuyako xa ko ndachro xa: “Tata Abraham, tikonóananta, ko xruan annta xi Lázaro sinchetjao xa dedue xa ixi inda ko tsji xa sinchetjao xa nejen ixi tsango tangi ritjén chringi xro i nti i.”

²⁵ Ko ndo Abraham ndache ndo xa: “Chjan na, xraxaoan ixi tsango jian bake e ngata a nunte, ko tsango kueya nge e chaxro kuachonda, ko xi Lázaro tsango tangi bake e xa nti a. Ko jai je e xa nti i jii xa juaxruxin ko ja a tangi ritjén ti jii xroi.

²⁶ Ko kaxon jii naa yaso e tsango ijié ngusine ti ste jan anna ko ja anta. Méxin sen ste nti i maski xrotjaun sen xrokjui sen tsingijnanta sen, jua i itsji sen; ko ni ste nti a jua i tsji na nti i ti ste jan anna.”

²⁷ Tjume e ndachro xi kuachóna itsjé tomi: “Tata Abraham, jan an tinóatána, xruan annta xi Lázaro itsji xa ndo a ndotána

²⁸ ixi nti a ste na ó xi kichian, ko jan an tja on sincheno e sen xa chijnie ndo Dio, ko jaña jian tsitikaon xa, ko je e xa tsi a xa nti i ti jii xro i.”

²⁹ Ko ndachro ndo Abraham: “Xi kichuua chóna xa xroon ti jitaxin tsikjin ndo Moisés, chijnie Ndo Dio ko ti tsinichja kain sen profeta. Sinchekuanxin xa ko tsitikaon xa xroon me e.”

³⁰ Ko xi kuachóna itsjé tomi ndachro xa: “Na i, tata Abraham, tsitikaon a xa. Cháña xruan annta naa ngisen ó ndakuen en xronichje e sen xa, me e tsitikaon xa ko tsindoxin xa.”

³¹ Tjume e ndachro ndo Abraham: “Siá tjaun a na tsitikaon na chijnie Ndo Dio tsikayé e ndo Moisés jitaxin xroon ko ti tsichronga kain sen profeta, maski tsikon na naa chujni ndakuen en ko xroxechón chujni, tsitikaon a na kaxon.”

17

Nge e nchekateyanta ixi sinche enta ti ndako a

(Mt. 18:6-7, 21-22; Mr. 9:42)

¹ Ndo Jesús ndache ndo sen teyuu chrikao ndo:

—Itsjé nge e jii nchekateyani ixi sinche e ni ti ndako a, ko, ícha tangi tson en ngisen kondeexin sinche eni ti ndako a!

² Ni me e xrokuite e tusin na naa ixro ijié ti tontsingaxin ko xrokuitsingangi na ndachaon ixi jaña ísinche a na ixi naa chjan xranoe a xrojuinche e xjan ti ndako a.

³*Taanta juachjaon ixi ja anta sinche anta ti ndako a, ko siá naa ni kichuunta sinche e ti ndako a ngajinnta, tuyakutéenta na; ko siá ísinche a na ti ndako a ngajinnta, ja anta tjáña anta nge e junta anta na.

⁴Maski yaato ndakua i sinta anta na naa nchakon, ko yaato xrondachro na tjáña anta nge e junta anta na, xrokonda yaato xrotjáña anta ja anta kaxon nge e junta anta na.

Ti chúntiani Ndo Dio me e nche e ícha soji tsinteeni

⁵ Sen kuajikao ndo Jesús ndache sen Ndo:

—Tingijnaninta ixi ícha xrochuntiana ngajinnta.

⁶ Ko je e Ndo Jesús ndachro ndo:

—Siá ja anta xrochuntianta ndo Dio naa nchinchjaon xranchi naa tsee ka mostaza, ja anta xrondachenta naa ntayua: “Ja a tachrjengixian inche nti i, ko xenga ngangí ndachaon”, ko ntaa me e tsitikaon ntaa.

Nge e xrokonda sinche e naa xi nchexra

⁷ 'Siá naa ja anta, chondanta naa xi nchexra ko xi me e tsikikao xa ngataon ijngi yunta o kuitsje e xa kutuchjoanta, ko ikjan xa tondó, ¿á xrojan ja anta xrondachenta xa: "Xrokuia take é sinte"?"

⁸ Na i, ja anta xrondachenta xi nchexra me e: "Xakon an nchéñanana sine, ko tikia sine ko tsi i, ko tjume e take é sinte ja a."

⁹ Ko, ¿á kaxon tájonnta juasaya ngajin xi nchexra ixi kuitikaon xa nge e kuituen ennta xa?

¹⁰ Jaña kaxon ja anta, ti tsjexin sinche enta kain ti kuetuan annta ndo Dio, xron-dachrona: "Jan anna xi nchexra xro an tundana; ixi je o juanta ana ixra tikinixinnana sinta ana."

Ndo Jesús juinchexruen en ndo ite xi kuachóna chinlepra

¹¹ Ndo Jesús tingakitji ndo tjajna Jerusalén, kuatsinga ndo itsjé tjajna tikinixin en nunte Samaria ko nunte Galilea.

¹² Ko tjume e kuiji ndo tjenka naa tjajna, ko tjajna me e kuachrjexin ite* xi níexin chinlepra. Ko konchjiñe a xa tjenka ndo, ikjion kuíxi xa.

¹³ Ko xi ni e me e kuyako xa ndache xa ndo:

—Jesús, Maestro, tikonóa nananta!

¹⁴ Ko hora bikon ndo Jesús xi ni e ndachro ndo:

—Itjinta ko tjakonta ngajin xi taana tjako ley.

Ko xranchi stetji xi ni e, kuachrje chin en xa ko koxruen en xa.

¹⁵ Ko naa xi ni e me e, bikon xa ixi koxruen en xa, ikjan xa ko kuajon xa juasaya ngajin ndo Dio.

¹⁶ Bake exin xa ntatuchi in xa ngajin ndo Jesús, ko kuisée xa ngata a nche, kuajon xa juasaya ngajin ndo. Ko xi me e, xi tjajna Samaria.

¹⁷ Ko tjume e ndachro ndo Jesús:

—¿Á je a ite xi koxruenxin ichin lepra? ¿No ste xi kaxin?

¹⁸ ¿Á je o xi ji i, xi kuixin ikjín, ikjan xa chjée xa juasaya ndo Dio?

¹⁹ Ko tjume e ndo Jesús ndache ndo xi me e:

—Tingatjen ko satjia; ixi nduaxin chuntia† ndo Dio, méxin koxruan an.

Tsij nchakon tsituan an Ndo Dio

(Mt. 24:23-28, 36-41)

²⁰ Ko tjume e xi fariseo juanchangi e xa ndo Jesús, ngisa tsij nchakon tsetuan an ndo Dio, ko ndo Jesús juatingíexin ndo:

—Nchakon tsij ti tsetuan an ndo Dio, ni chúxin a ndo jua i tsikon na ti tetuan an ndo.

²¹ Jua i xrondachro na: "Nti i jii", o "no ji a jii", ixi ti tetuan an Ndo Dio jii ngaya aséen ni titikaon.

²² Ko tjume e ndache ndo sen teyuu chrikao ndo:

—Tsij nchakon xrotjaunnta tsikonnta, maski naakua nchakon, chjen en ndo Dio, xjan jongí e xranchi chujni, ixi kain juachaxien xjan, ko ítsikon anta.

²³ Ko xrontatjunta na ixi nti i jii ndo o no jia a jii ndo, ko ja anta tji anta ko rue anta na.

²⁴ Xranchi tikonni tóngíxin ko tsingasáña nchijí ngajní, jaña tson en nchakon xrok-janna jan an, chjen en ndo Dio, xjan jongí e xranchi chujni.

²⁵ Ko xrokonda tsango tangi tsónna ko ni jii jai tsitikaon a na ko xrotjaun ana na jan an.

²⁶ Méxin xranchi kon en nchakon bake e ndo Noé, jaña tson en kaxon nchakon xrokjanna jan an, chjen en ndo Dio, xjan jongí e xranchi chujni.

²⁷ Ixi nchakon bake e ndo Noé, kain na bajine na ko baki i na ko bakute e na ko bakajon na chjen en na tsute e xjan. Ko ti kuitja nchakon kuixin in ndo Noé ntábarco ko kuania ichrin, kain na kuitu e na nduja ko kuen en na.

* 17:12 ite diez † 17:19 chuntia tener fe

²⁸ Jaña kon en kaxon nchakon bake e ndo Lot, ni me e bajine na ko baki i na, bake na na ko banchekji na, bakenga na ko banchekonchjian na nchia.

²⁹ Ko nchakon kuachrjexin ndo Lot tjajna Sodoma, kuaniaxin ngajni xro i ko ndagaa azufre, ko me e kuenxin kain na.

³⁰ Jaña tson en nchakon xrokjanna jan an, chjen en ndo Dio, xjan jongi e xranchi chujni.

³¹ *Ko nchakon me e xrojan ngisen jii ngata a ndo a, ko xrojan nge e kuintu e na ngaxin in nchia, xroxingajin a na xrotsé na nge e jii ngaxin in nchia. Ko siá xrojan ngisen jii ngataon ijngi, cháña xrokjan ina na ndo a na.

³² Xraxaonnta xranchi kon en janchri e ndo Lot.

³³ *Ni ícha tjaun chaxro tsake e ngata a nunte nti i, ni me e tsitjáña na, ko ngisen tsjée ixi titikaon sen chijnie ndo Dio, sen me e sinchetjáña i sen aséen sen.

³⁴ Jan an ntatjunta ixi tiie me e, ti yuu ngisen stejua ngata a naa kania, naa na tsajin in na ngajni ko inaa na tsitu e na.

³⁵ Kaxon, siá jii yuu nchri steta o nchra, naa nchra tsajin in nchra ngajni ko naa nchra tsitu e nchra.

³⁶ Yuu xi jinche e xa ixra ngataon ijngi, naa xa tsajin in xa ngajni ko naa xa tsitu e xa.

³⁷ Ko tjume e chujni kuin en ji i, juanchangi e na ndo Jesús ko ndachro na:

—¿Tinó tsoenxin ti rindachronta?

Ko ndo Jesús juatingíexin ndo:

—Ti jii cuerpoe ti tsiken en, nti a tjangataon kuntachrjen.

18

Ndo Jesús juako ndo kondee nchri ka an tjanchia nchra ijie

¹ Ndo Jesús juincheken en ndo sen teyuu chrikao ndo ixi kain nchakon xronichje e sen ndo Dio ko tsonchrjen a sen sinche e sen me e.

² Méxin ja in nichja ndo:

—Bake e naa xi juez, kuachónde a xa juasaya ndo Dio, ko chónde a xa juasaya ngajin chujni.

³ Ko tjajna me e bake e kaxon naa nchri ka an, nchri me e nanaó bakji nchra ngajin xi juez ña i ixi tjanchia nchra tsoñe e nchra ijie ngajin naa xi baketoka o nchra.

⁴ Tsango kueya vez ikjui nchra kuitsje e nchra xi juez me e ixi sinchéña xa ijie, ko je e xa juinche a xa nchra kuenta, ko tjume e xraxaon xi juez me e: “Maski jan an chonda i juasaya ndo Dio ko chonda i juasaya chujni,

⁵ ixi nchri ka an ji i nanaó tji nchra tjanchia nchra ijie ko tsango tajondaxin nchra ixra, jan an cháña sintaña ijie ngajin nchra ixi jaña ítsi a nchra ícha.”

⁶ Ko ndachro ndo Jesús:

—Jaña ndachro xi juez ña i.

⁷ Méxin, ¿á je a ndo Dio ícha tsingijna ndo kain sen kuinche e ndo ti tinóatée sen ngajin ndo tiie, nchakon? ¿Á tsonchrjen en ndo tsjate e ndo?

⁸ Jan an ndachrjan ixi je e ndo tuinxin tsingijna ndo sen. Ko nchakon xrokjanna jan an, Chjen en ndo Dio, xjan jongi e xranchi chujni, ¿á xratsitja ngisen ngata a nunte nti i xrochuntia ngajin jan an?

Ndo Jesús beki ndo naa chijni kondee xi fariseo ko xi tjáka tomi

⁹ Ko tjume e ndo Jesús beki ndo inaa chijni ngajin kaxin ni xraxaon ixi je e na tsango jian na, ko batjaun a na ni kaxin. Ko ndachro ndo:

¹⁰ —Yuu xi ikjui xa ni ngo kuinichje e xa ndo Dio. Naa xi fariseo, ko naa xi tjáka tomie tjajna Roma.

11 Ko xi fariseo me e siin xa, jinichje e xa ndo Dio ja in: “Ndotána Dio, juasianta ixi jan an chonda i ijię xranchi xiche e, xiña i, ko xi ncheye e janchri e ko xranchi xi tjáka tomi ji i.

12 Jan an ntakatsa a aséenna yuu nchakon ngujngu semana, ko tantsjendáa tomi ti tjacha ngujngu semana tikinixin en Ndo Dio.”

13 Ko xi tjáka tomi siin xa nchion ikjín ko jiséya xa nunte, tjendua i ikon xa noi, ko tande e xa ntakuin xa ko ndachro xa: “¡Ndotána Dio, tikonóananinta ixi chonda ijié!”

14 *Ko jan an ndachrjan ixi xi tjáka tomi, ícha jian ikjan xa ndo a xa ixi ndo Dio juinchemé e ndo kain jíee xa, ko xi fariseo na i. Méxin ngisen ícha tojié, ícha tjinte a na ngajin ndo Dio. Ko ngisen tojié a, Ndo Dio ícha xrotjue e ndo sen.

Ndo Jesús juinchenchaon ndo ichjan

(Mt. 19:13-15; Mr. 10:13-16)

15 Kaxon itsjé na bikao na chjen en na ti jii ndo Jesús ixi je e ndo tsake e ndo itja ndo ngata a jaa xjan. Ko sen teyuu chrikao ndo, kuaxi sen kuyakutee sen ni bikao chjen en.

16 Ko ndo Jesús kuiye e ndo sen ko ndachro ndo:

—Tintu enta ichjan tsii xjan ngajin, ko tingakuen anta xjan. Ixi ngisen tayé e ti tetuan an ndo Dio, sen me e, ikjan sen xranchi naa ichjan.

17 Nduaxin xrontatjunta ngisen xrokjan i xranchi naa chjan, jua i tsayé e sen ti tetuan an ndo Dio.

Naa xi tsango tetuan an juao xa Ndo Jesús

(Mt. 19:16-30; Mr. 10:17-31)

18 Naa xi tetuan an ningue ni judío juanchangi e xa ndo Jesús ko ndachro xa:

—Maestro, jian ja anta, ndachronta, ¿inge e sinta a ixi tsjacha tsarichón kain nchakon?

19 Ko tjume e ndo Jesús ndachro ndo:

—¿Sonda ndachijiana ixi jianna? Xro an ngisen jian, je o Ndo Dio jian ndo.

20 Ó no a chijnie ndo Dio: “Xrochonda ia inaa nchri, tónai a chujni, tema ia, je a xruenxon tjankata a ijię inaa chujni, ko chónde e juasaya ndotáa ko janáa.”

21 Ko je e xa ndachro xa:

—Kain ña ó juinta a, xranchiona.

22 Ko kuin en ndo Jesús nge e ichro xa, ko je e ndo juatingíexin ndo:

—Xratitjáña naa nge e sinche e. Nchekjia kain nge e chonda ko tonchjeye é ni nóa tomi me e, ko xrochónda nge e ícha tjintee ngajní. Ko tjume e tsji ia rua nana.

23 Ko xi me e kuin en xa nge e ichro ndo ko tsango kuechíin xa ixi itsjé nge e tjintee chónda xa.

24 Ko ti bikon ndo Jesús ixi tsango kuechíin xa, ndachro ndo:

—¡Tangi tixin in naa ngisen chónda itsjé tomi ti tetuan an Ndo Dio!

25 Ícha tangi a tixin in naa kucamello ikon naa ntachika ixi naa ngisen chónda itsjé tomi tixin in ti tetuan an ndo Dio.

26 Ko ni kuin en ji i ndachro na:

—¿Ngisen chao tixin in ti tetuan an ndo Dio tjume e?

27 Ko juatingíexin ndo Jesús:

—Nge e jua i sinche e chujni, Ndo Dio chao sinche e ndo.

28 Ndo Pedro ndache ndo ndo Jesús:

—Nchána, jan anna kuintu ana kain ti kuachondana ko rua ananta.

29 Ko ndo Jesús juatingíexin Ndo:

—Jan an nduaxin ntatjunta ixi ngisen kuintu e ndo a, ndotée, ko janée, xjan kichuu, o janchri e, chjen en ixi kondeexin chijnie Ndo Dio ko nge e tetuan an ndo,

³⁰ sen me e ícha itsjé nge e tsayé e sen jai ti jichón sen ngata a nunte nti i, ko kaxon tsayé e sen nchakon tsii ti tsechónni kain nchakon.

Ndo Jesús íjngo ndachro ndo tsen en ndo

(Mt. 20:17-19; Mr. 10:32-34)

³¹ Ndo Jesús kuiye e ndo sen teyuu chrikao ndo ko ndachro ndo:

—Jai satsjina tjajna Jerusalén. Ko nti a tsoenxin kain ti tsikjin sen profeta ó sa ó xranchi sinchekaona, chjen en ndo Dio, xjan jongí e xranchi chujni.

³² Ko ni me e tsajon nā xjan ngajin ni je a tjajna judío ko ni me e tsjanoana xjan, ko chinga xronache nā xjan, ko tsikitéena nā xjan ndaté e nā.

³³ Tsaxi nā xjan ntaā ko iton ko naatsóñaxón nā xjan. Ko nchakon nínxin xroxechón xjan.

³⁴ Ko sen teyuu chrikao ndo Jesús kuienxin a sen ti nichja ndo, ixi jua i xrokuienxin sen.

Ndo Jesús juinchexruen en ndo tjajna Jericó naa xi jua i tikon

(Mt. 20:29-34; Mr. 10:46-52)

³⁵ Ko nchakon ndo Jesús ko sen teyuu chrikao ndo kuiji sen tjenka tjajna Jericó, ko ngande e cha o bake e naa xi jua i tikon ko jitjanchiaka a xa.

³⁶ Ko je e ti xi tikon a kuin en xa ixi jitatsinga itsjé nā, méxin juanchangi xa nge e jiton en.

³⁷ Ko ndache nā xa ixi ndo Jesús tjajna Nazaret jitatsinga ndo nti a.

³⁸ Ko tjume e je e xa séen kuyako xa:

—¡Jesús, kuachrjenixinnta ndo David, tikonóananinta!

³⁹ Ko ni stetaon nti a koñao e nā xa ko ndachro nā ixi xrotenko xa ko je e xa ícha séen kuyako xa:

—¡Ja anta kuachrjenixinnta ndo David, tikonóananinta!

⁴⁰ Ko tjume e ndo Jesús chón en ndo ko kuetuan an ndo ixi tsika o nā xi tikon a. Ko bika o nā xa ti jii ndo, ko tjume e je e ndo Jesús juanchangi e ndo xa:

⁴¹ —¿Nge e tjauan sinta a ixi ja a?

Ko xi tikon a juatingíexin xa:

—Nchána, jan an tja on tsikon.

⁴² Ko ndo Jesús ndachro ndo:

—¡Chao tsikuan!, ixi chuntia me e koxruan an.

⁴³ Hora me e xi jua i bakikon chao bikon xa, ko rué e xa ndo Jesús, ko jitajon xa juasaya ngajin ndo Dio. Ko kain ni bikon nge e juinche e Ndo Jesús kaxon kuajon nā juasaya ngajin ndo Dio.

19

Ndo Jesús ko xi Zaqueo

¹ Ko Ndo Jesús kuiji ndo tjajna Jericó ko kuixin in ndo tjajna me e.

² Ko nti a bake e naa xi chóna itsjé tomi ndatin in xa Zaqueo. Xi me e tetuen en xa xi tejo tomie xi tetuan an tjajna Roma.

³ Ko je e xa tjaun xa tsikon xa ndo Jesús. Ko jua i tikon xa ndo ixi tsango itsjé nā jii nā nti a, ko je e xi Zaqueo jine a xa.

⁴ Méxin binga xa kuitaon xa ko kuajin in xa naa ntaā ndatin in sicómoro, ti no tsatsinga ndo Jesús.

⁵ Ko hora kuatsinga ndo Jesús, tsje e ndo noi ti jii xi Zaqueo ko ndachro ndo:

—Zaqueo, jaiko xingajian ixi jai xrokonda tsituna ndúya.

⁶ Tjume e xi Zaqueo jaiko xingajin xa, ko tsango juaxruxin bake e xa ixi ndo Jesús tsitu e ndo ndo a xa.

⁷ Ko kain na bikon na, ko kuaxi na nichja na ixi sonda ndo Jesús itsji ndo tsikitu e ndo ndo a naa xiña i.

⁸ Ko tjume e xi Zaqueo ndache xa ndo Jesús:

—Nchána, jai xrotjá a ni nóa ngusinexin kain nge e chonda, ko siá xrojan ngisen juntaya a ko kue é tomie na, jan an tsonkjan an na noóxin ícha ti kuantsja a na.

⁹ Ko ndo Jesús ndache ndo xi Zaqueo:

—Jai ndo Dio tsantsje ndo jíee ni ste nchia nti i, ixi kaxon xi ji i kuachrjenixin xa ndo Abraham.

¹⁰ *Méxin, jan an chjen en ndo Dio, xjan jongí e xranchi chujni, jui i bijée ngisen tsikitjáña ko tsantsje ijie chóna sen.

Ndo Jesús tjako ndo chijnie tomi
(Mt. 25:14-30)

¹¹ Ko ndajitin en na nge e jindachro ndo Jesús ko beki ndo naa chijni juakoxin ndo, ixi ó kuiji ndo tjenka tjajna Jerusalén, ko ixi je e na xraxaon na ixi ndo Dio ó tsaxi ndo tsetuan an ndo ngata a nunte nti i.

¹² Méxin ndachro ndo:

—Bake e naa xi, xi me e chjen en kaxin ni tetuan an ko sakjui xa ikjín inaa nunte ixi nti a je e xa xrokjan xa rey, ko tjume e xrokjan xa tjajnée xa.

¹³ Ko ó xrokuachrjexin xa tjajnée xa, méxin kuiye e xa ite xi nchexrée xa ko chjée xa xi nchexra kaxin tomi ngujngu xa, ko ndachro xa: “Nchejinche enta tomi ji i ixra xrokjanjan jan an.”

¹⁴ Ko ni tjajnée xi me e ningakon en na xa, méxin xruan an na kaxin ni xrondachro: “Tjaun ana xi ji i xrokjan xa rey tsetuannana.”

¹⁵ Ko tjume e, juexin kuayé e xa juachaxin ikjan xa rey, ko nchakon ikjan xa tjajnée xa kuetuan an xa tsij ni nchexrée xa, ni chjeye e tomi, ixi tjaun xa tsono e xa ngijan in juacha tomi kuajon xa ngajin ngujngu na.

¹⁶ Xi ícha tuinxin konchjiñe e ndachro xa: “Nchána, tomi chjánana juacha íjngo ite tomi xranchi chjánana.”

¹⁷ Ko je e xi rey ndachro xa: “Chao; jian juinche e ixra, ixi jian juinchejinche e ti kueya i tjá a, méxin jai xrotjá a juachaxin tsituan an ite tjajna.”

¹⁸ Tjume e konchjiñe e inaa xi nchexra ko ndachro xa: “Nchána, ti tomi chjánana juacha tomi íjngo na ó tomi xranchi chjánana.”

¹⁹ Xraje o jaña ndachro xi rey xranchi ndache xa xi sa ó kuij: “Jan an xrotjá a juachaxin tsetuan an na ó tjajna.”

²⁰ Ko tjume e konchjiñe e inaa xi nchexrée xa ko ndachro xa: “Nti i jii tomia chjánana. Jan an kuatsiin tomi ngaya naa panito

²¹ ixi jan an xronkana ixi ja a naa xi tsango ntue e, ko tatsían nge e je a na a, ko tatsían ti no benga ia.”

²² Tjume e xi rey ndachro xa: “Ja a je a naa xi nchexra jian, ixi ti ndachrua ja ua kuama ijie. Siá ó no a ixi jan an tsango ntuenta, ixi tja o ti no xro an nge e bakée, ko tatsiin ti no benga i,

²³ ¿sonda bikan ia tomina naa nchia nchejinchexina tomi ixra ixi jaña nchakon xrojui i xrokuaya tomina ko ti juacha tomi?”

²⁴ Ko ndache xi Rey ni ste nti a: “Tantsje enta xi ji i tomi kuayé e xa ko tájonnta tomi ngajin xi chóna ite tomi.”

²⁵ Ko je e na ndachro na: “Nchána, ¿sonda tsayé e je e xa siá ó chóna xa ite tomi?”

²⁶ *Ko xi Rey ndachro xa: “Jan an ntatjunta, ngisen chóna itsjé, sen me e ícha tsayé e sen, ko ni xro an chóna ko maski ti nchiín chóna na tsachrje e na.

27 *Ko kain ni ningakonna, ni tjaun ana ixi jan an xrokuaya a juachaxin tsetuan an ngata a nunte nti i, tikuunta na nti i ixi tsikon xranchi tsen en na.”

*Ndo Jesús kuixin in ndo tjajna Jerusalén
(Mt. 21:1-11; Mr. 11:1-11; Jn. 12:12-19)*

28 Juexin ndachro ndo Jesús kain ji i, íjngo kua ndo cha o itji tjajna Jerusalén.

29 Ko tjume e kuiji sen tjenka tjajna Betfagé ko tjajna Betania, tjenka ijna ndatin in Olivo, je e ndo kuetuen en ndo yuu sen chrikao ndo

30 ko ndache ndo sen:

—Itjinta nchia ste no yá a, ko ti tsjasonta nti a tsinchíinta naa kuntajno jichroá ba nti a ko xraxro an ngisen teta a ba. Tonxindange enta ba ko tikuunta ba nti i.

31 Ko siá xrojan ngisen tsjanchangi anta ko xrondachro na: “¿Sonda tonxindange enta kuntajnona?”, ja anta tjatingíexinnta: “Nchána xrokonde e ndo ba.”

32 Ko sen xruan an ndo ikjui sen ko kuitja sen kuntajno xranchi ndachro ndo.

33 Ko stetoxindange e sen kuntajno me e, kuiji ni kuntajnoé ko ndachro na:

—¿Sonda tonxindange enta kuntajnona?

34 Ko je e sen juatingíexin sen:

—Ixi Nchána xrokonde e ndo ba.

35 Ko tjume e bika o sen ba ti no jii ndo Jesús, ko bake e sen ti tetsáa sen ngata a ba ko juinçekita a sen ndo kuntajno.

36 Ko ti jitatsinga ndo, bingó na ti tetsáa na ngatja cha o ti jitatsinga ndo Jesús.

37 Ko stetonchjiñe e sen ti xingajinxinni ijna Olivo, tsango itsjé na sterué e na ndo Jesús ko ché e na, méxin séen kuyako na stetajon na juasaya ngajin ndo Dio ixi tsango itsjé nge e jian bikon na juinche e ndo Jesús.

38 Ko séen ndachro na:

—¡Itsjé juachaxin chóna ndo Rey, ndo jiti tsixrua an ndo Dio! ¡Chaxro ko ijié juaxruxin tsake e ngajni ko ijié juasaya tsayé e ndo Dio!

39 Tjume e kaxin xi fariseo ste xa ngakjen en ni nti a ndachro xa:

—Maestro, tetuen én chujnia xrotenko na.

40 Je e ndo Jesús juatingíexin ndo ko ndachro ndo:

—Jan an ntatjunta ixi siá xrotenko chujnina, ixro tsaxi ixro xronichja ixro.

41 Ti kuiji ndo Jesús tjajna Jerusalén, bikon ndo tjajna, je e ndo tsjangaxin ndo tjajna me e,

42 ko ndachro ndo:

—¡Siá nchakon jai ja a xrokuichuxianna, xrokuaye é ijié juaxruxin! Ko jai ja a tienxin a ixi jije e ikuan.

43 Ko tsii nchakon tangi ngajian ixi tsii kaxin tjajna xroningakon an ko tsija a na ko tsingakon an na nguixin ngandajian, ko tse to na ngajian.

44 Ko tsjacha na tsóna na, ja a ko kain chjan an, ko kain tjatu o ndúya tsonchjejin na, tsintue a na ninaa ixro ngata a inaa ixro. Ixi ja a kuichuxin a nchakon kuiji ndo Dio ngajian.

*Ndo Jesús juinchetjúá ndo ni ngo Jerusalén
(Mt. 21:12-17; Mr. 11:15-19; Jn. 2:13-22)*

45 Nchakon kuixin in ndo Jesús ngaxin in ni ngo ijié jii tjajna Jerusalén, kuaxi ndo kuantsje ndo kain ni stenchekji ko ni stete na nti a.

46 Ko ndachro ndo:

—Chijnie ndo Dio ndachro: “Nía ndatin in nchia nichjanaxinna sen”, ko ja anta juinçekjannta ncha ndo e xiche e.

⁴⁷ *Kain nchakon bake e ndo Jesús ngaxin in ni ngo me e, ko banchekuen en ndo chujni chijnie ndo Dio. Ko xitaana baketuan an, ko kain xi tjako ley, ko kain xi baketuan an tjajna me e jitjee n̄ xranchi tsóña n̄ ndo Jesús.

⁴⁸ Ko kuitja i n̄ xranchi tsóña n̄ ndo Jesús ixi kain n̄ stetin en n̄ nge e jichro ndo.

20

Juachaxin chóna Ndo Jesús

(Mt. 21:23-27; Mr. 11:27-33)

¹ Naa nchakon ndo Jesús juinchekuen en ndo n̄ ngaxin in ni ngo ijié, xranchi ndo Dio tsantsje ndo ijié chóna n̄. Hora me e kuiji kaxin xitaana, xi ícha tetuan an, ko xi tjako ley, ko kaxon kaxin xi tetuan an.

² Ko ndache xa ndo Jesús:

—Ndachijiana ngisen tjáa juachaxin ixi jaña nche e o, ¿ngisen tjáa juachaxin ji i?

³ Ko ndo Jesús juatingíexin ndo ko ndachro ndo:

—Kaxon jan an tsjanchangi anta naa nge e ko tjatingíexinnta.

⁴ ¿Ngisen xruan an ndo Juan, ndo bikitée chujni? ¿Á ndo Dio o chujni?

⁵ Ko kuaxi xa tjakaxin kichuu xa ko ndachro xa:

—¿Nge e tsjatingíexinna? Siá xrondachrona ixi ndo Dio tsixrua an xi Juan, xi Jesús xrondachro xa: “¿Sonda kuitikaon anta xa tjume e?”

⁶ Ko siá xrondachrona ixi chujni xruan an xa, kain ni ste nti i tsoñao n̄ ko tsaxinna n̄ ixro, ixi no e n̄ ixi xi Juan naa ndo profeta.

⁷ Méxin je e xa juatingíexin xa:

—Nóna ina ngisen xruan an xi Juan.

⁸ Tjume e ndachro ndo Jesús:

—Kaxon jan an xrontatju inta ngisen chjána juachaxin nta a ji i.

Ndo Jesús juako ndo naa chijni kondee xi nchexr̄a ña i

(Mt. 21:33-44; Mr. 12:1-11)

⁹ Ndo Jesús kuaxi ndo nichja ndo chijni ji i ko ndachro ndo:

—Bake e naa xi benga nt̄a tu uva nunte e xa, ko tjume e kuajon xa nunte ngajin inaa xi sinche e xa ixr̄a ko sakjuí xa kaxin nano.

¹⁰ Ko kuiji nchakon xroxexo itu me e, xruan an xi nunte e naa xi nchexrée xa ixi xrokuayé e xa itu tikinixin en xi nunte e. Ko je e xi kuayé e nunte xro an nge e kuajon xa, ko juaya xa ngajin xi xrokuayé e itu ko bengi kichuu xa.

¹¹ Tjume e xruan an xi nunte e inaa xi nchexrée xa. Ko kaxon jaña juinchekao n̄ xa, juaya n̄ ngajin xa ko kuyakutee kichuu xa, ko xro an nge e kuayé e xa.

¹² Ko tjume e xi nunte e xruan an xa inaa xi nchexrée xa. Ko kaxon xi me e xraje o juinchekao n̄ xa ko bengi n̄ xa.

¹³ Ko tjume e xi nunte e ndachro xa: “¿Nge e sinta a? Xroxruan an chjan na, xjan tsango tjua a. Ko siá tsikon n̄ chjan na tsitikaon n̄ ko tsajon n̄ juasaya* ngajin xjan.”

¹⁴ Ko je e xi kua nunte, bikon xa chjen en xi nunte e, ndache xa xi kaxin xi nche e ixr̄a: “Xjan ji i tsayé e xjan nunte e ndotée xjan, méxin naatsóñaxón n̄ xjan ixi tsintueina kain nge e tikinixin en xjan.”

¹⁵ Ko tjume e kuantsjexin n̄ xjan ngata a nunte ko naakóñaxón n̄ xjan.

Ko ndo Jesús ndachro ndo:

—¿Nge e sinche e xi nunte e ngajin ni nchexr̄a ña i?

¹⁶ Je e xa itsji xa ko naatsóñaxón xa xi kua nunte, ko tsajon xa nunte e xa ngajin ikaxin n̄.

Hora kuin en n̄ ji i, ndachro n̄:

—¡Ndo Dio tsajon a juachaxin tson en ji i!

¹⁷ Ko ndo Jesús jitsje e ndo na ko ndachro ndo:

—Méxin, ¿nge e xrondachro xroon chijnie ndo Dio ti jitaxin ja in?

Ixro jueña^o a ni nchekonchjian nchia,
ixro me e ikjan ixro ícha tjintee.

¹⁸ Ko ngisen tsitsingata a ixro ji i, ni me e tsaki kain nte e na. Ko siá ixro tsitsingata a ixro ngata a naa ngisen, ni me e xrokjan na xranchi inche.

Ti xroxenge e xi tetuan an

(Mt. 21:45-46; 22:15-22; Mr. 12:12-17)

¹⁹ Ko tjume e kain xitaana baketuan an ko xi tjako ley tjaun xa xrotsé xa ndo Jesús ixi kuienxin xa contre xa nichja ndo. Ko jua i itsé xa ndo ixi xrakon en xa ni tjajna.

²⁰ Méxin xruan an xa kaxin xi xrotsjaya xa ndo Jesús ko xi me e sinche e xa xranchi ngisen tsango jian ko nduaxin a, xi me e stechón en xa ixi nchéxin tsin en xa xronichja ndo Jesús naa nge e ndakua i ixi jaña tsjangí e xa ndo ngajin xi tetuan an.

²¹ Méxin juanchangi xi stetsjaya ndo Jesús:

—Maestro, nónana ixi kain ti nichjanta ko ti tjakonta me e ti nduaxin ko ti tjaun ndo Dio, ko ja anta tinche anta kaxion chujni, ixi ja anta tjue enta kain na.

²² Ko jai ndachijnnta: ¿á chao tsjengana na ngajin xi tetuan an, o á na i?

²³ Ko ndo Jesús kono e ndo ixi ndako a stexraxaon xa, méxin ndachro ndo:

—¿Sonda tjaunnta sincheyananta?

²⁴ Tjako nanta naa tomi. ¿Ngisen ikon jinito nti i, ko nge e jitaxin?

Ko je e xa juatingíexin xa ko ndachro xa:

—Ikon xi César.

²⁵ Méxin ndachro ndo Jesús:

—Chje énta xi César ti tikinixin en xa, ko chje énta ndo Dio ti tikinixin en ndo tsayé e ndo.

²⁶ Ko juacha i xa sinchenichja xa ndo Jesús ninaa nge e ndako a ngatoxin ni tjajna jitin en. Ko je e xa juinche e xa juaxruxin xranchi juatingíexin ndo, méxin tenko xa.

Xranchi xroxechón chujni

(Mt. 22:23-33; Mr. 12:18-27)

²⁷ *Ko tjume e kuiji kaxin xi saduceo kuitsje e xa ndo Jesús. Ko xi saduceo me e titikaon a xa ixi xroxechón chujni tsiken en. Méxin ndache xa ndo Jesús:

²⁸ —Maestro, ndo Moisés tsikjin ndo xroon ndachro siá naa xi tsikute e, ko ndakuen en xa ko xro an ichjan kuachón^{da} xa ngajin janchri e xa, xi kichuu xi kuen en xrokonda tsute e xa ngajin nchri ka an me e, ko xrochón^{da} xa ichjan, ko xjan me e xrokjan xjan xranchi chjen en xi kuen en.

²⁹ Bake e yaato xi, xi me e kichuu xa. Ko xi sa ó kute e xa janchri e xa ko ndakuen en xa ko xro an ichjan kuachón^{da} xa ngajin janchri e xa.

³⁰ Ko xi yuxin kute e xa nchri ka an, ko kaxon ndakuen en xa ko xro an ichjan kuachón^{da} xa ngajin nchra.

³¹ Ko tjume e xi nínxin kute e xa nchri ka an me e, ko xraje o ndakuen en xa. Ko jaña kon en kain ti yaato xa. Kain xa kuen en xa ko xro an chjan kuachón^{da} xa ngajin nchra.

³² Ko tjume e je e nchra kuen en nchra kaxon.

³³ Méxin nchakon xroxechónⁿⁱ, ¿ngixe i ti yaato xi kuen en xrokjan xixi e nchra, ixi kain yaato xa, kute e xa nchri me e?

³⁴ Tjume e juatingíexin ndo Jesús:

—Nti i ngata a nunte, xi ko nchri tute e na.

³⁵ Ko ni tsikinixin satsji ngajní xroxechón na, nti a tsute a na.

³⁶ Ixi nti a ítsen a chujni, nchakon me e chujni xrokjan sen xranchi sen ángel, ko ni me e xrokjan n̄a chjen en ndo Dio ixi ndo Dio juinchexechón ndo n̄a.

³⁷ Ko kaxon ndo Moisés juako ndo kondée ti xroxechón chujni, ikjin ndo ti jitaxin xranchi naa n̄a kjuáa xro i ko che a n̄a, nti a ndachro ndo Moisés ixi ndo Dio me e ndo Dio titikaon ndo Abraham, ndo Isaac, ko ndo Jacob.

³⁸ Ko ndo Dio je a ndo Dio ne e chujni ndatsiken en. Ndo Dio, ndo Dio ne e chujni stechón, ixi je e ndo tikon ndo kain n̄a jichón n̄a.

³⁹ Ko kaxin xi tjako ley ndachro xa:

—Maestro jian ndachronta.

⁴⁰ Ko xronka xa ko íxro an nge e juanchangi e xa ndo.

Ngisen kuachrjenixin Ndo Cristo

(Mt. 22:41-46; Mr. 12:35-37)

⁴¹ Ndo Jesús ndachro ndo:

—¿Á nduaxin ndachro chujni ixi ndo Cristo kuachrjenixin ndo ndo David?

⁴² Ndo David tsikjin ndo xroon Salmos ko ndachro ndo:

Nchána ndo Dio ndache ndo Nchána:

“Take é tjenkana ndatsjonxin jian,

⁴³ tsake ejan ni ningakon an chringi tutáa.”

⁴⁴ Ko siá ndo David ndache ndo ndo Mesías Nchána, ¿sonda tjume e ndo Cristo xrokjan chjen en ndo David?

Ndo Jesús tjangi e ndo xi tjako ley

(Mt. 23:1-36; Mr. 12:38-40; Lc. 11:37-54)

⁴⁵ Kain n̄a stetin en n̄a ti nichja ndo Jesús ngajin sen teyuu chrikao ndo:

⁴⁶ —Tsje enta jian xranchi nche e xi tjako ley ko nche anta xranchi je e xa, je e xa nche e xa juaxruxin take e xa manta jine, ko tjaun xa tsajon n̄a juajna ngajin xa ngataon ndasin, ko take e xa ícha tjenka ngaxin in ni ngo, ko nchakon itji xa kia tjaun xa tsake e xa ti xitaon ícha jian.

⁴⁷ Ko ixi juancheya xa tantsje e xa nchri ka an ndo a nchra ko tjume e nchexion xa, sée nichje e xa ndo Dio. Xi me e ícha tangi tson en xa nchakon sinchéña ndo Dio ije.

21

Tomi kuajon naa nchri ka an

(Mr. 12:41-44)

¹ Ndo Jesús jii ndo ngaxin in ni ngo ijié ko jitsje e ndo ixi itsjé ni chóna kueya tomi ko kueya nge e, kujj n̄a ko bake e n̄a tomi ngaya n̄a tingachjian tomi.

² Ko bikon ndo Jesús kujj naa nchri ka an ko nóa nchra, nchri me e bake e nchra yuu tomi nchínchín, tomi tjinte a.

³ Ko ndo Jesús ndachro ndo:

—Jan an nduaxin ntatjunta ixi nchri ka an nóa, ícha tjintee tomi bake e nchra ixi ti kuajon ikaxin n̄a,

⁴ ixi je e n̄a kuajon n̄a ti nge e xe e chóna n̄a, ko je e nchri nóa kuajon nchra kain tomi xrojuinexin nchra.

Ndo Jesús ndachro ndo ixi xrochjejin ni ngo

(Mt. 24:1-2; Mr. 13:1-2)

⁵ Kaxin n̄a stetjao n̄a ixi ni ngo ijié tsango chaxro ixro tsiki texin ni ngo, ko chaxro jitsje e nge e tsikajon n̄a ngajin ndo Dio. Ko ndo Jesús ndachro ndo:

⁶ —Tsij nchakon kain nge e tikonnta tsitjáña, kain xrochjejin ko ninnaa ixro tsitu e ngata a inaa ixro.

Nge e tson en nchakon tsitjáña nunte xasintajni
(Mt. 24:3-28; Mr. 13:3-23)

⁷ Juanchangi e na ndo Jesús:

—Maestro, ¿ngisa tson en ji i? ¿Ko nge e tsjakoxin ixi jaña tson en?

⁸ Ndo Jesús ndachro ndo:

—Tsje enta jian ixi xro an ngisen sintaya anta. Ixi tsii kueya na xrondachro na ixi je e na ndo Cristo na, ko xrondachro na: “Ó tsitjáña nunte.” Ja anta titikaon anta ti ndachro ni me e ko rue anta na.

⁹ Nchakon tsin ennta ixi stetóna kichuu naa tjajna ko inaa tjajna, ko kaxon kaxin tjajna steteto na, xronka inta ixi kain ji i sa ó xrokonda tson en ko xratsitjáña i nunte.

¹⁰ Ko ndo Jesús ndachro ndo ikaxin nge e:

—Tseto naa tjajna ko inaa tjajna, naa xi tetuan an naa tjajna ngajin inaa xi tetuan an inaa tjajna.

¹¹ Ko itsjé no tsanga tsontengi nunte, ko tsango tsatse na jinta ngata a nunte, ko kaxon tsango itsjé ichin tsii ngata a na, ko tsango chinga nge e tsikonni ngajni ko tsango sinchexronkana.

¹² 'Ko kain ji i xratsuen a, ixi sa ó tsenginta na, ko ndako a sinta anta na ko xrox-raxin innta na ndo achjiso ko tsingakjinnta na ngajin ni tituan an ni ngo ko tsikaannta na ngajin xi tetuan an, kondanaxin jan an.

¹³ Ko kain ji i sinta anta na, ko jaña ja anta chao xrondachronta ixi titikaonntana jan an.

¹⁴ *Ja anta ta inta juachjaon ko xraxaon anta xranchi tsjatingíexinnta ti nge e tsjan-changi anta na.

¹⁵ Ixi jan an xrontatjunta nge e tsjate enta, chijni jian tsaye enta, ko ninna ni ningakon annta jua i tsjatingíexin na.

¹⁶ Ko kaxon ndotánta, janánta o xi kichuunta o ngixe i inaa ni ndointa, tsajon na juachxin naatsónaxónnta na.

¹⁷ Ko kain ngisen xroningakon annta ixi titikaonntana.

¹⁸ Ko maski jaña tson en, ninna xrajaanta tsitjáña i.

¹⁹ Soji tinteenta, me e jaña tsjachanta tsarichonnta kain nchakon.

²⁰ 'Ko nchakon tsikonnta ixi tjajna Jerusalén tsixindajin xi soldado, ja anta tsono anta ixi íse a xrochjejin nchijíi tjajna me e.

²¹ Tjume e ni jii nunte Judea xrokonda tsingana satsji na ngata a jna. Ko ni ste tjajna Jerusalén kaxon xrokonda satsjixin na nti a ko ni ste ngataon ijngi íxrokjan i na tjajna.

²² Ixi kain nchakon me e tsango tsikaon ni titikaon a, ko ijíe juachjaon tsake e, xranchi jitaxin xroon chijnie ndo Dio.

²³ ¡Lastu kain nchri jía ichjan nchakon me e, ko nchri chóna ichjan stetaki! Ixi tsango ijíe juachjaon tsake e nchijíi ngata a nunte, ixi tsango tsikaon ko tangi tson en ni tjajna me e.

²⁴ Ko kaxin sen tsónaxin na sen ixi chika espada ko kaxin sen xrotsé na sen satsikao na sen ndo achjiso inaa tjajna. Ko ni chúxin a ndo Dio tsingatjangi na tjajnée ndo, tjajna Jerusalén, tsitjaja nchakon xrokjan chjen en ndo Dio.

Tsii chjen en ndo Dio, xjan jongí e xranchi chujni
(Mt. 24:29-35, 42-44; Mr. 13:24-37)

²⁵ *Tjume e tsonoxin nge e tson en chjiixro ko nchanitjao ko nchanotsé. Ko ngata a nunte xasintajni* kain tjajna tsaa na juachjaon, ko xroxranka na ixi tsanga tsontengi ko xroxruin ndachaon.

²⁶ Tsango xroxronka na ko tsontiye e na kondeexin xraxaon na nge e tson en ngata a nunte, ko kaxon kondeexin kain nge e jii ngajni tsontengi.

²⁷ *Ko tjume e tsikon na ndo Jesús, chjen en ndo Dio, xjan jongí e xranchi chujni, tsii ndo ngata a naa itjuí ko tsika o ndo ijié juachaxin tsetuan an ndo ko kaxon tsango ijié chjiixro tsika o ndo.

²⁸ Ko nchakon xroxrangíxin tson en kain ji i, take énta juaxruxin, ko tsikonnta ixi ndo Cristo ó kuii ndo tsantsjen ndo ijié chondanta.

²⁹ Ko ndachro ndo Jesús inaa chijni:

—Tsje enta xranchi jii ntaa tajon itu higo ko ikaxin ntaa.

³⁰ Nchakon tsikonnta jixechji ntaa, me e no anta ixi ó tsaxi sinche e súa.

³¹ Jaña kaxon nchakon tsikonnta ixi tsaxi tson en ngajní kain ji i, tsono anta ixi tuinxin tsii ti tsetuan an ndo Dio ngata a nunte.

³² Jan an nduaxin ntatjunta ixi sa ó tson en kain ji i, ko xratsen a chujni jii jai ngata a nunte.

³³ Ngajní ko nunte xasintajni tsatsinga, ko ti nichja jan an tsatsinga i, nduaxin tson en.

³⁴ Tsje enta xranchi take énta; xraxaon anta ixi je o xrotjaunna sintenta, xrokoannta ko ti ícha tajon juaxruxin ngata a nunte nti i ko ixi kondeexin me e tsonoa inta ó kuii nchakon tsji i.

³⁵ Ixi nchakon me e tson en xranchi take e naa nocha a itsé kulano, jaña tson en ngajin kain ni ste ngata a nunte.

³⁶ Méxin tsejua i asáanta, ko jian tantje e ikonnta, ko kain nchakon nichje enta ndo Dio ixi jaña chao tsatsinganta juachjaon tsii, ko jaña chao tsonchjiñe enta ngajin chjen en ndo Dio, xjan jongí e xranchi chujni.

³⁷ *Taanchakon ndo Jesús banchekuen en ndo na chijnie ndo Dio ngaxin in ni ngo ko tiie bakitu e ndo ti ijna ndatin in Olivo.

³⁸ Ko kain ni tjajna, ndúyo bakonchjiñe e na ti jii ni ngo ixi tjaun na tsin en na ti ndachro ndo Jesús.

22

Imao juao na xranchi xrotsé na ndo Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Ó jitonchjiñe e nchakon xrangíxin kia ti sine na nutja chóna i ti tja in nio, ko kia me e ndatin in Pascua.

² Kaxin xitaana xi tetuan an ko xi tjako ley stexraxaon xa xranchi tsóna xa ndo Jesús ixi ste xrakon en xa ni tjajnée xa.

³ Ko Xixron anxrée kuixin in aséen xi Judas kaxon ndatin in Iscariote. Xi me e naa xi teyuu sen bajikao ndo Jesús.

⁴ Ko xi Judas ikjui xa ngajin xitaana, xi tetuan an, ko xi stendáa ni ngo ko kuintejao xa xranchi tsingijna xa xrotsé na ndo Jesús.

⁵ Ko xi ste ni ngo tsango bake e xa juaxruxin ko juao xa ixi xrochjée na xi Judas tomi ixi tsingijna xa.

⁶ Ko xi Judas kutuexin xa ko jichón en xa xrochronga xa ngiora chao xrotsé na ndo Jesús nchakon xro an ngisen jii.

Sen teyuu juinekao sen ndo Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Ko kuii nchakon kia pascua sine sen nutja chóna i ti tja in nio, ko nchakon me e xrokonda tsen en naa kutuchjon sine sen.

⁸ Ko ndo Jesús xruan an ndo ndo Pedro ko ndo Juan ko ndachro ndo:

—Itjinta nchekonchjiannta ti sintena kia Pascua.

⁹ Ko je e sen juanchangi e sen ndo Jesús:

—¿Tinó tjaunnta tsonchjian ti sintena?

¹⁰ Je e ndo ndachro ndo:

—Hora tsixin innta tjajna ijié, tsetannta naa xi yama xa naa nchixréen inda. Rue énta xa ti nchia tixin in xa.

¹¹ Ko ndachenta xi ndo a: “Ndo nchekuannana ndachro ndo: ¿Ti no jii nchia sinexinna, jan an ko sen teyuu tajikia an, jai kia Pascua?”

¹² Ko je e xi ndo a tsjako anta xa naa nchia ijié, nchia yuxin jii ngata a noi, ko nchia me e ó chóna nchia kain nge e. Nti a nchekonchjianxinnta ti sintena.

¹³ Ko je e sen sakjui sen ko kuitja sen kain nge e xranchi ndachro je e ndo. Ko nti a juinchekonchjian sen ti sinekao sen ndo Jesús kia Pascua.

¹⁴ Ko kuitja hora sine sen, ndo Jesús ko ti sen teyuu chrikao ndo kuiji sen nti a ko bake e sen ti jii ntachaon.

¹⁵ Tjume e ndo Jesús ndachro ndo:

—Jan an tsango jueña o sinekuu kichuuna kia Pascua ti xratsen ana!

¹⁶ Ixi jan an ntatjunta í sine a kia ji i tsija nchakon tsetuan an ndo Dio.

¹⁷ Ko tjume e itsé ndo naa copa jitjiá vino ko kuajon ndo juasie ndo ngajin ndo Dio, ko ndachro ndo:

—Tin innta ti jitjiá copa ko tonchjeye e kichuunta.

¹⁸ Jan an ntatjunta ixi tsj a vino tsija nchakon ti tsetuan an ndo Dio.

¹⁹ Ko tjume e itsé ndo nutja ko kuajon ndo juasie ndo ngajin ndo Dio, ko konchrinjin ndo nio ko konchjeye e ndo sen ko ndachro ndo:

—Ji i cuerpona tsájon tsen en ixi ja anta. Nche enta ja in, me e xraxaonxinnintana jan an.

²⁰ Ko juexin juine sen nutja kaxon kuajon ndo copa jitjiá vino ko ndachro ndo:

—Ti jitjiá copa ji i xrondachro nge e natjúá tsixintaxin ixi jnina tsintji ixi ja anta.

²¹ Ko xi sinchekjina nti i jii xa, rinekj an xa ngata a ntachaon.

²² Méxin chjen en ndo Dio, xjan jongí e xranchi chujni, xrokonda tson en xjan xranchi jitaxin xroon, ko, ícha tangi tson en xi sinchekji xjan!

²³ Ko tjume e sen teyuu chrikao ndo kuaxi sen juakaxin kichuu sen ixi ngisen sinche e me e.

Ngisen ícha tjintee

²⁴ *Ko tjume e juakaxin kichuu sen ixi ngakjen en sen, ngisen ícha tjintee.

²⁵ Tjume e ndachro ndo Jesús:

—Kaxin xi chúxin a ndo Dio tsango tetuan an xa ngajin ni tjajnéa xa, ko xi tituan an ndachro xa ixi tsango jian xa ko tingijna xa tjajnéa xa.

²⁶ *Ko ja anta nche anta jaña. Ixi ngisen ícha tjintee, ícha tsitikaon sen xranchi naa chajan, ko chujni ícha tetuan an, me e sinche e ixra xranchi naa xi nchexra.

²⁷ *Méxin, ¿ngisen ícha tetuan an, á sen take e sine, o sen tajon sine ngajin ni jii ntachaon? Ngisen sine ti jii ntachaon, ni me e ícha tetuan an na, ko jan an ritjén ngajin ja anta xranchi naa ni nchexra.

²⁸ 'Ko ja anta bake enta ngajin jan an kain nchakon ko bikonta kain nge e tangi kuatsinga.

²⁹ Méxin jan an tjá anta juachaxin tsetuan annta xranchi juachaxin kuayá a chjana Ndotána,

³⁰ *ko ja anta sintenta ko tsi inta ti jii ntachaon tsétuan an; tsake enta nti a tsetuan annta ko sinchéñanta ijié ngajin teyuu tjajna kuachrjenixin ndo Israel.

Ndo Jesús chronga ndo nge e sinche e ndo Pedro

(Mt. 26:31-35; Mr. 14:27-31; Jn. 13:36-38)

³¹ Kaxon ndachro ndo Jesús:

—Simón, Simón, Xixron anxrée juanchia xa juachaxin tsontsjenga xa xranchi noa trigo.

³² Ko jan an kuinóatána ngajin Ndotána ixi ja a nduaxin xrochuntiana. Ko nchakon xrokjan tsitikaonna, tingijna sen kichuua ixi kaxon tsitikaon sen ko soji tsintee sen.

³³ Ko ndo Simón ndachro ndo:

—Nchána, jan an xrorua anta ti no tsiku unta na ko siá tsija anta kaxon jan an, ko siá ja anta tsen ennta, kaxon jan an tsen ena.

³⁴ Ko juatingíexin ndo Jesús:

—Pedro, jan an ntatjua ixi jai xraxrotsje a kuntaxichíká, ja a xrondachrua níi vez chuxin ana.

Kuui hora tangi sinchekaon na ndo Jesús

³⁵ *Tjume e ndo Jesús juanchangi e ndo sen chrikao ndo:

—Nchakon xruan annta, bikon inta puxa, nge e tsinga tomi, ko kate ko, ¿á xrojan nge e xrokonda anta?

Ko je e sen juatingíexin sen:

—Na i, xro an nge e.

³⁶ Ko tjume e ndachro ndo Jesús:

—Ko jai je a jaña tson en; ngisen chóna tomi, tsama sen tomie sen, ko kaxon puxa tsengachjian sen nge e sine sen; ko ngisen chóna i espada sinchekji sen noxrée sen ko tse na sen chika.

³⁷ Jan an nduaxin ntatjunta ixi xrokonda tangi tsónna xranchi ndachro chijnie ndo Dio: “Xranchi naa xi ndako a nche e, bikona ndo.” Méxin kain ti jitaxin xroon ixi jan an, xrokonda jaña tson en.

³⁸ Tjume e sen chrikao ndo ndachro sen:

—Nchána nti i jii yuu chika espada.

Ko ndachro ndo Jesús:

—Ó chao, í nichja inta ícha.

Ndo Jesús nichja ndo ngajin ndotée ndo

(Mt. 26:36-46; Mr. 14:32-42)

³⁹ Tjume e ndo Jesús kuachrjexin ndo tjajna Jerusalén ko sakjui ndo ti jii ijna ndatin in olivo xranchi kuanche e ndo, ko sen chrikao ndo rué e sen ndo.

⁴⁰ Ko hora kuiji sen nti a, ndachro ndo:

—Ja anta nichje enta ndo Dio ixi tsingijnanta ndo ixi xro an ijie tsamanta.

⁴¹ Ko tjume e ndo Jesús kuachrjendáa ndo kjinxin xranchi ti tjankani naa ixro, ko nti a bake exin ndo ntatuchi in ndo ko nichje e ndo ndotée ndo, ndo Dio.

⁴² Ko ndachro ndo:

—Ndotána, siá tjaunnta, tsatsinga kain nge e tangi tsónna ko tsoen a xranchi jan an tja on, tson en xranchi tjaun ja anta.

⁴³ Ko tjume e konoxin naa ndo ángel kuixin ngajni ixi sinchesoji ndo aséen ndo Jesús.

⁴⁴ Ko ixi tangi jiton en aséen ndo Jesús, ícha soji nichje e ndo ndotée ndo ko bakintji ndachjién ndo ngata a nche xranchi ndua gota ijni.

⁴⁵ Hora juexin nichje e ndo Jesús ndotée ndo, ko bingatjen ndo kuitsje e ndo ti jii sen kuajikao ndo, kuitja ndo sen stejua sen ixi ijie juachjaon chóna aséen sen.

⁴⁶ Méxin ndachro ndo:

—¿Sonda stechrinnta? Xingama anta, ko nichje enta ndo Dio ixi tsingijnanta ndo sinche anta nge e ndako a.

Itsé na ndo Jesús tsije e na ndo

(Mt. 26:47-56; Mr. 14:43-50; Jn. 18:2-11)

⁴⁷ Xrajinichja ndo Jesús, kuii kueya nã ko jitaon xi Judas, xi me e naa xi teyuu sen bajikao ndo. Ko konchjiñe e xi me e ngajin ndo Jesús ko kuitoxin xa ndo.

⁴⁸ Ko tjume e ndo Jesús ndache ndo xi Judas:

—Judas, ¿á ixi kuitoxiana me e xrondachro sinchekjiana, jan an chjen en ndo Dio, xjan jongí e xranchi chujni?

⁴⁹ Ko sen chrikao ndo Jesús, bikon sen nge e jiton en me e juanchangi e sen ndo:

—Ncháina,* ¿á tsjayana ngajin ni ji i ixi chika espada?

⁵⁰ Ko naa sen chrikao ndo Jesús juincheni e sen naa xi nchexrée xitaana, xi ícha tetuan an, naa chrinjinxon ndatsjon xa ti jian.

⁵¹ Ko ndo Jesús ndache ndo sen chrikao ndo:

—Ó chao, tintu enta xa.

Ko tjume e ndo Jesús itsé ndo ndatsjon xi me e, ko juinchexruen en ndo xa.

⁵² Tjume e ndo Jesús ndache ndo xi tetuen en xitaana, ko xi tetuen en ni ngo ko ikaxin sen tetuan an, xi kuii itsé xa ndo Jesús:

—¿Sonda bikuunta ntãã ko espada xrotséxinninta xranchi jan an xrokjui naa xiche e?

⁵³ *Kain nchakon bake e ngajinnta ngaxin in ni ngo, ko xro an juinche enta. Ko jai oránta ixi tsitikaonnta xi tetuen en ti naxixe e.

Ndo Pedro xrondachro ndo ixi chúxin a ndo ndo Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Ko tjume e itsé nã ndo Jesús, ko sabikao nã ndo ndo a xitaana, xi ícha tetuan an. Ko ndo Pedro kjínxin jirué e ndo.

⁵⁵ Ko juaaka nã xro i ngusine ntasien nchia me e ko kuendajin nã xro i. Ko kaxon ndo Pedro bake e ndo ngakjen en nã nti a.

⁵⁶ Tjume e naa nchri nche e ixrã nchia ngajin xitaana, ti bikon nchra ndo Pedro nti a ti jii xro i, ndachro nchra:

—Kaxon xi ji i chrikao xa xi Jesús.

⁵⁷ Ko ndo Pedro ndachro ndo:

—Na i, chuxin a xi me e.

⁵⁸ Ko tjume e kuii inaa xi ko bikon xa ndo Pedro ko ndachro xa:

—Ja a kaxon naa xi tajikao xi Jesús.

Ko ndo Pedro ndachro ndo:

—Na i, nduaxin a me e.

⁵⁹ Kuatsinga xranchi naa hora ko tjume e ndachro inaa xi:

—Nduaxin xi ji i chrikao xa xi Jesús, ixi kaxon je e xa xi nunte Galilea.

⁶⁰ Ko ndachro ndo Pedro:

—Nóna i nge e ndachronta.

Ko xrajinichja ndo itsje naa kuntaxichíká.

⁶¹ Ko tjume e je e ndo Jesús konkjan ndo tsje e ndo ndo Pedro, ko ndo Pedro xraxaon ndo ixi jaña tsindachro ndo Jesús: “Xraxrotsje a kuntaxichíká ja a xrondachrua ní vez chuxin ana.”

⁶² Ko tjume e ndo Pedro kuachrje ndo nduja ko tsango tsjanga ndo.

Tjanao nã ndo Jesús

(Mt. 26:67-68; Mr. 14:65)

⁶³ Ko xi soldado ti stendáa xa ndo Jesús juaya xa ngajin ndo ko juanoa xa ndo.

⁶⁴ Ko bije e xa ikon ndo ko tande e xa iton गया ikon ndo ko tjanchangi xa:

—¡Ndachrua ngisen kóña!

⁶⁵ Ko tsango chinga ndache xa ndo, ko kuyakutee xa ndo.

* **22:49** *Ncháina* Señor *Ncháina Jesús o Ncháina Dio* **22:53** Lc. 19:47; 21:37.

Ndo Jesús jii ndo ngajin xi tetuan an ni ngo
(Mt. 26:59-66; Mr. 14:55-64; Jn. 18:19-24)

⁶⁶ Ko ndúyaxin xra o kain xi tetuan an ni ngo, ko xi taana tetuan an, ko kain xi tjako ley ko bikao xa ndo Jesús ti ste xi tetuan an nti a ko ndachro xa:

⁶⁷ —Ndachijiana, ¿á ja a ndo Cristo?

Ko je e ndo ndachro ndo:

—Siá jaán xrondachrjan, ja anta tsitikaon anta.

⁶⁸ Ko siá tsjanchangi anta naa nge e, ja anta tsjatengíexin anta, ko tsajanda intana satsji.

⁶⁹ Ko jan an, chjen en ndo Dio, xjan jongí e xranchi chujni, xrajai tsake e ndatsjonxin jian ti jii ndo Dio chóna kain juachaxin.

⁷⁰ Ko tjume e kain xi ste nti a juanchangi e xa ndo Jesús ko ndachro xa:

—¿Á ja a nduaxin chjen en ndo Dio tjume e?

Ko ndo Jesús juatingíexin ndo:

—Jaán, ja anta ó ndachronta.

⁷¹ Ko tjume e ndachro xa:

—Íxrokonda i xronichja ikaxin na. Jan anna ó kuin anna nge e nichja xi ji i.

23

Ndo Jesús jii ndo ngajin xi Pilato
(Mt. 27:1-2, 11-14; Mr. 15:1-5; Jn. 18:28-38)

¹ Tjume e kain xa bingatjen xa ko sabikao xa ndo Jesús ngajin xi Pilato.

² Ko nti a kuaxi juankata a xa ijię ngajin ndo Jesús, ko ndachro xa:

—Jan anna kuitjana xi ji i juinchexronka xa ni tjajnanana. Ko ndachro xa ixi xrokonda i tsjengana i na ngajin xi tetuan an Roma, ko kaxon ndachro xa ixi je e xa ndo Cristo, ko je e xa naa rey tetuan an.

³ Ko tjume e xi Pilato juanchangi e xa ndo Jesús:

—¿Á ja a Rey tituen en ni judío?

Ko ndo Jesús ndachro ndo:

—Ja a ndachrua.

⁴ Ko tjume e xi Pilato ndache xa xitaana tetuan an ko ni bikao ndo Jesús:

—Xro an ijię titja jan an ngajin xi ji i.

⁵ Ko kain ni ste nti a ícha séen kuyako na ko ndachro na:

—Je e xa juincheye e xa kain ni tjajnanana ixi jée tjako xa. Ko kuaxi juako xa nunte Galilea, ko jai ó nti i tjajna Judea tjako xa.

Bikao na ndo Jesús ngajin xi Herodes

⁶ Ko kono e xi Pilato ji i, ko juanchangi xa á ndo Jesús kuixin ndo nunte Galilea.

⁷ Ko ndachro na ixi nti a tikinixin en ndo, me e xi Pilato kuetuan an xa ixi satsikao na ndo Jesús ngajin xi Herodes ixi xi me e tituan an nunte Galilea, ko nchakon me e xi Herodes tsikii xa tjajna Jerusalén.

⁸ Ko ti bikon xi Herodes ndo Jesús, tsango bake e xa juaxruxin ixi ó sée tjaun xa xrokuichuxin xa ndo ixi tsikin en xa nge e jian kuanche e ndo, ko tjaun xa xrobikon xa naa ixra ijié* xrojuinche e ndo Jesús.

⁹ Ko xi Herodes juanchangi e xa ndo Jesús itsjé nge e ko je e ndo xro an nge e juat-ingíexin ndo.

¹⁰ Ko kaxon nti a konchjiñe e itsjé xitaana tetuan an ko itsjé xi tjako ley ko tsango kueya ijię tjankata a xa ndo Jesús.

* 23:8 naa ixra ijié milagro

¹¹ Ko tjume e xi Herodes ko kain xi soldadoe xa kuaxi xa chinga juinchekao xa ndo Jesús, ko juanoa xa ndo, ko tjume e juinchekitsa xa ndo manta tetsáa xi rey. Tjume e xi Herodes kuetuan an xa satsjikao na ndo Jesús ngajin xi Pilato íjngo.

¹² Nchakon me e xi Pilato ko xi Herodes kuaxi tjento kichuu xa ixi seno kuaningakon en kichuu xa.

*Xi tetuan an ndachro xa tsen en ndo Jesús
(Mt. 27:15-26; Mr. 15:6-15; Jn. 18:39–19:16)*

¹³ Tjume e xi Pilato kuiye e xa xitaana tetuan an ko kain ni tetuen en ni judío, ko ni tjajna,

¹⁴ ko ndache xa na:

—Ja anta bikuunta xi ji i, ko ndachronta ixi nchexronka xa ni tjajna, ko ja anta kuin ennta nge e juanchangi a xa, ko jan an kuitja i ijię ngajin xa, xranchi ja anta ndachronta.

¹⁵ Kaxon xi Herodes kuitja i xa ijię ngajin xa, méxin íjngo xruan an xa xi ji i nti i. Ko ó bikonta ixi xro an ijię chóna xa tsikinixin tsen en xa.

¹⁶ Ko tsetuan an tsikaon xa, ko tjume e tsajon juachaxin satsji xa.

¹⁷ Ko kia me e, xi Pilato xrokonda tsajanda xa naa xi jixin in ndo achjiso.

¹⁸ Ko kain na kuaxi na kuyako na:

—¡Tajanda ia xi ji i! ¡Tja onna tsajanda xi Barrabás satsji xa!

¹⁹ Ko xi Barrabás jixin in xa ndo achjiso ixi juinhexronka xa ni tjajna Jerusalén ko naakóñaxón xa chujni.

²⁰ Ko xi Pilato íjngo ndachro xa tsajanda xa ndo Jesús.

²¹ Ko je e na ícha séen kuyako na:

—¡Tjankanitua xa ntacru! ¡Tjankanitua xa ntacru!

²² Nínxin juanchangi xi Pilato:

—¿Nge e ndako a juinche e xi ji i? Jan an titja i ijię tsikinixin tsenxin xa. Jan an tsetuan an tsikaon xa, ko tjume e tsajanda xa satsji xa.

²³ Ko je e na ícha séen kuyako na ko ndache na xi Pilato tsjankanito xa ndo Jesús ntacru. Séen kuyako na ko kaxon kuyako kain xi taana, xi tetuan an, ko juacha na nge e tjaun na.

²⁴ Méxin xi Pilato juinche e xa xranchi tjanchia na.

²⁵ Ko kuajanda xa xi Barrabás xranchi tjaun na, xi bake e ngaxin in ndo achjiso, xi juinhexronka ni tjajna ko naatsikóñaxón xa chujni. Ko xi Pilato kuajon xa ndo Jesús ixi sinchekao na ndo xranchi tjaun na.

*Juankanito na ndo Jesús ntacru
(Mt. 27:32-44; Mr. 15:21-32; Jn. 19:17-27)*

²⁶ Hora jitikao na ndo Jesús ixi tsjankanito na ndo ntacru, itsé na naa xi tjajna Cirene ndatin in xa Simón. Xi me e nandá tsiki xin xa chjakée xa ko juinchekama na xa ntacru ko jirué e xa ndo Jesús.

²⁷ Ko jirué e kueya ni tjajna, ko kaxon jirué e itsjé nchri stetsjanga nchra ko stetoyako nchra ixi yaa nchra juachjaon ixi ndo Jesús.

²⁸ Ko ndo Jesús ngatjia ndo tsje e ndo nchra ko ndachro ndo:

—Ja anta nchri tjajna Jerusalén, tsjangaxin antana. Ja anta tsjangaxinnta chjan anta ko ja anta.

²⁹ Ixi tsij nchakon xrondache kichuunta: “Tsango chaxro nchri jua i kuachóna ichjan, nchri xro an ichjan juinchejongí e, ko juinchekaki a nchra ichjan.”

³⁰ *Tjume e tsaxi na xrondache na ijna “Xrabatjaninta”; ko xronichje e na itjao ko xrondachro na “Nchekemáninta.”

³¹ Siá ntayua jaña stenchekao na ntã, ¿nge e sinchekao na ntã xema?

³² Ko kaxon bikao na yuu xiche e, xi me e kaxon tsjankanito na xa ntacru tjenka ndo Jesús.

³³ Ko kuiji na ijna ndatin in Ntajaa Chujni, ko nti a juankanito na ndo Jesús ntacru ko kao kayui xiche e, naa xi bake e na xa ndatsjonxin jian ti jii ndo Jesús, ko inaa xa bake e na xa ndatsjonxin kjon.

³⁴ Ko ndo Jesús ndache ndo ndotée ndo:

—Ndotána, tjáña anta ti ndako a stenchena na ixi je e na noe a na nge e stenze e na. Ko xi soldado sondaonxin xa ixro ixi tsono e xa ngisen tsjacha manta jiá ndo Jesús.

³⁵ Ko kueba ni tjajna nti a stetsje e na, ko kaxon xi tetuan an ko kain xa tjanoa xa ndo Jesús ko ndachro xa:

—Ikaxin na bingijna xi ji i, ko jai jua i je o xa tingijna xa aséen xa. Siá nduaxin je e xa ndo Cristo tsixrua an ndo Dio, chao xrobingijna aséen xa.

³⁶ Ko kaxon xi soldado tjanoa xa ndo Jesús; ko tjoké e xa ndo vino tsikonsán xrokui i ndo.

³⁷ Ko ndachro xa:

—Siá ja a ndo Rey tetuan an ni judío, ja ua xingajinxian ntaa me e.

³⁸ Ko nui ti ntaa tsikake e na ndo Jesús tsikake e na naa ntaa nchúin ko tsikjin na té griego, ko latín, ko hebreo ko ja in ndachro:

“Xi ji i Rey tetuen en ni judío.”

³⁹ Ko naa xiche e ti yuu xi jitjian nti a, nichjangí e xa ndo Jesús ko ndachro xa:

—Siá nduaxin ja a ndo Mesías, xingajinxian ntaa me e ko nchexingajianna jan anna kaxon.

⁴⁰ Ko inaa xiche e jitjian nango kuyakutee kichuu xa:

—Ja a, ¿á xrakuen a ndo Dio? Jaina stetjianna nti i ko chinga stencheinana.

⁴¹ Ixi jaña tikinixinna ixi ndako a juntu una. Ko xi ji i xro an nge e ndako a juinche e xa ko nti i jitjian xa.

⁴² Ko xi me e ndache xa ndo Jesús:

—Ja anta Jesús, xraxaonninta nchakon tsjangixinnta tsetuan annta.

⁴³ Ko juatingéxin ndo Jesús:

—Nduaxin ntatjua ixi jai tsake e ngajin ti chaxro jii ngajní.

Kuen en ndo Jesús

(Mt. 27:45-56; Mr. 15:33-41; Jn. 19:28-30)

⁴⁴ Ko konaxixe e ngata a nunte xrangíxixión ngusine nchakon, ko kuiji hora nínxin.

⁴⁵ Ko chjiixro konaxixe e, ko manta jijeexin ti ícha tjúá ndo a ndo Dio chrinjintonga manta.

⁴⁶ Ko ndo Jesús séen ndachro ndo:

—Ndotána, ngaya tjáanta takée aséenna.

Ko jaña jinichja ndo, ndakuen en ndo.

⁴⁷ Ko hora bikon xi tituen en xi soldado romano nge e kon en, je e xa kuajon xa juasie xa ngajin ndo Dio ko ndachro xa:

—Xi ji i tjúá xa ko nduaxin xro an nge e sínká xa.

⁴⁸ Ko kain ni ste nti a, bikon na nge e kon en, ko sakuinterkji na ko stexronka na ko tande e itja na ntakuin na.

⁴⁹*Ko kain ni chúxin ndo Jesús, ko kaxon nchri rué e ndo tsikí xin nchra tjajna Galilea, ikjín ste na stenchexroan na kain nge e kon en.

Xrabaa ndo Jesús

(Mt. 27:57-61; Mr. 15:42-47; Jn. 19:38-42)

⁵⁰ Ko bake e naa xi tsango jian, ndatin in xa José ko tjajnée xa tjajna Arimatea tikinixin en Judea. Xi me e kaxon xi tetuan an tjajnée ni judío.

⁵¹ Je e xi me e jichón en xa kaxon ngisen xroxruan an ndo Dio tsetuan an ngata a nunte. Ko je e xa bake a xa juaxruxin ti nge e juinche e ikaxin ni tetuan an.

⁵² Méxin, je e xa kuitsje e xa xi Pilato ko juanchia xa juachaxin ixi satsikao xa cuerpoe ndo Jesús.

⁵³ Ko juinchexingajin xa cuerpoe ndo Jesús ko kuintsía xa ndo naa manta natjúá tsango tjintee, ko bikao na ndo ti tsinge na ngaxin in naa itjaõ natjúá ti xraxro an ngisen xrabaa. Nti a bake e na cuerpoe ndo Jesús.

⁵⁴ Kain ji i kon en kóndo viernes ti taxi nchekonchjian na ixi tsjoké e na nchakon sábado.

⁵⁵ Ko sen nchri rué e ndo Jesús kuixin nunte Galilea, konchjiñe e nchra ko bikon nchra ti no tsikake e na cuerpoe ndo Jesús.

⁵⁶ Ko ikjan nchra ndo a nchra sinchekonchjian nchra inda chaxro xraxe ko xroan tsjimá cuerpoe ndo.

Ko nchakon sábado joke e nchra, xranchi tsikitue en kain ni judío.

24

Xechón ndo Jesús

(Mt. 28:1-10; Mr. 16:1-8; Jn. 20:1-10)

¹ Ndúyo domingo, nchakon xrangíxixín semana, ikjan nchra ti tsixrabaa ndo Jesús, ko jitikao nchra inda chaxro xraxe tsijinchedonchjian nchra ko sabikao kichuu nchra.

² Ko kuiji nchra nti a ko bikon nchra ixi ixro tsikijeexin itjaõ ti no bake e na cuerpoe ndo Jesús nango jii ixro.

³ Ko kuixin in nchra itjaõ ko í kuitja i nchra cuerpoe ndo.

⁴ Tjume e tsango xronka nchra ixi noe a nchra nge e kon en. Ko tuinxin bikon nchra yuu xi ste tjenka nchra ko tóngíxin manta steyá xa.

⁵ Ko tsango xronka nchra ko kuisée nchra nunte, ko xi me e ndachro xa:

—¿Sonda tjéenta naa sen jichón ngakjen en sen tsiken en?

⁶ *Je e ndo í ko a ndo nti i; xechón ndo. Sintaxiñaonta nge e ntatjunta ndo nchakon bakaji ndo nunte Galilea.

⁷ Chjen en ndo Dio, xjan jongí e xranchi chujni, ndachro ndo ixi xrokonda xrotsé na ndo ni tsango ña i ko tsóña na ndo ko tsenito na ndo ntacru ko nchakon nínxin xroxechón ndo.

⁸ Ko je e nchra xraxaon nchra nge e tsindachro ndo Jesús

⁹ ko ikjan nchra ko beki nchra nge e kon en ngajin sen tenaá chrikao ndo ko ngajin ikaxin na kaxon.

¹⁰ Ko nchri bikao juajna ndatin in nchra María Magdalena, nchri Juana ko inaa nchri ndatin in María, janée ndo Jacobo, ko ikaxin nchri ste ngajin nchra.

¹¹ Ko sen chrikao ndo Jesús kuitikaon a sen nge e ichro nchra ixi xraxaon sen jée nge e stenichja nchra.

¹² Ko ndo Pedro kuachrjexin ndo nchia ko binga ndo kuitsje e ndo ti no tsixrabaa ndo Jesús. Ko tsje e ndo ngaxin in itjaõ* ko bikon ndo ixi xro an nge e jii nti a, je o manta kuitsía cuerpoe ndo Jesús jii nango. Tjume e ikjan ndo nchia ko tsango xronka ndo ixi nge e kon en.

Nge e kon en cha o Emaús

(Mr. 16:12-13)

¹³ Xraje o nchakon me e, yuu sen chrikao ndo Jesús stetji sen cha o itji tjajna ndatin in Emaús, tjajna me e jii xranchi tenaá kilómetro kjínxin ti jii tjajna Jerusalén.

¹⁴ Ko stetjao sen kondee kain nge e juinchedkao na ndo Jesús.

15 Ko stenichja sen, ndo Jesús konchjiñe e ndo tjenka sen ko jitikao ndo sen ngatja cha o.

16 Ko maski bikon sen ndo Jesús jua i kuichúxin sen ndo.

17 Ko ndo Jesús juanchangi ndo:

—Ja anta, ¿nge e stetjaunnta ti ya anta cha o? ¿Ko sonda tsango ni e asáanta?

18 Ko naa sen ndatin in Cleofas juatingíexin:

—¿Ja ua ja a jui a tjajna Jerusalén ko noa ia nge e kon en nchakon ji i?

19 Ko ndo Jesús ndachro ndo:

—¿Nge e kon en nti a?

Ko je e sen juatingíexin sen:

—¿Á noa ia nge e kon en ndo Jesús, ndo tjajna Nazaret, naa ndo profeta kuachronga chijnie ndo Dio? Kain nge e nichja ndo ko ti juinche e ndo juako ndo ijié juachaxien ndo Dio, ko ni bikon kain ji i juinche e na juaxruxin.

20 Ko xi taana xi tetuan an ko xi tetuan an tjajnanana kuajon xa ndo Jesús ngajin xi Pilato ixi tsake e ndo xa nganito ntacru.

21 Ko jan anna xraxa onna ixi je e ndo Jesús xrokuantsjengí e ndo ti tetuan an ni romano ngajin tjajnanana Israel. Ko jai ó chóna ní nchakon kuen en ndo.

22 Ko kaxin nchri barué e ndo Jesús juinchexronkana nchra ixi ndúyo kuitsje e nchra ti no tsixrabaa ndo Jesús,

23 ko kuitja i nchra cuerpoe ndo, ko ikjan nchra nchia ko bekinana nchra ixi yuu sen ángel konoxin sen ngajin nchra ko chronga sen ixi ndo Jesús jichón ndo.

24 Ko kaxin sen kichianna ikjui sen kuitsje e sen ti no tsixrabaa ndo ko kuitja sen xranchi ndachro je e nchra, ko kaxon bikon a sen ndo.

25 Ko ndo Jesús ndachro ndo:

—¡Sonda tienxin anta, ko tsango indao titikaonnta kain ti nge e ndachro sen profeta kuij sa ó!

26 ¿Á je a ixi tsango tangi xrokon en ndo Cristo sa ó ko tjume e xrokuayé e ndo itsjé juasaya ngajní?

27 Ko tjume ejuangíxin ndo juinchekuen en ndo sen nge e jitaxin xroon chijnie ndo Dio ti ndachro nge e xrokon en je e ndo Cristo. Ko juangíxixín ndo ti no tsikjin ndo Moisés ko kain sen kuachronga chijnie ndo Dio ó sa ó.

28 Ko kuiji sen tjajna, ko ndo Jesús juinche e ndo xranchi saxrokjui ndo ícha ikjín.

29 Ko je e sen kuinóatée sen tsitu e ndo ngajin sen:

—Tituan anta ngajinna ixi ó kontie.

Ko ndo Jesús kuixin in ndo nchia ko kuitu e ndo ngajin sen.

30 Ko kuintee sen ti mesa ko ndo Jesús itsé ndo nutja ko kuajon ndo juasie ndo ngajin ndo Dio, ko tjume e konchrinjin ndo nio ko kuajon ndo nio ngajin sen.

31 Ko hora me e, xitje e ikon sen ko kuichúxin sen ndo Jesús ko je e ndo sajuixin ndo ti ste sen.

32 Ko je e sen ndache kichuu sen:

—¿Á je a aséeina tsango chaxro kono e ti steyá ana cha o ko je e ndo jinichjaina ndo nge e xrondachro chijnie ndo Dio?

33 Ko í chuen a sen ícha; tuinxin kua sen cha o ko ikjan sen tjajna Jerusalén. Nti a kuixin in sen nchia ti ste sen tenaá apóstol chrikao ndo Jesús ko ikaxin sen ste nti a.

34 Ko sen ste ngaxin in nchia chronga sen:

—Ndo Jesús nduaxin xechón ndo, ixi konoxin ndo ngajin ndo Simón Pedro.

35 Tjume e sen yuu kuixin tjajna Emaús chronga sen nge e kon en ngatja cha o, ko xranchi kuichúxin sen ndo Jesús ti konchrinjin ndo nutja ko konchjeya ndo nio.

*Ndo Jesús konoxin ndo ngajin sen chrikao ndo
(Mt. 28:16-20; Mr. 16:14-18; Jn. 20:19-23)*

³⁶ Ko xra stetjao sen nge e kon en, je e ndo Jesús bake e ndo ngusine ti ste sen ko ndachro ndo:

—¿Á chao stenta?

³⁷ Ko je e sen ícha xronka sen ixi xraxaon sen ti stetsje e sen naa espíritue ni tsiken en.

³⁸ Ko je e ndo Jesús ndache ndo sen:

—¿Sonda tsango stexronkanta ko sonda xratitikaon anta ngaya asáanta?

³⁹ Tsje enta tjáana ko tutéena ixi nduaxin jan an. Itseninta ko tsje enta; ixi naa espíritue ni tsiken en chóna i ntao ko intaa xranchi tikonnta chonda jan an.

⁴⁰ Jaña ndachro ndo, ko juako ndo itja ndo ko tutée ndo.

⁴¹ Ko je e sen xratitikaon a sen nge e stetsje e sen ixi tsango juaxruxin ste sen ko xrastexronka sen; méxin, je e ndo ndachro ndo:

—¿Á chondanta nge e sineni?

⁴² Ko je e sen chjée sen ndo tu o kuchee tsichjánta a xro i ko tu o katje chóna tsjeen kuchji i.

⁴³ Ko je e ndo itsé ndo nge e kuajon sen ko juine ndo ko je e sen stetsje e sen.

⁴⁴ Ko tjume e ndachro ndo:

—Nchakon bake e ngajinnta ntatjunta kain nge e xrojuinchená nã xranchi tsikjin ndo Moisés ko tsikjin sen profeta ko ti jitaxin xroon Salmo.

⁴⁵ Ko tjume e je e ndo kuajon ndo juachaxin ixi tsienxin sen ti jitaxin xroon chijnie ndo Dio,

⁴⁶ ko ndachro ndo:

—Ja in jitaxin ixi ndo Cristo xrokonda tsen en ndo ko nchakon nínxin xroxechón ndo.

⁴⁷ Ko juachaxien ndo ko nombrée ndo xrokonda xronichja nã tsin en kain ni tjajna xasintajni ixi jaña xrokjan nã tsitikaon nã ndo Dio, ko tsomé e kain ti ndako a nche e nã. Xroxrangíxixión tsin en ni tjajna Jerusalén.

⁴⁸ Ko ja anta ti bikonta kain ji i xrokonda xronichjanta ti nge e bikonta.

⁴⁹ *Ko jan an xroxruan annta ti nge e ndachro Ndotána. Ja anta tituan anta nti i tjajna Jerusalén tsayéjanta ijié juachaxin tsi x̄in ngajní ko me e Espíritue ndo Dio.

Ndo Jesús sakjui ndo ngajní

(Mr. 16:19-20)

⁵⁰ *Ko kuachrjexin sen tjajna me e ko ndo Jesús bikao ndo sen tjajna Betania. Nti a juatsi in itja ndo ko juinchenchaon ndo sen.

⁵¹ Ko xrajinchenchaon ndo sen, je e ndo kuachrjendáa ndo, ko kuaxi kuajin in ndo ngajní.

⁵² Ko je e sen kuajon sen juasaya ngajin ndo Jesús. Ko tjume e ikjan sen tjajna Jerusalén, ko tsango ijié juaxruxin chóna aséen sen.

⁵³ Ko kain nchakon bake e sen ngaxin in ndo a ndo Dio ko tajon sen juasaya ngajin ndo.

Chijnie ndo Jesús chronga ndo Juan

Ngisen chronga xranchi jii ndo Dio kuij nti i nunte xasintajni

¹ Ti xrangíxixín xrako a nunte xasintajni ó jii chijni ko chijni me e ndo Cristo, ko je e ndo bakekao ndo ndo Dio ko je e ndo ndo Dio ndo.

² Ti xrangíxixín bakekao ndo ndo Dio,

³ ko ixi je e ndo Cristo, ndo Dio juinchéña ndo kain nge e jii. Ko ninaa nge e jii xrokuake a siá xrakuajon a ndo juachaxien ndo xrobake e.

⁴ Je e ndo kuajon ndo juachaxin jichón kain nge e ko je e ndo naa xro i tingasáña ngajin chujni.

⁵ Ko xro i me e tingasáña ti naxixe e ko ti naxixe e jua i nchekanga xro i.

⁶ *Bake e naa ngisen tsixrúa an ndo Dio, ndo me e ndatin in ndo Juan

⁷ ixi xrochronga ndo kondee xro i me e ixi kain chujni tsitikaon na xro i ixi nge e xrondachro ndo.

⁸ Ko ndo Juan je a je e ndo xro i me e. Je e ndo je o xrochronga ndo kondee xro i.

⁹ Xro i nduaxin xro i tingasáña kain chujni ó jitij xro i nunte xasintajni.

¹⁰ Chijni jian, ndo Cristo, ó jii ndo nunte xasintajni, ko maski ndo juinchéña ndo nunte, chujni ste nunte xasintajni kuichúxin a na ndo.

¹¹ Kuij ndo ngajin ni judío, ni tjajnéé ndo, ko kuayé a na ndo.

¹² Ko ikaxin sen kuayé e sen ndo ko kuitikaon sen ndo, kuajon ndo juachaxin ngajin sen ixi xrokjan sen chjen en ndo Dio.

¹³ Sen me e je a xranchi tjongí e naa chjen en naa chujni jaña tjongí e sen. Na i. Ó chjen en ndo Dio je e sen.

¹⁴ Ko chijni, ndo Cristo, je e ndo ikjan ndo chujni ko bake e ndo ngajinna ko tjaunna ndo ko ti nduaxin ndachro ndo. Ko ó bikona juachaxien ndo, juachaxien chjen en Ndotáina Dio, xjan naakuaxon.

¹⁵ Ndo Juan nichja ndo ixi ndo Cristo ko ndachro ndo:

—Ji i ngisen ntatjunta nchakon ndachrjan, tjume e tsij inaa ngisen ícha tetuan an, ixi ó sa ó jii ndo ixi najan an.

¹⁶ Kainna ó kuaye ena juachaxin tjintee tajon ndo, ko nchennaonna ndo kain nchakon.

¹⁷ Ley kuetuan an ndo Dio juinchenojna ndo Moisés, ko ti tjue e ndo chujni ko ti nduaxin me e t̄j̄ x̄in ixi ndo Jesucristo.

¹⁸ Xro an ngisen bikon ndo Dio. Je o chjen en ndo, xjan naakuaxon, xjan jiní Ndotée ko je e xjan juinchenojna xjan xranchi jii Ndo Dio.

Ndo Juan nichja ndo kondee ndo Jesús

(Mt. 3:11-12; Mr. 1:7-8; Lc. 3:15-17)

¹⁹ Kaxin ni judío, ni tjajna Jerusalén, xrúan an na xitaana ko xi tjako ley ngajin ndo Juan ixi tsjanchangí e na ndo:

—¿Ngisen ja a?

²⁰ Ko je e ndo ndako juatingéxin ndo:

—Je a ndo Cristo najan an.

²¹ Tjume e íjngo juanchangi e xa ndo:

—¿Ngisen ja a tjume e? ¿Á ndo kuachronga chijnie ndo Dio ó sa ó, ndo Elías?

Ko ndo Juan ndachro ndo:

—Je a je e ndo jan an.

Tjume e juanchangi e xa ndo:

—¿Á ja a ndo xrochronga chijnie ndo Dio, ndo xrokuji?

Ko juatingíexin ndo:

—Na i.

²² Méxin, ndache xa ndo:

—¿Ngisen ja a tjume e? Xrokonda tsiki anna chijni ngajin ngisen xruan anna. ¿Nge e chao xrondachrua ngisen ja a?

²³ Juatengíexin ndo Juan:

—Jan an naa ngisen nichja séen jii ntajie ndachro: “Tantje enta naa cha o nao itji ixi Ncháina tsij” —ti ndachro ndo Juan me e tsindachro ndo profeta Isaías.

²⁴ Ko chujni tsikjin tsijao ndo Juan, xi fariseo tsixrua an chujni

²⁵ ko juanchangi e na ndo:

—Siá je a ja a ndo Cristo, ko je a ndo profeta Elías, ko kaxon je a ndo profeta stechón en na, ¿sonda tikitée na tjume e?

²⁶ Ndo Juan ndache ndo na:

—Jan an tikitéexin na inda, ko ngakjen en ja anta jii naa ngisen chuxin anta.

²⁷ Tuenxin najan an jitij ndo ko ícha tetuan an ndo ixi jan an. Ko tikinixin a tsoxin-danga a tjuée katée ndo.

²⁸ Kain ji i kon en tjajna Betábara ndatsjonxin ti indajitinga ndatin in Jordán ti no jii ndo Juan jitikitée ndo chujni.

Ndo Jesús xranchi naa kutuchjon ne e ndo Dio

²⁹ Ndúyaxin ndo Juan bikon ndo ndo Jesús jitonchjiñe e ndo tjenka ndo ko ndachro ndo:

—Tsje enta nti i jitij ndo xranchi naa Kutuchjoen ndo Dio, ndo tantsje jíee ni nunte xasintajni.

³⁰ Nchakon ndachrjan jitij naa ngisen tuenxin najan an, ngisen ícha tetuan an ixi ó sa ó jii je e ndo, me e nichja ixi je e ndo.

³¹ Jan an kaxon kuichuxin a ndo. Ko jan an bakikitéexin na ixi inda ixi jaña ni tjajna Israel xrokuichuxin na ndo.

³² Kaxon ndachro ndo Juan:

—Jan an bikon Espíritue ndo Dio xingajinxin ngajni xranchi naa kuntúa ko bake e ngata a ndo.

³³ Ko xranóna i ngisen je e ndo. Ko ngisen xruan anna tsikitée chujni ixi inda, ndo me e ndachijina ndo: “Nchakon tsikuan Espíritue ndo Dio xroxingajinxin ngajni ko tsij ngata a naa ngisen, ndo me e tsikitée ndo na ixi Espíritue ndo Dio.”

³⁴ Jan an ó bikon ndo ko chrja nga ixi je e ndo Chjen en ndo Dio.

Ndo Jesús kuinche e ndo sen bajikao ndo

³⁵ Ndúyaxin ndo Juan jii ndo nti a íjngo ko kao yuu sen chrijikao ndo,

³⁶ ko hora bikon ndo Juan kuatsinga ndo Jesús, ndachro ndo:

—Tsje enta, je e ndo Kutuchjoen ndo Dio.

³⁷ Kayui sen rué e ndo Juan kuin en sen nge e ndachro ndo ko rué e sen ndo Jesús.

³⁸ Méxin, ndo Jesús ngatjia ndo tsje e ndo ko bikon ndo jirué e sen ndo ko ndachro ndo:

—¿Nge e tjéenta?

Je e sen ndachro sen:

—Maestro, ¿no jii ndúya?

³⁹ Ko juatingíexin ndo Jesús:

—Xrokuinta tsje enta.

Méxin, ikjui sen ko bikon sen ti no bakitu e ndo ko kuatsinga sen nguixin nchakon me e ngajin ndo ixi ó kóndo xranchi las cuatro.

⁴⁰ Naa sen yuu tsikin en nge e ndachro ndo Juan ko tsirue e ndo Jesús, ndo me e ndatin in Andrés, ndo kichuu ndo Simón Pedro.

⁴¹ Ndo Andrés tuinxin ikjui ndo bijée ndo ndo kichuu ndo, ndo Simón, ko ndachro ndo: —Kuitjána ndo Mesías. Mesías xrondachro Cristo.

⁴² Tjume e ndo Andrés bikao ndo ndo Simón ti no jii ndo Jesús. Ko hora bikon ndo Jesús sen, ndachro ndo:

—Ja a Simón, chjen en ndo Jonás. Ko jai ndatsi ian Cefas. Ko Cefas xrondachro Pedro.

Ndo Jesús tiye e ndo ndo Felipe ko ndo Natanael

⁴³ Ndúyaxin ndo Jesús tjaun ndo xrokjui ndo nunte Galilea ko kuetan ndo ndo Felipe, ko ndache ndo ndo:

—Ruanana.

⁴⁴ Ko ndo Felipe, ndo tjajna Betsaida, nti a kaxon tjajnée ndo Andrés ko ndo Pedro.

⁴⁵ Ko ndo Felipe ikjui ndo bijée ndo ndo Natanael ko ndachro ndo:

—Ó bikona ndo xrokuji xranchi tsikjin ndo Moisés ti xroon ley ko kaxon ngisen tsikjin sen profeta. Ji i ndo Jesús, chjen en ndo José, ndo tjajna Nazaret.

⁴⁶ Ndachro ndo Natanael:

—¿Á ko chao xrokuachrje naa nge e jian tjajna Nazaret?

Juatengíexin ndo Felipe:

—Xrokuia tsje é.

⁴⁷ Ko hora bikon ndo Jesús jitonchjiñe e ndo Natanael, ndachro ndo:

—Nti i jitji naa ndo nduaxin israelita ko xro an juancheya jii ngajin ndo.

⁴⁸ Méxin, juanchangi ndo Natanael ngajin ndo Jesús:

—¿Xranchi chuxianna?

Ko ndachro ndo Jesús:

—Jan an bikuan ti xratiya ia ndo Felipe hora bake e chringi ntaaj tajon tuhigo.

⁴⁹ Méxin, ndachro ndo Natanael:

—Maestro, ja a Chjen en ndo Dio, ndo Rey tetuan an tjajna Israel.

⁵⁰ Juatengíexin ndo Jesús:

—¿Á kuitikaonna ixi je o ntatjua bikuan chringi ntaaj tajon tuhigo? Tjume e tsikuan ícha ijié nge e ixi ti nge e bikuan jai.

⁵¹ Kaxon ndachro ndo Jesús:

—Nduaxin ntatjunta ixi tsikonnta xroxitje e ngajni ko sen angéel ndo Dio stetajin in sen ko stexinganjin sen ngata a Chjen en ndo Dio, xjan jongí e xranchi chujni.

2

Tjajna Caná nunte Galilea kute e na

¹ Nii nchakon tjume e bake e naa kia kute e na tjajna Caná nunte Galilea. Janée ndo Jesús jii jan nti a.

² Ni bake e kia nichje e na ndo Jesús ko sen teyuu chrikao ndo xrokuji sen kia me e kaxon.

³ Tjume e tsikanga xranvino ko janée ndo Jesús ndache jan ndo:

—Í chóna i na xranvino.

⁴ Ko juatingíexin ndo Jesús:

—Nchri, ¿sonda ndachijiana me e? Xratiji a nchakon sinta a naa ixra ijié.*

⁵ Ko je e jan ndache jan ni stetonchjeya nge e:

—Nche enta kain nge e xrontatjunta ndo.

⁶ Ko nti a jii ikjaon ichi tsikoña ixro, jitjiá inda, me e tunde e ni judío nchakon tijma na, nchakon tantsje na jíee na. Ko ngujngu ichi me e titja tikia xranchi ochenta o ciento litro inda.

* 2:4 naa ixra ijié milagro

⁷ Ndo Jesús ndache ndo sen jitonchjeya nge e:

—Nchechrénta inda ichi ji i.

Ko juinche chré nã ichi inda.

⁸ Tjume e ndachro ndo Jesús:

—Tantsjenta nchíin inda ko tiku unta inda ngajin xi tetuan an kia.

Ko jaña juinche e nã.

⁹ Ko xi tetuan an kia kui i xa nchíin inda ko ó tsikjan inda xranvino ko noe a xa no kuixin xran. Je o ni tochjeya nge e no e nã ixi je e nã tsikantsje nã inda. Méxin, xi tetuan an kia kuiye e xa xi kute e.

¹⁰ Ko ndache xa xi kute e:

—Kain nã sa ó tajon nã xran ícha jian ko hora ni kuij kia ó kui i nã yee xran, me e tajonni xran ngixeko. Ko ja a tsikatsian xran jian hasta jai.

¹¹ Nge e tsijinche e ndo Jesús tjajna Caná nunte Galilea, ñã sa ó nge e juinche e ndo ixi tsjako ndo juachaxien ndo, ko sen teyuu chrikao ndo kuitikaon sen ndo.

¹² *Ko kuatsinga ji i, ikjui ndo tjajna Capernaum, ko janée ndo ko xikichuu ndo ko sen teyuu chrikao ndo, ko nti a bake e sen kaxin nchakon.

Ndo Jesús nchetjúá ndo ni ngo ijié

(Mt. 21:12-13; Mr. 11:15-18; Lc. 19:45-46)

¹³ Ó tsij nchakon kia Pascua ne e ni judío, ndo Jesús sakjui ndo tjajna Jerusalén.

¹⁴ Ko nti a ngaxin in ni ngo jié kuitja ndo ni nchekji kuxinta, kutuchjon, kuntúá, ko ni ste nunte jitasingixin nã tomie chujni.

¹⁵ Ko hora bikon ndo Jesús ji i, juinchéña ndo naa cuarta, ko bengixin ndo nã nti a ko kao kutuchjoen nã ko kuxinte e nã. Ko kuintjí ndo ngata a nche tomie ni bakasingixin ko ndá a banka ndo mesé nã.

¹⁶ Ko je e ndo ndache ndo ni nchekji kuntúá:

—¿Tantsjexinnta kain nge e nti i! Nchéña inta ndo a Ndotána xranchi naa ndasin.

¹⁷ Méxin, sen teyuu chrikao ndo xraxaon sen nge e ti ndachro xroon chijnie ndo Dio: “Tsango chjána juañao nge e ndako a ton en ngaxin in ndointa.”

¹⁸ Méxin ni judío juanchangi e nã ndo:

—¿Nge e tjakoxian ixi chao sinche e kain ji i?

¹⁹ *Ko juatingíexin ndo Jesús:

—Tonchjejinnta ni ngo ji i ko nínxin nchakon sintakonchjian ni ngo íjngo.

²⁰ Ko ni judío ndache nã ndo:

—Yuukan ko ikjaon nano konchjianxin ni ngo ji i, ko, ¿á ja a nínxin nchakon sinchekonchjianxian ni ngo íjngo?

²¹ Ko ti ni ngo nichja ndo Jesús me e cuerpoe ndo.

²² Méxin, nchakon xechón ndo Jesús, sen teyuu chrikao ndo xraxaon sen ti nge e tsichronga ndo, ko kuitikaon sen xroen ndo Dio ko chijni tsindache ndo sen.

Ndo Jesús chúxin ndo nge e xraxaon kain chujni

²³ Nchakon ndo Jesús bake e ndo tjajna Jerusalén kia Pascua, itsjé nã kuitikaon nã ndo nchakon bikon nã nge e jian juinche e ndo.

²⁴ Ko ndo Jesús kuachúntia i ndo nã ixi chúxin ndo nge e xraxaon kain nã,

²⁵ ko baxrokonde a ndo ixi naa chujni xrobeki e ndo nge e juinche e inaa chujni ixi je e ndo no e ndo nge e xraxaon nã ngaya aséen nã.

3

Ndo Jesús ko xi Nicodemo

¹ Bake e naa xi Fariseo ndatin in xa Nicodemo, xi me e tetuen en xa ngajin ni judío.

² Xi ji i ku*ii* xa ngajin ndo Jesús naa tiie ko ndachro xa:

—Maestro, nónana ixi ndo Dio xruan an ndo ixi sinchekuannana, ixi xro an ngisen xrojuinche e nge e jian nche e ja a siá ndo Dio xrobake a ndo ngajian.

³ Ko ndo Jesús ndachro ndo:

—Jan an ntatjua ixi ngisen tjongíe a íjngo jua i tsikon sen ti tetuan an ndo Dio.

⁴ Juanchangi xi Nicodemo:

—¿Xranchi tsjongí e naa xi íjngo siá ó ntaxi xa? ¿Xranchi chao íjngo tsixin in xa tse e janée xa ko tsjongí e xa íjngo?

⁵ Ko ndo Jesús ndachro ndo:

—Nduaxin ntatjua: ixi ngisen tsjongíexin a inda ko Espíritue ndo Dio jua i tsixin in sen ti tetuan an ndo Dio.

⁶ Chujni tjongíexin ndotée ko janée xra je o chujni sen, ko sen tjongíexin Espíritue ndo Dio, sen me e tayé e sen Espíritue ndo.

⁷ Xronka ia ixi nge e ntatjua ixi xrokonda tsjongí e kain chujni íjngo.

⁸ Chrinto itji chrinto no tjaun chrinto. Ko ja a tin en xroin chrinto ko noa ia no itji chrinto ko no ti x*in* chrinto. Ko jaña sen tjongíexin Espíritue ndo Dio.

⁹ Ko je e xi Nicodemo juanchangi xa:

—¿Xranchi tson en ji i?

¹⁰ Ko ndo Jesús ndachro ndo:

—Ja a nchekuen én chujni Israel, ¿á tienxin a ti ntatjua?

¹¹ Jan an nduaxin ntatjua ti nónana nichjana ko ti bikona tekina, ko ja anta titikaon anta ti nge e ndachrjanna.

¹² Teki anta nge e tson en ngata a nunte nti i ko titikaon anta ko, ¿xranchi tsitikaonnta siá xrontatjunta nge e tson en ngajní?

¹³ Xro an ngisen kuajin in ngajní, je o Chjen en Ndo Dio, xjan jongí e xranchi Chujni, je e xjan bake e xjan ngajní ko kuix*in* xjan nti a.

¹⁴ Xranchi juinche e ndo Moisés nchakon bake e sen ntajie, nti a kuasintjian ndo naa kunchee chika ixi xrotsje e sen ba ko jaña tsen a sen; méxin, jaña tson en tsasintjian na Chjen en ndo Dio, xjan jongí e xranchi chujni,

¹⁵ ko jaña kain sen tsitikaon ndo Jesús tsen a aséen sen, tsehón sen kain nchakon.

¹⁶ 'Ndotáina Dio tsango tjue e ndo kain chujni jii ngata a nunte xasintajni,* méxin xruan an ndo chjen en ndo, xjan naakuaxon, ixi kain sen tsitikaon xjan tsitjáña i aséen sen ko je e sen tsehón sen kain nchakon.

¹⁷ Ko ndo Dio xruan i ndo chjen en ndo ngata a nunte xasintajni ixi tsjankata a xjan ijie ngajin na. Na i, je e xjan tsantsje xjan ijie chón*da* na ko jaña tsitjáña i na.

¹⁸ Ngisen tsitikaon chjen en ndo Dio tsjankata i ndo sen ijie. Ko ni tsitikaon a, ó juankata a ndo ijie ngajin na ixi kuitikaon a na chjen en ndo Dio, xjan naakuaxon.

¹⁹ Méxin, ni titikaon a ó juexin juankata a ndo na ijie, ixi ku*ii* ngisen juinchengasáñe e chujni jii ngata a nunte xasintajni ko je e chujni juinche a juaxruxin ixi ícha rué e na ti naxixe e ixi ndako a nche e na.

²⁰ 'Kain ni ndako a nche e, ningakon en na xro i tingasáña ko tonchjiñe a na tjenka xro i ixi tjaun a na tsonoxin ti ndako a stenche e na.

²¹ Ko sen nche e jian tonchjiñe e sen tjenka xro i tingasáña ixi chao tsikon chujni kain nge e stenche e sen xranchi tjaun ndo Dio.

Ndo Juan chronga ndo íjngo kondee ndo Jesús

²² Tjume e ndo Jesús ko sen teyuu chrikao ndo sakjui sen nunte Judea. Nti a kuatsinga ndo kaxin nchakon bikitée ndo chujni.

²³ Kaxon ndo Juan bake e ndo tjajna Enón tjenka tjajna Salim ko nti a bikitée ndo chujni ixi nti a jii yee inda. Ko chujni bak*ii* na batikitée na.

* **3:16 xasintajni** mundo

²⁴ *Ji i kon en ti xratijé a na ndo Juan ndo achjiso.

²⁵ Méxin, kaxin chujni, sen chrikao ndo Juan ko ni judío kuaxi nichja na xranchi xrotjúáxin chujni.

²⁶ Ko sen chrikao ndo Juan kuintekji sen ngajin ndo ko chronga sen ngajin ndo:

—Maestro, ndo bake e ngajinnta tuenxin ndarío Jordán, ndo kondee bekinananta, jai kao ndo tikitée ndo chujni ko itsjé na rué e na ndo.

²⁷ Ko ndachro ndo Juan:

—Xro an ngisen xrojuinche e naa ixra siá ndo Dio xrokuajon a ndo juachaxin.

²⁸ *Ja anta kuin ennta nchakon ndachrjan ixi jan an je a ndo Cristo. Je o naa ngisen kuitao en ndo cha o ixi xrochrjanga tsijí ndo.

²⁹ Nchakon tute e chujni, xi tute e tsayé e xa janchri e xa. Ko tjume e sen chúxin xa take e sen juaxruxin ixi jitin en sen nge e jinichja xa. Ko kaxon jan an juaxruxin ritjén ixi kueya chujni jitonchjiñe e ngajin ndo Jesús.

³⁰ Je e ndo xrokonda ícha tsetuan an ndo ko jan an ína i.

Ngisen kuixin ngajni

³¹ 'Ndo kuixin ngajni tetuen en kain chujni. Ko chujni nunte xasintajni chronga nge e jii nunte xasintajni. Ko ndo kuixin ngajni tetuen en ndo kain nge e.

³² Je e ndo nichja ndo nge e tsikikon ndo ko nge e tsikin en ndo. Ko xro an chujni titikaon na nge e ndachro ndo.

³³ Ko siá xrojan ngisen titikaon nge e ndachro ndo, jaña tjako sen ixi nduaxin nge e nichja ndo Dio,

³⁴ ixi ndo xruan an ndo Dio nichja ndo chijnie ndo Dio, ixi je e ndo kuayé e ndo kain juachaxien Espíritue ndo Dio.

³⁵ *Ndotáina Dio tjue e ndo Chjen en ndo, ko jaña tsikajon ndo kain juachaxin ixi tsetuen en xjan kain nge e.

³⁶ Ngisen tsitikaon Chjen en ndo Dio xrochóna sen juachaxin tsechón sen kain nchakon. Ko ngisen tjaun a tsitikaon Chjen en ndo xrochóna i sen juachaxin me e, ixi ndo Dio tsajon ndo juachaxin tangi tson en sen.

4

Ndo Jesús juao ndo naa nchri samaritana

¹ Tjume e ni fariseo kono e na ixi ícha itsjé chujni rué e ndo Jesús ko ícha itsjé chujni bikitée ndo ixi ndo Juan.

² Ko je a ndo Jesús tikitée ndo na. Sen chrikao ndo, sen me e bikitée chujni.

³ Hora kono e ndo Jesús ixi jaña tsikin en ni fariseo, kuachrjexin ndo nunte Judea ko íjngo ikjan ndo nunte Galilea.

⁴ Ko hora kuachrjexin ndo nti a xrokonda tsatsinga ndo nunte Samaria.

⁵ Ko kuiji ndo naa tjajna Sicar nunte Samaria, tjenka nunte tsikajon ndo Jacob kuayé e chjen en ndo, ndo José.

⁶ Nti a jii naa pozo tjiá inda kuachóna ndo Jacob. Ko ndo Jesús kuiji ndo nti a ko tsango konchrje ndo ixi tsango ikjín tsikjixin ndo, méxin bake e ndo nunte tjenka pozo. Hora me e xranchi ngusine nchakon.

⁷ Ko tuinxin kuiji naa nchri tjajna Samaria, kuiji nchra ti pozo me e ixi tsantsje nchra inda. Ko ndo Jesús ndache ndo nchra:

—Chjánana nchíin inda tsi i.

⁸ Ko sen teyuu chrikao ndo satsikintekji sen tjajna tjenka nti a bike na sen nge e sinekao sen ndo.

⁹ Ko nchri samaritana juatingíexin nchra:

—¿Sonda ja a naa chujni judío tjanchianana inda ixi jan an naa nchri samaritanana? (Jaña ichro nchra ixi ni judío tjento a na ni samaritano.)

¹⁰ Ko juatingíexin ndo Jesús:

—Siá xrokono a nge e tajon ndo Dio ko xrochuxian ngisen jitjanchia a inda, ja a xrojuanchanana inda ko jan an xrotjá a inda jichón.

¹¹ Ko je e nchra juate e nchra:

—Ja a chondai a nge e tsantsjexian inda ko pozo tsango yaso e pozo, ¿no xrochjánaxianna inda jichón?

¹² Ndo Jacob, ndo kuachrjenixinna, ndo me e kuitunana ndo pozo ji i, ko je e ndo baki i ndo inda ko chjen en ndo ko kain kuée ndo kaxon. ¿Á ja a, á ícha tjintee ixi je e ndo?

¹³ Ko juatingíexin ndo Jesús:

—Kain ni ti i inda ji i, íjngo tsen en na inda.

¹⁴ Ko sen tsi i inda tajon jan an, nai a tsinteken en sen inda. Ixi inda tajon jan an tsoña xranchi inda jitachrjexin ngaya aséen sen ko ji i tajon juachaxin tsechón sen kain nchakon.

¹⁵ Ko ndachro nchra:

—Chjánana inda me e, ixi tsen ana inda íjngo ko íxrokjan ina tsantsje inda nti i.

¹⁶ Ko ndachro ndo Jesús:

—Itjia tiye é ndoxi a ko tjume e tsji ia nti i íjngo.

¹⁷ Ko je e nchra ndachro nchra:

—Chonda i xixi na.

Méxin, ndachro ndo Jesús:

—Nduaxin ndachrua ixi chonda ia xixi a.

¹⁸ Ixi kuachonda na ó xixi a, ko xi chonda jai je a xixi a. Nduaxin ndachrua ixi chonda ia xixi a.

¹⁹ Ko kuin en nchra ji i ko ndachro nchra:

—Nóna ixi ja a naa ngisen chronga chijnie ndo Dio.

²⁰ Sen kuachrjenixinna, kuaxraxaonxin sen ndo Dio ijna nti i. Ko ja anta, ni judíonta ndachronta ixi xrokonda xroxraonxinna ndo Dio ni ngo ijié jii tjajna Jerusalén.

²¹ Ko ndo Jesús ndache ndo nchra:

—Titikáoanna ixi tsij nchakon xrokonda i xroxraonxinnta Ndotáina Dio ijna nti i ko xroxraonxin anta ndo tjajna Jerusalén.

²² Ja anta chujni samaritanonta noa inta ngisen xraonnta. Ko jan an naa chujni judío chuxinna ngisen xraa onna. Méxin, ndo tantsje ijié chóna chujni, ndo me e tsikachrjexin ndo ni judío.

²³ Ko jitiji nchakon ko jai nchakon me e, ixi sen nduaxin tjaun sen tsajon sen juasaya ngajin Ndotáina Dio, xrokonda ixi nchijí aséen sen xroxraonxin sen Ndo. Ko Ndo Dio tsake e ndo juaxruxin ixi jaña xroxraon sen ndo.

²⁴ Ndo Dio espíritu ndo, ko sen xraon ndo xrokonda xroxraonxin sen ndo ixi aséen sen.

²⁵ Ko ndachro nchra:

—Jan an nóna ixi tsij ndo Mesías, ndo Cristo. Ko nchakon tsij ndo sinchekuannana ndo kain nge e.

²⁶ Ko juatingíexin ndo Jesús:

—Ndo me e najan an, ndo ritjáoa jai.

²⁷ Xrastetjao sen ja in, sen teyuu chrikao ndo kuiji sen, ko xronka sen ixi bikon sen jinichje e ndo naa nchri, ko xro an ngisen juanchangi e ndo nge e tjaun nchra, o sonda jinichje e ndo nchra.

²⁸ Tjume e je e nchra bake e nchra nchixran nunte ko sakjui nchra tjajna beki e nchra kain chujni:

²⁹ —Ichjina, tsikonnta naa ndo chronga kain nge e junta a. ¿Á je a ndo Cristo ndo me e?

³⁰ Tjume e chujni kuachrxexin na tjanya kuitsje e na ndo Jesús.

³¹ Xratiji a na, sen teyuu chrikao ndo tinóatée sen ngajin ndo, ndachro sen:

—Maestro, inte nge e.

³² Ko ndachro ndo:

—Jan an chóna nge e iné ko ja anta chuxin anta me e.

³³ Ko sen teyuu chrikao ndo kuaxi sen juanchangi e kichuu sen:

—¿Á xrojan chujni biken en ndo nge e juine ndo?

³⁴ Ko ndachro ndo Jesús:

—Ti iné jan an me e ixra sinta a ti tsiketuan an ngisen xruan anna, ko xrokonda sintajexin ixra.

³⁵ Ja anta ndachrona: “Xratitjáña noó nchanitjao tsandáanta noatrigo.” Ko jan an ntatjunta: Tsje enta no tsikinga ixi ó kuicha noa ko ó chao tsandáani.

³⁶ Sen tandáa, xenge e sen na. Ko nge e tandáa sen me e chujni, ko chujni me e tsechón kain nchakon. Ko sen tenga ko sen tandáa xre ó juaxruxin take e sen.

³⁷ Ko nduaxin nge e ndachro sen: “Naa sen tenga, ko inaa sen tsandáa.”

³⁸ Méxin, jan an xruan anna ixi tsandáanta naa nunte tsikenga inta. Inaa sen tsijinche e ixra ko ja anta tsjachanta tsasiinnta nge e benga sen.

³⁹ Ko itsjé ni tjanya samaritano ni ikjui nchra kuindache nchra, kuitikaon na ndo Jesús ixi chronga nchra: “Ndo ji i chronga ndo kain nge e junta a sa ó.”

⁴⁰ Ko hora kuin en na nge e juinche e ndo, kuii na ngajin ndo ko kuinóatée na ngajin ndo ixi tsitu e ndo nti a ngajin na. Ko nti a kuitu e ndo yuu nchakon.

⁴¹ Ko ícha kueya na kuitikaon na ndo ixi kuin en na nge e nichja ndo.

⁴² Ko ndache na nchra:

—Jai titika onna, ko ixi je a je o nge e ndachijiana. Kaxon ixi jai jan anna kuitikaonna ixi kuin anna nge e nichja ndo ko nónana ixi je e ndo nduaxin ndo Cristo ndo, ndo sinchemé e jiee kain chujni.

Ndo Jesús ko chjen en xi nche e ixra gobierno

⁴³ Yuu nchakon tjume e, ndo Jesús kuachrxexin ndo nunte Samaria ko sakjui ndo no nunte Galilea.

⁴⁴ *Xranchi tsindachro ndo Jesús, ninaa ndo chronga chijnie ndo Dio, ni tjanée ndo xrochónde e na ndo juasaya.

⁴⁵ *Nchakon kuiji ndo nunte Galilea, ni nti a kuayé e na ndo ko kuajon na juasaya ngajin ndo ixi kaxon tsikjin na kia Pascua tjanya Jerusalén, ko bikon na nge e juinche e ndo kia nti a.

⁴⁶ *Tjume e ikjan ndo Jesús tjanya Caná nunte Galilea, ti no tsijinckekjan ndo inda ixran vino. Nti a bake e naa xi tituan an xrée gobierno. Ko kuachóna xi naa chjan ni e tjanya Capernaum.

⁴⁷ Ko hora tsikin en xa tsikixin ndo Jesús nunte Judea ko kuiji ndo nunte Galilea, rué e xa ndo ko kuinóatée xa ngajin ndo ixi itsji ndo ndo a xa ko sinchexrjuen en ndo chjen en xa, ixi ó jite en xjan.

⁴⁸ Ko ndachro ndo Jesús:

—Ja anta, titikaon anta siá tsikon anta naa nge e jian sinta a.

⁴⁹ Ko kuinóatée xi nche e xrée gobierno ko ndachro xa:

—Taka ichjina ixi chjan na ó jite en xjan.

⁵⁰ Ko juate e ndo Jesús:

—Ikjan ndúya ixi chjan an chao jii xjan jai.

Ko xi me e kuitikaon xa nge e ti ndachro ndo Jesús, ko sakjui xa.

⁵¹ Ko ikjan xa ndo a xa, ni nche e xrée xa kuachrje n̄a biketan n̄a xa ngatja cha o, ko ndache n̄a xa:

—Chajan an ó jian jii chán.

⁵² Ko juanchangi e xa n̄a ngixe e hora kuaxi koxruen en chán. Ko chronga n̄a:

—Jnajna xranchi hora naa kóndo kuachrje e chán súa.

⁵³ Ko jaña kono e ndotée chán ixi hora ña tsindachro ndo Jesús ixi chjen en xa ó jian jii chán. Ko je e xa ko kain ni ndo a xa kuitikaon n̄a ndo Jesús.

⁵⁴ Ji i yuxin nge e jian juinche e ndo Jesús nchakon kuix̄in ndo nunte Judea, ikjan ndo nunte Galilea.

5

Ndo Jesús juinchexruen en ndo naa xi

¹ Tjume e ni judío bake e n̄a naa kia ko ndo Jesús ikjan ndo tjajna Jerusalén íngo.

² Nti a tjenka nt̄achja ndatin in Nt̄achje e Kutuchjon jii naa pila inda ngigua hebreo ndatin in Betesda. Ko ngande e pila me e jii na ó tjatu o nchínchín tsiki te n̄a.

³ Nti a stetsinga kueya ni ni e, ni tikon a, ni jua i itji ko ni jua i nchetengi tutée. Stechón en n̄a tsonengi inda

⁴ ixi je a nanaunka xingajin naa ndo ángel tjenka pila me e ko nchetengi ndo inda. Ko ni sa ó tiji nti a ko tjingi n̄a inda toxruenxin n̄a ixi ngixe i ichin bachóna n̄a.

⁵ Nti a jii naa xi ni e, ó ní ite ko ijní nano ni e xa.

⁶ Ko hora bikon ndo Jesús jitsinga xa, kono e ndo ixi ó sée ni e xa, ko juanchangi e ndo xa:

—¿Á tjauan tsoxruan an?

⁷ Ko xi ni e juatingíexin xa:

—Chonda i ngisen tsingijnana tsjingi inda hora tontengi inda. Ko hora tja on tsjingi nda, inaa ngisen ícha taka tjingi nda.

⁸ Ko ndachro ndo Jesús:

—Tingatjen, tatsían kania a, ko tajia.

⁹ Ko tuinxin koxruen en xa, ko juatsi in xa kanie e xa ko chao ikjui xa. Ko me e kon en nchakon tjoké e ni judío.

¹⁰ Tjume e ni judío ndache n̄a xi koxruen en:

—Jai nchakon tjoké eni ko xro an juachaxin jii tsama kania a.

¹¹ Ko ndachro xa:

—Xi juinchexruanna ndachijina xa tatsían kania a ko tajia.

¹² Ko juanchangi e n̄a xa:

—¿Ngisen kuetuan an tsatsian kania a ko ndachro tsajia?

¹³ Ko xi tsikoxruen en noe a xa ngisen juinchexruen en xa ixi nti a jii kueya n̄a, ko ndo Jesús íkonoxin a ndo chriken en n̄a nti a.

¹⁴ Tjume e ndo Jesús kuetan ndo xa ngaxin in ni ngo ijié ko ndache ndo xa:

—Tsje é jai ó koxruan an ko ínche a ti ndako a, ba ícha tangi tson an.

¹⁵ Tjume e sakjui xa, ko ndache xa ni judío ixi ndo Jesús juinchexruen en ndo xa.

¹⁶ Méxin ni judío kuaxi n̄a rué e n̄a ndo Jesús ko tjaun n̄a tsóña n̄a ndo ixi kuanche e ndo kain ji i nchakon tjoké e n̄a.

¹⁷ Ko ndo Jesús ndache ndo n̄a:

—Ndotána kain nchakon nche e ndo ixra, ko jan an kaxon jaña nta a ixra.

¹⁸ Méxin, jaña ni judío ícha tjaun n̄a tsóña n̄a ndo Jesús ixi titikaon a ndo nchakon tjoké e n̄a ko ixi kaxon ndachro ndo ixi je e ndo ko ndo Dio naxraje o sen, ko ndachro ndo ndotée ndo, ndo Dio.

Juachaxin chóna Chjen en ndo Dio

¹⁹ Tjume e ndo Jesús ndache ndo n̄a:

—Naa nge e nduaxin ntatjunta ixi Chjen en ndo Dio jua i sinche e ndo naa nge e je o je e ndo. Je o nche e ndo nge e tikon ndo nche e Ndotée ndo. Kain nge e nche e ndotée ndo kao chjen en ndo nche e xjan jaña.

²⁰ Ko Ndotána tjue e ndo Chjen en ndo, ko tjako e ndo chjen en ndo kain nge e nche e ndo, ko xratsjako ndo nge e ícha ijié ko ja anta xroxronkanta ixi tsikonnta me e.

²¹ Xranchi Ndotána nchexechón ndo ni tsiken en ko tajon ndo juachaxin tsechón na íjngo. Jaña kaxon Chjen en ndo chao tsajon xjan juachaxin tsechón kain ni tjaun je e xjan.

²² Ko Ndotána xruan an ngisen tjankata a ndo ijié ixi kuajon ndo juachaxin ngajin chjen en ndo,

²³ ixi kain na tsajon na juasaya ngajin chjen en ndo xranchi juasaya tayé e Ndotána. Ngisen tajon a juasaya ngajin chjen en ndo kaxon tajon a sen juasaya ngajin Ndotée ndo, ndo xruan an ndo Cristo.

²⁴ Nduaxin nge e ntatjunta: Ngisen tin en nge e ntatjunta ko titikaon Ndo xruan anna, chóna sen juachaxin tsechón sen kain nchakon ko tangi a tson en sen, ixi ó kuatsinga ti tsen en sen ko jai tsechón sen kain nchakon.

²⁵ Nduaxin ntatjunta ixi ó tsij hora, ko jai hora me e, ni tsiken en tsin en na xronichja Chjen en ndo Dio. Ko sen tsitikaon ndo tsechón sen.

²⁶ Ixi Ndotána chao tsajon ndo juachaxin tsechón na ko kaxon tsikajon ndo juachaxin ngajin Chjen en ndo sinche e xjan jaña,

²⁷ ko kaxon tsikajon ndo juachaxin ngajin Chjen en ndo sinchéña xjan ijié ixi je e xjan Chjen en ndo Dio, xjan jongí e xranchi chujni.

²⁸ Xrakon anta ixi ti nge e ntatjunta. Ixi tsiji hora ti kain ni tsiken en, tsin en na xronichja xjan.

²⁹ Ko tsachrjexin na ti no stexrabaa na. Ko ni ndako juinche e, xroxechón na ixi tsechón na kain nchakon. Ko ni ndako a juinche e xroxechón na ko tangi tsikaon na ti tsoñe e na ijié.

Juachaxin chóna ndo Jesús

³⁰ Jan an jua i sinta a naa nge e jan on. Jan an ntáña ijié xranchi tituanna. Ko ijié ntáña, ndako ntáña ijié ko nta i nge e tja on jan an. Na i. Nta a nge e tjaun Ndotána, ndo xruan anna.

³¹ Ko siá jan on nichjaxin ixi najan an, ti ndachrjan tjinte a.

³² Ko jii inaa ngisen nichjaxinna ko nge e ndachro sen me e ixi najan an, tjintee.

³³ *Ja anta xruan annta ngisen ikjui juanchangi e ndo Juan, ko nge e juatingéxin ndo ixi najan an, nduaxin me e.

³⁴ Ko jan an chuntia i nge e xrondachro xrojan ngisen ixi jan an. Ko je o ndachrjan ji i ixi ja anta xrochondanta juachaxin tsechonnta kain nchakon.

³⁵ Ndo Juan bake e ndo xranchi naa xro i jiche ko tingasáña, ko ja anta juaxruxin bake enta ixi xro i me e, maski tsjé a nchakon.

³⁶ *Ko jan an chóna naa nge e ícha tjintee tjakoxin ixi najan an, ixi nge e tsindachro ndo Juan. Ixra nta a jan an, ixra naxre o tituanna Ndotána sinta a, ña tjakoxin ixi nduaxin Ndotána tsixruan anna ndo.

³⁷ *Kaxon Ndotána, ndo xruan anna, tjakoxin ndo ixi najan an. Ko ja anta nai a kuin ennta nichja ndo ko nai a bikonta ndo.

³⁸ Ko chijnie ndo xra je a jii ngaya asáanta ixi ja anta xratsitikaon anta ngisen Ndotána, ndo tsixruan anna.

³⁹ Ja anta jian nchekuanxinnta xroon chijnie ndo Dio ixi chon énta tsaye enta juachaxin tsechonnta kain nchakon. Ko xroon me e nichja ixi najan an.

⁴⁰ Ko ja anta tjaun anta tonchjiñe enta tjenkana ixi tsaye enta juachaxin me e.

⁴¹ Jan an tayé a juasaya tajon chujni.

⁴² Ko jan an chuxinnta ko nóna ixi tjaun anta ndo Dio.

⁴³ Jan an jui i ixi Ndotána xruan anna ndo ko ja anta titikaon antana. Ko siá tij naa ngisen je o nichja nge e chónða ngaya aséen nã, ni me e titikaonnta.

⁴⁴ ¿Xranchi tsitikaonnta, siá tsaye enta juasaya tajon chujni, ko tjé anta ti nge e jian tj xin ngajin ndo Dio, ndo naáko Dio?

⁴⁵ Xraxaon anta ixi jan an tsjankata anta ijie ngajinxin Ndotána. Na i. Ndo tsjankata anta ijie me e ndo Moisés ixi chuntianta ngajin ndo.

⁴⁶ Ixi siá xrokuitikaonnta nge e tsindachro ndo Moisés, kaxon xrokuitikaonnta ixi ndo Moisés ikjin ndo ixi najan an.

⁴⁷ Ko siá tsitikaon anta nge e tsikjin ndo, ¿xranchi tsitikaonnta nge e ntatjunta?

6

Ndo Jesús kuajon ndo nge e juine na ó mil chujni

(Mt. 14:13-21; Mr. 6:30-44; Lc. 9:10-17)

¹ Tjume e sakjui ndo Jesús kuantu ndo ndachaon Galilea, inda me e ndatin in Tiberias kaxon.

² Ko kueya chujni rué e nã ixi bikon nã ixrã ijie juinche e ndo ti juinchexruen en ndo ni ni e.

³ Ko ndo Jesús kuajin in ndo naa ijnã ko nti a bake e ndo nunte kao sen teyuu chrikao ndo.

⁴ Ko ó jitonchjiñe e nchakon tsij kia pascua, kiée ni judío.

⁵ Ko bikon ndo Jesús ixi kueya chujni kuajin in nã jnã, jirué e nã ndo ko juanchangi e ndo ndo Felipe:

—¿No tse nana nge e sine kain chujni?

⁶ Jaña ndachro ndo ixi tsin en ndo nge e xichro ndo Felipe ixi ndo Jesús ó no e ndo nge e sinche e ndo.

⁷ Ko juate e ndo Felipe, ndachro ndo:

—Maski doscientos tomi xrochondana xrokuenaxinna nutja xraxrokuitja i xrojuine ngujngu chujni tu o nutja.

⁸ Ko ndo Andrés, naa sen chrikao ndo Jesús, ndosaué ndo Simón Pedro, ndachro ndo:

⁹ —Nti i jii naa chjan chónða xjan na ó nutja tsikoña noa cebada ko chónða xjan yuu kuchee. ¿Á tsitja ji i, ixi kueya chujni jii?

¹⁰ Ko ndachro ndo Jesús:

—Tetuen enta nã tsake e nã nunte.

Ti jii kayua nti a, bake e nã nunte, xranchi na ó mil chujni xi.

¹¹ Ko ndo Jesús kua ndo nutja ko kuajon ndo juasie ndo ngajin ndo Dio, ko tjume e kuajon ndo nio ngajin sen teyuu chrikao ndo. Ko je e sen konchjeya sen nio, kuayé e kain ni ste nti a. Jaña kaxon konchjeya sen kuchee. Ko kain nã juine nã kain ti tjaun nã.

¹² Juexin juine nã, tjume e kuetuen en ndo Jesús sen teyuu chrikao ndo, ndachro ndo:

—Tja onta nge e tsixe e ixi xro an nge e tsitjáña.

¹³ Ko jaña juinche e sen ko juinchekaon sen teyuu ntaxra nutja tutu o ti na ó nutja tsikoña noa cebada tsijinchexe e nã hora juexin juine nã.

¹⁴ Ko ni juine nutja bikon nã ti ixrã ijie juinche e ndo Jesús ko ndachro nã:

—Ndo me e nduaxin ndo tsixrúa an ndo Dio tsij nunte xasintajni.

¹⁵ Ko ndo Jesús kono e ndo ixi tjaun nã xraxrobikao nã ndo xrojuinchéña nã ndo rey ixi xrokuetuan an ndo. Ko je e ndo tjaun a ndo ji i ko je o ndo sakjui ndo ntajie íjngo, ko nti a bake e ndo.

Ndo Jesús itji ndo ngataon inda

(Mt. 14:22-27; Mr. 6:45-52)

16 Tjume e ó kóndo sen teyuu chrikao ndo Jesús xingajinxin sen ijna sakjui sen ngande e inda,

17 ko kuajin in sen naa ntábarco ko kuaxi sen kuantu sen inda satsji sen tjajna Capernaum. Ó naxixe e ko xrakjan i ndo Jesús.

18 Tjume e kuaxi kuii chrinto soji ko kuaxi jamangitaon inda.

19 Ko chao sakjui sen xranchi na ó o ikjaon kilómetro ko tuinxin bikon sen ndo Jesús, jitonchjiñe e ndo tjenka ntábarco, xranchi yaa ndo cha o jitji ndo ngataon inda. Jaña bikon sen ko tsango xronka sen.

20 Ko ndo Jesús ndachro ndo:

—Jan an jui i. Xronka inta.

21 Ko tsango juaxruxin kuintee sen ixi kuajin in ndo ntábarco. Ko tuinxin kuiji sen ti no xrokuiji sen.

Chujni tjée na ndo Jesús

22 Ko nchakon ndúyaxin, ni kuitu e ti ndachaon* kono e na ixi naakuaxon ntábarco bake e nti a, ko no e na ixi ndo Jesús tsikikao a sen ndo ixi bikon na ixi je o sen teyuu chrikao ndo, satsikji sen.

23 Ko tjume e kuii kaxin ntábarco ti xin tjajna Tiberias tjenka ti no juinexin na nutja, ti kuajonxin ndo Jesús juasie ndo ngajin ndo Dio.

24 Ko nchakon bikon na ixi ko a ndo Jesús ko kaxon ko a sen teyuu chrikao ndo, tjume e je e na kuajin in na ntábarco ko sakjui na tjajna Capernaum ko bijée na ndo Jesús.

Ncháina Jesús, je e ndo xranchi nutja tajon juachaxin stechón chujni

25 Tjume e kuiji na tuenxin inda ko bikon na ndo Jesús ko juanchangi e na ndo:

—Maestro, ¿ngisa jui ia nti i?

26 Ko juate e ndo Jesús, ndachro ndo:

—Ó nóna ixi ja anta tjéenta na ixi juintenta nutja ko kaonnta, ko je a ixi kuienxinnta ti ixra ijié junta a.

27 Ta inta juachjaon ixi nge e sintenta taka tsjexin. Nche enta ixra ixi nge e ti sintenta tsjexin a ixi tsaye enta juachaxin tsechonnta kain nchakon. Me e tajon Chjen en ndo Dio, xjan jongí e xranchi chujni, ixi Ndotée ndo tjako ndo ixi Chjen en ndo chóna xjan juachaxin.

28 Ko juanchangi e na ndo:

—¿Xranchi sinta ana ixi tsitika onna xranchi tjaun ndo Dio?

29 Ko juate e ndo Jesús, ndachro ndo:

—Ndo Dio tjaun ndo ixi tsitikaonnta ngisen tsixrua an ndo.

30 Ko juanchangi e na ndo:

—¿Nge e tjakoxian ixi tsikonna ko chao tsitika onna? ¿Nge e ixra nche e?

31 Sen tsikachrjenixinna sa ó juine sen maná ikjan nutja nchakon bake e sen ntajie, méxin, jaña chijnie ndo Dio tsikjin na ndachro: “Kuajon ndo nge e juine na, me e nutja kuixin ngajni.”

32 Ko juate e ndo Jesús, ndachro ndo:

—Naa nge e nduaxin ntatjunta, je a ndo Moisés kuajon maná ikjan nutja xingajinxin ngajni. Ndotána tajon ndo nutja nduaxin, nutja xingajinxin ngajni.

33 Nutja tajon ndo Dio, me e ndo xingajinxin ngajni ko je e ndo chjée ndo chujni nunte xasintajni juachaxin tsechón na kain nchakon.

34 Ko ndachro na:

—Ncháina, kain nchakon chjánana nutja me e.

35 Ko ndachro ndo Jesús:

* 6:22 *ndachaon* mar

—Jan an me e nutja tajon juachaxin tsechón chujni. Sen tonchjiñe e ngajin jan an ítsen a sen jinta, ko sen tsitikaonna, ítsen a sen inda.

³⁶ Ko xranchi ntatjunta sa ó, maski ó bikontana, xratitikaon anta.

³⁷ Ko kain chujni chjána Ndotána tsonchjiñe e nã ngajin. Ko kain ni tonchjiñe e ngajin, jan an tsengí a nã satsji nã.

³⁸ Jan an juixin ngajní ko je a nge e tja on sinta a. Jui i xixi sinta a ixrã tjaun ndo tsixruan anna.

³⁹ Ko Ndotána tsixruan anna, me e tjaun ndo xixi xro an chujni chjána ndo tsitjáña, xixi tjaun ndo jan an sintaxechón kain nã nchakon tsjexixin.

⁴⁰ Ngisen tsixruan anna tjaun xixi kain ni tsikon jan an, Chjen en ndo Dio, ko tsitikaonna nã, ni me e tsayé e nã juachaxin tsechón nã kain nchakon. Tjume e jan an sintaxechón nã nchakon tsjexixin.

⁴¹ Ko ni judío juangíxin nã ndako a nichje e nã ndo Jesús xixi tsindachro ndo je e ndo nutja xingajinxin ngajní.

⁴² Ko ndachro nã:

—¿Á je a xi i xi Jesús, ndotée xa ndatin in José? Chuxinna ndotée ko janée xa. ¿Méxin, sonda ndachro xa xixi ngajní tsixingajinxin xa?

⁴³ Ko juate e ndo Jesús, ndachro ndo:

—Ínichjangi anta.

⁴⁴ Xro an chujni xrokonchjiñe e ti ritjén jan an siá xrokuajon a juachaxin Ndotána. Ko sen tonchjiñe e ti ritjén, jan an sintaxechón sen nchakon tsjexixin.

⁴⁵ Sen kuachronga chijnie ndo Dio ó sa ó tsikjin sen xroon ndachro: “Ndo Dio sinchekuen en ndo kain chujni.” Méxin kain sen tsikin en ti nichja Ndotána ko juinchekuen en ndo sen jitonchjiñe e sen ti ritjén jan an.

⁴⁶ Xro an chujni tsikikon Ndotána. Je o ngisen kuixin ti jii ndo Dio tsikikon ndo.

⁴⁷ Nduaxin nge e ndachrjan xixi sen titikaonna ó chónnda sen juachaxin tsechón sen kain nchakon.

⁴⁸ Jan an nutja tajon juachaxin tsechón chujni.

⁴⁹ Chujni kuachrjenixinnta sa ó juine nã maná ikjan nutja, nchakon bake e nã ntajie, ko maski juine nã tjume e kuen en nã ko kuitjáña nã.

⁵⁰ Ko ti nichja jan an me e nutja xingajinxin ngajní, ko sen sine nutja me e tsen a sen.

⁵¹ Jan an nutja jichón xingajinxin ngajní. Ko sen sine nutja, tsechón sen kain nchakon. Nutja tsajon jan an ntau na me e, ko jan an tsajon nutja me e xixi chujni nunte xasintajni xrochónnda sen juachaxin tsechón sen kain nchakon.

⁵² Ko ni judío koñao nã, tjao kichuu nã, ndachro nã:

—¿Xranchi xrokuajon xi i ntau e xa xrojuinena?

⁵³ Ko juate e ndo Jesús, ndachro ndo:

—Jan an ndachrjan xixi siá sine anta ntau e Chjen en ndo Dio, xjan jongí e xranchi chujni, ko siá tsi anta jnié xjan, xrochonda inta juachaxin tsechonnta kain nchakon.

⁵⁴ Ngisen sine ntau na ko tsi i jnina, sen me e xrochónnda sen juachaxin tsechón sen kain nchakon ko jan an sintaxechón sen nchakon tsjexixin.

⁵⁵ Xixi ntau na nge e nduaxin sine chujni, ko jnina me e nduaxin tsi i chujni.

⁵⁶ Sen ine ntau na ko ti i jnina stenii sen jan an ko jan an riní je e sen.

⁵⁷ Ndotána tsixruan anna ndo jan an, ndo me e jichón ndo, ko jan an richónxin xixi je e ndo. Ko sen sine ntau na, sen me e tsechónxin sen xixi jan an.

⁵⁸ Méxin, rinichja xixi nutja xingajinxin ngajní, nutja me e je a xranchi maná juine ni tsikachrjenixinnta sa ó xixi je e nã, maski juine nã maná, kuen en nã. Ko siá sintenta nutja xingajinxin ngajní, ja anta tsaye enta juachaxin tsechonnta kain nchakon.

⁵⁹ Kain ji i juinchekuen en ndo ni tsixra o ni ngo Israel tjajna Capernaum.

Nge e chronga ndo Jesús tajon juachaxin tsechón chujni kain nchakon

⁶⁰ Ko nchakon kuin en nã nge e juinçekuen en ndo Jesús nã, tjume e itsjé sen chrikao ndo ndachro sen:

—Tsango tangi nge e chronga ndo. ¿Ngisen xrokuitikaon ji i?

⁶¹ Ko kono e ndo Jesús ixi jaña ndachro sen kuienxin a sen nge e tsindachro ndo ko juanchangi e ndo sen:

—¿Á kaxon ja anta tjaun anta tsin ennta ji i?

⁶² ¿Xranchi xrokon en siá tsikonnta ixi Chjen en ndo Dio, xjan jongí e xranchi chujni, satsji xjan íjngo ti no tsikí xin xjan?

⁶³ Espíritue ndo Dio tajon juachaxin tsechón chujni kain nchakon, ko ntau e chujni xro an tjintee. Ko nge e ntatjunta me e kondee Espíritue ndo Dio ko chónnda juachaxin tsechónxin chujni.

⁶⁴ Ko kaxinnta xratitikaon anta,

Jaña ichro ndo ixi xrangíxixín ó no e ndo ngisen tsitikaon a ndo ko no e ndo ngisen sinçekji ndo.

⁶⁵ Méxin, ndachro ndo:

—Jaña ntatjunta ixi xro an chujni tsonchjiñe e ti ritjén jan an siá Ndotána tsajon a ndo juachaxin.

⁶⁶ Ko juexin ji i, kueya sen bakajikao ndo Jesús tuinxin kuintu e sen ndo, rue a sen ndo.

⁶⁷ Tjume e juanchangi e ndo sen teyuu chrikao ndo, ndachro ndo:

—¿Á kaxon ja anta tjaunnta satsjinta?

⁶⁸ *Ko juate e ndo Simón Pedro:

—Ncháina, ¿ti no itsjina? Chijni nichja ja anta tajon juachaxin tsechónna kain nchakon†

⁶⁹ ko titika onna ko nónana ixi nduaxin ja anta ndo Cristo, Chjen en ndo Dio jichón.

⁷⁰ Ko juate e ndo Jesús, ndachro ndo:

—Jan an kuincha a kainnta teyuunta, ko naánta nti i xrokjannta naa chujni ña i.

⁷¹ Ti ndachro ndo Jesús xrondachro ixi xi Judas Iscariote, ndotée xa ndatin in Simón. Xi Judas naa teyuu sen kuinche e ndo, ko xi me e sinçekji xa ndo Jesús.

7

Sen kichuu ndo Jesús kuitikaon a sen ndo

¹ Tjume e ndo Jesús kuaji ndo nunte Galilea ixi jua i tsaji ndo nunte Judea ixi ni judío tjaun nã naatsóñaxón nã ndo.

² Ko ó kuji nchakon kia, kiée ni judío nchéña nã kueya nchia nchínchín,

³ ko sen kichuu ndo Jesús ndache sen ndo:

—Titua ia nti i. Satjia nunte Judea ixi kaxon sen rua a nti a tsikon sen ixrã ijié nche e.

⁴ Ixi siá naa chujni tjaun ixi chujni xrochuxin nã sen, sen me e je a imao sinche e sen ixrã. Méxin, siá nduaxin nche e ixrã ijié, je a imao xrojuinche e me e. Tsikon kain chujni nunte xasintajni.

⁵ Jaña ndachro sen kichuu ndo Jesús ixi kaxon je e sen titikaon a sen ndo.

⁶ Ko juatingíexin ndo Jesús:

—Xratitjá i hora sinta a ixrã ijié. Ko ja anta ngixe i hora chao sinche enta nge e.

⁷ Chujni nunte xasintajni jua i xroningakon annta nã. Jan an tsango ningakonna nã ixi jan an ntatjan nã ixi je e nã je a jian nge e nche e nã.

⁸ Ja anta itjinta kia. Jan an tsji a ixi xratiji a orána.

⁹ Jaña ndachro ndo, ko kuitu e ndo nunte Galilea.

Ndo Jesús jii ndo kia

¹⁰ Ko juexin satsikji sen kichuu ndo Jesús, tjume e je e ndo kaxon ikjui ndo kia, ko konoxin a ndo ixi tjaun ndo xro an ngisen xrobikon ndo.

¹¹ Ko ni judío tjée n̄a ndo ti kia ko ndachro n̄a:

—¿No jii xi me e?

¹² Ko kueya ni ste nti a stetjao n̄a kondee ndo Jesús. Kaxin n̄a ndachro n̄a: “Jian xi ñ̄a”; ko ikaxin n̄a ndachro n̄a: “Je a jian xa ixi ncheye e xa chujni.”

¹³ Ko xro an ngisen nichja kondee ndo ícha, ixi xrakon en n̄a ni judío.

¹⁴ Tjume e ó ngusine kia kuixin in ndo Jesús ni ngo ijié ko juangíxin ndo juinchequen en ndo n̄a.

¹⁵ Ko ni judío xronka n̄a, tsje e n̄a ndo, ko ndachro n̄a:

—¿Xranchi tsango no e xi ji i kain nge e ixi xro an ngisen juako e xa?

¹⁶ Ko juate e ndo Jesús, ndachro ndo:

—Nge e ntakuan an chujni je a nge e tja on, ti ntakuan an n̄a me e kondee ngisen tsixruan anna jui i.

¹⁷ Siá xrojannta tjaunnta tsitikaonnta nge e tjaun ndo Dio, me e tsono anta á nduaxin ixi ndo Dio tjako o á je o nge e xraxa on.

¹⁸ Ko ngisen nichja nge e tjaun, je o nichja n̄a ixi tjaun n̄a ixi ikaxin n̄a tsajon n̄a juasaya ngajin je e n̄a. Ko ngisen tjaun ixi ngisen tsixrua an n̄a tsayé e juasaya, ni me e tjako nge e nduaxin ko ncheya i n̄a.

¹⁹ ¿Á je a ndo Moisés tjáanta ndo ley chijnie ndo Dio? Ko ninaánta kuitikaonnta nge e tsikjin ndo. Méxin, ¿sonda tjaunnta tson intana?

²⁰ Ko je e n̄a juate e n̄a:

—Ja a chonda naa espíritue Xixron anxrée. ¿Ngisen tjaun tsóñaxion?

²¹ Ko ndachro ndo Jesús:

—Naáko nge e junta a nchakon tjoké e n̄a ko xronkanta.

²² Ko ndo Moisés tsiketuan an ndo ixi chjan anta, xjan xi, tsaa xjan chji e, (ko je a ndo Moisés kuaxi ndo juinchequen en ndo n̄a ji i, sen tsikachrjenixinnta kuaxi sen juinche e sen). Jaña ja anta chje énta xjan chji e, maski nchakon tjoka anta.

²³ *Ja anta tjaunnta tsitikaonnta nge e tsiketuan an ndo Moisés, méxin, chje énta ichjan chji e xjan nchakon tjoka anta, ko, ¿sonda toñaonta ixi juntaxruan an naa chujni nchakon me e?

²⁴ Tjankata inta ijié ixi je o nge e tikonxinnta ikonnta. Sa ó xraxaonnta nge e jian tjaun ndo Dio.

Ndo Jesús nichja ndo kondee ti no kuixin ndo

²⁵ Tjume e kaxin ni tjajna Jerusalén kuaxi n̄a juintejaio kichuu n̄a, ko juanchangi n̄a:

—¿Á je a xi ji i tjée n̄a tsóña n̄a xa?

²⁶ Ko jai jinichja xa ngajinxin ikon kain n̄a ko xro an ngisen ndachro nge e. ¿Á titikaon ni tituan an ixi xi ji i nduaxin ndo Cristo xa?

²⁷ Ko jaina noina no tsiki xin xa. Ko nchakon tsii ndo Cristo, xro an ngisen tsono e no tsi xin ndo.

²⁸ Ko ndo Jesús juinchequen en ndo n̄a ti ni ngo ko kuin en ndo jaña juao n̄a, ko séen nichja ndo, ndachro ndo:

—Nduaxin chuxinntana, ko no anta no juixin. Ko je a jui i ixi jan an tja on. Jan an jui i ixi xruan anna ndo nduaxin nche e nge e, ko ja anta chuxin anta ndo.

²⁹ Jan an chuxin ndo ixi nti a juixin ti jii ndo, ko je e ndo xruan anna ndo.

³⁰ Tjume e tjaun n̄a xrotsé n̄a ndo, xroxraxon in n̄a ndo ndo achjiso, ko xro an ngisen itsé ndo ixi xrakuajon a ndo Dio juachaxin sinche e n̄a me e.

³¹ Ko kueya n̄a kuitikaon n̄a ndo ko ndachro n̄a:

—Hora tsii ndo Cristo, ¿á ícha ijié nge e sinche e ndo, ixi xi ji i?

Xroxraxin in n̄a ndo Jesús ndo achjiso

³² Tjume e ni fariseo kuin en n̄a nge e ndachro n̄a ixi ndo Jesús, ko je e n̄a ko xitaana tetuan an kuetuen en n̄a kaxin ni policia nche e ixra ni ngo xrotsé n̄a ndo Jesús xroxraxin in n̄a ndo ndo achjiso.

³³ Méxin, ndachro ndo Jesús:

—Tsake e ngajinnta kaxin nchakon ko tjume e xrokjanna ngajin ngisen tsixruan anna.

³⁴ Ja anta tsjéentana ko tsinchii antana ixi jua i itsjinta ti no tsake e jan an.

³⁵ Ko ni judío juangíxin n̄a juanchangi e kichuu n̄a:

—¿No satsji xa ixi jua i tsitjana xa? ¿Á tsji xa ngajin ni judío stekjen en ngajin ni nichja ngigua griego ixi sinchekuen en xa n̄a nti a?

³⁶ ¿Nge e xrondachro ti ndachro xa ixi tsjéena xa ko tsitja ina xa ko jua i itsjina ti no tsake e xa?

Ndajitinga jichón

³⁷ Nchakon jitjexin kia, me e nchakon ijié, bingatjen ndo Jesús, ko séen nichja ndo:

—Siá xrojan ngisen kuen en inda tonchjiñe enta ngajin jan an ko tin innta inda.

³⁸ Xranchi ndachro xroon Chijnie ndo Dio, ngisen titikaonna, sen me e ngaya aséen sen tsinga naa ndajitinga jichón.

³⁹ Jaña ndachro ndo Jesús ixi sen titikaon ndo tsayé e sen Espíritue ndo Dio. Ixi xrati a Espíritue ndo ko ndo Jesús xrasatji a ndo ngajní.

Je a xraje o xraxaon chujni

⁴⁰ Ko kaxin n̄a, nchakon kuin en n̄a nge e ndachro ndo Jesús, ndachro n̄a:

—Á nduaxin xi ji i xi profeta xrokuji.

⁴¹ Ko ikaxin n̄a ndachro n̄a:

—Xi ji i ndo Cristo.

Ko ikaxin n̄a ndachro n̄a:

—¿Xranchi xrokuji x̄in nunte Galilea ndo Cristo?

⁴² Xroon tsikjin sen kuachronga chijnie ndo Dio sa ó ndachro ixi ndo Cristo tsachrjexin ndo ni kuachrjenixin ndo rey David ko tsj̄ x̄in ndo tjajna Belén, tjajna bake e ndo David.

⁴³ Méxin, kain n̄a je a naxraje o xraxaon n̄a ko chjeya n̄a kondeexin ndo Jesús.

⁴⁴ Kaxin n̄a tjaun n̄a saxrobikao n̄a ndo ixi xroxraxin in n̄a ndo ndo achjiso ko xro an ni juinche e nge e.

Ni tetuan an titikaon a n̄a ndo Jesús

⁴⁵ Tjume e ni policia kondee ni ngo ikjan n̄a ti ste ni fariseo ko xitaana tituan an. Ko je e n̄a juanchangi e n̄a ni policia:

—¿Sonda biko inta xa?

⁴⁶ Ko juate e ni policia:

—Xro an ngisen kuanichja xranchi nichja xi me e.

⁴⁷ Ko ndache ni fariseo ni policia:

—¿Á kaxonnta kuintu enta juntaya anta xa?

⁴⁸ ¿Á xrojan n̄a tetuan an tjajnaina o ni fariseo kuitikaon xa?

⁴⁹ Ni titikaon xa, ni me e chúxin a n̄a ley ko je e n̄a tsikaon n̄a.

⁵⁰ *Xi Nicodemo, xi kuitsje e ndo Jesús naa tiie ó sa ó, xi me e naa ni fariseo, ko ndache xa n̄a:

⁵¹ —Ley tajon a juachaxin tsjankata ana naa chujni ijié ti xratien ani nge e nichja n̄a ko noe ani nge e ijié juinche e n̄a.

⁵² Ko juate e n̄a:

—¿Á kaxon ja a juixian nunte Galilea? Nchekuanxian xroon chijnie ndo Dio ko tsono a ixi xro an ngisen kuachronga chijnie ndo Dio tsiki xin nunte nti a.

⁵³ Ko ngujngu na chjeya na sakjui na ndo a na.

8

¹ Ko ndo Jesús sakjui ndo ijna Olivo.

Naa nchri ndako a juinche e

² Ndúyaxin kuji ndo Jesús ni ngo ko chujni tjajna kuji na ngajin ndo ko bake e ndo nunte ko kuaxi ndo juinhekuen en ndo na.

³ Tjume e ni tjako ley ko ni fariseo bika o na naa nchri tsikitjaxin na nchra jijuakao nchra naa xi, ko xi me e je a xixi e nchra. Ko bake e na nchra ngusine ni ste nti a.

⁴ Ko ndache na ndo Jesús:

—Maestro, nchri ji i kuitjaxin na nchra jijuakao nchra naa xi, ko xi me e je a xixi e nchra.

⁵ Ko xroon tsikjin ndo Moisés ndachro ixi kain nchri jaña sinche e tsóñaxin na nchra ixro, ko ja a, ¿nge e ndachrua?

⁶ Jaña juanchangi e na ndo ixi tjaun na ndako a xrojuatingíexin ndo ixi xrokuitja na nge e xrobankata a na ndo ijię. Ko je e ndo Jesús kuisée ndo ko kuaxi ndo ikjin ndo ngata a inche ixi dedo itja ndo.

⁷ Ko je e na ícha tjanchangí e na ndo. Me e xendua ndo ko ndache ndo na:

—Ni xro an ijię chóna, ni me e sa ó tsjánka na ixro ko tsóña na nchra.

⁸ Ko íjngo kuisée ndo ko kuaxi ikjin ndo ngata a inche.

⁹ Ko je e na kuin en na nge e ndachro ndo ko xraxaon na ixi je e na chóna na ijię kaxon. Méxin, kuaxi na sakjui na, naa ko naa na, xrangíxixín ni ícha tachríi hasta ni ícha nchíin. Ko je e ndo Jesús ko nchri tsikika o na, yutu je o sen kuitu e sen.

¹⁰ Ko tjume e ndo Jesús xendua ndo ko juanchangi e ndo nchra:

—Ja a nchri, ¿no ste ni tangi a ko ni ndachro ixi chonda ijię ko xrokuen en? ¿Á ninaa na tjankata a na ijię?

¹¹ Ko je e nchra ndachro nchra:

—Na i, Ncháina, ninaa na ko a na.

Ko tjume e ndo Jesús ndachro ndo:

—Kaxon jan an tjankatái a ijię. Satjia ko ínche a ícha ti ndako a juinche e.

Ndo Jesús xro i tingasáñaxin nunte xasintajni

¹² *Tjume e ndo Jesús nichja ndo íjngo ngajin na ko ndachro ndo:

—Jan an xro i tingasáña nunte xasintajni. Sen xroruéna xrochóna sen xro i tajon juachaxin tsechón sen kain nchakon ko ítsaji a sen ti naxixe e.

¹³ *Ko ni fariseo ndachro na:

—Ja ua nichjaxian ixi ja a, ko ti ndachrua tjinte a.

¹⁴ Ko juatingíexin ndo Jesús:

—Nge e nichjaxin jan on tjintee ixi nóna no juixin ko nóna no satsji. Ko ja anta noa inta no juixin ko no satsji.

¹⁵ Ja anta nchéñanta ijię xranchi chujni nunte xasintajni nchéña ijię. Ko jan an xro an ngisen tjankata a ijię.

¹⁶ Ko siá jan an sintaña ijię, ndako ntáña ijię ixi je a jan on ntáña ji i. Ndotána, ndo xruan anna jui i, kayuina ntáñana ijię.

¹⁷ Ko ley tsikjin ndo Moisés ndachro siá tsonoxin yuu ni xrochronga á nduaxin jaña tsikon en, jaña xrokonda tsitikaonni na.

¹⁸ Ko jan an nichjaxin ixi jan an ko me e ó naa ni chronga nge e, ko kaxon Ndotána, xruan anna jui i, je e ndo nichjaxin ndo ixi najan an. Me e ó yuu sen chronga.

¹⁹ Ko juanchangi e na ndo:

—¿No jii Ndotáa?

Ko juate e ndo Jesús:

—Ja anta chuxin antana ko kaxon chuxin anta Ndotána. Siá xrokuichuxinntana, kaxon xrokuichuxinnta Ndotána.

²⁰ Jaña ichro ndo Jesús nchakon juako ndo ngaxin in ni ngo ijié tjenka ti jii ntaa tjinga tomi tajon na. Ko xro an chujni itsé ndo ixi ndo Dio xratajon a ndo juachaxin xrotsé na ndo.

“Jua i itsjinta ti no satsji jan an”

²¹ Ndo Jesús íjngo ndache ndo na:

—Jan an satsji. Ko ja anta tsjéentana, ko nchakon tsen ennta xratsamanta ijié chondanta. Ko jua i itsjinta ti no satsji jan an.

²² Ko ni judío juao kichuu na ko ndachro na:

—¿Á tsóna xa aséen xa, méxin ndachro xa ixi jua i itsjina tinó satsji xa?

²³ Ko ndache ndo Jesús na:

—Ja anta nunte nti inta. Ko jan an juixin ngajní. Ja anta nunte xasintajninta ko jan an je a nunte xasintajnina.

²⁴ Méxin, ndachrjan ixi nchakon tsen ennta xratsamanta ijié chondanta ixi siá tsitikaon anta ngisen ndachrjan, ngisen najan an, nchakon tsen ennta xraxrochondanta ijié.

²⁵ Ko tjume e juanchangi e na ndo:

—¿Ngisen ja a?

Ko juate e ndo:

—Xrangíxixión kuaxi ndachrjan ngisen najan an.

²⁶ Itsjé nge e xrondachrjan ko kaxon sintaña ijié ngajinnta. Ko ngisen xruan anna jui i chronga ndo nge e nduaxin. Ko je o nge e kuin an ndachro ndo xruan anna, me e ntakuan an ni nunte xasintajni.

²⁷ Ko je e na kuienxin a na ti nichja ndo ixi Ndotée ndo jii ngajní.

²⁸ Ko ndachro ndo:

—Nchakon tsjankanitonta ntacru Chjen en ndo Dio, xjan jongí e xranchi chujni, tsono anta ixi jan an nduaxin ngisen ntatjunta ngisen najan an. Ko tsono anta ixi je a jan on tituan an ixra nta a. Na i. Je o nge e juako na Ndotána me e tjako.

²⁹ Ixi ndo xruan anna jui i, ndo me e jii ndo ngajin jan an. Ndotána kuintuna ina ndo jan on ixi kain nchakon titika on nge e tjaun ndo.

³⁰ Nchakon jaña ndachro ndo Jesús kueya na kuitikaon na ndo.

Xranchi ste ni ikjan Chjen en ndo Dio

³¹ Tjume e ndo Jesús ndache ndo ni judío, ni kuitikaon ndo:

—Siá tsintue anta ti tjako jan an, ja anta nduaxin chujnina.

³² Ko xrochuxinnta ti nduaxin, ko me e xrotjáanta juachaxin ixi jian tsake enta ko xro an ngisen tsantsja anta juachaxin me e.

³³ *Ko juate e na:

—Jan anna kuachrjenixinna ndo Abraham, méxin í jua i tsituannana inaa ngisen. ¿Sonda ndachrua ja a jai, xro an ngisen tsingakonnana?

³⁴ Ko ndachro ndo Jesús:

—Naa nge e nduaxin ntatjunta ixi ngisen nche e nge e ndako a, jua i tintu e na ti ndako a, ko ijié chóna na me e tantsje e na juachaxin.

³⁵ Ixi naa ni nchexra jua i titu e na nchia kain nchakon. Ko naa chjen en ni ndo a, tikinixin en xjan titu e xjan nchia kain nchakon.

³⁶ Ko nchakon Chjen en ndo Dio xrotjáanta xjan juachaxin, xro an nge e tsingako annta ko nduaxin chao tsajinta.

³⁷ Ó nóna ixi ja anta tsikachrjenixinnta ndo Abraham. Ko tjaunnta tsóñantana ixi titikaon anta nge e ndachrjan.

³⁸ Jan an ndachrjan nge e ó juakona Ndotána. Ko ja anta titikaonnta nge e ntatjunta ndotáanta.

³⁹ Ko je e na juate e na:

—Ndotánana ndo Abraham.

Ko ndachro ndo Jesús:

—Siá nduaxin xrokjuinta chjen en ndo Abraham xrojuinche enta nge e juinche e ndo.

⁴⁰ Ko jan an ntatjunta nge e nduaxin, nge e ndo Dio juako na ndo, ja anta tjaunnta tson intana. Ndo Abraham nai a juinche e ndo naa nge e jaña.

⁴¹ Ja anta nche enta xraje o nge e nche e ndotáanta.

Ko ndachro na:

—Je a juinchéñamána na. Na i. Chondana naakua Ndotánana me e ndo Dio.

⁴² Ko ndache ndo Jesús na:

—Siá nduaxin ndo Dio Ndotáanta me e xrotjauntana ixi jan an kaxon kuachrjexin ti jii ndo ko nti i ritjén. Je a jan on jui i. Na i. Ndo Dio xruan anna.

⁴³ ¿Sonda tienxin anta nge e ndachrjan? Titikaon anta ixi tjaun anta tsin ennta nge e tjako.

⁴⁴ Ja anta chjen en Xixron anxrée ko ja anta tsikachrjexinnta xa ko tjaunnta tsitikaonnta nge e tjaun xa. Xixron anxrée xrangíxixión tóña xa chujni. Ko nai a nichja xa nge e nduaxin. Kain nchakon ncheya xa ixi jaña xraxaon xa. Je e xa tituan an xa kain juancheya.

⁴⁵ Ko jan an ndachrjan nge e nduaxin ko ja anta titikaon anta.

⁴⁶ ¿Á xrojannta no anta naa ijię juinta a? Siá ndachrjan nge e nduaxin, ¿sonda titikaon antana?

⁴⁷ Ngisen titikaon ndo Dio tjaun sen tsin en sen chijnie ndo. Ko ja anta titikaon anta ndo, me e tjaun anta tsin ennta chijnie ndo.

Ndo Cristo sa ó bake e ndo ko tjume e ndo Abraham

⁴⁸ Ko ni judío ndache na ndo Jesús:

—Nduaxin ndako ndachrjana ixi ja a naa chujni samaritano ko chóna naa espíritue Xixron anxrée.

⁴⁹ Ko juate e ndo Jesús:

—Xro an espíritue Xixron anxrée chonda. Ixra nta a tajonxin juasaya ngajin Ndotána. Ko ja anta chonda inta juasaya ngajin jan an.

⁵⁰ Jan an tjaun a xrochjana chujni juasaya. Ko jii naa ngisen tjaun ixi chujni xrochjana juasaya, ko je e ndo nchéña ndo ijię ngajin kain chujni.

⁵¹ Naa nge e nduaxin ntatjunta; siá tsitikaonnta nge e tjako, nai a tsen ennta.

⁵² Ko juate e ni judío:

—Jai nóna ixi nduaxin chonda naa espíritue Xixron anxrée. Ndo Abraham ko kain sen kuachronga chijnie ndo Dio sa ó, kuen en sen. Ko ja a ndachrua ixi siá tsitikaonna nge e tjakoa, tsen ana.

⁵³ ¿Á ícha tetuan an ja a ixi ndotánana Abraham? Je e ndo kuen en ndo ko kaxon kuen en sen kuachronga chijnie ndo Dio ó sa ó. ¿Ngisen ja a ixi jaña ndachrua?

⁵⁴ Ko juate e ndo Jesús, ndachro ndo:

—Siá jan on tsajon juasaya ngajin jan an, tjinte a ji i. Ko Ndotána chjana ndo juasaya ko ja anta ndachronta ixi je e ndo, ndo Dio na anta.

⁵⁵ Ko ja anta chuxin anta ndo. Ko jan an chuxin ndo. Siá xrondachrjan chuxin a ndo me e xrojuincheya xranchi ja anta. Ko jan an chuxin ndo ko titika on nge e tituan an ndo.

⁵⁶ Ndo Abraham, ndo tsikachrjenixinnta tsango juaxruxin bake e ndo ixi xrobikon ndo nchakon xrojui i jan an. Ko bikon ndo nchakon me e ko juaxruxin bake e ndo.

⁵⁷ Ko ni judío ndache na ndo Jesús:

—Ja a xrachonda ia yukante nano, ¿ko sonda ndachruea ixi ó bikuan ndo Abraham?

⁵⁸ Ko juate e ndo Jesús:

—Naa nge e nduaxin ntatjunta ixi xrako a ndo Abraham, ó ritjén jan an.

⁵⁹ Ko tjume e kua na ixro xrobanke e na ndo Jesús, ko je e ndo kuemá ndo, ko kuachrjexin ndo ni ngo nti a. Tjume e kuatsinga ndo ngusine ti ste na ko sakjui ndo.

9

Ndo Jesús juinchexruen en ndo naa xi tikon a xa

¹ Jitatsinga ndo Jesús naa cha o ko bikon ndo naa xi nchakon tsijongíexón xa tikon a xa.

² Ko sen chrikao ndo juanchangi e sen ndo:

—Maestro, ¿sonda tsijongíexón xa tikon a xa? ¿Á kondeexin jíee ndotée o janée xa o á jíeó xa?

³ Ko juate e ndo Jesús, ndachro ndo:

—Ji i je a jíee xa ko je a jíee ndotée ko janée xa. Jaña tsikon en xa ixi ndo Dio tsjako juachaxien ndo.

⁴ Xratáanchakon xrokonda sinta a ixra tjaun ngisen tsixruan anna. Ko ó tsii tiie ko xro an ngisen chao sinche e ixra.

⁵ *Xraritjén jan an nti i nunte xasintajni, jan an me e xro i tingasáñaxin nunte.

⁶ Ko juexin ndachro ndo ji i, tjume e kuintjé ndo ndatée ndo nunte ko juinchéña ndo nchíin nchita o ko bingamá ndo nchita o me e ikon xi tikon a.

⁷ Ko kuetuen en ndo xa:

—Itjia tuye tjia inda ndatin in Siloé ko tontia inda ikuan. (Ko Siloé xrondachro ngigue e na, tsixrua an.)

Ko sakjui xi tikon a, konti xa inda ikon xa, ko hora ikjan xa ó chao tikon xa.

⁸ Ko ni ndo a tjenka ndo a xa ko ni bakikon ixi tikon a xa, ndachro na:

—¿Á je a xi ji i batjanchiaka a?

⁹ Ko ikaxin na ndachro na:

—Jaán, je e xa.

Ko ikaxin na ndachro na:

—Na i, je a xa. Je o tikonni xa xranchi xi me e.

Ko je e xa juatingíexin xa:

—Jaán, jan anna.

¹⁰ Méxin, juanchangi e na xa:

—¿Xranchi jai chao tikuan?

¹¹ Ko juatingíexin xa:

—Naa ndo ndatin in Jesús juinchéña ndo nchita o bingamá ndo ikon ko tjume e kuetuanna ndo itsji ti jii pila jitjia inda nchekin in na Siloé ko tsonti inda ikon. Ko ikjui konti inda, ko tuinxin bikon.

¹² Ko juanchangi e na xa:

—¿No jii xi me e?

Ko juate e xa:

—Nóna i.

Ni fariseo tjanchangí e na xi batikon a

¹³ Ko je e na sabikao na xi batikon a ngajin ni fariseo.

¹⁴ Ko nchakon tjoké e na tsijinchekonchjian ndo Jesús nchita o ko juinchexruen en ndo xi batikon a.

¹⁵ Méxin, ni fariseo juanchangi e na xa íjngo xranchi koxruen en xa ko chao tikon xa jai. Ko je e xa ndachro xa:

—Juinchéña ndo chita o bingamá ndo ikon, ko konti inda ikon, ko jai chao tikon.

¹⁶ Ko kaxin ni fariseo ndachro na:

—Xi juinche e ji i, je a chujnie ndo Dio xa ixi chóna i xa juasaya nchakon tjoké eni.

Ko ikaxin na ndachro na:

—¿Xranchi nche e xa ixra ijié siá chóna xa ijié?

Ko jaña je a xraje o xraxaon na.

¹⁷ Tjume e juanchangi e na xi batikon a íjngo:

—¿Ja a nge e ndachrua ixi xi juintaxruan an?

Ko je e xa ndachro xa:

—Jan an ndachrjan ixi je e ndo naa ngisen nichja chijnie ndo Dio.

¹⁸ Ko ni judío kuitikaon a na ixi nduaxin batikon a xa ko jai chao tikon xa. Méxin, kuiye e na ndotée ko janée xi tsikoxruen en,

¹⁹ ko juanchangi e na sen:

—¿Á ji i chjan anta, ja anta ndachronta ixi ti jongíexón xa tikon a xa? ¿Ko xranchi jai chao tikon xa?

²⁰ Ko juatingíexin ndotée ko janée xa:

—Nónana ixi xi ji i chjan naa ko nónana ixi nchakon jongí e xa tikon a xa.

²¹ Ko nóna i na xranchi tikon xa jai ko nóna i na ngisen juinchexruen en xa. Tjanchangí enta xa, ó jié xa ko je e xa xrochronga xa xranchi koxruen en xa.

²² Jaña juatingíexin ndotée ko janée xa ixi xrakon en na ni judío, ixi je e na tsindachro na ixi tsantsjexin na ni ngo chujni titikaon ndo Jesús ndo Cristo.

²³ Méxin, ndachro ndotée ko janée xa: “Tjanchangí enta xa ixi ó ijié xa.”

²⁴ Ko ni judío íjngo kuiye e na xi batikon a ko ndache na xa:

—Ndako chronga ngajinxin* ikon ndo Dio ixi ó nónana ixi xi me e ndako a nche e xa.

²⁵ Ko xi batikon a juatingíexin xa:

—Nóna i á chóna ndo ijié o na i. Naakua nge e nóna ixi sa ó batikon a ko jai ó tikon.

²⁶ Ko juanchangi e na xa íjngo:

—¿Xranchi juinche e xa ixi juinchexruan an xa?

²⁷ Ko juatingíexin xa:

—Juexin ntatjunta ko titikaon anta. ¿Sonda tjaunnta íjngo xrondachrjan? ¿Á kaxonnta tjaunnta xrurué enta ndo?

²⁸ Ko koyaku e na xa ko ndachro na:

—Ja a rue é xi me e. Ko jan anna titika onna nge e kuetuan an ndo Moisés.

²⁹ Jan anna nónana ixi ndo Dio nichje e ndo ndo Moisés. A xi me e, nóna ina no tsiki xin xa.

³⁰ Ko juate e xa ko ndachro xa:

—Tsango jée ji i. Ndo me e juinchexruanna ndo ko chao tikon ko ja anta noa inta no tsiki xin ndo.

³¹ Nónana ixi ndo Dio tien a ndo nge e tjanchia chujni chóna ijié. Je o tin en ndo nge e tjanchia sen titikaon ndo, ko sen titikaon nge e tjaun ndo.

³² Ko nai a kuin anna ixi naa ngisen nchexruen en naa chujni xratsijongíexión tikon a.

³³ Ko ndo me e, siá xrokuixin a ndo ti jii ndo Dio, xro an nge e jian xrojuinche e ndo.

³⁴ Ko juate e ni fariseo ko ndachro na:

* 9:24 ngajinxin delante de

—Ja a kueya ije chonda nchakon jongí a. Ko jai, ¿á tjaun ixi ja a tsjako nana? Ko bengixin na xa ni ngo.

Tjaun a na tsienxin na ixi aséen na

³⁵ Ndo Jesús kono e ndo ixi jaña juinchekao ni judío xi batikon a ti bantsjexinna xa ni ngo. Ko kuetan ndo Jesús xi me e ko juanchangi e ndo xa:

—¿Á chuntia Chjen en ndo Dio, xjan jongí e xranchi chujni?

³⁶ Ko ndachro xa:

—Ncháina, ndachijiana ngisen me e ixi xrochuntia ndo.

³⁷ Ko juate e ndo Jesús:

—Ó bikuan ndo. Me e ndo ritjáoa.

³⁸ Ko xi me e bake exin ntatuchi in xa tutée ndo Jesús, ko ndachro xa:

—Jai chuntia, Ncháina.

³⁹ Ko ndachro ndo Jesús:

—Jan an jui i nunte xasintajni ixi sinta a ije ngajin chujni, ixi ni tikon a, tsikon na, ko ni tikon, tsikon a na.

⁴⁰ Ko kaxin ni fariseo ste nti a kuin en na jaña ndachro ndo Jesús ko juanchangi e na ndo:

—¿Á kaxon jan anna tikon ana?

⁴¹ Ko juatingéxin ndo Jesús:

—Ja anta siá nduaxin xrobikon anta, xrochonda inta ije. Ko na ndachronta tikonnta, me e chondanta ije.

10

Ndo Jesús teki ndo kondee noó tijexin kutuchjon

¹ Tjume e ndachro ndo Jesús:

—Nduaxin ntatjunta: ni tsixin a ntachja tijexin kutuchjon, ko tixixin na nango; ni me e nche e na xranchi naa xiche e ko naa ni ndako a nche e.

² Ko ngisen tixixin ntachja, sen me e nduaxin sen tsje e kutuchjon.

³ Ko sen tendáa ntachja tantje e sen ntachja ixi tixin in sen nduaxin tsje e ba, ko kutuchjon chúxin ba tée sen. Ko tiye e sen ngujngu kutuchjon ixi xranchi tin in ba ko tantsjexin sen ba ndo a ba.

⁴ Ko juexin tachrje kain ba, titaon en sen ba cha o ko rué e ba ixi chúxin ba tée sen.

⁵ Ko rue a ba inaa ngisen chúxin a ba; cháña satinga ba ixi chúxin a ba tée je e na.

⁶ Jaña juako ndo Jesús chijni ji i, ko je e na kuienxin a na nge e ndachro ndo.

Ndo Jesús ndo jian tsje e kutuchjon

⁷ Tjume e ndachro ndo Jesús íjngo:

—Nduaxin ndachrjan ixi jan an ntachja me e tixixin kutuchjon.

⁸ Kain ni kujj ti xrati a jan an, ni me e xiche e ko ni tee. Ko kutuchjon kuitikaon a ba na.

⁹ Jan an ntachja me e: siá tixinxinnta jan an, tsitjáña inta ko xrokjannta xranchi kutuchjonna tsachrjexin ba ti jije e ba ko tixin in ba ko titja ba nge e ine ba.

¹⁰ 'Ko xiche e je o tji xa ixi tjaun xa tsee xa, ko tsóña xa, ko nchetjáñajin xa kain nge e. Ko jan an jui i ixi tsarichonnta kain nchakon ko xro an nge e tsitjáña anta.

¹¹ Jan an naa ngisen jian tsje e kutuchjon, ko sen jian me e tsenxin sen ixi kutuchjoen.

¹² Ko ngisen je o nche e ixra je o tjaun na tsjacha na; tikon na jitji naa kundanihra tintu e na kutuchjon ko satsji na ixi je e na je a ngisen nduaxin tsje e kutuchjon ko je a kutuchjoen na. Ko kundanihra xrotsé ba kutuchjon ko ikaxin kutuchjon satsinga ba, xrochjeke e ba.

13 Ko ni me e satsinga n̄a ixi je o tjaun n̄a tsjenge e n̄a n̄a n̄a ko ta i n̄a juachjaon ixi kutuchjon tsje e n̄a.

14-15 *'Ko jan an naa sen jian tsje e kutuchjon. Ko xranchi Ndotána chúxin n̄a ndo, kaxon jan an chuxin ndo. Jaña chuxin jan an kutuchjonna ko je e ba chúxinna ba. Ko jan an tsenxin ixi kutuchjonna.

16 Kaxon jan an chonda ikaxin kutuchjon xra je a nti i ste ba ko xrokonda tsikian ba. Ko siá je e ba tsin en ba ti nichja jan an, tsoñã naakua no tsintee ba ko naakua ngisen xrotsje e ba.

17 'Ndotána tjaunna ndo ixi maski tsen én, xroxechónna íjngo.

18 Xro an ngisen tsantsjena ti ríchon, jan on tajon aséenna tsen en ixi jaña tja on. Chonda juachaxin tsajon aséenna ko chonda juachaxin xroxechónna íjngo. Ji i kuetuanna Ndotána.

19 Hora kuin en ni judío ti ndachro ndo Jesús, kuaxi n̄a chjeje e n̄a íjngo.

20 Kueya n̄a ndachro n̄a:

—¿Sonda tin enna inge e ndachro xa? Je e xa chónda xa espíritue Xixron anxrée ko xraxaon a xa jian.

21 Ko ikaxin n̄a ndachro n̄a:

—Ninaa chujni chónda espíritu ña i nichja jaña. ¿Á chao naa espíritue Xixron anxrée xrokuajon juachaxin ixi naa ngisen tikon a, chao tsikon?

Ni judío kuitikaon a n̄a ndo Jesús

22 Ko ó nchakuen ikin, tjajna Jerusalén stenze e n̄a kia xraxaonxin n̄a nchakon juexin tsikoña ni ngo.

23 Ko ndo Jesús jitji ndo ti ndasin ndatin in Salomón, naa ndasin ni ngo.

24 Ko ni judío kondentájin n̄a ndo Jesús ko juanchangi e n̄a ndo:

—Stechon anna tsonónana ngisen ja a. Jai chronga nduaxin á ja a ndo Cristo.

25 Ko juatingíexin ndo Jesús:

—Ó ntatjunta ko titikaon anta. Kain ixrã nta a, juachaxien Ndotána nta axin ixrã; ko ji i tjakoxin ngisen jan an.

26 Ko titikaon anta ixi je a kutuchjonna ja anta xranchi ntatjunta sa ó.

27 Kutuchjonna chúxin ba taana ko kaxon jan an chuxin ba ko je e ba rua na ba.

28 Jan an tjá a ba juachaxin tsechón ba kain nchakon ko nai a tsitjáña ba ko xro an ngisen tsantsjexin ba ngaya tjána.

29 Ndotána chjána ndo ba, ndo ícha tetuan an ngajin kainna, ko xro an ngisen tsantsjexin ba itja ndo.

30 Jan an ko Ndotána naakua ngisenna.

31 Ko ni judío íjngo itsé n̄a ixro xrojuange e n̄a ndo.

32 Ko ndachro ndo Jesús:

—Kueya nge e jian bikonta junta a ixi juachaxien Ndotána. ¿Sonda tjaunnta tsóñaxinntana ixro ixi junta a kain me e?

33 Ko juate e ni judío:

—Je a ixi kain nge e jian juinche e tsaaxianna ixro. Na i. Ixi nge e ndako a ndachrua, ja a xraje o xranchi inaa chujni, ko ja a ndachrua xixian ndo Dio.

34 Ko ndachro ndo Jesús:

—Ndachro xroon chijnie ndo Dio tsikjin sen sa ó: “Kaxon xranchi ndo Dio ja anta.”

35 Ko noina ixi nge e ndachro xroon chijnie ndo Dio, jua i tsitikaon ana. Ndachro ndo Dio ixi xranchi ndo Dio ngujngu chujni kuayé e chijnie ndo.

36 Ko ndo Dio kuinche ena ko xruan anna ndo nunte xasintajni, ¿sonda ndachronta ixi jan an nichjangí a ndo Dio ixi ndachrjan jan an Chjen en ndo?

³⁷ Siá jan an xrojuinta i ixra nche e Ndotána, titikaon antana.

³⁸ Ko siá nduaxin nta a ixra nche e Ndotána, maski titikaon antana jan an, titikaonnta ixra nta a ixi ña tsitikaonxinnta ixi Ndotána ko jan an naakuana ko je e ndo jii ndo ngajin ko jan an ritjén ngajin ndo.

³⁹ Ko íjngo xrotsé na ndo Jesús xrobije e na ndo ko je e ndo sakjui ndo.

⁴⁰ *Ko ndo Jesús ikjan ndo íjngo tuenxin ndarío Jordán ti no bake e ndo Juan batikitéxin ndo chujni sa ó.

⁴¹ Ko kueya na rué e na ndo ko ndachro na:

—Nduaxin ndo Juan maski juinche a ndo itsjé ixra ijié, nduaxin chronga ndo ixi xi ji i.

⁴² Ko kueya na jii nti a kuitikaon na ndo Jesús.

11

Kuen en ndo Lázaro

¹ *Bake e naa xi ni e ndatin in Lázaro, tjañée xa Betania, tjañée nchri María ko nchri Marta, nchri kichuu xa.

² *Nchri María, nchri kichuu xi Lázaro xi ni e, nchri me e nchri bikitée nda chaxro xraxe tutée ndo Jesús ko juinchexemaxin nchra tutée ndo ixi xrajaa nchra.

³ Ko kayui nchra, kichuu nchra, xruan an nchra naa ngisen ndache ndo Jesús:

—Ncháina, xi tjentúa ni e xa.

⁴ Ko kuin en ndo Jesús ko ndachro ndo:

—Ichin chóna xa je a tsenxin xa ichin me e. Na i. Ji i tsjako juachaxin ijié chóna Chjen en ndo Dio.

⁵ Ko maski ndo Jesús tsango tjue e ndo nchri Marta, ko kao nchri kichuu nchra ko xi Lázaro,

⁶ hora ndache na ndo ni e xi Lázaro, xrakuitu e ndo yuu nchakon ti no jii ndo.

⁷ Ko tjume e ndache ndo sen chrikao ndo:

—Ichjina íjngo nunte Judea.

⁸ Ko juatingíexin sen chrikao ndo:

—Maestro, xrachóna i itsjé nchakon, ni judío tjaun na xrokóñaxinna na ixro. ¿Á íjngo tjaunnta itsjinta nti a?

⁹ Ko ndachro ndo Jesús:

—¿Á je a nchakon chóna teyuu hora? Siá tanchakon ichrjini tontengixin ani ixro ixi jii xro i tingasáñaxin nunte xasintajni.

¹⁰ Ko siá ichrjini tiie tontengixinni ixi ko a xro i.

¹¹ Tjume e ndachro ndo Jesús:

—Xi Lázaro, xi tjentona, jijua xa ko itsji sintaxingama a xa.

¹² Ko ndachro sen chrikao ndo:

—Ncháina, siá jijua xa, chao xroxruen en xa.

¹³ Ko ti ndachro ndo Jesús xrondachro ixi tsiken en xi Lázaro. Ko sen teyuu chrikao ndo xraxaon sen ixi je o ndachro ndo jijua xa.

¹⁴ Tjume e ndako chronga ndo Jesús:

—Xi Lázaro tsiken en xa.

¹⁵ Ko juaxruxin ritjén ixi ko ana nti a ixi ja anta tsikonnta ko tsitikaonnta. Ko jai ichjina tsitsje ena xa.

¹⁶ Tjume e ndo Tomás, ndo nchekin in sen xjan kuatsi, ndache ndo sen kaxin:

—Kao jaina ichjina ko tsen en na xranchi ndo Jesús.

Ndo Jesús sinchexechón ndo chujni

¹⁷ Nchakon kuiji ndo Jesús nti a, kono e ndo ixi xi Lázaro ó chóna noó nchakon tsixrabaa xa.

¹⁸ Tjajna Betania ko tjajna Jerusalén tjenka ste yui tjajna, xranchi yuu kilómetro kutu o kjínxin ste tjajna.

¹⁹ Ko itsjé ni judío ikjui nã kuitsje e nã nchri Marta ko nchri María, kuinichje e nã nchra ixi jitioni e aséen nchra ixi kuen en xi kichuu nchra.

²⁰ Hora kuin en nchri Marta ixi ó jitii ndo Jesús, kuachrje nchra biketan nchra ndo. Ko nchri María kuitu e nchra nchia.

²¹ Ko nchri Marta ndache nchra ndo Jesús:

—Ncháina, siá ja a xrobake e nti i, xrokuen a xi saona.

²² Ko nóna ixi ndo Dio xrotjáa ndo kain nge e tsjanche e ndo.

²³ Ko ndache ndo Jesús nchra:

—Xisaua xroxechón xa íjngo.

²⁴ Nchri Marta ndachro nchra:

—Jan an nóna xroxechón xa íjngo nchakon xroxechón kain ni tsiken en, nchakon tsjexixin kain nge e.

²⁵ Ko ndachro ndo Jesús:

—Jan an ntaxechón chujni ko tajon juachaxin tsechón chujni. Ngisen titikaonna, maski tsen en sen, xroxechón sen íjngo.

²⁶ Ko kain sen xra jichón ko titikaon sen, nai a tsen en sen. ¿Á titikáoan ji i?

²⁷ Je e nchra ndachro nchra:

—Jaán, Ncháina, jan an titika on ixi ja a ndo Cristo, Chjen en ndo Dio, ndo xrokuii nunte xasintajni.

Tsjanga ndo Jesús ti tsixrabaa ndo Lázaro

²⁸ Ó juexin ndachro nchri Marta jaña, ko sakjui nchra kuiye e nchri kichuu nchra, nchri María, ko imao ndache kichuu nchra:

—Ndo Maestro jii ndo nti i ko tiya a ndo.

²⁹ Ko kuin en nchri María, tuinxin bingatjen nchra sakuitsje e nchra ndo Jesús.

³⁰ Ko ndo Jesús xratsikixin a ndo tjajna, xra jii ndo ti no kuetanxin ndo nchri Marta.

³¹ Ko ni judío, ni jinichje e nchri María stenchecháxin nã nchra, bikon nã ixi taka kuachrjexin nchra nchia, ko rué e nã nchra ixi xraxaon nã ixi satsji nchra ti no tsixrabaa xisaoe nchra, ko nti a xrotsjangaxin nchra xa.

³² Tjume e nchri María kuiji nchra ti jii ndo Jesús, bake exin ntatuchi in nchra tutée ndo, ko ndachro nchra:

—Ncháina, siá xrobake e nti i xrokuen a xisaona.

³³ Ko bikon ndo Jesús jitsjanga nchri María ko ni judío kuijikao nchra, me e tsango juincheni e ndo.

³⁴ Ko juanchangi ndo:

—¿No juabaanta xa?

Ko ndachro nã:

—Ncháina, xrokuia tsje é.

³⁵ Ko tsjanga ndo Jesús.

³⁶ Ko ndachro ni judío:

—Tsje enta tsango tjue e ndo xi tsiken en.

³⁷ Ko ikaxin nã ndachro nã:

—Je e xa juinche e xa ixi chao bikon xi batikon a. ¿Á jua i xrokuajon xa juachaxin ixi xrokuen a xi Lázaro?

Xechón xi Lázaro

³⁸ Ko tsango koni e aséen ndo Jesús ko konchjiñe e ndo ti no tsixrabaa xi Lázaro. No tsixrabaa xa naa itjao* me e ko nduja tsikijeexin na naa ixro.

³⁹ Ko kuetuan an ndo Jesús:

—Tintjiannta ixro.

Ko nchri Marta, nchrikichuu xi tsiken en, ndachro nchra:

—Ncháina, já ó bakaxra ndo ixi chóna xa noó nchakon kuen en xa.

⁴⁰ Ko ndachro ndo Jesús:

—Á ntatju ia ixi siá tsitikaon tsikuan naa ixra ijié sinche e ndo Dio ixi juachaxien ndo.

⁴¹ Tjume e kuintjian na ixro. Ko ndo Jesús tsje e ndo ngajní, ko ndachro ndo:

—Ndotána, tajon juasiana ngajinnta ixi ó kuin ennta nge e ndachrjan.

⁴² Jan an nóna ixi kain nchakon tin ennta nge e ntatjunta ko jai jaña ntatjunta ixi tsin en ni ste nti i ko tsitikaon na ixi ja anta xruan anntana jui i.

⁴³ Ko juexin ndachro ndo ji i, séen kuyako ndo:

—¿Lázaro, tachrjexian ña!

⁴⁴ Ko xi tsiken en tuinxin kuachrje xa, ko itja xa ko tutée xa jixritexin ixi manta ko ikon xa jisiamá inaa manta. Ko ndachro ndo Jesús:

—Tonxindange enta xa ko tintu enta satsji xa.

Xraxaon na xranchi tsóña na ndo Jesús

(Mt. 26:1-5; Mr. 14:1-2; Lc. 22:1-2)

⁴⁵ Ko kueya ni judío, ni kuijikaon nchri María bikon na nge e juinche e ndo Jesús ko kuitikaon na ndo.

⁴⁶ Ko ikaxin na kuitsje e na ni fariseo, ko beki na nge e tsijinche e ndo Jesús.

⁴⁷ Tjume e xi fariseo ko xitaana tetuan an xra o na ngajin chujni ícha tetuan an, ko ndachro xa:

—¿Nge e sintu una ixi xi ji i jinche e xa itsjé nge e ijié?

⁴⁸ Siá tsintu ena xa, tjume e kain na tsitikaon na xa, ko tsji ni tetuan an Roma ko tsonchjejin na ningoina ko sinchetjáña na tjajnaina.

⁴⁹ Ko naa xi tin in Caifás, xitaana ícha tetuan an nano me e, ndache xa na:

—Ja anta xro an nge e no anta

⁵⁰ ko xraxaon anta ixi ícha jian naakua chujni tsen en ixi tjajnaina ko je a kain ni tjajnaina tsitjáña na.

⁵¹ Ko xi Caifás je a je e xi tsixraxaon xa ja in, Espíritue ndo Dio juincheno e xa ixi ndo Jesús tsenxin ndo tjajné ni judío ixi je e xa tetuen en xa xitaana nano me e.

⁵² Ko je a je o tjajna me e xrokuenxin ndo. Na i. Kaxon xrokuenxin ndo ixi xroxra o kain chjen en ndo Dio, xjan tsichjeke e nchijí nunte xasintajni.

⁵³ Ko hora me e ni tetuen en ni judíojuangíxin na xraxaon na xranchi naatsóñaxón na ndo Jesús.

⁵⁴ Méxin, nchakon me e ndo Jesús í bakonoxin a ndo ngakjen en ni judío, ko kuachrjexin ndo nunte Judea, sakjui ndo tjenka ijna, ti jii naa tjajna ndatin in Efraín. Nti a kuituekao ndo sen teyuu chrikao ndo.

⁵⁵ Xratitjáña xrokui kia Pascua, kiée ni judío ko kueya na kuachrjexin na tjajné na sakjui na tjajna Jerusalén ixi nti a sintakji na ixi tsontjúá na ti xrati a kia Pascua.

⁵⁶ Nti a stetjée na ndo Jesús ko kuiji na ngaxin in ni ngo ijié ko ndache kichuu na:

—¿Ja anta nge e chronta? ¿Á tsji xa kia o na i?

⁵⁷ Ko xi fariseo ko xi tetuen en xitaana kuetuan an xa ixi siá xrojan ngisen no e no jii ndo Jesús xrochronga na ko jaña xrotsé xa ndo ko xroxraxon in xa ndo ndo achjiso.

* 11:38 itjao cueva

12

Naa nchri bingamá nchra ndaxi e chaxro xraxe tutée ndo Jesús

(Mt. 26:6-13; Mr. 14:3-9)

¹ Xratitjáña ikjaon nchakon xrokuji kia pascua, ndo Jesús ikjui ndo tjajna Betania ti jii xi Lázaro. Xi me e ndo Jesús juinchexechón ndo xa.

² Ko nti a juine sen naa kónkjín ko kuajon sen juasaya ngajin ndo Jesús. Nchri Marta juinchekonchjian nchra ti juine sen ko xi Lázaro ko ikaxin sen ste sen stenekao sen ndo Jesús.

³ *Tjume e nchri María bika o nchra xranchi tu o litro nda chaxro xraxe tsikoña xroan nardo tsango tjintee tsike na nchra ko bingamá nchra tutée ndo Jesús, ko ixi xrajée nchra juinchexemaxin nchra tutée ndo, ko nguixin ngaxin in nchia bakaxraxe xroan me e.

⁴ Ko xi Judas Iscariote, ndotée xa ndatin in Simón, je e xa naa sen teyuu chrikao ndo Jesús, ko xi me e sinchekji ndo ícha tjume e, ndachro xa:

⁵ —¿Sonda konchji a xroan xraxe? Xrokúchjixin ní ciento tomi denario ixi xrobingijnaxinni ni nóa.

⁶ Ko xi Judas je a ndachro xa jaña ixi tikonóe e xa ni nóa. Na i. Ndachro xa ji i ixi ché e xa, ko je e xa tsje e xa nge e tjinga tomi ko kain nchakon tee xa tomi tsixra o nti a.

⁷ Méxin, ndachro ndo Jesús:

—Tintu enta nchra. Tsikatsi in nchra xroan xraxe ji i ixi nchakon xroxrabaana.

⁸ Ni nóa kain nchakon tsariku unta na ko jan an kain a nchakon xrochondantana.

Ni judío tjao na xranchi tsóña na ndo Lázaro

⁹ Tjume e kueya ni judío kono e na ixi ndo Jesús jii ndo tjajna Betania, ko sakjui na nti a. Je a je o xrokuitsje e na ndo. Kaxon tjaun na xrokuitsje e na xi Lázaro, xi juinchexechón ndo Jesús.

¹⁰ Tjume e xitaana tetuan an juao kichuu xa ko xraxaon xa naatóñaxón xa xi Lázaro kaxon

¹¹ ixi kondeexin je e xa kueya ni judío stetingaxiton na ngajin xitaana ko jititikaon na ndo Jesús.

Ndo Jesús tixin in ndo tjajna Jerusalén

(Mt. 21:1-11; Mr. 11:1-11; Lc. 19:28-40)

¹² Kueya na satsikji na tjajna Jerusalén kia Pascua. Ko ndúyaxin kono e na ixi tsiji ndo Jesús tjajna nti a.

¹³ Ko konchrinjin na chaan ntakajne ko kuachrje na ngatja cha o kuayé e na ndo Jesús, ko séen ndachro na:

—Juasaya ngajin ndo Dio. Tsango jian ndo kujixin ixi juachaxien Ndotáina jii ngajní. Tsango jian ndo Rey tetuen en tjajna Israel.

¹⁴ Ko kuitja ndo Jesús naa kuntajno ko kueta a ndo ba, xranchi jitaxin chijnie ndo Dio:

¹⁵ Xrakon a ja a tjajna Jerusalén, tsje e jitii ndo Rey na a, jita a ndo naa kuntajno.

¹⁶ Ko nchakon kon en ji i, sen teyuu chrikao ndo Jesús kuienxin a sen sonda kon en. Tjume e nchakon juexin sakjui ndo Jesús ngajní, xraxaon sen ixi jaña jitaxin xroon tsikjin ni kuachronga chijnie ndo Dio sa ó, xranchi tson en ndo, ko nduaxin jaña kon en.

¹⁷ Jaña kain ni bake e ngajin ndo Jesús nchakon kuiye e ndo xi Lázaro kuachrjexin xa ti no tsixrabaa xa ko xechón xa, ni me e beki na nge e bikon na.

¹⁸ Méxin, kueya na bijirue e na ndo Jesús ngatja cha o, ixi ó kono e na ixra ijié tsijinche e ndo.

¹⁹ Méxin, xi fariseo juao kichuu xa:

—Ó bikonta, jua i ngakon en ña, tsje enta kain ña rué e ña xa.

Kaxin ni ngigua griego tjée ña ndo Jesús

²⁰ Kaxin ni nichja ngigua griego bake e ña ngakjen en ni kuijia kia tjajna Jerusalén xroxraxaonxin ña ndo Dio.

²¹ Me e konchjiñe e ña ngajin ndo Felipe, ndo tjajna Betsaida, nunte Galilea, ko kuinóatée ña ngajin ndo ko ndachro ña:

—Tja onna tsikonna ndo Jesús.

²² Ko ndo Felipe kuiji ndo kuindache ndo ndo Andrés. Ko tjume e yui sen kuindache sen ndo Jesús.

²³ Ko ndachro ndo Jesús:

—Ó kuiji hora, ixi Chjen en ndo Dio, Xjan jongí e xranchi chujni, satsji ndo tsayé e ndo juachaxien Ndotée ndo.

²⁴ Ko nduaxin nge e ntatjunta ixi siá tsitsinga naa noatriga ngata a inche, ko tsen a noa, je o naa noa tsitu e. Ko siá tsen en noa, tjume e tsoña kueya noa ixi jaña tsandáani no.

²⁵ *Ko ni tjue e aséen ixi xro an nge e sintakon en ña, ni me e sinchetjáña ña ti tsechón ña kain nchakon. Ko ngisen ningakon en aséen maski xrokuen en sen nti i nunte xasintajni ixi xrochronga sen chijnie ndo Dio, sen me e xrochón da sen juachaxin tsechón sen kain nchakon.

²⁶ Siá xrojan ngisen tjaun sinche e xraña, xroruana sen. Ko ti no tsake e jan an, nti a kaxon tsake e sen nche e xraña. Siá xrojan ngisen sinche e xraña, Ndotána tsjenge e ndo sen ña.

Ndo Jesús chronga ndo tsen en ndo

²⁷ 'Ko jai tsango toni e aséenna. ¿Nge e xrondachrjan? ¿Á xrondachrjan: “Ndotána tájon anta juachaxin nge e tsónna jai”? Ko ixra me e juixin nti i ixi jaña tsónna.

²⁸ Cháña xrondachrjan: “Ndotána, tsjakonta juachaxin ijié chonda ngajin chujni nunte nti i.”

Hora me e kuin en ña nichja naa tée ngajni ko ndachro:

—Ó juexin juako juachaxinna ko íjngo sinta a me e.

²⁹ Ko ni ste nti a stetin en ña, méxin, ndachro ña jitjatee ngajni, ko ikaxin ña ndachro ña:

—Naa ndo ángel nichje e ndo.

³⁰ Ko ndachro ndo Jesús:

—Tée kuin ennta, kuijin ngajni ixi tsitikaonntana.

³¹ Ko jai ndo Dio sinchéña ndo ijié ngajin chujni nunte xasintajni, ko jai Xixron anxrée tetuan an xa nunte xasintajni tsachrjexin xa nti i.

³² Ko nchakon tsake e nganito ntacru, kueya ña tsikon ña ko tsitikaonna ña.

³³ Jaña ndachro ndo ixi jichrónga ndo xranchi tsenxin ndo.

³⁴ Ko juate e ni ste nti a:

—Kuin anna ndachro xroon tsikjin sen sa ó ixi ndo Cristo kain nchakon tsechón ndo ko, ¿sonda ndachrua ja a ixi Chjen en ndo Dio, xjan jongí e xranchi chujni, xrokonda tsake e ña xjan nganito ntacru? ¿Ngisen Chjen en ndo Dio ikjan xranchi Chujni?

³⁵ Ko ndachro ndo Jesús:

—Xratsake e xro i ngajinnta, ko je o kaxion nchakon. Tajinta ixi xrachondanta xro i ji i ixi sintaxronka inta ti naxixe e. Ixi ngisen taji ti naxixe e tikon a ña no taji ña.

³⁶ Titikaonnta xro i tingasáña ixi ngajinnta jii xro i ixi xrokjannta chujni jian chón da xro i.

Ko juexin ndachro ndo Jesús ji i, tjume e sakjui ndo kuemá ndo.

Ni judío titikaon a na ndo Jesús

³⁷ Maski ndo Jesús tsijinche e ndo kueya ixra ijié ngato ikon na, kuitikaon a na ndo

³⁸ ixi xrokonda jaña tson en xranchi nge e tsikjin ndo Isaías sa ó:

Ncháina, ¿ngisen titikaon nge e nichjana?

¿Ngisen juincheno e ndo Dio juachaxien ndo?

³⁹ Méxin, kuitikaon a na ndo Jesús ixi kaxon tsikjin ndo Isaías:

⁴⁰ Ndo Dio kuajon ndo juachaxin ixi tsikon a na

ko juinchecha ndo aséen na,

ixi tsikonxin a na ikon na,

ko tsienxin a na ixi aséen na,

ko xrokjan i na ngajin ixi syntaxruan an na.

⁴¹ Jaña tsichro ndo Isaías sa ó ixi tsikikon ndo juachaxin ijié chóna ndo Jesús ko nichja ndo ixi je e ndo.

⁴² Ko kueya ni judío tetuan an kuitikaon na ndo Jesús, ko bachronga i na ixi ó kuitikaon na ndo ixi xrakon en na xi fariseo, ixi je e xa xrokuantsjexin xa na ningue ni judío.

⁴³ Ixi je e na ícha banche e na juaxruxin bakayé e na juasaya tajon chujni ixi juasaya tajon ndo Dio.

Nge e ndachro ndo Jesús tsóñexin chujni ijié

⁴⁴ Ko ndo Jesús séen ndachro ndo:

—Ngisen titikaonna, je a je o jan an titikaonna sen, kaxon titikaon sen Ndotána, ndo xruan anna jui i.

⁴⁵ Ko ngisen tikonna kaxon tikon sen ndo tsixruan anna.

⁴⁶ Jan an xro i kuii nunte xasintajni ixi sen titikaonna tsake a sen ti naxixe e.

⁴⁷ Ko xrojan ngisen tin en nge e ndachrjan ko tsitikaon ana na, je a jan an tsjankata a na ijié. Ixi jan an jui a tsjankata a jíee chujni nunte nti i. Na i. Jui i tsingijna na ixi tsitjáña i na.

⁴⁸ Ko chujni titikaon ana ko titikaon a chijnina ó jii ngisen tsjankata a na ijié. Chijni nichja me e chijni sinchéña ijié ngajin na nchakon tsjexixin nunte xasintajni.

⁴⁹ Ixi jan an nichjaxin a jan on. Na i. Ndotána, ndo tsixruan anna, kuetuanna nge e xronichja ko nge e sintakuan an chujni.

⁵⁰ Ko nóna ixi ti kuetuan an Ndotána me e tajon juachaxin tsechón chujni kain nchakon. Méxin, kain nge e ndachrjan, Ndotána kuetuanna xronichja.

13

Ndo Jesús néma ndo tutée sen chrikao ndo

¹ Titjáña naa nchakon tsii kia pascua ko ndo Jesús ó no e ndo kuiji hora satsjixin ndo nunte xasintajni, ko satsji ndo ti Ndotée ndo. Kain nchakon tjue e ndo sen chujnie ndo ste nunte xasintajni, ko jai ícha tjakoxin ndo ixi tjue e ndo sen.

² Ko ó kuii hora sine sen tsokjín, ko Xixron anxrée ó tsixruxin in xa aséen xi Judas Iscariote, ndotée xa ndatin in Simón, sinchekji xa ndo Jesús.

³ Ndo Jesús no e ndo ixi tsikixin in ndo ti jii ndo Dio ko ti no xrokjan ndo. Ko no e ndo ixi Ndotée ndo kuajon ndo juachaxin tsetuen en ndo kain nge e.

⁴ Tjume e bingatjen ndo ti no stene sen ko kuantsje ndo manta jitsáa ndo, ko kua ndo naa manta xemaxinni, ko bingatóxin ndo manta.

⁵ Ko bikia ndo inda ngaya naa tjatu o, ko kuaxi ndo juné ma ndo tutée ngujngu sen chrikao ndo, ko juinchemaxin ndo ixi manta jingatoxin ndo.

⁶ Ko hora kuiji ndo ti jii ndo Pedro, ndo Pedro ndachro ndo:

—Nchána, ¿á ja anta sinémanta tutéena?

⁷ Ko juatingéxin ndo Jesús:

—Jai tienxin a nge e rinta a. Tjume e tsienxian sonda rinta a ji i.

⁸ Ko ndachro ndo Pedro:

—Nai a sinémanta tutéena.

Ko ndachro ndo Jesús:

—Siá sinéma i tutáa, ninge o tsikinixin a ngajin.

⁹ Ko juate e ndo Simón Pedro:

—Na i, Ncháana. Je a je o tutéena né manta. Kaxon né manta tjáana ko jáana.

¹⁰ Ko ndo Jesús ndachro ndo:

—Ngisen tsikengi xrokonda i tsengi sen íjngo. Je o tutée sen tsijma ixi nchijíi sen tjúá sen. Ko ja anta tjúánta, maski je a kainnta.

¹¹ Ndachro ndo Jesús je a kainnta tjúánta, ixi no e ndo ngisen xrojuinchekji ndo.

¹² *Juexin juné ma ndo tutée kain sen, tjume e itsé ndo mantée ndo, manta jitsáa ndo, ko ikjan ndo bake e ndo nunte ti no stene sen ko ndachro ndo:

—¿Á tienxinnta nge e junta a?

¹³ Ja anta tiya nantana ngisen tjako anta ko Ncháanta, ko ndako ndachronta ixi jan an ngisen me e.

¹⁴ Siá jan an ngisen tjako anta ko Ncháanta jan an, ko juné ma tutáanta, kaxon jaña ja anta xrojuinéme e kichuunta tutáanta.

¹⁵ Ixi jan an juako xranchi junta a, kaxon ja anta sinche enta jaña.

¹⁶ *Naa nge e nduaxin ntatjunta ixi ni nche e ixra, je a ícha tjintee na ixi ni xrée, ko ninaa ngisen tikao naa juajna, tjinte a na ícha ixi ni tsixrua an juajna.

¹⁷ Siá tienxinnta ko siá sinche enta ji i, juaxruxin tsake enta.

¹⁸ 'Je a ixi kainnta ndachrjan ji i. Jan an nóna ngisen kuincha a. Ko xrokonda tson en xranchi tsikjin sen sa ó: “Ngisen neki an, ni me e tsingaxiton na ngajin.”

¹⁹ Jan an ntatjunta ixi nchakon tson en ji i, ja anta tsitikaonnta ixi jan an ngisen ntatjunta ngisen najan an.

²⁰ *Naa nge e nduaxin ntatjunta, ixi ngisen tayé e naa sen xruan an jan an, kaxon jan an tayé ena sen, ko ngisen tayé ena jan an, tayé e sen ngisen tsixruan anna jui i.

Ndo Jesús chronga ndo ixi xi Judas sinchekji xa ndo

(Mt. 26:20-25; Mr. 14:17-21; Lc. 22:21-23)

²¹ Ko juexin ndachro ndo Jesús ji i, tsango koni e aséen ndo ko ndako ichro ndo:

—Nduaxin ntatjunta ixi naa ja anta sinchekjintana.

²² Ko sen teyuu chrikao ndo kuaxi tsje e kichuu sen ixi noe a sen ngisen sinche e ti ndachro ndo.

²³ Ko naa ndo chrikao ndo Jesús, ndo me e ndo Jesús tsango tjue e ndo, jii ndo nunte tjenka ndo Jesús ti no stene sen.

²⁴ Ko ndo Simón Pedro jinchetengi ndo ndo me e ixi tjanchangí e ndo ndo ngisen sinche e ti ndachro ndo Jesús.

²⁵ Tjume e je e ndo konchjiñe e ndo ti jii ndo Jesús, ko juanchangi ndo:

—Ncháana, ¿ngisen sinche e me e?

²⁶ Juate e ndo Jesús:

—Ngisen xrotjá a tu o nutja tsikontjao, me e je e xa.

Méxin, juinchetjao ndo tu o nutja ko kuajon ndo ngajin xi Judas Iscariote, chjen en ndo Simón.

²⁷ Ko kuayé e xi Judas nutja, ko tuinxin Xixron anxrée kuixin in xa aséen xi Judas. Ko ndo Jesús ndache ndo xa:

—Nge e sinche e, jaiko xakon an nche e me e.

²⁸ Ko ninaa sen stene nti a kuienxin sen sonda jaña ndachro ndo.

²⁹ Kaxin sen xraxaon sen ixi xi Judas tsje e xa ti jitjinga tomi, méxin ndo Jesús kuetuen en ndo xa ixi tsike na xa nge e ixi ó tsii kia, o xrokuajon xa nge e ngajin ní nóa.

³⁰ Juexin kuayé e xi Judas nutja, tuinxin kuachrje xa ko ó tiie me e.

Naa nge e natjúá kuetuan an ndo Jesús

³¹ Ko ó juexin satsikji xi Judas, ndachro ndo Jesús:

—Jai tsonoxin juachaxien Chjen en ndo Dio, xjan jongí e xranchi chujni, ko tsjakoxin ndo juachaxin ijié chóna ndo Dio.

³² Siá Chjen en ndo Dio, xjan jongí e xranchi chujni, tsjakoxin ndo juachaxin ne e ndo Dio, ko me e jaña ndo Dio tsjakoxin ndo juachaxin chóna Chjen en ndo, ko tuinxin tson en me e.

³³ *Chjan na, xranaanchion tsake e ngajinnta nti i. Tjéentana ko xranchi ntatjan ni judío, jaña ntatjunta kaxon: Ti no itsji jan an, jua i itsjinta.

³⁴ *Naa nge e natjúá tetuan annta ixi xrotjue enta kichuunta xranchi jan an tjua anta.

³⁵ Ji i tsjakoxin ngajin kain ni xasintajni ixi ja anta chujninanta siá xrotjue enta kichuunta.

Ndo Jesús ndachro ndo nge e sinche e ndo Pedro

(Mt. 26:31-35; Mr. 14:27-31; Lc. 22:31-34)

³⁶ Tjume e juanchangi e ndo Simón Pedro ndo Jesús:

—Nchána, ¿no itsjinta?

Ko juate e ndo Jesús:

—Ti no satsji, jua i itsjia jai. Ko tjume e xroruanana nti a.

³⁷ Ko ndachro ndo Pedro:

—¿Sonda jua i xrorua a jai? Jan an chao tsenxinna ixi ja anta.

³⁸ Ko ndo Jesús juate e ndo:

—¿Á nduaxin tsenxian ixi jan an? Nduaxin ntatjua xraxrotsje a kuntaxichíká, ní xrondachrua chuxin ana.

14

Ndo Jesús cha o satsjixinna ti Dio jii ngajni

¹ Ta inta juachjaon. Titikaonnta ndo Dio, titikaonntana jan an kaxon.

² Ndo a Ndotána kueya nchia jii. Ko siá je a xrobake e nchia, jan an xrontatjunta. Méxin, satsji, sintakonchjian no tsake enta.

³ Ko siá satsji ko sintakonchjian no tsake enta, tsji i íjngo, ko tsjirua anta ixi ti no tsake e jan an kaxon ja anta tsake enta nti a.

⁴ Ja anta no anta no itsji ko no anta cha o.

⁵ Ko juate e ndo Tomás:

—Nchána, nóna ina ti no itsjia. ¿Xranchi xrokonóna cha o me e?

⁶ Ko ndachro ndo Jesús:

—Jan an cha o ko jan an chijni nduaxin ko jan an tsajon juachaxin stechón chujni. Xro an ngisen itji ti jii Ndotána siá tsjixin a sen ixi jan an.

⁷ Siá chuxinntana, kaxon xrochuxinnta Ndotána ko ó chuxinnta ndo jai ko ó bikonta ndo.

⁸ Ko ndachro ndo Felipe:

—Nchána, tjako nana Ndotáa. Me ó tja onna.

⁹ Ko ndo Jesús ndachro ndo:

—Felipe, ó itsjé nchakon ritjén ngajinnta, ¿ko xrachuxin ana? Ngisen bikona ó bikon Ndotána kaxon. ¿Sonda ndachrua ja a ixi tsjako a Ndotána?

¹⁰ ¿Á titikaon anta ixi jan an riní Ndotata, ko Ndotata jii ndo ngajin? Ti nge e nichja jan an je a ti tja on nichja. Na i. Ko Ndotána ndo jii ngajin, je e ndo nche e ndo ixra.

¹¹ Titikaonnta ixi jan an ritjén ngajin Ndotána, ko Ndotána jii ndo ngajin. Maski titikaon anta ji i, tsitikaonxinnta ixi ti ixra ijié junta a ko nge e bikonta.

¹² Naa nge e nduaxin ntatjunta siá nduaxin tsitikaonnantana, ti junta a kaxon ja anta chao sinche enta kain me e ko kaxon ixra ícha ijié nge e sinche enta ixi jan an satsji ti jii Ndotána.

¹³ Kain nge e tsjanche enta Ndotána ixi nombréena, jan an sinta a ixi jaña tsjako juachaxien Ndotána.

¹⁴ Siá xrojan nge e tsjanchaxinnta nombréena, jan an tsajon.

Ndo Jesús xroxruan an ndo Espíritue ndo Dio

¹⁵ 'Siá nduaxin tjuananta, titikaonnta nge e kuetuan annta.

¹⁶ Ko jan an tsinóatána ngajin Ndotána ixi xroxruan an ndo Espíritue ndo ixi tsingijnanta ko tsajon ndo juachaxin tsake e juaxruxin asáanta ko Espíritue ndo tsake e ngajinnta kain nchakon,

¹⁷ Espiritu nduaxin. Ti ni nunte xasintajni jua i tsayé e na Espiritu ko chúxin a na Espiritu. Ko ja anta chuxinnta Espiritu ixi ngajinnta jii ndo ko je e ndo tsitu e ndo ngajinnta kain nchakon.

¹⁸ Jan an tsintua inta nóanta ko ja onta; xrokjanna íjngo ixi tsake e ngajinnta.

¹⁹ Ko ítsjé a nchakon chujni nunte xasintajni tsikon anana. Ko ja anta tsikonntana ixi ja anta tsarichonnta ixi jan an ríchon.

²⁰ Ko nchakon me e tsono anta ixi jan an ko Ndotána naakuana ko ja anta ko jan an naakuana kaxon.

²¹ Ngisen no e ko titikaon nge e kuetuan an, sen me e tjua na. Ko sen tjua na, Ndotána kaxon xrotjue e ndo sen, kaxon jan an tjua a* sen ko tsichuxinna sen.

²² Ko xi Judas, je a xi Iscariote, ndache xa ndo:

—Ncháina, ¿sonda jan anna xrochuxiana ko ikaxin ni nunte xasintajni, na i?

²³ Ko juate e ndo Jesús ndachro ndo:

—Ngisen tjua na, sen me e titikaon nge e tituan an. Ko Ndotána xrotjue e ndo sen, ko Ndotána ko jan an tsji ina tsinteena ngajin sen.

²⁴ Ko ngisen tjaun ana, ni me e titikaon a na nge e ndachrjan. Ko nge e chijni tin ennta, je a chijnina. Na i. Ji i chijnie Ndotána, ndo xruan anna jui i.

²⁵ 'Rintatjunta kain ji i ixi xraritjén ngajinnta.

²⁶ Ko Espíritue Ndotána, xroxruan an ndo juachaxin ixi nombréena, ixi tsingijnanta, ko xronichja anta ndako ko tsjako anta kain nge e ko sintaxraxaonnta kain nge e ntatjunta.

²⁷ 'Juaxruxin tinta anta ko juaxruxin tajon ngajinnta. Je a xranchi juaxruxin tajon ni nunte xasintajni. Na i. Xrakon anta ko ta inta juachjaon.

²⁸ Ó kuin ennta nge e ndachrjan, satsji ko xrokjanna íjngo ko tsake e ngajinnta. Siá nduaxin tjaunnanta, juaxruxin xrobake enta ixi no anta satsji ti jii Ndotána ixi ícha tetuan an je e ndo ixi najan an.

²⁹ Sa ó ntatjunta ji i ixi nchakon tsikonnta tson en, tsitikaonnta.

³⁰ 'Ko sé a xronichjana jai ixi jitji Xixron anxrée, xi tetuen en chujni nunte xasintajni. Ko je e xa xro an nge e tetuen en xa ngajin.

³¹ Ko xrokonda jaña tson en ixi chujni nunte xasintajni tsono e na ixi jan an tjua a Ndotána ko titika on nge e tetuanna ndo. Ko jai tingatjennta sachjinxina nti i.

15

Ntaq tajon tu uva ko chaan ntaq

* 14:21 *tjua a* yo te amo

¹ Jan an me e xranchi naa viña jichón ko Ndotána xranchi ngisen tayakon en nta̱a.

² Tsonchrijin ndo chaan nta̱a tajon a itu ko tsame e ndo nta̱a ko tayakon en ndo nta̱a ixi ícha itsjé itu tsajon nta̱a.

³ Ko ja anta ó tjuá asáanta ixi chijni tjá anta.

⁴ Take énta ngajin xranchi jan an ritjén ngajinnta. Xranchi chaan nta̱a jua i je o chaan nta̱a tsajon itu siá jitse a kichuu nta̱a, jaña ja anta kaxon jua i sinche enta nge e siá ste anta ngajin.

⁵ Jan an nta̱a ijié tajon tu uva, ko ja anta chaan nta̱a. Ngisen jitséxin najan an ko jan an ngajin sen tsajon sen kueya itu ixi ja anta jua i sinche enta naa nge e siá ritjén a ngajinnta.

⁶ Ko ngisen jitseni a jan an, ni me e jii n̄a xranchi chaan nta̱a tjankana ndá a ixi xroxema nta̱a ko tsjaaka n̄a nta̱a.

⁷ Ko siá ja anta steniintana, ko xrotjáña inta nge e juintakuan annta, tjanchianta nge e tjaunnta ko tsaye enta.

⁸ Ndotána tayé e juasaya siá ja anta tájonnta itsjé itu. Ko jaña tsjakoxinnta ixi titikaonntana.

⁹ Jan an tsango tjua anta xranchi Ndotána tjua na. Tintue anta ti tjua anta jan an.

¹⁰ Siá tsitikaonnta ti kuetuan annta, tsono anta ixi tjua anta xranchi kaxon jan an titika on nge e kuetuanna Ndotána ko nóna ixi je e ndo tjua na ndo.

¹¹ Jaña nichja anta ixi tsake enta juaxruxin ngajin ko juaxruxin tsake e asáanta.

¹² *Ti tetuan annta me e ji i: tjue enta kichuunta xranchi jan an tjua anta.

¹³ Ngisen ícha tjue e naa ngisen, ba tsen en sen ixi ngisen tjue e sen.

¹⁴ Ja anta chujni tjento siá tsitikaonnta ti tetuan annta.

¹⁵ Ítiya inta ni nche e ixr̄a, ixi chujni nche e ixr̄a noe a sen nge e nche e xi tetuen en sen. Ko ja anta chujni tjentona ixi kain nge e juinchekuanna Ndotána, juintano anta.

¹⁶ Kuinche antana ja anta. Jan an kuincha anta ko kuinóatána ngajinnta ixi itsjinta ko tájonnta itsjé itu ko tsitjáña i tu. Ko jaña Ndotána xrotjá anta ndo kain nge e tsjanchi-axinnta nombréena.

¹⁷ Jaña tetuan annta ixi xrotjue enta kichuunta.

Ningakon en n̄a ndo Jesús ko sen titikaon ndo

¹⁸ Siá ni nunte xasintajni toña o anta, no anta ixi jan an ningakonna n̄a sa ó.

¹⁹ Siá ja anta xrokjuinta chujni nunte xasintajni, ni nunte xasintajni xrotjua anta n̄a ixi xrakichuunta n̄a. Ko jan an kuincha anta ngakjen en ni nunte xasintajni. Ko méxin, ni nunte xasintajni ningakon annta n̄a ixi í je anta chujni nunte xasintajninta.

²⁰ *Xraxaonnta nge e ntatjunta ixi ni naa xi nche e ixr̄a tetuan an ícha ixi xi xrée. Siá ningakonna n̄a ko rua na n̄a, jaña xrorua anta n̄a kaxon. Ko siá kuitikaon n̄a nge e juintakuan an n̄a, me e kaxon tsitikaonnta n̄a nge e tsjako enta n̄a.

²¹ Kain ji i sinta anta n̄a kondeexin jan an ixi titikaonntana ko ixi chúxin a n̄a ngisen xruan anna jui i.

²² Siá xrojui a nti i ko xronichja i ngajin n̄a, je e n̄a xrochónda i n̄a ninaa ijié. Ko jai jua i xrondachro n̄a ixi noe a n̄a ko chónda i n̄a ijié.

²³ Ni ningakonna, ni me e ningakon en n̄a Ndotána kaxon.

²⁴ Je e n̄a xrochónda i n̄a ijié siá xrojuinta i nge e ti ninaa ngisen juinche e sa ó. Ko jai ó bikon n̄a kain nge e juinta a, ko maski bikon n̄a, ningakonna n̄a ko kaxon ningakon en n̄a Ndotána.

²⁵ Ko jaña ton en ixi xrokonda tson en nge e ndachro ley ne e n̄a: “Ningakonna n̄a maski xro an ijié chonda.”

²⁶ Ko nchakon tsii ngisen tsingijna, me e Espíritue ndo Dio nduaxin, xroxruan an jan an ixi juachaxien Ndotána ko je e ndo xronichjaxinna ndo.

²⁷ Ko ja anta kaxon xronichjaxinntana ixi ngajin ritjennta xraxrangíxixión juako anta.

16

¹ Kain ji i ntatjunta ixi tsintue anta nge e juntakuan annta.

² Ni judío tsajon a na juachaxin tsixin innta ni ngo ko tsiji nchakon ixi ni naat-soñaxónnta xroxraxaon na ixi ti nche e na me e naa xrée ndo Dio.

³ Jaña sinche e na ixi chúxin a na Ndotána ko chúxin a na najan an.

⁴ Ko ntatjunta kain ji i ixi nchakon jaña tson en, xroxraxaonnta ixi ó ntatjunta sa ó jaña tson en.

Ixrq nche e Espíritue ndo Dio

’Ti xrangíxixión ntatju inta ji i ixi bake e ngajinnta.

⁵ Ko jai satsji ti jii ngisen xruan anna jui i. Ko ninaánta tjanhangínta no satsji

⁶ ixi tsango jitoni e asáanta ixi ntatjunta kain ji i.

⁷ Nduaxin, cháña satsji ixi ja anta jian tsake enta. Ko siá satsji a tsi a ngisen tsingij-nanta. Ko siá satsji, jan an xroxruan an ndo tsii ndo.

⁸ Ko nchakon tsii ndo sinchexraxaon ndo chujni nunte xasintajni ixi chóna na ijie, ko jii naa cha o ndako xrorué e na ko ndo Dio sinchéñe e ndo na ijie.

⁹ Je e na chóna na ijie ixi titikaon a na

¹⁰ ko tsono e na ixi jii naa cha o jian ko ixi jan an satsji ti jii Ndotána ko ítsikon antana,

¹¹ ko tsono e na ixi ndo Dio sinchéña ndo ijie ixi ó juexin juinchéña ndo ijie ngajin Xixron anxrée, xi tituen en nunte xasintajni.

¹² Xrarichonda itsjé nge e xrontatjunta, ko jai jua i tsienxinnta.

¹³ Nchakon tsii Espíritue ndo Dio nduaxin, je e ndo sintakuan annta ndo kain nge e nduaxin ixi je a nge e tjaun ndo xrontatjunta ndo. Na i. Xrontatjunta ndo kain nge e tsin en ndo ko sintano anta ndo nge e tson en.

¹⁴ Je e ndo tsajon ndo juasaya ngajin jan an ixi tsayé e ndo kain chijnina ko nge e tikinixinna ko sintano anta ndo kain ji i.

¹⁵ Kain nge e chóna Ndotána na na kaxon. Méxin, ndachrjan ixi Espíritue ndo Dio tsayé e ndo nge e tikinixinna ko tjume e sintano anta ndo kain ji i.

Ti toni e aséenni xrokjan juaxruxin

¹⁶ Xra íse a í tsikon antana. Ko kaxon íse a tsikonntana íjngo ixi satsji ti jii Ndotána.

¹⁷ Ko kaxin sen chrikao ndo ndache kichuu sen:

—¿Nge e xrondachro ji i ixi íse a tsikonna ndo ko kaxon sé a tsikonna ndo íjngo ixi satsji ndo ti jii Ndotée ndo?

¹⁸ ¿Inge e tjaun ndo xrondachro ndo ixi: “íse a”? Tianxin ana nge e ndachro ndo.

¹⁹ Ko kono e ndo Jesús nge e tjaun sen tsjanhangí e sen ndo ko ndache ndo sen:

—Jan an ntatjunta ixi íse a ítsikon antana ko kaxon sé a tsikonntana íjngo. ¿Á ji i ritjan Chiangí e kichuunta?

²⁰ Nduaxin ntatjunta ixi tsango xrotsjanganta ko tsoni e asáanta, ko ni nunte xasintajni tsake e na juaxruxin. Ko maski tsango tsoni e asáanta ko tjume e xrokjan tsake enta juaxruxin.

²¹ Hora naa nchri sinchejongí e nchra chjen en nchra, tsango tsoni e aséen nchra ixi ó kuiji hora tsjongí e xjan. Ko tjexin tjongí e xjan, tjume e ísintexi aña nchra juachjaon kuatsinga nchra ixi juaxruxin take e nchra ixi juinchejongí e nchra naa chjan ngata a nunte xasintajni.

²² Jaña ja anta kaxon toni e asáanta jai. Ko tjume e tsikonntana íjngo ko tsango tsake e juaxruxin asáanta ko ninaa chujni tsantsja anta juaxruxin me e.

²³ Nchakon me e xro an nge e tsjanchangínanta. Nduaxin nge e ntatjunta. Ixi Ndotána xrotjáanta ndo kain nge e tsjanchaxinnta nombréena.

²⁴ Ja anta xraxro an nge e tjanchiixinnta nombréena jai. Ko jai tjanchianta ko tsaye enta, ko tsango tsake enta juaxruxin.

Ncháina Jesucristo juacha ndo kuetuan an ndo nunte xasintajni

²⁵ Ntatjunta ji i je o xranchi tekini naa nge e. Ko tsii nchakon ítsekia inta jaña ixi ndako xrontatjunta ixi Ndotána.

²⁶ Nchakon me e tsjanchiixinnta nge e nombréena. Ko ndachrjan i ixi jan an xronich-jaxinnta ngajin Ndotána

²⁷ ixi je e Ndotána tjua anta ndo. Tjua anta ndo ixi ja anta tjuananta jan an ko ixi titikaonnta ixi jan an juixin ti jii je e ndo.

²⁸ Kuachrjexin ti jii Ndotána ixi jui i nunte xasintajni. Ko jai tintu a nunte xasintajni ixi satsji ti jii Ndotána íjngo.

²⁹ Tjume e ndachro sen chrikao ndo:

—Jai ndako ritjakua ko ítjakoxin a ixi xrojan chijni,

³⁰ jai tienxinna ixi no a kain nge e ko xrokonda i ixi xrojan ngisen tsjanchangi ana. Méxin, titika onna ixi ja a juixian ti jii ndo Dio.

³¹ Ndo Jesús juate e ndo:

—¿Jai ché kuitikaonnta?

³² Ko tsii nchakon ko jai hora me e ixi ja anta xrochjeyanta ko satsjinta ko tsintunantana jan on. Ko je a jan on ritjén ixi Ndotána jii ndo ngajin.

³³ Ji i ntatjunta ixi kainnta juaxruxin tsake e asáanta ixi titikaonntana. Ko nti i nunte xasintajni tsatsinganta juachjaon, ko xronka inta ixi jan an ó juacha tetuan an nunte nti i.

17

Ndo Jesús tjanchia ndo ixi sen chrikao ndo

¹ Ó juexin ndachro ndo Jesús kain ji i, tjume e tsje e ndo ngajni ko ndachro ndo:

—Ndotána, ó kuiji nchakon. Chje énta Chjan anta juachaxin ixi kaxon Chjan anta xrotjáanta xjan juasaya.

² Ko ja anta chje énta Chjan anta juachaxin ixi tsetuen en xjan kain chujni ko tsajon xjan juachaxin tsechón sen kain nchakon, kain sen tsichje enta xjan.

³ Ko juachaxin chóna sen tsechón sen kain nchakon me e ti xrochuxinnta sen ja anta, ndo naakua ndo Dio nduaxin jichón, ko kaxon xrochuxin sen ndo Jesucristo, ndo tsixruan annta ja anta nunte xasintajni.

⁴ Jan an tjá anta juasaya nti i nunte xasintajni ko juexin junta a ixra kuetuannanta.

⁵ Ko jai Ndotána, chjánanta juachaxin ixi xranchi kuachonda jan an nchakon bake e ngajinnta ti xrako a nunte xasintajni.

⁶ Ó juintero a sen chjánanta, sen nunte xasintajni, sen tsikinche e ja anta. Je e sen chujnianta sen ko ja anta chjánanta sen ko jan an ó juentakuan an sen chijnianta ko kuitikaon sen.

⁷ Ko jai ó no e sen ixi kain juachaxin chóna jan an ti xin ngajinnta.

⁸ Jui i ixi juako a sen chijnianta chjánanta, ko je e sen kuitikaon sen, ko kuienxin sen ixi nduaxin jan an juixin ngajinnta, ko kuitikaon sen ixi ja anta tsixruan annanta.

⁹ Jan an tjancha anta ixi tsingijnanta sen me e. Je a tjancha anta ixi tsingijnanta kain chujni nunte xasintajni. Na i. Je o tjancha anta ixi sen chjánanta ko ixi je e sen chujnianta sen.

¹⁰ Ko kain nge e chonda ja anta, na na, ko kain nge e na na, na anta kaxon. Ko méxin, je e sen tsajon sen juasaya ngajin.

11 'Jai ítsituna i nti i nunte xasintajni. Ko je e sen xratsitu e sen nti i. Ko jan an satsji ixi tsake e ngajinnta. Ndotána jian, tayakon ennta ixi juachaxiannta sen chjánanta ixi je e sen naakua tsake e sen xranchi jan an ko ja anta naakua stena.

12 *Nchakon bake e ngajin sen nti i nunte xasintajni, kuayakon an sen ixi juachaxiannta. Ko ninaa sen kuitjáña i sen. Je o naakua naa ngisen kuitjáña, ixi xi me e ó tsikitjáña xa ixi jaña tson en xranchi jitaxin xroon tsikjin sen sa ó.

13 'Ko jai satsji ti no ritjennta. Ko ixi xraritjén nti i nunte xasintajni ndachrjan ji i ixi tsake e sen juaxruxin xranchi juaxruxin chóna jan an.

14 Jan an juintakuan an sen chijnianta, ko jai ni nunte xasintajni ningakon en na sen ixi je e sen je a chujni nunte xasintajni xranchi jan an kaxon je a chujni nunte xasintajni.

15 Tjánchá ianta ixi tsantsjexinnta sen nunte xasintajni. Na i. Tjancha anta ixi tsingijnanta sen ixi Xixron anxrée sincheye a xa sen.

16 Xranchi jan an je a chujnie nunte xasintajni, kaxon je e sen je a chujni nunte xasintajni sen.

17 Nchetjúáxinnta sen ixi nge e nduaxin ixi chijnianta chijni nduaxin.

18 Xranchi xruan annanta jui i nunte xasintajni, jaña jan an xruan an sen itsji sen ngakjen en chujni nunte xasintajni.

19 Ixi je e sen totjúáxinna jan an, ko kaxon je e sen tsontjúáxin aséen sen ixi chijni nduaxin.

20 'Ko je a je o tinóatána ixi je e sen. Na i. Kaxon tinóatána ixi tsingijnanta sen tsitikaon ícha tjume e, nchakon tsin en sen nge e xronichja je e sen.

21 Tjancha anta ixi kain sen naakua xroxraxaon sen xranchi ja anta Ndotána ko jan an naakua stena, ixi kain chujni nunte xasintajni tsitikaon na ixi ja anta xruan annanta jui i.

22 Ó tjá a sen naxra je o juachaxin ijié xranchi juachaxin chjánanta ixi naakua xroxraxaon sen xranchi jan an ko ja anta naakua stena.

23 Jan an ko je e sen naakuana xranchi ja anta ko jan an naakuana kaxon. Ko jaña chujni nunte xasintajni tsono e na ixi ja anta xruan annanta jui i ko kaxon tjue enta na xranchi tjaunnanta jan an.

24 'Ndotána, ja anta chjánanta sen, ko tja on ixi tsake e sen ti no tsake e jan an ixi tsikon sen juachaxin ijié chjánanta; ixi fiaonanta ti xrako a nunte xasintajni.

25 Ndotána, tsango jian ja anta. Chujni nunte xasintajni chúxin a na ngisen ja anta, ko jan an ó chuxinnta, ko kain sen chjánanta, kaxon ó no e sen ixi ja anta xruan annanta jui i.

26 Ó juintano a sen ngisen ja anta ko xrasintano a sen ícha, ixi xranchi ja anta tjaunntana jaña xrotjue e kichuu sen ko jan an tsake e ngajin sen.

18

Itsé na ndo Jesús ko bibe e na ndo

(Mt. 26:47-56; Mr. 14:43-50; Lc. 22:47-53)

1 Juexin ndachro ndo Jesús kain ji i, tjume e kuachrjenka o ndo sen chrikao ndo ko sakjui sen kuantu inda Cedrón. Nti a jii naa ijngi ko nti a ikjui ndo Jesús ko sen chrikao ndo.

2 Kaxon xi Judas, xi juinчекji ndo Jesús, chúxin xa ijngi me e ixi nti a itsjé nchakon baxraka sen chrikao ndo Jesús ko kao je e ndo.

3 Méxin, xi Judas bika o xa kueya xi soldado ko kaxin xi policia nche e xra ni ngo tsixrua an xitaana tetuan an ko xi fariseo. Kuujikao na chika ko xro i tingasáñaxin.

4 Ko ndo Jesús ó no e ndo kain nge e xrokon en ndo, ko konchjiñe e ndo ngajin na ko juanchangi e ndo na:

—¿Ngisen tjéenta?

⁵ Ko juate e na:

—Tjéena xi Jesús, xi tjajna Nazaret.

Ko juate e ndo Jesús:

—Jan anna.

Ko xi Judas, xi tsijinckekji ndo, nti a jikao xa na.

⁶ Ko hora ndachro ndo Jesús: “Jan anna”, je e na xronka na ko ngaxiton na kuitsinga na nunte.

⁷ Ko íjngo ikjan ndo Jesús juanchangi e ndo na:

—¿Ngisen tjéenta?

Ko je e na ndachro na:

—Tjéena xi Jesús, xi tjajna Nazaret.

⁸ Ko ndachro ndo Jesús:

—Ntatjunta jan an ngisen tjéenta. Ko siá jan an ngisen tjéenta, tintu enta satsji sen chrijiki an.

⁹ Jaña ndachro ndo Jesús ixí xrokonda tson en ti nge e tsindachro ndo: “Sen chjána Ndotána, xro an ngisen tsitjáña.”

¹⁰ Ko ndo Simón Pedro kuantsje ndo naa chika espada konchrijinxin ndo ndatsjon naa xi, ndatsjon xa ti jian, xi me e ndatin in xa Malco, xinckexrée xitaana tetuan an.

¹¹ *Ko ndo Jesús ndache ndo ndo Pedro:

—Xraxi ian chika espada ña. Siá Ndotána kuetuan an ixí tangi tsatsinga, xrokonda tsatsinga jan an kain ji i.

Ndo Jesús ikjui ndo ngajin xi tetuen en xitaana

(Mt. 26:57-58; Mr. 14:53-54; Lc. 22:54)

¹² Tjume e xi soldado ko xi tetuen en xa ko xi policía judío nche e xra ni ngo itsé xa ndo Jesús ko kuintee xa ndo.

¹³ Ko sabikao xa ndo a xi Anás, a xi Anás xichée xi Caifás, ngisen nano me e tituen en xitaana.

¹⁴ *Ko xi Caifás, xraje o je e xa tsindache ni judío ixí ícha jian naakua naa chujni xrokuenxin ixí tjajnéa na.

Ndo Pedro ndachro ndo chúxin a ndo ndo Jesús

(Mt. 26:69-70; Mr. 14:66-68; Lc. 22:55-57)

¹⁵ Ndo Simón Pedro ko inaa ndo bakajikao ndo Jesús sterué e sen ndo. A ndo inaa ó chúxin ndo xitaana tituan an. Méxin, kaxon kuixin in ndo no kuixin in ndo Jesús, ngaxin in ndasin ndo a xitaana tituan an.

¹⁶ Ko ndo Pedro kuitu e ndo nduja ti ntachja. Ko ndo chúxin xitaana tituan an kuachrje ndo ko nichje e ndo nchri tendáa ntachja ko kuajon nchra juachaxin kuixin in ndo Pedro.

¹⁷ Tjume e nchri tendáa ntachja juanchangi e nchra ndo Pedro:

—¿Á kaxon ja a chriku a xi ña?

Ko juate e ndo Pedro ndachro ndo:

—Na i, jan an na i.

¹⁸ Ko nti a tsango ikin ko xi nche e ixra ko xi policía juaaka xa naa xro i nti a ko siin xa stexraxru e xa. Kaxon ndo Pedro jixraxru e ndo nti a.

Xitaana tetuan an tjanchangí e xa ndo Jesús

(Mt. 26:59-66; Mr. 14:55-64; Lc. 22:66-71)

¹⁹ Ko xitaana tetuan an juangíxin xa juanchangi e xa ndo Jesús ngisen sen chrikao ndo ko nge e tjako ndo.

²⁰ Ko juate e ndo Jesús:

—Jan an nichja ngajinxin ikon kain ni nunte xasintajni, ko bajako ngaxin in nchia ko ngaxin in ni ngo ti no baxra o kain ni judío. Ko xro an nge e ndachrjan imao.

²¹ ¿Sonda tjanchinginana? Tjanchangi e ni kuin en xranchi tjako. Je e na no e na nge e ndachrjan.

²² Juexin ndachro ndo Jesús ji i, tjume e naa xi policia nche e xra ni ngo, jindaxin xa nti a, kuande e xa naa iton ikon ndo Jesús ko ndachro xa:

—¿Á jaña tjate é ngajin xi tituen en xitaana?

²³ Ko juate e ndo Jesús:

—Siá ndako a ndachrjan naa nge e, ndachijiana nge e ndako a ndachrjan, ko siá ndako nge e ndachrjan, ¿sonda kon iana?

²⁴ Tjume e xi Anás xruan an xa ndo Jesús jixrite e ndo ngajin xi Caifás, xitaana tetuan an.

Ndo Pedro íjngo ndachro ndo chúxin a ndo ndo Jesús

(Mt. 26:71-75; Mr. 14:69-72; Lc. 22:58-62)

²⁵ Ko ndo Pedro xraiin ndo nti a jixraxru e ndo, ndache na ndo:

—¿Á kaxon ja a chriku a xi ña?

Ko ndo Pedro ndachro ndo chúxin a ndo ndo Jesús, méxin, ja in juate e ndo:

—Na i, jan an na i.

²⁶ Tjume e naa xi nche e xree xitaana tetuan an, xi me e xrakichuu xa xi tsikonchrijin ndo Pedro ndatsjon, juanchangi xa:

—¿Á je a ja a bikon riku a xa ti jii ijngi chóna lahuerta?

²⁷ Ko ndo Pedro ndachro ndo íjngo je a ndo. Ko tuinxin itsje naa kuntaxichiká.

Ndo Jesús ngajin xi Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Kuachrjexin na ndo a xi Caifás, sabikao na ndo Jesús ti nchia ijie tetuanxin xi gobernador. Ko ó kuaxi jitingasáña ko ni judío kuixin a na nchia me e ixi jaña xrokuama i na ijie, ne jua i sine na kia Pascua.

²⁹ Tjume e xi Pilato kuachrjexin xa nchia tetuan an na, juanchangi e xa na:

—¿Nge e ijie chóna xi ji i?

³⁰ Ko je e na juate e na:

—Siá je a ndako a juinche e xa, xrobikian ina xi nti i.

³¹ Ko ndache xi Pilato na:

—Satiku unta xa, ncheñe enta xa ijie xranchi jitaxin ley na anta.

Ko juate e ni judío:

—Jan anna judiona chonda ina juachaxin naatsónaxónna naa ngisen.

³² *Jaña kon en xranchi tsindachro ndo Jesús xranchi tsen en ndo.

³³ Tjume e xi Pilato íjngo kuixin in xa nchia tetuanxin xa ko kuiye e xa ndo Jesús ko juanchangi e xa ndo:

—¿Á ja a xi Rey tetuen en ni judío?

³⁴ Ko ndachro ndo Jesús:

—Ti nge e tjanchinginana, ¿á ja ua xraxaoan jaña?, o, ¿á ixi inaa na jaña ndachro na?

³⁵ Ko juate e xi Pilato:

—¿Á jan an judiona? Ni tjajnaa ko xitaana tetuan an bikaan na ngajin. ¿Nge e juinche e?

³⁶ Ko juate e ndo Jesús:

—Juachaxin chóna jan an je a kuixin nunte xasintajni. Siá xrokuj xin nunte xasintajni, sen chrjiki an xrojuinche e sen nge e ixi xrotsé ana ni judío ko juachaxin chóna jan an, je a juachaxin nunte xasintajni.

³⁷ Ko ndachro xi Pilato:

—Ja a, ¿á nduaxin naa xi rey?

Ko juate e ndo Jesús:

—Jaán, jan an rey xranchi ja a ndachrua. Jan an jui i nunte xasintajni ixi xronichja ti nduaxin. Kain sen titikaon nge e nduaxin, sen me e tin en nge e tjako.

³⁸ Ko ndachro xi Pilato:

—¿Nge e nduaxin ndako, ndachrua?

Xi Pilato kuajon xa juachaxin tsen en ndo Jesús

(Mt. 27:15-31; Mr. 15:6-20; Lc. 23:13-25)

Ko juexin juanchangi xi Pilato ji i, tjume e kuachrje xa ko ikjui xa ti ste ni judío, ko ndache xa na:

—Kuitja i ninaa ijie ngajin xi ji i.

³⁹ Ko ja anta ó xrakuan anta ixi kia pascua tajanda naa chujni jije e. ¿Á tjaunnta tsajanda xi Rey tetuen en ni judío?

⁴⁰ Ko kain na kuyako na ndachro na:

—Xi ña na i. Tajanda xi Barrabás.

Ko xi Barrabás naa xiche e me e.

19

¹ Tjume e xi Pilato kuetuan an xa ixi tsjaya na ngajin ndo Jesús.

² Ko ni soldado juinchéña na ixi ntacha a naa corona ko bake e na ngata a jaa ndo Jesús. Ko juinchekeya na ndo naa manta tiie játse.

³ Ko konchjiñe e na ti jii ndo, ko ndachro na:

—Tsechón ndo rey tetuen en ni judío.

Ko juanoa na ndo. Ko itja na kuandexin na ikon ndo.

⁴ Ko xi Pilato íjngo kuachrjexin xa nchia tetuanxin xa, ko ndache xa ni tsixra o nti a:

—Tsje enta, tsantsje xa ixi tsienxinnta ixi kuitja i ninaa nge e ndako a juinche e xa.

⁵ Ko kuachrjexin ndo Jesús nti a jitikao ndo ngata a jaa ndo corona tsikoña ntacha a ko jitsáa ndo manta tiie játse. Ko ndachro xi Pilato:

—Tsje enta, nti i jii xa.

⁶ Ko nchakon bikon ni taana tetuan an ko ni policia ne e ni ngojuangixin na kuyako na:

—¡Tjankanitua xa ntacru! ¡Tjankanitua xa ntacru!

Ko ndachro xi Pilato:

—Ja anta tiku unta xa ko tankanitonta xa ntacru ixi jan an kuitja i ninaa nge e ndako a ngajin xa.

⁷ Ko juate e ni judío:

—Jan anna chondana naa ley xrokonda tsen en xa ixi ndachro xa ixi Chjen en ndo Dio je e xa.

⁸ Ko nchakon kuin en xi Pilato ji i ícha xronka xa.

⁹ Tjume e íjngo kuixin in xa nchia tetuanxin xa ko juanchangi e xa ndo Jesús:

—¿No juixian?

Ko ndo Jesús xro an nge e juate e ndo.

¹⁰ Ko ndachro xi Pilato:

—¿Sonda tjatée a? ¿Á noa ia ixi jan an chonda juachaxin tsetuan an na tankanitua na ntacru o kaxon chonda juachaxin tsajanda satsjia ko xro an nge e tson an?

¹¹ Ko juate e ndo Jesús:

—Xro an juachaxin chónḁa ja a siá je a Ndotána Dio xrotjáa ndo juachaxin. Ko chujni bikaana nti i ícha ijie chónḁa nḁa ixi ja a.

¹² Ko kuin en xi Pilato ji i, tjume e juangíxin xa juée xa xranchi xrobajanda xa ndo Jesús. Ko ni judío kuyako nḁa ndachro nḁa:

—Siá tsintu é satsji xa, ja a je a tjentua xi tetuen en tjajnaina. Ngisen nchéña aséen xranchi naa rey, ni me e ningakon en xa xi tituainna.

¹³ Kuin en xi Pilato ji i, tjume e sabikao xa ndo Jesús nduja ko bake e xa nunte ti no nchéñaxin nḁa ijie ko kaxon nchekin in nḁa ti kueya ixro ko ngigua aremeo xrondachro Gabatá.

¹⁴ Nchakon me e naa nchakon sa ó kia Pascua, ko ó xrochjée ngusine nchakon ko xi Pilato ndache xa ni judío:

—Nti i jii xi rey tetuan annta.

¹⁵ Ko je e nḁa kuyako nḁa ndachro nḁa:

—Tsachrje xa, tsachrje xa. Tankanitia xa ntḁcru.

Ko xi Pilato ndachro xa:

—¿Á tjaunnta tsjankanito xa ntḁcru xi rey tituan annta?

Ko je e nḁa juate e nḁa:

—Xro an xi rey chondana, je o xi César tituan an.

¹⁶ Méxin, xi Pilato kuajon xa ndo Jesús ngajin ni judío ko sabikao nḁa ndo tsjankanito nḁa ndo ntḁcru.

Juankanito nḁa ndo Jesús ntḁcru

(Mt. 27:32-44; Mr. 15:21-32; Lc. 23:26-43)

¹⁷ Jaña ndo Jesús kuachrxexin ndo nti a yama ndo ntḁcru ti no tsjankanito nḁa ndo, noxon cha o itji ti no tin in ntajaa chujni ko ngigua arameo xrondachro Gólgota.

¹⁸ Nti a juankanito nḁa ndo ntḁcru, ko kaxon íjngo yuu xi, naa xi bake e xa ndatsjonxin jian ko inaa xa ndatsjonxin kjon ko ngusine bake e nḁa ndo Jesús.

¹⁹ Ko kuetuan an xi Pilato xrokjin nḁa ngata a naa ntḁa ko tsake e nḁa ti noi ntḁcru ko xrondachro ntḁa:

“Ndo Jesús, ndo tjajna Nazaret, me e ndo Rey tetuen en ni judío.”

²⁰ Ko itsjé ni judío juinchekuanxin nḁa letra tsikoña ixi tjenka tjajna Jerusalén kuenito nḁa ndo Jesús nganito ntḁcru ko níi téé tjajna tsikjin nḁa, naa téé hebreo, naa téé griego, naa téé latín.

²¹ Ko ni taana tetuan an ni judío ndache nḁa xi Pilato:

—Kjin a ja a je e xa “xi Rey tetuen en ni judío”; cháña ikjian “Je e xa ndachro xa ixi je e xa xi Rey tetuen en ni judío.”

²² Ko juate e xi Pilato:

—Ti kuetuan an xrokjin nḁa ó juexin kóña, ko jaña tsitu e.

²³ Tjume e ni soldado, hora juexin bake e nḁa ndo Jesús nganito ntḁcru, kua nḁa mantée ndo Jesús, konchjeya nḁa manta ko noó juinchéña nḁa manta nanaá mantée nḁa. Ko kaxon kua nḁa manta jine jiá ndo. Manta me e tsixraun a manta, naakua manta tsikoña me e.

²⁴ Ko ni soldado juao kichuu nḁa ndachro nḁa:

—Xrochjeya ina manta ji i. Ícha jian xrosondaoinna ixro ixi jaña tsonojna ngisen tsjacha manta.

Jaña kon en xranchi ndachro xroon chijnie ndo Dio tsikjin sen sa ó: “Sondaonxin nḁa ixro ko jaña chjeye e nḁa mantána.” Jaña juinche e ni soldado.

²⁵ Ko tjenka ntḁcru ti no jinito ndo Jesús bake e janée ndo ko jan kichuu jan, jan María, janchri e ndo Cleofas ko jan María Magdalena.

²⁶ Ko nchakon bikon ndo Jesús janée ndo ko tjenka jan jii ndo chrikao ndo, ndo ícha tjue e ndo, ndache ndo janée ndo:

—Tsje é nti i jii chjan an.

²⁷ Ko tjume e nichje e ndo Jesús ndo bajikao ndo, ndo jii tjenka jan, ko ndachro ndo:
—Nti i jii janáa.

Ko ndo me e kuayé e ndo jan, sabikao ndo jan ndo a ndo ko je e jan ikjan jan xranchi janée ndo.

Kuen en ndo Jesús

(Mt. 27:45-56; Mr. 15:33-41; Lc. 23:44-49)

²⁸ Ó no e ndo Jesús ixi kain ixra ó juexin juinche e ndo ko xrokonda tson en nge e jitaxin xroon ko ndachro ndo:

—Kuen enna inda.

²⁹ Ko nti a jii naa chikute jitjiá xran tsjá ko je e na juinchetjao na naa tu o manta kuintsiá na naa ntaa ko bake e na tjenka ro a ndo.

³⁰ Ko ndo Jesús kui i ndo xran tsjá ko ndachro ndo:

—Ó juexin junta a kain nge e kuituanna.

Tjume e kuisée jaa ndo ko kuajon ndo espíritu ndo ko ndakuen en ndo.

³¹ Nchakon me e naa nchakon sa ó kia Pascua, méxin, ni judío tjaun a na xrokuitu e cuerpoe ni tsiken en nganito ntacru nchakon tjoké e na, ixi nchakon me e naa nchakon ijié. Méxin, juanche e na xi Pilato tsondaki na tutée ni kuen en nganito ntacru ko satsikaoxin na nti a cuerpoe ni me e.

³² Ko ni soldado ikjui na ko kondaki na tutée naa xi ko kao tutée xi yuxin juankanito na ntacru tjenka ndo Jesús.

³³ Ko hora kuiji na tjenka ndo Jesús ko bikon na ó tsiken en ndo, kondaki a na tutée ndo.

³⁴ Ko naa xi soldado kuantje e xa ndatsjonxin ntakuin ndo Jesús ixi naa chika ko tuinxin chrinka ijni ko inda.

³⁵ Méxin, jan an rikjin xroon ixi bake é nti a, bikon ixi jaña kon en ko ndachrjan ti nduaxin ixi ja anta kaxon tsitikaonnta.

³⁶ Jaña kon en ji i ixi tson en nge e ndachro xroon chijnie ndo Dio tsikjin sen: “Tsondaki a na ninaa nte e ndo.”

³⁷ *Kaxon ínggo nichja xroon chijnie ndo Dio tsikjin na sa ó ndachro: “Xrotsje e na ndo juinчекatsingato e na chika ndatsjonxin ntakuin ndo.”

Xrabaa ndo Jesús

(Mt. 27:57-61; Mr. 15:42-47; Lc. 23:50-56)

³⁸ Tjume e ó juexin kon en kain ji i, ko ndo José, naa ndo tjajna Arimatea, juanchia ndo ngajin xi Pilato juachaxin ixi tsakinjinxin ndo ntacru cuerpoe ndo Jesús ko satsikao ndo ndo xroxrabaa ndo. Je e ndo José imao rué e ndo ndo Jesús ixi xrakon en ndo ni judío. Tjume e xi Pilato kuajon xa juachaxin ko sabikao ndo José cuerpoe ndo Jesús.

³⁹ *Kaxon ndo Nicodemo, ndo me e bikitsje e ndo Jesús naa tiie, a nchakon xroxrabaa ndo Jesús bika o ndo níite kilo xroan xraxe tsintekjan xroan mirra ko xroan áloe.

⁴⁰ Jaña ndo José ko ndo Nicodemo kuayé e sen cuerpoe ndo Jesús, juinчекitsa sen ndo naa manta jine tsikaa xroan xraxe ixi jaña bakitikaon ni judío nchakon tsixrabaa chujni tsiken en.

⁴¹ Ti no juankanito na ndo Jesús ntacru tjenka nti a jii naa huerto ko nti a jii naa itjao natjúá xraxro an chujni tsixrabaa nti a.

⁴² Nti a juabaa sen ndo Jesús ixi kjín a jii itjao* ko íse a hora xroxrangíxin nchakon tjoké e ni judío.

20

Xechón ndo Jesús

(Mt. 28:1-10; Mr. 16:1-8; Lc. 24:1-12)

¹ Tjume e nchakon xrangíxin semana xra naxixe e jan María Magdalena ikjui jan ti no tsixrabaa ndo Jesús, ko bikon jan ixi ixro tsijijeexin na itjaq* ti no tsixrabaa ndo tsijinchetengi na ixro.

² Méxin sabinga jan ikjui jan ti no jii ndo Simón Pedro ko ti jii inaa ndo tsikinche e ndo Jesús, ndo me e tsango tjue e ndo ndo Jesús, ko ndachro jan:

—Ó tsikantsje na cuerpoe Ncháina satsikikao na ndo ko nóna ina ti no tsikake e na ndo.

³ Ndo Pedro ko ndo me e kuin en sen jaña, méxin, sakjui sen ti tsixrabaa ndo Jesús.

⁴ Yui sen binga sen. Ko ndo naa ícha nteeto binga ndo ixi ndo Pedro, ko je e ndo sa ó kuiji ndo tinó tsixrabaa ndo Jesús.

⁵ Kuisée ndo tsje e ndo ngaxin in ti no tsixrabaa ndo Jesús ko bikon ndo manta tsikitsía na ndo ko kuixin a ndo nti a.

⁶ Ko tjume e kuiji ndo Simón Pedro ko kuixin in ndo ti no tsixrabaa ndo Jesús ko kaxon bikon ndo manta tsikitsía ndo,

⁷ ko bikon ndo ixi manta tsikitsía jaa ndo Jesús nango tsixratu u manta, ji a manta tjenka ti no ste manta kaxin.

⁸ Ko ndo bajikao ndo Jesús, ndo kuiji sa ó ti no tsixrabaa ndo, kaxon kuixin in ndo ko bikon ndo nge e tsikon en ko kuitikaon ndo.

⁹ Ko xrakuienxin a sen nge e ndachro xroon chijnie ndo Dio, ti xrokonda xroxechón ndo Jesús.

¹⁰ Tjume e sen tsikji tsikitsjexin ti no tsixrabaa ndo Jesús ikjan sen ndo a sen.

Ndo Jesús konoxin ndo ngajin jan María Magdalena

(Mr. 16:9-11)

¹¹ Ko jan María kuitu e jan ngandangi nduja ti no juabaa na ndo Jesús jitsjanga jan. Ko jaña jitsjanga jan, kuisée jan tsje e jan ngaxin in ti no tsixrabaa ndo,

¹² ko bikon jan yuu sen ángel jiá sen manta tjúa ste sen nunte tinó tsikake e na cuerpoe ndo Jesús ko naa ndo ángel jii ndo ti no bake e jaa ndo Jesús ko inaa ndo jii ndo ti bake e tutée ndo.

¹³ Tjume e sen ángel juanchangi sen:

—Nchri, ¿sonda tsjanga?

Ko juate e jan:

—Satsikikao na cuerpoe Nchánana, ko nóna ina no tsikake e na ndo.

¹⁴ Juexin ndachro jan ji i ko konkjan jan tsje e jan ko bikon jan ixi nti a jii ndo Jesús, ko juatsuan i jan ndo.

¹⁵ Ko ndo Jesús juanchangi e ndo jan:

—Nchri, ¿sonda tsjanga? ¿Ngisen tjée?

Ko je e jan xraxaon jan ixi ndo nichje e jan naa sen tayakon en huerto nti a, ko ndachro jan:

—Siá ja a sabiko a ndo, ndachijiana no bakée ndo ixi jan an satsiki an ndo.

¹⁶ Ko ndo Jesús nichje e ndo jan ndachro ndo:

—¡María!

Ko tsje e jan ndo, ko nichjaxin jan ngigua arameo, ndachro jan:

—¡Raboni!

(Ji i xrondachro Maestro.)

¹⁷ Ko ndachro ndo Jesús:

—Tajandana ixi xrasatji a ti jii Ndotána. Itjia titsje é sen kichuuna ko ndache sen ixi sajiin ti jii Ndotána, ndo kaxon Ndotánta, ndo Dio na na ko kaxon ndo Dio na anta.

* **20:1** *Itjaq cueva*

¹⁸ Tjume e jan María Magdalena sakjuichronga jan ngajin sen kuajikao ndo Jesús, ko ndachro jan ixi tsikikon jan Ncháina ko kaxon chronga jan ixi jaña tsindachro ndo.

Ndo Jesús konoxin ndo ngajin sen kuakuajikao ndo

(Mt. 28:16-20; Mr. 16:14-18; Lc. 24:36-49)

¹⁹ Tjume e kóndo nchakon xrangixin semana, sen kuajikao ndo Jesús tsixra o sen ngaxin in nchia ko jian tsikije e sen nchia ixi xrakon en sen ni judío. Ko ndo Jesús kuixin in ndo ko ngusine je e sen bake e ndo, ko nichje e ndo sen, ndachro ndo:

—¿Á jian stenta?

²⁰ Ko juexin ndachro ndo ji i, juako ndo itja ndo ko chjiyéé ndo. Ko je e sen bake e sen juaxruxin ixi bikon sen Ncháina.

²¹ Tjume e ndachro ndo Jesús:

—Juaxruxin stenta. Xranchi Ndotána xruan ana ndo jui i nti i, jaña jan an xruan annta.

²² Ko kuanotée ndo ngata a sen ko ndachro ndo:

—Taye énta Espíritue ndo Dio.

²³ *Siá xrotjáña anta ijié juinche e xrojan ngisen, jaña kaxon tsomé e jíee na. Ko siá xrotjáña inta ijié juinche e xrojan ngisen, tsomé a ijié chóna na.

Ndo Tomás bikon ndo ixi tsixechón Ncháina

²⁴ Tjume e ndo Tomás, naa sen teyuu sen chrikao ndo Jesús, kaxon nchekin in sen ndo xjan Kuatsi, ndo me e ko a ndo nchakon konoxin ndo Jesús.

²⁵ Méxin sen ikaxin chrikao ndo Jesús ndache sen ndo:

—Ó bikona Ncháina.

Ko ndachro ndo Tomás:

—Siá tsikon a jan an tinó tsikitu u na clavo itja ndo ko xroxruxin a dedo tjáana nti a ko ti chjiyéé ndo, tsítikaon a.

²⁶ Tjume e kuatsinga ijní nchakon ko xra o kain sen íjngo ngaxin in nchia ko kaxon ndo Tomás jikao sen ndo nti a. Tsikije e sen jian nchia ko tuinxin bikon sen ndo Jesús ngusine ti ste sen ko nichja ndo ngajin sen ko ndachro ndo:

—¿Á juaxruxin stenta?

²⁷ Ko ndache ndo ndo Tomás:

—Xruxin ia dedo tjáa ti no tsixrandu u na chika clavo tjáana ko xruxin ia tjáa chiyéna. Ko jaña je a xrokuitikaon a ixi nduaxin jan an.

²⁸ Ko juate e ndo Tomás:

—¡Ja a Ncháina ko ndo Dio na na!

²⁹ Ko ndache ndo Jesús ndo Tomás:

—Tomás bikonjana, kuitikaoan. Ko ikaxin sen juaxruxin ste sen, maski bikon ana sen ko jaña titikaon sen.

Ji i chronga sonda tsikjin ndo Juan xroon ji i

³⁰ Ndo Jesús juinche e ndo itsjé ixra ijié bikon sen chrikao ndo ko jitaxin a kain nge e me e xroon ji i.

³¹ Ko nge e jitaxin xroon ji i, tsikixintaxin ixi tsítikaonnta ixi ndo Jesús me e ndo Cristo, Chjen en ndo Dio, ixi siá tsítikaonnta ndo, xrochondanta juachaxin tsarichonnta kain nchakon.

21

Ndo Jesús konoxin ndo ngajin sen yaato bakajikao ndo

¹ Tjume e íjngo ndo Jesús konoxin ndo ngajin sen chrikao ndo ngande e ndachaon ndatin in Tiberias.

² Naakua ste sen, ndo Simón Pedro ko ndo Tomás, xi nchekin in sen xjan Kuatsi, ko ndo Natanael, xi tsiki x̄in t̄ajna Caná nunte Galilea, ko yuu chjen en ndo Zebedeo ko íjngo yuu sen bakajikao ndo Jesús.

³*Tjume e ndachro ndo Simón Pedro:

—Satsji xrotse kuchee.

Ko juate e sen:

—Kaxon jan anna itsjina.

Ko sakjui sen kuajin in sen naa nt̄abarco. Ko xro an kuchee itsé sen nchijí tiie.

⁴ Ko ó jitingasáña ko tuinxin bikon sen ndo Jesús ngande e ndachaon, ko juatsuan i sen ndo.

⁵ Ko juanchangi e ndo sen:

—Ja anta, ¿á xraxro an kuchee itsenta?

Ko juate e sen, ndachro sen:

—Xraxro an nge e.

⁶*Ko ndo Jesús ndache ndo sen:

—Tja ngangínta nocha a nango jian nt̄abarco ko xrotsénta ba.

Tjume e jaña juinche e sen, banka sen nocha a ko jua i kuantsjexin sen inda nocha a ixi kueya kuchee itsé sen.

⁷ Ko ndo ícha t̄jue e ndo Jesús ndache ndo ndo Pedro:

—¡Ncháina ji i!

Ko kuin en ndo Simón Pedro ixi Ncháina, ko kuéyá ndo mantée ndo, manta jindatexin, ixi tsikantsje ndo manta ko juingi ndo inda.

⁸ Tjume e sen kaxin bajikao ndo Jesús kuiji sen ngande e ndachaon bijikao sen nt̄abarco jitingakjín nocha a chóna kuchee ixi tsikjin sen xranchi naa ciento metro kjínxin ti no jii ngande e inda.

⁹ Tjume e kuiji sen ngande e inda ko xingajinxin sen nt̄abarco ko bikon sen xruitja tsiche xro i ko ngata a xruitja jii naa kuchee ko nango jii nutja.

¹⁰ Tjume e ndo Jesús juanchia ndo:

—Tikuunta kaxin kuchee sintenta.

¹¹ Ko ndo Simón Pedro kuajin in ndo nt̄abarco bingakjin ndo nocha a jitjinga itsjé kuchee, naa ciento cincuenta ko ní ba. Ko maski kueya ba tsitsé sen tsichrindaon a nocha a.

¹² Tjume e ndachro ndo Jesús:

—Xrokuiinta, sintenta.

Tjume e ninaa sen juanchangi e sen ndo ngisen je e ndo ixi ó juatsuan sen ndo.

¹³ Ko konchjiñe e ndo Jesús ko kua ndo nutja chjée ndo sen ko jaña kuajon ndo kuchee.

¹⁴ Ji i nínxin konoxin ndo Jesús ti tsixechón ndo.

Ndo Jesús nichja ndo ngajin ndo Simón Pedro

¹⁵ Juexin juine sen juanchangi e ndo Jesús ndo Simón Pedro:

—Ja a Simón, chjen en ndo Jonás, ¿á ícha t̄jauanna ixi sen ji i?

Ko juate e ndo Pedro:

—Jaán, Nchána, ó no anta ixi t̄jua anta.

Ko ndachro ndo Jesús:

—Siá nduaxin me e, tayakon én kutuchjonna.

¹⁶ Tjume e yuxin juanchangi ndo Jesús:

—Ja a Simón, chjen en ndo Jonás, ¿á t̄jauanna?

Ko juate e ndo Pedro:

—Nchána, ja anta no anta kain nge e, jan an ó no anta jan an t̄jua onnta.

Ko ndachro ndo Jesús:

—Siá nduaxin me e, tayakon én kutuchjonna.

¹⁷ Tjume e nínxin juanchangi ndo Jesús:

—Ja a Simón, chjen en ndo Jonás, ¿á tjaunna?

Ko koni e aséen ndo Pedro ixi nínxin juanchangi ndo Jesús á tjaun ndo Pedro ndo Jesús ko ndachro ndo:

—Nchána, ja anta ó no anta kain nge e. Ja anta ó no anta jan an tjaunnta.

Ko ndachro ndo Jesús:

—Siá nduaxin me e, tayakon én kutuchjonna.

¹⁸ Ko naa nge e nduaxin ntatjua ixi nchakon xrachájan ja a, ja ua bakaria mantáa ko bakjia tinó tjaun. Ko nchakon tsootáchría tsinxé tjáa ko inaa ngisen sintekitsaa mantáa ko tsikaan na ti no tjaun a itsjia.

¹⁹ Ti ndachro ndo Jesús xrondachro xranchi tsenxin ndo Pedro ko ji i tachrxjin xranchi tsajon ndo juasaya ngajin ndo Dio. Ko juexin ndachro ndo ji i, íjngo ndache ndo ndo Pedro:

—Rua nana.

Nge e tson en xi ícha tjue e ndo Jesús

²⁰ *Tjume e ndo Pedro tsje e ndo tuenxin ndo ko bikon ndo ixi rué e ndo ícha tjue e ndo Jesús, ndo me e bake e tjenka ti bake e ndo Jesús nchakon juine sen ko tsijanchangí e ndo ndo Jesús ixi ngisen sinchekji ndo.

²¹ Ko ndo Pedro bikon ndo ixi jirué e ndo me e ko juanchangi e ndo ndo Jesús:

—Nchána, ndo ji i, ¿nge e tson en ndo?

²² Ko juate e ndo Jesús:

—Siá tja on xratsechón ndo ti nchakon xrokjan jan an, ja a nge e konda a. Ja a ruenana.

²³ Me e juangíxin juao sen ixi tsen a ndo me e. Ko je a ndachro ndo Jesús ixi xrokuen a ndo. Na i. Je o ndachro ndo ixi siá tjaun ndo xratsechón ndo nchakon xrokjan je e ndo, nge e kondee je e ndo Pedro.

²⁴ Ndo me e ngisen chronga ixi nduaxin kon en kain ji i, ko ikjin ndo xroon ji i. Ko ó noina ixi nge e tsikjin ndo, me e nduaxin.

²⁵ Xrajíi kueya nge e juako ndo Jesús kjin a jan an. Siá xrokjin naanaa me e, xrokitja i nunte xasintajni xrobínga kain xroon ti xrokjin. Jaña tson en.

Ixra juinche e sen kuinche e ndo Jesús

Ndachro ndo Jesús tsii Espíritue ndo Dio

¹ *Tjua anta Teófilo, xroon sa ó ikjín, nti a ikjin kain nge e juinchekuajina ndo Jesús ko ixra juinche e ndo ó sa ó

² kuijija nchakon sakjui ndo ngajní. Ko ti xrasatji a ndo kuinche e ndo sen sinche e ixra ko Espíritue ndo Dio bingijna ndo kuetuen en ndo sen ixi tsono e sen nge e ixra sinche e sen.

³ Nchakon juexin kuen en ndo Jesús, tjume e konoxin ndo ixi jichón ndo, ko yuu kán nchakon nanaó konoxin ndo ngajin sen. Itsjé nge e juako ndo ixi tsono e sen nduaxin jichón ndo ko juinhekuen en ndo sen ti tituan an ndo Dio.

⁴ *Ti xra jii ndo ngajin sen chrikao ndo, je e ndo ndache ndo sen satsjixin a sen tjajna Jerusalén. Ja in ndachro ndo:

—Nti i chon éntta tsaye enta nge e tsajon Ndotána, ti nge e ntatjunta ndo sa ó.

⁵ *Nduaxin ndo Juan bikitée ndo chujni ixi inda. Ko tsjé a nchakon ja anta tsaye enta Espíritue ndo Dio.

Sakjui ndo Jesús ngajní

⁶ Tjume e sen chrikao ndo Jesús, juanchangi e sen ndo:

—Ja anta Nchánana, ¿á tsajonnta juachaxin jai ixi ni tjajnaina tsetuan an tjajna íjngo?

⁷ Ko juatingíexin ndo Jesús:

—Na i. Ja anta chonda inta juachaxin tsono anta ngisa tson en ji i. Je o Ndotána no e ndo ngixe e nchakon.

⁸ *Ko nchakon tsii Espíritue ndo Dio tsaye enta, me e xrochondanta juachaxin tsachrjenta ko xrochronganta nge e ixra junta a, nguixin tjajna Jerusalén, ko nunte Judea, ko nunte Samaria, ko nchijíi nunte xasintajni.

⁹ *Ko juexin nichja ndo Jesús ji i, xrastetsje e sen ndo, tuinxin je e ndo kuaxi bajin in ndo nui, sakjui ndo ko kuintsía ndo naa tjuí ko í bikon a sen ndo íjngo.

¹⁰ Ko xrastetsje e sen ti sakjui ndo Jesús ngajní, tuinxin bikon sen yuu xi tjenka ti no ste sen, steyá xa manta tjúá.

¹¹ Ko xi me e ndachro xa:

—Ja anta chujni nunte Galilea, ¿sonda stetsje enta ngajní? Xranchi bikonta sakjui ndo Jesús, jaña xrokjan ndo íjngo.

Ndo tsitu e ixra banche e xi Judas

¹² Tjume e kjanxin sen ijna ndatin in Olivo ko kuiji sen tjajna Jerusalén. Cha o me e kjín a xranchi naa kilómetro, xranchi jii juachaxin taji ni judío nchakon tjoké e na.

¹³ *Ko kuiji sen tjajna nti a ko kuajin in sen ti jii piso noi nchia tsikjen sen ti bake e sen seno, ndo Pedro, ndo Jacobo, ndo Juan, ndo Andrés, ndo Felipe, ndo Tomás, ndo Bartolomé, ko ndo Mateo. Kaxon ndo Jacobo, ndotée ndo ndatin in Alfeo, ko ndo Simón, ndo me e ndo kuarue e ni Cananista, ko kaxon ndo Judas, ndosaué ndo Jacobo.

¹⁴ Kain sen xra o sen nti a xronichje e sen ndo Dio, ko kaxon jan María, janée ndo, ko sen kichuu ndo ko kaxin nchri.

¹⁵ Ko nchakon me e, ndo Pedro bingatjen ndo ko bake exin tutée ndo ngusine ti ste sen titikaon Ncháina Jesús, je e sen xranchi naa ciento ko kán sen tsixra o nti a. Tjume e ndachro ndo:

¹⁶ —Kichuuna, xrokonda tson en xranchi nichja xroon chijnie ndo Dio ti tsinichja ndo David ó sa ó tsichronga Espíritue ndo Dio nge e sinche e xi Judas, xi bika o ni itsé ndo Jesús.

¹⁷ Je e xa kaxon kuajiku una xa ko xraje o ixra kuayé e xa.

¹⁸ *Tjume e je e xa sakjui xa bike na xa naa nunte ixi tomi juacha xa ixi ti ndako a juinche e xa. Ko nti a juinxin jaa xa, me e chringa xa ko kuachrje tse e xa.

¹⁹ Jaña kono e kain ni tjajna Jerusalén, ko nunte me e kuin in ngigue e na Acéldama, me e xrondachro naa nunte ijni.

²⁰ Ja in jitaxin naa Salmo chijnie ndo Dio:

Je o ndo a xa tsitu e,
ko xro an ngisen tsake e nti a.

Ko kaxon ndachro:

Inaa chujni tsayé e ixra kuanche e xa.

²¹ *Nti i ste ni kuajiku una kain nchakon ti bake e Ncháina Jesús,

²² xbranchakon bikona ndo Juan bikitée ndo ndo Jesús ko ti kuijija nchakon bikona sakjui ndo Jesús ngajni. Méxin, jai xrokonda tsjéena inaa sen tsajiku una, ixi sen me e kaxon xronichja sen ixi nduaxin xechón Ncháina Jesús.

²³ Ko tjume e kuinche e sen yuu sen, ndo José, ndatin in ndo kaxon Barsabás ko kaxon Justo, ko inaa ndo ndatin in Matías.

²⁴ Tjume e nichje e sen ndo Dio ko ndachro sen:

—Ncháina, ja anta chuxinnta aséen kain chujni. Tjako nananta ngisen kuinche enta

²⁵ tsayé e ixra xranchi apóstol, ixra kuintu e xi Judas, ixi ndako a juinche e xa ko sakjui xa ti no tikinixin en xa.

²⁶ Tjume e sondaonxin sen ixro ixi jaña tsono e sen ngixe e xi tsayé e ixra, ko juacha ndo Matías, ko hora me e kuayé e ndo ixra ko bajikao ndo sen tenaá kuinche e Ncháina Jesús.

2

Kuij Espíritue ndo Dio

¹ Tjume e kuij kia Pentecostés ko kain sen titikaon ndo Jesús xra o sen, naakua no ste kain sen.

² Ko tuinxin kuin en sen naa nge e séen ndachro kuixin ngajni xranchi naa chrinto soji. Kuixin in chrinto nguixin ngaxin in nchia ti ste sen.

³ Ko bikon sen naa nge e xranchi nejen xro i. Ko xro i chjeya ko baketa a xro i ngujngu jaa sen.

⁴ Ko kain sen kuayé e sen Espíritue ndo Dio, ko tjume e kain sen kuaxi sen nichja sen inaa ngigua ixi Espíritue ndo Dio kuajon xronichja sen.

⁵ Ko nchakon me e tjajna Jerusalén bake e ni judío, ni titikaon ndo Dio, tsiki xin na nchiji nunte xasintajni.

⁶ Ko kueya na tsikin en na ti chrinto méxin konchjiñe e na. Ko noe a na nge e xroxraon na ixi ngujngu na kuin en na nichja sen titikaon ndo Jesús ngujngu ngigue e na.

⁷ Méxin, xronka na, ko xrakon na ko tjao kichuu na:

—¿Á je a kain ni nichja ji i, ni nunte Galilea?

⁸ ¿Xranchi chao tienxinna nichja na ngujngu ngigua ina?

⁹ Nti i jii ni tsiki xin tjajna Partia, Media, Elam, Mesopotamia, Judea, Capadocia, Ponto, Asia,

¹⁰ Frigia, Panflia, Egipto ko kaxin ni nunte Africa ícha tjenka tjajna Cirene. Ko kaxon ni romano ste nã nti i. Kaxin nã judío nã xrajongíexon nã, ko ikaxin nã je o titikaon nã ndo Dio xranchi ni judío.

¹¹ Kaxon jii ni tsiki xìn Creta, ko Arabia. Ko kaina kuin anna ngujngu ngigua ina nichja nã ixrã ijié juinche e ndo Dio.

¹² Ko xronka nã, noe a nã nge e xroxraxaon nã me e juanchangi e kichuu nã:

—¿Nge e xrondachro kain ji i?

¹³ Ko ikaxin nã juano nã ko ndachro nã:

—Tsikuan kain ni ji i.

Ndo Pedro ndo nichja ngajin ni ste nti a

¹⁴ Tjume e je e ndo Pedro bingatjen ndo ko kao sen tenaá apóstol ko séen nichja ndo ko ndachro ndo:

—Ja anta ni judío ko ni ste tjajna Jerusalén. Kainnta stenta nti i tin ennta nge e xronichja.

¹⁵ Sen ste nti i je a tsikuan sen xranchi ndachrona, ixi jai xranduyo, nandá las nueve.

¹⁶ Ti stetikonnta me e tsichronga ndo profeta Joel:

¹⁷ Ndachro ndo Dio: Nchakon tsjexin

me e xroxruan an Espírituna tsayé e kain chujni.

Ichjan, xjan xi ko xjan nchri, xrochronga xjan chijnina.

Ko sen chajan tsikon sen ixrã ijié tsjako jan an

ko sen ó tachrúi, tsoxienxin nge e xrontatjan sen.

¹⁸ Nchakon tson en kain ji i, jan an xroxruan an Espírituna tsayé e kain sen nche e xrãna, nchri ko xi,

ko je e sen xrochronga sen chijnina.

¹⁹ Ko jan an tsjáko ixrã ijié tsikonni ngajní,

ko kaxon ngata a nunte xasintajni tsjáko kaxin ixrã ijié:

ijní, xro i ko i nchi xranchi itjuí tsikon nã.

²⁰ Chjiixro tsonaxixe e chjiixro.

Ko nchanitjao tsikonni xranchi ijní.

Jaña tson en ko tjume e tsí Ncháina.

Ji in naa nchakon tsango ijié ko tsango chaxro.

²¹ Ko kain sen tsiye e Ncháina, sen me e tsitjáña i sen,

tsechón sen kain nchakon.

²² 'Ja anta ni israelita, tin ennta nge e xrondachrjan. Ndo Jesús, ndo tjajna Nazaret, ndo Dio tsixrúa an ndo ndo ngajinnta ko je e ndo juinche e ndo itsjé ixrã ijié bikonta, me e juakoxin ndo ixi ndo Dio tsikajon ndo juachaxin ngajin ndo. Me e jian no anta.

²³ *Maski jaña bikonta, ja anta ndakua i juinchekuunta ndo xranchi tsixraxaon ndo Dio ó sa ó. Ko ja anta kuajonnta ndo ngajin ni ña i, ko kuenitonta ndo ntacru.

²⁴ *Ko ndo Dio juinchechón ndo ndo Jesús ko ndo Dio kuantsje ndo kain juachaxin chónnda xichononte;* í jua i tsetuan an xa ngajin ndo.

²⁵ Ko sa ó ndo rey David tsichronga ndo ixi ndo Jesús ko ndachro ndo:

Jan an xraxa on Nháina

ko je e ndo tjenkana jii ndo.

Je e ndo jii ndo ndatsjonxin jian,

méxin, xro an nge e tsónna.

²⁶ Méxin, tsango juaxruxin bake e aséenna

ko ro a chaxro itsje,

ixi nóna jan an maski tsen enna, xro an nge e tsónna.

²⁷ Ixi nóna tsintue anta aséenna ti no ste ni tsiken en, ko tsajon anta juachaxin ixi xrorenga ntau na ngaya tuye ixi jan an jian nta a xráanta.

²⁸ Ja anta juako nanta cha o tsechónxixini, ko jan an juaxruxin tsake e ti ritjén ja anta.

²⁹ Kichianna, chjánanta juachaxin xrondachrjan ixi ndo David, ndo kuachrjenixinna, tsiken en ndo ko tsixrabaa ndo. Ko ti no tsixrabaa ndo xra jii nti i nchakon stena jai.

³⁰ Ko ndo David, naa ngisen tsichronga chijnie ndo Dio, ó no e ndo ixi nduaxin ndo Dio chronga ixi naa ngisen tsachrjenixin ndo xrokjan ndo rey, ndo Cristo tsetuan an xranchi je e ndo baketuan an ndo.

³¹ Jaña ndo David ó bikon ndo sa ó, ko chronga ndo ixi xroxechón ndo Cristo ko ndachro ndo ixi aséen ndo Cristo tsitue a ti jii ni tsiken en ko xrorenga i ntau e ndo.

³² Méxin, ndo Dio juinchexechón ndo ndo Jesús, ko bikona kaina ko chrongana ixi nduaxin ji i.

³³ Jai ndo Dio bikao ndo ndo Jesús ko jii ndo Jesús ndatsjonxin jian ti jii je e ndo. Ko kuayé e ndo Jesús Espíritue ndo Dio, ti tsindachro ndo Dio xroxruan an ndo, me e jai xruan an ndo kuaye ena. Ko kain ji in ti bikonta ko ti kuin ennta.

³⁴ Noina ixi ndo David jui a ndo ngajni xranchi ndo Jesús, ixi je e ndo David ndachro ndo:

Ncháina[†] Dio ndache Ncháina Jesús:

“Take é ndatsjonxin jian ti ritjén jan an,

³⁵ tsake eja kain ni ningakon an ngangí tutáa ixi ja a tsituen en na.”

³⁶ Méxin, kainnta ni israelita xrokono anta nduaxin ixi je e ndo Jesús, ndo juankanintonta ntacru, ndo me e ndo Dio juinchéña ndo Ncháina, ndo Cristo.

³⁷ Ko kuin en na ji i, tjume e tsango koni e aséen na. Ko juanchangi e na ndo Pedro ko sen kaxin kuinche e ndo Jesús ko ndachro na:

—Kichianna, jai, ¿inge e sinta ana?

³⁸ Tjume e juate e ndo Pedro ko ndachro ndo:

—Tintu enta ti ndako a nche enta ko titikaonnta ndo Dio. Ko tjume e tikitéxinnta nombrée ndo Jesucristo ko ndo Dio sinchemé e ndo jáanta ko tsajon ndo Espíritue ndo tsaye enta.

³⁹ Ndo Dio tajon ndo Espíritue ndo tsayé e ja anta ko chjan anta ko kaxon kain ni ste ikjín. Je e ndo tsajon ndo Espíritue ndo ngajin kain sen tsinche e je e ndo.

⁴⁰ Jaña ndachro ndo Pedro ko ikaxin nge e ndachro ndo. Ko nichje e ndo na íjngo, ko ndachro ndo:

—Tintu enta ti ndako a ixi tsikaon anta xranchi tsikaon kain ni ndako a nche e jai.

⁴¹ Tjume e kain ni kuitikaon nge e ndachro ndo, bikitée na ko ni konchjiñe e nchakon me e ní mil na.

⁴² Kain sen kuitikaon sen nge e juinchekuen en sen sen apóstol tsikinche e ndo Jesús, ko juento kichuu sen, ko juinekao kichuu sen ko kaxon konchrinjin sen nutja ixi jaña xroxraon sen ti kuen en ndo Cristo, ko kain sen nichje e sen ndo Dio.

Xranchi kuintee sen titikaon Ncháina

⁴³ Ko tjume e kain chujni xronka na ixi sen apóstol kuinche e ndo Jesús juinche e sen itsjé ixra ijié.

⁴⁴ *Ko tjume e kain sen titikaon ndo Jesús naakua naa nge e xraon sen ko kain sen tonchjeye e kichuu sen ti sine sen.

⁴⁵ Ko nchakon kuanchekji sen xrojan nge e kuachónnda sen, tomi me e chjeye e ngujngu sen chónnda i.

[†] 2:34 Ncháina Señor Ncháina Jesús o Ncháina Dio 2:44 Hch. 4:32-35.

⁴⁶ Ko ngujngu nchakon xra o sen ni ngo ko ngujngu ndo a sen, chaxro nekao kichuu sen. Ko konchrinjin sen nutja ixi xraxaon sen ti kuen en ndo Jesús ko nchejié a aséen sen.

⁴⁷ Kuajon sen juasaya ngajin ndo Dio. Ko itsjé chujni tjue e na sen. Ko ngujngu nchakon Ncháina bakinche e ikaxin sen ixi itsjé sen tsitikaon sen ko xrochóna sen juachaxin tsechón sen kain nchakon.

3

Koxruen en naa xi jua i itji

¹ Naa nchakon ndo Pedro ko ndo Juan sakjui sen ti jii ni ngo. Kuiji sen ó kóndo xranchi hora níi, hora me e nichje e sen ndo Dio.

² Nti a jii naa xi jua i itji xratsijongiexión xa. Kain nchakon tikao na xa ni ngo ixi tsake e xa ngandangi nduja ni ngo ndatin in Ntáchja Chaxro. Nti a tjanchiaka a xa ngajin ni tixin in ni ngo.

³ Nchakon bikon xi ni e ixi ndo Pedro ko ndo Juan xrokuixin in sen ni ngo juanchiaka a xa ngajin sen.

⁴ Tjume e ndo Pedro ko ndo Juan tsje e sen xi me e ko ndachro ndo Pedro:

—Tikonntana.

⁵ Ko xi me e jian tsje e xa ixi xrojan nge e tsajon sen ngajin xa.

⁶ Ko ndo Pedro ndachro ndo:

—Chonda i chika plata ko oro, ko ti chonda xrotjá a. Juachaxien ndo Jesucristo, ndo tajana Nazaret, tingatjen ko itjia.

⁷ Ko ndo Pedro itsé ndo itja xa ti jian ko tjume e juinchengatjen ndo xa. Ko tuinxin konsoji tutée xa.

⁸ Ko chrinka xa bake exin tutée xa ko kuaxi xa kuaji xa. Tjume e je e sen ko je e xa kuixin in sen ngaxin in ni ngo ko je e xa jitji xa ko jichrinka xa ko tajon xa juasaya ngajin ndo Dio.

⁹ Tjume e kain ni jii tajana nti a bikon na ixi chao itji xa ko tajon xa juasaya ngajin ndo Dio.

¹⁰ Ko xronka na ixi jaña koxruen en xa ixi kuichúxin na xa ixi xi me e bakake e xa tjanchiaka a xa tomi ngandangi nduja ni ngo ndatin in Ntáchja Chaxro.

Nichja ndo Pedro ngajin ni jii ngaxin in ndasin ndatin in Salomón

¹¹ Xi jua i bakji tintue a xa ndo Pedro ko ndo Juan. Tjume e kain ni ste nti a xronka na ikjui na sakuitsje e na ntasién ni ngo, ndasin Salomón ixi nti a ste sen ko je e xa kaxon.

¹² Ko hora bikon ndo Pedro kuij na, je e ndo ndache ndo na:

—Ja anta ni israelita, ¿sonda xronkanta ko sonda nchexruanninta? ¿Á xraxaonnta ixi jan onna chondana ijié juachaxin o tsango titika onna ndo Dio, méxin koxruen en xi ji i?

¹³ Na i. Ndo Dio, Nchée ndo Abraham, ndo Isaac, ko ndo Jacob, tsango kuajon ndo ijié juachaxin ngajin Chjen en ndo ndatin in Jesús. Ko ja anta kuajonnta xjan ngajin xi Pilato ko je e xa tjaun xa xrokuajanda xa ndo Jesús ko ja anta chro anta.

¹⁴ *Ko ja anta xrojuanchianta xrokuajanda xa ndo tjúa aséen. Ko chro anta. Ko cháña juanchianta kuajanda xa naa xi naatóñaxón chujni.

¹⁵ Ko ja anta naakóñaxónnta ngisen tajon juachaxin tsechón chujni, me e ndo Jesús, ko ndo Dio juinchexechón ndo ndo. Jaña bikona jan anna ko me e ndachrjanna.

¹⁶ Ko juachaxien ndo Jesús chuntiana, me e koxruen en xi jua i bakaji, xi tikonnta ko chuxinnta. Ko je e xa nduaxin chuntia xa ko kuitikaon xa, méxin koxruen en xa. Me e stetsje enta jai.

¹⁷ Ko jai kichianna, nókana ixi nchakon ja anta ko ni tetuan an kon inta ndo Jesús, noa inta nge e juinche enta.

¹⁸ Ko jaña juexin kon en ixi tsindachro ndo Dio tsinichjixin ndo sen tsichronga chijnie ndo ixi ndo Cristo xrokonda tsen en ndo.

¹⁹ Méxin, tintu enta ti ndako a nche enta ko titikaonnta ndo Dio ko je e ndo sinchemé e ndo kain ijié chondanta ko Ncháina Jesús sinchesoji ndo asáanta.

²⁰ Ko tjume e je e ndo Dio xroxruan an ndo ndo Jesucristo, ndo tikinixin en sinchemé e jíanta.

²¹ Ko jai ndo Jesucristo xrokonda tsitu e ndo ngajni tsijija nchakon sinchekonchjian ndo Dio kain nge e xranchi tsichronga ndo jitaxin chijnie ndo ó sa ó.

²² Ó seno ndo Moisés tsindachro ndo: “Ncháina ndo Dio xroxruan an ndo naa ngisen tsachrjenixina ko ndo me e xrochronga chijnie ndo Dio xranchi jan an. Ko ja anta titikaonnta kain nge e xrondachro ndo.

²³ Ko ngisen tsitikaon a ti xronichja ndo, sen me e ítsikinixien a sen tjajna Israel.”

²⁴ Xrangíxin ndo Samuel ko kain sen tsichronga chijnie ndo Dio: chronga sen kain ti jiton en jai.

²⁵ Ja anta tikinixin annta tsiton anta ti tsindachro ndo Dio tsinichjixin ndo sen tsichronga chijnie ndo, ko kaxon tsaye enta naa chijni tjintee ti tsindachro ndo Dio ngajin sen tachrí anta. Ixi tsindache ndo Abraham ja in: “Kain ni nunte xasintajni tsonchaonxin na naa ngisen tsachrjenixinnta.”

²⁶ Nchakon ndo Dio juinchexechón ndo Chjen en ndo sa ó xruan annta ndo chjen en ndo ngajinnta ja anta ni israelita ixi sintanchaonnta ndo ngujngunta ko tsintu enta ti ndako a nche enta.

4

Ndo Pedro ko ndo Juan ste sen ngajin ni tetuan an

¹ Ndo Pedro ko ndo Juan xranichje e sen ni ste nti a ko tuinxin kuji xitaana ko xi tetuan an ni ngo ko xi saduceo.

² Tsango koñaon na ixi ndo Pedro ko ndo Juan stenchekuen en sen ni tsixra o nti a xranchi xroxechón chujni tsiken en xranchi jaña xechón ndo Jesús.

³ Tjume e je e na itsé na sen ko sabikao na sen, xraxin in na sen ndo achjiso. Nti a kuitu e sen tiie me e ixi nchakon me e ó kóndo.

⁴ Ko kueya na kuin en na chijni juako sen, ko kuitikaon na. Ko kain xi kuitikaon, na ó mil xi.

⁵ Ko ndúyaxin xra o kain ni tetuan an ni judío ko ni tjako ley ne e ndo Moisés nti a tjajna Jerusalén.

⁶ Kaxon nti a jii xi Anás, me e xitaana ícha tetuan an, ko xi Caifás, ko kaxon xi Juan, ko xi Alejandro, ko kain ni kichuu xitaana tetuan an.

⁷ Tjume e kuetuan an xa kuixrakua ndo Pedro ko ndo Juan. Ko bake e xa sen ngusine ko tjume e juanchangi e xa sen:

—¿Ngisen kuajon juachaxin o ngisen nombrée nche exinnta kain ji i?

⁸ Ko ndo Pedro tsango chóna ndo juachaxien Espíritue ndo Dio, juate e ndo ndachro ndo:

—Ja anta ni tetuan an tjajna ko ja anta xi tachrí tjajna Israel,

⁹ ja anta tjanchangínta xranchi koxruen en naa xi ni e ixi tjaunnta tsono anta xranchi kon en ji in.

¹⁰ Méxin, tin ennta jian nge e xrondachrjan ixi kainnta ni tjajna Israel tsono anta ixi xi jii nti i koxruen en xa ixi juachaxien ndo Jesucristo, ndo tjajna Nazaret, ndo kuenitonta ntacru, ko tjume e ndo Dio juinchexechón ndo ndo.

¹¹ Ja anta juinche enta xranchi ni nchekonchjian nchia kuitikaon a na ixro ko tjume e ikjan xro ícha jian ko tjintee tonsojixin nchiji nchia me e ndo Jesús me e ti ixro kuíntenta ti juinchekonchjiannta tjatu o ko jai ikjan ndo ixro tjintee.

¹² Ixi je o ndo Jesús chónḁa juachaxin sinchemé e ndo ijię ko je o je e ndo tsixrua an ndo Dio ngata a xasintajni ixi ko a inaa ngisen tsitikaon nā ixi tsomé e jíęę nā.

¹³ Ko xi tetuan an bikon xa ixi ndo Pedro ko ndo Juan nichja sen ixi nchijí aséen sen ko kono e xa ixi sen me e xranchi ngixe i inaa sen ko je a ni ícha no e xroon. Tjume e xronka xi ixi kuichúxin xa ixi sen me e tsikajikao ndo Jesús.

¹⁴ Ko xi tsikoxrue en nti a stekao sen xa. Méxin, jua i tsjankata a xa ijię ngajin sen.

¹⁵ Ko kuetuan an xa ixi ndo Pedro ko ndo Juan tsachrje sen nduja ko tjume e je o xa kuitu e xa ngaxin in nchia juintejaō kichuu xa.

¹⁶ Ko tjume e ndachro xa:

—¿Nge e sinchekuuna xi ñā? Ixi kain ni tjajna Jerusalén bikon nā ixi ndo Dio bingijna ndo xi ji i, me e koxruen en xi ni e ko jua i xrondachrona ixi nduaxin a.

¹⁷ Ko ítaun ana xronichja xi ji i ngajin kain nā. Méxin, xrondachena xa íxronichjxin a xa nombrée ndo Jesús.

¹⁸ Me e kuiye e xa sen íjngo ko kuetuen en xa sen ixi xronichja i sen ko ítsjako a sen ixi nombrée ndo Jesús.

¹⁹ Ko tjume e ndo Pedro ko ndo Juan juate e sen ko ndachro sen:

—Xraxaon ja anta, ¿á xrobake e ndo Dio juaxruxin siá xrokuitika onna nge e ndachro ja anta o xrokuitika onna nge e tituan an je e ndo?

²⁰ Ko jan ana jua i tsintu ana xronichjana nge e bikona ko nge e kuin ana.

²¹ Ko tjume e je e nā kuyakutee nā sen ko kuintu e nā sen sakjui sen ixi kuitja i nā xranchi chao xrobikaon sen ixi kain ni tjajna nti a tajon nā juasaya ngajin ndo Dio ixi ti nge e jian juinche e sen.

²² Ko xi koxruen en ixi juachaxien ndo Dio, xi me e chónḁa xa ícha ixi yuu kán nano.

Sen titikaon ndo Jesús tjanche e sen ndo ixi xroxrakon a sen

²³ Tjume e ndo Pedro ko ndo Juan ó tsikajánda nā sen, me e ikjui sen ti tsixra o kain sen chúxin sen. Ko chronga sen kain ti kuetuan an xitaana tetuan an ko sen tachrí tetuan an.

²⁴ Ko juexin kuin en sen, me e kain sen nichje e sen ndo Dio ko ndachro sen:

—Ncháina, ja anta juinchekonchjiannta ngajní ko nunte xasintajni ko ndachaon ko kain nge e jii.

²⁵ Ja anta ixi Espíritue ndo Dio nichjxinnta ngajin ndo David, ndo juinche e ixrā ngajinnta me e ja in ndachro ndo:

¿Sonda toñao ko tjakaxin kain ni tjajna chuxin anta?

Xro an tjintee kain ti xraxaon nā.

²⁶ Sen rey jii nunte xasintajni ko kain ni tjajna naakua xraka nā ningakon en nā Ncháina Dio ko ndo Cristo.

²⁷ *Nduaxin xi Herodes, ko xi Poncio Pilato, ko ni tsikjixin ikjín, ko ni israelita tsixra o tjajna nti i ixi ningakon en nā Chjan an ndo Jesús, ndo chónḁa i ijię, me e ndo kuinche enta tsóña ndo Mesías.

²⁸ Jaña juinche e nā nge e ó sa ó tsindachronta ixi jaña xrokonda xrokon en.

²⁹ Ncháina, tsje enta ti juinhexronka nā sen ko tingijnanta sen nche e xráanta ixi xrochronga sen chijnianta ko xroxrakon a sen.

³⁰ Ko ixi juachaxiannta sinchexrjuen en sen ni ni e ko sinche e sen ijię ixrā ixi nombrée chjan anta, ndo tsango tjúá, ndo Jesús.

³¹ Ko juexin nichje e sen ndo Dio, bengi nunte ti ste sen. Ko kain sen kuayé e sen juachaxien Espíritue ndo Dio ko kuaxi sen chronga sen chijnie ndo Dio ko xrakon a sen.

Sen titikaon tonchjeje e kichuu sen ti chónḁa sen

³² *Kain sen kuitikaon ndo Jesús naakua nge e xraxaon sen ko kain sen tonchjeye e kichuu sen ti chóna sen ko xro an ngisen ndachro ixi je e sen tituan an sen xrojan nge e.

³³ Sen kuinche e ndo Jesús ixi juachaxien ndo Dio kuachronga sen ixi xechón Ncháina Jesús ko ndo Dio ícha juinchenchaon ndo sen.

³⁴ Ko xro an sen nóa bake e ngakjen en sen ixi kain sen kuachóna jngi e ko ndo a kuanckekji sen ko me e tika o sen tomi

³⁵ ko bakajon sen ngajin sen kuinche e ndo Jesús ko je e sen bakonchjeya sen ngajin ngujngu sen xrokonde e.

³⁶ Xranchi juinche e naa xi levita ndatin in José. Je e xa tsikí xín xa nunte Chipre ko sen kuinche e ndo Jesús juinckekin in sen xa Bernabé, me e xrondachro ngisen tajon juaxruxin.

³⁷ Je e ndo Bernabé juinckekji ndo naa ijngi kuachóna ndo ko bika o ndo tomi ngajin sen kuinche e ndo Jesús.

5

Ti ndako a juinche e xi Ananías ko nchri Safira

¹ Ko naa xi ndatin in Ananías, ko janchri e xa, Safira, juinckekji sen naa ijngi kuachóna xa.

² Ko xi ji i kuitu e xa tu ya tomi ko tu ya tomi bikaan xa ngajin sen kuinche e ndo Jesús xranchi xrokjui kain tomi. Ko janchri e xa no e jan kaxon.

³ Méxin, ndo Pedro ndachro ndo:

—Ananías, ¿sonda chje é juachaxin Xixron anxrée kuixin in xa ntakuian ixi xrojuinckeye é Espíritue ndo Dio ko xrokuitua a tu ya tomi tsinckekjixian nunte?

⁴ ¿Á je a jngi a? Ko siá ó juinckekjia ijngi, ¿á je a tomia? ¿Sonda xraxaon juinche e ja in? Ja a juinckeye é ndo Dio, je a juinckeye é chujni.

⁵ Ko kuin en xi Ananías ji i, tuinxin kuitsinga xa ko ndakuen en xa. Ko kain sen kuin en ji i, tsango xronka sen.

⁶ Tjume e kaxin chajan kuintsía chán manta cuerpoe xi Ananías ko sabikao chán xa, xroxrabaa xa.

⁷ Níi hora tjume e kuixin in janchri e xi Ananías ti ste sen. Ko noe a nchra nge e kon en nti a.

⁸ Ko ndo Pedro juanchangi e ndo nchra:

—Ndachijiana, ¿á juinckekjixinta ijngi ixi ti tomi ndachronta?

Ko juatingéxin nchra:

—Jaán, jaña kochjixin ijngi.

⁹ Ko ndo Pedro ndachro ndo:

—¿Sonda juintejaonta xrojuinckeye énta Espíritue ndo Dio? Nduja ste chajan bikao ndoxi a kuixrabaa ndo ko jai ja a satiko a chán tsixrabaa kaxon.

¹⁰ Ko tuinxin kue é nchri Safira nunte tjenka tutée ndo Pedro ko ndakuen en nchra. Tjume e kuixin in chajan nchia ko bikon chán nchra ndatsiken en nchra ko kuantsje chán nchra, ko bijabaa chán nchra ndatsjonxin nango ti no jixrabaa ndoxi e nchra.

¹¹ Kain sen ni ngo ko ikaxin sen kuin en sen nge e kon en, me e tsango xronka sen.

Itsjé ixrā ijié juinche e sen ixi juachaxien ndo Dio

¹² Tjume e sen kuinche e ndo Jesús juinche e sen kueya ixrā ijié ngajin ni ste nti a ixi juachaxien ndo Dio ko kain sen xra o sen ngaxin in ndasin ndatin in Salomón.

¹³ Ninaa nā tjaun a nā xrokonckjiñe e nā tjenka sen titikaon Ncháina Jesús. Ko chujni tjajna chaxro kuanichja nā ixi je e sen.

¹⁴ Ko kueya xi ko nchri kaxon kuitikaon nā Ncháina Jesús.

¹⁵ Ko itsjé n̄a bakantsje n̄a ni ni e ko bake e n̄a ni ni e ngatja cha o, ngata a camé n̄a ko kanié e n̄a ixi tsatsinga ndo Pedro ko maski je o tsauen ndo tsatsinga ti ste n̄a, tsoxrúen en n̄a.

¹⁶ Itsjé ni ikaxin t̄ajna n̄ti a bakii n̄a t̄ajna Jerusalén bika o n̄a ni ni e ko ni chón̄da espíritue xiña i ko kain n̄a koxrúen en n̄a.

Ni toñao barué e n̄a sen kuitikaon ndo Jesús

¹⁷ Ko t̄jume e xitaana tetuan an ko xi saduceo tsango kochjuye e xa ngajin sen kuinche e ndo Jesús,

¹⁸ ko itsé xa sen xraxin in xa sen ndo achjiso.

¹⁹ T̄jume e naa ndo ángel ne e Ncháina Jesús kuii tiie kuantje e ndo nt̄achja ndo achjiso ko kuantsje ndo sen. Ko ja in ndache ndo sen:

²⁰ —Itjinta ni ngo ko nchekuen ennta kain ni ste n̄ti a chijni tsechón̄xin chujni.

²¹ Ko juexin kuin en sen ji i, ndúyaxin sakjui sen kuixin in sen ni ngo ko juincheckuen en sen ni ste n̄ti a.

Ko xitaana tetuan an ko ni chrikao xa kueya xa ixi xroxra o ni tetuan an Israel. Ko kuetuan an n̄a ixi tsixrakua sen ste ndo achjiso, sen kuinche e Ncháina Jesús.

²² T̄jume e kuiji xi soldado ndo achjiso ko kuitja i xa sen ko ikjan xa

²³ ko ndachro xa:

—Juasona n̄ti a ko bikona jije e jian ndo achjiso ko n̄ti a ste xi jindaa nt̄achja. Ko kuantjan ana ndo achjiso ko kuitja ina sen jije e n̄ti a.

²⁴ Ko kain xi tetuan an xitaana ko xi tetuen en xi policía ne e ni ngo ko ikaxin xitaana tetuan an kuin en xa ji i ko me e xraxaon xa ixi nge e ícha xrokon en.

²⁵ Ko tuinxin kuiji naa ngisen ndachro:

—Ni xraxin innta ndo achjiso ó ste n̄a ngaxin in ni ngo, n̄ti a stenchekuen en n̄a chujni.

²⁶ Ko t̄jume e xi tetuen en xi policía bikao xa xi policié xa ko jian bika o xa sen ixi xronka xa ba ni t̄ajna tsaxi n̄a xa ixro.

²⁷ Ko hora bika o xa sen, bake e xa sen ngajinxin* xi tetuan an, ko xitaana tetuan an ndachro xa:

²⁸ *—Jan ana kuajon ana juachaxin ixi tsjakonta nombrée xi Jesús ko ja anta kuitikaon anta ko nchijí t̄ajna Jerusalén juako enta n̄a ko t̄jaunnta t̄jankata antana ijie ixi jan ana kon ina xi me e.

²⁹ T̄jume e ndo Pedro ko kaxin sen kuinche e ndo Jesús ndachro sen:

—Jan ana xrokonda tsitika onna ndo Dio sa ó ko t̄jume e tsitika onna chujni.

³⁰ Ndo Dio, tsikitikaon sen kuachrjenixinna, ndo Dio me e juinchehexechón ndo Jesús, ndo kuenitonta nt̄acru.

³¹ Ko jai bake e ndo Dio ndo Jesús ngajní ndatsjonxin jian ti jii je e ndo ko kuajon ndo juachaxin ixi je e ndo tsituan an ndo ko tsantsje e ndo n̄a ijie ixi ni t̄ajna Israel xrokjan n̄a xrokuitikaon n̄a ndo Dio, ko me e xrokuitjáña ijie chón̄da n̄a.

³² Ko kaxon jan ana nichjana kain nge e bikona ixi juachaxien Espíritue ndo Dio, Espiritu me e tajon ndo Dio tsayé e kain sen nduaxin tsitikaon ndo.

³³ Ko xi tetuan an kuin en xa kain ji i ko t̄jume e ícha koñao xa ko t̄jaun xa xrokóña xa sen.

³⁴ Ko t̄jume e naa xi fariseo, xi me e kaxon tituan an xa, ndatin in xa Gamaliel. Je e xa naa xi maestro juincheckuen en xa ley kain ni t̄ajna n̄ti a ko ni t̄ajna chón̄de e n̄a xa juasaya. Bingatjen xa ko ndache xa sen kuinche e Ncháina ixi tsachrje sen nduja naa nchion.

³⁵ T̄jume e nichje e xa kain xi tetuan an ko ndachro xa:

—Ja anta ni israelita, xraxaonnta nge e sinchekuunta sen ji i.

* 5:27 ngajinxin delante de 5:28 Mt. 27:25.

³⁶ Xraxaonnta ixi ó sa ó bake e naa xi ndatin in Teudas ko bandachro xa ixi tsango tituan an xa. Ko noó ciento nã barué e nã xa. Tjume e íkaxin chujni kóña nã xa ko kain ni barué e xa chjeke e nã ko kuitjáña nã ko tjume e ndajuexin ixrã juinche e xa.

³⁷ Tjume e nchakon kueki nã chujni tjajna, kují inaa xi ndatin in Judas, naa xi tjajna Galilea, ko itsjé nã rué e nã xa. Ko tjume e kaxon kóña nã xa ko kain ni barué e xa juexin nã.

³⁸ Méxin, tintu enta sen ji i ko tingakuen anta sen. Siá jinche e sen ixrã ne e chujni, ixrã ji i tsjexin xra.

³⁹ Ko siá nduaxin nchekuen en sen chujni juachaxien ndo Dio, ja anta jua i tsingakon ennta sen. Méxin, tintu enta sen, siá na i, ja anta ritetoku unta ndo Dio.

⁴⁰ Tjume e kain xi tituan an kuitikaon xa ko kuiye e xa sen tsikinche e ndo Jesús ko kóña nã sen ko kuetuan an xa ngajin sen ixi íxronichja i sen ixi nombrée ndo Jesús ko tjume e kuajanda xa sen, satsji sen.

⁴¹ Tjume e sen kuinche e ndo Jesús kuachrxjexin sen ti ste xi tituan an, ko maski jaña kon en sen, bake e sen juaxruxin ixi ndo Dio kuajon ndo juachaxin tangi kon en sen kondee nombrée ndo Jesús.

⁴² Ko kuintue a sen ti tjako sen chijnie ndo Jesucristo kain nchakon ngaxin in ni ngo ko ngujngu ndo a chujni.

6

Juée sen yaatō ni tsingijna ixrã

¹ Nchakon me e ícha konkueya sen titikaon Ncháina Jesús. Tjume e sen nichja ngigua griego bajaxin sen ngajin sen nichja ngigua hebreo. Ndachro sen ixi nchri ka an tjajnée sen griego tayé a nchra itsjé nge e tonchjeya sen sine nchra ngujngu nchakon.

² Tjume e sen teyuu kuinche e ndo Jesús kuiye e sen kain sen titikaon ndo ko ndachro sen:

—Jaina jua i tsintu ena ti nchekuen enna chujni chijnie ndo Dio ko itsjina tsonchjeyana nge e sine nchri ka an.

³ Méxin, ja anta kichianna tinche enta yaatō xi ste ngakjen ennta, sen jian chuxinnta ko sen no e ko sen ícha chóna Espíritue ndo Dio, sen me e xrochje énta ixrã ji i.

⁴ Ko jan ana xronichja ana ndo Dio ko tsjakona chijnie ndo.

⁵ Kain sen kuin en me e ko naakua naa nge e xraxaon sen. Ko kuinche e sen ndo Esteban, ndo tsango chuntia Ncháina ko ícha chóna ndo Espíritue ndo Dio, ko kaxon ndo Felipe, ndo Próculo, ndo Nicanor, ndo Timón, ndo Parmenas ko ndo Nicolás. Je e ndo me e ndo tjajna Antioquía ko ó sa ó tsikitikaon ndo xranchi ni judío.

⁶ Ko juexin kuinche e sen sen sinche e xrã me e, bika o kichuu sen ti ste sen tsikinche e Ncháina Jesús. Ko je e sen nichje e sen ndo Dio ko bake e itja sen ngata a ngujngu sen kuayé e xrã me e.

⁷ Chijnie ndo Dio tsango binga nunte nti a ko kueya nã kuitikaon nã Ncháina tjajna Jerusalén. Kaxon itsjé xitaana judío kuitikaon xa Ncháina.

Itsé nã ndo Esteban

⁸ Ndo Esteban, ndo kuachóna juachaxin ne e ndo Dio, kuanche e ndo itsjé ixrã ijié ngajin nã.

⁹ Tjume e kaxin ni tsikí xín ni ngo judío, ni sa ó bake e esclavo, ni me e tsikí xín nã tjajna Cirene, ko Alejandría, ko Cilicia, ko nunte Asia, ni me e juakaxin nã ngajin ndo Esteban.

¹⁰ Ko jua i juacha nã ixi Espíritue ndo Dio kuanichjaxin ndo Esteban.

¹¹ Tjume e je e nã juenge e nã nã ikaxin nã ixi xrondachro nã kuin en nã nichjangí e ndo Esteban ndo Moisés ko ndo Dio.

¹² Me e tsango koñao kain ni tjajna ko xi tetuan an ni ngo ko xi tjako ley. Tjume e itsé na ndo Esteban sabikao na ndo ngajin ni tetuan an.

¹³ Kaxon juée na ni ncheya ixi ndachro na ndako a juako ndo Esteban ko ndachro na:
—Xi ji i tsango nichjangí e xa ningoina ko ley kuetuan an ndo Moisés.

¹⁴ Kuin anna chronga xa ixi xi Jesús, xi tjajna Nazaret, sinchetjáña xa ningoina nti i ko tsindoxin xa nge e titikaonna ti tsinichja ndo Moisés.

¹⁵ Tjume e xi tetuan an ko kain ni ste nti a stetsje e na ndo Esteban ko bikon na ixi ikon ndo Esteban ikjan xranchi ikon naa ndo ángel.

7

Ti juatingéxin ndo Esteban

¹ Tjume e xitaana tetuan an juanchangi e xa ndo Esteban ko ndachro xa:

—¿Á nduaxin kain ti ndachro na ixi ja a?

² Tjume e je e ndo juate e ndo ko ndachro ndo:

—Kichianna xrotjajna Israel ko sen tachríi tin ennta nge e xrondachrjan. Ndo Dio titika onna chónnda juachaxin, ndo me e juako ndo juachaxien ndo ngajin ndo Abraham, ndo kuachrjenixinna nchakon bake e ndo tjajna Mesopotamia, xrasatji a ndo nunte Harán.

³ Ndo Dio ndache ndo ndo Abraham: “Tintu é tjajnáa ko kain sen ndúia ko satjia naa nunte tsjako a.”

⁴ Tjume e ndo Abraham kuachrjexin ndo nunte Caldea ko sakjui ndo ko bake e ndo nunte Harán. Ko ó juexin kuen en ndotée ndo, tjume e ndo Dio bikao ndo ndo Abraham ti no stenta jai.

⁵ Ko ndo Abraham kuayé a ndo nitu o nunte ti no tsake e tutée ndo. Tjume e chronga ndo Dio ixi nchakon tsen en ndo Abraham, nduaxin sen tsachrjenixin ndo tsayé e sen nunte ji i. Maski xrachónnda i ndo ichjan, jaña ndachro ndo Dio.

⁶ Kaxon tsindachro ndo Dio ixi sen tsachrjenixin ndo Abraham, sen me e tseta a sen jée nunte, ko sinche exin sen xrée na, nti a chjinga sinchekao na sen ko xroxenge a sen na ko nti a tsintee sen noó ciento nano.

⁷ Kaxon ndachro ndo Dio: “Tjume e jan an sintaña ijię ngajin ni juincheni e chjan an ti no juinchinche e na xjan xra. Ko tjume e sintakjan chjan an ko xrochjana xjan juasaya nti i.”

⁸ Tjume e ndo Dio tsijao ndo ndo Abraham ixi kain xjan xi tsachrjenixin ndo tsaa xjan chji e xjan ne e sen israelita. Ko jaña nchakon jongí e chjen en ndo Abraham, xjan sa ó, xjan Isaac, ndo Abraham chjée ndo xjan chji e xjan nchakon kuitja xjan ijní nchakon. Kaxon jaña juinche e ndo Isaac nchakon kuichónnda chjen en ndo, xjan Jacob, ko tjume e ndo Jacob jaña juinche e ndo ngajin ti teyuu chjen en ndo. Sen me e kóna ndotée ti teyuu tjajna Israel.

⁹ Ko chjen en ndo Jacob, sen kuachrjenixinna ó sa ó, sen me e kochjio sen ngajin xjan kichuu sen xjan José, ko juinчекji sen xjan ngajin kaxin xi, ko sabikao na xjan tjajna Egipto, ko ndo Dio bingijna ndo xjan

¹⁰ ko kuantsje ndo ti tangi bake e ndo. Ko ndo Dio kuajon juachaxin ixi tsango kono e ndo kain nge e. Me e bikon xi Faraón, rey tjajna Egipto, ixra jian juinche e ndo José, ko kuajon xa juachaxin ixi tsetuan an ndo José tjajna Egipto ko ndo a xa.

¹¹ Tjume e kuji jinta ngata a tjajna Egipto ko nunte Canaán ko tangi kuintee na ko sen tsikachrjenixinna chónnda i sen nge e sine sen.

¹² Ko tsikin en ndo Jacob ixi tjajna Egipto jitochji noa trigo ko kuetuen en ndo chjen en ndo ixi tsintekji xjan nti a tse na xjan noa, ko je e xjan me e sen tsikachrjenixinna. Ji i sa ó ikjui xjan nti a.

13 Tjume e yuxin ikjan sen nti a ko ndo José juincheno e ndo sen ixi je e ndo ndo kichuu sen. Ko juako e ndo José xi Faraón kain ndo saoe ndo.

14 Tjume e kuetuan an ndo José ixi tsjirué e sen ndotée ndo, ndo Jacob, ko kain sen kichuu ndo, xranchi ní ikán ko tena ó sen.

15 Jaña kon en ko ndo Jacob, sakjui ndo bake e ndo tjajna Egipto ko tjume e nti a kuenxin ndo. Ko kaxon sen tsikachrjenixinna nti a kuenxin sen.

16 Ko tjume e kuantsjengí sen nte e ndo Jacob ko sabikao sen nte e ndo nunte Siquem, ko nti a juabaa sen ntaa ti naa nunte tsike na ndo Abraham, tsijinckekji chjen en xi Hamor tjajna Siquem.

17 Tjume e kuij nchakon tson en nge e tsindachro ndo Dio tsijao ndo ndo Abraham, ko sen Israel tsango konkueya sen tjajna Egipto.

18 Tjume e tuinxin inaa xi rey baketuan an tjajna Egipto kuachúxin a xa ndo José.

19 Ko xi rey me e juincheye e xa sen tjajnana ko chinga juinckekao xa sen. Kuetuan an xa ixi chjen en sen xjan xi nandá tsjongí e, tsintu e sen xjan ixi tsinteken en xjan.

20 Ko tjume e nchakon tsijongí e ndo Moisés tsango bake e juaxruxin ndo Dio ixi xjan me e. Ko ndotée xjan ko janée xjan kuachóna sen xjan ndo a sen ní nchanitjao.

21 Tjume e jua i tsemá sen xjan ícha, me e bijánka sen xjan. Ko nchrichje en xi rey tjajna Egipto kuitja nchra xjan ko sabikao nchra xjan ko juinckekangi nchra xjan xranchi chjen en nchra.

22 Ko tjume e ndo Moisés kuangi ndo kain nge e no e ni Egipto ko tsango chóna ndo juachaxin ti nge e ndachro ndo ko nge e kuanche e ndo.

23 Ko nchakon kuichóna ndo Moisés yuu ikán nano xraxaon ndo tsitsje e ndo ni israelita, ni kichuu ndo.

24 Nti a bikon ndo ixi naa xi tjajna Egipto jitoña xa naa ni kichuu ndo. Me e bingijna ndo ni kichuu ndo ko naakóñaxón ndo xi Egipto.

25 Xraxaon ndo ixi ni kichuu ndo, ni israelita, xrokono e na ixi ndo Dio tsixrua an ndo je e ndo tsingijna ndo na. Ko je e na juatsuan i na ndo.

26 Tjume e inaa nchakon ndo Moisés bikon ndo ixi yuu ni israelita steteto na. Ko tjaun ndo xrojuike e ndo ixi íxroketō a na. Ko ndachro ndo: “Ja anta kichuunta, ¿sonda stetetonta?”

27 Tjume e xi chóna ijiē koñao xa ko kuncheka xa ndo Moisés. Ko ndachro xa: “¿Ngisen kuajon juachaxin ixi ja a tsituannana ko sinchéña ijiē ngajin na?”

28 ¿Á tjaun tson iana xranchi naakóñaxuan xi Egipto najna?”

29 Ko kuin en ndo Moisés ji i ko sabinga ndo tjajna Madián ko nti a bake e ndo xranchi naa ni tsikj xjn jée nunte. Ko tjume e nti a kute e ndo ko kuachóna ndo yuu xjan xi.

30 Tjume e kuatsinga yuu kán nano ko tjenka jna ndatin in Sinaí bikon ndo naa ndo ángel tjenka naa ntaa yaa xro i.

31 Ko ndo Moisés xronka ndo ixi jaña bikon ndo ko konchjiñe e ndo ixi xrotsje e ndo ti xro i ko kuin en ndo té Ncháina Dio ndachro:

32 “Jan an ndo Dio titikaon sen tsikachrjenixin ndo Abraham, ko ndo Isaac, ko ndo Jacob.” Ko ndo Moisés kuaxi xranga ndo ko xronka ndo ko tjaun a ndo xrotsje e ndo.

33 Ko ndachro Ncháina: “Tantsje kateá ixi nunte ritingatjangia, nunte tjúa.

34 Jan an bikon ixi ni tjajnana tsango tangi ste na tjajna Egipto ko ó kuin an ixi teya na. Ko jai jui i ixi tsingijna na. Méxin, xroxruan an ja a itsjia tjajna Egipto.”

35 Ko ni israelita juanoa na ndo Moisés ko tsindachro na: “¿Ngisen tjáa juachaxin ixi ja a tsituannana ko sinchéñanana ijiē?” Ko ndo Dio xruan an ndo ndo Moisés ixi tsetuan an ndo ko tsingijna ndo ni israelita ko ixi juachaxien ndo ángel bikon ndo ngaka a ntaa yaa xro i.

³⁶ Ndo Moisés kuantsjexin ndo ni tsikachrjenixinna tjajna Egipto. Tsango itsjé ixra ijié juinche e ndo ko itsjé nge e juakoxin ndo tjajna Egipto, ko ndachaon tin in Ndachaon Játse, ko no ntajie kuaji na yuu kán nano.

³⁷ Je e ndo Moisés ndache ndo ni israelita: “Ndo Dio xroxruan an naa ngisen xronichja chijnie ndo xranchi xruan anna ndo jan an ko ndo me e tsachrjenixin ndo ni kichuunta. Titikaonnta ndo.”

³⁸ Ndo Moisés bake e ndo ngajin ni israelita nchakon bake e na ntajie. Ko juao ndo ndo ángel ne e ndo Dio ijna Sinaí ko ni kuachrjenixinna kuayé e na chijni tajon juachaxin tsechón chujni, ko chijni me e kuaye ena jai.

³⁹ Tjume e ni kuachrjenixinna kuitikaon a na ko juanoa na ndo Moisés ko tjaun na íjngo xrokjan na tjajna Egipto.

⁴⁰ Ko ndache na ndo Aarón: “Tja onna xrochondana naa dio tsitaonana nti a ixi ínona ina nge e kon en ndo Moisés, ndo bingijna kuachrjexinna tjajna Egipto.”

⁴¹ Ko juinchéña na naa kuxintachjan ko naakóñaxón na iko kuajon na kuayé e kuxintachjan me e, ko tsango bake e na juaxruxin ixi bikon na nge e tsikóñaxin itja chujni.

⁴² Tjume e ndo Dio kuintu e ndo na ixi tsitikaon na nchanotsé jii ngajní.* Ji i tsikjin naa ngisen kuachronga chijnie ndo Dio ko ndachro ja in: Ja anta ni Israel, ¿á naakóñaxónnta iko xrokuaya a jan an ti yuu kán nano bake enta ntajie?

⁴³ Na i, ja anta biku unta iko me e ti jii ningue xi dio Moloc ko kaxon biku unta nchanotsé ne e xi dio Renfán.

Ja anta juinchekonchjiannta kain ji i ixi xrochje énta juasaya xranchi xrokjui ndo dio na anta.

Méxin, jan an tsantsjexinnta tjajnánta ko xroxruan annta tjajna Babilonia ko ícha nta a.

⁴⁴ Xrabake e ni kuachrjenixinna ntajie, nti a chóna na naa ni ngo tsikonchjianxin manta ti no jii ley tsiketuan an ndo Dio. Ji i juinchéña na xranchi tsiketuen en ndo Dio ndo Moisés sinchéña ndo xranchi tsikikon ndo.

⁴⁵ Tjume e ni tsikachrjenixinna kuayé e na ni ngo manta kuitu e na. Tjume e ni chrikao ndo Josué bikao na ni ngo me e nchakon juacha na kuayé e na nunte e ikaxin tjajna, ni me e kuantsjexin ndo Dio. Jaña kon en kuijija nchakon kuaxi kuetuan an ndo David.

⁴⁶ Tsango juinchenchaon ndo Dio ndo rey David ko ndo David tjaun ndo sinchekonchjian ndo naa ningue ndo Dio, ndo tsikitikaon ndo Jacob.

⁴⁷ Ko je e ndo juinchekonchjian i ndo ni ngo. Ndo Salomón, chjen en ndo David, juinchekonchjian ni ngo me e.

⁴⁸ Ko ndo Dio jii ngajní ji a ndo ngaxin in naa ni ngo tsikonchjianxin itja chujni. Ndachro naa xi nichja chijnie ndo Dio:

⁴⁹ Jan an ndo Dio ngajní nti a tetuanxin ko nunte xasintajni nti a jita a tutéena.

¿Ngixe e nchia sinchekonchjiananta?,
o, ¿ti no tsake e tsjokéena?

⁵⁰ ¿Á je a tjáana juintañaxin kain nge e?

⁵¹ Ko ja anta icha asáanta ko titikaon anta. Ja anta tin ennta ko nche enta xranchi ni chúxin a ndo Dio. Kain nchakon tetoku unta Espíritue ndo Dio. Ja anta nche enta xranchi ni tsikachrjenixinnta ó sa ó.

⁵² Ni tsikachrjenixinnta chinga juinchekao na sen chronga chijnie ndo Dio. Ko naakóñaxón na sen kuachronga ixi tsij ngisen xrochóna i ijié. Ko ó kuij ndo me e ko ja anta juinchekjinta ndo ko tjume e naakóñaxón na ndo.

* 7:42 ngajní cielo

⁵³ Ja anta kuaye enta ley kuetuan an ndo Dio, nge e chronga ndo ángel, ko ja anta kuitikaon anta.

Ndakuen en ndo Esteban

⁵⁴ Ko hora kuin en nã nge e ndachro ndo Esteban, tsango koñao nã, ncheketo neno na ixi koñao e nã ndo.

⁵⁵ Ko ndo Esteban ícha jichóna ndo juachaxin Espíritue ndo Dio ko tsje e ndo ngajní ko bikon ndo juachaxien ndo Dio ko kaxon bikon ndo ndo Jesús siin ndo ndatsjonxin jian ti jii ndo Dio.

⁵⁶ Ko ndachro ndo Esteban:

—Bikon xitje e ngajní ko nti a jii Chjen en ndo Dio, xjan jongí e xranchi chujni, ndatsjonxin jian ti jii ndo Dio.

⁵⁷ Ko je e nã bije e ndatsjon nã ko séen koyaku e nã ndo,

⁵⁸ ko sabikao nã ndo ngande e tjajna ko ixro kóñaxin nã ndo, ko ni tjangi e ndo Esteban kuantsje nã ti jitsáa nã ko bake e nã tutée naa chajan ndatin in Saulo ixi xrotsje e chán manta.

⁵⁹ Ko je e nã yaxin nã ixro ndo Esteban ko je e ndo tinóatée ndo ngajin Ncháina Jesús ko ja in ndachro ndo:

—Ncháina Jesús taye énta aséenna.

⁶⁰ Ko bake exin ntatuchi in ndo ko séen nichja ndo:

—Ncháina Jesús, ja anta tjankata inta ijię ngajin ni stetóñana.

Jaña ichro ndo ko ndakuen en ndo.

8

Ndo Saulo tjaun ndo tsóña ndo sen titikaon ndo Jesús

¹ Ndo Saulo naxraje o xraxaon ndo xranchi ni kóña ndo Esteban.

Ko nchakon me ejuangíxin nã tóña nã sen titikaon ndo Jesús tjajna Jerusalén ko kain sen titikaon ndo Cristo kuaxi chjeke e sen sakjui sen nchijí nunte Judea ko nunte Samaria. Ko je o sen apóstol tsikinche e ndo Jesús kuitu e sen Jerusalén.

² Kaxin sen tsango titikaon ndo Dio juabaa sen ndo Esteban ko tsjangaxin sen ndo.

³ *Ko xi Saulo ningakon en xa sen titikaon ndo Cristo. Ko kuaxi xa kuixin in xa ngujngu ndo a sen ko itsé xa sen xi ko sen nchri ko bingakjin xa sen ko xraxin in xa sen ndo achjiso.

Juako sen chijnie ndo Cristo nunte Samaria

⁴ Ko sen sajuixin tjajna Jerusalén stetjako sen chijnie ndo Cristo nchijí ti no kuintekji sen.

⁵ Naa ndo ndatin in Felipe sakjui ndo naa tjajna nunte Samaria ko kuaxi ndo chronga ndo chijnie ndo Cristo.

⁶ Ko tsango tsjé nã xra o nti a ko kuin en nã nge e ndachro ndo Felipe ixi ó bikon nã ixra ijié juako ndo.

⁷ Ko itsjé ni chóna espíritue Xixron anxrée koxruen en nã ko espíritu me e kuyako kuachrjexin je e chujni me e. Kueya ni jua i tingatjen kuaxi nã itji nã ko ni ntarengo chao itji nã kaxon.

⁸ Ko kain ni tjajna ijié tsango juaxruxin bake e nã.

⁹ Tjajna me e bake e naa xi ndatin in Simón, xi me e tuso xa ko bancheye e xa ni nunte Samaria ko je e xa ndachro xa tsango tetuan an xa.

¹⁰ Kain nã jian stetin en nã, xjanchínchín ko ni tachrí ko ndachro nã:

—Xi ji i tsango chóna xa juachaxien ndo Dio.

¹¹ Kain nã baktikaon nã xa ixi ti ixra ijié banche e xa me e juincheye e xa nã itsjé nano.

¹² Ko nchakon kuitikaon na chijni juako ndo Felipe kondee juachaxien ndo Dio ko ndo Jesucristo, tjume e ni xi ko ni nchri bikitée na.

¹³ Ko kaxon xi Simón, kuitikaon xa ko bikitée xa kojuangíxin xa rué e xa ndo Felipe ko tsango kuitekaon xa ixi bikon xa ixra ijié juako ndo Felipe.

¹⁴ Tjume e sen apóstol, sen tsikitu e tjajna Jerusalén, kuin en sen ixi itsjé ni nunte Samaria ó kuitikaon na chijnie ndo Dio. Ko tjume e kuetuen en sen ndo Pedro ko ndo Juan satsji sen nti a.

¹⁵ Ko nchakon kuiji sen juanche e sen ndo Dio ixi ni titikaon ndo Cristo nti a xrokuayé e na Espíritue ndo Dio

¹⁶ ixi xratayé a na Espíritue ndo. Je o tsikikitexin na nombrée Ncháina Jesús.

¹⁷ Tjume e ndo Pedro ko ndo Juan bake e itja sen ngata a jaa na ko kuayé e na Espíritue ndo Dio.

¹⁸ Ko xi Simón bikon xa ixi sen apóstol bake e itja sen ngata a jaa ni tsikitikaon ko kuayé e na Espíritue ndo Dio, ko tjume e xi Simón tjaun xa tsajon xa tomi ngajin sen apóstol

¹⁹ ko ndachro xa:

—Chjánanta juachaxin ixi kaxon jan an tsakée tjána ngata a jaa chujni ko tsayé e na Espíritue ndo Dio.

²⁰ Ko ndachro ndo Pedro:

—Ja a ko tomia xroche ti xro i tanga i ixi xraxaoan tse na juachaxien ndo Dio.

²¹ Ja a jua i sinche e ixra ji i ixi ndo Dio no e ndo ixi ja a tjúa i asáan.

²² Ko tintu é ti ndako a nche e ko tinóatáa ngajin ndo Dio ixi sinchemé e ndo ijié chonda.

²³ Ó bikona ixi tsango chjuye e asáan ko kueya ijié chonda.

²⁴ Ko tjume e xi Simón juate e xa ndachro xa:

—Tjanche enta Ncháina Jesús ixi ti ndachronta tsoen a ji in ngajin jan an.

²⁵ Tjume e juexin chronga sen apóstol chijnie ndo Jesús, sakjui sen itsjé tjajna tikinixin en nunte Samaria ko juinchekuen en sen na chijni tajon juachaxin tsechón aséen chujni. Ko tjume e ikjan sen tjajna Jerusalén.

Ndo Felipe ko xi tsiki xin tjajna Etiopía

²⁶ Tjume e naa ndo ángel ne e Ncháina Dio ndache ndo Felipe:

—Tingatjen satjia no njin, ti jii cha o xingajinxin chujni tjajna Jerusalén ti tjixin ni tjajna Gaza.

Cha o ji i tatsinga no ntajie.

²⁷ Ko ndo Felipe bingatjen ndo ko sakjui ndo no cha o me e. Nti a kuetan ndo naa xi tjajna Etiopía. Je e xa naa xi eunuco ko xi me e tja o xa tomie jan Candace, naa jan reina tetuen en tjajna Etiopía. Je e xa tsikji xa tjajna Jerusalén, nti a kuajon xa juasaya ngajin ndo Dio.

²⁸ Tjume e je e xa kjanxin xa tjajna Jerusalén ko satsji xa tjajné e xa ko je e xa jiyá xa naa carreta me e jincheckuanxin xa naa xroon tsikjin ndo profeta Isaías, ndo kuachronga chijnie ndo Dio ó sa ó.

²⁹ Ko Espíritue ndo Dio kuetuen en ndo Felipe:

—Itjia tonchjiñe e tjenka carreta me e.

³⁰ Ko konchjiñe e ndo Felipe ti jii carreta, ko kuin en ndo ixi xi me e jincheckuanxin xa xroon tsikjin ndo Isaías. Ko juanchangi e ndo xa:

—¿Á tienxian nge e rincheckuanxian?

³¹ Tjume e juate e xa ko ndachro xa:

—¿Xranchi tsianxin siá xro an ngisen tingijnana tsianxin nge e jichro xroon ji i?

Ko juanche e xa ndo Felipe tsajin in ndo carreta tsake e ndo tjenka xa.

³² Ko xroon chijnie ndo Dio jincheckuanxin xa, ja in ndachro:

Sabikao na ndo xranchi naa kutuchjon tsóña na.
Xranchi naa kutuchjon tenko ba nchakon kjin en na ba,
jaña je e ndo kaxon xro an nge e ndachro ndo
ko xro an nge e nichja ndo.

³³ Juanoa na ndo ko juincheñe a na ndo ijie.
Ko sen kuachrjenixin ndo, ¿ngisen tseki ji i?,
ixi je e ndo kuen en ndo ngata a nunte nti i.

³⁴ Tjume e xi eunuco juanchangi e xa ndo Felipe ko ndachro xa:

—Ixudio ndachijiana ngisen kon en kain ji in. ¿Á ndo tsikjin xroon ji in o á inaa ngisen?

³⁵ Tjume e ndo Felipe kuaxi ndo chronga ndo ti no jincheckuanxin xa ko juako e ndo xa chijnie ndo Jesús.

³⁶ Ko stetatsinga sen ti no jii inda, me e ndachro xi eunuco:

—Nti i jii inda. ¿Á jua i tsikitéxinna nti i?

³⁷ Ko ndachro ndo Felipe:

—Siá nduaxin titikáoaan ngaya asáan, chao tsikitée.

Ko je e xa juate e xa:

—Titika on ixi ndo Jesucristo, Chjen en ndo Dio.

³⁸ Ko kuetuan an xi me e tsíxin carreta ko kayui sen xingajin sen ti jii inda ko ndo Felipe bikitée ndo xa.

³⁹ Tjume e juexin kuachrxexin sen inda, Espíritue ndo Dio sabikao ndo Felipe íjngo. Ko xi bikitée, í bikon a xa ndo Felipe. Ko tsango juaxruxin kua xa chaoé xa.

⁴⁰ Ko ndo Felipe konoxin ndo tjajna Azoto ko bakatsinga ndo ngujngu tjajna ko kuachronga ndo chijnie Ncháina Jesús, jaña juinche e ndo ko kuiji ndo tjajna Cesarea.

9

Ndo Saulo kuitekaon ndo ndo Jesús

(Hch. 22:6-16; 26:12-18)

¹ Xi Saulo tsango ningakon en xa sen titikaon Ncháina Jesús ko tjaun xa naatsóñaxón xa sen. Méxin, sakjui xa bijée xa xitaana tetuan an

² ko juanchia xa naa xroon chóna juachaxin satsji xa ni ngo tjajna Damasco tsjée xa sen titikaon chijnie ndo Jesús ixi tsikao xa sen nchri ko sen xi tjajna Jerusalén xroxruxin in xa sen ndo achjiso.

³ Ko yaa xa cha o ko ó xrokuiji xa tjajna Damasco, tuinxin kuii naa xro i kuixin ngajní bingasáña ngandajin xa.

⁴ Ko xi Saulo kuitsinga xa nunte, ko kuin en xa nichja naa ngisen ko ndachro:

—Saulo, Saulo, ¿sonda ningakonna ko tengiana?

⁵ Ko tjume e xi Saulo juanchangi xa:

—¿Ngisen ja anta?

Ko té sen nichja, ndachro:

—Jan an ndo Jesús, ndo tsango ningakon én.

⁶ Je e xa xranga xa ko xronka xa, ko ja in ndachro xa:

—Ja anta, ¿nge e tjaunnta sinta a?

Ko Ncháina Jesús ndachro ndo:

—Tingatjén, tixin ia tjajna Damasco, ko nti a tsetuan an nge e sinche e.

⁷ Ko tjume e ni bijikao xi Saulo tsango xronka na ixi kuin en na té naa ngisen nichja ko xro an ngisen bikon na.

⁸ Ko bingatjen xi Saulo ko kuantje e ikon xa ko xro an nge e bikon xa. Ko ni tikao xa ngatsé e na xa ko sabikao na xa tjajna Damasco.

⁹ Ko nti a bake e xa ní nchakon, bikon a xa ko juine a xa ko xro an nge e kui i xa.

¹⁰ Ko tjajna Damasco bake e naa ndo titikaon Ncháina Jesús ndatin in Ananías, ko juachaxin espíritue ndo Dio tsikikonxin ndo ndo Jesús ja in kuituan an ndo Jesús ngajin ndo:

—Ananías.

Ko ndo Ananías juate e ndo:

—Nti i ritjén, Ncháina.

¹¹ Ko ndachro Ndo Jesús:

—Tingatjén satjia cha o ndatin in Nao. Ko tjée ndo a naa ndo ndatin in Judas ko nti a tsinchía naa xi ndatin in Saulo tsiki xin tjajna Tarso ko je e xa jinichja na xa,

¹² ixi je e xa bikon xa naa xi ndatin in Ananías tixin in xa nchia ko tsake e itja xa ngata a jaa je e xi me e ko chao tsikon xa íjngo.

¹³ Ko ndo Ananías juate e ndo:

—Ncháina, ó kuin an nge e ndachro kueya chujni, ixi xi me e ndako a nche e xa ngajin sen titikaon ngajinnta, sen ste tjajna Jerusalén.

¹⁴ Ko jai kuii xa nti i ixi tsikayé e xa juachaxien xitaana tetuan an ixi tsikao xa kain sen titikaonnta.

¹⁵ Ko Ncháina Jesús ndachro ndo:

—Itjia ixi jan an kuincha a xi me e ixi tsjako xa chijnina. Sinchekuen en xa ni ste jée tjajna ko xi rey ko kaxon ni israelita,

¹⁶ ko jan an tsjako a xa ixi tsango tangi tson en xa ixi tsitikaonna xa.

¹⁷ Tjume e ndo Ananías sakjui ndo nchia ti jii xi Saulo ko bake e itja ndo ngata a jaa xa ko ndachro ndo:

—Ja a kichian Saulo, Ncháina Jesús, ndo bikuan ngatja cha o, kuetuanna ndo jui i ixi tsikuan íjngo ko tsaye é Espíritue ndo.

¹⁸ Ko tuinxin kuinjixin ikon xi Saulo naa nge e xranchi kjo e kucheé, ko chao bikon xa íjngo. Ko bingatjen xa ko bikitée xa.

¹⁹ Ko tjume e juine xa ko chao konsoji xa íjngo. Ko kuitu e xa kaxin nchakon ngajin sen titikaon Ncháina Jesús tjajna Damasco.

Ndo Saulo juinchekuen en ndo na tjajna Damasco

²⁰ Ko tjume e juangíxin ndo Saulo juako ndo ngaxin in ni ngo Israel ixi ndo Jesús, Chjen en ndo Dio.

²¹ Kain ni jitin en tsango xronka na ko ndachro na:

—¿Á je a xi ji i barué e ko bakoña kain ni titikaon ndo Jesús tjajna Jerusalén? ¿Á me e kui xin xa nti i ixi tsikao xa ni titikaon ndo Jesús ngajin xitaana tetuan an?

²² Ko ícha xrakon a xa juako xa ixi nduaxin ndo Jesús ndo Cristo. Ko ni judío bake e tjajna Damasco jua i nichjangí e na ndo.

Xi Saulo satinge e xa ni judío

²³ *Ko ó kuatsinga itsjé nchakon ko ni judío stexraxaon na xranchi naatsóñaxón na xi Saulo.

²⁴ Ko ó kono e ndo ti stexraxaon na. Ko tiie ko nchakon stechón en na ngandangi nduja tjajna ixi tjaun na naatsóñaxón na ndo.

²⁵ Ko naa tiie sen titikaon Ncháina Jesús bake e sen ndo Saulo ngaya naa ntaxra ijié ko tjume e juinchexingajin sen ntaxra jiá ndo tuenxin tjatu o jii ngandajin nduja tjajna. Me e chao sabinga ndo.

Ndo Saulo sakjui ndo tjajna Jerusalén

²⁶ Ko nchakon kuiji ndo Saulo tjajna Jerusalén tjaun ndo xrokui ndo ngajin sen titikaon Ncháina Jesús. Ko kain sen xronka sen ixi kuitikaon a sen á nduaxin kaxon je e ndo ó titikaon ndo Ncháina Jesús.

²⁷ Ko tjume e ndo Bernabé sabikao ndo ndo Saulo ti ste sen apóstol ko chronga ndo ixi ndo Saulo tsikikon ndo Ncháina ngatja cha o ko Ncháina tsinichje e ndo ndo. Ko tjajna Damasco juako ndo Saulo nombrée Ncháina Jesús ko xronka i ndo.

²⁸ Tjume e ndo Saulo kuitu e ndo tjajna Jerusalén ko chrikao ndo sen apóstol. Ko xrakon a ndo tjako ndo chijnie Ncháina Jesús.

²⁹ Ko je e ndo tjaun ndo tsjao ndo ni judío nichja griego ko je e na tjaun na naatsóñaxón na ndo.

³⁰ Tjume e sen titikaon ndo Cristo tsikin en sen nge e xrokon en ndo ko sabikao sen ndo tjajna Cesarea ko kuetuen en sen ndo satsji ndo tjajna Tarso.

³¹ Ko tjume e sen titikaon Ncháina nchijí nunte Judea, nunte Galilea ko nunte Samaria juaxruxin bake e sen ko ícha kuitikaon sen ndo Jesús. Kuachóna sen juasaya ngajin Ncháina ko Espíritue ndo Dio bingijna sen ko ícha konkueya sen.

Xi Eneas koxruen en xa

³² Tjume e ndo Pedro kuitsje e ndo kain sen titikaon Ncháina Jesús. Kaxon sakjui ndo kuitsje e ndo sen titikaon Ncháina ste tjajna Lida.

³³ Nti a kuitja ndo naa xi ndatin in Eneas. Ijní nano jitsingata a xa kania ixi tsiken en yui tutée xa.

³⁴ Ko ndachro ndo Pedro:

—Eneas, ndo Jesucristo syntaxruan an ndo jai. Tingatjen tatsían kania a.

Ko tjume e xi Eneas tuinxin bingatjen xa.

³⁵ Ko kain ni jii tjajna Lida ko tjajna Sarón bikon na ixi koxruen en xa ko kaxon je e na kuitikaon na Ncháina Jesús.

Xechón nchri Dorcas

³⁶ Ko nchakon me e bake e naa nchri tjajna Jope titikaon nchra Ncháina ko ndatin in nchra Tabita ko ngigua griego xrondachro Dorcas. Ko je e nchra jian juinche e nchra ko bingijna nchra ni nóa.

³⁷ Tjume e naa nchakon tsango koni e nchra ko ndakuen en nchra. Ko juinéma sen cuerpo e nchra ko bake e sen nchra ti piso yuxin noi.

³⁸ A tjajna Jope jii tjajna tjenka tjajna Lida, nti a bake e ndo Pedro. Ko sen titikaon Ncháina no e sen ixi nti a jii ndo. Ko tjume e xruan an sen yuu sen xrondache sen ndo ixi tuinxin tsii ndo ko tsonchrjen a ndo.

³⁹ Ko tjume e sabikao sen ndo Pedro. Ko kuiji sen nti a ko tuinxin bikao sen ndo ti jii cuerpo e nchri tsiken en. Nti a ste kain nchri ka an tsango tsjanga nchra ko juako nchra kain manta tsijaon nchri Dorcas nchakon xrabakechón nchra.

⁴⁰ Tjume e kuetuan an ndo Pedro ixi kain na tsachrje na nduja. Ko bake exin ntatuchi in ndo ko nichje e ndo ndo Dio. Ko jitsje e ndo nchri tsiken en ko ndachro ndo:

—Tabita, tayá.

Ko je e nchra kuantje e ikon nchra ko bikon nchra ndo Pedro ko bake e nchra nunte.

⁴¹ Ko tjume e itsé ndo itja nchra ko juinchengatjen ndo nchra. Ko kuiye e ndo kain sen titikaon Ncháina ko kaxon kain nchri ka an ixi tsikon sen ó tsixechón nchra.

⁴² Tjume e kain ni jii tjajna Jope kono e na nge e juinche e ndo Pedro ko itsjé na kuitikaon na Ncháina Jesús.

⁴³ Tjume e ndo Pedro kuitu e ndo itsjé nchakon tjajna me e ko bake e ndo ndo a ndo Simón, naa ndo kuanchexema tjue é iko.

10

Ndo Pedro ko ndo Cornelio

¹ Tjajna Cesarea bake e naa ndo ndatin in Cornelio. Ndo me e ndo capitán tetuen en xi soldado kuixin Italia.

² Tsango jian ndo ko kain sen ndo a ndo xraxaon na ndo Dio ko tajon ndo kueya tomi ixi tjaun ndo tsingijna ndo sen judío ko kain nchakon nichje e ndo ndo Dio.

³ Tjume e naa nchakon hora nínxin ó kóndo tuinxin bikon ndo naa ndo ángel nche e ixra ngajin ndo Dio, ndo me e kuixin in ndo ti jii ndo Cornelio ko ndachro ndo:

—Cornelio.

⁴ Ko ndo Cornelio jitsje e ndo ndo ángel ko xronka ndo ko juanchangi ndo:

—¿Nge e tjaunnta?

Ko ndachro ndo ángel:

—Ndo Dio bake e juaxruxin ixi ti nichje é ndo ko jian nche e tingijna ni nóa.

⁵ Méxin, tetuen én naa ngisen satsji tjajna Jope ixi tsikao na ndo Simón kaxon ndatin in Pedro.

⁶ Ko ndo me e jii ndo ndo a naa xi kaxon ndatin in xa Simón. Xi me e kuanchexema tjue é ko. Ndo a xa jii tjenka ndachaon.*

⁷ Hora sakjui ndo ángel, ndo nichje e ndo Cornelio, je e ndo Cornelio kuiye e ndo yuu xi nchexra ko kaxon naa xi soldado xraxaon xa ndo Dio ko jian tjento ndo xa.

⁸ Beki e ndo xa kain ti bikon ndo ko tjume e kuetuen en ndo xa satsji xa tjajna Jope.

⁹ Ngusine nchakon íjngo steyá xa cha o tjenka tjajna Jope, ko ndo Pedro kuajin in ndo ngata a nchia ixi nti a xronichjexin ndo ndo Dio.

¹⁰ Ko tjume e tsango kuen en ndo jinta ko tjaun ndo sine ndo. Nandá stenchekonchjian na nge e sine ndo, tuinxin bikon ndo naa nge e.

¹¹ Bikon ndo ixi xitje e ngajni ko nti a xingajinxin naa manta ijié. Jixrite e kanoó ikon manta.

¹² Ko ngaxin in manta jitjinga iko chóna noó tutée kao kunchee ko kain iko tjanga.

¹³ Ko tjume e kuin en ndo nichja naa ngisen ndachro:

—Pedro, taya, ton ía iko me e, ko inte ba.

¹⁴ Ko ndo Pedro juate e ndo:

—Nchána. Jan an nai a ine nge e tjúa i.

¹⁵ Ko ndo ángel nichja íjngo ko ndachro ndo:

—Ti ó juinchetjúa ndo Dio, ndachro a ixi tjúa i.

¹⁶ Níi kon en jaña ko tjume e tuinxin sakjui manta ngajni.

¹⁷ Tjume e ndo Pedro xraxaon ndo nge e xrondachro ti bikon ndo, tuinxin xi xruan an ndo Cornelio kuiji xa ngandangi nduja nchia me e ko tsijanchangi xa ti no jii ndo a ndo Simón.

¹⁸ Tjume e séen juanchangi xa:

—¿Á nti i jii ndo Simón kaxon ndatin in Pedro?

¹⁹ Xra jixraxaon ndo Pedro nge e bikon ndo, ko Espíritue ndo Dio ndachro:

—Tsje é ó kuiji níi sen tjanchangi ixi ja a.

²⁰ Taya, xingajian ko satiko a xa ko ta ia juachjaon, ixi jan an xruan an sen ña ngajian.

²¹ Tjume e xingajin ndo Pedro ti ste xa ko ndachro ndo:

—Jan an Pedrona. ¿Inge e tjéxinntana?

²² Ko juate e xa:

—Kuetuan an ndo capitán Cornelio jui ina nti i. Je e ndo naa ni tsango jian ko xraxaon ndo ndo Dio. Kain ni judío chónde e na ndo juasaya ko tjue e na ndo. Naa ndo ángel tsixrúa an ndo Dio nichje e ndo ko chronga ndo ángel ixi xrojuirua ananta ixi itsjinta ndo a ndo ko tsin en ndo nge e xrondachrona.

²³ Ko ndo Pedro ndachro ixi chao tsitu e xa nti a tiie me e. Ko ndúyaxin sabikao xa ndo Pedro kaxon kaxin ni titikaon Ncháina ste tjajna Jope.

²⁴ Tjume e inaa nchakon kuiji sen tjajna Cesarea. Nti a jichón en ndo Cornelio ko kaxon kain ni ndo a ndo ko ni chúxin ndo tsikiye e ndo.

* **10:6 ndachaon** mar

²⁵ Ko nchakon kuiji ndo Pedro ndo a ndo Cornelio, tjume e ndo Cornelio kuachrjexin ndo nchia ko nichje e kichuu ndo. Ko bake exin ntatuchi in ndo Cornelio ngajin ndo Pedro ixi tjaun ndo xrokuajon ndo juasaya ngajin ndo Pedro.

²⁶ Tjume e ndo Pedro juinchengatjen ndo ndo Cornelio ko ndachro ndo:

—Tingatjen. Takexin a ntatuchi ian. Jan an naa chujni xranchi ja a.

²⁷ Ko jitjao kichuu sen kuixin in sen ndo a ndo Cornelio ko bikon ndo Pedro ixi kueya na ste na nti a.

²⁸ Ko ndachro ndo Pedro:

—Ja anta no anta ixi jan anna xro judíona jua i tsjentona chujni je a judío ko chonda ina juachaxin tsixin inna ndo a ni me e. Ko je e ndo Dio juako na ndo ixi jua i xrondachrjan tjúa i ngixe i chujni.

²⁹ Méxin, nchakon kuiya nanta, tuinxin jui i. Tja on tsonóna sonda kuiya nantana.

³⁰ Tjume e juate e ndo Cornelio ko ndachro ndo:

—Ó kuatsinga noó nchakon, xranchi hora i nti i ritjén nía rintakatseña o jinta ko rinichja a ndo Dio. Ko tuinxin bikon naa ngisen jiyá manta tjúa jitóngíxin.

³¹ Ndachro sen me e: “Cornelio, ó kuin en ndo Dio nge e nichje é ndo ko ó no e ndo ixi tsango tingijna ni nóa.

³² Méxin, tetuen én naa ngisen satsji tjajna Jope ixi tsika o sen ndo Simón kaxon ndatin in Pedro. Jii ndo ndo a naa xi kaxon ndatin in xa Simón chjée xroan tjue é iko ko tjenka ndachaon jii ndo a xa”, ichro ndo ángel me e.

³³ Méxin, jaña tuinxin kuituan an ngisen kuiya a. Jian juinche e ixi jui ia nía. Ko jai ó no e ndo Dio ixi kain jan anna tja onna tsin anna nge e kuetuan an Ncháina Dio xrochronga ngajinna.

Ndo Pedro juinchekuen en ndo ndo Cornelio chijnie ndo Dio

³⁴ Tjume e ndachro ndo Pedro:

—Jai ó tianxin ixi ndo Dio xraje o tjue e ndo Dio kain chujni,

³⁵ ixi je e ndo tayé e ndo kain sen ngixe i tjajna titikaon ko tajon sen juasaya ngajin ndo.

³⁶ Ndo Dio nichje e ndo sen tjajna Israel ko kuin en sen chijni tajon juaxruxin chronga Ncháina Jesucristo. Je e ndo Nchée kain chujni.

³⁷ Ja anta ó no anta jian kain nge e tsikon en nchijí ti ste ni judío xrangíxinín nunte Galilea nchakon ndachro ndo Juan xrokonda tsikitée kain chujni.

³⁸ Ja anta ó no anta ixi ndo Dio kuajon ndo juachaxien Espíritue ndo kuayé e ndo Jesús, ndo tsiki xín tjajna Nazaret ko ó no anta kaxon ixi ndo Jesús jian juinche e ndo ko juinchexruen en ndo kain ni tangi ste kondeexin Xixron anxrée. Jaña jian juinche e ndo Jesús ixi ndo Dio jii ngajin ndo.

³⁹ Tjume e jan anna nduaxin bikona kain nge e juinche e ndo Jesús nunte Judea ko tjajna Jerusalén. Tjume e juankanito na ndo ntacru ko naakóñaxón na ndo.

⁴⁰ Tjume e ndo Dio juinchexechón ndo ndo Jesús nchakon nínxin ko kuajon ndo juachaxin bikona ndo íjngo.

⁴¹ Je a kain chujni bikon na ndo. Je o sen kuinche e ndo Dio ixi tsikon sen nduaxin xechón ndo. Jan anna juinekianna ndo ko kuikiana ndo nchakon xechón ndo.

⁴² Kuituan an ndo ixi jan anna sintakuan anna ko xrochra ngana ixi je e ndo sinchéña ndo ijie ngajin kain chujni, ni stechón ko ni tsiken en.

⁴³ Kain sen chronga chijnie ndo Dio chronga sen ixi ngujngu chujni titikaon ndo Jesús, sen me e sinchemé e ndo jíee sen.

Ni je a tjajna judío kuayé e na Espíritue ndo Dio

⁴⁴ Xrajnichja ndo Pedro, tjume e kain ni jitin en nge e juako ndo kuayé e na Espíritue ndo Dio.

⁴⁵ Tjume e sen judío tsikika o ndo Pedro xronka sen ixi ndo Dio kuajon Espíritue ndo, kuayé e sen je a judío.

⁴⁶ Méxin, kuin en sen judío jinichja ndo Cornelio ko sen jikao ndo jée ngigua ko stetajon sen juasaya† ngajin ndo Dio.

⁴⁷ Tjume e ndachro ndo Pedro:

—Sen ji i ó kuayé e sen Espíritue ndo Dio xranchi kuayé e jaina. Jai ó chao tsikitée sen.

⁴⁸ Tjume e kuetuan an ndo Pedro tsikitée kain sen ixi juachaxien ndo Jesucristo. Ko sen bikitée juanchia sen tsitu e ndo Pedro nti a kaxin nchakon.

11

Nichja ndo Pedro ngajin sen Jerusalén

¹ Tjume e sen kuinche e Ncháina Jesús ko kain sen titikaon Ncháina ste nunte Judea, sen me e kuin en sen ixi ni je a judío ó titikaon na chijnie ndo Dio.

² Ko nchakon ikjan ndo Pedro tjajna Jerusalén kaxin sen ste nti a tjaun sen ixi kain sen xrochóna sen chji e ni judío, ko tjakaxin sen ndo Pedro.

³ Juanchangi e sen ndo ko ndachro sen:

—¿Sonda ikjuinta kuitsje enta ni je a judío, ko juinekuunta na?

⁴ Ko ndo Pedro kuaxi chronga ndo kain nge e tsikon en ko ndachro ndo:

⁵ —Jan an bake e tjajna Jope rinichja a ndo Dio ko tuinxin bikon naa manta ijié xingajinxin ngajni. Jixrite e kanoó ikon manta ko kuji manta ti ritjén jan an.

⁶ Tjume e tsja a jian ko bikon ngaya manta jitjinga iko chóna noó tutée, ko jie e, kao kunchee ko kain ko tjanga.

⁷ Kaxon kujn an té naa ngisen ndachijina: “Pedro, taya ton iá iko me e ko inte.”

⁸ Ko juata a: “Na i, Ncháina. Nai a ine jan an ninaa nge e tjúa i.”

⁹ Ko íjngo nichja tée kuixin ngajni ko ndachro: “Ti nge e juinchetjúa ndo Dio ndachro a ja a ixi tjúa i.”

¹⁰ Jaña kon en nínxin. Ko tjume e kain ji in ikjan ngajni.

¹¹ Ko tuinxin ní xi kuiji nchia ritjén. Tsiki xin xa tjajna Cesarea ko tjéena xa.

¹² Ko Espíritue ndo Dio kuetuanna chao tsiki an xa ko kaxon biki an ikjaon sen kichuuna. Kainna kuixi inna ndo a naa ndo ndatin in Cornelio.

¹³ Tjume e ndo Cornelio chronga ndo ixi bikon ndo naa ndo ángel siin, ja in nichja: “Tetuen én ngisen satsji tjajna Jope tsika o sen naa ndo ndatin in Simón ko kaxon ndatin in Pedro.

¹⁴ Je e ndo xrochronga ndo xranchi ja anta ko kain sen ndointa xrochondanta juachaxin tsarichonnta kain nchakon.”

¹⁵ Tjume e jan an kuaxi nichja a sen ko tuinxin kuayé e sen Espíritue ndo Dio xranchi kuayé e jaina seno.

¹⁶ *Tjume e xraxa on ti kuanichja Ncháina Jesús, ti kuandachro ndo: “Nduaxin ndo Juan je o inda bikitéexin ndo chujni, ko jai ja anta tsaye enta Espíritue ndo Dio.”

¹⁷ Xranchi jan anna nchakon kuaxi kuitikaonna Ncháina Jesucristo, tjume e kuajon ndo Dio Espíritue ndo kuaye ena, jaña jai kuajon ndo Dio Espíritue ndo kuayé e sen ji in. ¿Ngisen jan an ixi xrokuitikaon a nge e juinche e ndo Dio?

¹⁸ Tjume e sen kichuuna, sen ste tjajna Jerusalén, kuin en sen nge e tsikon en ko tenko sen ko kuajon sen juasaya ngajin ndo Dio ko ndachro sen:

—Kuajon ndo Dio juachaxin kaxon ngajin ni je a judío ixi tsayé e na juachaxin tsitikaon na ndo Dio ko xrochóna na juachaxin tsechón na kain nchakon.

Ni ngo tjajna Antioquía

† 10:46 *juasaya* respeto, honor 11:16 Hch. 1:5.

¹⁹ *Nchakon naakóñaxón na ndo Esteban, kuaxi na rué e na ko ningakon en na sen titikaon Ncháina Jesucristo. Xrokonda sakjui sen nunte Fenicia ko Chipre, ko tjajna Antioquía. Nti a juinçekuen en sen je o ni judío chijni jian.

²⁰ Tjume e ikaxin sen titikaon Ncháina tsiki xin sen tjajna Chipre ko kaxin sen tjajna Cirene sakjui sen tjajna Antioquía ko nchakon kuiji sen nti a juinçekuen en sen ni je a judío chijni jian ne e Ncháina Jesucristo.

²¹ Juachaxien Ncháina Jesús chonda sen; méxin, kueya ni nti a kuayé e na chijni jian ko kuitikaon na Ncháina Jesucristo.

²² Ko tjume e sen titikaon Ncháina Jesús tjajna Jerusalén kuin en sen nge e tsikon en tjajna Antioquía ko xruan an sen ndo Bernabé nti a.

²³ Ko nchakon kuiji ndo Bernabé bikon ndo xranchi ndo Dio tsango bingijna ndo ni nti a kaxon. Ko tsango bake e juaxruxin aséen ndo. Tjume e nichje e ndo na ixi nchijí aséen na tsitikaon na Ncháina ko soji tsake e na.

²⁴ Ixi ndo Bernabé me e naa ngisen tsango jian aséen ko chóna ndo juachaxien Espíritue ndo Dio ko jian chuntia* ndo ndo Jesús; méxin, kueya na kuitikaon na Ncháina Jesús.

²⁵ Tjume e ndo Bernabé sakjui ndo tjajna Tarso bijée ndo ndo Saulo.

²⁶ Nchakon kuitja ndo ndo Saulo, sakjui sen tjajna Antioquía. Ko bake e sen ngajin sen titikaon Ncháina nchijí naa nano ko juinçekuen en sen itsjé chujni. Méxin nti a xrangixixín kuiye e na sen titikaon ndo Cristo: “sen Cristiano.”

²⁷ Tjume e kaxin sen chronga sen chijnie ndo Dio sajuixin sen tjajna Jerusalén ko kuiji sen tjajna Antioquía.

²⁸ *Naa ndo ndatin in Agabo kuixin ndo ti tsixra o sen titikaon ndo Jesús ko ixi juachaxien Espíritue ndo Dio chronga ndo ixi tsii jinta nchijí nunte nti a. Ko ti chronga ndo nduaxin kon en nchakon baketuan an naa xi ndatin in Claudio.

²⁹ Ko tjume e sen titikaon Ncháina tjajna Antioquía xraxaon sen ixi je e sen tsingijna sen sen titikaon ndo Cristo jii nunte Judea. Ko ngujngu sen kuajon sen nge e kuachóna sen.

³⁰ Jaña xraxaon sen ko kuajon sen tomi sabikao ndo Bernabé ko ndo Saulo xrokuayé e sen tituan an ni ngo nunte Judea.

12

Kuen en ndo Jacobo, ko xraxin in na ndo Pedro ndo ndo achjiso

¹ Nchakon me e xi rey Herodes kuaxi xa bengi xa sen titikaon ndo Jesús ixi tjaun xa xrotsé xa sen.

² Ko kuetuan an xa tsenxin ndo Jacobo ixi chika espada, ndo Jacobo me e ndo kichuu ndo Juan.

³ Ko bikon xi Herodes ixi juinche e ni judío juaxruxin ixi kuen en ndo Jacobo, me e itsé xa ndo Pedro. Ji i kon en nchakon kia Pascua ti ine na nutja chóna i nge e nchetja in nio.

⁴ Itsé xi Herodes ndo Pedro ko xraxin in xa ndo ndo achjiso. Ko nti a jii noó grupo xi soldado ko jii noó xi soldado ngujngu grupo. Jixraxaon xi Herodes ixi tsatsingaja kia pascua, tsantsje xa ndo Pedro ixi tsikon nchijí tjajna israelita xranchi tsen en ndo.

⁵ Xrají ndo Pedro ngaxin in ndo achjiso ko jindaa xi soldado ndo, ko kain sen titikaon Ncháina jinichje e sen ndo Dio ixi tsingijna ndo ndo Pedro.

Ndo Dio bingijna ndo ndo Pedro

⁶ Tiie me e xraxaon xi Herodes ixi ndúyaxin tsantsje xa ndo Pedro tsjako xa ndo ngajin ni tjajna. Ko ndo Pedro jijua ndo ngusine yuu xi soldado ko jichroaxin ndo yuu chika cadena. Ko ikaxin xa jindaa xa ntachja ndo achjiso.

⁷ Ko tuinxin konoxin naa ndo ángel ne e Ncháina, ko ngaxin in ndo achjiso tsango kongíxin ko bake e ndo ángel itja ndo chjiyée ndo Pedro me e xingame e ndo. Ko ndachro ndo ángel:

—Taka xingama a.

Ko tjume e chika cadena jitséxin itja ndo Pedro kue e chika nunte.

⁸ Ko kuetuan an ndo ángel:

—Taritsía ko takée kateá.

Ko kuitikaon ndo Pedro me e ndachro ndo ángel íjngo:

—Taritsía noxráa ko ruana na sachjina.

⁹ Ko tjume e ndo Pedro rué e ndo ndo ángel ko noe a ndo á nduaxin jaña jiton en o je o naa nge e jitikon ndo.

¹⁰ Ko juexin kuatsinga sen ti ste xi sa ó stendáa ko kuatsinga sen ti ste xi yuxin stendáa. Tjume e kuiji sen ti jii ntachja chika ijié tjenka cha o. Ko ntachja chika je o ntachja xitje e ntachja ko kuachrje sen ko kuatsinga sen naa cha o ko tuinxin ndo Pedro í bikon a ndo ndo ángel je o ndo kuitu e ndo.

¹¹ Ko tjume e ndo Pedro kono e ndo ixi nduaxin kon en ji i ko ndachro ndo:

—Ó nóna jai ixi nduaxin Ncháina tsixrua an naa ndo ángel ixi tsingijnana ndo ixi tsóña ina xi Herodes ko xruan an nge e tsónna xranchi tjaun ni judío.

¹² Ko jixraxaon ndo nge e kon en ndo, me e sakjui ndo ndo a jan María, janée ndo Juan, kaxon nchekin in sen Marcos. Nti a tsixra o itsjé sen titikaon ndo Jesús ko stenichje e sen ndo Dio.

¹³ Ko binga ndo ntachja cha o ko nichja ndo. Ko naa nchrichajan ndatin in Rode kuachrje nchrichan kuitsje e nchrichan ngisen kuii.

¹⁴ Ko hora juatsuan nchrichan nichja ndo Pedro, tjume e taka i kuantje e nchrichan ntachja ixi tsango ché e nchrichan. Ko binga nchrichan sakjuichronga nchrichan ixi ngandangi nduja nchia jii ndo Pedro.

¹⁵ Ko ndachro sen:

—Tsijinchetjáña jáa.

Ko je e nchrichan ndachro:

—Nduaxin je e ndo Pedro —ichro nchrichan.

Ko je e sen ndachro sen:

—Je a je e ndo. Je o espíritue ndo.

¹⁶ Ko ndo Pedro ícha jitinga ndo ntachja ko hora kuantje e sen ntachja bikon sen ndo ko xronka sen.

¹⁷ Ko tjume e juakoxin ndo Pedro itja ndo ixi xrotenko sen ixi chronga ndo xranchi Ncháina kuantsjexin ndo ndo ndo achjiso. Ko ndachro ndo:

—Teki énta ndo Jacobo ko kain sen kichuuna nge e kónna —ichro ndo ko tjume e sakjui ndo jée tjajna.

¹⁸ Ko ndúyaxin tsango xrakon xi soldado ixi noe a xa ti no satsikji ndo Pedro.

¹⁹ Ko xi Herodes kuetuen en xa xi soldado satsijée xa ndo Pedro, ko kuitja i xa ndo, ko xi Herodes juankata a xa xi soldado ijié ko kuetuan an xa ixi tsen en xi soldado. Ko tjume e xi Herodes kuachrjexin xa nunte Judea ko sakjui xa tjajna Cesarea ko nti a bake e xa.

Kuen en xi Herodes

²⁰ Xi Herodes ningakon en xa ni tjajna Tiro ko tjajna Sidón. Ko je e na juao kichuu na ixi satsjitsje e na xa. Nti a jii naa xi ndatin in Blasto ko kuayakon en xa ndo a xi Herodes, ko tjume e juanche e na xa xronichjaxin xa na ngajin xi tetuan an. Ko juanchia na ixi tsetokau a xi Herodes je e na ixi tjajnée xa ti xin nge e ine na.

²¹ Tjume e xi Herodes ndache xa nã ixi xroxra o nã naa nchakon. Ko je e xa kuéyá xa manta chaxro tsje e ko tjintee ko kueta a xa ntaxitaon ne e chujni tetuan an. Ko tjume e kuaxi xa nichje e xa kain ni tsixra o nti a.

²² Ko tjume e kuaxi nã kuyako nã, ko ndachro nã:

—Je a chujni jinichja! Naa dio jinichja.

²³ Tjume e tuinxin naa ndo ángel ne e ndo Dio juincheni e xi Herodes ixi kuajon a xa juasaya ngajin ndo Dio. Ko kutsindo juine ngaya tse e xa ko ndakuen en xa.

²⁴ Ko itsjé nã kuin en nã chijnie ndo Dio nguixin nti a ko konkueya ni kuitikaon Ncháina Jesús.

²⁵ Ko ndo Bernabé ko ndo Saulo ó juinchejexin ixrã kuachóna sen tjajna Jerusalén, tjume e ikjan sen tjajna Antioquía ko sabikao sen ndo Juan, ndo kaxon nchekin in sen Marcos.

13

Xruan an sen ndo Pablo ko ndo Bernabé

¹ Ni ngo Antioquía ste sen nichja chijnie ndo Dio. Sen me e ndo Bernabé ko ndo Simón, kaxon nchekin in nã ndo Negro, ndo Lucio, ndo tjajna Cirene, ndo Manaén, naa ndo tsikajikao xi Herodes, xi tetuan an nunte Galilea, ko ndo Saulo.

² Naa nchakon tsixra o sen tsajon sen juasaya ngajin ndo Dio, nchakon me e tsijinchekatse ñao sen jinta. Tjume e Espíritue ndo Dio ndache ndo sen:

—Tantsjendáanantana ndo Bernabé ko ndo Saulo ixi jan an ó kuincha a sen xrotjá a sen naa ixrã sinche e sen.

³ Ko juexin nichje e sen ndo Dio ko juinchekatse ñao sen jinta, bake e itja sen ngata a jaa sen me e ko ndachro sen ixi chao satsji sen.

Ndo Pablo ko ndo Bernabé ste sen nunte Chipre

⁴ Ko tjume e Espíritue ndo Dio xruan an ndo Bernabé ko ndo Saulo sakjui sen tjajna Seleucia. Ko nti a kuajin in sen naa ntábarco ko sakjui sen nunte Chipre.

⁵ Ko kuiji sen naa tjajna ndatin in Salamina ngande e nda, nti a xingajinxin sen ntábarco ko nti a juangíxin sen juako sen chijnie ndo Dio ningue ni judío. Kaxon bikao sen ndo Juan ixi tsingijna ndo sen.

⁶ Ko tjume e sakjui sen nchijí nunte Chipre kuijija sen tjajna Pafos. Nti a kuetan sen naa xi tuso, xi me e naa xi judío ndatin in Barjesús. Je e xa ncheya xa ixi ndachro xa kaxon nichja xa chijnie ndo Dio.

⁷ Ko xi me e bakekao xa xi tetuan an ndatin in Sergio Paulo. Ko je e xi tetuan an tsango jian xraxaon xa, me e kuiye e xa ndo Bernabé ko ndo Saulo ixi je e xa tjaun xa tsin en xa chijnie ndo Dio.

⁸ Tjume e xi tuso, kaxon ndatin in xa Elimas, ningakon en xa sen tjako chijnie ndo Dio ixi tjaun a xa ixi xi tetuan an xrochuntia xa ndo Dio.

⁹ Tjume e ndo Saulo, kaxon nchekin in nã Pablo, tsango chóna ndo Espíritue ndo Dio. Ko jian tsje e ndo xi tuso

¹⁰ ko ndachro ndo:

—Ja a naa chujni ncheya, chjen en Xixron anxrée ja a, ningakon en kain nge e jian. ¿Sonda nchetjáñajian chujni ixi tjaun a tsitikaon nã Ncháina Jesús?

¹¹ Jai tangi tson an. Tsontakutsian ko kaxin nchakon tsikon a chjiixrué nchakon.

Ko tuinxin xi Elimas í bikon a xa ko jué e xa naa ngisen tsingatse e xa ko satsikao nã xa ixi ítikon a xa.

¹² Tjume e jaña bikon xi tetuan an nge e kon en ko kuaxi kuitikaon xa Ncháina ixi bake e xa juaxruxin ti juako sen ngajin xa.

Ndo Pablo ko ndo Bernabé ste sen nunte Pisidia

¹³ Tjume e ndo Pablo ko sen chrikao ndo sajuixin sen tjajna Pafos. Kuixin in sen naa ntábarco sakjui sen ko kuiji sen tjajna Perge nunte Panfilia. Ko ndo Juan Marcos kuintu e ndo sen ko ikjan ndo tjajna Jerusalén.

¹⁴ Tjume e sajuixin ndo Pablo ko ndo Bernabé tjajna Perge ko kuiji sen tjajna Antioquía tjenka tjajna Pisidia. Ko nchakon tjoké e sen kuixin in sen ningue ni judío ko nti a bake e sen.

¹⁵ Ko juexin juinchekuanxin sen xroon jitaxin ley ko nge e tsikjin sen kuachronga chijnie ndo Dio ó sa ó, tjume e ni tetuan an ni ngo kuiye e na sen tjako ko ndachro na:

—Kichianna siá chondanta nge e xrochronganta ixi ícha tsake ena juaxruxin, ndachronta, jai tsin anna.

¹⁶ Ko tjume e ndo Pablo bingatjen ndo ko itja ndo juanchiixin ixi xrotenko sen. Ko ndachro ndo:

—Tin ennta ja anta sen israelita ko kaxon tin ennta ja anta ti tsikixinnta jée tjajna ko ja anta sen titikaonnta ndo Dio.

¹⁷ Ndo Dio titikaon sen tjajna Israel kuinche e ndo sen tachrí ina. Ko tjume e ndo Dio kuajon ndo juachaxin ixi konkueya sen ti xrabake e sen tjajna Egipto. Xranchi ngisen tsiki xín inaa tjajna jaña bake e sen nti a ko juachaxien ndo Dio bingijna sen kuachrxjexin sen nunte Egipto.

¹⁸ Ndo Dio bingijna ndo sen yuu kán nano bake e sen ntajie nchese.

¹⁹ Ko tjume e juinchetjáña ndo yaato tjajna ti bake e nunte Canaán, ixi sen tsikachrjenixinna xrokuayé e sen nunte me e.

²⁰ Ko kain nano bake e sen nti a xranchi cuatrociento cincuenta nano. Ko tjume e ndo Dio baketuen en ndo sen ixi kaxin xi bancheña ijie ti kuijija ndo Samuel, naa ndo kuachronga chijnie ndo Dio.

²¹ Tjume e juanchia sen israelita naa ndo rey tsetuen en sen. Ko ndo Dio kuinche e ndo ndo Saúl, kuetuan an ndo yuu kán nano. Ko ndotée ndo Saúl, ndo Cis, ko kuachrxjenixin ndo ndo Benjamín.

²² Tjume e ndo Dio kuantsje e ndo ndo Saúl ti ixra rey kuachónnda ndo ko ndo David kuayé e ti xra rey me e. Ko ndachro ndo Dio: “Ó kuitja ndo David, chjen en ndo Isaí. Je e ndo naa ngisen chjana jíe juaxruxin ko titikaon ndo kain nge e tja on.”

²³ Ndo Jesús me e naa chujni kuachrxjenixin ndo David ko ndo Dio xruan an ndo ixi je e ndo sinchemé e ndo jíee sen israelita xranchi tsindachro ndo.

²⁴ *Xrati a ndo Jesús, ndo Juan bajako ndo chijni jian ngajin ni israelita ko ndachro ndo ixi xrokjan na tsitikaon na ndo Dio, tjume e tsikitée na.

²⁵ *Ko ó xrokuiji nchakon xrokuen en ndo Juan, me e ndachro ndo: “Jan an je a ngisen xraxaon ja anta ixi tjume e tsii inaa ngisen ko jan an chonda i juachaxin tsoxindanga tjuée katée ndo ixi je e ndo ícha tetuan an ndo ixi najan an.”

²⁶ 'Ja anta kichianna tsikachrjenixinnta ndo Abraham tin ennta, ko kainnta ni tsiki xín ikjín titikaonnta ndo Dio, tin ennta chijnie ndo ixi sinchemé e ndo ti ndako a juinche enta.

²⁷ Méxin, ni ste tjajna Jerusalén ko ni tetuan an nti a konoe a na ngisen ndo Jesús ko kuienxin a na nge e tsikjin sen kuachronga chijnie ndo Dio ó sa ó ti juinchekuanxin na xroon ngaxin in ni ngo ngujngu nchakon tjoké e na. Jaña je e na, nchakon tangi juinchekao na ndo Jesús, tsijinche e na xranchi nichja xroon.

²⁸ *Ko maski kuitja i na xrojan nge e ndako a juinche e ndo Jesús juanche e na xi Pilato ixi tsetuan an xa tsen en ndo.

²⁹ *Ko nchakon juexin kon en kain ji i, tjume e sen kuitikaon ndo Jesús juinchenganjinxin sen cuerpoe ndo ntacru ko juabaa sen ndo.

³⁰ Ko ndo Dio juinchexechón ndo ndo Jesús íjngo.

³¹ *Ko itsjé nchakon bikon sen ndo Jesús, sen chrikao ndo nchakon kuixin sen nunte Galilea sakjui sen tjajna Jerusalén. Ko jai sen me e nichja sen xranchi juako ndo Jesús ko nchekuen en sen itsjé chujni.

³² 'Jai jan anna tjakona chijni jian, nge e tsikajon ndo Dio kuayé e sen tsikachrjenix-inna ó sa ó.

³³ Jaña kon en, jan anna kuayá ana xranchi tsindachro ndo Dio tsayé e sen tsachrjenixin sen bake e sa ó. Tjume e ndo Dio juinchexechón ndo ndo Jesús xranchi nichja xroon Salmo yuxin ko ndachro: “Ja anta chjan na, jan an tjá anta juachaxin tsarichonnta.”

³⁴ Ko tsindachro ndo Dio ixi sinchexechón ndo ndo Jesús ixi cuerpoe ndo xrorenga i. Jaña chronga xroon chijnie ndo Dio, ndachro: “Jan an tsajon nge e jian ngajin ndo David.”

³⁵ Ko inaa Salmo ndachro ja in: “Ja anta tsintue anta xrorenga cuerpoe ndo tsango tjúá.”

³⁶ Ko ndo David kuitikaon ndo xranchi tsiketuan an ndo Dio nchakon bake e ndo ko tjume e kuen en ndo ko tsixrabaa ndo, jaña kuaxrabaa ni tsikachrjenixinna ko renga cuerpoe ndo.

³⁷ Ko cuerpoe ndo juinchexechón ndo Dio renga i.

³⁸ Méxin, kichianna, xrokonda tsono anta xranchi tsumé e jíanta ixi ndo Jesús me e kuenxin ndo ixi ja anta.

³⁹ Tjume e kain sen titikaon ndo Jesús ó juinchetjúá ndo aséen sen ixi ley kuetuan an ndo Moisés chóna i juachaxin tsantsjen jíee sen.

⁴⁰ Tsje enta jian ixi tsuan inta xranchi tsikjin sen kuachronga chijnie ndo Dio ó sa ó:

⁴¹ Tsje e ja anta ti tjanonta ko titikaon anta.

Jai xronkanta ko satinganta ixi nge e tson en

ixi jan an ndo Dio tsjáko naa ixra *ijié** jai

ko ja anta tsitikaon anta maski inaa ngisen xrontatjunta.

⁴² Tjume e ndo Pablo ko sen chrikao ndo kuachrjexin sen ni ngo, ko ni je a judío juanche e na ndo ixi xrokjan sen nchakon íjngo tjoké e na ixi ícha xrojuinchekuen en ndo na.

⁴³ Nchakon juexin sajuixin sen ni ngo, tjume e kueya ni judío ko ni je a judío, ni baktikaon xranchi ni judío ko baxraxaon na ndo Dio, tsango bake e na juaxruxin ixi nge e juako ndo Pablo ko ndo Bernabé ko rué e na sen. Ko je e sen kuetuan an sen ixi ícha jian tsitikaon na ndo Dio ixi je e ndo tsango tjue e ndo na.

⁴⁴ Tjume e inaa semana nchakon tjoké e na, xra o kain ni jii tjajna nti a ixi tjaun na tsin en na chijnie ndo Dio.

⁴⁵ Ko bikon ni judío ixi kueya na tsixra o na, ko tsango kochjio na, tjume e kaxin na nichjangí e na ndo Pablo.

⁴⁶ Tjume e ndo Pablo ko ndo Bernabé soji nichja sen ko ndachro sen:

—Xrokonda sa ó ja anta ni judíonta xrokuin ennta chijnie ndo Dio. Ko ja anta tjaun anta tsin ennta nge e jian tsajon juachaxin tsechón chujni kain nchakon. Ko jai tsintu ananta ja anta ni judíonta ko satsjina sintakuan anna ni je a judío.

⁴⁷ Jaña tsiketuan an Ncháina:

Jan an bakéenta ja anta xranchi xro i tsingasáñaxin kain tjajna

ixi tsiku unta chijni tajon juachaxin tsechón chujni nguixin nunte.

⁴⁸ Tjume e kuin en ni je a judío ji in ko bake e na juaxruxin ko ndachro na ixi jian chijnie Ncháina Jesús.

Tjume e kuaxi kuitikaon kain ni tikinixin en xrochóna juachaxin tsechón kain nchakon.

⁴⁹ Ko jaña xrangíxin juinçekuen en sen nã chijnie Ncháina nchijí tjajna nti a.

⁵⁰ Ko tjume e ni judío nichje e nã kaxin nchri nche e jian ko ngajin xi tetuan an tjajna nti a ixi ndachro nã ndako a nche e ndo Pablo ko Bernabé ixi tsango toñaio e nã sen ko bengixin nã sen nti a.

⁵¹ *Ko je e sen kontsjenga sen katée sen, jaña juakoxin sen ixi je e nã ndako a xraxaon nã ixi je e sen. Tjume e sakjui sen tjajna Iconio.

⁵² Ko sen titikaon Ncháina Jesús tsango bake e sen juaxruxin ko ícha chóna sen juachaxien Espíritue ndo Dio.

14

Ndo Pablo ko ndo Bernabé ste sen tjajna Iconio

¹ Tjume e kuiji ndo Pablo ko ndo Bernabé tjajna Iconio ko kuixin in sen ningue sen judío ko nti a juinçekuen en sen chujni. Ko itsjé sen judío ko sen je a judío kuitikaon sen.

² Tjume e kaxin ni judío, ni kuitikaon a, kuaxi nã kuajon nã chijni ngajin ikaxin ni je a judío ixi xronichjangí e nã ndo Pablo ko ndo Bernabé.

³ Ko je e sen itsjé nchakon kuitu e sen nti a ko ícha chuntia sen Ncháina Jesús ko xronka i sen nichja sen chijnie ndo. Ko juachaxien ndo Jesús ícha bakingijna sen ixi nge e kuanichja sen xranchi ndo Dio tjue e ndo chujni, ko kuajon ndo juachaxin sinchexrjuen en sen chujni ko tsjako sen ijíe ixra.

⁴ Ko chujni tjajna nti a je a xraje o xraxaon nã. Kaxin nã kuitikaon nã ni judío ko ikaxin nã kuitikaon nã sen kuinche e Ncháina Jesús.

⁵ Ko tjume e ni judío ko ni je a judío xraxaon nã naakua naa nge e, kao xi tetuan an, ixi tjaun nã sinchexronka nã sen kuinche e ndo Jesús ko xrokuaxin nã sen ixro.

⁶ Ko ndo Pablo ko ndo Bernabé kono e sen nge e xraxaon nã, me e sakjui sen tjajna Listra ko tjajna Derbe nunte Licaonia ko nguixin no nti a

⁷ ko juako sen chijni jian ne e Ncháina Jesús.

Ni tjajna Listra tjanke e nã ndo Pablo ixro

⁸ Ko tjajna Listra jii naa xi xratsijongíexión xa jua i itji xa.

⁹ Xi me e jii xa nunte ko jitin en xa nge e juako ndo Pablo. Tjume e ndo Pablo jian jitsje e ndo xa ko kono e ndo ixi je e xa chuntia xa Ncháina ko chao xrokoxruen en xa.

¹⁰ Ko je e ndo Pablo séen ndache ndo xa:

—Tingatjen, ndako take é tutáa.

Ko tuinxin bingatjen xa ko chrinka xa, bake exin xa tutée xa ko chao kuaxi kuaji xa.

¹¹ Tjume e kain ni tjajna nti a bikon nã nge e juinche e ndo Pablo, ko kuaxi nã kuyako nã ixi ngigüe e ni Licaonia ko ndachro nã:

—Ndo Dio tsikjan chujni tsikí xin ngajní, steku una nti i.

¹² Ko je e nã juinçekin in nã ndo Bernabé dio Júpiter ko ndo Pablo dio Mercurio ixi ícha juako ndo chijni.

¹³ Ko xitaana ne e dio Júpiter chóna ni ngo ngande e tjajna ko bika o xa kuxinta ko itsjo, ko je e xa ko kain ni rué e xa tjaun nã xrokuajon nã juasaya ngajin ndo Pablo ko ndo Bernabé ko tjaun nã xrokóñe e nã sen kuxinta.

¹⁴ Ko ndo Pablo ko ndo Bernabé kono e sen nge e tjaun nã sinche e nã, me e kuinchje sen mantée sen ko juike e sen ngakjen en chujni ste nti a ko kuyako sen ndachro sen:

¹⁵ —¿Sonda nche enta ji i? Jan anna chujnina xranchi ja anta. Jan anna jui ina ixi sintakuan anna chijnie ndo Dio ko tintu enta kain nge e xro an tjintee ko ikjannta

tsitikaonnta ndo Dio, ndo jichón. Je e ndo juinchéña ndo ngajní ko nunte xasintajni* ko ndachaon ko kain nge e jii ngataon nche.

¹⁶ Sa ó ndo Dio kuintu e ndo chujni ixi sinche e na xranchi tjaun na.

¹⁷ Ko ndo Dio juako ndo ixi je e ndo tetuan an ndo ixi juinchéña ndo kain nge e jii. Je e ndo tetuan an ndo ixi tsij ichrin, me e tenga na ko jian toñe e na, ko kain nchakon je e ndo tajon ndo nge e sine na, ko je e ndo tajon ndo juachaxin juaxruxin ste na.

¹⁸ Maski jaña ichro ndo Pablo ko ndo Bernabé, je e na titikaon a na ixi tjaun na tsajon na juasaya ngajin sen ko xrokóñe e na sen kuxinta.

¹⁹ Tjume e kuij kaxin ni judío kuixin tjajna Antioquía ko tjajna Iconio. Nichje e na ni ste nti a ixi tsintu e na ti nge e tjako ndo Pablo ko ndo Bernabé, méxin kuaxi na ixro ndo Pablo. Ko xraxaon na kuen en ndo, me e bingakjin na ndo ngande e tjajna.

²⁰ Ko tjume e sen titikaon Ncháina Jesús xra o sen ngandajin ndo Pablo ko je e ndo bingatjen ndo ko ikjan ndo tjajna nti a íjngo. Ko ndúyaxin sabikao ndo Pablo ndo Bernabé tjajna Derbe.

²¹ Ko ó juexin chronga sen chijni jian ko juacha sen kueya na kuitikaon na Ncháina Jesús, tjume e ikjan sen tjajna Listra ko tjajna Iconio ko tjajna Antioquía.

²² Kain tjajna kuatsinga sen nichje e sen sen kuitikaon Ndo Jesús ko kuetuan an sen ixi soji xrochuntia sen Ncháina ko ndachro sen ixi siá tsixin inni ti tetuan an ndo Dio, xrokonda tangi tson enni.

²³ Ko ngujngu ni ngo kuinche e sen ngisen tsetuen en sen ti sen titikaon ndo Jesús ko nichje e sen ndo Dio ko juincheckatse ñao sen jinta ko tjume e ndache sen Ncháina ixi tsayakon en ndo sen kuitikaon je e ndo.

Ndo Pablo ko ndo Bernabé ikjan sen Antioquía

²⁴ Tjume e kuatsinga sen nunte Pisidia ko kuiji sen nunte Panfilia.

²⁵ Ko tjajna Perge juako sen chijnie Ncháina ko tjume e sakjui sen tjajna Atalia.

²⁶ Nti a kuixin in sen ntabarco ko sakjui sen tjajna Antioquía, tjajna me e tsinichje e sen ndo Dio ko tsijanchia sen ixi ndo Dio xrobingijna ndo sen ti ixra juinche e sen.

²⁷ Ko nchakon kuiji sen tjajna Antioquía xra o kain sen titikaon ndo Jesús ko kuaxi chronga ndo Pablo xranchi bingijna ndo Dio ngajin sen ko xranchi kuajon ndo Dio juachaxin sinchekuen en sen ni je a judío ixi kaxon xrochuntia na Ncháina Jesús.

²⁸ Ko ndo Pablo ko ndo Bernabé kuitu e sen ngajin sen titikaon Ncháina Jesús itsjé nchakon.

15

Xra o sen kuitekaon ndo Jesús tjajna Jerusalén

¹ Kaxin sen tsikj xin nunte Judea kuiji sen tjajna Antioquía. Kuaxi sen juincheckuen en sen sen kichuuna nti a ixi jua i tsumé e jíee sen siá chóna i sen chji e sen ti tsiketuan an ndo Moisés.

² Tjume e ndo Pablo ko ndo Bernabé ko je e sen judío kuaxi juakaxin kichuu sen. Méxin, juao sen ixi ndo Pablo ko ndo Bernabé ko ikaxin sen xrokuji sen tjajna Jerusalén. Nti a tsjao sen apóstol ko sen tetuan an ni ngo ixi á xrokonda xrochóna na chji e ti tsiketuan an ndo Moisés.

³ Jaña sen titikaon Ncháina tjajna Antioquía xruan an sen kichuu sen, ko tjume e kuatsinga sen nunte Fenicia ko nunte Samaria ko nti a chronga sen xranchi itsjé sen je a judío kuayé e sen chijnie ndo Dio. Ko kain sen kichuuna kuin en me e, tsango juaxruxin bake e sen.

⁴ Tjume e kuiji ndo Pablo ko ndo Bernabé tjajna Jerusalén ko sen titikaon Ncháina ko sen apóstol ko sen tetuan an ne e ni ngo kuajon sen juachaxin tsintee sen nti a. Ko chronga sen xranchi ndo Dio tsango bingijna ndo sen.

* 14:15 xasintajni mundo

⁵ Tjume e ikaxin ni fariseo tsikitikaon Ncháina Jesús bingatjen na ko ndachro na:

—Ni je a judío titikaon na Ncháina xrokonda tsa na chji e ni judío, ko xrokonda tsitikaon na nchijí ley tsiketuan an ndo Moisés.

⁶ Ko tjume e kain sen apóstol ko sen tetuan an ni ngo xra o sen ko xraxaon sen xranchi tson en ixi jaña ichro ikaxin sen judío.

⁷ *Sée juakaxin kichuu sen ko tjume e bingatjen ndo Pedro ndachro ndo:

—Ja anta kichuuna, ó no anta ixi seno ndo Dio kuinchena ndo jan an ixi tsjako ngajin kain ni je a judío ixi tsin en na chijni jian ne e ndo Cristo ko kaxon je e na tsitikaon na.

⁸ *Ndo Dio chúxin ndo aséen chujni, juako ndo ixi kuayé e ndo ni je a judío, me e kuajon ndo Espíritue ndo kuayé e na xranchi jaina.

⁹ Ndo Dio tikon ndo kain chujni naxraje o xranchi jaina. Ko juinchetjúá ndo aséen sen ixi ó chuntia sen Ncháina Jesús.

¹⁰ Méxin, ¿sonda titikaon anta nge e juinche e ndo Dio ko tetuen ennta na tsitikaon na kain ley tangi? Ko jaina ko sen tsikachrjenixinna jua i kuitikaon sen kain ji i.

¹¹ Ó noina ixi juasie Ncháina Jesús koméexin jéina ko kaxon jaña komé e jée sen je a judío, sen kuitikaon.

¹² Ko kain sen tsixra o tenko sen ko tjume e kuin en sen xranchi ndachro ndo Bernabé ko ndo Pablo ixi ndo Dio bingijna ndo sen juinche e sen itsjé ixra ijié, jaña bikon kaxon ni je a judío.

¹³ Juexin nichja ndo Pablo ko ndo Bernabé, tjume e kuaxi nichja ndo Jacobo ko ndachro ndo:

—Kichuuna, jian tin ennta nge e xrondachrjan.

¹⁴ Ndo Simón Pedro chronga ndo xranchi juako ndo Dio ixi tjue e ndo ni je a judío ko xranchi kuinche e ndo ikaxin na ixi tsitikaon na ndo.

¹⁵ Jaña nduaxin chronga xroon tsikjin sen kuachronga chijnie ndo Dio ó sa ó:

¹⁶ Jan an xrokjanna ixi sintakonchjian íjngo ni ngo tsichjejin ne e ndo David ko jan an tsingijna ixi tsetuan an naa sen ndo a ndo David.

¹⁷ Ixi kain na tsjéena na ko kaxon kain ni jée tjajna kuiya a na ixi tsitikaon na jan an.

¹⁸ Jan an ndo Dio, ndo ndachro sa ó tson en ji i.

¹⁹ Méxin, ndachrjan jan an ixi ni je a judío xrokonda i tsitikaon na nchijí ley ixi je e na ó kuintu e na nge e kuitikaon na sa ó.

²⁰ Méxin, xroxruen enna na naa xroon ixi sinchena ena sine a na ntao ti tikinixin en ídolo ko xrochóna i na inaa nchri je a nchrinchri e na ko sine a na ntau e iko tsikintji a jnié ko sine a na jnié ba.

²¹ Méxin, ngujngu tjajna jii ngisen chronga ley tsiketuan an ndo Moisés ngaxin in ni ngo ngujngu nchakon tjoké e na.

²² Tjume e kain sen kuinche e Ncháina Jesús ko sen tetuan an ni ngo ko kaxin sen titikaon Ncháina juao sen ixi kaxin sen satsji sen tjajna Antioquía. Ko sen itsji me e ndo Judas, ndo nchekin in sen Barsabás, ko ndo Silas, kayui sen jian titikaon sen, satsikao sen ndo Pablo ko ndo Bernabé.

²³ Ko ja in ndachro xroon tsikao sen:

“Jan anna, ni kuinche e Ncháina Jesús ko ni tetuan an ni ngo nti i nichja ananta ja anta kichuuna ni je a judío, ti stenta tjajna Antioquía ko nunte Siria ko nunte Cilicia, taye énta juajna.

²⁴ Ó nóna ixi ikaxin sen kichuuna tsikjxin tjajnanana maski kuachóna i sen juachaxin, kuiji sen juntaxronkanta sen ixi xrokonda tsaanta chji e ni judío ti tsiketuan an ndo Moisés.

²⁵ Tjume e juaona ixi kaxin sen ste nti i tsitsja anta sen, je e sen ko ndo Bernabé ko ndo Pablo, sen tsango tjua ana.

²⁶ Je e sen tsango tangi juinchekaon na sen ixi ti titikaon sen Ncháina Jesucristo.

²⁷ Méxin, xroxruan annanta ndo Judas ko ndo Silas ixi kaxon xronichja anta sen ko xrochronga sen kain ji i.

²⁸ Ixi Espíritue Dio jian bingijnana ko ja in juaona ixi tsitikaon anta nge e tsango tangi. Ko nti i jitaxin nge e xrokonda tsitikaonnta:

²⁹ Nte anta iko tikinixin en ngajin ídolo ko kaxon sinte anta jnié ba ko nte anta ntau e iko tsikintji a jnié ko kaxon xrochonda inta inaa nchri je a nchri anta. Titikaonnta kain ji in ko jaña chao tsintenta.”

³⁰ Ko tjume e je e sen sakjui sen tjajna Antioquía. Ko nchakon kuiji sen nti a xra o sen titikaon ndo Jesús ko je e sen kuajon sen xroon me e.

³¹ Ko nchakon juinchekuanxin sen kichuuna xroon me e, tsango juaxruxin bake e sen ixi nge e chronga xroon.

³² Tjume e ndo Judas ko ndo Silas kaxon chronga sen chijnie ndo Dio, ko nichja sen jian ko juaxruxin bake e sen kichuuna.

³³ Ko nti a kuintee sen kaxin nchakon, ko nchakon ó satsji sen, kain sen titikaon Ncháina Jesús jian nichje e kichuu sen ko ikjan sen ti no tsiki x̄in sen tjajna Jerusalén ti ste sen kichuu sen.

³⁴ Ko ndo Silas xraxaon ndo ixi nti ao xrokuitu e ndo.

³⁵ Ko kaxon ndo Pablo ko ndo Bernabé kuitu e sen tjajna Antioquía. Je e sen ko ikaxin sen juako sen ko chronga sen chijnie Ncháina Jesús.

Ndo Pablo sakjui ndo yuxin viaje

³⁶ Tjume e ndo Pablo nichje e ndo ndo Bernabé ko ndachro ndo:

—Ichjina titsje ena sen kichuuna ti kain tjajna juakona chijnie ndo Dio ó sa ó ixi tsonojna xranchi ste sen nti a.

³⁷ Ko ndo Bernabé kaxon tjaun ndo xrobikao sen ndo Juan, ndo kaxon nchekin in sen Marcos.

³⁸ *Ko ndo Pablo juinche a ndo juaxruxin ixi xrobikao sen ndo Juan Marcos ixi je e ndo juinche a ndo ixra, ixra juinche e sen nunte Panfilia.

³⁹ Méxin, je a naxraje o xraxaon sen, méxin chjeya sen. Ndo Bernabé sabikao ndo ndo Juan Marcos ko kuixin in sen inaa ntábarco sakjui sen nunte Chipre.

⁴⁰ Ko ndo Pablo kuinche e ndo ndo Silas satsikao ndo, ko sen kichuu sen nti a juanche e sen ndo Dio ixi jian tsingijna ndo sen ko jaña sakjui sen.

⁴¹ Tjume e kuatsinga sen nunte Siria ko nunte Cilicia ko jian nichje e sen sen titikaon Ncháina ni ngo nti a.

16

Ndo Timoteo sabikao ndo ndo Pablo ko ndo Silas

¹ Tjume e kuiji ndo Pablo tjajna Derbe ko tjajna Listra. Nti a bake e inaa ndo titikaon ndo Jesús ndatin in ndo Timoteo. Janée ndo naa nchri tjajna judío titikaon nchra Ncháina Jesús ko ndotée ndo naa xi tjajna griego.

² Sen kichuuna jii tjajna Listra ko tjajna Iconio nichja sen jian ixi ndo Timoteo.

³ Méxin, ndo Pablo tjaun ndo xrobikao ndo ndo Timoteo. Sa ó kuetuan an ndo ixi ndo Timoteo xrokua ndo chji e ni tjajna judío ixi xroningakuen a na ndo kain ni judío ti tjajna xrokjui sen ixi no e na ndotée ndo Timoteo naa xi griego.

⁴ Tjume e kuatsinga sen kain tjajna ko chronga sen nge e tsiketuan an sen apóstol ko sen tetuan an ni ngo tjajna Jerusalén.

⁵ Sen chuntia Ncháina ícha konsoji sen ko ngujngu nchakon ícha konkueya sen.

Juachaxien espíritue ndo Dio bikon ndo Pablo naa ngisen nunte Macedonia

⁶ Tjume e Espíritue ndo Dio kuajon a juachaxin tsjako sen chijnie ndo Dio nunte Asia, me e kuatsinga sen nunte Frigia ko nunte Galacia.

⁷ Ko nchakon kuiji sen nunte Misia xraxaon sen xrokjui sen nunte Bitinia. Ko Espíritue ndo Jesús kuajon a juachaxin satsji sen nti a.

⁸ Méxin, xrakuatsingako sen nunte Misia ko kuiji sen tjajna Troas ngande e ndachaon.

⁹ Ko naa tiie ixí juachaxien espíritue ndo Dio bikon ndo Pablo naa xi nunte Macedonia, siin xa jitinóatée xa ko ndachro xa: “Tatsinga nunte Macedonia ko tingijnana.”

¹⁰ Jaña tsikikon ndo Pablo, méxin tuinxin konchjianna ixí satsjina nunte Macedonia ixí jian nónana ixí ndo Dio kuetuan an ndo nti a tsjakona chijni jian xranchi tsumé e jíee na. [Jan an ndo Lucas ikjin xroon ji i sabiki an sen kaxon.]

Ndo Pablo ko ndo Silas bake e sen tjajna Filipos

¹¹ Tjume e nti a tjajna Troas kuixi inna inaa ntábarco ko xrajuikona naa nunte nchíin ngataon inda ndatin in Samotracia. Ko ndúyaxin juasona tjajna Neápolis.

¹² Nti a sajuixinna ko juasona tjajna Filipos. Tjajna me e tetuan an ni romano, ko tjajna me e naa tjajna ícha tjintee ixí ikaxin tjajna nunte Macedonia. Nti a kuinteena kaxin nchakon.

¹³ Ko nchakon tjoké e ni israelita kuachrxexinna tjajna Filipos ko sakjuina ngande e ndarío ko nti a nanaunka xra o na nichje e na ndo Dio. Me e nti a kuinteena nunte ko kuaxina juntakuan anna kaxin nchri ste nti a.

¹⁴ Ko nti a jii naa nchri ndatin in Lidia tsikí xín tjajna Tiatira. Je e nchra nchekji nchra manta chaxro játse tiie. Ko je e nchra xraxaon nchra ndo Dio ko jitin en nchra nge e tjako ndo Pablo ko Ncháina bingijna nchra ixí tsienxin nchra jian chijnie ndo Dio.

¹⁵ Je e nchra ko kain ni ndo a nchra bikitée na. Tjume e kuinóatée nchra ngajin ndo Pablo ko ndachro nchra:

—Siá titikaonnta ixí nduaxin titika onna Ncháina, tituan anta nía nti i.

Ko kuitunana nti a.

¹⁶ Tjume e inaa nchakon sakjuina ti no nichje e sen ndo Dio ko kuetanna naa nchrichajan chónnda nchrichan espíritue Xixron anxrée tonuexin nchrichan kaxin nge e ko jii naa ngisen tetuen en nchrichan ko kueya tomi tjacha ni me e ixí ti chronga nchrichan.

¹⁷ Ko nchrichajan me e kuaxi nchrichan rué e nchrichan ndo Pablo ko jan anna ko tjume e séen nichja nchrichan:

—Sen ji i nche e sen xrée ndo Dio jii ngajni ko tjako sen cha o tsechónxin chujni.

¹⁸ Jaña juinche e nchrichan itsjé nchakon. Tjume e tsango koña ndo Pablo ko ngatjia ndo nichje e ndo espíritue Xixron anxrée chónnda nchrichan, ko ndachro ndo:

—Juachaxien nombrée ndo Jesucristo tetuan an ixí tsachrxexian nchrichan ji i.

Tjume e tuinxin kuachrxexin nchrichan espíritue Xixron anxrée.

¹⁹ Ko tjume e ni tetuan an nchrichan bikon na nge e kon en nchrichan ko kono e na ixí ítsjacha i na ícha tomi ixí ixra kuanche e nchrichan. Méxin koña na ko itsé na ndo Pablo ko ndo Silas ko bingakjina sen ti ste ni tetuan an ntaasien tjajna.

²⁰ Ko tjume e bikona na nti a ti jii xi nchéña ije ko ndachro na:

—Ni ji i ni judío tsango nchexronka na ni tjajnaína

²¹ ko tjako na nge e jua i tsitikaonna ko jua i sintu una ixí jan anna ni romanona.

²² Ko kain ni nti a koña e na sen. Tjume e xi nchéña ije kuetuan an xa tsantsje e na sen manta steyá sen ko tsóña na sen ixí ntasé.

²³ Ko tsango kóna na sen, tjume e xraxin in na sen ndo achjiso ko kuetuan an na ngajin xi jindaa ndo achjiso ixí xrotsje e xa satsinga i sen.

²⁴ Ko kuitekaon xa ko xraxin in xa sen ti ícha yaso e ndo achjiso ixí tsachrje a sen. Ko kuintexin xa tutée sen ixí naa ntaa chónnda tuye ixí satsji a sen.

²⁵ Tjume e ngusine tiie ndo Pablo ko ndo Silas nichje e sen ndo Dio ko itsje sen ngajin ndo Dio. Ko ikaxin ni jii ndo achjiso kuin en nã ixi jaña jitsje sen.

²⁶ Tuinxin kontengi nunte me e kontsjenga nchijí tátuée ndo achjiso ko kain ntachja xitje e ko kuitsinga chika cadena ti stetséxin kain ni ste nti a.

²⁷ Tjume e xi jindaa ndo achjiso kuaya xa ko bikon xa ixi tsixitje e ntachja, méxin kuantsje xa naa chika espada, ko xroxrantu u xa chika me e ntakuin xa ixi ndaxrokuen en xa ixi xraxaon xa sabinga kain ni jii ngaxin in ndo achjiso.

²⁸ Ko ndo Pablo séen kuyako ndo ndachro ndo:

—Na i, xruan an nge e nchekua asáan ixi kainna stena nti i.

²⁹ Tjume e xi jindaa ndo achjiso juanchia xa naa xro i ko nteeto kuixin in xa ko jixranga xa ixi xronka xa ko bake exin ntatuchi in xa tutée ndo Pablo ko ndo Silas.

³⁰ Ko tuinxin kuantsjexin xa sen nti a ko juanchangi e xa sen:

—¿Nge e sinta a ixi tsechón aséenna kain nchakon?

³¹ Ko je e sen ndachro sen:

—Titikáoan Nchána Jesucristo ko jaña tsomé e jiá ko jíee ni ndúya.

³² Tjume e juinчекuen en sen xa ko kao kain ni ste ndo a xa chijnie Ncháina Jesucristo.

³³ Ko maski naxixe e, hora me e sabikao xa sen ko juné ma xa kain ti no juincheni e na sen. Ko tuinxin je e xa ko kain ni ste ndo a xa bikitée nã.

³⁴ Ko tjume e je e xa sabikao xa sen ndo a xa íjngo; nti a kuajon xa nge e juine sen. Je e xa ko kain ni ndo a xa bake e nã juaxruxin ixi kuitikaon nã ndo Dio.

³⁵ Tjume e ndúyaxin xi nchéña ijie kuetuen en xa xi policia tsitsje e xa xi jindaa ndo achjiso ixi tsantsje xa ndo Pablo ko ndo Silas.

³⁶ Tjume e xi jindaa ndo achjiso ndache xa ndo Pablo nge e ndachro xipolicia:

—Xi nchéña ijie kuetuan an xa ixi tsachrjenta. Juaxruxin satsjinta.

³⁷ Tjume e ndo Pablo ndache ndo xi policia:

—Jan anna ni romanona, juaya nã ngajinna ko bikon kueya chujni ko ndachro a xa nge e ijie junta ana. Ko jaña xraxin inna xa ndo achjiso ko jai, ¿á imao tsajandana xa? Na i. Tsii je e xa ko je e xa tsantsjena xa.

³⁸ Tjume e xipolicia sakjui xa ko ndache xa xi nchéña ijie nge e ndachro sen ste ngaxin in ndo achjiso. Ko tsango xronka xi nchéña ijie ixi kuin en xa ixi je e sen romano sen.

³⁹ Tjume e ikjui xi nchéña ijie ko kuinóatée xa ngajin ndo Pablo ko ndo Silas ixi tsoñao a sen ixi nge e kon en sen, ko tjume e kuachrjexin sen nti a ko juanchia xa ixi satsjixin sen tjajna nti a.

⁴⁰ Tjume e ndo Pablo ko ndo Silas, hora kuachrjexin sen ndo achjiso, kuiji sen ndo a jan Lidia. Ko nti a bikon sen sen kichuu sen ko juinchechaxin kichuu sen ko sajuixin sen nti a.

17

Kuintee ni tjajna Tesalónica

¹ Tjume e ndo Pablo ko ndo Silas kuatsinga sen tjajna Anfípolis ko tjajna Apolonia ko sakjui sen tjajna Tesalónica. Nti a jii naa ni ngo judío.

² Ko tjume e ndo Pablo sakjui ndo ni ngo ixi jaña xrakuen en ndo ko níi semana ngujngu nchakon tjoké e ni judío juako ndo xranchi ndachro xroon chijnie ndo Dio.

³ Juako ndo ixi ndo Cristo xrokonda xrokuen en ndo ko tjume e xroxechón ndo íjngo. Jaña ndachro ndo:

—Ndo Jesús, ndo ntatjunta, me e ndo Cristo.

⁴ Tjume e kaxin ni judío kuitikaon n̄a ko rué e n̄a ndo Pablo ko ndo Silas. Ko kaxon kuitikaon itsjé ni griego, ni ó chóxin ndo Dio, ko kaxon kaxin nchri ícha chúxin n̄a tjajna nti a, kuitikaon nchra.

⁵ Ko ikaxin ni judío kuitikaon a n̄a nge e nichja ndo Pablo ko tsango kochjio n̄a me e juée n̄a kaxin xi ña i, xi nai a nche e xra ko juincheKateya n̄a ni tjajna. Tjume e kuixin in n̄a ndo a naa xi ndatin in Jasón ixi chrijitjée n̄a ndo Pablo ko ndo Silas ko tjaun n̄a tsikaan n̄a sen ti jii ni tetuan an.

⁶ Ko kuitja i n̄a sen me e itsé n̄a xi Jasón ko ikaxin sen titikaon Ncháina ko bingakjin n̄a sen sabikao n̄a sen ti jii xi tetuan an tjajna nti a. Ko kuintee n̄a ko kuyako n̄a ko ndachro n̄a:

—Ni ji i juincheye e n̄a chujni nchijí nunte ko jai ó kuii n̄a tjajnaina nti i.

⁷ Xi Jasón kuajon xa juachaxin ixi kuitu e n̄a ndo a xa. Kain ni ji in titikaon a n̄a ley tetuan an xi romano ko ndachro n̄a ixi jii inaa ngisen ícha tetuan an ndatin in Jesús.

⁸ Hora kuin en n̄a ji in kain ni tsixra o ko xi tetuan an tsango koña n̄a.

⁹ Ko xi Jasón ko sen titikaon Ncháina juenga sen n̄a méxin xi tetuan an kuintu e xa sakjui sen.

Ndo Pablo ko ndo Silas sakjui sen tjajna Berea

¹⁰ Ko tuinxin tiie me e sen kichuuna xruan an sen ndo Pablo ko ndo Silas satsji sen tjajna Berea. Ko nchakon kuiji sen nti a kuixin in sen ningue ni judío.

¹¹ Ko ni judío nti a ícha jian nche e n̄a ixi ni tjajna Tesalónica. Ko ícha juinche e n̄a juaxruxin kuin en n̄a chijnie ndo Dio ko ngujngu nchakon nchekuanxin n̄a xroon chijnie ndo Dio ixi tsono e n̄a á nduaxin ti juako e n̄a sen.

¹² Méxin, itsjé ni nti a kuitikaon n̄a, ko ikaxin nchri griega ícha chúxin n̄a kuitikaon nchra ko kaxon ni xi.

¹³ Ko ni judío tjajna Tesalónica kono e n̄a ixi ndo Pablo juako ndo chijnie ndo Dio tjajna Berea ko sakjui n̄a nti a ko juincheKateya n̄a ni nti a.

¹⁴ Méxin sen kichuuna titikaon Ncháina xruan an sen ndo Pablo satsji ndo no ngande e ndachaon. Ko ndo Silas ko ndo Timoteo xrakuitu e sen tjajna Berea.

¹⁵ Tjume e kaxin sen nti a sabikao sen ndo Pablo tjajna Atenas. Ko ikjan sen tjajnée sen ixi kuetuan an ndo Pablo xrochronga sen ngajin ndo Silas ko ndo Timoteo ixi jaiko satsji sen ti jii ndo ixi nti a tsetan sen ndo Pablo.

Ndo Pablo jii ndo tjajna Atenas

¹⁶ Xrajichon en ndo Pablo ixi tsiji ndo Silas ko ndo Timoteo tjajna Atenas, tsango koni e aséen ndo ixi bikon ndo nti a jii kueya ídolo ko chujni tajon juasaya ngajin ídolo me e.

¹⁷ Ko ni ngo judío nti a juako ndo ngajin kaxin ni judío ko ikaxin n̄a chúxin n̄a ndo Dio, ko kain nchakon bake e ndo ti ntaasin, juako e ndo ni jii nti a.

¹⁸ Ko kaxin chujni tikinixin en chujni ndatin in epicúreos ko ikaxin ni tikinixin chujni ndatin in estoicos kuaxi n̄a juao n̄a ndo Pablo. Kaxin n̄a ndachro n̄a:

—¿Nge e xrondachro ti nichja xi ji i?

Ko kaxin n̄a ndachro n̄a:

—Jinichja xa ixi inaa dio.

Jaña ichro n̄a ixi juako ndo Pablo chijni jian kondée ndo Jesús ko ndachro ndo ixi ndo Jesús maski kuen en ndo, xechón ndo íjngo.

¹⁹ Tjume e sabikao n̄a ndo Pablo naa ijna ndatin in Areópago. Nti a nichje e n̄a ndo ko ndachro n̄a:

—Tja onna xrondachijiana nge e natjúá tjakoa ja a.

²⁰ Itsjé nge e jée tjakoa, ko tja onna tsonónana nge e xrondachro me e.

²¹ Ko kain ni tjajna Atenas ko ni tsiki x̄in jée tjajna ste nti a, je o baki en n̄a ko bakeki n̄a nge e natjúá kuin en n̄a.

²² Tjume e ndo Pablo bake exin tutée ndo ti ste nã nti a ti Ijnã Areópago ko ndachro ndo:

—Ja anta ni tjajna Atenas tin ennta. Jan an tikõn ixi ja anta titikaonnta itsjé dio tsikoña tjatu o.

²³ Ko hora kuatsinga nti a jan an bikon ti no tájonxinnta juasaya ngajin ídoloanta ko bikon naa altar ja in tsikjinnta: “Nti i xraxaonxinna naa Dio chuxin ani.” Méxin, ti Dio xraxaonnta maski xrachuxin anta, me e ndo Dio tjako jan an.

²⁴ *Ndo Dio me e juinchéña ndo nunte xasintajni ko kain nge e jii ngata a nunte. Je e ndo me e Nchéé ngajní ko nunte nti i. Ndo Dio ji a ndo ngaxin in naa ni ngo tsikonchjianxin itja chujni.

²⁵ Ko xrokonde a ndo ixi xrojan chujni xrobingijna ndo ixi je e ndo tajon ndo juachaxin tsechón kain chujni ko tajon ndo chrinto ko kain nge e jii ngata a nunte.

²⁶ Naakua ngisen kuantsjenixin ndo kain tjajna ixi tsake e nã nguixin ngata a nunte. Ko kaxon ndachro ndo Dio tinó ko ngisa tsake e nã.

²⁷ Jajna xrokonda tsjéena ndo Dio ixi indao tsienxinna xranchi tsitjana ndo. Ko nduaxin je e ndo kjín a jii ndo.

²⁸ Ixi je e ndo stechónxinna ko tontengina ko tayakuina ndo. Ko tsindachro naa xi tjajnánta sa ó: “Jajna kuachrjenixinna ndo Dio.”

²⁹ Nduaxin jajna kuachrjenixinna ndo Dio, méxin jua i xroxraxaonna ixi ndo Dio, je e ndo naa chika oro o naa chika plata o naa ixro xranchi xraxaon ni nchéña ídolo.

³⁰ Sa ó ndo Dio tjáñe e ndo ti kuanche e chujni ixi no e ndo xrakuachuxin a nã ndo. Ko jai tituan an Dio ngajin kain chujni jii ngata a nunte xrokonda tsitikaon nã ndo.

³¹ Ndo Dio kuinche e ndo naa nchakon sinchéña ndo ijie ngajin chujni jii ngata a nunte ko kuinche e ndo naa ndo juakoxin kain juachaxin, ndo me e maski kuen en ndo, xechón ndo íjngo.

³² Ko nchakon kuin en nã ixi xroxechón chujni tsiken en, kaxin nã juanoa nã ndo Pablo. Ko ikaxin nã ndachro nã:

—Íjngo nchakon tsin anna nge e ndachrua.

³³ Tjume e ndo Pablo sakjui ndo.

³⁴ Ko ikaxin nã rué e nã ndo ko kuitikaon nã Ncháina. Ko naa xi kuitikaon ndatin in Dionisio, me e naa xi kuanchéña ijie ngajin chujni ngata a ijnã Areópago, ko naa nchri kuitikaon nchra ndatin in nchra Dámaris ko ikaxin nã kaxon kuaxi nã kuitikaon nã Ncháina.

18

Sakjui ndo Pablo tjajna Corinto

¹ Tjume e ndo Pablo sajuixin ndo tjajna Atenas ko ikjui ndo tjajna Corinto.

² Nti a kuetan ndo naa xi judío ndatin in Aquila. Je e xa xi tjajna nunte Ponto ko sé a nchakon je e xa ko janchri e xa tsikixin sen tjajna Italia ixi xi tetuan an nti a, xi Claudio, kuetuan an xa ixi kain ni judío tsachrjexin nã tjajna Roma. Tjume e ndo Pablo ikjui ndo kuitsje e ndo sen me e.

³ Ko xraje o ixrã kuanche e sen, ti kuanchéña sen nchia manta. Méxin, nti ao kuitu e ndo Pablo ixi xrojuinche e sen xrã.

⁴ Ko kain nchakon tjoké e ni judío, ndo Pablo bakji ndo ni ngo nichje e ndo ni judío ko ni je a judío ixi tjaun ndo kain nã tsitikaon nã Ncháina.

⁵ Ko nchakon ndo Silas ko ndo Timoteo kuixin sen nunte Macedonia, tjume e ndo Pablo í kuanche a ndo xrã, je o bajako ndo chijnie ndo Dio ixi tsono e ni judío ixi ndo Jesús me e ndo Cristo.

⁶ Ko je e ni judío kuaxi na ningakon en na ndo Pablo ko tsango nichjangí e na ndo. Ko je e ndo kontsjenga ndo manta jitsáa ndo ixi jaña juakoxin ndo je a juaxruxin jii ndo. Ko ndachro ndo:

—Ja onta tamanta ije tsitjáñaxinnta. Jan an íxro an ije tama ixi ó juntano anta chijni jian, ko ja anta kuitikaon anta. Méxin, jai satsji sintakuan an ni je a judío.

⁷ Tjume e kuachrjexin ndo ni ngo judío ko sakjui ndo ndo a naa sen ndatin in Justo, ndo me e xraxaon ndo ndo Dio. Ko tjenka ndo a ndo jii ni ngo.

⁸ Ko ndo Crispo, ndo tetuan an ni ngo judío, ko kain sen ndo a ndo, kuitikaon sen Ncháina Jesús. Ko kaxon kueya ni tjajna Corinto kuin en na chijnie ndo Dio ko kuaxi na kuitikaon na Ncháina* Jesús ko bikitée na.

⁹ Tjume e naa tiie bikon ndo Pablo Ncháina Jesús ko ja in ndachro ndo Jesús:

—Tjakua chijnina ko xronka ia. Nai a tintu e nichja chijnina

¹⁰ ixi jan an tjenka ritjén ko xro an ngisen ndako a sinta a ixi jan an chonda itsjé sen titikaonna tjajna nti i.

¹¹ Méxin, ndo Pablo kuitu e ndo naa nano ko tu o nti a tjajna Corinto, ko juinçekuen en ndo na chijnie ndo Dio.

¹² Nchakon baketuan an xi Galión nunte Acaya, itsjé ni judío ningakon en na ndo Pablo ko bikao na ndo ti ste xi tetuan an.

¹³ Ko ndache na xi tetuan an:

—Xi ji i ichrji xa nchekateya xa chujni ixi tjaun xa jée xronichjexin na ndo Dio, je a xranchi ndachro ley.

¹⁴ Ko ndo Pablo ó tjaun ndo xronichja ndo, ko tuinxin xi Galión ndache xa ni judío:

—Siá nduaxin naa ije tsango ije juinche e xi ji i, jan an xrokonda tsin an nge e xrondachrona.

¹⁵ Ko ji i je o chijni ko nombre ko ley na anta tetoxinnta. Méxin, ja onta nchekonchjiannta ji i ixi jan an tjaun a tsjitexin nge e tetoxinnta.

¹⁶ Tjume e kuetuan an xa ixi satsjixin na nti a.

¹⁷ Ko ni griego koñaon na ko itsé na xi Sóstenes, xi tetuan an ni ngo judío, ko nti a juaya na ngajin xa ko stetsje e kain xi tetuan an, ko xi Galión xro an nge e ndachro xa.

Ikjan Ndo Pablo tjajna Antioquía

¹⁸ Ndo Pablo xrakuitu e ndo itsjé nchakon tjajna Corinto ko tjume e chjée ndo sen juajna sen kichuuna ko kuixin in ndo naa ntábarco ixi sakjui ndo nunte Siria ko kao jan Priscila ko ndo Aquila. Tjume e kuiji sen tjajna Cencrea ko nti a ikjín jaa ndo Pablo ixi juakoxin ndo juinche e ndo ti nge e tsindachro ndo.

¹⁹ Nchakon kuiji sen tjajna Éfeso kuintu e ndo Pablo jan Priscila ko ndo Aquila ko sakjui ndo naa ni ngo ko juao ndo ni judío tsixra o nti a.

²⁰ Ko je e na kuinóatée na ixi xrokuitu e ndo nti a, ko je e ndo chro a ndo.

²¹ Méxin, nichje e ndo na ko ndachro ndo:

—Xrokonda tsake é tjajna Jerusalén nchakon tsii kia. Ko xrokjanna íjngo xrotsja anta siá tsituexin ndo Dio.

Tjume e kuintu e ndo na ko kuixin in ndo ntábarco sakuixin ndo tjajna Éfeso.

²² Nchakon kuiji ndo tjajna Cesarea sakjui ndo tjajna Jerusalén ko bikitsje e ndo sen titikaon Ncháina nti a. Ko tuinxin bingajin ndo tjajna Antioquía.

²³ Kuatsinga kaxin nchakon, kuachrjexin ndo nti a ko bakji ndo kaxin tjajna nunte Galacia ko Frigia ko nichje e ndo kain sen titikaon Ncháina Jesús ixi juaxruxin tsintee sen.

Ndo Apolos juako ndo ngajin ni tjajna Éfeso

* 18:8 Ncháina Señor Ncháina Jesús o Ncháina Dio

²⁴ Nchakon me e naa ndo judío ndatin in Apolos kuiji ndo tjajna Éfeso, ndo me e tikinixin ndo tjajna Alejandría. Je e ndo jian tjako ndo ko jian chúxin ndo xroon chijnie ndo Dio.

²⁵ Je e ndo no e ndo cha o ne e Ncháina ko juaxruxin banichja ndo kondee ndo Jesús maski je o no e ndo xranchi batikitée ndo Juan chujni.

²⁶ Ko ndo Apolos juako ndo ti ni ngo ko xrakon a ndo. Ko nchakon kuin en jan Priscila ko ndo Aquila ti juako ndo, tjume e kuachrjendaka o sen ndo ko juinchekuen en sen ndo ti nge e xranoe a ndo cha o ne e ndo Dio.

²⁷ Tjume e nchakon tjaun ndo Apolos satsji ndo nunte Acaya, sen kichuuna bingijna sen ndo ko ikjin sen naa xroon ngajin sen titikaon Ncháina ste nti a ixi xrokuayé e sen ndo jian. Ko nchakon kuiji ndo nunte Acaya bingijna ndo ngajin sen ixi juasie ndo Dio ó tsikitikaon sen.

²⁸ Ko stetin en kain chujni, juakoxin ndo ixi ndako a titikaon ni judío ko juacha ndo juako ndo ixi xroon chijnie ndo Dio chronga ixi nduaxin ndo Jesús ndo Cristo.

19

Ndo Pablo bake e ndo tjajna Éfeso

¹ Xrabake e ndo Apolos tjajna Corinto, ndo Pablo bakaji ndo tjajna ste nganito jna ko tjume e kuiji ndo tjajna Éfeso ko nti a kuetan ndo kueya ni titikaon chijnie ndo Dio.

² Ko tjume e juanchangi e ndo sen me e:

—¿Á kuaye enta Espíritue ndo Dio nchakon kuitikaonnta Ncháina?

Ko je e sen juate e sen:

—Na i, jan anna xratian ina á jii Espíritue ndo Dio.

³ Tjume e juanchangi ndo Pablo:

—¿Ngisen juachaxien bikitéexinta?

Ko je e sen juate e sen:

—Xranchi kuachronga ndo Juan, jaña bikitéena.

⁴*Ndachro ndo Pablo:

—Ndo Juan kuanchekitée ndo chujni ixi xrokjan na xrokuitikaon na ndo Dio ko juako ndo ixi xrokuitikaon na ngisen tsii tuenxin ndo, ko ndo xrokuji ndo me e ndo Jesús, ndo Cristo.

⁵ Kuin en sen ji i, me e bikitée sen; ixi juachaxien Ncháina Jesús.

⁶ Tjume e ndo Pablo bake e itja ndo ngata a jaa sen ko kuii Espíritue ndo Dio ngajin sen ko kuaxi sen nichja sen jée ngigua ti chúxin a sen ko nichja sen nge e kuajon ndo Dio.

⁷ Ko sen xi me e xranchi teyuu sen.

⁸ Ko ní nchanitjao, ndo Pablo bake e ndo ni ngo judío nti a ko bajako ndo ko baxronka i ndo. Ko nichje e ndo sen ko jian banchekuen en ndo na xranchi jii juachaxin tetuan an ndo Dio.

⁹ Ko kaxin na tsango icha aséen na ko tjaun a na tsitikaon na Ncháina Jesús ko chaxro a kuanichja na ixi chijnie Ncháina ngajin kain chujni. Tjume e ndo Pablo kuachrjendaa ndo ko sabikao ndo sen titikaon chijnie Ncháina ko kain nchakon bajako ndo ti jii naa escuela ndatin in Tiranno.

¹⁰ Jaña bajako ndo yuu nano, ko kain ni bake e nti a nunte Asia kuin en na chijnie Ncháina Jesús, ni judío ko kaxon ni je a judío.

¹¹ Ko ndo Dio ícha juinche e ndo ijié ixra ixi ti kuanichja ndo Pablo.

¹² Ko itsjé na bakikao na pañuelo ko manta ngajin ndo Pablo ixi tsake e itja ndo ko jaña bakikao na ngajin ni ni e ko kain ichin chóna na kuachrje ichin ko espíritue Xixron anxrée kuachrje kaxon.

¹³ Ko kaxin ni judío bakaji na ko tjaun na tsantsje na espíritue Xixron anxrée ko je e na je o ncheye e na chujni ixi tjaun na xronichja na ixi juachaxien ndo Jesús. Ko bandache na espíritue Xixron anxrée:

—Juachaxien ndo Jesús, ndo tjako ndo Pablo, tetuan anna ja a espíritue Xixron anxrée tachrxexian nti i.

¹⁴ Jaña banche e yaato chjen en naa xi judío ndatin in Esceba, xitaana tetuan an.

¹⁵ Tjume e naa nchakon nichje e na espíritue Xixron anxrée. Ko espíritu me e ndachro:

—Chuxinna ndo Jesús ko nókana ngisen ndo Pablo. Ko ja a, ¿ngisen ja a?

¹⁶ Ko jaña xi chóna espíritue Xixron anxrée chringanito xa na ko tsango soji xa juacha xa juincheni e xa kain na. Ko turuchu na kuachrxexin na nchia ko tsikoni e na.

¹⁷ Ko kain ni judío ko ni je a judío ste na tjajna Éfeso kuin en na nge e tsikon en ko tsango xronka na ko ndachro na ixi tsango ijié juachaxien Ncháina Jesús.

¹⁸ Kaxon itsjé ni kuitikaon Ncháina bakiji na ko kuachronga na kain ti ixra ndako a banche e na.

¹⁹ Ixi itsjé na banche e xra tuso, ni me e bakika o na xroon banchekuanxixin na xra tuso ko juaaka na xroon stetsje e kain chujni ste nti a. Ko ti tjintee kain xroon me e xranchi yuu ikánte mil tomi chika plata.

²⁰ Ko chijnie Ncháina Jesús ícha jitingangi ko tjakoxin ixi nduaxin chóna chijni ijié juachaxin.

²¹ Ko ndo Pablo xraxaon ndo tsitsje e ndo sen tjajna Jerusalén ko tsatsinga ndo nunte Macedonia ko Acaya. Ko tsjexinja tsake e ndo tjajna Jerusalén, satsji ndo tjajna Roma.

²² Ko xruan an ndo yuu sen tingijna ndo satsji sen nunte Macedonia, sen me e ndo Timoteo ko ndo Erasto, ko je e ndo Pablo xrakuitu e ndo nunte Asia kaxin nchakon.

Koñao ni tjajna Éfeso

²³ Ko nchakon me e itsjé ni tjajna Éfeso koñao na ixi juaxruxin a ste na ixi chijnie Ncháina Jesús.

²⁴ Ixi nti a jii naa xi ndatin in Demetrio ko je e xa banchekonchjian xa ixi chika plata kaxin ni ngo nchínchín kondee naa nchri diosa ndatin in Diana, ko kueya tomi bajacha xa ko kaxon ni ché e xrée xa.

²⁵ Tjume e jua o xa ikaxin ni kuanche e xra me e ko ndache xa na:

—Ja anta no anta ixi ti ixra nche ena tjachana jian ko jaña juaxruxin stena.

²⁶ Ko xranchi tikonnta ko tin ennta ixi xi Pablo tjako xa ixi ídolo nchéñana je a dio. Ko jaña ndache xa itsjé chujni ko je a je o nti i tjajna Éfeso, kaxon nguixin nunte Asia.

²⁷ Tsango chaxro a ji i ixi xrajna tsitjáña xra ko kaxon ningue nchri diosa Diana ba tsitjáña, ko ítsitikaon a na nchra ko tsitjáña juachaxien nchra nguixin nunte Asia ko nchijí xasintajni.

²⁸ Ko hora kuin en na ji in, tsango koñao na ko séen kuyako na:

—Tsehón nchri Diana, santoe ni tjajna Éfeso.

²⁹ Tjume e tsango koñao kain ni tjajna Éfeso ko ningakon en na ndo Gayo ko ndo Aristarco, sen me e yuu sen tsikí xin nunte Macedonia. Ko itsé na sen ko bingakjin na sen bikao na sen ngaxin in ti tónaxin junta.

³⁰ Tjume e ndo Pablo tjaun ndo tixin in ndo nti a ixi xronichje e ndo na, ko sen titikaon Ncháina kuintue a sen ndo itsji ndo.

³¹ Kaxon ikaxin ni tetuan an nunte Asia, ni chúxin ndo Pablo, xruen en na chujni ixi xronache sen ndo Pablo ixi tsixin a ndo nti a.

³² Ko tjume e ni tsixra o nti a ndachro na naa nge e, ko ikaxin na jée chro na ko koñao na ko itsjé na noe a na sonda xra o na nti a.

³³ Ko ikaxin ni judío ndache na naa xi ndatin in Alejandro nge e jiton en ko baka e na xa ngusine ko je e xa juakoxin itja xa ixi xrotenko na ixi xronichjixin xa ni judío ngajin ni ste nti a.

³⁴ Ko hora juatsuan na xi Alejandro ixi kaxon xa ni judío xa, kain na kuyako na xranchi yuu hora ko ja in ndachro na:

—Tsechón nchri Diana, santoe ni tjajna Éfeso.

³⁵ Tjume e xi secretario ni tjajna nti a kuetuan an xa xrotenko na ko ndachro xa:

—Chujni tjajna Éfeso tin ennta. Nchijí nunte xasintajni no e na ixi ni tjajna Éfeso tayakon en na ningue nchri diosa Diana, tsikoña ixro kuixin ngajni.

³⁶ Xro an ngisen ndachro ixi nduaxin a ji in. Méxin, tenkonta, ko xraxaonnta nge e nche enta

³⁷ ixi ni bikuunta nti i nichjangie a na ningoina ko nichjangie a na santoina Diana.

³⁸ Ko siá xi Demetrio ko ni nchexree xa tjankata a na ijie xrojan ngisen jii nti i, méxin jii ni ncheña ijie, je e na xrokuin en na nge e xrondachro xi Demetrio ko jaña sincheña na ijie.

³⁹ Ko siá jii inaa nge e nta inta juaxruxin, xrokonda xronichjanta nchakon xroxra o kain na ko nchakon me e tsoña ijie.

⁴⁰ Xrokonda i tsjakaxin kichuuna ko sincheketona chujni ixi ba tsjangiina xi tetuan an ixi ndako a stentu una.

⁴¹ Ko tjume e kuetuan an xi secretario ixi satsji na ko jaña juexin sakjui ni tsixra o nti a.

20

Sakjui ndo Pablo nunte Macedonia ko nunte Grecia

¹ Nchakon juexin kain ji in, tjume e ndo Pablo kuiye e ndo kain sen titikaon Ncháina Jesús nti a ko ndachro ndo kaxin chijni ixi ícha xrochuntia sen Ncháina ko tjume e sakjui ndo no nunte Macedonia.

² Ko nchijí ti no kuatsinga ndo, chaxro nichje e ndo sen titikaon Ncháina ixi juaxruxin tsintee sen. Ko tjume e kuiji ndo nunte Grecia.

³ Nti a kuitu e ndo ní nchanitjao ko tjume e xrokua ndo naa ntabarco saxrokjui ndo nunte Siria. Ko kono e ndo ixi kaxin ni judío ningakon en na ndo ko xraxaon ndo cháña xrokjanxin ndo tutée ndo ko tsatsinga ndo nunte Macedonia.

⁴ Ko sen bikao ndo Pablo, me e ndo Sópater, ndo tjajna Berea, ndo Aristarco, ndo Segundo, ndo tjajna Tesalónica, ndo Gayo, ndo tjajna Derbe, ndo Timoteo, ko kaxon ndo Tíquico, ko ndo Trófimo, sen nunte Asia.

⁵ Sen kichuuna kuitaon sen nti a ko chonna sen tjajna Troas.

⁶ Ko juexinja kuatsinga kia ine sen nutja chóna i ti tja in nio, tjume e kuixi inna naa ntabarco ko kuachrjexinna tjajna Filipos ko kuatsinga na ó nchakon, tjume e juasona tjajna Troas ko nti a kuetanna sen kuitaonxin ko nti a kuitunana yaato nchakon.

Ndo Pablo sakjui ndo tjajna Troas

⁷ Ko nchakon xrangixín semana xra ona ixi xrochrijin nutja xraxaonxinna Ncháina Jesucristo. Ko ndo Pablo nichje e ndo kain sen titikaon Ncháina Jesús ixi tjaun ndo saxrokjui ndo ndúyaxin, méxin xrajitjako ndo chjéja ngusine tiie.

⁸ Ko piso noi nchia nti a xrauxinna ko nti a steche kueya xro i.

⁹ Ko nti a jii naa chajan ndatin in chán Eutico, chán me e bake e chán nunte ngata a ventana. Ko ndo Pablo tsango sée nichja ndo, méxin, tsango chjée chán kotachrin. Ko ndatsikejua chán ko kue e chán nunte ti nínxin piso ko hora kuatsi in sen chán, ndatsiken en chán.

¹⁰ Méxin, ndo Pablo xingajin ndo ko kuitsingata a ndo chán ko joa ndo chán. Ko ndache ndo sen kichuuna:

—Xronka inta, jichón chán.

11 Tjume e ndo Pablo ikjan ndo bajin in ndo ixi tsonchrijin ndo nutja sine sen, xroxraonxin sen Ncháina Jesucristo. Ko nichja ndo bingasáñajan ko tjume e sakjui ndo.

12 Ko chán tsike e nunte sabikao sen chán jichón chán, ko kain sen juaxruxin kuitu e sen.

Sajuixin ndo Pablo tjajna Troas ko kuiji ndo tjajna Mileto

13 Jan anna kuitaonxinna nti a ko kuaana naa ntábarco ko juasona tjajna Asón ixi nti a tsetanna ndo Pablo ixi ndachro ndo tsjixin ndo tutée ndo.

14 Nchakon kuetanna ndo tjajna Asón, kuixin in ndo ntábarco stetji jan anna ko sakjuina tjajna Mitilene.

15 Ko kuachrjexin nã nti a, ndúyaxin kuatsingana nunte Quío ko nchakon yuxin juasona tjajna Samos ti no tachrje ikaxin ntábarco ko tjume e sakjuina tjajna Trogilio ko nti a jokénãna. Ko kuatsinga naa nchakon juasona tjajna Mileto.

16 Jaña junta ana ixi ndo Pablo tjaun a ndo sée xrobake e ndo nunte Asia ko tjaun a ndo xrokjui ndo tjajna Éfeso ixi tjaun ndo taka tsiji ndo tjajna Jerusalén ixi nti a tsake e ndo nchakon kia Pentecostés.

Nichje e ndo Pablo sen tetuan an ni ngo tjajna Éfeso

17 Hora bake e ndo Pablo tjajna Mileto kuituan an ndo ixi tsij sen tetuen en ni ngo tjajna Éfeso.

18 Ko nchakon kuiji sen ndachro ndo:

—Ja anta ó no anta xranchi kuantã a nchakon xrangíxixín juaso nunte Asia.

19 Ó no anta ixi kain nchakon bake é ngajinnta ko junta a ixrã ngajin Ncháina Jesucristo ko juntajié a aséenna ko tsjanga ixi kueya juachjaon kua ixi ni judío tjaun nã xrojuinchenina nã.

20 Ko jan an kuíntua i juáko kain nge e jian xrokonda xrokono anta. Ko juako anta ti xra o kain itsjé chujni ko kaxon ndointa.

21 Juintakuan an kain ni judío ko kain ni je a judío ixi xrokonda tsintu e nã ti ndako a nche e nã ko xrochuntia nã ndo Dio ko Ncháina Jesucristo.

22 Ko jai satsji tjajna Jerusalén ixi Espíritue ndo Dio kotuanna ko nóna i nge e tsónna nti a.

23 Je o nóna ixi kain tjajna tsatsinga, Espíritue ndo Dio ndachijina ixi ni tjajna Jerusalén xroxruxin inna nã ndo achjiso ko tangi sinchenãna.

24 *Ko ta i juachjaon ixi maski tangi tsónna. Je o juaxruxin tsake é ixi sintajexin ti kotuanna Ncháina Jesús ixi tsjáko chijnie ndo, xranchi ndo Dio tjue e ndo chujni.

25 'Ko jai nóna ixi ninaánta, ni juako anta juachaxien ndo Dio, ítsikon aninta íjngo.

26 Méxin, jai ntatjunta ixi xro an ijie chónã siá xrojannta ítsitikaon anta.

27 Ixi ó juako anta kain nge e tjaun ndo Dio, ko ítitjáña i tsjáko xrojan nge e.

28 Tsje enta xranchi jian take énta ko tsje enta sen kichuunta, sen ni ngo, ixi Espíritue Dio tjáanta ndo ixrã tayakon ennta sen ste ningue Ncháina, sen kuenaxin ndo ixi jnié ndo.

29 Ko ó nóna nchakon satsji jan an, tsij kaxin ni sincheke to sen ni ngo xranchi kundanixra tinchje ba kutuchjon.

30 Ko kaxin nã ste nã ngakjen ennta sincheya nã ko jaña sen ni ngo xrorué e sen nã ko ítsitikaon a sen Ncháina.

31 Méxin, tsje enta, ko xraxaonnta ixi xranchi ní nano jan an juintakuan annta tiie ko nchakon ko tsjanga ko kuíntua i juintakuan annta ti jian.

32 'Ko jai ja anta kichianna, गया itja ndo Dio takéenta ko kaxon tsingijnaxinnta ndo chijnie ndo ixi je e ndo tjua anta ndo. Ko je e ndo tsango chónã ndo juachaxin tsingijnanta ndo ixi tsaye enta kain nge e ti tjaun ndo ti xrochjée ndo kain sen chujnie ndo ti tjúá aséen sen.

³³ Jan an tjaun a tomie na ni mantée na.

³⁴ Ja anta no anta jian ixi jan an tjána junta axin ixra ko kuenaxin nge e xrokondana ko kaxon nge e xrokonde e sen riki an.

³⁵ Jaña juako ngajinnta ixi sinche enta ixra ko tsingijnanta ni xro an nge e chóna nge e. Ko xraxaonnta ti tsindachro Ncháina Jesús: “Ícha juaxruxin take e sen tajon, ixi sen tayé e.”

³⁶ Ko juexin ndachro ndo Pablo ji i, bake exin ntatuchi in ndo ko nichje e ndo ndo Dio ko kaxon kain sen.

³⁷ Tjume e kain sen tsjanga sen, joa sen ndo ko kuitoxin sen ndo.

³⁸ Ko tsango koni e aséen sen ixi chronga ndo ítsikon a sen ndo íjngo. Tjume e bikao sen ndo ti no jii ntabarco ko sakjui ndo.

21

Sakjui ndo Pablo tjajna Jerusalén

¹ Nchakon kuintu ana sen kichuuna, tjume e kuixi inna ntabarco ko sakjuina nunte Cos. Ko ndúyaxin sakjuina tjajna Rodas, ko nti a sakjuixinna tjajna Pátara.

² Tjajna Pátara kuitjana naa ntabarco satsjixinna no nunte Fenicia ko kuixi inna ntabarco me e ko sakjuina.

³ Nchakon kuatsingana nti a bikona nunte Chipre ko kuatsingana ndatsjonxin ikjon ko xrabikonna nunte Siria. Tjume e ntabarco sakjui ntaa tjajna Tiro ixi xrokonda xroxingajin nge e tjinga ntaa ti tjajna me e, ko nti a kuixi inna tjajna.

⁴ Ko kuitjana sen titikaon Ncháina ko nti a kuitunana ngajin sen yaato nchakon. Ko Espíritue ndo Dio juincheno e sen ixi xronache sen ndo Pablo satsji a ndo tjajna Jerusalén.

⁵ Ko juexin kuatsinga ti yaato nchakon me e, kuachrjexinna nti a kaina ko kain sen titikaon Ncháina Jesús ko janchri e sen ko chjen en sen bikaanxina sen ngande e tjajna ko ngande e ndachaon bake exinna ntatuchi inna nichja ana ndo Dio.

⁶ Ko tjá ana sen juajna ko bajína ntabarco ko je e sen ikjan sen ndo a sen.

⁷ Ko juasona tjajna Tiro ko tjajna Tolemaida. Nti a tjá ana juajna sen titikaon Ncháina ko nti a kuitunana ngajin sen naa nchakon.

⁸ *Ko ndúyaxin ndo Pablo ko jan anna sajuixinna nti a, sakjuina tjajna Cesarea. Nti a ikjuina ndo a ndo Felipe, naa ndo tjako chijnie Ncháina Jesús. Je e ndo naa sen yato sen tingijna kuinche e Ncháina Jesús ko kuitunana ndo a ndo.

⁹ Ndo Felipe kuachóna ndo noó nchrichajen en ndo, nchri xratutee a, nchri me e tayé e nchrichan chijnie ndo Dio ti tjaun ndo tsono e chujnie ndo.

¹⁰ *Nti a kuinteena itsjé nchakon ko tjume e kuiji naa ndo tayé e chijnie ndo Dio ko ndo me e ndatin in ndo Agabo, ndo nunte Judea.

¹¹ Kuiji ndo kuitsjenana ndo ko itsé ndo tjuá tingatóxin ndo Pablo ko tjuá me e kuintexin ndo tutée ndo ko itja ndo ko ndachro ndo:

—Espíritue ndo Dio ndachro ixi ni judío ja in sinchekao na nché tjuá ji i ko tsikao na ndo ngajin ni je a tjajna judío.

¹² Juexin kuin anna ti ndachro ndo Agabo, tjume e jan anna ko ni tjajna Cesarea kuinóatánana ngajin ndo Pablo ixi tsji a ndo tjajna Jerusalén.

¹³ Ko juatingixin ndo Pablo:

—¿Sonda ncheni enta aséenna ixi ritsjanganta? Jan an je a je o xrochon an tsinteenana, kaxon jan an tsenxinna kondeexin Ncháina Jesús nti a tjajna Jerusalén.

¹⁴ Ko jan anna juacha ina xrokuitikaonna ndo, méxin kuintu ana ndo satsji ndo ko ntatjana ndo:

—Tson en ti tjaun Ncháina Jesús.

¹⁵ Ko kuatsinga kaxin nchakon xakonnana ko sakjuina tjajna Jerusalén.

¹⁶ Ko biki ana kaxin sen titikaon Ncháina, sen tjajna Cesarea. Sabiki anna sen ndo a naa ndo tjajna Chipre ndatin in ndo Mnasón. Je e ndo ó sa ó titikaon ndo Ncháina Jesús ko kuajon ndo ndo a ndo kuitunana.

Ndo Pablo kuitsje e ndo ndo Jacobo

¹⁷ Nchakon juasona tjajna Jerusalén sen kichuuna jian nichja nana sen.

¹⁸ Ko ndúyaxin biki ana ndo Pablo bikitsja ana ndo Jacobo, ndo kichuu Ncháina Jesús, ko kaxon nti a ste kain sen kichuuna tetuan an ni ngo.

¹⁹ Ndo Pablo chjée ndo sen juajna ko beki e ndo sen kain nge e juinche e ndo Dio nchakon juako e ndo ni je a judío.

²⁰ Juexin kuin en sen ji in, kuajon sen juasaya ngajin ndo Dio, ko ndache sen ndo Pablo:

—Kichianna, ja anta ó bikonta ixi jii itsjé mil ni judío ó titikaon na ndo Jesús ko kain na ndachro na ixi xrokonda kaxon tsitikaonna ley kuajon ndo Moisés.

²¹ Ko jai tsikin en na ixi ja anta juincheckue ennta ni judío ste tjajna ícha ikjín ixi tsitikaon a na ti ley juako ndo Moisés ko kaxon ndachenta na ixi xrochjé a na chji e ni judío chjen en na ko xrokonda i tsitikaon na ti titikaon ni judío.

²² ¿Nge e sinta ana ixi tsin en na ixi ó jui inta?

²³ Méxin, cháña ja in nche enta. Nti i jii noó sen tjaun sinche e sen ti ó ndache sen ndo Dio.

²⁴ Tiku unta sen ko tjenganta na kain nge e xrokonda sinche e sen ti tontjúá aséen sen ko ti ikjín jaa sen, tjenganta na ti tsoxienxin ko jaña tsono e kain sen kichuuna ixi nduaxin a kain ti nichja na ti ja anta nche enta ko jai tsikon sen ixi ja anta titikaonnta ley.

²⁵ *Ko ni je a judío, ni ó tsikitikaon Ncháina Jesús ó kjin anna na naa xroon ixi tsa i na juachjaon ixi kain ji in. Je o sine a na ntao tsikinixin en ídolo ko sine a na ijni ko ntau e iko tsikintji a jnié ba, ko xrochóna i na inaa nchri o xi je a ndoxi e o janchri e na.

Itsé na ndo Pablo ti ni ngo

²⁶ Tjume e ndo Pablo sabikao ndo sen noó ko ndúyaxin juexin kontjúá sen kao je e ndo. Ko tjume e kuixin in ndo ni ngo ixi xrochronga ndo ixi juexin kontjúá sen ko xrobikao ngujngu sen nge e tikinixin en ndo Dio tsayé e xitaana.

²⁷ Ó xroxetja yaato nchakon, tjume e kaxin ni judío tsiki xin nunte Asia bikon na ndo Pablo ngaxin in ni ngo. Ko tjume e juincheckateya na kain chujni tjajna ko itsé na ndo Pablo.

²⁸ Ko stekoyako na ko ndachro na:

—Kainnta, ni tjajna Israel, tingijnananta. Xi ji in ichrji xa nguixin nunte ko tjako xa nge e je a jian kondee tjajnaina, ko titikaon a xa ley kuetuan an ndo Moisés, ko titikaon a xa ningoina. Ko jai tsixraxin in xa kaxin ni griego ko nchekitja xa ngaxin in ni ngo tjúá.

²⁹ *Jaña ndachro na ixi seno tsikikon na chrikao ndo Pablo ndo Trófimo tjajna Éfeso ko xraxaon na ixi ndo Pablo tsikikao ndo xa ni ngo.

³⁰ Ko nchijí tjajna koña na ko kain na ikjui na itsé na ndo Pablo ko bingakjin na ndo ngandangi nduja ni ngo ko bije e na ntachja ni ngo.

³¹ Ko tjaun na naaxrokónaxón na ndo ko naa xi comandante tetuan an xi soldado romano kuin en xa ixi nchijí tjajna Jerusalén stekoña na.

³² Tjume e xi comandante bikao xa xi soldado ko ni tetuen en xa ko binga na ikjui na ti ste kain na. Ko hora bikon na ixi ó kuiji xi comandante ko xi soldado kuintu e na ndo Pablo, ko í juaya i na ngajin ndo.

³³ Ko xi comandante konchjiñe e xa ko itsé xa ndo Pablo ko kuetuan an xa ixi tsintexin n̄a ndo yuu chika cadena. Ko tjume e juanchangi e xa n̄a ngisen je e ndo ko nge e tsijinche e ndo.

³⁴ Ko chujni tsixra o nti a, kaxin n̄a kuyako n̄a naa nge e ko ikaxin n̄a íjngo nge e. Ko xi comandante tienxin a xa sonda jaña stenche e n̄a ixi tsango tuyako n̄a. Tjume e kuetuan an xa ixi satsikao xa ndo Pablo ti no jii cuartel.

³⁵ Ko bijikao xa ndo ti tjasoxinni nchia, xrokonda kuama xa ndo Pablo ixi tjaun n̄a xrojuaya n̄a ngajin ndo.

³⁶ Ko kain ni sterué e ja in stetoyako n̄a:

—Naatóñaxónnta xa.

Ndo Pablo chronga ndo ngajin n̄a ixi chóna i ndo ijie

³⁷ Ko hora xroxraxon in n̄a ndo Pablo ti jii cuartel, juanchangi e ndo Pablo xi comandante ko ndachro ndo:

—¿Á chao xronichj̄a ngajinnta?

Ko je e xa juatingíexin xa ko ndachro xa:

—Ja a, ¿á no a nichja ngigua griego?

³⁸ Méxin, ¿á je a ja a xi tjajna Egipto, xi juinchekateya chujni ko sabikao noó mil ni ña i ntajie?

³⁹ Tjume e juate e ndo Pablo ko ndachro ndo:

—Na i, jan an naa xi judío jongínaxin tjajna Tarso, nunte Cilicia. Jan an juixin naa tjajna tsango tjintee. Ko tjancha a ixi tintun̄ana xronichja a chujni ji i.

⁴⁰ Tjume e xi comandante kuajon xa juachaxin ko ndo Pablo bake exin tutée ndo ti jii ti tajixinni nchia ko itja ndo juakoxin ndo ixi xrotenko n̄a. Tjume e kuita n̄a ko kuaxi ndo nichjexin ndo n̄a ngigua hebreo ko ndachro ndo:

22

¹ —Ja anta kichuuna ko sen tachríi, tin ennta nge e xrondachrj̄an ixi jan an chonda i ijie.

² Ko kuin en n̄a ixi nichja ndo ngigua Hebreo ko ícha tenko n̄a. Ko ndachro ndo Pablo:

³ *—Jan an naa xi judío jongínaxin tjajna Tarso nunte Cilicia. Ko nti i bangíxin tjajna Jerusalén ko juentakuanxin ngajin ndo Gamaliel ko titika on kain ti tjako ley tsikitikaon sen xranchrjen. Ixi jan an ícha junta a jian xrée ndo Dio ixi nichj̄íi aséenna xranchi ja anta nche enta jai.

⁴ *Jan an sa ó bakengi ko bakoña uan sen titikaon Ncháina Jesús ko naabakóñaxón sen ko baxraxon in xi ko nchri ndo achjiso.

⁵ Ko xitaana tetuan an ko kain ni tachríi tayakon en ni ngo judío no e n̄a kain ji i ixi je e n̄a chjána n̄a xroon tsayé e sen kichuuna judío ste tjajna Damasco. Tjume e sakjui nti a ixi bijée sen titikaon Ncháina ixi xrobikian sen nti i tjajna Jerusalén ixi tangi xrobikaon sen.

*Xranchi kuaxi kuitikaon ndo Pablo Ncháina
(Hch. 9:1-19; 26:12-18)*

⁶ 'Nchakon juaso tjenka tjajna Damasco xranchi ngusine nchakon tuinxin ngandajinna tsango bingasáña naa xro i kuixin ngajní.

⁷ Ko kuaritsinga nunte ko tuinxin kuñ an naa téé sen nichja ko ndachro: “Saulo, Saulo, ¿sonda rua n̄ana ko sonda ningakonn̄ana?”

⁸ Ko jan an juanchangi: “¿Ngisen ja anta?” Ko juate e ndo: “Jan an ndo Jesús tjajna Nazaret, ndo ja a tengia ko ningakon én.”

⁹ Ko sen biki an bikon sen xro i ko xronka sen ko je e sen tsikien a sen téé sen nichja.

¹⁰ Ko jan an juanchangi: “¿Nge e tjauannta sinta a?” Ko juate e ndo ko ndachro ndo: “Taya satjia ko tixin ia tjajna Damasco ko nti a xrontatjua kain nge e sinche e.”

¹¹ Ko kondeexin xro i me e í bikon a, méxin, sen biki an bingatséna sen ko sabiki an sen tjajna Damasco.

¹² Nti a bake e naa ndo ndatin in ndo Ananías, ndo me e jian kuitikaon ndo ley tsikajon ndo Moisés. Ko kain ni judío jii tjajna Damasco tsango chónde e na ndo juasaya.

¹³ Ko ndo Ananías kuji ndo kuitsjena ndo ko hora kuiji ndo ndachijina ndo: “Kichian Saulo, taye é juachaxin ixi íjngo tsikuan.” Ko nduaxin tuinxin bikon.

¹⁴ Ko ndachijina ndo: “Ndo Dio kuitikaon sen xrachrjeina kuincha a ndo ja a ixi tsono a nge e tjaun ndo ko ixi tsikuan ndo tsango jian ko tsin en ti xronichja ndo.

¹⁵ Ko ja a xrochronga nge e nduaxin bikuan ko nge e kuin en ngajin kain ni jii ngata a nunte.

¹⁶ Ko jai í chuen a ícha. Taya ko tikitéexian nombrée Ncháina Jesucristo ixi me e tsijmaxin jáa.”

Ndo Dio tajon ndo ixra ngajin ndo Pablo

¹⁷ Ko nchakon ikjanna tjajna Jerusalén tjume e ikjui ni ngo kuinichja a ndo Dio ko bikon Ncháina,

¹⁸ ko ja in ndachijina ndo: “Jaiko tachrxexian tjajna Jerusalén ixi chujni nti i tsitikaon a na chijnina tsjakoa ja a.”

¹⁹ Tjume e jan an ndachrjan: “Ncháina, je e na no e na ixi seno jan an bakji kain ni ngo ko kuatse sen titikáoan ja a ko baxraxin in sen ndo achjiso ko bajaya ngajin sen.

²⁰ *Nchakon naakóñaxón na ndo Esteban, ndo nche e xraa, banichja chijnia, jan an kaxon nti a bake é ko ndachrjan ixi chao ndatsen en ndo ko jan an tsja a mantée ni kóña ndo.”

²¹ Ko Ncháina ndachijina ndo íjngo: “Satjia ixi xroxruan an ikjín sinchekuen én ni je a judío.”

Ndo Pablo jichón en ndo nge e xichro xi comandante

²² Ni tsixra o je o kuin en na kain ji i ko tjume e kuaxi na kuyako na:

—Tsen en xi ji i, jan ana tjaun ana tsechón xa.

²³ Ko ícha stetoyako na ko stetjanka na mantée na ko kaxon stetjanka na inche.

²⁴ Ko xi comandante kuetuan an xa ixi xroxraxin in na ndo Pablo ngaxin in cuartel. Ko kuetuan an xa ixi tsande e na ndo ixi jaña tsono e xa sonda ningakon en na ndo.

²⁵ Ko juexin kuintee na ndo ixi tsjaya na ngajin ndo, tjume e ndo Pablo ndache ndo xi capitán jii nti a:

—¿Á jii juachaxin tsjayanta ngajin naa xi romano, xratóñe a xa ijie?

²⁶ Ti kuin en xi capitán ji i, ikjui xa kuichronga xa ngajin xi comandante ko ndachro xa:

—Tsje é nge e sinche e ixi xi ji i naa xi romano xa.

²⁷ Tjume e xi comandante konchjiñe e xa ngajin ndo Pablo ko juanchangi xa:

—¿Á nduaxin ja a naa xi romano?

Ko Ndo Pablo juate e ndo:

—Jaán, nduaxin.

²⁸ Xi comandante ndachro xa:

—Jan an juenga na itsjé tomi ixi kóñana naa xi romano.

Tjume e ndachro ndo Pablo:

—Jan an jongínaxin nti a.

²⁹ Ko tjume e ni xrojuaya ngajin ndo Pablo bingaxinton na ko kaxon xi comandante ixi kuin en na ixi ndo Pablo naa xi romano. Ko xronka na ixi tsixraxin in na ndo achjiso.

Ndo Pablo nichje e ndo ni tetuan an ni judío

³⁰ Ko ndúyaxin xi comandante tjaun xa tsono e xa nge e ijie juankata a ni judío ngajin ndo Pablo. Tjume e koxindanga xa chika cadena jichroaxin ndo ko kuetuan an xa ixi xroxra o kain xitaana tetuan an ko kain xi tetuan an ni judío, ko tjume e kuantsje xa ndo Pablo ko bake e xa ndo ti ste kain na.

23

¹ Tjume e ndo Pablo jian tsje e ndo ni tituan an ni judío ko ndachro ndo:

—Kichuuna, ndo Dio jitsje e ndo ixi jian junta a jan an kain nchakon.

² Ko xi Ananías, xitaana tituan an, kuituan an xa ngajin ni ste tjenka ndo Pablo ixi tsande e na itja na ro a ndo.

³*Ko juate e ndo Pablo:

—Ndo Dio tsjaya ndo ngajinnta kaxon ixi ndako a nche enta. Ja anta ritjénnta ixi sinchéñanta jie xranchi tituan an ley. Méxin, ¿sonda titikaon anta ley ko kuituan annta bikaonna?

⁴ Tjume e ni ste nti a ndachro na:

—¿Á jaña nichjangí e xitaana tetuan an ne e ndo Dio?

⁵ Ko ndachro ndo Pablo:

—Kichuuna, jan an nóna i á xi ji i ndotaana ícha tetuan an, ixi ndachro xroon chijnie ndo Dio: “Xronichjangíe a chujni tituen en tjajnána.”

⁶*Ko ndo Pablo kono e ndo ixi kaxin ni jii nti a ni partidoe xi saduceo, ko ikaxin na ni partidoe xi fariseo. Ko séen ndachro ndo:

—Kichuuna, jan an naa ni fariseo ko sen nía kaxon fariseo sen. ¿Sonda ja anta nchekamaninta ijie ixi jan an titika on xroxechón ni tsiken en?

⁷ Ko juexin ndachro ndo ji i, tjume e ni fariseo ko ni saduceo kuaxi juakaxin kichuu na ko je a naxraje o xraxaon na, méxin chjeja na.

⁸*Ixi ni saduceo ndachro na xroxechón a ni tsiken en ko kaxon ndachro na xro an sen ángel jii ko xro an espíritu. Ko ni fariseo titikaon na kain me e.

⁹ Tjume e kain na kuintee na, ko kaxin xi fariseo tjako ley bingatjen xa ko ndachro xa:

—Xi ji in, jan anna xro an nge e ti ndako a kuitjana juinche e xi ji in. Á nchéxin naa espíritu o naa ángel nichje e xa.

¹⁰ Ko tsango koñao chujni ste nti a. Méxin xi comandante xronka xa ixi batsoña na ndo Pablo, ko kuetuan an xa ixi satsikao xa ndo ti jii cuartel.

¹¹ Ko tiie me e konoxin Ncháina ngajin ndo Pablo, ko ja in ndachro ndo:

—Xronka ia Pablo ixi xranchi juakua chijnina nti i tjajna Jerusalén, jaña kaxon tsjakoja tjajna Roma.

Juaon na ixi naatsóñaxón na ndo Pablo

¹² Ndúyaxin kaxin ni judío xraxaon na xranchi naatsóñaxón na ndo Pablo. Ko ndachro na ixi nombrée ndo Dio nduaxin tson en ji i ko xro an nge e sine na ko xro an nge e tsi i na tsjexinja tson en ti xraxaon na.

¹³ Ko xranchi yuu ikán* na xraxaon na ixi jaña sinche e na.

¹⁴ Tjume e ikjui na ti ste xitaana tituan an ko ni tetuan an ni judío ko ndachro na:

—Jan anna juaona ixi nombrée ndo Dio tson en ji in, sine ana ko tsi ana tsjexinja naatsóñaxónna xi Pablo.

¹⁵ Méxin, ja anta ko kaxin ni tituen en ni judío tjanche enta xi comandante ixi tsika o xa xi Pablo ndúya ngajinnta, xrondachronta ixi tjaunnta ícha tsono anta kondee je e xa ko jan anna xrochon anna ngatja cha o ko naatsóñaxónna xa ko ítsi a xa nti i.

¹⁶ Ko naa chán kueen ndo Pablo tsikin en chán nge e tjaun na sinchekao na ndo Pablo, méxin ikjui xjan ti cuartel kuichronga chán nge e kuin en chán stetjao na.

¹⁷ Tjume e ndo Pablo kuiye e ndo naa xi capitán ko ndachro ndo:

—Tiku a chán ji i ngajin xi comandante ixi chóna chán naa nge e xrochronga chán ngajin xa.

¹⁸ Ko xi capitán sabikao xa chán ti jii xi comandante ko ndachro xi capitán:

—Xi Pablo jii ndo achjiso ndachijina xa ixi tsikian chán ji in nti i ixi tjaun chán xrontatjua chán naa nge e.

¹⁹ Tjume e xi comandante itsé xa itja chán ko kuachrjendaka o xa chán ko juanchangi xa:

—¿Nge e tjauan xrondachijiana?

²⁰ Tjume e ndachro chán:

—Ni judío tjaun na tsjanca a na ixi ndúya ndúyo tsiku a ndo Pablo ti ste ni judío tituan an. Ko xrondachro na ixi tjaun na tsjanchangí e na ndo Pablo ikaxin nge e.

²¹ Titikaon a ja a ti ndachro na ixi xranchi yuu ikán xi imao xrochon en xa ngatja cha o ko nduaxin nombrée ndo Dio sine a xa ko tsi a xa nge e tsjexinja naatsóñaxón xa ndo Pablo. Ko jai stechón en xa nge e xichrua ja a.

²² Ko xi comandante kuetuen en xa chán xrondache a chán ninaa ngisen nge e chronga chán ngajin xa.

Xro an na ndo Pablo ngajin xi gobernador Félix

²³ Tjume e xi comandante kuiye e xa yuu xi capitán ko kuetuan an xa ixi tsjejo xi capitán yuu ciento chujni tsjixin tutée ko yuu ikán ko ní ite xi tseta a kunxin ko yuu ciento xi tsikao chika lanza, ko satsji xa tjajna Cesarea xranchi hora na tiie.

²⁴ Ko kuetuan an xa sinchekama na kunxin tseta a ndo Pablo ko ndachro xa ixi xro an nge e tson en ndo ko jian tsiji ndo ti jii xi gobernador Félix.

²⁵ Ko xi comandante ikjin xa naa xroon, ndachro:

²⁶ “Jan an xi Claudio Lisias xruan an juajna ngajinnta Félix gobernador.

²⁷ Ni judío nti i itsé na xi ji i ko tjaun na naaxrokóñaxón na xa. Ko hora konóna jan an ixi je e xa naa xi romano, biki an xi soldado ko bingijna xa.

²⁸ Ko tja on tsonóna nge e ijié chóna xa, méxin, biki an xa ngajin ni tetuan an ni judío.

²⁹ Ko konóna ixi tjankata a na xa ijié ixi ley chóna na. Ko xro an ijié chóna xa tsikinixin en ixi naaxrokóñaxón na xa o xroxraxon in na xa ndo achjiso.

³⁰ Tjume e kuin an ixi ni judío xraxaon na naaxrokóñaxón na xa, méxin xruan an xa ngajian ko kuetuan an kain ni me e itsji na ngajian ko xrontatjua na nge e ijié chóna xa.”

³¹ Ko ni soldado juinche e na xranchi kotuen en na ko sabikao na ndo Pablo tiie me e tjajna Antípatris.

³² Ko ndúyaxin xi soldado kuj xin tutée ikjan xa ti cuartel. Ko xi steta a kunxin sabikao xa ndo Pablo.

³³ Ko nchakon kuiji na tjajna Cesarea kuajon na xroon tsikjin xi gobernador ko kaxon kuajon na ndo Pablo ngajin xa.

³⁴ Ko juexin juinчекuanxin xi gobernador xroon, tjume e juanchangi xa no tjajné ndo Pablo ko kono e xa ixi tjajné ndo tjajna Cilicia,

³⁵ ko ndachro xa:

—Tjume e tsin an nge e xrondachrua tsija ni tjankata a ijié.

Ko kuetuen en xa ikaxin xi soldado tsikao xa ndo Pablo naa nchia tsijinchéña xi Herodes.

24

Ndo Pablo nichja ndo ngajin xi Félix

¹ Kuatsinga na ó nchakon, tjume e xi Ananías, xitaana tsango tituan an, kuiji xa tjanya Cesarea. Kaxon bikao xa kaxin ni tetuan an ni ngo ko naa xi nchéña ijie ndatin in Tértulo. Xi me e nichje e xa xi gobernador ko tjankata a xa ijie ngajin ndo Pablo.

² Nchakon bikao na ndo Pablo, xi Tértulo kuaxi xa bankata a xa ijie ngajin ndo Pablo ko ndache xa xi Félix:

—Gobernador ixi juasianta tsango juaxruxin stena ko juasiaa ja anta ixi tsango jian no anta tituan annta tjananana.

³ Tsango jian ja anta Félix. Ko juasianta ixi kain nge e chjánananta.

⁴ Tjaun ana sintachrjan ananta, méxin, tinóatánana ixi nchion tin ennta nge e xron-dachrjana.

⁵ Xi ji in jii xa xranchi naa ichin tinga nguixin no ko ncheye e xa ni judío ko ncheketo xa na. Je e xa tituen en xa ni titikaon chijnie naa xi tsiki xin tjanya Nazaret.

⁶ Je e xa kaxon xrojuinchekitja xa ni ngo ko jan ana itséna xa ko xrojuintañana ijie ngajin xa xranchi tituan an ley chondana.

⁷ Ko tjume e xi comandante Lisias juike e xa ko kuantsjenana xa xi Pablo.

⁸ Tjume e kuetuan an xi comandante ixi ni tjankata a ijie ngajin xi Pablo tsij na ngajinnta. Ja anta chao tjanchangí enta xi Pablo, me e tsono anta jian nge e ijie chóna xa.

⁹ Ko ndachro kain ni judío jii nti a:

—Kain ji i nduaxin.

¹⁰ Tjume e xi gobernador juakoxin itja xa ixi xronichja ndo Pablo. Ko ndachro ndo Pablo:

—Juaxruxin xrontatjunta ixi xro an ijie chonda ixi nóna ja anta nduaxin jian nchéñanta ijie kondee tjanya nti i ko itsjé nano tituan annta nti i.

¹¹ Ja anta kaxon xrokono anta ixi nandá chóna teyuu nchakon juaso tjanya Jerusalén ixi nti a tsajonxin juasaya ngajin ndo Dio.

¹² Ko ni tjankata ana na ijie jai, kuitja ina na ritetoki an xrojan chujni, ko nichjangía i chujni ste ni ngo ijie ko kaxon ni ste ni ngo nchín ko chujni tjanya xro an nge e ntatjana.

¹³ Ko ni ji i jua i xrondachro na ixi jaña junta a.

¹⁴ Ti nduaxin ndachrjan ixi nta a ixra ngajin ndo Dio, ndo baktikaon sen tachrí nana xranchi tetuan an cha o jian. Ko je e na ndachro na ixi ndako a nge e titika on. Ko kaxon titika on kain nge e jitaxin ley ko titika on nge e tsikjin sen kuanichja chijnie ndo Dio ó sa ó.

¹⁵ Kaxon titika on ndo Dio xranchi titikaon je e na ixi ndo Dio sinchexechnón ndo kain ni jian ko kaxon kain ni ña i.

¹⁶ Méxin, taa juachjaon ixi kain nchakon tjúa tsake e aséenna ngajin ndo Dio ko ngajin chujni.

¹⁷*'Kuatsinga kaxin nano kuaji jée tjanya, ko jai ikjana tjanána ixi tsajon tomi ngajin ni nóa jii tjanána ko kaxon tsajon juasaya ngajin ndo Dio.

¹⁸ Ko bake é ngaxin in ni ngo, ko tjume e kaxin ni judío tsiki xin nunte Asia kuitjana na nti a ko hora me e juexin juntatjúá aséenna ko tsjé a chujni riki an ko xro an ngisen kuetoki an.

¹⁹ Ko siá me e xrojuinta a, ni me e xrokuji na nti i xrokjuankata ana na ijie.

²⁰ Ko ni ste nti i xrochronga na nge e ijie richonda siá nduaxin xrojan ti ndako a junta a.

²¹*Ánchéxin xrondachro na ixi nchakon bake e ngajin na séen kuyako ko ndachrjan jan an: “Jai stenchéñantana ijie ixi titika on xroxechón ni tsiken en.”

²² Ko juexin kuin en xi Félix nge e ichro na, ko je e xa jian no e xa nge e xrondachro chijni tjako ndo Pablo, méxin juinchéña i xa ijie ngajin ndo Pablo ko ndachro xa:

—Tsija xi comandante Lisias me e tsjexin tsonóna nge e ijie tsama xi ji i.

²³ Ko kuetuen en xa xi capitán ixi tsendáa xa ndo Pablo ko chao tsaji ndo ko tsayé e ndo sen chúxin ndo, tsiji sen tsitsje e sen ndo.

²⁴ Ko kuatsinga kaxin nchakon, bijikao xi Félix janchri e xa nchri Drusila, nchri me e naa nchri judía. Ko kuetuan an xa tsjirué e na ndo Pablo ixi xrochronga ndo xranchi chao xrochuntia na ndo Jesucristo.

²⁵ Ko ndo Pablo juako ndo xranchi sinche e na jian ko xranchi tsetuen en na aséen na ko sinche a na ti ndako a ko xranchi tsii nchakon ndo Dio sinchéña ndo ijie ngajin kain chujni. Ko xi Félix kuin en xa, me e xronka xa, ko ndachro xa:

—Jai satjia ko tjume e tsiya a naa nchakon ti xro an ixra xrochondana.

²⁶ Ko xi Félix tjaun xa ixi ndo Pablo xrokuajon ndo tomi ngajin xa; me e xrokuajanda xa ndo, méxin, nanaó bakiye e xa ndo.

²⁷ Ko jaña kon en ko kuatsinga yuu nano, ko xi Félix juinche e xa nge e tjaun ni judío, méxin kuintu e xa ndo Pablo ngaxin in ndo achjiso ko tjume e kuintu e xa ti ixra kuanche e xa ko naa xi ndatin in Porcio Festo kuayé e xa ixra me e.

25

Ndo Pablo jii ndo ngajin xi Festo

¹ Xi Festo kuiji xa tjajna Cesarea ixi tsjangixin xa sinche e xa ixra gobernador ko nchakon nínxin sakjui xa tjajna Jerusalén.

² Ko xitaana tetuan an ko kaxin ni judío tsango tetuan an juankata a na ijie ngajin ndo Pablo.

³ Ko kaxon kuinóatée na xrokuetuan an xa xrokjui ndo Pablo tjajna Jerusalén ixi ó tsijao na ixi xroxruan an na kaxin xi xrochon en xa ngatja cha o ko naatsóñaxón xa ndo Pablo.

⁴ Ko xi Festo juate e xa ixi ndo Pablo jii ndo ngaxin in ndo achjiso tjajna Cesarea ko kaxon je e xa tuinxin xrokjan xa tjajna Cesarea.

⁵ Ko ndachro xa:

—Kaxin ja anta xro ícha tetuan annta itsjina tjajna Cesarea. Ko siá nduaxin chóna xa Pablo ijie, nti a sintaña ijie.

⁶ Ko xi Festo bake e xa tjajna Jerusalén xranchi ijin o ite nchakon ko tjume e ikjan xa tjajna Cesarea. Ko ndúyaxin bake e xa nunte ti nchia tetuanxin xa ko kuetuan an xa tsika o na ndo Pablo.

⁷ Ko hora kuixin in ndo Pablo, ni judío kuixin tjajna Jerusalén konchjiñe e na ngandajin ndo ko bankata a na ndo ijie. Ko ti ndachro na nduaxin a ixi je o nchekamaxón na ndo ijie.

⁸ Ko nichja ndo Pablo ko ndachro ndo:

—Xro an ijie junta a ngajin ni ngo Jerusalén ko xro an nge e ndachrjan kontree xi emperador ne e Roma ko jian kuiteka on ley ne e sen judío.

⁹ Ko xi Festo tjaun xa jian xrokuitu e xa ngajin ni judío, méxin, juanchangi e xa ndo Pablo ko ndachro xa:

—¿Á tjaun tsjia tjajna Jerusalén ixi nti a sintañaxian ijie?

¹⁰ Ko ndo Pablo juate e ndo:

—Na i, jan an ó ritjén ti tóñaxin ijie kondee xi gobierno romano ko chao nti ó tsóñaxin ijie ko ó no anta xro an ijie junta a ngajin ni judío.

¹¹ Siá nduaxin xrojan nge e ti ndako a junta a tikinixin en tsen enna, jan an xrakon a ixi tsen enna. Ko siá nduaxin a ijie tjankata antana chujni ji i, xro an ngisen chóna juachaxin tsajonna ngajin ni tjankata ana ijie. Jan an tjánchía ixi xi tsango tetuan an jii tjajna Roma sinchéñana xa ijie.

¹² Tjume e xi Festo juexin juao xa ni tingijna nchéña xa ijie, ja in ndache xa ndo Pablo:

—Ja a juanchia ixi xi tsango tituan an sintaña a xa ijie. Itjia ngajin xi me e.

Ndo Pablo jii ndo ngajin xi rey Agripa

¹³ Ko kuatsinga kaxin nchakon, tjume e xi rey Agripa ko janchri e xa nchri Berenice kuiji na tjajna Cesarea ixi tsajon na juajna xi Festo.

¹⁴ Ko nti a bake e na itsjé nchakon, me e xi Festo beki e xa xi rey ixi ndo Pablo ko ndachro xa:

—Nti i jii naa xi tsikintu e xi Félix ngaxin in ndo achjiso.

¹⁵ Ko nchakon bake é tjajna Jerusalén xitaana tetuan an ko ni tetuen en ni judío kuiji na ngajin ko juankata a na ijié ngajin xi me e ko juanchia na tsen en xa.

¹⁶ Ko jan an juata a: “Jaina ni romano jua i xrondachrjana ixi tsen en naa chujni; xrokonda sa ó chujni me e tsikon ko tsin en ni tjankata a ijié ko chao xrondachro na á nduaxin chóna jje ni me e.

¹⁷ Ko nchakon kuiji ni judío nti i, jan an í chuan i ícha, tuinxin ndúyaxin ikjui nchia tóñaxin ijié ko kuituan an tsika o na xi Pablo.

¹⁸ Tjume e konchjiñe e ni judío ko xro an ijié juankata a na xa xranchi jan an xraxa on xrondachro na.

¹⁹ Je o bakoñao e na xa ixi xranchi bakajon xa juasaya ngajin ndo Dio ko ningakon en na xa ixi kondeexin naa xi ndatin in Jesús ó tsiken en xa ko xi Pablo ndachro xa ixi tsixechón xa.”

²⁰ Jan an nóna i xranchi xrojuintaña ijié, méxin juanchangi a xa á tjaun xa itsji xa tjajna Jerusalén ixi nti a sinchéña na ijié ngajin xa.

²¹ Ko je e xa juanchia xa ixi xi tsango tetuan an Roma xrojuinchéñe e xa ijié. Me e jan an kuetuan an ixi nti ó tsitu e xa ngaxin in ndo achjiso tsjija nchakon xroxruan an xa tjajna Roma.

²² Tjume e xi Agripa ndache xa xi Festo:

—Kaxon jan an tja on tsin an inge e xrondachro xi me e.

Ko ndachro xi Festo:

—Ndúya tsin en nge e xrondachro xa.

²³ Ko ndúyaxin xi Agripa ko nchrinchri e xa nchri Berenice kuixin in na nchia tóñaxin ijié ko bikao na xi soldado tetuan an ko kaxon kaxin ni tetuan an tjajna nti a. Tjume e kuetuan an xi Festo ixi tsixrakua ndo Pablo.

²⁴ Tjume e ndachro xi Festo:

—Ja anta rey Agripa ko kainnta xrastenta nti i. Nti i jii xi ji i. Tsango itsjé ni judío bankata a na xa ijié tjajna Jerusalén ko kaxon tjajna Cesarea ko séen stetoyako na tjanchia na tsen en xa.

²⁵ Ko xro an ijié kuitjá tikinixin en tsen en xa. Ko je e xa juanchia xa ixi xi César sinchéñe e xa xi ijié. Méxin, xraxa on xroxruan an xa tjajna Roma.

²⁶ Ko jan an nóna i nge e ijié chóna xa ixi xrokjin xroon tsayé e xi César, méxin, kuetuan an bika o na xa nti i ngajin ja anta rey Agripa ko kainnta ti stenta nti i, tjanchangí enta xa xranchi kuaxi kon en ji i ixi tja on tsonóna nge e xrokjin

²⁷ ixi jua i xroxruan an naa xi jije e ndo achjiso satsji tjajna Roma ko nóna i nge e ti ndako a juinche e xa.

26

Ndo Pablo jii ndo ngajin xi rey Agripa

¹ Tjume e xi rey Agripa ndache xa ndo Pablo:

—Chao xronichja ixi tsóña a ijié.

Tjume e ndo Pablo juatsin in tja ndo ko kuaxi nichja ndo, ko ndachro ndo:

² —Juaxruxin ritjén ixi xronichja ngajinnta, rey Agripa, ko xrondachrjan kain ijié tjankata ana ni judío.

³ Ko ja anta jian no anta ley ko nge e nche e ni judío, ko ja anta no anta nge e tjakaxin kichianna. Méxin, tjancha anta tsin ennta jian nge e xrondachrjan.

Ndo Pablo teki ndo xranchi kuanche e ndo sa ó

⁴ Kain ni judío ó no e na xranchi bake e seno tñajnána ko tñajna Jerusalén ti xranchiona.

⁵ *Kaxon no e na jian ko chao xrochronga na ixi xranchiona, jan an fariseona. Ko ni fariseo ícha titikaon na ley.

⁶ Ko jai jitoñana ijié ixi jan an titika on nge e tsindachro ndo Dio tsajon ndo ngajin sen tachrí ina.

⁷ Sen teyuu tñajna tsikachrjexin ndo Israel stechón en sen ixi tsikon sen ixi tsayé e sen nge e tsindachro ndo Dio. Je e sen tajon sen juasaya ngajin ndo Dio tiie ko nchakon. Jai tin ennta, rey Agripa, jan an kaxon richon an ji in, ko kondeexin me e tjankata a na ijié ni judío.

⁸ ¿Á titikaonnta ja anta ixi ndo Dio sinchexechón ndo chujni tsiken en?

Ndo Pablo kuaningakon en ndo ni titikaon Ncháina Jesucristo

⁹ *Jan an sa ó kuaxraxa on xranchi xrokon ín ni titikaon ndo Jesús, ndo tñajna Nazaret,

¹⁰ ko jaña juintekian chujni tñajna Jerusalén ixi juachaxien xitaana tetuan an, kuaxraxin in itsjé ni bakitikaon ndo Jesús ngaxin in ndo achjiso. Ko nchakon naabakóñaxón na sen kaxon jan an jaña xraxa on.

¹¹ Ko nanaó bajintani a sen titikaon Ncháina* ixi í xrokuitikaon a sen ndo. Kain ji i kuenta a ngujngu ni ngo ixi tsango baningakon an sen, méxin barua a sen tñajna sabinga sen.

Beki ndo Pablo xranchi kuaxi ndo kuitikaon ndo Ncháina Jesucristo

(Hch. 9:1-19; 22:6-16)

¹² Jaña rixraxa on sakjui tñajna Damasco ixi juachaxien xitaana tituan an.

¹³ Ko ja anta rey, tsono anta ixi ngusine nchakon me e ngatja cha o bikon naa xro i bingasáña nguixin ngandajinna, ko tsango jitóngíxin xroi ícha ixi chjiixrué chjiixro.

¹⁴ Ko kaina kuari ina nunte ko jan an kuin an nichja naa ngisen ngigua hebreo ko ja in ndachijina sen: “Saulo, Saulo, ¿sonda tsango ningakonnana ko ritengiana? Ja ua rincheni e asáan xranchi naa kuxinta tjanka tutée ikon chika tikao ntagarocha.”

¹⁵ Ko jan an juanchangi: “¿Ngisen ja anta?” Ko sen me e juate e sen: “Jan an ndo Jesús, ngisen ja a ningakon én ko tengia.

¹⁶ Jai tingatjen, take exian tutáa ixi jan an kuajon juachaxin kuin en nge e ndachrjan ixi jan an kuincha a sinche e ixra ngajin ko tsekia nge e kuin en ko tjume e tsikuan nge e sinta a jan an.

¹⁷ Jan an tsingijna ixi xro an nge e sinta a ni tñajnáa ko ni jée nunte. Ko jai tetuan an satsjia tsjako e na nge e xrontatjua.

¹⁸ Méxin, tetuan an satsjia ti ste ni titikaon a ixi tsakintje e ikon na ko ítsaji a na cha o naxixe e ixi chao me e xrokjan cha o tingasáña ko íxrochóna i Xixron anxrée juachaxin tsetuen en xa aséen na. Ko jai xrochuntiana na jan an ko jan an tsayá a na ko sintama a ijié chóna na ko tsayé e na juachaxin tsake e na ti no tsake e kain sen titikaonna”, ichro Ncháina Jesucristo.

Ndo Pablo titikaon ndo nge e kuin en ndo

¹⁹ Méxin, rey Agripa, jan an kuitika on nge e kuin an ti kuixin ngajni.

²⁰ *Sa ó juintakuan an ni tñajna Damasco ko tjume e ni tñajna Jerusalén, ko nchiji nunte Judea ko kaxon juintakuan an ni je a judío. Juako a na ixi tsintu e na ti ndako a nche e na ko xrokjan na tsitikaon na ndo Dio, ko sinche e na ti jian.

²¹ Kondeexin ji in, ni judío tséxinna na ngaxin in ni ngo ko tjaun na naatsóñaxónna na.

²² Ko juasie ndo Dio bingijnana ndo me e jian ritjén jai, ko xrantakuan an ni nóa ko ni tetuan an ko xro an inaa nge e nichja, je o tjako chijni bajako sen profeta ko ndo Moisés.

²³ *Ndo Cristo, xrokonda xrokuen en ndo ko xroxechón ndo nchakon nínxin ixi jaña tsjakoxin ndo xranchi tsingasañaxin ni ste nti i ko ni ste ikaxin tjajna ixi tsitjáña i aséen nã.

Nge e juatingíexin xi Agripa ngajin ndo Pablo

²⁴ Ndo Pablo jaña beki ndo ti kon en ndo ko tjume e xi Festo séen kuyako xa:

—Pablo, ja a tsijinchetjáña jáa ixi tsango nchekuanxian xroon.

²⁵ Ko juatingíexin ndo Pablo:

—Na i, juntatjáña i jáana. Festo, nge e ndachrjan me e jian ko nduaxin.

²⁶ Nti i jii xi rey Agripa. Je e xa chúxin xa jian kain nge e kon en. Méxin, chao rinichja ixi je e xa ó no e xa kain ji i ko kain ji i ti kon en, je a imao kon en.

²⁷ Ja anta, rey Agripa, ¿á titikaonnta ti bajako ni kuachronga chijnie ndo Dio ó sa ó? Nóna ixi ja anta titikaonnta nge e bajako sen.

²⁸ Juate e xi Agripa ko ndachro xa:

—Bananchichjaon ko jan an kaxon xrokuitika on xi Jesús.

²⁹ Tjume e ndachro ndo Pablo:

—Á bananchichjaon nge e xrondachrjan o itsjé nge e, ndo Dio tjaun ndo je a ja onta xrokuitikaonnta ndo. Kaxon tjaun ndo ixi kain ni stetin en nti i xrokjan nã xranchi jan an titika on ndo ko je e nã tsechruaxin a nã chika cadena xranchi jan an.

³⁰ Ko juexin nichja ndo Pablo, tjume e bingatjen xi rey, ko xi gobernador, ko kaxon nchri Berenice, ko kain ni ste nti a.

³¹ Ko kain nã kuachrje nã ko juntejao kichuu nã ko ndachro nã:

—Xro an ijié chóna xi ji i, tikinixin a tsen en xa ko xrobake a xa ndo achjiso.

³² Tjume e xi Agripa ndache xa xi Festo:

—Chao xrokuajandani xa saxrokjui xa siá xrojuanchia i xa ixi xi tsango tituan an sinchéña xa ijié ngajin xa.

27

Ndo Pablo xruan an nã ndo tjajna Roma

¹ Tjume e kuetuan an nã ixi satsjina nunte Italia. Ko je e nã ndache nã naa xi capitán ndatin in Julio ixi tsikao xa ndo Pablo ko ikaxin ni jii ngaxin in ndo achjiso. Je e xa naa xi policía nche e xrã ngajin xi Augusto César.

² Tjume e kuixi inna naa ntábarco tsikí xín no puerto Adramitio, ko ntábarco me e ó satsji ntãa ti jii puerto nunte Asia. Kaxon steki anna xi Aristarco tikinixin en xa tjajna Tesalónica kondee nunte Macedonia.

³ Ko ndúyaxin juasona puerto tjajna Sidón. Ko xi Julio jian juao xa ndo Pablo ko tjume e kuajon xa juachaxin ixi tsitsje e ndo ngisen chúxin ndo nti a ixi tsingijna sen ndo.

⁴ Ko tjume e sajuixinna tjajna Sidón ko juasona naa isla ndatin in Chipre no ndat-sjonxin kjon, kondeexin chrinto soji.

⁵ Tjume e kuatsingataonna ndachaon ko juasona tjenka tjajna Cilicia ko Panfilia ko tjume e juasona tjajna Mira nunte Licia.

⁶ Ko nti a xi capitán kuitja xa naa ntábarco tsikí xín tjajna Alejandría ko ntãa me e satsji ntãa nunte Italia ko ndachro xa tsixin inna ntãa ixi satsiki anna ntãa tjajna me e.

⁷ Itsjé nchakon yao kuintekjina ko tsango tangi juasona tjenka tjajna Gnido ixi chrinto tintuna ina itsjina taka, méxin kuatsingana ngandajin isla Creta ko juasona tjenka tjajna Salmón.

⁸ Ko jaña tsango tangi kuatsingana nguixin nunte me e ko juasona naa tjajna ndatin in Puerto Jian tjenka tjajna Lasea.

⁹ Ko juntatjáñana itsjé nchakon, ko jai ícha tangi bajinxinni ntábarco ngata a ndachaon ixi ó tsii nchakon tonkin. Méxin, ndo Pablo ndache ndo nã:

¹⁰ —Kainnta tin ennta nge e xrondachrjan. Tikon ixi tsatsingana itsjé juachjaon siá satsjina ixi sinchetjáñana ntábarco ko kain nge e jitinga ntáa ko kaxon jaína.

¹¹ Ko xi capitán tetuan an ícha kuin en xa ti ndachro xi teka ntábarco ko nchéé ntáa ko kuitikaon a xa ti ndachro ndo Pablo.

¹² Ixi puerto me e je a jian tsitu eni nchakon tonkin, méxin kain na xraxaon na ixi ícha jian tsachrjexinna nti a ixi tjaun na tsijina tjajna Fenice, naa puerto nunte Creta ti ndatsjonxin chuya ko níjin, ko nti a xrokuitunana tsatsingaja nchakon tonkin.

Chrinto soji ngata a ndachaon

¹³ Tjume e kuaxi binga chrinto kuixin no níjin ko soji a chrinto, méxin xraxaon na chao satsjina.

Tjume e kuachrjexinna nti a ko juasona ngande e isla Creta.

¹⁴ Ko tuinxin kuji naa chrinto soji ndatin in noroéste kuande e ntábarco.

¹⁵ Ko kuaxi chrinto me e kuncheka ntábarco ko jua i sakjuina ixi ti tjaun xi teka ntáa ixi konchekana chrinto. Méxin, kuintu e xa ntábarco bikao chrinto.

¹⁶ Tjume e juasona naa isla nchín ndatin in Clauda ixi nti a je a soji jitinga chrinto. Ko tsango tangi juentakajinna ntábarco nchínchín jitenixin tuenxin ntábarco ijié.

¹⁷ Ko juexin juasitianna ntábarco nchínchín ngande e ntábarco ijié ko kuintexinna ino ntábarco ijié ixi xro an nge e tson en ntáa. Ko stexronkana ixi xroké e nchese ntábarco ti xrojuasona nunte Sirte. Ko juinchexingajin xa manta tikao ntábarco ko kuintu e xa je o chrinto satsikao ntáa.

¹⁸ Ko ndúyaxin xra tsanga jitinka chrinto, kuaxi xa kuintjí xa kain nge e jitikao ntábarco chringi ndachaon.

¹⁹ Ko nchakon nínxin tjána juankaxinna nge e xrokonde a ntábarco ngangí ndachaon.

²⁰ Itsjé nchakon kondeexin itjuj bikon ana chjiixro ko nchanotsé ixi tsango jitinga chrinto ko xraxa onna xrokunteken enna.

²¹ Ko kuatsinga itsjé nchakon juine ana ko ndo Pablo bingatjen ndo ko ndachro ndo: —Xrokuitikaonnta nge e ntatjunta ko xrokuachrjexin ana nunte Creta, ko jaña xrokuen a kain ji i.

²² Ko jai ta inta juachjaon ixi xro an ngisen tsen en maski ntábarco tsitjáña ntáa.

²³ Ixi nakonkjin bikon naa ndo ángel tsixrua an ndo Dio, ndo titika on ko nta a xréé.

²⁴ Ko ndo ángel ndachijina ndo: “Xrakon a Pablo. Xrokonda tsjasua ti jii xi César tetuan an ko kondaxian ja a, ndo Dio tsingijna ndo kain ni stetji ngaya ntábarco, tsen a na.”

²⁵ Méxin, xrakon inta ixi jan an chuntia ndo Dio ko nóna ixi tson en xranchi ndachro ndo ángel.

²⁶ Xrokonda tsituina naa nunte jii ngusine ndachaon.

²⁷ Juexin kuatsinga yuu semana, tjume e naa tiie juasona ndachaon ndatin in Adriático ko nti i, ndá a tiki anna chrinto. Ko ngusine tiie xi teka ntábarco bikon xa ixi ó stetjasona ti jii inche xema.

²⁸ Ko juaticho a xa ti yaso e inda ko xranchi ní ite* ko ikjaon metro yasoexin inda. Tjume e kjín a juasona ko íjngo juaticho a xa ko ikán ko yatō metro yasoexin inda.

²⁹ Ko tsango xronka xa ixi xroké e ntábarco ixro, méxin banka xa noó chika gancho tuenxin ntábarco ko jaña chon anna bingasáñajan.

³⁰ Ko xi nche e ixra ntábarco xraxaon xa xrobinga xa ko kuaxi xa juinchexingajin xa ntábarco nchínchín ngataon inda ko juinchexin xa xranchi xrobanka xa chika gancho chóna ikon ntábarco.

³¹ Tjume e ndo Pablo ndache ndo xi capitán ko kain xi soldado:

—Siá xi ste nti i me e tsintue a xa ngaxin in ntábarco, jua i tsjasona ti jii inche xema.

* 27:28 ite diez

³² Méxin, xi soldado konchrinjin xa ino jichroaxin nt̄abarco nchínchín ko kuintu e xa kuitsinga nt̄aa ngangí inda.

³³ Ko jitingasáña ndo Pablo nichje e ndo kain ni ste nti a ko ndachro ndo sine n̄a ko kaxon ndachro ndo:

—Ó chóna yuu semana tarichrin anta ko nte anta.

³⁴ Tinóatáana ngajinnta intenta ko jaña chao tsinteenta ixi jaña xro an chujni ste nti i sinchetjáña n̄a ninaa xrajaa n̄a.

³⁵ Juexin ndachro ndo Pablo ji i, tjume e itsé ndo naa nutja ko kuajon ndo juasie ndo ngajin ndo Dio ko stetsje e ni ste nti a, ko konchrinjin ndo nutja ko kuaxi juine ndo.

³⁶ Tjume e juaxruxin bake e kain n̄a ko kuaxi n̄a juine n̄a kaxon.

³⁷ Kain n̄a xraste n̄a ngaxin in nt̄abarco xranchi yuu ciento, ní ikán ko tekjaon n̄a.

³⁸ Ko juexin juinena tjume e juankana noa trigo ngangí inda ixi ítsoyé a nt̄abarco.

Nt̄abarco konunte nt̄aa ngangí inda

³⁹ Ko ó bingasáña, xi tikao nt̄abarco juatsuan i xa tinó juasona ko bikon xa nche xema. Ko xraxaon xa ixi chao satsikao xa nt̄abarco nti a.

⁴⁰ Ko konchrinjin xa ino jixritexin chika gancho ko kuintu a xa chika sakjui chringi nda. Tjume e juinchendá xa nt̄aa timón tekáxin xa nt̄abarco ko juinchengajin in xa manta jii ikon nt̄abarco ko chrinto kuncheka nt̄aa ti jii inche xema.

⁴¹ Ko juasona ti tixin yuu ikon inda ko nt̄abarco ké e nt̄aa nchese. Ko í jua i kontengí nt̄aa, ko tuenxin nt̄abarco kuaxi kuixrato kondeexin chrinto soji.

⁴² Ko kain xi soldado tjaun xa naaxrokóñaxón xa ni steje e ixi tjaun a xa saxrokuinga n̄a.

⁴³ Ko xi tetuen en tjaun a xa tsen en ndo Pablo, méxin kuajon a xa juachaxin jaña xrokron en. Ko kuetuan an xa ixi ngisen chao itsji ngataon inda tsitaon n̄a ti jii inche xema

⁴⁴ ko ngisen noe a itji ngataon inda, sen me e tsjixin sen tu o nt̄abarco. Ko jaña kaina juasona ti jii inche xema ko ninaána xro an nge e kónnana.

28

Ndo Pablo jii ndo isla Malta

¹ Nchakon juachana juasona inche xema, konónana ixi isla me e ndatin in Malta.

² Ko ni tjajna nti a tsango jian n̄a ko bingijnana n̄a kaina ko juaaka n̄a naa xro i ijíe ixi xroxraxonana ixi tsango ikin ko jitania ichrin. Tjume e ndachro n̄a ixi tsonchjiña ana kaina tjenka xro i.

³ Tjume e ndo Pablo jua o ndo kaxin ni o tsixema ko bake e ndo ni o ngata a xro i. Ko tuinxin kuachrje naa kunchee ti jii xro i ixi jichján ba ko kuitsía ba itja ndo Pablo.

⁴ Tjume e ni tjajna nti a bikon n̄a kunchee jitjia ngi ba itja ndo Pablo ko ndache kichuu n̄a:

—Nduaxin xi ji i naa xi tóña chujni ko, maski kuen a xa ti ndachaon, ndo Dio ítjaun a ndo tsehón xa.

⁵ Ko ndo Pablo kontsjenga itja ndo ngata a xro i ixi tsitsinga kunchee me e ko je e ndo xro an nge e kon en ndo.

⁶ Ko kain n̄a stehón en n̄a ixi tsatjuya itja ndo o tuinxin xrokron en ndo ko sée chón en n̄a ko bikon n̄a xro an nge e kon en ndo. Ko tjume e kuindoxin nge e xraxaon n̄a ko kuaxi n̄a ndachro n̄a ixi je e ndo Pablo naa xi dio.

⁷ Ko tjenka nti a jii nunte e naa xi tetuan an isla ndatin in Publio. Xi me e kuajon xa juachaxin kuitunana ndo a xa ko kuajon xa juinena ní nchakon.

⁸ Ko ndotée xi Publio ni e ndo, méxin jitsinga ndo ixi chóna ndo súa ko pojo. Ko ndo Pablo kuitsje e ndo ndo ni e ko juexin nichje e ndo ndo Dio, tjume e bake e itja ndo ngata a jaa ndo ni e ko ndo ni e koxruen en ndo.

⁹ Jaña kaxon konchjiñe e ikaxin ni ni e jii nti a ko kain n̄a koxruen en n̄a.

¹⁰ Tjume e tsango chónde e n̄a ndo Pablo juasaya.* Ko nchakon kuaana inaa nt̄abarco sakjuixinna nti a, kuajon n̄a itsjé nge e xrokondanana.

Ndo Pablo kuiji ndo tjajna Roma

¹¹ Ko kuatsinga ní nchanitjao bake ena isla ko tjume e kuaana naa nt̄abarco tsikitu e nchakon juinche e ikin nti a. Nt̄abarco me e tsiki x̄in tjajna Alejandría ko nganito nt̄abarco me e tsikatsjéya n̄a ikon xi dio Cástor ko Pólux.

¹² Kuachrjexinna nti a juasona puerto tjajna Siracusa ko nti a kuitunana ní nchakon.

¹³ Ko xrastexi inna nt̄abarco, kuatsingana ngande e inche ko juasona tjajna Regio. Ko ndúyaxin kuaxi kuii chrinto níjin, ko nchakon yuxin juasona tjajna Puteoli.

¹⁴ Nti a kuetanna kaxin sen kichuuna, ko juanchanana sen tsitunana nti a ko kuitunana naa semana ko tjume e sakjuina tjajna Roma.

¹⁵ Tjume e sen kichuuna tjajna Roma ó no e sen ixi tsjasona, me e bijiruanaxinna sen ngatja cha o tjajna Foro Apio ko ikaxin sen kuetanna sen tjajna Níi Tabernas. Nchakon ndo Pablo bikon ndo sen kuajon ndo juasaya ngajin ndo Dio ko tsango bake e ndo juaxruxin.

¹⁶ Ko nchakon juasona tjajna Roma, tjume e xi capitán kuajon xa ni tsije e bika o xa ko kuayé e xi tetuan an. Ko ndo Pablo inaa nchia nchíin kuintu e xa ndo ko naa xi soldado tsendáa xa ndo.

Ndo Pablo tjako ndo chijni ngajin ni tjajna Roma

¹⁷ Tjume e kuatsinga ní nchakon, ndo Pablo kuiye e ndo kain ni judío tetuan an jii tjajna Roma. Ko nchakon xra o kain n̄a, tjume e ndachro ndo:

—Kichianna, xro an ti ndako a junta a ngajin ni judío ko ningakuan i nge e kuanche e sen tachrí ina xranchrjen ko maski bijéna n̄a tjajna Jerusalén ti tetuan an ni romano.

¹⁸ Ko ni me e kuitja i n̄a ijié ngajin, méxin tjaun n̄a xrokuajandana n̄a ixi kuitja i n̄a ijié xrokuenxinna jan an.

¹⁹ *Ko ni judío tsango koñao n̄a ko tjankata ana n̄a ijié. Méxin, juanchia ixi xi César xrojuinchéña xa ijié ngajin. Ko jan an xro an ijié tsjankata a sen tjajnána.

²⁰ Méxin, kuiya anta ixi tja on xrobikonnta ko xronichja anta ixi jan an titika on ngisen stechón en kain ni israelita, méxin jai jixritexinna chika cadena.

²¹ Tjume e ndachro n̄a:

—Jan anna kuaya ina ninaa xroon kuixin Judea kondeexin ja a ko kui a ninaa ni kichuuna ndachijina n̄a nge e ndako a tsijinche e ja a.

²² Tja onna tsin anna xranchi xraxaoan ja a ixi ó nónana itsjé tjajna tjaun a n̄a nge e natjúá tjakoa ja a.

²³ Tjume e bake e n̄a naa nchakon tsin en n̄a nge e tjako ndo Pablo ko nchakon me e xra o kueya n̄a ti nchia bake e ndo ko ndúyo xrangíxixión nichja ndo hasta ti kóndo. Me e nichja ndo xranchi jii juachaxin tetuan an ndo Dio. Nichje e ndo n̄a ixi tsitikaon n̄a ndo Jesús, ko juakoxin ndo ixi ley kuajon ndo Moisés ko ti tsikjin sen kuachronga chijnie ndo Dio ó sa ó.

²⁴ Kaxin n̄a kuitikaon n̄a nge e ndachro ndo Pablo ko ikaxin n̄a kuitikaon a n̄a.

²⁵ Ko je a naáko naa nge e xraxaon n̄a ko sakuntekji n̄a, ko ndo Pablo ndachro ndo:

—Chao tsinichja Espíritue ndo Dio ngajin sen kuachrjenixinna ó sa ó ti ndachro ndo profeta Isaías:

²⁶ Itjia nichje é ni tjajna israelita maski je e n̄a tin en n̄a, tienxin a n̄a, ko maski stetsje e n̄a, tikon a n̄a.

²⁷ Ixi aséen ni tjajna me e tsikoncha

* 28:10 juasaya respeto, honor 28:19 Hch. 25:11.

ko ndatsjon na steje e
ko steje e ikon na
ko jua i tsikonxin na ikon na
ko tsien a na ndatsjon na
ko tsitikaon a na ixi aséen na
ko xrokjan i na ngajin ixi sintaxruan an na.

²⁸ Méxin, tsono anta ixi jai ni je a judío tsayé e na nge e tajon ndo Dio ixi tsechón na ko je e na nduaxin tsin en na.

²⁹ Jaña ndachro ndo Pablo, ko tjume e ni judío sakjui na ko stetjakaxin kichuu na.

³⁰ Ko ndo Pablo kuitu e ndo yuu nano nchia tsikjen ndo ko kuayé e ndo kain ni itji tikitsje e ndo.

³¹ Ko juinhekuen en ndo na ixi ti tetuan an ndo Dio ko juako ndo nge e juinche e Ncháina Jesucristo ko xro an ngisen bakoñaao.

Xroon tsikjin ndo Pablo xrúen en ndo sen ste tjajna Roma

Ndo Pablo ikjin ndo xroon kuayé e sen tjajna Roma

¹ Jan an, Pablo, nta a xrée ndo Jesucristo ikjin xroon ji i. Ndo Dio kuinchena ndo jan an ixi sinta a xrée ndo, ixi tsjako chijni jian, chijni tsingijna chujni tsechón nã kain nchakon.

² Jaña tsindachro ndo Dio tson en ixi jaña jitaxin xroon tsinichjaxin sen kuachronga chijnie ndo ó sa ó.

³ Chijni ji in tikinixin en Ncháina Jesucristo Chjen en ndo Dio. Je e ndo ikjan ndo chujni ko kuachrjenixin ndo sen kuachrjenixin ndo rey David.

⁴ Ko juachaxin ijié chónnda Espíritue ndo Dio juinhexechón ndo Jesucristo ti kuen en ndo me e juako ixi nduaxin ndo Jesucristo, Chjen en ndo Dio.

⁵ Ixi ndo Jesucristo me e kuaye ena juachaxin ixi sintu una xrée ndo, xronichjana chijnie ndo ngajin kain chujni chúxin a ndo, chujni ste nchijí nunte xasintajni, ixi tsitikaon nã ndo ko xrochuntia nã ndo.

⁶ Ko ja anta ni ste tjajna Roma, ndo Dio kuincha anta ndo ixi tsitikaonnta ndo Jesucristo.

⁷ Méxin, ikjin xroon ji i xrúan annta kainnta xro stenta tjajna Roma. Ndo Dio tjua anta ndo ko je e ndo kuincha anta ndo ixi xrokjannta chjen en ndo. Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Ndo Pablo tjaun ndo itsji ndo tsitsje e ndo sen tjajna Roma

⁸ Sa ó tajon juasaya* ngajin ndo Dio ixi juachaxien ndo Jesucristo ixi kain ja anta ko ixi nguixin no nichja nã jian ixi ja anta tsango chuntianta ndo Dio.

⁹ Jan an nta a xrée ndo Dio, ixi nchijí aséenna, ko nichja chijnie Chjen en ndo, ko Ndo Dio jian no e ndo ixi kain nchakon tjancha a ndo ixi ja anta.

¹⁰ Ko kaxon kain nchakon tjancha a ndo tsajon ndo juachaxin ixi chao tsjasotsja anta.

¹¹ Tja on tsikonnta ko jaña tsingijnanta ixi jian xroxraxaonnta ko chao tsojojinta ko jaña ícha tsitikaonnta ndo Dio.

¹² Jaña tsingijna kichuuna ko juaxruxin tsojuna ixi naxraje o chuntiana Ncháina Jesucristo.

¹³ *Kichuuna, tja on tsono anta ixi ó chónnda itsjé nchakon tja on xrojuasótsja anta ko xrajua i tjaso. Tja on tsjaso xronichja chijni jian ngajin chujni ixi tsitikaon nã ndo Jesús xranchi kuanichja ikaxin tjajna ti xrachuxin a nã ndo.

¹⁴ Xrokonda sintakuan an ngajin kain nã, á ni griego o á ni je a griego, á ni no e o á ni noe a.

¹⁵ Méxin, tsango tja on tsjaso tjajna Roma ixi sintakuan annta chijni jian, chijni xrotjáanta juachaxin tsarichonnta kain nchakon.

Juachaxin chónnda chijni jian

¹⁶ *Jan an tosuana i nichja chijnie ndo Dio ixi chijni ji i chónnda juachaxien ndo, ixi kain ni tsin en ko tsitikaon, ni me e tsechón nã kain nchakon, sa ó ni judío ko kaxon ni je a judío.

¹⁷ Ixi chijnie ndo Dio tjakoina xranchi tsomé e jéina ixi jajna chuntiana ndo Jesucristo. Xranchi ndachro xroon chijnie ndo Dio: “Ngisen chuntia chijnie ndo Dio tsechón sen kain nchakon.”

Kainna chondana ije

* 1:8 juasaya respeto, honor 1:13 Hch. 19:21. 1:16 Mr. 8:38.

¹⁸ Ndo Dio jii ngajni tsango toña ndo ngajin ni ña i ko ni ndako a nche e, ko kondeexin ti ndako a nche e na me e tingakon en ixi ikaxin chujni tsono e chijni nduaxin.

¹⁹ Je e na ó no e na jian ixi chao xrochúxini ndo Dio ixi je e ndo juako ndo ngajin na juachaxien ndo ixi juinchéña ndo kain nge e ngata a nunte xasintajni.

²⁰ Maski tikon ana ndo Dio, noina ixi je e ndo juinchéña ndo kain nge e ko tikonna kain juachaxien ndo, méxin chao tsichuxinna ndo. Ko ni ndako a nche e jua i xrondachro na noe a na nge e nche e na ixi je e na tikonna kain ji i kaxon.

²¹ *Maski no e na jii ndo Dio, chónde a na ndo juasaya xranchi tikinixin en tsayé e ndo; je o xraxaon na sinche e na nge e ndako a ko tsikoncha aséen na ko ndako a xraxaon na.

²² Je e na xraxaon na ixi no e na kain nge e ko nduaxin a; xro an nge e no e na.

²³ Xrokuajon na juasaya ngajin ndo Dio, ndo ícha tituan an, ndo jichón kain nchakon, ko nche a na jaña. Je o tajon na juasaya ngajin nge e jichón a xranchi naa ngisen tsiken en o xranchi kuxe tjanga, ko iko chóna noó tutée ko kaxon kunchee.

²⁴ Méxin, ndo Dio kuintu e ndo na sinche e na nge e ndako a tjaun na, ti je o chóna kichuu na xranchi xi ko xi, ko nchri ko nchri, me e nche e nge e tosuexinni.

²⁵ Kuitikaon a na ndo Dio, ndo nduaxin jichón, ko kuitikaon na juancheya; kuajonna juasaya ngajin nge e tsijinchéña ndo Dio ko kuajon a na juasaya ngajin je e ndo, ndo juinchéña kain nge e. Je e ndo tikinixin en ndo juasaya kain nchakon. Jaña tson en.

²⁶ Méxin, ndo Dio kuintu e ndo na sinche e na nge e ndako a ti tosuexinni, xranchi nchri ko nchri je o nchra chóna kichuu nchra, ko ji in tjaun a ndo Dio xrokon en.

²⁷ Kaxon jaña xi chóna i nchri ixi je o xi ko xi chóna kichuu xa, me e naa nge e tosuexinni ko kondeexin me e tangi ichin xrotsé xa.

²⁸ Ko je e na xraxaon a na ndo Dio, méxin je e ndo kuintu e ndo na xraxaon na kain nge e ti ndako a ko sinche e na ti ndako a xraxaon na.

²⁹ Kueya ti ndako a nche e ni me e. Je o nge e ndako a nche e na; tjaun na xrochóna na inaa nchri, nchri je a janchri e na, ko tsango ña i na, ko tjaun na je o xrochóna na itsjé nge e, ko méxin chóna na ijie, ko tsango chjuye e na, ko tjaun na naatsónaxón na chujni, ko je e na ncheketo kichuu na, ko ncheya na ko nichja na nge e nduaxin a ixi inaa chujni.

³⁰ Nichjangí e kichuu na ko ningakon en na ndo Dio, ko je o na tjaun na tsituan an na, ko nchejié aséen na, ko xraxaon na ixi tsango tjintee na, je o xraxaon na xranchi sinche e na ti ndako a ko titikaon a na ndotée na ko janée na.

³¹ Tjaun a na tsienxin na ko nche a na ti ndachro na xrojuinche e na, ko tjue a kichuu na, ko tjaun a na xrotjáñe e na nge e juinchekao kichuu na, ko tikonóe a kichuu na.

³² Ni me e no e na nge e tsiketuan an ndo Dio ko no e na ixi ngisen jaña sinche e tikinixin tsen en, ko maski jaña no e na, xranche e na kain me e ko xratake e na juaxruxin ti tikon na inaa ngisen naxraje o jaña nche e.

2

Ndo Dio jian nchéña ndo ijie ngajin chujni

¹ *Nchakon tsjankata anta ijie ngajin inaa chujni, ja onta tsamanta ijie ixi kaxon ja anta nche enta ti ndako a.

² Ó noina ixi nchakon ndo Dio nchéña ndo ijie ngajin ngisen sínká naa nge e, ixi ti nduaxin nchéña ndo ijie.

³ Ko ja anta, ti tsjankata anta ijie ngajin ikaxin chujni, ¿á xraxaonnta chao rinche enta siá naxraje o ndako a nche enta?, ko, ¿á ndo Dio xro an ijie sinchéña ndo ngajinnta? Ja anta jua i satsinge enta ndo.

⁴ ¿Á xraxaonnta ixi xro an tjintee ti ndo Dio tsango jian ndo ko taka i toñao ndo ngajinnta? ¿Á noa inta ixi ti jian nche e ndo ngajin chujni, ji i nche e ndo ixi tsitikaonnta ndo ko tsintu enta ti ndako a?

⁵ Ko siá rinche enta ti ndako a ko ncheníe a asáanta ja onta ritamanta ixi ícha tangi tsintekon annta. Tsij nchakon ndo Dio sinchéña ndo ijie ngajin kain chujni ko je e ndo tsango tsoñao ndo ko tangi tson annta,

⁶ ixi je e ndo tsjenga ndo nã ngajin ngujngu chujni ti ixra tsijinche e nã.

⁷ Ko tsajon ndo juachaxin tsechón nã kain nchakon, ni juée kain juachaxien ndo Dio ko juée nã tsechón nã ti jii je e ndo, ko ni ndako ko jian juinche e ixra.

⁸ Ko tsoñao ndo Dio ngajin ni nchejié aséen ko ni tjaun a tsitikaon ti ndako tjako ndo. Ni ji i tangi tsintekon en nã ixi ícha juaxruxin nche e nã ti ña i.

⁹ Tangi tson en kain ni juinche e nge e ña i, ko ni me e xrochónnda nã itsjé juachjaon, sa ó ni judío ko kaxon ni je a judío.

¹⁰ Ko ndo Dio tsajon ndo juachaxin ko juaxruxin ko xrochónde e ndo juasaya ngajin kain ni kuitikaon ndo, ko sa ó ni judío ko kaxon ni je a judío.

¹¹ Ixi ndo Dio je a je o tjue e ndo kaxion chujni ixi kain nã naxraje o tjintee nã.

¹² Kain chujni chónnda ijie, ko maski noe a nã nge e tsikjin ndo Moisés, xraje o tsama nã ijie. Ko chujni kuayé e ley tsikjin ndo Moisés, ko nche e nã ti ndako a, ley me e tsóñexin nã ijie.

¹³ Je a je o ixi tsin en nã ley, me e xrokotjúáxin jíee nã. Na i. Xrokonda tsitikaon nã nge e tituan an ndo Dio.

¹⁴ Kaxin ni je a judío, siá jian nche e nã, maski chúxin a nã ley tsiketuan an ndo Dio, je o nã ndako tituen en nã aséen nã, ko no e nã nge e jian ko nge e ndakua i jii.

¹⁵ Ixi nge e jian nche e nã, tikonni ixi ngaya aséen nã jitaxin ti tituan an ley ko aséen nã xraxaonxin nã á chao ste nã o na i.

¹⁶ Naa nchakon ndo Dio sinchéña ndo ijie ngajin kain ti imao juinche e chujni. Ji i tson en ixi juachaxien Ncháina Jesucristo xranchi jitaxin chijni jian tjako jan an.

Ni judío ko ley tsikjin ndo Moisés

¹⁷ Kaxinnta ndachronta ixi judío ja anta ko xraxaonnta ixi jian titikaonnta ley kuayé e ndo Moisés ko nchejié asáanta ixi chujnie ndo Dio ja anta.

¹⁸ No anta nge e tjaun ndo Dio ko ixi ley noaxinnta sinche enta ti jian.

¹⁹ Ja anta nchejié asáanta ixi ndachronta ixi chao sinchekuen ennta ni ndako a nche e ko chao tsingatse enta nã ixi tsitjáña i nã ti ichrji nã ti naxixe e.

²⁰ Ndachronta ixi no anta sinchekuen ennta ni noe a ko tsingijnanta ni tienxin a ixi ja anta chondanta ley chronga xranchi xroxraxon chujni ti nduaxin.

²¹ Ko ja anta, ¿xranchi sinchekuen ennta ikaxin chujni, siá ja anta tangi anta? ¿Xranchi tsjako enta chujni tsee a nã siá ja anta itsenta ti tikinixian inta?

²² Ndachronta ixi jua i xrochónnda nã inaa nchri o xi je a janchri e o ndoxi e nã, ko ja anta, ¿sonda jaña nche enta? Ndachronta ixi titikaon anta ídolo, ko, ¿sonda te enta nge e tjintee jii ngaxin in ningue ídolo?

²³ Ja anta nchejié asáanta ixi chuxinnta ley, ko titikaon anta nge e tituan an ley, ko jaña chonde anta juasaya ndo Dio.

²⁴ Ndako ndachro xroon jitaxin chijnie ndo Dio: “Kondeexin ja anta ni je a judío nichjangí e nã ndo Dio.”

²⁵ Siá nduaxin xrokuitikaonnta ley kuayé e ndo Moisés, je a xruenxon tsikaannta chji e ndo Dio. Ko titikaon anta ley, me e xrokjui xranchi tsikaa inta chji e ndo.

²⁶ Ko chujni tsika i chji e ndo Dio ko titikaon nã xranchi tituan an ley, ni me e xranchi ó tsikaa nã chji e ndo, maski nduaxin a chónnda nã chji e ndo.

²⁷ Ko chujni kua i chji e ndo ko titikaon ley, ni me e tsjankata anta na ijie ixi ja anta chuxinnta ley ko kuitikaon anta, maski chondanta xroon jitaxin ley ko maski tsikaannta chji e ndo.

²⁸ Ko je a nduaxin judío ja anta je o ixi ó chondanta chji e ndo cuerpoanta xranchi nche e kain ni judío.

²⁹ Ni nduaxin judío xrokonda xrochóna na chji e ndo ngaya aséen na, ji i naa nge e nche e Espíritue ndo Dio, ko je a je o tsitikaon na nge e jitaxin xroon. Ko ni nche e jaña, nduaxin judío na, ko ndo Dio jii ndo juaxruxin ixi jaña nche e na maski ikaxin na i.

3

¹ ¿Á tjintee ti ndachro na judío na? O, ¿á tjintee ti tsikaa na chji e ndo Dio?

² Jaán, tjintee me e ixi ndo Dio kuajon ndo chijnie ndo sa ó kuayé e ni judío ixi xrokuitikaon na.

³ Méxin, siá xrojan je e na xrokuitikaon a na, ¿á kondeexin me e, kaxon ndo Dio ísinche a ndo kain nge e tsindachro ndo sinche e ndo ngajin chujni?

⁴ Na i. Ndo Dio sinche e ndo kain nge e tsindachro ndo sinche e ndo, maski kain na xrojuincheya na. Ja in ndachro xroon chijnie ndo Dio:

Kain chujni xrondachro na ixi ja anta ndo Dio

ko nduaxin ndachronta kain nge e.

Méxin, nchakon tsjankata anta na ijie, ja anta tsjachanta.

⁵ Siá ti ndako a nche ena, tjakona ixi ndo Dio jian ndo, ¿méxin nge e xrondachrona? ¿Á chao xrondachrona ndako a nche e ndo Dio ixi tajon ndo juachaxin tangi tsojna? (Jan an rinichja xranchi nichja ngixe i naa chujni.)

⁶ Na i, siá ndo Dio je a tsango jian xrokjui ndo, ¿xranchi jian xrojuinchéña ndo ijie ngajin kain chujni nunte xasintajni?

⁷ Ko siá kondeexin ti juintaya me e konoxin ti nduaxin juako ndo Dio, ko jaña itsjé na ícha xrochónde e na ndo juasaya, ¿sonda tsama ijie jan an kondeexin ti me e?

⁸ Méxin, ¿á cháña sinche eni ti ndako a ixi jaña tsj xjn nge e jian? Jan an me e tjako, ichro kaxin chujni, ko méxin, nchekamana na ijie, ko ni jaña tjangina, tangi tsintekon en na kondeexin jaña ichro na.

Kainna chondana ijie

⁹ ¿Nge e xrondachro kain ji in? Ixi jan anna judíona, ¿á ícha tjinteena ixi ikaxin chujni? Na i. Ó ndachrjan á judíona o je a judíona, kainkona chondana ijie.

¹⁰ Ndachro xroon chijnie ndo Dio:

Xro an chujni nche e nge e jian,

kain chujni chóna na ijie.

¹¹ Xro an ngisen tienxin,

ko xro an ngisen tjée ndo Dio.

¹² Kainko na tsingachrue na,

ko kain na nche e na ti ndako a me e tsitjáñaxin na.

Xro an ngisen tjaun sinche e ti jian, ninaa chujni.

¹³ Tusin na jii xranchi naa tuye jixrange e ti tsixrabaa chujni,

je o no e na ncheya na.

Ro a na chóna nge e xranchi ndachikjeen kunchee.

¹⁴ Jeoxón nge e ndako a nichja na,

ko ndako naa nge e itsjá tono eni ti nge e nichja na.

¹⁵ Tuinxin chjée na juaño

ko tjaun na naatsóñaxón na chujni.

¹⁶ Ti ndako a nche e na,

me e nchetjáña ikaxin chujni ko tika o ícha juachjaon,

17 ko chúxin a n̄ cha o tajon juaxruxin

18 ko xraxaon a n̄ xroxrakon en n̄ ndo Dio.

19 Noĩna ixi kain nge e nichja xroon jitaxin ti tetuan an ndo Dio, me e kuetuen en kain ni kuayé e ley ixi jaña kain chujni ste nunte xasintajni xrotenko n̄ ko ndo Dio sinchéña ndo ijie ngajin kainxin chujni.

20 *Ixi xro an ngisen tsumé e jíee ixi je o xrokuitikaon n̄ nge e tituan an ley. Ley je o nchenoĩna ixi chondana ijie.

Tsitjáña ina siá chuntiana ndo Cristo

21 Ko je a ley tsingijnana ixi chao tsumé e jíeina. Jai konoxin ixi ndo Dio tsingijnana ndo xranchi chao tsumé e jíeina, ko ji i jitaxin xroon ti tsiketuan an ndo Dio ko nge e kuanichja sen kuachronga chijnie ndo Dio ó sa ó.

22 *Tsumé e jíeina ixi chuntiana ndo Jesucristo, ixi je e ndo naxraje o tikon ndo tjintee kainni.

23 Ixi kain chujni chónnda n̄ ijie, ko jua i tsikon n̄ juachaxin chónnda ndo Dio méxin chonda i n̄ juachaxin tsake e n̄ ti jii ndo Dio.

24 Juasie ndo Dio ixi tsango jian ndo ko sinchemé e ndo jíeina ixi ndo Cristo Jesús kuen en ndo kondeexin jíeina.

25 Ndo Dio xruan an ndo ndo Cristo, ko kuenxin ndo kondeexin jaina, ko xrokonda xrochuntiana ndo; jaña tsumé e jíeina. Jaña juinche e ndo Dio koña a ndo maski kueya ti ndako a juintu una sa ó.

26 Jaña juakoxin ndo Dio ixi jian ndo, ko jai xrajichon en ndo sinchemé e ndo jíee kain chujni chuntia ndo Jesús.

27 Méxin, ¿á tjintee ti nchejié aséenni? Na i. Íjua i sinchejié aséen chujni ngajin ndo Dio, ko je a ixi kuitikaonna nge e tetuan an ley, méxin koméexin jíeina. Na i. Koméexin jíeina ixi chuntiana Ncháina Jesucristo,

28 ko jaina noĩna ixi tsuméxin jíeina siá chuntiana ngajin ndo, ko je a ixi kuitikaonna nge e kuetuan an ley.

29 Ndo Dio, ¿á je o Dio ne e ni judío? Na i, je e ndo Dio ne e kain chujni, kaxon ni je a judío.

30 *Ixi naakua ndo Dio jii, ko je e ndo sinchemé e ndo jíeina ixi chuntiana ndo ko xrotsje a ndo á chondana chji e ndo o na i.

31 Ko siá chuntiana Ncháina Jesucristo, ¿á íxrokuitikaon ana ley kuetuan an ndo Dio? Na i, ícha ndako tsitikaonna ley kuetuan an ndo.

4

Nge e juako ndo Abraham

1 Xraxaonna, ¿á kuitee nge e juinche e ndo Abraham, ndo kuachrjenixinna ó sa ó?

2 Siá ti ndako juinche e ndo Abraham me e xrokoméexin ixi ti ndako a juinche e ndo, juaxruxin xrobake e ndo ixi me e, ko chao xrojuinchejié aséen ndo, ko kain me e tjinte a ngajin ndo Dio.

3 *Ko ndachro xroon jitaxin chijnie ndo Dio: “Ndo Abraham tsango chuntia ndo ngajin ndo Dio, méxin komé e jíee ndo.”

4 Ko noĩna ixi naa ngisen nche e ixra xenge e sen n̄, je a jaña tayé e sen tomi. Ixi ixra juinche e sen, méxin tjachaxin sen.

5 Ko je a naxraje o xraxaon ndo Dio. Ndo Dio nchemé e ndo jíee chujni maski xro an ixra juinche e n̄, je o xrokonda xrochuntia n̄ ndo.

6 Xranchi ndachro ndo David: Juaxruxin tsintee ni komé e jíee, maski xro an nge e jian juinche e n̄, je o kuitikaon n̄ ndo Dio.

⁷ Ko ja in jitaxin xroon chijnie ndo Dio:
Juaxruxin tsintee na ixi ndo Dio juinchemé e ndo jíee na,
maski ndako a juinche e na,
ko tjáñe e ndo Dio ijie juinche e na.

⁸ Juaxruxin tsintee na ixi Ncháina juinchemé e ndo ijie kuachóna na.

⁹ A juaxruxin ji i, ¿á je o ni chóna chji e ndo tikinixin en juaxruxin?, o, ¿á kaxon ni chóna i chji e ndo? Ko ó ndachrjan ixi ndo Dio juinchemé e ndo jíee ndo Abraham ixi ndo Abraham chuntia ndo ndo Dio.

¹⁰ Méxin, ¿ngisa juinchemé e ndo Dio jíee ndo Abraham? ¿Á ti ó tsikaa ndo Abraham chji e ndo Dio?, o, ¿á ti xratsika i ndo chji e ndo Dio? Sa ó juinchemé e ndo Dio jíee ndo Abraham, ko tjume e ndo Abraham kua ndo chji e ndo Dio.

¹¹ Ko ndo Abraham tjume e kua ndo chji e ndo Dio ixi jaña xrojuako ndo ixi ndo Dio ó juinchemé e ndo jíee ndo Abraham ixi chuntia ndo ndo Dio. Tjume e jaña ikjan ndo Abraham ndotée kain sen chuntia* ndo Dio, maski tsika i sen chji e ndo.

¹² Ko kaxon ndo Abraham, ndotée kain chujni tsikaa chji e ndo Dio, siá chuntia sen ndo Dio xranchi chuntia je e ndo Abraham, nchakon xratsika i ndo chji e ndo Dio.

Nge e tsajon ndo Dio ngajin sen chuntia ndo

¹³ *Ndo Dio tsindache ndo ndo Abraham ixi je e ndo ko ni tsachrjenixin ndo tsayé e na nunte xasintajni. Ko tsayé e ndo Abraham ji i je a ixi kuitikaon ndo ley. Na i. Ixi chuntia ndo ndo Dio ko ndo Dio juinchemé e ndo jíee ndo.

¹⁴ *Méxin, siá ndo Dio xrokuajon ndo nge e ndachro ndo je o ngajin ni titikaon ley, méxin xro an tjintee ti xrochúntiani ndo Dio ko méxin tjinte a ti nge e ndachro ndo xrokuajon ndo.

¹⁵ Siá tsitikaon ani nge e jitaxin ley, tangi tson enni. Ko siá xro an ley xrokuake e, kaxon xrokuama i ijie.

¹⁶ *Méxin, ti tsindachro ndo Dio tsajon ndo ngajin ndo Abraham ko ngajin kain ni tsachrjenixin ndo, tjintee me e ko je o chuntia ndo Abraham ngajin ndo Dio ko xro an nge e ícha juanchia ndo Dio. Ko chao tsayé eni nge e tsajon ndo Dio ko kaxon ngajin kain sen chuntia ndo, xranchi kuayé e ndo Abraham ixi chuntia ndo ngajin ndo Dio, ko je a je o ni titikaon ley tsayé e na. Méxin jaña, ikjan ndo Abraham ndotée kain chujni.

¹⁷ Xranchi jitaxin chijnie ndo Dio: “Jan an kuajon juachaxin ixi ja anta xrokjannta ndotée itsjé ni ste nunte xasintajni.” Méxin ndo Dio sinche e ndo nge e tsindachro ndo ixi ndo Abraham jian kuitikaon ndo. Ndo Dio je o je e ndo nchexechón ndo ni tsiken en, ko tituan an ndo ixi tsake e nge e ko a.

¹⁸ Maski xro an ichjan kuachóna ndo Abraham, je e ndo kuitikaon ndo ndo Dio, méxin ikjan ndo ndotée kueya chujni xranchi tsindachro ndo Dio ngajin ndo Abraham: “Kueya chujni tsachrjenixin ja anta.”

¹⁹ Maski ndo Abraham ó kuachóna ndo xranchi naa ciento nano, ko no e ndo ixi ó taka xrokuen en ndo, ko janchri e ndo, jan Sara, ó nachríi jan ko jua i xrochóna jan ichjan, je e ndo chuntia ndo ndo Dio,

²⁰ ko jian no e ndo ixi ndo Dio xrokuajon ndo nge e ndachro ndo. Ko tsango chúntia ndo ndo Dio ko bakajon ndo juasaya ngajin ndo Dio.

²¹ Ko no e ndo Abraham ixi chóna ndo Dio ijie juachaxin sinche e ndo kain nge e ti tsindachro ndo.

²² Méxin, ndo Dio jian bikon ndo nge e juinche e ndo Abraham ti chuntia ndo, ko jaña ndo Dio juinchemé e ndo ijie kuachóna ndo Abraham.

²³ Ko ti jitaxin xroon ixi ndo Dio juinchemé e ndo jíee ndo Abraham, je a je o jíee ndo;

* **4:11 chuntia** tener fe **4:13** Gá. 3:29. **4:14** Gá. 3:18. **4:16** Gá. 3:7.

²⁴ kaxon sinchemé e ndo jíeina ixi tsitikaonna ndo, ndo juinchexechón Ncháina Jesucristo,

²⁵ ko kuajon ndo ndo Jesucristo kuenxin ndo ixi jaina. Ko xechón ndo ínggo ixi jaña xrokomé e jíeina ko jai íxro an nge e sinkana.

5

Jian tsinteena ixi ndo Dio juinchemé e ndo jíeina

¹ Komé e kain jíeina ixi chuntiana ndo Cristo ko chao stena ngajin ndo Dio ixi Ncháina* Jesucristo kuenxin ndo ixi jaina.

² Ixi juasie Ncháina Cristo Jesús, chao tonchjiñe ena ngajin ndo Dio ixi chuntiana ndo ko je e ndo tjaunna ndo ko méxin jaña ícha chuntiana. Ko juaxruxin stena ixi stechon enna tsayé ena juachaxin ijié chóna ndo.

³ Ko je a je o me e. Kaxon juaxruxin tsinteena maski tangi stena ngata a nunte nti i ixi noina kain juachjaon me e, ícha nchesoji aséeina.

⁴ Ko ti soji tsintee aséeina, me e jaña jian tsatsingana kain nge e tangi ixi stechon enna naa nge e jian tsiji.

⁵ Ko ti jian stechon enna nduaxin tsiji ixi ndo Dio tsango tjaunna ndo ko tsichjaina ndo Espíritue ndo.

⁶ Ko jaina chondana ijié, ko jua i jaiona sinchemé ena ijié me e. Ndo Cristo kuen en ndo ixi kain chujni chóna jié, kuen en ndo nchakon ndachro ndo Dio kondeexin ijié chóna kain chujni.

⁷ Xro an ngisen teenxin ixi inaa ngisen maski sen me e jian sen. Maski chao xrokuenxinni ixi inaa ngisen nduaxin juinche e ti jian.

⁸ Ko ndo Dio juakoina ndo ixi tsango tjuaina ndo; maski chondana ijié, xruan an ndo ndo Cristo kuenxin ndo ixi jaina.

⁹ Méxin, ndo Dio juinchemé e ndo jíeina ixi ndo Cristo kuenxin ndo ixi jaina. Jai ó noina ixi je e ndo chjaina ndo juachaxin tsechónna kain nchakon† ko je a tangi tsatsingana nchakon tsjexin kain nge e.

¹⁰ Ixi, maski bakoñao ena ndo Dio, je e ndo kuajon ndo juachaxin tsonchjiñe ena ngajin ndo ixi Chjen en ndo kuenxin xjan ixi jaina, ko jai noina ixi tsingijna ndo tsechónna kain nchakon ixi jichón chjen en ndo ko juaxruxin tsonjoku una xjan.

¹¹ Ko je a je o ji i. Kaxon ndo Dio chjaina ndo juaxruxin ixi chao tonchjiñe ena ngajin ndo ixi juasie Ncháina Jesucristo.

Xi Adán ko ndo Cristo

¹² Sa ó naakua naa sen juinche e ti ndako a, méxin, chujni nchijíi nunte xasintajni kuama na ijié. Jaña kuii kaxon ti ten en aséenni, méxin kaina chondana ijié ko kaina tikinixin enna tsen en na.

¹³ Sa ó ti xrabake a ley tsiketuan an ndo Dio, kain chujni nunte xasintajni kuanche e na ti ndako a, ko ixi xro an ley jii, méxin, jua i sinchekamani ijié naa ngisen ndako a juinche e.

¹⁴ Xra ti bake e ndo Adán ko kuii nchakon bake e ndo Moisés, kuinteken en aséen chujni kondeexin ijié juinche e na. Maski jíee na je a ti kuitikaon a na xranchi juinche e ndo Adán, ixi je e ndo kuitikaon a ndo nge e kuetuan an ndo Dio. Ko ndo Adán juako ndo xranchi xrokuii inaa ndo ícha tjume e.

¹⁵ Ko ijié juinche e ndo Adán jua i xrondachrona naxraje o ixi ti nge e jian nchekituina ndo Dio. Ko ixi naakua ngisen kuitikaon a, kondeexin me e, kueya na kuinteken en na. Jai juasie ndo Dio, xruan an ndo naakua naa ngisen, ndo Jesucristo, ko ixi je e ndo

* 5:1 Ncháina Señor Ncháina Jesús o Ncháina Dio † 5:9 tsechónna kain nchakon vida eterna

komé e jíeina. Ji i naa nge e ícha jian juinchekitoina ndo ixi kueya na tsayé e na juachaxin tsechón na kain nchakon.

¹⁶ Ijie juinche e naakua naa ngisen je a naxraje o ixi ti juachaxin juinchekitoina ndo Dio, ti tsechónna kain nchakon. Kondeexin ijie ti kuitikaon a ndo Adán, méxin kuamana ijie ko tikinixianna tsen enna. Ko jai juasie ndo Dio juinchekitoina ndo juachaxin tsechónna kain nchakon, ko je e ndo nchemé e ndo kain ijie chondana maski tikinixian ina me e.

¹⁷ Méxin, siá kondeexin ijie juinche e ndo Adán, tsen en kain chujni, jai chao xron-dachrona ixi naakua naa ngisen, me e ndo Jesucristo, je e ndo kontjúáxin ijie kuachondana, méxin chondana juachaxin tsojuna jian ngajin ndo ixi ndo Dio tjuajina ndo, ko xrokonda i jajina sintu una naa nge e ixi tsjachana juachaxin me e.

¹⁸ Méxin, ixi ijie juinche e ndo Adán, kain chujni kuama na ijie ko kuinteken en na. Ko jai ndo Cristo juinchemé e ndo ijie chónnda kain chujni, ko kuajon ndo juachaxin tsechón na ixi jian ndo ko kuenxin ndo ixi jajina.

¹⁹ Ixi naakua naa ngisen kuitikaon a, ndo Adán juinche e me e, méxin kueya chujni kuama na ijie. Jaña jai, kaxon naakua naa ngisen jian kuitikaon, me e ndo Cristo, ko ixi je e ndo tsoméxin jíeina.

²⁰ Bake e ley kuetuan an ndo Dio ko chujni ícha juinche e na ti ndako a ko kuama na ijie. Ko maski jaña ícha ijie kuama chujni, ndo Dio ícha bikonóe e ndo na.

²¹ Kondeexin ijie me e bake e juachaxin tsen en chujni. Ko jaña kaxon ndo Dio ícha chónnda ndo juachaxin sinchemé e ndo jíee chujni ko tsajon ndo juachaxin tsechónna kain nchakon ixi Ncháina Jesucristo kuenxin ndo ixi jajina.

6

Juasie ndo Cristo stechónna kain nchakon

¹ Ko jai, ¿á xraxaxaonna sintu una ti ndako a ixi jaña ndo Dio ícha tsikonoina ndo?

² Na i. Jai jajina í chonda ina nge e xrotsje ena ngajin kain ti ndako a ko kain ijie tamani ixi ó kuintu ena kain me e.

³ ¿Á noa inta ixi nchakon bikitéena ó kuitikaonna ko rué ena ndo Cristo, ji i xrokjui kaxon xranchi xrokue enna xranchi je e ndo?

⁴*Nchakon bikitéena, nchakon me e kuen enna ko xrabaana xranchi je e ndo ixi xroxechónna ko xrochondana juachaxin tsechónna kain nchakon ko jian tsajina, xranchi ndo Cristo xechón ndo ixi juachaxin ijié chónnda Ndotée ndo, ndo Dio.

⁵ Siá kuen enna xranchi kuen en ndo Cristo, kaxon xroxechónna xranchi xechón je e ndo.

⁶ Ó noina ixi sa ó bakamana ijie, ko nchakon ndo Cristo kuen en ndo nganito ntacru jaña kuitjáña kain ijie kuachondana, jajina kaxon kuen enna ko ijie ítituan i ngajinna.

⁷ Ixi nchakon ten en naa ngisen íxro an juachaxin jii tsama sen ijie.

⁸ Ko jajina, siá kuen enna ixi kuen en ndo Cristo, noina ixi xroxechónna kaxon, ko tsonjoku una ndo kain nchakon.

⁹ Noina ixi ndo Cristo xechón ndo ko ínai a tsen en ndo ixi xichononte* í chónnda i xa juachaxin ngajin je e ndo.

¹⁰ Nchakon kuen en ndo Cristo, kain ijie í chonda i juachaxin ngajin chujni. Ko jai jichón ndo Cristo ko jii ndo ngajin ndo Dio.

¹¹ Jaña kaxon ja anta xraxaonnta ixi kain ijie íxro an juachaxin chónnda ngajinnta ixi ó titikaonnta ndo Cristo Jesús ko je e ndo tjáanta ndo juachaxin tsarichonnta kain nchakon, ko ti jai stechonnta, me e sinche enta nge e tjaun ndo Dio.

¹² Méxin, tintue anta tsituan annta ti ndako a íjngo ko sinchekateya i cuerpoanta sinche enta ti ndako a.

¹³ Tintue anta cuerpoanta sinche e ti ndako a, cháña tájonnta asáanta ngajin ndo Dio xranchi tikinixin sinche e naa ngisen tsiken en ko tsixechón íjngo. Tájonnta cuerpoanta ngajin ndo Dio ixi sinche enta naa ixra jian xranchi tjaun je e ndo.

¹⁴ Ixi jai ijie íxrochónnda i juachaxin tsetuan annta jai ixi í je a ley tituan annta. Na i, ti tjua anta ndo Dio me e tituan annta.

Ntu una xrée ndo Dio

¹⁵ Ko jai, ¿nge e sintu una? ¿Á xrasintu una ti ndako a, me e tsamana ijie ixi ítituan ina ley ko ti tjuajina ndo Dio me e tituajinna? Sintu ina jaña.

¹⁶ Ja anta jian no anta ixi, siá titikaonni kain nge e tituan an naa ngisen, je eni ikjanni ni nchexrée sen me e. Jaña ton en kaxon, siá titikaonnta ko nche enta nge e ndako a, ja anta ikjannta ni nche e xrée ti ndako a ko ji i tsenxinni. Ko nchakon tsitikaonnta ndo Dio, je e ndo xrotjáanta ndo juachaxin tsake enta ngajin ndo.

¹⁷ Jai juasie ndo Dio, bikonóa anta ndo. Sa ó kuachondanta ijie ko ijie me e baketan anta, ko jai ixi nchijí asáanta kuitikaonnta nge e jian kuin ennta.

¹⁸ Ko jai kuintu enta ti bakamaxinta ijie ko kuajonnta asáanta ngajin ndo Dio ixi jian nche enta xrée Ncháina Jesucristo.

¹⁹ Jan an rinichja xranchi nichja ngixe i naa chujni ixi ja anta xratiexin anta jian nge e ji i. Sa ó kuitikaonnta nge e ña i ko bakajonta cuerpoanta ixi kuanche enta nge e ndako a. Ko jai xrokonda tsajonnta cuerpoanta ngajin ndo Dio ixi sinche enta ixra jian xranchi tjaun je e ndo.

²⁰ Nchakon ti ña i batituan annta kondeexin me e bakamaxinta ijie, jua i kuanche anta nge e tjaun ndo Dio.

²¹ ¿Ko nge e juachanta ixi jaña kuanche enta? Jai kain ti ndako a juinche enta, kain me e, tosuaxinnta ko kain me e teenxin chujni.

²² Ko jai ó komé e jíanta ko ítetuan inta ti ndako a. Jai xrée ndo Dio nche enta. Ko ji i jian tsingijnanta ixi ti tsitikaonnta ndo Dio me e noaxinnta tsarichonnta kain nchakon.

²³ Siá sinche enta ti ndako a, tsamanta ijie, ko ti tsjachanta me e tsen ennta. A ndo Dio je e ndo tajon ndo juachaxin tsechónna kain nchakon siá titika onna Ncháina Cristo Jesús.

7

Jai tikinixin enna ndo Cristo

¹ Kichuuna, ja anta chuxinnta ley ko no anta ixi ley chónnda juachaxin tsetuen enni je o ti xrajichónni.

² Ji i jii xranchi naa nchri tsikute e, ley tituan an ixi je e nchra tsitikaon nchra xixi e nchra, ko je e xa chónnda xa juachaxin tsetuen en xa nchra ixi xrajichón xa. Ko siá tsii nchakon tsen en xixi e nchra, ley me e ítituan i ngajin nchra.

³ Ko siá je e nchra satsikao nchra inaa xi ko xrajichón xixi e nchra, je e nchra tsama nchra ijie. Ko siá xixi e nchra tsen en xa, je e nchra íxro an ijie tsama nchra, ko chao xrokjan tsute e nchra ko íxro an ijie tsitsingata a nchra.

⁴ Jaña ja anta kaxon, kichuuna, ndo Cristo kuenxin ndo ixi jaina, méxin, ley ítetuan i ngajinna. Jai jaina tikinixin enna ndo Cristo ixi ndo Dio juinchechón ndo ndo Cristo, méxin chao sintu una xrée ndo.

⁵ Ixi nchakon jua i bakintu ena ti ndako a, ley je o banche e ixi jaina ícha tjaunna sinche ena ti ndako a, ko me e kuixin ti tsen enna.

⁶ Ko jai ley í chónnda i juachaxin tsetuajinna ixi xranchi ó kuen enna. Íxro an nge e tingakoina ixi sintu una xrée ndo Dio xranchi naa ngisen natjúá, ixi Espíritue ndo Dio chjaina ndo ko ítsetuan ina naa ley ntaxi jitaxin xroon.

Xranche ena ti ndako a

⁷ ¿Nge e xrondachrona ixi ji i? ¿Á xrondachrona ixi ley me e ndako a? Na i. Jan an xrokonóna i nge e xrondachro ti tamani ijié siá xrobake a ley xrochronga. Xrokonóna i nge e xrondachro ti chjuye eni siá ley xrondachro a: “Tuchjuya inta nge e chóna inaa ngisen.”

⁸ Tjume e nchakon konóna nge e jitaxin ley, ti ndako a ícha kuetuan an ko ícha tja on sinta a kain nge e ndakua i. Ko siá xrokuake a ley, kaxon ko a ti ña i nchekateyani sinche eni ti ndako a.

⁹ Ko nchakon kuichuxin a ley, jan an xro an juachjaon kuachonda, ko nchakon kuichuxin ley, konóna ixi jan an tsango yama ijié,

¹⁰ ko kuichuxin a ndo Dio, ko ley kuajon a juachaxin tsechón chujni, je o kuajon juachaxin tsen eni.

¹¹ Ixi ti konona ley, me e ti ndako a juincheyana, méxin kuama ijié ko tikinixin tsen ena.

¹² Chao xrondachrjan ixi ndo Dio tsikajon ndo ley, ko nge e tituan an ndo Dio, jian me e.

¹³ Ko jua i xrondachrona ixi kondeexin ley tsen enni. Na i. Tsen enni kondeexin ijié chónani ko ti ndako a nche eni, ixi ley naa nge e ndako tituan an, ko jaña chao tonojna nge e ndakua i jii, ko kaxon no eni ixi tsango ña ini siá sinche eni ti ndakua i.

¹⁴ Jaino nojina ixi ley me e kuajon ndo Dio. Ko jan an jua i tintu a nge e tjaun cuerpona; jan an ícha tja on sinta a ti ndakua i.

¹⁵ *Jan an tianxin a, ixi ti tjaun a sinta a me e nta a, ko ti tja on sinta a, me e nta i.

¹⁶ Ko maski nta a nge e tjaun a sinta a, nóna ixi ley kuajon ndo Dio, jian ley.

¹⁷ Méxin, je a jan an nta a nge e ndako a. Na i, ti nche e me e, me e juachaxien ti ndako a jii ngaya aséenna.

¹⁸ Jan an tonóna ixi cuerpona tajon a juachaxin sinta a ti jian, ixi maski tja on sinta a nge e jian, jua i nta a me e.

¹⁹ Ko tja on sinta a nge e jian ko jua i nta a me e, ko nta a nge e ndako a ti tjaun a sinta a.

²⁰ Ko siá nta a nge e tjaun a, ko je a jan an tja on sinta a ji i, kain ji i nche e ti ndakua i jii ngaya aséenna.

²¹ Ko nóna ixi nchakon tja on sinta a nge e jian, je o nta a nge e ndako a.

²² Ko nóna ixi aséenna tsango take e juaxruxin ixi ley kuetuan an ndo Dio.

²³ Ko tonóna ixi ti tetuan an cuerpona, me e ti ndako a, ko ji i tetoka o ley jian jii ngaya aséenna; ko ti ndako a tjacha tetuan an.

²⁴ Lastuna nóana. ¿Ngisen tsingijnana ixi kondeexin ti nche e cuerpona tsenxinna?

²⁵ Juasie ndo Dio ixi je e ndo tsingijnana ndo ixi kuij Ncháina Jesucristo ko ixi Ncháina tsechónna kain nchakon. Jan an nóna ixi xrokonda tsitika on ley kuetuan an ndo Dio, maski cuerpona tjaun sinche e ti ndako a.

8

Stechónxinna ixi Espíritue ndo Dio

¹ Jai sen titikaon ndo Cristo Jesús, íxro an ijié sínká sen. Je o tjaun sen tsitikaon sen Espíritue ndo Dio ko nche a sen ti tjaun corpoe sen.

² Ixi ti tetuan an Espíritue ndo Dio tajon juachaxin tsechónna kain nchakon ixi titika onna ndo Cristo Jesús. Ko ti ndako a ko juachaxien xichononte ítituan i ngajinna

³ ixi ndo Dio juinche e ndo nge e jua i juinche e ley kuayé e ndo Moisés ixi jua i tintu eni ti ndako a. Ndo Dio xruan an ndo Chjen en ndo ko ikjan xjan xranchi ngixe i chujni chóna ijié. Kuij ndo kuenxin ndo ixi jíee kain chujni nunte xasintajni, ko kuantsjengí e ndo ijié xrokuitjáñaxinna.

⁴ Jaña kon en ixi jaina jian xrokuitikaonna kain ti tetuan an ley ko xrokuitikaon ana ti ndachro cuerpojna. Ícha jian xrokuitikaonna Espíritue ndo Dio.

⁵ Ni titikaon nge e ndako a tjaun cuerpoe na, ni me e je o xraxaon na nge e jii nunte xasintajni. Ko ni tjaun tsitikaon Espíritue ndo Dio jitjee na nge e tikinixin en Espíritue ndo Dio.

⁶ Siá xroxraxaonna je o nge e tjaun cuerpojna, tsen enna. Siá xroxraxaonna nge e tikinixin en Espíritue ndo Dio, xrochondana juaxruxin ko juachaxin tsechónna kain nchakon.

⁷ Tjume e ni tsango take e juaxruxin ixi ti ndako a nche e na, ni me e ningakon en na ndo Dio, ixi tjaun a na ko jua i titikaon na ti tituan an ndo.

⁸ Ko ni take e juaxruxin ixi nche e na ti ndako a, ni me e jua i sinche e na naa nge e tsake exin juaxruxin ndo Dio.

⁹ Ko ja anta ítikaon anta ti tjaun cuerpoanta. Ja anta titikaonnta Espíritue ndo Dio, siá nduaxin chondanta Espíritue ndo, ko ngisen chóna i Espíritue ndo Cristo, tikinixien a na ndo.

¹⁰ Siá ndo Cristo jii ngajinnta, maski cuerpoanta ndatsen en kondeexin ti ndako a juinche enta, asáanta tsechón ixi ó chondanta juachaxien ndo Dio ixi je e ndo bikonóa anta ndo, ko juinchetjúa ndo asáanta.

¹¹ *Ko siá chondanta Espíritue ndo Dio, ndo juinhexechón ndo Cristo, kaxon sinchexechón ndo cuerpoanta tsiken en, ixi Espíritue ndo Dio jii ngajinnta.

¹² Méxin kichuuna, xrokonda tsitikaonna ti tetuan an ndo Dio, ko ísitikaon ana nge e tjaun cuerpojna.

¹³ Ko siá sinche enta nge e tjaun cuerpoanta, ndatsen ennta ko ínai a xrotsechónnta. Ko siá tsitikaonnta Espíritue ndo Dio, tsintu enta kain nge e tjaun cuerpoanta, jaña tsarichonnta kain nchakon.

¹⁴ Kain sen titikaon Espíritue ndo Dio ó ikjan sen chjen en ndo Dio.

¹⁵ *Ixi Espíritue ndo Dio kuaye enta, je a xranchi ti nge e ña i baketuan anta ó sa ó ko bantaxronkanta. Na i. Espíritue ndo Dio chondana me e juinчекjanna chjen en ndo. Ko Espíritue ndo tajon juachaxin xrondachrona: “Ndotána, ja anta.”

¹⁶ Espíritue ndo Dio tonuexin aséejna ixi ikjanna chjen en ndo Dio.

¹⁷ Ko siá ikjanna chjen en ndo Dio, tikinixianna tsayé ena nge e tsajon ndo ti tsindachro ndo ó sa ó, jaña tikinixinna nge e tsajon ndo Dio tsayé e ndo Cristo ko jaina. Siá tsikaonna ko tangi tsatsingana xranchi ndo Cristo kon en ndo, jaña kaxon tsayé ena juachaxin xranchi juachaxin tayé e je e ndo.

Tsii ijié juachaxin

¹⁸ Ko jai, maski tsatsingana nge e tangi, xro an nge e nche e me e, ixi nge e tsayé ena tjume e ícha jian ko ícha tjintee.

¹⁹ Kain nge e jii ngata a inche jichón en ixi ndo Dio tsjakoxin ndo ixi jaina chjen en ndo.

²⁰ Ixi nunte xasintajni ko kain nge e jii ndá tsingachrue, ko je a ixi jaña tjaun. Na i. Jaña tsiketuan an ndo Dio. Ko kain nge e jii ngata a nunte kaxon jichón en

²¹ ixi tsayé e kain nge e ti chaxro ko tsake e juaxruxin xranchi ste ni tsikjan chjen en ndo Dio.

²² Ó nojna ixi kain nge e juinchéña ndo Dio xra tangi tsikon, xranchi tangi tikon naa nchri, nchri nchejongí e chjen en.

²³ *Ko je a je o nge e jii ngata a nunte xasintajni tangi jii. Kaxon jaina tangi tikonna, jaina ti chondana Espíritue ndo Dio, ixi Espíritue ndo tjakoxin naa nge e ícha tuinxin tsayé ena ko ícha tjume e tsajon ndo Dio. Tangi stetikonna ko stechon enna nchakon ndo Dio tsingijnana ndo ko xrokjanna chjen en ndo Dio ko tsayé ena juachaxin ixi tsen ana.

²⁴ Ó kuaye ena juachaxin tsechónna kain nchakon ixi titika onna ko stechon enna nge e xratikon ana. Siá xrobikonna nge e stechon enna íxrokonda i xrochon enna ícha. Nge e ó tikonni íxrokonda i xrochon enni ti tikonni.

²⁵ Siá stechon enna nge e xratikon ana, xrokonda xrochon enna maski tangi stena.

²⁶ Ko jaña kaxon Espíritue ndo Dio tsingijnana nchakon jua i xrochuntiana ndo Dio. Ixi nóna ina xranchi xronichje ena ndo Dio, ko Espíritue ndo nichjaxin ixi jaína, ko jaína jua i tienxinna xranchi tjanchia Espíritue ndo ixi jaína.

²⁷ Ndo Dio no e ndo nge e tono e aséeina, ko no e ndo nge e tjanchia Espíritue ndo, ixi Espíritue ndo tinóatée xranchi tjaun ndo Dio, ko nichjaxin Espíritue ndo ixi jaína, ni titikaon ndo.

²⁸ Ó noína ixi ndo Dio jian ndo. Maski tangi tatsingana, je e ndo tsingijnana ndo ixi kain nge e jian tsachrje ngajin kain ni tjue e ndo, ni tsikinche e je e ndo ixi jaña tjaun ndo.

²⁹ Sen ó sa ó tsikinche e ndo, tjaun ndo xrokjan sen xranchi chjen en ndo, ko xrobikon sen Chjen en ndo, xjan naakuaxon, ixi xjan me e ícha sa ó xjan.

³⁰ Sen tsikinche e ndo Dio sa ó, kaxon kuiye e ndo sen, ko sen kuiye e ndo, juinchemé e ndo jíee sen, ko sen komé e jíee, chjée ndo sen ijié juachaxin.

³¹ ¿Nge e xichrona? Siá ndo Dio jii ndo ngajinna, ¿ngisen xrojan nge e sincheina?

³² Siá ndo Dio kuajon ndo chjen en ndo, xjan naakuaxon, kuenxin xjan ixi kaina, jaña kaxon xrochjaína ndo kain nge e.

³³ ¿Ngisen xrojuankata a ijié ngajin sen tsikinche e ndo Dio siá ndo Dio ó juinchemé e ndo jíee sen?

³⁴ ¿Ngisen xrojuankata a ijié ngajin sen? Siá ndo Cristo kuenxin ndo ixi je e sen ko xechón ndo íjngo, ko ndatsjonxin jian jii ndo ngajin ndo Dio, ko jitinóatée ndo ngajin ndo Dio ixi kain jaína.

³⁵ ¿Ngisen xrokuantsjeina ti tjuajina ndo Cristo?, maski chinga xrokoína, xroningakoína na, maski tsatsena jinta ko xrochonda ina manta tsetsána, o maski ijié juachjaon xrochondana, o xrokue enna.

³⁶ Xranchi ndachro xroon chijnie ndo Dio:

Ixi titikaonnanta chondana juachjaon kainxin nchakon ko xrokue enna kondeexin me e, xranchi kutuchjon tóña na ba, jaña tsoína kaxon.

³⁷ Ko maski kain nge e tangi tsatsingana, noína ixi ndo Jesucristo tjuajina na ndo ko tsingijnana ndo tsatsingana kain juachjaon.

³⁸ Méxin jian noína ixi ninaa nge e tsatsjeina ti tjuajina ndo Dio. Maski ti tsen enna, o maski ti tsechónna, ni sen ángel, o espíritu ña i, o maski nge e jiton en jai, o nge e tson en ícha tjume e,

³⁹ o nge e jiton en ngajní, o nge e jiton en ti jii ícha yaso e nunte xasintajni, o inaa nge e juinchéña ndo Dio. Ninaa nge e me e tsatsjeina ti tjuajina ndo Dio ixi chjaína ndo chjen en ndo, Ncháina Jesucristo, kuenxin ndo ixi jaína.

9

Ndo Dio kuinche e ndo ni tjajna Israel

¹ Jan an titika on ndo Cristo ko méxin, ndachrjan ti nduaxin. Espíritue ndo Dio nchexaxaonna ixi kain me e nduaxin, ko jaña xraxa on ko ntaya i.

² Tsango toni e aséenna ko juaxruxin a ritjén

³ ixi kondeexin ni kichuuna, ni judío, tja on ixi tsitikaon na ndo Cristo, maski jan an xrokuama ijié, siá ji i xrobingjna na ixi ndo Dio xrojuinchemé e ndo jíee na.

⁴ Je e na tsikachrjenixin na tjajna Israel ko ndo Dio kuinche e ndo na xranchi chjen en ndo, ko jii ndo ngajin na, ko kuajon ndo juachaxien ndo ngajin na ko kuayé e na ti nge e tsindachro ndo tsajon ndo ko kaxon kuajon ndo ngajin na ley kuayé e ndo Moisés, ko juako ndo xranchi xrokuajon na juasaya ngajin ndo, ko chronga ndo nge e tsayé e na.

⁵ Ni Israel tsikachrjenixin na ni tsikachrjenixin jaina kaxon, ko kaxon ndo Cristo tsikachrjenixin ndo ni israelita nchakon ikjan ndo chujni. Je e ndo, ndo Dio ne e kain nge e jii, ko tikinixin tsajonna juasaya ngajin ndo kain nchakon. Jaña tson en.

⁶ Ko rindachrjan i xixi ndo Dio kuajon a ndo nge e tsindachro ndo ngajin ni tjajna Israel. Ixi je a kain ni tsikachrjenixin ni israelita nduaxin tikinixin en na tjajna Israel.

⁷ Ko kain a ni kuachrjenixin ndo Abraham nduaxin ikjan na chjen en ndo. Ndo Dio tsindache ndo ndo Abraham: “Ni xrokjan ni kichuua tsachrjenixin na ndo Isaac.”

⁸ Ji i tienxinni xixi xro an chujni ikjan chjen en ndo Dio xixi tsikachrjenixin na naa chujni tjintee. Na i. Je o ni titikaon nge e tsindache ndo Dio ndo Abraham, ni me e nduaxin tsikachrjenixin na ndo.

⁹ Ja in tsindache ndo Dio ndo Abraham: “Tsij nchakon janchria, jan Sara, sinchejongí e jan naa ichjan.”

¹⁰ Ko je a je o me e. Kaxon kayui ichjan juinchejongí e jan Rebeca naakua ndotée xjan, ndo ndatin in Isaac, ndo tsikachrjexinna jaina.

¹¹ Ko xrajongí e kayui ichjan ko xraxo an nge e jian o ndakua i tsijinche e xjan, jaña kon en xixi juako ndo Dio chóna ndo juachaxin tinche e ndo ngisen tjaun ndo.

¹² Ixi ndache ndo jan Rebeca: “Xjan sa ó xrokjan xjan, xjan nchexrée xjan yuxin.”

¹³ Kaxon jaña ichro xroon chijnie ndo Dio: “Ícha tjua a* ndo Jacob, xixi ndo Esaú.”

¹⁴ ¿Ko nge e xichrona? ¿Á xrondachro na xixi ndo Dio ndakua i nche e ndo? Na i.

¹⁵ Ixi ndo Dio tsindache ndo ndo Moisés: “Xrotjua a ngisen tja on xrotjua a, ko tsikonóa a ngisen tja on tsikonóa a.”

¹⁶ Je a xixi chujni tjaun o je a xixi nge e tsijinche e chujni, ndo Dio tinche e ndo ngisen tsikonóe e ndo.

¹⁷ Ndachro xroon chijnie ndo Dio xranchi nichje e ndo xi rey tjajna Egipto: “Kuájon juachaxin xixi ja a ikjan rey jaña tsjako juachaxin chóna jan an xixi jaña nchijí nunte xasintajni xrokono e ngisen jan an ko xrokuitikaon na nombréena.”

¹⁸ Jaña siá tjaun ndo Dio tsikonóe e ndo xrojan chujni, ni me e tsikonóe e ndo na, ko ngisen tjaun ndo sinchecha ndo aséen sen, jaña nche e ndo kaxon.

¹⁹ Ko xrojan ngisen xrondachro: “¿Sonda tsjankata a ndo Dio ijie ngajin chujni siá xro an ngisen tsjacha xronichjangí e ti tetuan an ndo?”

²⁰ Jan an xrojuata a: ¿Ngisen ja anta xixi xronichjangí enta ndo Dio? Xranchi naa ichi tsikónaxin inche xronichja xrondachre ngisen juinchéña ichi: “¿Sonda jaña juinchéñana?”

²¹ Sen nchéña ichi chóna sen juachaxin sinchéña sen nge e tjaun sen. Ko chao sinchéña sen naa ichi tsonda kain nchakon o je o naa chi tsonde e sen nchakon jii kia ko chao je o nchitja o tsonde e sen.

²² Jaña kaxon ndo Dio tjaun ndo xrokjuakoxin ndo ti koña ndo ko ti ijié tetuan an ndo méxin bikonóe e ndo chujni tikinixin en xrokuen en.

²³ Jaña juako ndo ijié juachaxin chóna ndo xixi je e ndo bikonóaina ndo, jaña ó tsixraxaon ndo ó sa ó xixi xrochjijaana ndo.

²⁴ Ko ndo Dio kuinche e ndo chujni judío ko chujni je a judío.

²⁵ Jaña ndachro xroon tsikjin ndo Oseas:

Ni tikinixin a tjajnána, ni me e xrontatjan ni tjajnána.

Ni tjua i jan an, ni me e xrotjua a.

²⁶ Ko tjajna tsindache ndo:

“Je a ni tjajnána”,

* 9:13 **tjua a** yo te amo

xrondache ndo na íjngo:

“Ni tjanána ja anta ixi ja anta chjen en ndo Dio, ndo jichón.”

²⁷ Kaxon ndo Isaías ndachro ndo ixi ni israelita: “Maski ni tsachrjenixin ni Israel, kueya na xranchi kueya nchese jii ti ndachaon,[†] je o kaxin na tsjacha na tsayé e na juachaxin tsechón na kain nchakon

²⁸ ixi tuinxin tson en nge e tsindachro Ncháina ndo Dio, sinchéña ndo ijie ngajin chujni ste nunte xasintajni.”

²⁹ Kaxon ndo Isaías tsindachro ndo ó sa ó:

Ncháina, ndo Dio, chóna ndo kain juachaxin ixi kuintue a ndo xrokuitjáña kain ni kuachrjenixin ndo Israel

xranchi kuitjáña kain ni tjana Sodoma ko kain ni tjana Gomorra.

Sen judío ko chijni jian

³⁰ ¿Nge e ícha xrontatjunta sen je a judío? Jue a sen ndo Dio ixi xrojuinchemé e ndo jíee sen, maski je e ndo juinchemé e ndo jíee sen ixi je o chuntia sen ngajin ndo Cristo.

³¹ A ni israelita kuitikaon na ley ixi xrokoméexin jíee na, ko jua i komé e.

³² ¿Ko sonda jua i komé e jíee na? Ixi xraxaon na ixi nge e xrojuinche e na, me e ndo Dio xrojuinchemé e ndo jíee na ko xrokuayé e na juachaxin, ko je a ixi xrochuntia na ndo. Méxin ndo Cristo ikjui ndo xranchi naa ixro kontengíxin na kondeexin jíee na.

³³ Jaña chronga xroon chijnie ndo Dio:

Bake é naa ixro tjana Jerusalén, ixro tsontengíxin na ko tse e na nunte.

Ko ni titikaon ndo, je e na xroxraon a na ixi je e ndo tsintu e ndo na.

10

¹ Kichuuna, ixi nchijí aséenna, tjanča a ndo Dio ixi tsjeña o ixi ni israelita tsayé e na juachaxin tsechón na kain nchakon.

² Jan an nóna ixi ni israelita tsango tjaun na sinche e na xrojan ixra ngajin ndo Dio, ko jua i jian xraxaon na ixi je e na noe a na xranchi sinche e na ti tjaun ndo Dio.

³ Ko je e na titikaon a na xranchi ndo Dio chao sinchemé e ndo jíee na. Méxin, tjaun na sinche e na inaa nge e ixi jaña ndo Dio tsayé e ndo na ko titikakon a na xranchi kuetuan an ndo Dio sinche e na ixi sinchemé e ndo jíee na.

⁴ Ko jai ixi ti kuen en ndo Cristo, ña juexin juachaxien ley tsoméxin ijie, ko jai ixi tsitikaonna ndo Cristo me e sinchemé e ijie chondana.

⁵ Ko ti xrokoméexin jíee chujni ixi ley, ndo Moisés ja in tsikjin ndo: “Ngisen tsitikaon kain ley, ni me e tsjacha na tsoomé e jíee na ko tsechón na kain nchakon.”

⁶ Ko ti sinchemé e ndo Dio jíee na ixi chuntia na ngajin ndo ja in ndachro xroon: “Ndachro anta ngaya asáanta: ¿Ngisen saxrokjui ngajní? (Ji i xrondachro tjaun na xroxingajin ndo Cristo íjngo.)

⁷ Ko ndachro anta kaxon: ¿Ngisen xroxingajin ti ícha yaso e ti jii chujni tsiken en?” (Ji i xrondachro ixi tsjanche enta ndo Cristo xroxechón ndo íjngo.)

⁸ Ko xroon chijnie ndo Dio ndachro: “Chijnie ndo Dio jii tjenkanta, ngaya ro anta ko ngaya asáanta.” Chijni me e ndachro ixi xrochuntianta ndo Dio ko me e tjako annanta.

⁹ Siá ixi ro anta xrondachroxinna ko tsitikaonnta ixi ndo Jesucristo Ncháina, ko siá ixi nchijí asáanta tsitikaonnta ixi ndo Dio juinhexechón ndo Cristo, ja anta tsarichonnta kain nchakon.

¹⁰ Ixi siá nchijí aséina tsitikaonna ixi ndo Dio sinchemé e ndo jéina, ko siá ro ana xrondachroxinna ixi chuxinna ndo Jesucristo, je e ndo tsajon ndo juachaxin tsechónna kain nchakon.

¹¹ Ndachro xroon chijnie ndo Dio: “Ngisen xrochuntia ndo Dio, sen me e nai a tsosue e sen.”

[†] 9:27 *ndachaon* mar

¹² Ko ndo Dio tikon ndo naxraje o kain chujni, á ni judío o á ni je a judío. Ncháina, Nchéé kain chujni ko tingijna ndo kain ni tjanche e ndo.

¹³ Kaxon ndachro xroon chijnie ndo Dio: “Kain ni tiye e Ncháina tsayé e nā juachaxin tsechón nā kain nchakon.”

¹⁴ ¿Ko xranchi xronichje e nā ndo Dio siá xrachuxin a nā ndo? ¿Ko xranchi tsichuxin nā ndo siá xratien a nā ngisen je e ndo? ¿Ko xranchi xrokuin en nā siá xro an ngisen tsjako e nā ngisen je e ndo?

¹⁵ ¿Ko xranchi tsjako nā chijnie ndo siá xro an ngisen xruan an nā itsji nā? Xranchi ndachro xroon jitaxin chijnie ndo Dio: “Juaxruxin tsake eni nchakon tikonni naa chujni chronga chijnie ndo Dio.”

¹⁶ Ko kain a chujni kuitikaon nā chijnie ndo Dio. Jaña ndachro ndo Isaías: “Ncháina, ¿ngisen kuitikaon chijni nichjana?”

¹⁷ Jaña xrokonda tsin en nā chijnie ndo Dio, me e tsaxi xrochuntia nā ndo, ko chijni ti tin en nā me e chijnie ndo Cristo.

¹⁸ Ko jan an xraxa on: ¿Á nai a kuin en nā chijnie ndo Dio? Jaán, ó kuin en nā chijni. Ixi ndachro xroon chijnie ndo Dio:

Chijnie ndo Dio kuin en nā nguixin nunte,
ko ti nichja ndo nchijíi nunte xasintajni.

¹⁹ Ko íjngo jan an xraxa on:

¿Á ni israelita xratienxin a nā?

Jaán, ó kuienxin nā,

ixi ó sa ó ndachro ndo Dio ti tsikjin ndo Moisés:

Jan an sinta a ixi ja anta tsochjuya anta ngajin kaxin tjajna tsikincha i
ko xroningakon ennta naa tjajna tjaun a tienxin.

²⁰ Ko ndachro ndo Isaías naa nge e ó sa ó ti tsindachro ndo Dio:

Jan an kuajon juachaxin xrokuitjana chujni jitje a nā
ko jan an konoxinna ngajin ni juanchangi a ngisen jan an.

²¹ Ko chronga ndo Isaías nge e ndachro ndo Dio ixi ni israelita: “Nchijíi nchakon tja on tsingijna naa tjajna tienxian a ko titikaon a.”

11

Ndo Dio tintue a ndo ni tjajna Israel

¹ *Jai tjanchangi: ¿Ndo Dio á ó kuintu e ndo ni tjajna Israel? Na i, ixi jan an kaxon israelitana, ko kuachrjenixinna ndo Abraham ko tikinixinna ni ndo a ndo Benjamín.

² Ixi ó sa ó tsikinche e ndo Dio ni israelita xranchi ni tjajnéé ndo. Ko jai tintue a ndo nā. ¿Á noa inta xranchi nichja xroon chijnie ndo Dio, ti tsindachro ndo profeta Elías, ti tjankata a ndo ijie ngajin ni Israel? Ko ja in tsindachro ndo:

³ “Ncháina, je e nā naakóñaxón nā ni kuachronga chijnianta ko konchjenjin nā altar na anta ko je o jan an kuituna ti nichja chijnianta ko kaxon tjaun nā naatsóñaxónna nā.”

⁴ Ko ndo Dio juate e ndo ko ndachro ndo: “Xra ste yaato mil chujni titikaon nā najan an ko xratakexin a nā ntatuchi in nā ngajin ídolo Baal.”

⁵ Kaxon jaña jiton en jai, kaxin nā xratitikaon nā ndo Dio, ni tsikinche e ndo.

⁶ Jian ndo Dio, ko juasie ndo ixi bikonóe e ndo nā, ko je a ixi xrojan ixra juinche e nā ixi méxin bikonóe e ndo nā. Ko siá jaña xrokjui, je a nduaxin ixi je e ndo bikonóe e ndo nā.

⁷ Maski itsjé ni israelita jitjee nā ndo Dio, ko je o kaxin nā kuitja nā ndo, ni je e ndo tsikinche e ndo. Ko kaxin nā ícha koncha aséen nā ko kuitikaon a nā.

⁸ Xranchi ndachro xroon chijnie ndo Dio: “Ndo Dio kuajon a ndo juachaxin xrokuienxin na, ko kaxon jaña xrajiton en nchakon jai. Kuajon a ndo juachaxin ixi xrobikon na ko xrokuienxin na.”

⁹ Kaxon tsikjin ndo David:

Kia nchéña na, me e nchexin na ti ndako a, ko me e xrochóna na ijié juachjaon.

¹⁰ Ko xranchi itjuj tseta a ikon na me e tsikon a na ko kondeexin ijié chóna na me e tangi tson en na kain nchakon.

Ni je a judío kaxon tsayé e na juachaxin tsechón na kain nchakon

¹¹ Ko maski ni judío jua i juinche e na nge e tjaun ndo Dio, je a xrondachro ixi ndo Dio ó tjáñe e ndo ixi je e na. Ko ti kuitikaon a ni judío, méxin ni je a judío juacha na kuayé e na juachaxin tsechón na kain nchakon. Ko ji i sinche e ixi ni judío tsochjuye e na ixi je e na juacha i na juachaxin me e.

¹² Ixi kuitikaon a ni judío, ndo Dio kuajon ndo juachaxin ngajin ni je a judío tsitikaon na ndo. Ko nchakon xrokjan ni judío tsitikaon na ndo Cristo, ícha jian ixi ícha itsjé na xrokjan na tsitikaon na ko tsechón na kain nchakon.

¹³ Ti xrondachrjan xrokonda tsin ennta, ni je a judío. Ndo Dio xruan anna ndo sintakuan anna ni je a judío, ko ji i tsango tjintee.

¹⁴ Tja on ixi ni tjajnána tsochjuye e na ixi ja anta titikaonnta ndo Dio, ko ixi jaña kaxon kaxin na xrokjan na tsayé e na juachaxin tsechón na kain nchakon.

¹⁵ Ixi kuintu e ndo Dio ni judío, ni je a judío kuitja na juachaxien ndo Dio. Ko siá xrokjan ni judío tsitikaon na, jaña ni ste xranchi ni tsiken en jai xroxechón na.

¹⁶ Siá xroxrajon naa nutja ó sa ó tsikoña tsayé e ndo Dio, kaxon nchijí chu u tikinixin en ndo, ko kaxon siá tikinixin en ndo nue e naa ntáa, kaxon kain chaan ntáa tikinixin en ndo.

¹⁷ Ko kaxin ni judío xranchi chaan ntáa olivo, ntáa jian konchrinjin ndo Dio, me e je e ndo juinchetsé ndo ikaxin chaan ntáa je o jitangi no jna, ntáa me e xrokjui xranchi ja anta ni je a judío, ko ixi jaña kon en, méxin ja anta kóñanta ni tjajnée ndo Dio, ko jaña kuaye enta juachaxin tsarichonnta kain nchakon.

¹⁸ Méxin, xraxaon anta ixi ja anta ícha tjinteenta ixi ni judío, ni kuitikaon a ndo Dio. Xraxonnta ixi ja anta kuaye enta juachaxin me e kondeexin ni judío, ko je a kondeexin ja anta.

¹⁹ Nchéxin xraxonnta ixi ndo Dio kuintu e ndo ni judío ixi ja anta xrokjannta ni tjajnée ndo.

²⁰ Chao me e. Ko ndo Dio kuintu e ndo na ixi je e na kuitikaon a na ndo. Ko ja anta kuaye enta juachaxin ixi chuntianta ndo. Méxin, nchejié a asáanta. Cháña titikaonnta ndo.

²¹ Siá ndo Dio bikonóe a ndo ni judío, jaña kaxon tsikonóa inta ndo siá ndako a sinche enta.

²² Tsje enta ixi ndo Dio tsango jian ndo, ko kaxon chjée ndo juaña, me e tsajon ndo juachaxin tangi tsintekon en chujni titikaon a. Ko jian ndo ngajinnta, ko jaña sinche e ndo, siá jian tsitikaonnta ko tsajonnta juasaya ngajin ndo. Ko siá na i, je e ndo nduaxin tsintu anta ndo.

²³ Ko ni judío, nchakon tsintu e na nge e ndako a kuanche e na ko tsitikaon na ndo Dio, je e na xrokjan na íjngo ni tjajnée ndo, ixi je e ndo chóna ndo kain juachaxin jaña sinche e ndo.

²⁴ Méxin, siá ja anta je a sa ó tsikincha anta ndo Dio ixi xrokjuinta ni tjajnée ndo, ko kuaya anta ndo maski tikinixin a xrokjuinta ni tjajnée ndo, ¿xranchi xrokjan i ni tjajnée ndo, ni nduaxin judío, ni sa ó tsikinche e ndo, ni ikjui tjajnée ndo?

Ni Judío tsayé e na juachaxin tsechón na kain nchakon

²⁵ Kichuuna, xrajíi itsjé nge e tsono anta ti je o ndo Dio no e ndo, ko jai sintano anta ixi jaña sinchejié a asáanta, ixi ni judío je a kain nchakon tsitikaon a na ndo Jesucristo, ixi tsij nchakon itsjé ni je a judío tsitikaon na ndo, ko tjume e kaxon ni judío xrokjan na tsitikaon na ndo.

²⁶ Nchakon jaña tson en, tjume e kain ni judío tsayé e na juachaxin tsechón na kain nchakon ixi xroon chijnie ndo Dio ndachro:

Tsi xin tjajna Jerusalén naa ngisen tsingijnanta

ko tsantsje ndo ijié chónnda sen tsikachrjenixin ndo Jacob.

²⁷ Ji i juachaxin tsayé e sen,

nchakon sintama a ti ndako a juinche e sen.

²⁸ Jai ni judío titikaon a na chijni natjúá, méxin, ndo Dio ningakon en ndo na, ko chao tsajon ndo juachaxin ixi ja anta, ni je a judío, tsitikaonnta ndo. Ko jaán, ndo Dio xratjue e ndo ni judío ixi je e ndo tsikinche e ndo sen tachrí e na.

²⁹ Kain nge e tajon ndo Dio, ko í chjija i ndo íjngo ko kaxon í tintue a ndo ni ó tsikinche e ndo.

³⁰ Sa ó ja anta baktikaon anta ndo Dio, ko jai ni judío tjaun a na tsitikaon na ndo, méxin ndo Dio jai tikonóa a ndo ja anta.

³¹ Ko jaña kaxon, ndo Dio tsikonóe e ndo ni judío xranchi bikonóa anta ndo ja anta.

³² Ndo Dio kuintu e ndo ixi kain na xrokuitikaon a na ndo, ixi jaña tsikonóe e ndo na kaxon.

³³ Juachaxien ndo Dio tsango ijié ko tsango no e ndo kain nge e. Xro an chujni tienxin xranchi xraxaon ndo Dio, ko xro an chujni chao xrochronga nge e tjaun ndo sinche e ndo.

³⁴ Ndachro xroon chijnie ndo Dio: “¿Ngisen no e xranchi xraxaon Ncháina, ko ngisen chao xrojuincheken en ndo nge e sinche e ndo?”

³⁵ ¿Ngisen xrokuajon nge e xrokuayé e ndo Dio ko jaña xrojuinchekonkjan ndo inaa nge e?”

³⁶ *Kain nge e ti xin ti jii ndo Dio, ko kain nge e juinchekonchjian je e ndo, kain me e sinche e ixra ngajin ndo. Ko je e ndo tikinixin en ndo juasaya kain nchakon. Jaña tson en.

12

Xranchi xrokonda tsintee chjen en ndo Dio

¹ Méxin, kichuuna, ndo Dio tikonóa anta ndo, méxin, jan an tinóatáana ixi nchijíi asáanta tjéenta ndo Dio jai, ko tájonnta asáanta ko nchijíi ja anta sinche enta xra ixi ó tjúá asáanta ko jaña tikinixin tsajonnta juasaya ngajin ndo.

² Ko ínche anta xranchi nche e chujni chúxin a ndo Dio, ni ste nunte xasintajni.* Cháña tájonnta juachaxin ixi ndo Dio tsindoxin ndo asáanta ko ti xraxaonnta. Ko jaña tsono anta nge e tjaun ndo Dio sinche enta, me e ti jian ko ti chaxro.

³ Juasie ndo Dio, kuajon ndo ixra nta a ngajin ndo. Méxin, ntatjunta xroxraxon anta ixi ja anta ícha tjinteenta. Na i. Xraxonnta jian ixi juachaxin tjáanta ndo Dio ixi chuntianta ndo.

⁴ *Jaña cuerpoina, kueya parte chónnda. Ko ngujngu me e je a naxraje o ixra nche e.

⁵ Jaña kaxon jaina, maski kueyana, ikjanna naakua cuerpoe ndo Cristo. Jaña naakua xroxraxonna ixi ó ikjanna kaina naakua cuerpoe ndo.

⁶ *Ko ndo Dio kuajon ndo kueya ixra sintu una, ko kuajon ndo ngajin ngujngu jaina xranchi tjaun je e ndo. Ko xrokonda jian sinche ena ti ixra kuajon ndo. Méxin, siá

tajon ndo juachaxin ixi xronichjana chijnie ndo, xrokonda sinche ena ixra me e xranchi nduaxin chuntiana ndo.

⁷ Siá chjajina ndo Dio ixra ti tsingijnana chujni, xrokonda jian sinche ena xra me e. Ko ngisen tsikayé e juachaxin tsjako, xrokonda ixra me e sinche e sen.

⁸ Ngisen tsikayé e juachaxin sinchexraxaon inaa ngisen naa nge e jian, xrokonda ixi nchijíi aséen sen sinche e sen ixra me e. Ko ngisen tsikayé e xra ixi tsajon xrojan nge e, xrokonda juaxruxin tsajon sen. Ko ngisen tsikayé e ixra tsetuan an, jian xrokonda tsetuan an sen, ko ngisen tsikayé e xra xrobingijna ngajin ni chóna i, xrokonda juaxruxin tsingijna sen.

Xranchi tsintee sen titikaon ndo Cristo

⁹ Ko nchijíi asáanta xrotjue e kichuunta. Tintu enta kain nge e ña i ko xraxaonnta kain nge e jian.

¹⁰ Tjue e kichuunta ixi titikaonnta Ncháina Jesús ko chóna e kichuunta juasaya.

¹¹ Jian nche enta ixra ko tosa inta, ko nche enta ixra ngajin Ncháina ixi nchijíi asáanta.

¹² Take énta juaxruxin ixi ti xrastechon ennta ti jian tsii, ko chá anta maski tangi tson annta, ko tintue anta nichje enta ndo Dio.

¹³ Tingijnanta sen titikaon Ncháina siá xro an nge e chóna sen. Taye énta sen tii ndointa ko tájonnta juachaxin tsitu e sen ndointa.

¹⁴ *Tjanche enta ndo Dio sinchenchaon† ndo ni ndakua i nta anta ko tjanche anta ndo Dio ixi xrojan nge e ndako a tson en na.

¹⁵ Chá anta ngajin sen ste juaxruxin, ko siá xrojan ngisen yaa juachjaon ko stetsjanga sen, tsjangaku unta sen.

¹⁶ Juaxruxin tinteeku unta sen kichuunta ko nchejié a asáanta ko chaxro tjentonta sen xro an nge e chóna, ko xraxaon anta ixi ícha no anta.

¹⁷ Ko siá ndako a sinta anta xrojan chujni, tjenge anta. Cháña nche enta ti jian ixi jaña tsikon kain na.

¹⁸ Tjéenta ixi nchijíi asáanta jian tsinteku unta kain na.

¹⁹ Kichuuna, ja onta nchéña inta ijie ngajin inaa chujni, cháña tintu enta ixi ndo Dio je e ndo sinchéña ndo ijie ngajin na, xranchi ndachro xroon chijnie ndo: “Jan an tikinixinna sintaña ijie ko jan an xrotjá a na ti tikinixin en na.”

²⁰ Kaxon ndachro xroon: “Siá ni ningakon annta kuen en na jinta, chje énta na sine na, ko siá kuen en na inda, chje énta na tsi i na. Jaña tsosue e na ixi ja anta jian juinche enta ngajin na.”

²¹ Tintue anta ixi tsjacha ti ña i ngajinnta; cháña nche enta ti jian ixi jaña ti jian tsjacha.

13

Tsitikaonni ni tituan an

¹ Kain na xrokonda tsitikaon na ni tituan an, ixi juachaxin chóna na, ndo Dio tsikajon juachaxin, ixi xro an ni tituan an xrobake e siá je a ndo Dio xrokuajon juachaxin.

² Chujni titikaon a ni tituan an kaxon titikaon a na nge e tsiketuan an ndo Dio. Ko ni jaña nche e, tangi tson en na.

³ Ko ni tituan an ste a na ixi sinchexronka na chujni nche e jian. Na i, ni nche e ndako a. Siá tjaunnta ixi ni tituan an syntaxronka inta na, ndako ko jian nche enta, ko jaña je e na kaxon ndako xronichja anta na.

⁴ Ixi ndo Dio kuetuan an ndo ixra stenche e na ixi jaña ja anta jian tsinteenta. Ko siá sinche enta ti ndako a, xrokonda xroxronkanta ixi je a xruxon ste ni tituan an. Je e na chóna na juachaxin sintajenganta na i na ixi je e na nche e na xrée ndo Dio, sinchejengana na ni ndako a nche e.

⁵ Méxin, xrokonda tsitikaonnta ni tituan an, je a je o ixi sintajenganta na na ixi ti ndakua i juinche enta. Na i. Ixi jaña tikinixin tsitikaonnta na.

⁶*Kaxon ja anta tjenganta na ngajin ni tituan an ixi je e na stenche e na ixra tsikajon ndo Dio, ko nche e na nge e tikinixin.

⁷ Kaxon chje énta na nge e tikinixin tsayé e na. Sen xroxenge e na ixi jaña tikinixin, xroxenge e na, ko ngisen sínká ixi juinчекji sen xrojan nge e, tsjenga sen na, ko siá tikinixin tsajonnta juasaya, tájonnta juasaya.

⁸ Kaxon xro an ngisen tasinke enta. Je o ti xrokonda tsasinke e kichuunta, me e ti xrotjue enta kichuunta, ixi ngisen tjaun ko tjue e ni kichuu, ó kuitikaon sen nge e kuituan an ley.

⁹ Ixi ndachro xroon jitaxin chijnie ndo Dio: “Xrochonda inta inaa nchri je a janchri anta, ko tóna inta kichuunta, ko temá inta, ko nichja inta nge e nduaxin a ixi inaa ngisen, ko tochjuya inta nge e chóna inaa chujni.” Kain ji i ko ikaxin nge e kuituan an ndo Dio xrondachro naakua naa chijni tsiketuan an ndo: “Xrotjue e kichuuna xranchi tjue ena aséeina.”

¹⁰ Chujni tjue e kichuu, xro an nge e ti ndako a jinчекao inaa chujni. Cháña, tjue e kichuunta ixi jaña tsitikaonnta jian kain nge e jitaxin ley.

¹¹ Kain ji i xrokonda sinche ena jai ixi ó kuii nchakon xroxingamaína ixi íse a ó tsii nchakon tsayé ena juachaxin tsechónna kain nchakon, ixi tsonchrjen a ó tsii kain ji i je a xranchi nchakon tijuangixin kuitikaonna.

¹² Jai ó juexin tiie ko íse a tsingasáña, ko jai xrokonda tsintu ena ti kuanche ena ti kuajina ti naxixe e, ko xrochondana juachaxien Espíritue ndo Dio, me e tsingijnana tsajina ti tingasáña.

¹³ Xrotsje ena jian xranchi tsajina ti tingasáña taanchakon. Tsaji ana kiée chujni ti no te to na ko ti kuan na, ko xroxaxaon ana xrochondana inaa sen je a janchri ina o ndoxi ina, ko tsinteketo ana ngajin inaa chujni ko xrochuya ina.

¹⁴ Cháña taye énta juachaxien Ncháina Jesucristo, ko íxraxaon anta sinche enta nge e ti ndakua i.

14

Nichja inta kontree inaa sen kichuunta

¹ *Jian nichje enta sen xratienxin a nge e tetuan an ndo Dio, ko siá je a naxraje o tienxinnta chijnie ndo, tjakaxin a kichuunta.

² Ste kaxin sen ndachro sen chao sine sen kain nge e ixi soji titikaon sen, ko ste kaxin sen soji a sen ixi ti nge e titikaon sen, méxin ne a sen ntao.

³ Ko ngisen ine kain nge e tsjanao i sen sen ne a ntao, ko ngisen ne a ntao, tsjanao i sen sen ne kain nge e, ixi ndo Dio nataonxin kuayé e ndo sen.

⁴ Ixi, ¿ngisen ja anta ixi xronichjanta kontree naa sen kichuunta, sen nche e ixra ngajin inaa ngisen? Siá sen nhexra me e, á chao o chao a juinche e sen ixra, nchée sen me e xrondachro á chao o chao a jii ti juinche e sen. Ko jian ixra sinche e sen ixi Ncháina chóna ndo ijié juachaxin tsingijnana ndo sen ixi jian sinche e sen.

⁵ Ko ste kaxin sen xraxaon sen tsango tjintee naa nchakon ko inaa nchakon na i. Ko ikaxin sen ndachro sen ixi kain nchakon xraje o nchakon. Méxin, ngujngu ja anta ti jian xroxaxaonnta me e nche enta.

⁶ Ngisen xraxaon ixi naa nchakon ícha tjintee, je e sen jaña xraxaon sen ixi chónde e sen juasaya Ncháina, ko kaxon sen titikaon a jaña, kaxon chónde e sen Ncháina juasaya, maski je a xraje o xraxaon a sen. Kaxon sen ine kain nge e, ine sen ixi jaña chónde e sen juasaya Ncháina ko tajon sen juasaya ngajin ndo Dio. Kaxon jaña nche e sen ne a ntao, ko kaxon tajon sen juasaya ngajin ndo Dio.

⁷ Ixi ninaa jaina jua i xrokuechón ana ni xrokue enna; kain ji in ton en ixi juachaxien Ncháina.

⁸ Siá stechónna o ndatsen enna, jaina tsajonna juasaya ngajin ndo Dio. Méxin, maski tsen enna o maski tsechónna, jaina tikinixin enna ndo Cristo.

⁹ Méxin, ndo Cristo kuen en ndo ko xechón ndo íjngo ixi tsetuan an ndo ngajin ni tsiken en ko ngajin ni stechón.

¹⁰*Ko ja anta, ¿sonda nichjanta kontree inaa sen?, o, ¿sonda chonde anta juasaya ngajin kain chujni? Kainna xrokonda tsonchjiñe ena ngajin ndo Cristo ixi sinchéñaina ndo ijië.

¹¹ Ndachro xroon jitaxin chijnie ndo Dio:

Jan an ixi ríchon, ndachrjan ixi kain chujni tsakexin na ntatuchi in na ngajin ko kain chujni xrondachro na ixi jan an ndo Dio ne e na.

¹² Jaña kainna tsatsingana ngajin ndo Dio ixi sinchéñaina ndo ijië xranchi kuinteena ngata a nunte nti i.

Chungíe a kichuunta

¹³ Méxin, cháña xrochungi ana kichuuna ko xro an nge e ti ndako a xronichjana ixi inaa ngisen, ixi kondeexin jaina naa sen titikaon Ncháina ba tsama sen ijië o ítsitikaon a sen ndo Dio.

¹⁴ Jan an titika on Ncháina Jesús, me e nónaxin ko a nge e tjúa i. Ko siá xrojan ngisen xraxaon ixi naa nge e ine sen tjúa i, cháña sine a sen.

¹⁵ Siá naa sen kichuunta xraxaon sen ixi tjúa i nge e intenta ko me e ncheni e aséen sen, me e xrondachro íjtue anta sen; méxin, ja anta cháña ínte anta nge e ndachro inaa sen ixi tjúa i ixi jaña sen kuenxin ndo Cristo tsitjáña i sen.

¹⁶ Ko tintue anta ixi ndako a xronichja na ti nge e jian titikaonnta ixi juachaxin tjáanta ndo Jesucristo.

¹⁷ Ixi juachaxien ndo Dio je a ti sinena o nge e tsu una. Na i. Juachaxien ndo Dio tituan an ixi jian tsojuna ko juaxruxin tsinteena ixi Espíritue ndo Dio tajon kain ji i.

¹⁸ Sen jian nche e ixra ngajin ndo Cristo, sen me e stence e sen nge e tjaun ndo Dio, ko ikaxin chujni xronichja jian ixi je e sen.

¹⁹ Méxin, nche ena kain nge e tika o juaxruxin, ixi me e tsingijna sen kichuuna ko jaña ícha tsitikaon sen Ncháina Jesús.

²⁰ Méxin, tintue anta tsitjáña ixra juinche e ndo Dio kondeexin ti sineni, ixi kain nge e ineni, ó juinchetjúá ndo Dio. Siá xrojan nge e sineni me e xroxaxaon inaa sen ixi ndako a jii ko kondeexin me e tsitjáña nge e o kuitikaon sen, cháña sine ani.

²¹ Méxin, ícha tjintee sinte anta ntao ko tsi anta ixran siá inaa ngisen xroxaxaon ndako a me e, ko xro an nge e sinche enta ixi jaña tsama sen kichuunta ijië.

²² Nge e jian titikaonnta, ja onta ko ndo Dio no anta. Ko juaxruxin tsake e ngisen xraxaon ixi xro an ijië yama sen kondeexin nge e nche e sen.

²³ Ko ngisen ine xrojan nge e ko jixraxaon sen ixi ndakua i jii, sen me e tsama sen ijië, ixi xraxaon sen ndakua i jii nge e juinche e sen. Ixi ti nduaxin a chúntiani nge e nche eni, me e yamaxinni ijië.

15

Tingijnanta ixi ícha soji tsitikaon sen kichuunta

¹ Jaina siá ícha soji titikaonna Ncháina Jesucristo, xrokonda tsingijnana sen xrasoji a titikaon ndo, ko sinche ana je o ti nchejna juaxruxin.

² Kainna xrokonda sinche ena ti jian ngajin sen kichuuna, ko jaña tsingijnana sen ixi ícha xrochuntia sen Ncháina Jesucristo.

³ Ixi ndo Cristo juinche a ndo je o ti juinche e ndo juaxruxin. Na i. Je e ndo kuitikaon ndo nge e ndachro xroon chijnie ndo Dio: “Tangi juinchenina ti nichjangí e na ndo Dio.”

⁴ Kain nge e jitaxin xroon chijnie ndo Dio tsiketaxin ixi jaina xrokonojna nge e jian, ko xrochon enna nge e tsayé ena, maski tangi tsojna, ixi chijnie ndo Dio chjaina juachaxin ixi xrochondana juaxruxin.

⁵ Ko ndo Dio, me e ndo tingijnana ko chjaina ndo juaxruxin, tsingijnanta ndo ixi jian tsariku unta sen kichuunta, ko tsinteenta xranchi juako ndo Cristo Jesús.

⁶ Ko kaina naxraje o xronichje ena ndo Dio ko tsajonna juasaya* ngajin ndo, Ndotée Ncháina Jesucristo.

Chjni jian tsayé e ni je a judío

⁷ Méxin, titikaonnta ko tjue é kichuunta xranchi ndo Cristo kuaya anta ndo, ko jaña tsajonnta juasaya ngajin ndo Dio.

⁸ Jan an chao xrondachrjan ixi ndo Cristo kuu ndo ixi tsingijna ndo ni judío ixi tson en nge e jian tsindache ndo Dio sen tachrí ana ó sa ó, ixi jaña tsjako ndo Cristo ixi ndo Dio jian ndo ko nche e ndo nge e tsindachro ndo.

⁹ Kaxon kuui ndo ixi ni je a judío tsajon na juasaya ngajin ndo Dio ixi bikonóe e ndo na, xranchi chronga xroon chijnie ndo Dio:

Jan an ko chujni ste jée tjajna tsajonna juasaya ngajin ndo Dio ko xrotsjēna himno ngajin ndo.

¹⁰ Kaxon ndachro chijnie ndo Dio:

Ja anta ti je a judíonta, take énta juaxruxin ngajin kain chujnie ndo Dio.

¹¹ Kaxon íjngo tsindachro xroon chijnie ndo Dio:

Tájonnta juasaya ngajin Ncháina Dio kainnta, maski je a judíonta, ko kain chujni xrotsjē ngajin ndo Dio.

¹² Kaxon ndo Isaías tsikjin ndo:

Tsachrjenixin ndo Isaí naa ngisen tsetuen en kain ni je a judío, ko je e na tsitikaon na ndo Dio, ko me e tsechón na kain nchakon.

¹³ Ndo Dio, ndo tsajon juachaxin stechon ennta, xrotjáanta ndo juaxruxin ko xrocha anta ixi titikaonnta ndo, ixi juachaxien Espíritue ndo xrochon énta nge e tsaye enta.

¹⁴ Kichuuna, nduaxin nóna ixi ja anta jiannta ko jian tienxinnta ko no anta me e sinchekuen ennta sen kichuunta.

¹⁵ Ko jaña ikjin xroon ji i ixi jian tsono anta nge e sinche enta ko xrotjáña inta. Jaña nta a ixi ixra ji i kuituanna ndo Dio sinta a,

¹⁶ ko kuinchena ndo sinta a xrée ndo Jesucristo, xronichja chijnie ndo Dio ngajin ni je a judío. Ixra me e ti tjako chjni jian ixi tsayé e na juachaxin tsechón na kain nchakon, ko je e na xrokjan na xranchi naa nge e jian tsayé e ndo Dio ixi Espíritue ndo.

¹⁷ Jan an naa ngisen titikaon ndo Cristo Jesús, méxin, juaxruxin ritjén ixi nta a xrée ndo.

¹⁸ Ko jua i xrondachrjan inaa nge e. Je o ndachrjan kondee juachaxin kuajon ndo Cristo kuayá a ixi xronichja ngajin ni je a judío chijnie ndo ixi tsitikaon na ndo Dio. Ko ó kuitikaon na ixi chjni juáko ko je a ixi je o ti nichja, kaxon ixi nge e jian junta a.

¹⁹ Ixi juachaxien Espíritue ndo Dio junta a itsjé ixra ijié ko juntakuan an na chijnie ndo Cristo ixi jaña tsechónna kain nchakon. Ko juangixin juáko tjajna Jerusalén ko kain tjajna tjenka nti a ko nguixin no Iliria.

²⁰ Ko tja on tsjako chjni tajon juachaxin ngajin tjajna ti xratien a na chijnie ndo Cristo, ixi jan an tjaun a sinta a ixra ti no inaa sen ó juinche e sen ixra.

²¹ Tja on sinta a xranchi ndachro xroon chijnie ndo Dio: Xrokuin en ni xranai a tsikin en chijnie ndo.

* 15:6 juasaya respeto, honor

Ko xrokuienxin chujni, ni xratienxin a chijnie ndo.

Ndo Pablo xraxaon ndo itsji ndo tjajna Roma

²² *Ó itsjé nchakon tja on xrojuasótsja anta ko xrajua i tjaso.

²³ Ko jai ó juexin ixra rinta a nguixin nti i. Ko ó tsjé nano tja on xrojuasótsja anta,

²⁴ méxin, xraxa on tsjaso nchakon tsatsinga itsji tjajna España. Jua i tsituna itsjé nchakon ngajinnta ko nóna ixi juaxruxin tsake e ixi tsikonnta, ko tja on tsingijnaninta nchakon satsjixin nti a.

²⁵ *Ko jai satsji tjajna Jerusalén, tsiki an tomi tsingijnaxin sen kichuuna nti a.

²⁶ Ixi sen ni ngo nunte Macedonia ko sen ni ngo nunte Acaya jua o sen tomi ixi xroxruan an sen ngajin sen kichuuna, sen nóa, ste tjajna Jerusalén.

²⁷ *Je e sen, sen je a judío, juaxruxin juinche e sen ji i, ixi sen judío titikaon ndo Cristo bingijna ti je e sen, sen tjajna Macedonia, ixi xrokono e sen chijnie ndo Dio ó seno. Ko jai kaxon je e sen bingijna sen ko kuajon sen nge e chóna sen ixi xrokuayé e sen judío titikaon Ncháina.

²⁸ Ko nchakon tsajon tomi ngajin sen kichuuna, tjume e jan an satsji tjajna España ko no ña tsatsinga tsjasotsja anta.

²⁹ Nóna ixi nchakon tsjaso nti a tjajna Roma xrontatjunta kain nge e jian juinche e ndo Cristo ngajin.

³⁰ Kichuuna, tinóatáana ixi Ncháina Jesucristo ko Espíritue ndo, ti tajon juachaxin tjue e kichuuna, tjanche enta ndo Dio ixi tsingijnana ndo.

³¹ Kaxon tjanche enta ndo ixi tsingijna ndo ixi xro an nge e sinchena ni titikaon a ndo Dio, ni jii tjajna Judea, ko tomi tika an sen kichuuna ste tjajna Jerusalén, jian tsayé e sen tomi.

³² Tjume e, siá ndo Dio tjaun ndo, juaxruxin tsjaso ti stenta ko juaxruxin tsjokéena nti a.

³³ Ndo Dio, ndo chjaina juaxruxin, tsake e ndo ngajin kainnta. Jaña tson en.

16

Ndo Pablo xruan an ndo juajna ngajin sen chúxin ndo

¹ Ixudio tingijnanta jan kichuuna Febe. Je e jan jian nche e jan xrée ndo Dio ti ni ngo jii tjajna Cencrea.

² Taye énta jan ixi juachaxien Ncháina, xranchi tikinixin sinche e sen kichuuna titikaon Ncháina. Tingijnanta jan ixi xrojan nge e xrokonde e jan, ixi je e jan tsango bingijna jan kueya chujni ko kaxon jan an bingijnana jan.

³ *Tájonnta juajna ngajin jan Priscila ko ndo Aquila. Je e sen ko jan an junta ana xrée ndo Cristo.

⁴ Je e sen xrokuen en sen ixi bingijnana sen, méxin, tajon juasiana ngajin sen, ko je a je o jan an, kaxon kain sen kichuuna, sen ni ngo je a judío.

⁵ Tájonnta juajna kaxon ngajin kain sen kichuuna xra o ndo a jan Priscila ko ndo Aquila. Nichje enta ndo Epéneto, ndo tsango jian tjento, ndo me e sa ó juangixin kuitikaon ndo ndo Cristo nunte Acaya.

⁶ Chje énta juajna jan María ixi kaxon je e jan tsango juinche e jan ixra nti a ti stenta.

⁷ Kaxon tájonnta juajna ngajin sen tsikixin tjajnana, ndo Andrónico ko kaxon ndo Junias, sen kuariki an ndo achjiso. Kain sen kichuuna tsango tjento, sen me e ó sa ó kuitikaon sen ndo Cristo ko tjume e jan an.

⁸ Kaxon tájonnta juajna ngajin ndo Amplias ixi je e ndo naa ndo chuxin ko tsango tjua a, ko titikaon ndo ndo Cristo.

⁹ Tájonnta juajna ngajin ndo Urbano ixi kayuina junta ana xrée ndo Jesucristo, ko tájonnta juajna ngajin ndo tsango tja on, ndo Estaquis.

¹⁰ Tájonnta juajna ngajin ndo Apeles. Je e ndo tsango tangi kon en ndo ixi kuitikaon ndo ndo Cristo. Kaxon tájonnta juajna ngajin sen ndo a ndo Aristóbulo.

¹¹ Kaxon tájonnta juajna ngajin ndo kichuuna Herodión, ko kaxon ngajin kain sen ndo a ndo Narciso ixi kaxon titikaon sen Ncháina.

¹² Tájonnta juajna ngajin jan Trifena ko jan Trifosa. Je e sen juinche e sen xrée Ncháina, ko nichje enta kaxon jan kichuuna Pérsida, jan tjua a. Je e jan juinche e jan xrée Ncháina Jesucristo.

¹³ *Kaxon ngajin ndo Rufo tájonnta juajna. Je e ndo naa ngisen tsikinche e Ncháina, ko nichje enta janée ndo ixi kaxon bingijnana jan ko jan an tja on jan xranchi janána.

¹⁴ Kaxon nichje enta ndo Asíncrito ko ndo Flegonte ko ndo Hermes ko ndo Patrobas ko ndo Hermas, ko ikaxin sen kichuuna, sen stekao sen nti a.

¹⁵ Kaxon tájonnta juajna ngajin ndo Filólogo ko Julia ko Nereo ko jan kichuu ndo ko ndo Olimpas ko kain sen kichuuna titikaon Ncháina stekao sen.

¹⁶ Ko chje é kichuunta juajna ko tjue é kichuunta. Kain sen ni ngo tikinixin en ndo Cristo xruan annta sen juajna.

¹⁷ Kichuuna, tinóatáana ngajinnta jian tsje enta ngisen jitansetsjendaa sen kichuuna titikaon Ncháina. Sen me e titikaon a sen jian chijnie ndo Dio kuayé e ja anta. Méxin, cháña tjento anta sen.

¹⁸ Sen jaña nche e, je a xrée Ncháina Jesucristo nche e sen. Je o nche e sen nge e tjaun sen ko ti xraxaon sen, ko chaxro nichje e sen chujni xranoe a ko jaña ncheya sen ngajin sen.

¹⁹ Kain chujni no e na ixi ja anta jian titikaonnta Ncháina. Méxin, jan an ritjén juaxruxin ko tja on sinche enta ti jian, ko sinche anta ti ndako a.

²⁰ Ndo Dio, ndo tsango tajon ndo juaxruxin, ó tuinxin tsantsje e ndo Xixron anxrée ti tituan an xa. Ko Ncháina Jesucristo sintanchaonnta ndo.

²¹ *Ndo Timoteo xruan annta ndo juajna. Je e ndo ko jan an xraje o xra stenta ana. Kaxon ndo Lucio ko ndo Jasón ko ndo Sosípater, sen tjajnána, xruan annta sen juajna.

²² Jan an Tercio, rikjin xroon ji i ixi ndo Pablo ndachijina ndo nge e xrokjin, kaxon xruan annta juajna ixi juachaxien Ncháina.

²³ *Ndo Gayo xruan annta ndo juajna. Je e ndo kuajon ndo juachaxin titunana ndo a ndo, ko kaxon ndo a ndo stexra o sen ni ngo. Ko ndo Erasto xruan annta ndo juajna. Je e ndo tja o ndo tomie tjajna, ko ndo kichuuna ndo Cuarto kaxon xruan annta ndo juajna.

²⁴ Ncháina Jesucristo sintanchaonnta ndo kain ja anta. Jaña tson en.

²⁵ Jai tajonna juasaya ngajin ndo Dio ixi je e ndo ícha sinchesoji ndo asáanta xranchi nichja chijnie ndo Dio, chijni me e jan an ó juntakuan annta, ko me e chijnie ndo Jesucristo. Ko ji i nduaxin, ndo Dio juinchenoına ndo nge e xrakonoe a chujni ti xra xrangíxixión nunte xasintajni.

²⁶ Ko jai kainna noına me e, ixi jitaxin xroon tsikjin sen profeta xranchi kuetuan an ndo Dio, ndo jichón kain nchakon. Kain ji in chujni nchijí nunte xasintajni xrochuxin na ko tsitikaon na ko sinche e na ti ndachro je e ndo.

²⁷ Jii naakua ndo Dio, ndo no e kain nge e, ko je o je e ndo tikinixin en ndo kain juasaya ixi juachaxien Ncháina Jesucristo. Jaña tson en.

Xroon sa ó tsikjin ndo Pablo xrúen en ndo sen ste tjajna Corinto

Ndo Pablo ikjin ndo xroon ngajin sen tjajna Corinto

¹ Jan an, Pablo, ndo Dio kuinche ena ndo ixi sinta a ixra ngajin Ncháina Jesucristo. Jan an ko ndo kichuuna Sóstenes

² *ikjinna xroon ji i xrúan anna ngajinnta xro stenta ni ngo tjajna Corinto ixi titikaonnta Ncháina Jesucristo ko ja anta tikinixin ennta ndo Dio. Ndo Dio kuincha anta ndo ixi tjúa tsake enta, xranchi sen ste itsjé tjajna ó titikaon Ncháina Jesucristo, Nchéé sen ko Ncháina kaxon.

³ Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Ndo Pablo nichja ndo ngajin ndo Dio

⁴ Kain nchakon tajon juasaya ngajin ndo Dio ixi je e ndo juntanchaonnta ndo ixi ja anta titikaonnta Ncháina* Jesús.

⁵ Ixi titikaonnta Ndo Dio, me e tjáanta ndo juachaxin ko kain nge e jian, méxin jian no anta xranchi xronichjanta ko jian tienxinnta kain nge e.

⁶ Jaña kuitikaonnta chijni kuin ennta ne e ndo Cristo ko jai jian tjakoxinnta ji i.

⁷ Méxin, ja anta ó chondanta kain juachaxin tajon Espíritue ndo Dio, íxro an nge e titjáña anta ti xra stechon ennta xrokjan Ncháina Jesucristo.

⁸ Ko Ncháina Jesucristo tayakon annta ndo ko tsintue anta tsitikaonnta ndo tsija nchakon tsjexin kain nge e. Ko jaña xro an ngisen tsjankata anta ijje nchakon xrokjan ndo Jesucristo.

⁹ Ndo Dio nduaxin sinche e ndo nge e tsindachro ndo ixi je e ndo kuincha anta ndo ixi tsitikaonnta Chjen en ndo, Jesucristo, Ncháina.

Je a xraje o xraxaon sen ni ngo tjajna Corinto

¹⁰ Kichuuna, tinóatána ngajinnta ixi juachaxien Ncháina Jesucristo naxraje o xroxraonnta ko tanchrjenda i kichuunta; cháña naxraje o xroxraonnta ko xraje o nche enta.

¹¹ Kichuuna, jaña ndachrjan ixi kuin an nge e ndachro sen ndo a ndo Cloé ixi je a naxraje o xraxaonnta.

¹² *Ti rindachrjan ixi kaxinnta ndachronta “jan an rua a ndo Pablo”, ko ikaxinnta ndachronta rue énta ndo Apolos ko ikaxinnta ndachronta rue énta ndo Pedro, ko ikaxinnta ndachronta ixi rue énta ndo Cristo.

¹³ ¿Á tsichrijin ndo Cristo? ¿Á je a naakua ndo Cristo titika onna? ¿Á jan an Pablo kuenxinna ixi ja anta? ¿Á bikitéexinta ixi juachaxinna?

¹⁴ *Juasie ndo Dio ixi tsjé a sen bikitée jan an. Je o ndo Crispo ko ndo Gayo bikitée.

¹⁵ Ixi jaña ninaánta xrondachro anta ixi juachaxinna bikitéexinta.

¹⁶ *Kaxon bikitée ndo Estéfnas ko sen ndo a ndo. Ko sintaxin aña on á bikitée ikaxin sen o na i.

¹⁷ Ixi ixra chjána ndo Cristo je a tsikitée chujni. Ixra chjána Ncháina Jesucristo me e ti xronichja chijni jian tajon juachaxin tsehónni kain nchakon. Tjaun a xronichja ixi chijni tsango chaxro ixi tjaun a tsantsja a ti juachaxin ijje konoxin nchakon kuen en Ncháina Jesucristo nganito ntacru.

Ndo Cristo chóna ndo juachaxien ndo Dio

¹⁸ Ti ndachro chijni ixi ndo Cristo kuenxin ndo nganito ntacru, kaxin na xraxaon na tjinte a ji i ko ni jaña xraxaon tsitjáña na, ko jaña ti titika onna me e nduaxin tsechónna kain nchakon, chijni me e chónnda kain juachaxin.

¹⁹ Jaña ndachro xroon chijnie ndo Dio tsikjin sen ó sa ó: Jan an ndo Dio sintatjáña nge e xraxaon ni ícha no e, ko sintajexin ti ndachro ni tienxin.

²⁰ ¿Nge e tsonda ti ndachro na tsango no e na ko nge e tsonda ti nchekuen en na ikaxin chujni ko nge e tsonda ti ndachro na no e na kondee nunte xasintajni? Ndo Dio tikon ndo kain ji i tjinte a ko xro an xrée.

²¹ Ndo Dio tsango no e ndo, méxin kuintue a ndo ixi ti no e chujni xrokuichuxixin na ndo. Cháña ndo Dio juako ndo ixi chijnie ndo tsichuxixin na ndo, ko chijni me e tsechónxinni, maski je e na xraxaon na ixi tjinte a chijni.

²² Ni judío tjaun na xrobikon na naa ixra tsango jié, ko ni griego tjaun na tsono e na ícha.

²³ Ko jaña kaina tjakona chijnie ndo Cristo, je e ndo kuenxin ndo nganito ntacru. Ko ni judío xraxaon na ixi ti titikaon jaña, me e naa chijni tsosuexinni. Ko ni je a judío ndachro na ixi nintana ixi jaña titika onna.

²⁴ Ko sen kuinche e ndo Dio, maski sen judío o sen griego, kain sen ndachro sen ixi ndo Cristo chónnda ndo ijié juachaxin ko ndo Cristo chronga ndo kain ti jian no e ndo Dio.

²⁵ Ti xraxaon chujni ixi ndo Dio noe a ndo ko nduaxin je e ndo ícha no e ndo ixi ngixe i chujni ndachro ixi ícha no e na. Ko ti xraxaon chujni ixi ndo Dio jié a juachaxin chónnda ndo, ko ti jié a juachaxin ichro na me e ícha ijié ixi kain juachaxin chónnda chujni.

²⁶ Kichuuna, xraxaonnta xranchi kuincha anta ndo maski tsjé anta no anta ícha xranchi tikon ni ste nunte xasintajni. Ko tsjé a ja anta ko sen ndointa tjinteenta ngajin tjajna.

²⁷ Ndo Dio kuinche e ndo kaxin sen noe a ichro chujni ste nunte xasintajni ixi jaña je e ndo tjaun ndo tsosue e ni ndachro ícha no e. Ko kaxon kuinche e ndo kaxin sen tjinte a ichro chujni ste nunte xasintajni ixi jaña je e ndo tjaun ndo tsosue e ni ndachro chónnda na ijié juachaxin.

²⁸ Ndo Dio kuinche e ndo kaxin sen tituan i ko ikaxin sen xro an tjintee ixi je e ndo tjaun ndo sinchetjáña ndo juachaxin chónnda ni xraxaon tsango no e.

²⁹ Méxin, xro an ngisen sinchejié aséen ngajin ndo Dio.

³⁰ Ixi juachaxien ndo Dio ja anta kuitikaonnta ndo Cristo Jesús, ko ti kuitikaonna ndo, me e nduaxin tjintee, ko ixi juachaxien ndo komé e ijié kuachondana, ko juachaxien ndo sinchetjúáxin ndo aséeina ko jnié ndo kuenaxinna ndo.

³¹ Méxin, ndachro xroon chijnie ndo Dio: “Ngisen tjaun sinchejié aséen, sinchejié aséen sen ixi je e sen no e sen ixi Ncháina chónnda ndo ijié juachaxin.”

2

Ndo Pablo chronga ndo ixi ndo Jesucristo kuen en ndo nganito ntacru

¹ Kichuuna, nchakon juaso nti a tjajnanta ko juntakuan annta nge e tjaun ndo Dio tsono anta, ko nichjaxin a ixi naa chijni tienxin anta ko tjako a xranchi naa chujni tsango no e.

² Je a me e junta a ti bake e nti a. Je o juako anta ixi ndo Cristo ti kuen en ndo nganito ntacru.

³ *Ko ti juaso nti a juntakuan annta, je a xraxra on ixi tsango nóna. Na i, jan an jixrangana xranchi naa ngisen noe a.

⁴ Ti nichja, nichja i xranchi naa ngisen tsango no e. Je o kuintu a ixi Espíritue ndo Dio bingijnana nichja ixi sintakuan anta kain juachaxin chónnda ndo Dio,

⁵ ko kuichuntianta ndo Dio ixi juachaxien ndo, ko je a ixi ti tsango no e chujni.

Espíritue ndo Dio tjakoína kain nge e

⁶ Ko nchakon juáko ngajin ni ó jian titikaon Ncháina, jan an nichja xranchi nichja naa sen tsango chúxin ko no e chijnie ndo ko ji i je a xranchi nge e no e ni jii nunte xasintajni, o xranchi nichja ni tetuan an nunte xasintajni, ixi ti no e na ó tuinxin tsitjáña.

⁷ Jan anna juakona jian nge e kuanoe a chujni, nge e tsixraxaon ndo Dio ó sa ó ti xrako a nunte xasintajni, ko me e tjaun ndo tsono e chujni jai ixi me e tsjacha na tsechón na kain nchakon.

⁸ Ko xro an ni tituan an nunte xasintajni kuienxin na chijni ji i ti tsixraxaon ndo Dio ixi siá je e na xrokuienxin na, xrobake a na nganito ntacru Ncháina Jesucristo, ndo chóna kain juachaxin.

⁹ Ndachro xroon chijnie ndo Dio tsikjin sen ó sa ó:

Juinchéña ndo nge e xraxro an ngisen tikon

ko xraxro an ngisen tin en,

ko xraxro an ngisen xraxaon

ko ji i tsayé e sen nduaxin tjue e ndo Dio.

¹⁰ Ndo Dio juinchenoína ndo kain ji i ixi chondana Espíritue ndo ixi Espíritue ndo tsje e kain nge e ko no e kain nge e xraxaon ndo Dio.

¹¹ Xro an ngisen no e nge e xraxaon inaa chujni. Je o ngujngu chujni no e nge e xraxaon. Jaña kaxon xro an ngisen no e nge e xraxaon ndo Dio, je o Espíritue ndo me e no e.

¹² Ko jaina kuayé ana espíritue chujni nunte xasintajni. Na i. Ndo Dio chjaina ndo espíritue ndo ko ixi espíritue ndo me e nómaxinna kain nge e jian juinche e ndo ixi je e ndo tsango tjuaina ndo.

¹³ Nchakon nichja nge e juinche e ndo Dio ixi jaina, je a nichjana ixi xranchi ó xrokono e chujni nunte xasintajni. Juachaxien Espíritue ndo Dio nichjaxinna. Ko jaña nichjaxinna sen chóna Espíritue ndo.

¹⁴ Ni chóna i Espíritue ndo Dio jua i tsayé e na nge e tajon Espíritue ndo ixi xraxaon na chijni ji in, tsango ninta chijni. Jua i tsienxin na ji in ixi chóna i na Espíritue ndo.

¹⁵ Ko ngisen chóna Espíritue ndo Dio chao tienxin sen kain nge e ko no e sen á chao jii o na i. Ko ni chóna i Espíritue ndo jua i xrondachro na á chao tjako sen chóna Espíritue ndo o na i ixi je e na tienxin a na.

¹⁶ Xranchi ndachro xroon chijnie ndo Dio: “¿Ngisen xrokono e xranchi xraxaon Ncháina Dio? ¿Ngisen chao xrojuincheken en ndo?” Ko jaina chondana juachaxien Espíritue ndo, méxin, xraxaonna xranchi xraxaon ndo Cristo.

3

Sen nche e xré ndo Dio

¹ Kichuuna, jua i nichja anta xranchi sen ó chóna Espíritue ndo Dio ixi ja anta xranche enta xranchi chujni nunte xasintajni. Méxin, xrokonda nichja anta xranchi sen nandá taxi chuntia ndo Cristo.

²*Jan an juako anta nge e tangi a ixi ndako xjan nchínchín stenta, xjan nandá ti i itsjin ko jua i ine xjan nio ko xrajua i tienxinnta jai

³ ixi xranche enta xranchi nche e chujni nunte xasintajni. Xratochjuya anta nge e nche e ikaxin sen ko tetoku u kichuunta. ¿Á je a me e xrondachro ixi ja anta xranche enta xranchi nche e ni nunte xasintajni?

⁴*Kaxinnta ndachronta ixi rua naninta jan an Pablo, ko ikaxinnta ndachronta ixi rue énta ndo Apolos. Jaña xraxaonnta xranchi chujni nunte xasintajni.

⁵ ¿Ngisen ndo Pablo ko ngisen ndo Apolos? Jan ana je o nta ana xrée ndo Dio ixi juako ananta ko kuitikaonnta Ncháina. Ngujnguna je o junta ana nge e kuetuannana ndo Dio.

⁶ *Jan an kuenga tsee chijnie ndo Jesucristo, ko ndo Apolos xranchi ngisen tikitée inda tsee, me e juako ndo xranchi xrochuntianta ndo Dio ko je o je e ndo Dio tajon ndo juachaxin tsangi ika, me e xrondachro ícha tsitikaonnta ndo.

⁷ Méxin, ngisen tenga ko ngisen tikitée inda, je o juinche e sen xra; je o ndo Dio tajon ndo juachaxin tsangi ka.

⁸ Sen tenga ko sen tikitée inda xraje o tjintee sen, ko ndo Dio tsjenge e ndo sen na ixi ixra juinche e sen.

⁹ Méxin, jan an ko ndo Apolos je o nta ana xrée ndo Dio, ko ja anta stenta xranchi naa ijngi tsikinga chijnie ndo Dio, o xranchi naa nchia jincheckochjian ndo.

¹⁰ Ndo Dio jian ndo, méxin, chjána ndo juachaxin ixi jan an tsake e xranchi naa xi tetuan an xranchi sincheckonchjian sen nchia, me e xrondachro ti bakée ixro sa ó tsaxi tsite xin tjatu o. Tjume e ikaxin sen kuite sen ícha ixro, ko ngujngu sen xrokonda ndako sincheckonchjian sen nchia,

¹¹ ixi xro an ngisen tsake e inaa ixro xrangíxixín nchia ixi ó jii xro sa ó tsikaxi tsiki texin nchia, ko ixro me e ndo Jesucristo.

¹² Ko tjume e ngata a ixro me e chao tsi te sen ixi chika oro ko chika plata, ixro chaxro tjintee, ntaa, ka tsixema, o ntaxro,

¹³ ko nchakon tsjexin kain nge e, ndo Dio tsjako ndo ixra juinche e ngujngu sen. Ko xro i tsjakoxin ndo ngixe i ixra juinche e ngujngu chujni.

¹⁴ Ko siá ti juinche e sen jian, tsjacha sen naa nge e jian,

¹⁵ ko siá ti xra juinche e sen je a jian, tsitjáña kain xra me e, ko je e sen tsitjáña i sen, ixi xrokjui xranchi je e sen xrokuinge e sen xro i.

¹⁶ *Kain ja anta, ¿á noa inta ixi ja anta ningue ndo Dio ko Espíritue ndo jii गया asáanta?

¹⁷ Ko siá xrojan ngisen tjaun sincheni e ningue ndo, je e ndo Dio sinchetjáña ndo ni me e, ixi ningue ndo Dio tjúá ni ngo ko ja anta me e ni ngo.

¹⁸ Ja anta ncheye anta asáanta. Siá xrojannta ndachronta गया asáanta ixi ícha no anta xranchi chujni ste nunte xasintajni, xrokonda xrokjannta xranchi naa ni noe a ixi tjume e xrokjannta xranchi naa ni nduaxin ícha no e.

¹⁹ Ixi ti nge e no e chujni jii nunte xasintajni me e xro an tjintee tikon ndo Dio. Ko ndachro xroon chijnie ndo Dio tsikjin sen ó sa ó: “Ti chujni ícha no e, ko je o ti no e na me e tsitjáñaxin na.”

²⁰ Ko kaxon ndachro xroon chijnie ndo Dio: “Ncháina no e ndo kain nge e xraxaon ni ndachro ícha no e ko ti xraxaon na xro an tjintee.”

²¹ Méxin, nchejié a asáanta ixi ndachronta jii naa chujni ícha no e, ixi kain nge e jii me e tikinixin anta,

²² jan an ndo Pablo, ndo Apolos, ndo Pedro, nunte xasintajni, nge e jichón, ti tsen en ni, nge e jii jai, ko nge e tson en ícha tjume e, kain tikinixin anta.

²³ Ko ja anta tikinixin ennta ndo Cristo ko ndo Cristo tikinixin en ndo ndo Dio.

4

Ixra juinche e ni kuinche e Ncháina Jesucristo

¹ Ja anta xrobikonnanta je o xranchi ngisen nche e xrée ndo Cristo ko kuituannana ndo tsjakona nge e xro an ngisen kuano e kondee je e ndo.

² Ko ngisen kuayé e naa ixra xrokonda tsjako sen ixi nduaxin chao xrochúntiani ngajin sen.

³ Ko jan an ta i juachjaon ixi nge e xrondachronta ixi jan an, o chujni nchéña ijie ixi ixra nta a ngajin ndo Dio, ko jan an jua i tsjankata a ijie aséenna.

⁴ Ko jan an xraxaon a á richonda ijie, ko ntamá i ijie richonda. Na i. Je o Ncháina chónnda ndo juachaxin xrondachro ndo á chonda ijie o na i.

⁵ Méxin, tjankata inta ijie ngajin xrojan ngisen. Chuenjanta nchakon tsij Ncháina ixi je e ndo tsjako ndo kain nge e jimá ti naxixe e, ko sinchenoxin ndo kain nge e jii ngaya aséen chujni. Ko nchakon me e ndo Dio jian xronichja ndo ixi ngujngu ixra juinche e chujni.

⁶ Kichuuna, jai nichja anta ixi jian tsake enta, ko ndachrjan ji i ixi jan an ko ndo Apolos tjinte a jan anna ixi sinche enta ko xroxraxaonnta ícha, je o ti nge e tsikjin sen ó sa ó: “Sinche ani ko xrondachro ani ícha je o ti jitaxin xroon chijnie ndo Dio.” Ko me e xro an ngisen nchejié aséen ixi rué e sen naa ngisen xraxaon sen ícha no e, ko me e xrochónde a kichuu sen juasaya.

⁷ ¿Ngisen ntatjunta ixi ja anta ícha tjinteenta ixi inaa ngisen?, ko, ¿nge e chondanta ti je a ndo Dio tsitjáanta ndo? Siá ndo Dio kuajon ndo kain nge e chondanta, méxin, ¿sonda nchejié asáanta ixi xranchi ja onta tsijinchiinta ti chondanta ko ti no anta?

⁸ Ja anta chondanta kain nge e tjaunnta ko chondanta kain nge e xranchi naa xi rey, ko jai nche enta xranchi ítonda ina ngajinnta. Siá nduaxin ja anta tituan annta xranchi naa xi rey, me e jan anna kaxon chao tsituan anna xranchi ja anta.

⁹ Xraxa on ixi jan anna, ngisen kuinche e ndo Dio, tjinte ana. Stena xranchi ni jichón en tsen en, ko kain chujni nunte xasintajni ko kain sen ángel stetikon ti tangi stetónana.

¹⁰ Ko jan anna tikon na jan anna tsango nintana ixi titika onna ndo Cristo. Ko ja anta tikonnanta je e na xranchi ni ícha no e. Jan anna stena xranchi chujni soji a, ko ja anta xranchi chujni tsango soji. Ja anta chonde enta na juasaya, ko ngajin jan anna, na i.

¹¹ Jai jan anna tatséna jinta, ko ten enna inda, ko chonda ina nge e tsaritsa ana, ko chujni chjinga nchenana, ko chonda ina nchia tsinteena.

¹² *Tsango tonchrjena ixi tjánana ntaxinna ixra. Ko tenganana na teka ko jan anna tjancha ana ndo Dio ixi je e na. Tengina na ko jan anna tjua ana na.

¹³ Ko tjanginana na ko jan anna jian nichja ana na. Nchenana na xranchi xrokjuina xinenoe xasintajni,* ko xrajaña jiton en nchakon jai.

¹⁴ Ikjin ji i je a ixi tsosuxinnta. Na i. Tja on syntaxraxa onnta ixi jian sinche enta ixi xranchi chjan na tikonnta ixi tsango tjua anta.

¹⁵ Maski xrochondanta te mil ngisen sintakuan annta chijnie ndo Cristo, chonda inta itsjé ndotánta. Ko jan an ikjui xranchi ndotánta nchakon ja anta kuaye enta ndo Cristo Jesús ixi juintakuan annta chijnie ndo Dio ko me e kuaye enta juachaxin tsarichonnta kain nchakon.

¹⁶ *Méxin, tinóatána ngajinnta jian tjakonta xranchi jan an.

¹⁷ Méxin, kuituan an ndo Timoteo tsiji ndo ngajinnta. Xranchi chjan na tikon ndo, ko tjua a† ndo, ixi jian nche e ndo ixra ne e Ncháina. Tsiji ndo syntaxraxaonnta ndo xranchi jan an nta a ti kuituan an ndo Cristo ko kain ji i tjako ngujngu ni ngo nguixin tinó ichrji.

¹⁸ Ko kaxin ja anta xraxaonnta ixi je a nduaxin tsjasotsja anta, méxin nchejié asáanta.

¹⁹ Ko siá tjaun Ncháina, tuinxin tsjaso ngajinnta. Me e tsin an ko tsikon ixi sen nchejié aséen, á nduaxin nche e sen nge e nichja sen.

²⁰ Ko juachaxien ndo Dio, je a je o nge e xronichjani. Xrokonda tsjakoni ixi nduaxin chónndani juachaxien ndo.

²¹ ¿Xranchi tjaunnta tsjasotsja anta? ¿Á tsjasokian naa ntasé tsikaonxinnta?, o, ¿á tjaunnta jian ko juaxruxin tsjaso?

5

Tsoñe e ijie ngisen ndako a juinche e

¹ Itsjé chujni no e na ixi naa ja anta chondanta xranchi nchrinchri anta janajo annta. Ji i naa nge e tsango ndakua i jii. Ni chúxin a ndo Dio nche a na jaña xranchi ja anta.

² Ko maski jaña tsikon en, kain ja anta tsango nchejié asáanta ko tosua inta ixi xi jaña nche enta, ja anta ó xrobengixinnta xa ni ngo.

³ Maski ritjén a ti ste ja anta, aséenna nti a jii ngajinnta, ko ndachrjan ixi xi jaña tsijinche e ó yama xa ijie.

⁴ Méxin, nchakon stetajonnta juasaya ngajin Ncháina Jesús, xraxaonnta ixi jan an ritjén ngajinnta,

⁵ ko xi jaña tsijinche e tintu enta xa ixi Xixron anxrée sincheni e ntau e xa, ko jaña nchakon xrokjan Ncháina Jesucristo tsitjáña i aséen xa.

⁶ *Take anta juaxruxin ko nchejié a asáanta ixi ti ndako a kon en nti a. ¿Á noa inta ixi siá tsake eni naanchichjaon ti nchetja in chu u, kain chu u tja in chu u?

⁷ Méxin, tintu enta ti ndako a nche enta ixi ti ndako a kon en me e xranchi nge e ti nchetja in chu u ko me e nhexenga kain chu u. Nche anta ti ndako a, me e ja anta tsake enta xranchi naa nutja tsikónaxin chu u natjúá, xranchi nutja ineni kia pascua ixi ndo Cristo, kuenxin ndo ixi jaina, kuen en ndo xranchi naa kutuchjon tóñani kia pascua.

⁸ Siá jian sinche ena, jaina stena xranchi nutja jian ineni kia pascua ixi nduaxin xraxaonni ndo Cristo. Xrokonda jian sinche ena xranchi nutja jian chóna i ti nchetja in chu u, méxin, ixi nchijí aséina tsitikaonna ndo Dio ko tsintu ena kain ti ndako a.

⁹ Xroon xruan annta ó sa ó ntatjunta ixi xrojuento anta ni ndako a nche e, ni chóna inaa nchri je a janchri e.

¹⁰ Ko ndachrjan i ixi xrojuento anta kain chujni ste nunte xasintajni, ni ndako a nche e, ni chóna nchri je a janchri e, ni tjaun xrochóna itsjé nge e, ni tee, ko ni titikaon ídolo. Na i. Siá xrojuento anta kain ni jaña nche e, xrokonda xrokuachrjexinnta nunte xasintajni.

¹¹ Ti ndachrjan jan an, me e ti tjento anta ngisen ndachro ixi titikaon ndo Cristo ko nche e sen ti ndako a xranchi ti chóna sen nchri je a janchri e, ti tjaun sen xrochóna sen itsjé nge e, ko sen titikaon juancheya, sen kuan, ko sen tee. Sen jaña nche e ntekui anta sen.

¹² Tikinixinna i jan an sintaña ijie ngajin ni ítji a ni ngo. Ko ja anta xrokonda sinchéñanta ijie ngajin ni kichuuna steku unta ni ngo nti a.

¹³ Ndo Dio sinchéña ndo ijie ngajin chujni xratitikaon a ndo ko ja anta xrokonda tenginta xi ndako a juinche e.

6

Jaiona nchéñana ijie ti nge e juinche e sen kichuuna

¹ Nchakon xrojan ja anta kuetoku unta naa sen kichuunta, tjanche anta inaa ngisen titikaon a Ncháina sinchéña ijie. Cháña tjanche enta naa sen ni ngo, sen titikaon ndo Dio, sinchéña sen ijie ngajin kayuinta.

² ¿Á noa inta ixi sen titikaon Ncháina Jesús sinchéña sen ijie ngajin kain ni nunte xasintajni? Méxin, siá sinchéñanta ijie ngajin kain chujni, ¿sonda jua i sinchéñanta ijie ti tangi a kon en ngajinnta jai?

³ ¿Á noa inta ixi kaxon ngajin sen ángel jaina sinchéñana ijie? Méxin, ¿á jua i xrojuinchéñana ijie ngajin sen kichuuna?

⁴ Méxin, siá xrojan nge e chao tsonchjianku unta sen kichuunta, ¿sonda tjaunnta inaa ngisen titikaon a Ncháina sinchéña ijie ngajinnta?

⁵ Ntatjunta ji i xro an ngisen jii ni ngo nti a xroxaxaon jian ko chao sinchéña ijie ngajinnta?

⁶ Ko ja anta je a je o tətoku u kichuunta, kaxon tjéenta inaa chujni sinchéña ijie ngajinnta, ko ni me e titikaon a nā Ncháina Jesucristo.

⁷ Ti tətoku unta kichuunta me e ó yamanta ijie. Cháña tokuaxin anta ti ndakua i sinta anta sen ko tsee sen ngajinnta kaxon.

⁸ Ko kaxon ja anta ndako a nche enta siá te enta ko ndako a nchekuunta sen kichuunta.

⁹ ¿Á noa inta xro ni ndako a nche e, tsayé a nā juachaxin tsechón nā ti jii ndo Dio? Tájon anta juachaxin xro sintaya anta nā. Ni tejuaka o ngixe i nchri, ni tájon juasaya ngajin ídolo, ko xi chónnda inaa nchri, nchri je a janchri e xa, ko xi tejuakao inaa xi,

¹⁰ xiche e, ni tjaun xrochónnda itsjé nge e, ni kuan, ni nichja kontree inaa ngisen, ko ni ncheya, kain chujni jaña nche e, tsayé a nā juachaxin tsake e nā ti jii ndo Dio.

¹¹ Kaxinnta jaña kuake enta ó sa ó. Ko ndo Dio ó juinchemé e ndo ijie kuachondanta ko juinchetjúá Ndo asáanta ko jai tikinixin en Ndo ja anta. Kain ji i kon en xro juachaxien Ncháina Jesucristo ko juachaxien Espíritue ndo Dio.

Tsajonna juasaya ngajin Ndo Dio

¹²*“Chao sinta a kain nge e.” Ko tikinixin a sinta a kain nge e. Ko ndachrjan xro an nge e xrotjá a juachaxin tsituanna.

¹³ Ti ineni ji in tikinixin en tse eni, ko tse eni tikinixin en ti sineni. Ko ndo Dio juinçekonchjian ndo kayui ji i ko kaxon chao tsitjáña kayui. Ko cuerpoína je a konchjian xro sinche e ti ndako a xranchi ti tsejuakao ngixeko chujni. Cuerpoína konchjian xro tsajon juasaya ngajin Ncháina ko cuerpoína tikinixin en Ndo.

¹⁴ Ndo Dio juinçhexechón Ncháina Jesucristo, jaña kaxon sinçhexechón ndo jaina xro juachaxien ndo.

¹⁵ ¿Á noa inta xro ngujngu cuerpoína tikinixin en ndo Cristo? ¿Á chao naa chujni tikinixin en ndo Cristo tsejuakao naa nchri ncheye e kueya xi? Me e, ché na i.

¹⁶ ¿Á noa inta xro nchakon naa xi chónnda xa naa nchri chónnda kueya xi, je e nchra ko je e xa ikjan nā naakua cuerpo? Xro ndachro xroon chijnie ndo Dio: “Kayui nā xrokjan nā naakua chujni.”

¹⁷ Ko jaña kaxon ngisen titikaon Ncháina, je e sen ko Ncháina ikjan sen xranchi xrokjui naakua chujni.

¹⁸ Méxin, ja anta xrochonda inta nchri je a janchri anta xro ngixe i ti ndako a xro juinche enta, je a tsango tangi tson en cuerpoanta. Ko ni chónnda inaa nchri je a janchri e, je o nā ncheni e nā cuerpoe nā.

¹⁹*¿Á noa inta xro cuerpoína ningue Espíritue ndo Dio, me e chjaina ndo? Cuerpoína tikinixin en ndo Dio ko í je a jaina tikinixinna cuerpoína.

²⁰ Ndo Dio kuenaxinna ndo xro naa nge e tsango tjintee. Méxin, tájonnta juasaya ngajin ndo Dio xro cuerpoanta ko nchijí asáanta xro kayui ji i tikinixin en ndo Dio.

7

Chijni kondee sen tsikute e

¹ Ti xroon xruannanta xro juanchanginanta, ndachrjan cháña tsute a chujni.

² Ko itsjé nā tjaun a nā tsute e nā xro jaña chao tsajikao nā itsjé xi o itsjé nchri, méxin, cháña ngujngu xi xrochónnda xa naa janchri e xa ko ngujngu nchri xrochónnda nchra naa ndoxi e nchra.

³ Xi tsikute e xrokonda tsejuakao xa je o janchri e xa ko jaña kaxon nchri xrokonda tsejuakao nchra je o ndoxi e nchra.

⁴ Nchri tsikute e í je a je e nchra tituen en nchra cuerpoe nchra, ó ndoxi e nchra tituen en nchra. Jaña kaxon xi í je a je e xa tituen en xa cuerpoe xa, ó janchri e xa tituen en xa.

⁵ Méxin, nchri o xi tsikute e sinchenaxien a tsejuakao kichuu sen. Ko siá je e sen xroxraxaon sen tsakaon a kichuu sen kaxin nchakon ixi tsjao sen Ncháina, ko tsjexin ji i, chao xrochóna kichuu sen íjngo, ixi jaña Xixron anxrée tsakaon a xa sen ixi sinche e sen ti ndako a.

⁶ Ko jaña jian sinche enta maski ji i je a ti kuetuan an ndo Dio.

⁷ Ko jan an ndachrjan ixi kainnta xrojuinche enta xranchi jan an. Ko Ndo Dio kuajon ndo juachaxin ngajin ngujngu chujni, je a xraje o sinche e sen.

⁸ Ko kain chajan xra tutee a ko sen nchri, sen ka an, ntatjan sen ixi cháña xrokutee a sen, xranchi jan an kutena i.

⁹ Ko siá tjaun sen xrochóna sen janchri e sen, cháña tsute e sen, ko xroxraxaon a sen inaa nge e ixi ba sinche e sen ti ndako a.

¹⁰ *Ko ja anta ti ó tsikuta anta, tituan annta ji i: “Tintue a kichuunta”, ko je a jan an tituan an ji i, Ncháina tituan an.

¹¹ Ko siá naa nchri tsintu e nchra xixi e nchra, cháña je o nchra tsake e nchra, o ícha jian íjngo xronichje e kichuu sen ko tsintu e sen juaña ko íjngo tsekao kichuu sen. Ko xi tsintue a xa janchri e xa.

¹² Ko sen kaxin: siá naa xi titikaon Ncháina chóna xa janchri e xa ko je e nchra titikaon a nchra Ncháina ko je e nchra tjaun nchra tsekao nchra xa, je e xa tsengí a xa nchra. Ko ji i jan an ndachrjan, je a Ncháina.

¹³ Ko siá naa jan titikaon Ncháina chóna jan xixi e jan ko titikaon a xa Ncháina, ko je e xa tjaun xa tsekao xa jan, je e jan tsintue a jan xa.

¹⁴ Siá xixi e jan titikaon a xa Ncháina Jesús, ndo Dio chao tsikonóe e ndo xa, ixi janchri e xa titikaon jan ndo Dio, ko naa nchri titikaon a Ncháina kaxon ndo Dio tsikonóe e ndo nchra, ixi ndoxi e nchra titikaon ndo ndo Dio. Ko siá xrokjui a me e, chjen en sen xrokuama xjan ijje, ko jai ó tjúa aséen chjen en sen.

¹⁵ Ko siá naa ni titikaon a Ncháina, xrokjui xi o nchri, ko tjaun na tsintu e na sen titikaon Ncháina, chao xrochjeya sen, ixi ndo Dio tjaun ndo juaxruxin tsintee ni tsikute e.

¹⁶ Ja anta nchri, chao tsingijnanta ndoxi anta ixi je e ndo tsitikaon ndo Ncháina. Ko ja anta xi, chao tsingijnanta janchri anta ixi tsitikaon nchra Ncháina.

¹⁷ Méxin, ngujngu sen tsikute e ko sen tsikute a tsintee sen xranchi tsikajon Ncháina juachaxin, xranchi kuintee sen nchakon ndo Dio kuiye e ndo sen. Ji i tetuan an ngajin kain ni ngo jaña sinche e sen.

¹⁸ Siá ndo Dio kuiye e naa xi ó chóna chji e sen judío, chao jaña tsitu e xa. Ko siá ndo Dio kuiye e ndo naa xi xra chóna i xa chji e sen judío, xrokonda i tsaa xa chji e sen judío.

¹⁹ Méxin, tjinte a á chóna chujni chji e sen judío o na i. Ti tsitikaon sen nge e kuetuan an Dio me e ti ícha tjintee.

²⁰ Ngujngu chujni xrokonda tsintee sen xranchi kuintee sen nchakon kuaxi kuitikaon sen ndo Dio, ko á chóna o chóna i sen chji e sen judío.

²¹ Méxin nchakon ndo Dio kuincha anta ndo, siá ja anta ritjennta xranchi naa chujni tsike na na ko xro an juachaxin chondanta, ta inta juachjaon. Ko siá chao tsachrjexinnta nti a, tuinxin nche enta jaña.

²² Ixi ngisen tsikochji ko xro an juachaxin kuachóna, nchakon Ncháina kuinche e ndo sen, jai xro an nge e sínká ko chóna juachaxin. Ko ngisen chóna juachaxin nchakon kuitikaon sen ndo Dio, ó ikjan sen chujni nche e xrée ndo Cristo.

²³ Ndo Dio tsango tjintee kuenaxinna ndo jaña. Méxin, tájon anta juachaxin ixi inaa sen tsituan annta.

²⁴ Méxin, ngujngu ja anta, xranchi bake enta nchakon kuincha anta ndo Dio ixi tsitikaonnta ndo, jaña tinteenta ko tintue anta ixi inaa na tsetuan annta na.

Chijni kondee sen xratutee a ko nchrikan an

²⁵ Ko sen nchri xratutee a, jan an xrondachrjan i ixi Ncháina kuituanna ndo xrojan nge e. Je o ntatjunta nge e xraxa on jan an, ko chao tsitikaonnta ti ndachrjan ixi Ncháina je e ndo tingijnana ndo.

²⁶ Chujni xratutee a cháña tsute a sen; xraxa on ji i ixi nchakon stena jai, tsango tangi nchakon.

²⁷ Ko siá chondanta nchrinchri anta tintue anta nchra. Ko siá chonda inta nchrinchri anta, cháña jaña tituan anta.

²⁸ Ko sen tsute e chao nche e sen, ko siá naa nchrichajan tsute e kaxon xro an ijie tsama nchrichan ixi sen tsute e tsatsinga sen itsjé juachjaon, méxin, ndachrjan cháña xrokutee a sen ixi tjaun a tsatsinga sen juachjaon.

²⁹ Jaña ndachrjan ixi itsjé a nchakon titjáña xrokjan Ncháina Jesucristo. Méxin, sen tsikute e, ícha xrokonda tsitikaon sen Ncháina.

³⁰ Ko sen tsjanga xrojuinche e sen xranchi xrotsjanga i sen. Ko sen ste juaxruxin, xrojuinche e sen xranchi juaxruxin a ste sen. Ko sen te na xrojan nge e, xrojuinche e sen xranchi tsikinixien a sen nge e tsike na sen.

³¹ Ko sen chónnda itsjé nge e jii nunte xasintajni, sinche e sen xranchi xro an nge e xrochónnda sen, ixi kain nge e jii ngata a nunte nti i tsjexin.

³² Tjaun a jan an tsaanta juachjaon. Sen tsikute a ícha tjaun sen sinche e sen xrée Ncháina ko tjaun sen juaxruxin tsake e ndo.

³³ Ixi xi tsikute e ícha tjaun xa ti jii ngata a nunte xasintajni ixi tjaun xa sinche e xa ti nche e nchrichri e xa juaxroxin.

³⁴ Kaxon jée xraxaon nchri tsikute e ko nchri tsikute a ixi nchri tsikute a ko nchrikan an ícha tjaun sen sinche e sen xrée Ncháina ixi tjaun sen tjúá tsake e aséen sen ko cuerpoe sen. A nchri tsikute e ícha tjaun nchra nge e jii nunte xasintajni ixi tjaun nchra sinche e nchra ti nche e ndoxi e nchra juaxroxin.

³⁵ Ntatjunta ji i ixi tja on ixi jian tsake enta, je a ixi xrokuituan annta jan an. Tja on ixi ja in tsake enta ko je o ngajin Ncháina sinche enta ixra.

³⁶ Ko siá xrojan ja anta xraxaonnta ixi cháña xrokute e naa nchrichajan annta ixi ó itsjé nano chónnda nchrichan, chao tsute e nchrichan, xro an ijie tsama nchrichan.

³⁷ Ko xrojan ja anta tjaunnta ixi nchijí asáanta xrokutee a nchrichaja annta ko kaxon je e nchrichan jaña xraxaon nchrichan, chao jaña nche enta.

³⁸ Méxin, siá tájonnta juachaxin ixi nchrichajan annta tsute e nchrichan, chao ji i. Ko kaxon siá tjaun a nchrichan tsute e nchrichan, ícha jian me e.

³⁹ Ley tituan an ixi nchri tsikute e xrokonda tsekao nchra ndoxi e nchra ti xra jichón xa. Ko siá tsen en ndoxi e nchra, chao tsute e nchra inaa xi tjaun nchra, naa xi titikaon Ncháina xrokute e nchra.

⁴⁰ Ko ti xraxa on jan an, cháña ícha juaxruxin tsake e nchra siá tsute a nchra íjngo. Jaña xraxa on jan an ixi chonda juachaxien Espíritue ndo Dio.

8

Ti tajon na ngajin ídolo

¹ Xrontatjunta kondee iko tsen en ko tajon na ngajin ídolo. Kainna nojna kondee ji in. Ko xrokonda tsienxinna ixi ti ícha no eni me e nchejié aséeina. Ko ti xrotjue e kichuuna, me e ícha nche e juaxruxin Ncháina Jesús.

² Kaxin na ndachro na ixi ícha no e na, ko je a nduaxin ixi xratitjáña tsangi na.

³ Ko ngisen tjue e ndo Dio, ndo Dio kaxon ó chúxin ndo sen.

⁴ Ko ti xrojuineni ntao tsikajon na ngajin ídolo, ó noina jian ixi ídolo xro an juachaxin chóna nti i nunte xasintajni ixi naakua ndo Dio jii.

⁵ Ste kaxin na ndachro na ixi jii kueya dio ngajni ko nunte xasintajni. Ko maski jii itsje nge e nchekin in na “dio”,

⁶ jaina je o chondana naakua ndo Dio, me e Ndotáina, ko je e ndo juinchekonchjian ndo kain nge e ko jaina stechónna ixi tikinixin enna ndo. Ko kaxon jii naakua Ncháina, me e ndo Jesucristo, ko kain nge e jichón ixi je e ndo, ko kaxon jaina stechónna ixi juachaxien ndo.

⁷ Ko kain a sen no e sen ji i. Kaxin sen titikaon ndo Cristo, je e sen bakajon sen juasaya* ngajin ídolo ko xraxraon sen ixi ídolo me e chóna juachaxin, ko jaña siá ine sen ntao tsikajon na ngajin ídolo, me e xraxraon sen ixi kuama sen ijie.

⁸ Ko jaina noina ixi je a ti nge e sintena o ti nge e sinte ana tingijna xrochuntiana ndo Dio.

⁹ Maski chao sineni kain nge e o sine ani, xrokonda xrotsje eni ixi ti sintu una sinchenie a ikaxin sen kichuuna, sen xratitikaon a jian.

¹⁰ Méxin, siá xrojan ngisen xratitikaon a Ncháina jian, tsikon sen ixi ja anta, xro no anta jian, sinenta no ti chóna na ídolo, kaxon je e sen xroxraon sen ixi chao sine sen nge e kuayé e naa ídolo xro an juachaxin chóna.

¹¹ Ko jaña kondaxin ja anta tsitjáña naa sen kichuunta xrasoji a titikaon sen ndo Cristo, ko je e ndo kaxon kuenxin ndo ixi je e sen.

¹² Méxin, siá sincheni enta aséen sen kichuunta, sen xrasoji a titikaon Ncháina, ja anta ritamanta ijie ko titikaon anta nge e kuituan an ndo Cristo.

¹³ Méxin, siá kondeexin ti sineni naa sen kichuuna tsoni e aséen sen, cháña sine ani ntao ixi kondeexin jaina, naa sen kichuuna sinche e sen ti ndako a.

9

Ti tikinixin en sen apóstol

¹ Jan an xro an inaa ngisen tetuanna ixi jan an naa apóstol, ngisen Ncháina Jesús tsikinche e ixi jan an bikon ndo. Ko ixra junta a, me e ja anta kuitikaonnta Ncháina Jesús.

² Ko kaxin na ndachro na ixi jan an je a apóstolna. Ko ja anta jian no anta ixi ja anta kuitikaonnta Ncháina ixi ixra junta a jan an, me e tjakoxin ixi nduaxin Ncháina Jesús kuinche ena ndo jan an.

³ Méxin, nchakon xrojan ngisen ndachijina ji i, jan an chao ndachrjan:

⁴ Jan anna tikinixin tsayá ana nge e tsajon sen sinena ko tsi ina.

⁵ Kaxon jan anna chao xrochondana naa janchri nana titikaon Ncháina xrokua-jiki anna xranchi ikaxin sen apóstol tsikinche e Ncháina Jesús, xranchi ndo Pedro ko sen kichuu ndo Jesús.

⁶ ¿Á xraxaonnta ixi je o ndo Bernabé ko jan an, xrokonda sinta ana ixra ixi jaña sinena?

⁷ Naa xi soldado je a sincheja xa inaa ixra me e sine xa. ¿Ngisen tjenga nta tu uva ko ne a sen itu tóna? ¿Ko ngisen chóna kutuchjon ko ti a sen itsjin tajon ba?

⁸ Ndachro anta ixi jan on jan an jaña xraxra on. Na i, kaxon jaña jitaxin xroon tsikjin ndo Moisés.

⁹*Ja in ndachro xroon tsikjin ndo: “Take anta nchisen ro a kuxinta nchakon tondaki ba katrigo ti tandáanta no.” ¿Á je o ixi kuxinta taaxin ndo Dio juachjaon?

¹⁰ Na i. Kaxon ixi jaina taa ndo juachjaon. Jaña jitaxin xroon ixi jaina. Méxin, ni chjée nchechji nunte e ixi tsinga ko ni tondaki katrigo, stechón en na tsjatsi in na nge e bengana.

* 8:7 *juasaya* respeto, honor 9:9 1Ti. 5:18.

11 *Ko siá jan anna bengana chijnie ndo Dio ngaya asáanta, tikinixinnana tsayá ana nge e tsajonnta ixi jian tsintee jan anna.

12 Ko siá ikaxin sen apóstol tjančia sen nge e, jan anna ícha tikinixinnana tsjančiaana ti xrokondanana.

Ko maski tikinixinnana, tjančia ina nge e xrokondanana, tjančia ina maski tangi stena ixi tjaun ana me e tingakon en ti tsin ennta chijnie ndo Cristo.

13 Ja anta no anta ixi ni tjako ni ngo judío, ni itji ni ngo tajon na nge e xrokonde e ni tjako. Ko ni nche e xra ti jii altar tikinixin en na tayé e na nge e tsikajon na ngajin ndo Dio.

14 *Méxin, jaña kaxon Ncháina kuetuan an ndo ixi sen nche e xrée ndo, sen chronga chijnie ndo, ixi ixra me e tsachrjenixin ti sine sen.

15 Ko maski jan an chao tsjančia nge e tikinixinna, nta i me e, ko kjin a xroon ji i ixi ja anta xrochjánanta xrojan nge e xrokondana. Na i. Maski tsenxinna jinta, tjaun a tsjančia anta xrojan nge e ixi tjaun a tsachrjena juaxruxin chonda.

16 Je a ixi tja on sintajié aséenna ixi tjako chijnie ndo Dio, chijni tajon juachaxin tsechónni kain nchakon. Na i. Jan an nta a ixra ixi ndo Dio jaña kotuanna ndo. Lastuna siá xrochrjanga i chijnie ndo.

17 Méxin, jan an chuan i xroxengana na ixi tjako chijnie ndo Dio, ixi jan an xranchangina i á tja on sinta a ixra o na i. Ndo Dio, je e ndo kotuanna ndo ko jan an kuiteka on.

18 ¿Méxin, nge e tsjacha jan an ixi nichja chijni ji i? Ko nóna jan an ixi ti tsjácha me e richonda juaxruxin ixi tjako chijnie ndo Dio, ko xro an tomi tsjácha; maski tikinixinna tsjácha ixi ixra rinta a.

19 Méxin, maski xro an ngisen ícha tetuan an aséenna, nta a ixra ixi je o tja on tsingijna chujni ixi jaña itsjé na tsitikaon na ndo Cristo.

20 Nchakon ritjén ngajin ni judío, jan an nta a xranchi nche e ni judío ixi jaña xrokuitikaon na ndo Cristo. Ko titika on ti kuetuan an ndo Moisés, maski íxrokonda i xrokuitika on ley me e.

21 Ko nchakon ritjén ngajin ni titikaon a ley, jan an nta a xranchi je e na ixi jaña tsingijna na tsitikaon na ndo Cristo ko je a ixi titikaon a ley. Na i jan an titika on nge e kuetuan an ndo Cristo.

22 Nchakon ritjén ngajin sen nandá taxi titikaon ndo Cristo, jan an nta a xranchi je e sen ixi jaña ícha sen tsitikaon. Jan an nta a xranchi ngujngu chujni ixi jaña ikaxin na tsitikaon na ndo Cristo.

23 Kain ji i nta a ixi tsienxin na chijnie ndo Dio ko ixi tja on tsayá a kain nge e jian tsajon ndo.

24 Ja anta no anta ixi nchakon tinga itsjé chujni ixi tjaun na tsjacha na naa nge e, je a kain na tsjacha na tsayé e na me e. Jaña kaxon ti titika onna ndo Cristo, jian sintu una ixi jaña tsayé ena nge e tsituina ndo.

25 Ni tinga, tintu e na kain ti tingijna i na tsjacha na ko tayakon en na aséen na ixi tjaun na xrojuacha na maski naa nge e taka tsjexin. Ko jaina ntu una xrée Ncháina Jesús ixi tsayé ena naa nge e nai a tsjexin.

26 Ko jan an, nta a ixra ixi tsjácha nge e tsajon ndo Jesús ko nta a ixra ixi nóna nge e nta a. Ko je a xruenxon nta a ji i.

27 Jan an tintua i ixi cuerpona tsituan an ngajin jan an, ko tetuan an aséenna ixi jian tsitika on ixi tjaun a sinta a ti ndako a ko ixi jan an ó juako chijnie ndo Dio ngajin ikaxin na ko nchakon ndo Dio tsajon ndo ti ndachro ndo ngajin chujni, tjaun a ixi jan an tsayá i.

10

Nge e tetuan an ndo Dio kondee ídolo

¹ Kichuuna, jan an tja on tsono anta ixi sen kuachrjenixinna, kain sen kuintee sen ngangí naa itjuj bake e ndo Dio, ko kain sen kuatsingatu e sen Ndachaon ndatin in Játse.

² Jaña kain sen kuarue e ndo Moisés bikitée sen ixi kuintee sen ngangí itjuj ko kuatsingatu e sen ndachaon* ko jaña kuitikaon sen kain ti kuetuan an ndo Moisés.

³ Ko kain sen xraje o juine sen nge e kuixin ngajni

⁴ ko kain sen naxraje o kui i sen nge e kuajon ndo Dio ixi kui i sen inda kuachrxjin naa ixro juinchenchaon ndo Dio, ixro me e ndo Cristo.

⁵ Ko itsjé sen juinche a sen ti tjaun ndo Dio; méxin, koñaon ndo ko ntajie nchese nti a kuenxin sen.

⁶ Kain ji i kon en ixi juako ngajin jaina ixi jaina tsikakuenxin ana sinche ena ti ndako a xranchi juinche e je e sen.

⁷ Méxin, titikaon anta ídolo xranchi juinche e kaxin sen, jaña jitaxin xroon chijnie ndo Dio tsikjin sen kuachronga ó sa ó: “Kain chujni bake e sen nunte juine sen ko kui i sen, tjume e bingatjen sen ko ité sen ko juinche e sen ti ndako a.”

⁸ Kaxon xrochonda ina nchri je a janchrí ana xranchi juinche e kaxin sen ko kondeexin me e naakua nchakon kuen en ventitres mil sen.

⁹ Kaxon sintu ana ixi tsikonna á nduaxin tsoñaon ndo Dio xranchi juinche e je e sen ko kondeexin me e kuen en sen ixi kunchee juine e ba sen.

¹⁰ Ko xronichjangíe ana ndo Dio xranchi je e sen kuanichjangí e sen ndo, méxin kujj naa ángel ne e xichononte† ko naakóñaxón xa sen.

¹¹ Kain ji i kon en sen tachrí ina ixi jaña kaxon jaina xrokonojina ko ji i jitaxin xroon ixi tsjakoína jaina ti stena jai ti ó tsjexin tsitjáña nunte xasintajni.

¹² Ko ngisen xraxaon ixi jian jinche e sen, xrotsje e sen jian, ixi kain nchakon jaña sinche e sen.

¹³ Ja anta ti xrojan nge e tsango tangi kon annta, xraxaonnta ixi kain chujni jaña ton en na kaxon. Ko ja anta chuntianta ndo Dio ixi je e ndo tsintua inta ndo ixi ja anta tsatsinganta naa juachjaon tsango tangi ti tsokuaxian inta. Méxin, nchakon tsii xrojan nge e tangi ngajinnta, ndo Dio tsingijnanta ndo ko jaña tsjachanta.

¹⁴ Méxin, kichuuna, titikaon anta ídolo.

¹⁵ Ja in nichja anta ixi nóna tienxinnta nge e rindachrjan. Ko ja onta take énta xrox-raxaonnta á nduaxin ti ndachrjan.

¹⁶ *Nchakon intena cena juako Ncháina Jesús ko tajonna juasaya ngajin ndo, kainna tu una ti jitjiá copa ko naakua xraxaonna ixi jnié ndo Cristo kuintjé ixi jaina. Ko tonchrijinna nutja intena ko jaña xraxaonna ixi je e ndo kuajon ndo cuerpoe ndo ixi jaina.

¹⁷ Maski kueyana, kainna naakua nutja intena ixi kainna ikjanna naakua cuerpoe ndo Cristo.

¹⁸ Tsje enta xranchi nche e ni tjajna Israel, ine na iko tsikajon na ngajin ndo Dio me e xrondachro ixi je e na kaxon nekao kichuuna nge e tsikajon na ngajin ndo.

¹⁹ Ndachrjan i ixi ti ídolo chóna juachaxin, ko kaxon ndachrjan i ixi ntao tajon na ngajin ídolo me e tjintee. Na i.

²⁰ Ndachrjan ixi ni titikaon a ndo Dio tajon na xrojan nge e ngajin ídolo ko nduaxin espíritue Xixron anxrée tayé e ji i, je a ndo Dio. Ko jan an tjaun a ixi jaña xrojuinche enta kaxon ixi tjaun a kaxon ja anta tsjitexinnta ngajin espíritue Xixron anxrée.

²¹ Jua i tsu una nge e ti xraxaonxinna jnié Ncháina Jesús ko kaxon tsu una nge e xraxaonxinna espíritue Xixron anxrée. Ko jua i sintena nutja xruaxaonxinna cuerpoe Ncháina Jesús ko kaxon sintena nge e xroxaxaonxinna espíritue Xixron anxrée.

²² ¿Á tjaunnta ixi ndo Dio tsoñaon ndo? ¿Á jaina ícha chondana juachaxin ixi je e ndo?

* **10:2 ndachaon** mar † **10:10 xichononte** muerte **10:16** Mt. 26:26-28; Mr. 14:22-24; Lc. 22:19, 20.

Tsjena nge e ícha tsingijna sen kichuuna

²³ *Chao sintu una kain nge e ko je a kain nge e jian. Chao sintu una xrojan nge e tjaunna ko je a kain ti tjaunna tsingijnana ixi ícha tsichuxinna ndo Dio.

²⁴ Tjé anta je o nge e ja onta tjaunnta ixi tsake enta juaxruxin. Na i. Kaxon tjéenta nge e tsingijna ikaxin sen.

²⁵ Chao sintenta kain ntao tochji ngataon ndasin ko xro an nge e tjanchangínta, jaña xroxraxaon anta á ndako o ndakua i rinche enta,

²⁶ ixi kain nge e jii nunte xasintajni, Ncháina Jesús juinchéña ndo.

²⁷ Ko siá xrojan ni titikaon a Ncháina xrokuiya anta na ixi xrojuinteku unta na, ko ja anta tjaunnta xrokonchjiñe enta, chao sintenta nge e tjáanta na ko tsjanchangi anta nge e kondee ti sintenta

²⁸ Ko siá xrojan ngisen xrondachro ixi ntao sintenta ó tsikajon na ngajin naa ídolo, cháña nte anta ntao me e, ixi kondeexin ti nche enta, ndako a xroxraxaon na.

²⁹ Ndachrjan ji i ixi tja on ixi ndako xroxraxaon ni titikaon a ndo Dio, je a ixi xrojan ja anta ndakua i xroxraxaonnta.

Jan an nchena i juaxruxin sinta i naa nge e je o ixi ikaxin sen ndako a xroxraxaon sen.

³⁰ Siá jan an tajon juasaya ngajin ndo Dio ixi nge e siné, ¿sonda ndakua i xronichja na ixi xrojan nge e juiné?

³¹ Nchakon intenta ko tin innta ko nchakon nche enta ixra, kain ji i nche enta ixi jaña tsayé e ndo Dio juasaya.

³² Nche anta nge e sincheni e aséen ikaxin sen, maski sen judío o maski sen je a judío o sen ningue ndo Dio.

³³ Jan an tja on ixi kain ti nta a xrobake exin juaxruxin kain chujni, je a tja on ixi je o jan an xrobake é juaxruxin. Na i. Jan an tja on ixi jian tsake e ikaxin chujni ixi tja on tsitikaon na ndo Dio.

11

¹ *Nche enta xranchi nta a jan an ixi jan an nta a xranchi juinche e ndo Cristo.

Xranchi xrojuinche eni nchakon xra oni ni ngo

² Kichuuna, juasianta ixi kain nchakon xraxaonninta ko titikaonnta nge e juin-takuan annta.

³ Ko tja on tsono anta ixi ndo Cristo tetuen en ndo kain xi, ko kain xi tetuen en xa janchri e xa, ko kaxon jaña ndo Dio tetuen en ndo ndo Cristo.

⁴ Ko naa xi ti nichje e ndo Dio o tjako xa chijnie ndo ko jichjinga xa xronchritjé e xa, ña xrondachro chóna i xa juasaya ngajin Ncháina Jesús.

⁵ Ko siá naa nchri jixratja i jaa nchra ti nichje e nchra ndo Dio ko ti jitjako nchra chijnie ndo, ña xrondachro ixi chóna i nchra juasaya ngajin ndoxi e nchra me e xrokjui xranchi xrochóna i nchra xrajaa nchra.

⁶ Ko siá naa nchri tjaun a nchra xroxratja jaa nchra, cháña xrokjín jaa nchra. Ko siá tsosue e nchra xrokjín jaa nchra, cháña xroxratja jaa nchra.

⁷ Ko xi xrokonda i xroxratja jaa xa ixi je e xa tsixexin xa xranchi ndo Dio ko ngajinxin xa tsikonni juachaxien ndo Dio. Ko naa nchri, ngajin nchra tikonxin juachaxin chóna ndoxi e nchra.

⁸ Ixi nchakon xraxrangíxixión nunte xasintajni, xi kuachrjenixin a xa naa nchri. Na i. Nchri kuachrjenixin nchra naa xi.

⁹ Ko kóna i xi kondeexin nchri. Na i. Nchri kóna nchra ixi xi xrokonde e xa ngisen tsekao xa.

¹⁰ Méxin, xrokonda xroxratja jaa nchri ixi jaña xrondachro je e nchra titikaon nchra ndoxi e nchra ko jaña sen ángel tsikon sen ixi titikaon nchra.

11 Ko ti titikaonni ndo Cristo xrokonda ixi xi tsingijna xa nchri ko nchri tsingijna nchra xi ixi naxraje o tjintee sen ngajin ndo Dio.

12 Ti xrangíxixión nchri kuachrenixin nchra naa xi, jaña jai kaxon xi tjongíexin xa ixi naa nchri. Ko kainna tikinixin enna ndo Dio.

13 Ja anta nge e xraxaonnta, ¿á chao naa nchri xroxratja i jaa nchra xronichje e nchra ndo Dio?

14 Tikonni ixi tosue eni ixi naa xi tsintu e xa tsangi xrajaa xa.

15 Ko nchri chaxro tikonni nchra chrian xrajaa nchra ixi ndo Dio kuajon ndo xrajaa nchra ixi jaña xroxratja jaa nchra.

16 Ko siá jii xrojan ngisen titikaon a ji i, tsono anta ixi jan anna ko kain sen ningue ndo Dio jaña titika onna.

Ndako a nche e sen ti ine sen cena juako Ncháina

17 Ko jii naa nge e xrontatjunta ixi ndakua i nche enta. Nchakon xejunta ni ngo naa nge e jian xrojuinche enta ko nche anta me e.

18 Sa ó xrontatjunta ixi jan an kuin an nchakon xejunta tetoku u kichuunta. Ko jan an tianxin ixi nchéxin jaña jiton en.

19 Xrokonda tson en jaña ixi jaña xrokonoaxinnta ngisen nduaxin titikaon Ncháina ko ngisen na i.

20 Méxin, siá tjakaxin kichuunta nchakon xejunta sintenta cena juako Ncháina, nduaxin a nche enta ti juako Ncháina.

21 Ixi nchakon sintenta, kaxinnta chuen anta ko intenta, méxin kaxinnta xra chundanta jinta ko kaxinnta kuannta.

22 ¿Á chonda inta nchianduinta? Nti a xrojuintexinnta ko xrokui inta nge e tjaunnta. Siá jaña nche enta ngaxin in ni ngo, me e xrondachro chonda inta juasaya ngajin ningue ndo Dio ko me e tosuexin sen nóa, sen chóna i nge e sine. ¿Nge e tjaunnta xrondachrjan? Chuen anta ixi xrondachrjan jian stenze enta. Na i. Je a jian nche enta.

Sintena ixi xraxaxaunxinna Ncháina

23 Ti juakona Ncháina, me e ntakuan annta: Ixi tiie itsé na ndo, je e ndo kua ndo nutja

24 ko kuajon ndo juasaya ngajin ndo Dio ko tjume e konchrinjin ndo nutja ko ndachro ndo: “Ji i cuerpona tsajon ko tsen en ixi ja anta. Nchakon sintenta nio xraxaonntana.”

25 Ko juexin juine sen, itsé ndo copa jitjiá ndée tu uva ko ndachro ndo: “Copa jitjiá ndée tu uva ji i; me e xrondachro tsóña naa ley natjúá ixi tsintji jnina. Nchakon tsi inta ndée tu uva ji i, jan an xroxraonntana.”

26 Méxin, nchakon sintenta nutja ko tsi inta ndée tu uva, me e xroxraonnta ixi kuen en Ncháina Jesús. Jaña nche enta tsijija nchakon xrokjan Ncháina.

Xranchi sineni cena juako Ncháina

27 Méxin, siá xrojan ngisen sine nutja ko tsi i sen ndée tu uva xroxraonxin sen Ncháina ko siá ndako a sinche e sen me e, tsama sen ijie ixi chóna a sen juasaya ngajin cuerpo ko jnié Ncháina Jesús.

28 Méxin, ngujnguna xrokonda xroxraonna sa ó á ndako o ndakua i juntu una ko tjume e sintena nutja ko tsu una ndée tu uva.

29 Ko ngisen sine ko tsi i ko nduaxin a xraxaon sen cuerpo Ncháina Jesús, ndo Dio sinchekama ndo sen ijie.

30 Ko méxin itsjénta ni anta ko itsjénta soji anta ko ikaxin sen ó kuen en sen.

31 Méxin, xrokonda xrotsje ena jian xranchi jii ngaya aséeina nchakon xroxraonna ixi je e ndo ko jaña Ncháina sinchekama ina ndo ijie.

32 Ko siá ndo Dio tsjankata ana ndo ijie jai, ko kaxon tangi tsoina ixi jaña tjaun ndo tsjakoina ndo jian sintu una ixi jaña í tsjankata ina ndo ijie xranchi chujni nunte xasintajni.

³³ Méxin, kichuuna, nchakon xra onta ixi sintenta cena juako Ncháina, chón en ngu-jngu kichuunta.

³⁴ Ko siá jii naa sen kuen en jinta, cháña sa ó sine sen xrojan nge e ndo a sen ixi ndo Dio í tsjankata i ndo sen ijie nchakon xra onta.

Ko xra jii íkaxin nge e xrontatjunta nchakon tsjasotsja anta.

12

Espíritue ndo Dio tajon ixra ngajin ngujngu chujnie

¹ Kichuuna, tja on tsono anta nge e ixra tajon Espíritue ndo Dio tayé e ngujngu chujnie ndo.

² Ja anta ó no anta jian ixi nchakon xratitikaon anta Ncháina Jesús, ja anta kuarue enta kaxin ídolo jua i nichja.

³ Méxin, xrontatjunta ixi ngisen nichjaxin Espíritue ndo Dio, jua i xronichjangí e sen ndo Jesús, ko xro an ngisen chao xrondachro ixi ndo Jesús Nchéé sen, siá nichjaxin a sen ixi Espíritue ndo Dio.

⁴ *Jii kueya ixra tajon Espíritue ndo Dio ko xraje o Espíritue ndo jitajon kain ixra me e.

⁵ Ko jii itsjé ixra sinche eni, ko kain ixra me e xrée Ncháina.

⁶ Ko jii kueya ixra nche e ngujngu sen ko xraje o ndo Dio, ndo tajon juachaxin sinche eni ixra me e.

⁷ Ndo Dio tajon juachaxin ngajin ngujngu chujnie ndo ixi sinche e sen ixra ko ixi juachaxien Espíritue ndo me e tsingijna sen ikaxin sen kichuu sen.

⁸ Espíritue ndo tajon juachaxin ngajin kaxin sen tsono e sen chijni tsango jian, ko ngajin ikaxin sen tajon ndo juachaxin tsango jian xronichja sen chijnie ndo.

⁹ Ko Espíritue ndo tajon ngajin ikaxin sen ixi ícha xrochuntia sen ndo Dio ko kaxon ngajin ikaxin sen juachaxin ixi sinchexrjuen en sen chujni ni e.

¹⁰ Ko ikaxin sen tayé e sen juachaxin sinche e sen kaxin ixra tsango ijié, ko ikaxin sen tayé e sen juachaxin xrochronga sen nge e jindachro ndo Dio, ikaxin sen tayé e juachaxin xrondachro sen nge e jinichjaxin chujni, á Espiritu jian o espíritu ña i, ko ikaxin sen tayé e sen juachaxin xronichja sen itsjé ngigua, ko ikaxin sen tayé e sen juachaxin xrochronga sen nge e xrondachro ngigua me e.

¹¹ Ko xraje o Espíritue ndo Dio tajon kain ji in ko je e ndo tajon ndo juachaxin ti xra sinche e ngujngu chujnie ndo xranchi je e ndo tjaun ndo.

Kainna tikinixin enna ndo Cristo

¹² *Sen ningue Ndo Cristo ste sen xranchi naa cuerpoe chujni, jaña ste sen ixi chóna kueya parte. Ko maski kueya parte, naakua cuerpo jii. Jaña ningue ndo Cristo naakua cuerpo kaxon.

¹³ Kainna maski á sen judíona o á je a sen judíona, o maski sen nchenche e na ixra* kain nchakon ko xenge a sen na, o á sen tituan an, kainna naakuaxon Espíritue ndo Dio bikitéexina, ko kainna ikjanna naakua cuerpoe ndo Cristo, ko xranchi naakua chujni, jaña kuaye ena Espíritue ndo Dio.

¹⁴ Ixi cuerpo je a naakua parte chóna. Na i. Itsjé parte chóna.

¹⁵ Siá tutéina xrondachro: “Jan an je a itjani, méxin jan an tikinixian i cuerpo”, me e á je a xraje o cuerpo kayui, itjani ko tuténi.

¹⁶ Kaxon siá xrondachro naa ndatsjonni: “Jan an je a ikonni, méxin jan an tikinixian i cuerpo”, ko je a nduaxin me e kaxon.

¹⁷ Siá nchijíi cuerpo xrokjui ikonni, ¿xranchi xrokuin enni? Ko siá nchijíi cuerpoeni xrokjui ndatsjonni, ¿xranchi xrobakaxre eni?

¹⁸ Méxin, ndo Dio kuituan an ndo no tsake e nguju ngu parte ne e cuerpo xranchi tja on je e ndo.

¹⁹ Ko siá naa parte xrokjui nchijíi cuerpo, í xrokuake a cuerpo.

²⁰ Ko nduaxin kueya parte chóna naa cuerpo ko kain parte me e naakua cuerpo.

²¹ Ikonna jua i xronache itjani: “Xrokondana ia ja a”, ko kaxon jaani jua i xronache tutéeni: “Xrokondana ia ja a.”

²² Ti parte xraxaonni ixi tanto a tjintee, me e ti ícha xrokonda

²³ ko ikaxin parte ne e cuerpo xraxaonni tjinte a ko me e ti ícha jian tetsáa ko ti parte ícha chaxro a, me e ti ícha tatjani.

²⁴ Ko nge e ti ícha chaxro chondana xrokonda i xroxratjaxin manta. Je e ndo Dio juinchekonchjian ndo nchijíi cuerpoina ko je e ndo kuajon ndo ti tjintee ngajin parte ícha tjinte a.

²⁵ Jaña kain parte cuerpoeni naakua jitséxin kichuu ko jaña tingijna kichuu.

²⁶ Nchakon toni e naa parte cuerpoeni, kain ikaxin parte kaxon tiín; ko nchakon tayakon enni naa parte, nchijíi cuerpo take e juaxruxin.

²⁷ Ko ja anta ikjannta cuerpoe ndo Cristo ko nguju ngunta tikinixin ennta cuerpoe ndo.

²⁸ *Ko ndo Dio kuinche e ndo sen sinche e xrée ndo ti ni ngo, sa ó kuinche e ndo sen apóstol; tjume e kuinche e ndo sen xrochronga nge e nichja ndo. Nínxin kuajon ndo juachaxin ngajin sen tsjako chijnie ndo, ko kaxon kuajon ndo juachaxin ngajin kaxin sen sinche e sen kaxin ixra ijié, ko kaxon kuajon ndo juachaxin ngajin ikaxin sen sinchexrjuen en chujni ni e, ko kuajon ndo ngajin ikaxin sen juachaxin tsingijna sen ikaxin chujni, kaxon kuajon ndo juachaxin ngajin ikaxin sen tsetuan an sen ixra ni ngo, ko kaxon kuajon ndo juachaxin ngajin ikaxin sen xronichjaxin sen inaa ngigua.

²⁹ Kain a sen kuayé e sen ixra apóstol, ko kain a sen kuayé e sen juachaxin xronichja nge e ndachro ndo Dio, ko kain a sen chóna sen juachaxin tsjako sen chijnie ndo, kain a sen chóna sen juachaxin sinche e sen kaxin ixra ijié,

³⁰ ko kain a sen chóna sen juachaxin sinchexrjuen en sen chujni ni e, ko kain a sen chóna sen juachaxin xronichjaxin sen jée ngigua, kain a sen chóna sen juachaxin xrochronga sen nge e xronachro ngigua me e.

³¹ Tjéenta naa ixra ícha jian xrotjáanta ndo Dio. Ko jai jan an tsjako anta naa cha o ícha jian xrorué enta.

13

Xrotjue e kichuuna

¹ Siá xronichja ikaxin ngigua ko xronichja xranchi nichja sen ángel, ko tjaun a sen kichian, kain me e xro an tjintee ko xrokjanna xranchi naa n̄t̄jua je o tonkjan, o naa chika séen tonkjan.

² *Ko siá xronichja chijnie ndo Dio, ko siá xrokuiánxin kain nge e xra noe a ikaxin chujni, ko siá xrokonoína kain nge e, ko ícha xrochuntia ndo Dio ko chao xrontatjan naa ijna: tachrjengíxian nti i ko satjia nango, maski jaña sinta a ko tjaun a sen kichian, kain ti nta a xro an tjintee.

³ Ko siá tsingijna ni nóa ko xrotjá a n̄a kain nge e chonda, ko maski xrokuajon cuerpoena xroche, ko tjua i sen kichian, xro an tjintee nge e nta a jan an.

⁴ Ko sen tjue e sen kichuu toña a sen taka, ko jian aséen sen, ko je a tochjio sen, nchejié a aséen sen, ko ndachro a sen ixi tsango no e sen,

⁵ je a ndakua i nche e sen ko je a ña i sen, je a taka chjée sen juaña, ko tjenge a sen ti nchekao n̄a sen,

⁶ ko chéé a sen ti nge e nche e ni ndako a. Je e sen ste sen juaxruxin nchakon inaa chujni nichja ti nduaxin.

⁷ Siá tjue e kichuuna maski xrojan nge e ndako a sincheina na, toñao ana, ko nduaxin titika onna ndo Dio, me e xrochon enna ixi tsingijnana ndo.

⁸ Ti tjue e kichuuna nai a tsjexin. Ko tsii nchakon ti nichja sen chronga chijnie ndo Dio tsjexin, ko nichja sen ikaxin ngigua tsjexin, ko tsjexin kain ti kuano e chujni.

⁹ Ti noina jai ko ti nichjana ixi ndo Dio me e naa nge e xrachuxin ana jian.

¹⁰ Ko nchakon tsii ti tsango jian, tjume e tsjexin ti nchíin noina jai.

¹¹ Nchakon xrancháina, kuanichja xranchi xjanchíin, kuaxraxa on xranchi xjanchíin ko bakianxin xranchi tienxin naa xjanchíin. Ko nchakon ba ngi kuintu a kain ti kuenta a xranchi xjanchíin.

¹² Jai tikon ana jian, tikonna xranchi tikonna ixi naa xrosenda chóna kitja, ko tjume e tsii nchakon chao tsikonna ndo Cristo ixi ikonna. Ko jai xratitjáña tsichuxinna ndo; ko tsii nchakon nduaxin xrochuxinna ndo Dio jian xranchi ndo Dio chuxinna ndo jaina.

¹³ Ko jai jii ní nge e tjintee, me e ti xrochuntiana ndo Dio, ko ti noina jian ixi je e ndo xrochjaina ndo ti stechon enna, ko ti xrotjue e kichuuna. Ko ti ícha tjintee me e ti xrotjue e kichuuna.

14

Ti nichja na ikaxin ngigua ko chronga na chijnie ndo Dio

¹ Ícha tjéenta xrotjue e kichuunta ko ícha jian tjanchianta ixi Espíritue ndo Dio xrotjáanta juachaxin ixi xronichjanta nge e tjaun ndo.

² Ixi ngisen nichja ikaxin ngigua, ngajin ndo Dio nichja sen ko je a ngajin chujni, ixi xro an ngisen tienxin nge e jinichja sen ixi espíritue ndo Dio nichjaxin sen ti xranoe a sen.

³ Ko ngisen nichja nge e jichrónga ndo Dio, me e xrokonde e chujni ixi ícha jian sinche e sen ko jaña tsake e sen juaxruxin.

⁴ Ko ngisen nichja ikaxin ngigua je o tsingijna aséen sen ixi ícha tsono e sen juachaxien ndo Dio. Ko ngisen nichja nge e tjaun ndo Dio tsono eni, sen me e tsingijna ikaxin sen ni ngo ixi ícha tsono e sen.

⁵ Jan an tja on ixi kainnta xronichjanta ikaxin ngigua tajon espíritue ndo Dio. Ko ícha jian ikaxinnta xrochronganta nge e tjaun ndo Dio tsono eni ixi ícha tjintee xrochronga sen nge e tjaun ndo Dio ixi ti xronichjani ikaxin ngigua. O siá je e sen kaxon xrondachro sen nge e ti nichja sen ixi jaña tsienxin kain sen titikaon ndo Dio.

⁶ Kichuuna, siá jai xrojuasótsja anta ko xronichjaxin ikaxin ngigua, xruenxon xronichja me e. Ícha jian xrobingijnanta siá jan an xronichjaxin naa ngigua tienxinnta, jaña tsono anta nge e ndachro ndo Dio o tsienxinnta naa nge e xranoa inta, o xrontatjunta naa nge e tjaun ndo Dio xrokono anta, o xrojuako anta naa nge e jian.

⁷ Ixi kaxon xranchi tonkjan naa ntaxro ko tonkjan naa arpa, siá xraje o tonkjan ngujngu, jua i tsichuxinni nge e soon jitonkjan.

⁸ Ko siá ndako a xrondachro tjao, ¿xranchi xronojina xrondachro satsjina guerra o na i?

⁹ Jaña ja anta kaxon, siá nichjanta naa ngigua tienxin a chujni, ¿xranchi tsono e sen nge e nichjanta? Ko siá xro an ngisen tienxin, ja anta xranchi chrinto rinichje enta.

¹⁰ Jii kueya ngigua nunte xasintajni, ko ngujngu ngigua jii chujni tienxin ngigua.

¹¹ Ko siá xrojan ngisen xronichja na ko xrokuiánxin a nge e nichja sen, sen me e jan an xroxraxa on ixi je e sen tsikixin sen inaa tjajna ko kaxon je e sen xroxraxaon sen ixi jan an jée tjajna tsijixin.

¹² Méxin, ja anta ti tsango tjaunnta tsaye enta naa ixra tajon Espíritue ndo Dio, tjanchianta kaxin ixra tsingijna kain sen titikaon ixi jaña ícha jian tsitikaon sen.

¹³ Méxin, ngisen nichja ikaxin ngigua, xrojuanche e sen ndo Dio ixi tsajon ndo juachaxin tsienxin sen ko xrochronga sen ti nichja sen.

¹⁴ Siá jan an xronichja a ndo Dio naa ngigua tajon espíritue ndo, aséenna jinichje e ndo, ko tianxin a nge e rindachrjan.

¹⁵ ¿Nge e xrojuinta a tjume e? Xronichjixin ndo Dio ixi aséenna ko kaxon xrokuiánxin nge e rintatjan ndo, ko xrotsje ngajin ndo ixi aséenna ko kaxon xrokuiánxin nge e ritsje.

¹⁶ Ixi siá xrokuajonnta juasaya ngajin ndo Dio ixi asáanta ko sen stetin en tsienxin a sen nge e rindachenta ndo Dio, jua i tsajon sen juasaya ixi tienxin a sen nge e richronta.

¹⁷ Maski tsango chaxro rinichje enta ndo Dio ko tájonnta juasaya ngajin ndo, siá tsienxin a sen stetin en, ja anta tingijna inta sen ixi ícha tsono e sen nge e tikinixin en ndo Dio.

¹⁸ Jan an tajon juasaya ngajin ndo Dio ixi jan an chonda juachaxin xronichja íkaxin ngigua tajon ndo Dio, ngigua tienxin a ja anta.

¹⁹ Ko nchakon tsixra o sen ni ngo, je o tja on xronichja na ó chijni ti tsienxin sen ixi jaña ikaxin sen jian tsitja sen ixi siá xronichja ite* mil chijni ti inaa ngigua tsienxin a sen.

²⁰ Kichuuna, xraxaon anta xranchi ichjan. Ja anta nche enta xranchi ichjan ixi ichjan noe a xjan nge e xrondachro ti ndako a. Ja anta xraxaonnta xranchi naa sen cha.

²¹ Xroon jitaxin ti kuetuan an ndo Dio ja in ndachro: “Jan an xronichjixin ngajin ni tjajna Israel ixi ikaxin ngigua ko kaxon xronichjixin chujni tsikixin inaa tjajna, ko je e na tsitikaon ana na.”

²² Ti xronichjixin ikaxin ngigua tienxin a na, ni titikaon a Ncháina me e tsikon na ixra jíe ne e ndo Dio, ko ji i tingijna i sen titikaon ndo. Ko chijni chronga naa nge e juincheno e ndo Dio, me e tsingijna ngajin sen titikaon Ncháina Jesús, ko je a ni titikaon a ndo.

²³ Tjume e nchakon xroxejunta ti jii ni ngo kainnta titikaonnta Ncháina, ko siá kainnta xronichjanta ikaxin ngigua, ko tixin in naa na ko tsienxin a na nge e stetin en na, o xratitikaon a na Ncháina Jesús, xrondachro na ixi tsinchetjáña jáanta.

²⁴ Ko siá xrochronganta naa nge e juintano anta ndo Dio, ko tixin in naa ni titikaon a Ncháina, o tixin in naa ni xratienxin a, ko tsin en na nge e rinichjanta, xroxraon na ixi je e na ndako a juinche e na.

²⁵ Ko jaña tsonoxin nge e imao xraxaon na ngaya aséen na ko tjume e tsake exin ntatuchi in na ko tsajon na juasaya ngajin ndo Dio ko xrondachro na ixi nduaxin ndo Dio jii ngajinnta.

Ndako sintu una kain nchakon xroxejuna ti ni ngo

²⁶ Méxin, kichuuna, ¿nge e xrokon en? Nchakon xroxra unta ti jii ni ngo, itsjenta salmo, ko kaxinnta xrojuinchequen ennta sen kichuunta, kaxinnta xrochronganta nge e juintano anta ndo Dio, kaxinnta xronichjixinnta ikaxin ngigua tienxin a sen, ko kaxinnta xrochronganta nge e xrondachro ngigua me e. Kain ji i tson en ixi sen ni ngo ícha tsitikaon sen ndo Dio.

²⁷ Ko siá xronichjixinnta ikaxin ngigua, je o yuu o ní sen xronichja ko sa ó naa sen ko tjume e inaa sen, ko xrokonda ixi xrojan ngisen tienxin xrochronga sen nge e xrondachro ti jinichja inaa sen.

²⁸ Ko siá xro an ngisen jii ni ngo no e ko xrochronga nge e xrondachro nge e jinichja inaa sen, cháña xronichjixin a sen ikaxin ngigua nchakon xroxra unta, ko je o xronichjixin sen ngaya aséen sen ngajin ndo Dio.

²⁹ Tájonnta juachaxin ixi xronichja yuu o ní sen xrochronga nge e juincheno e ndo Dio sen. Tjume e sen jitin en xroxraon sen á nduaxin chijnie ndo Dio ti stendachro sen jinichja.

³⁰ Ko siá xrojuincheno e ndo Dio xronichja naa sen jii nti a, sen sa ó jinichja xrotenko sen ixi xronichja sen nandá kuayé e chijnie ndo Dio.

* **14:19 ite diez**

³¹ Chao ngujngu sen xrochronga sen nge e juincheno e ndo Dio sen ixi jaña kainnta tsono anta nge e jian ko juaxruxin tsake e asáanta.

³² Ko ngisen kuayé e juachaxin xronichja nge e chronga ndo Dio tsono e sen kichuu sen, kaxon xrokonda je o xronichja sen ti tikinixión.

³³ Ixi ndo Dio, ndo tajon juaxruxin tsake e aséenni, tjaun ndo kaxon jian tson en ngaxin in ningue ndo.

Xranchi ó kuan annta nche enta nchakon xra onta ngaxin in ni ngo,

³⁴ sen nchri xrokonda xronichja i sen hora ritin ennta chijnie ndo Dio ixi ko a juachaxin jaña tson en; xrokonda tsitikaon sen xranchi tetuan an ley.

³⁵ Siá tjaun sen nchri tsono e sen xrojan nge e, ti tsijja sen ndo a sen, nti a chao tsjanchangí e sen ndoxi e sen ti tienxin a sen. Ixi je a jian xronichja sen ti stetin ennta chijnie ndo Dio ngaxin in ni ngo.

³⁶ Xrokono anta ixi chijnie ndo Dio xrangíxixín a chijni ngajinnta ko kaxon je a ja onta kuaye enta chijni ji i.

³⁷ Méxin, siá jii xrojan ngisen xraxaon ixi je e sen chronga sen chijnie ndo Dio o xraxaon sen ixi Espíritue ndo Dio tingijna sen, xrokono e sen ixi ti rikjin me e naa nge e tsiketuan an Ncháina Jesús.

³⁸ Ko ngisen titikaon a, ja anta titikaon anta sen.

³⁹ Méxin, kichuuna, tsango tjéenta ixi xrokuaye enta juachaxin xronichjanta nge e tjaun ndo Dio tsono eni ko kaxon xrondachro anta ixi jua i xronichja sen ikaxin ngigua tsikayé e sen,

⁴⁰ ko kain ti nge e sinche enta, ndako ko jian tson en.

15

Tsixechón ndo Cristo

¹ Kichuuna, jai tja on syntaxraxaonnta chijni jian juntakuan annta. Chijni me e kuaye enta ko jian rititikaonnta.

² Ko siá tsintue anta chijni me e, tsarichonnta kain nchakon. Ko siá na i, xruenxon kuitikaonnta.

³ Sa ó, juntakuan annta nge e jan an kuayá a kaxon: ndo Cristo kuenxin ndo ixi ti ndako a juntu una, xranchi ndachro xroon chijnie ndo,

⁴ *ko juabaa sen ndo ko je e ndo xechón ndo nchakon nínxin xranchi ndachro xroon chijnie ndo Dio.

⁵ *Ko sa ó konoxin ndo ngajin ndo Pedro, ko tjume e ngajin sen teyuu kuajikao ndo.

⁶ Tjume e konoxin ndo ngajin quinientos sen kichuuna tsixra o sen ko bikon sen ndo. Ko jai itsjé sen me e xra ste sen, ko ikaxin sen ó tsiken en sen.

⁷ Tjume e konoxin ndo ngajin ndo Jacobo, ko tjume e ngajin kain sen apóstol.

⁸ *Tjume e konoxin ndo ngajin, bikon Ncháina Jesús maski jan an ícha tjume e kuichúxin ndo, xranchi naa xjan tsikitsingajin.

⁹ *Ko jan an nóna ixi je a ícha tjinteena xranchi ikaxin sen tsikinche e Ncháina ko tikinixinna i xrondachijina sen apóstol, ixi jan an kuaningakon an ko tja on naaxrokóñaxón sen titikaon Ncháina.

¹⁰ Maski ndako a junta a, juasie ndo Dio ixi juachaxien ndo kuindoxin ti xraxa on, ko je a xruenxon bikonóa na ndo, ixi ícha junta a ixra ne e ndo ixi kain sen apóstol. Ko je a jan an junta a ixra me e. Na i. Ndo Dio bingijnana ndo ko chjána ndo juachaxin junta a xrée ndo.

¹¹ Ko ni jan an ko ikaxin sen tjinte ana, ti ícha tjintee me e ti chijni nichjana ko ti kuitikaonnta.

Xroxechón ni tsiken en

¹² Ko siá ndachrona ixi ndo Cristo xechón ndo, ¿sonda ndachro kaxinnta ixi xechón a chujni tsiken en?

¹³ Siá xroxechón a sen tsiken en, ña xrondachro kaxon tsixechón a ndo Cristo.

¹⁴ Ko siá tsixechón a ndo Cristo, tjinte a nge e nichjana ko nge e tjakona ko tjinte a kaxon nge e chuntianta.

¹⁵ Ko siá nduaxin a xechón chujni, jaina stencheye ena chujni, ixi chrongana ixi ndo Dio juinchexechón ndo, ndo Cristo. Siá nduaxin sen tsiken en xroxechón a sen íjngo, je a nduaxin xechón ndo Cristo.

¹⁶ Ko siá xechón a sen tsiken en, kaxon ndo Cristo xechón a ndo.

¹⁷ Ko siá ndo Cristo tsixechón a ndo, tjinte a ti chuntianta ndo ko komé a jíanta.

¹⁸ Siá nduaxin a xechón ndo Cristo, kaxon sen kuitikaon ndo, sen kuen en, kuitjáña sen ko jai nai a xroxechón sen.

¹⁹ Ko siá chuntiana ndo Cristo ko xraxaonna ixi je o tsingijnana ndo jai ti stena ngata a nunte xasintajni, tsango lastuna ixi jaina xroxechón ana.

²⁰ Ko nduaxin xechón ndo Cristo. Je e ndo sa ó xechón ndo ko ji i nchenojna ixi nduaxin xroxechón sen tsiken en.

²¹ Ixi naakua xi juangíxin juinche e ti ndako a, méxin kain chujni kuama ijie ko kuaxi kuinteken en chujni, kaxon jaña naakua xi xechón, méxin jaña kaxon chao xroxechón kain sen tsiken en.

²² Ixi ti ndako a juinche e ndo Adán, méxin kain chujni kuaxi kuinteken en na. Ko jai, ixi tsitikaonna ndo Cristo, jaña kaxon kaina tsechónna kain nchakon.*

²³ Ja in xrokonda tson en, sa ó xechón ndo Cristo, ko tjume e nchakon xrokjan ndo xroxechón kain sen chuntia ndo.

²⁴ Ko tsijí nchakon naatsjexinxón kain nge e ko ndo Cristo sinchejexin ndo kain ni tetuan an ko kain espíritu ña i, ko tsajon ndo kain ti tetuen en ndo tsayé e Ndotée ndo, ndo Dio.

²⁵ Ixi xrokonda tsetuan an ndo Cristo ti tsijija nchakon sinchejexin ndo juachaxin chónnda kain ni ningakon en ndo.

²⁶ Ko ti tsjexixin tsitjáña, me e xichononte ko ti ten en chujni.

²⁷ Ndo Dio kuajon ndo kain juachaxin ngajin ndo Cristo ixi tsetuen en ndo kain nge e. Ko ti jaña ndachro xroon chijnie ndo Dio ixi ndo Cristo tsetuen en ndo kain nge e, je a xrondachro ixi tsetuen en ndo ndo Dio kaxon. Na i. Ixi ndo Dio chjée ndo Chjen en ndo, xjan Jesús, kain juachaxin tsetuen en xjan kain nge e.

²⁸ Ko tjume e nchakon tsjexin tsetuen en ndo Cristo kain nge e, ndo Cristo, Chjen en ndo Dio, kaxon tsitikaon ndo Ndotée ndo, ndo tsikajon juachaxin ngajin ndo Cristo. Ko jaña ndo Dio tikinixin en ndo tsetuen en ndo kain nge e.

²⁹ Jii ikaxin na tikitéexin na chujni ixi ni tsiken en, ¿sonda jaña nche e na siá titikaon a na ixi ni tsiken en xroxechón na íjngo?

³⁰ Ko, ¿sonda ngujngu nchakon tituexinna ixi naatsóñaxóna na?

³¹ Méxin, kichuuna, jan an nóna ixi ngixe i nchakon naatsóñaxónna na. Ko nduaxin juaxruxin ritjén ixi ja anta kaxon titikaonnta Ncháina Jesucristo.

³² Ko nchakon bake é tjajna Éfeso kuətōki an chujni ste nti a ixi je e na nche e na xranchi iko jie e, ¿ko nge e xrojuacha jan an ti tsen enna siá nduaxin a xroxechón ni tsiken en? Siá nduaxin a ji i, cháña nche ena xranchi ndachro kaxin na: “Sinena ko tsu una ixi ndúya ndatsen enna.”

³³ Tituexin anta ixi sintaya anta na: “Siá xrojuentonta ni ndako a nche e, ja anta sinchetjáñanta kain nge e jian no anta.”

³⁴ Ikjannta nche enta ti jian ko ínche anta ti ndako a. Kaxinnta xrandako a titikaonnta ndo Dio ko ndachrjan ji i ixi jaña tsosua anta.

* 15:22 tsechónna kain nchakon vida eterna

Xranchi xroxechón ni tsiken en

³⁵ Nchéxin xrojan ja anta tsjanchangínta: “¿Xranchi xroxechón ni tsiken en ko xranchi tson en cuerpoe na?”

³⁶ Naa nge e ninta ti xranchangi ji i. Tsee tengani chjaka xrokonda tsen en tsee ixi jaña tsechón ika.

³⁷ Ti tengani je a ika tengani. Na i. Ti tengani naa tsee, á tsee noatrigo o ngixe i inaa tsee.

³⁸ Ko ndo Dio tajon ndo ngujngu nge e tachrje ko tsóña xranchi tjaun ndo, ko ngujngu tsee xrochónnda ngujngu kée.

³⁹ Ko je a kain cuerpo xraje o. Na i. Jii cuerpoe chujni, jii cuerpoe iko, jii cuerpoe kuxe, ko jii cuerpoe kuchee.

⁴⁰ Kaxon jaña jii cuerpoe sen ángel ste ngajní ko jii cuerpoe ni ste ngata a nunte xasintajni. Ko jii cuerpoe sen ángel chaxro tsje e ko kaxon jii cuerpoe chujni chaxro tsje e.

⁴¹ Ti tingasáña chjiixro chaxro, ko chaxro tingasáña nchanitjao ko kaxon nchanotsé tingasáñaxin, ko maski jii itsjé nchanotsé, jéexin tingasáñaxin ngujngu nchanotsé.

⁴² Jaña kaxon tson en nchakon xroxechón ni tsiken en. Ixi nchakon ten en na ko xrabaa na, renga cuerpoe na ko nchakon xroxechón na íjngo, í xrorenga i na ixi tsechón na kain nchakon.

⁴³ Ni tsixrabaa renga cuerpoe na, ko nchakon xroxechón na íjngo, tsayé e na naa cuerpo chaxro ko í tsorenga i.

⁴⁴ Xroxrabaa naa cuerpo renga ko tjume e xroxechón naa cuerpo renga i ixi chónnda juachaxien Espíritue ndo Dio. Ko xranchi jii cuerpo renga, jaña kaxon jii cuerpo renga i, chónnda juachaxien Espíritue ndo Dio.

⁴⁵ Ko xranchi jitaxin xroon chijnie ndo Dio: “Xi juinchekonchjian ndo Dio ti xrangíxixión me e ndo Adán, ndo kuayé e juachaxin tsechón ndo.” Ko tjume e kui inaa ndo xranchi ndo Adán, ko ndo me e chónnda espíritu tajon juachaxin tsechón chujni kain nchakon.

⁴⁶ Ko je a sa ó kóña cuerpo chónnda juachaxien Espíritue ndo Dio. Na i. Sa ó kóña cuerpo renga, ko tjume e kóña cuerpo chónnda juachaxien Espíritue ndo Dio.

⁴⁷ Ndo kóña sa ó, kóñaxin ndo ixi inche jii nunte xasintajni. A ndo yuxin ngajní kuixin ndo me e Ncháina.

⁴⁸ Kain ni jii nunte xasintajni chónnda na naa cuerpo xranchi ngisen tsikóñaxin inche ti xrangíxixión. Ko kain sen jii ngajní chónnda sen cuerpo xranchi cuerpo chónnda ngisen kuixin ngajní.

⁴⁹ Jai jaina stena xranchi ngisen kóñaxin inche, ko tjume e jaina xrokjanna xranchi ngisen kuixin ngajní.

⁵⁰ Méxin, kichuuna, ndachrjan ixi ti cuerpo chónnda ntao ko ijni jua i tsake e ti tetuan an ndo Dio. Naa nge e renga jua i tsayé e naa nge e nai a tsjexin.

⁵¹ *Xrontatjunta naa nge e noa inta: Kain ana tsen enna ko nduaxin xrontatjunta kainna tsindoxin cuerpoina.

⁵² Tjume e xranchi xitje e ko tije e jmakonna, ti tsjexixin tsin enna xrondachro tjao, ko kainxin sen tsiken en kuichuntia Ncháina xroxechón sen íjngo ko ínai a tsen en sen, ko kainna, ti stechónna, tsindoxin cuerpoina.

⁵³ Ixi xrokonda ti cuerpo renga tsindoxin naa cuerpo nai a xrorenga, ko cuerpo ten en tsayé e juachaxin nai a tsen en.

⁵⁴ Ko nchakon cuerpo renga tsindoxin naa cuerpo nai a xrorenga ko cuerpo ten en tsayé e juachaxin nai a tsen en, tjume e tson en xranchi jitaxin xroon chijnie ndo Dio: “Nchakon me e tsjexin juachaxin kuachónnda ti ten enni.

⁵⁵ Ja a ti ton iá chujni, ¿no jii juachaxian? ¿No kuitu e ti ncheníexian chujni?”

⁵⁶ Kondeexin ti ndako a nche eni, me e ten enni. Ko ley kuayé e sen sa ó, me e juankata ani ijie.

⁵⁷ Ko juasie ndo Dio ixi xruan an ndo Ncháina Jesucristo ixi juinchemé e ndo ijie kuachóndani.

⁵⁸ Méxin, kichuuna, tsango tjua anta. Tintue anta titikaonnta Ncháina Jesucristo. Kain nchakon ícha xrojuinche enta xrée Ncháina ixi ó jian no anta ixi ixra me e je a xruenxon nche eni ixra.

16

Xejo tomi xroxruen en sen ni ngo tjajna Jerusalén

¹ *Ko tomi jua onta ixi tsingijnanta sen kichuuna titikaon Ncháina, nche enta xranchi kuetuan an sen ni ngo nunte Galacia.

² Ngujngu domingo tantsjendaánta nchín tomi juachanta nchakon ikjuinta ixra ixi jaña íxrokonda i xroxra o tomi me e nchakon tsjasotsja anta.

³ Ko nchakon tsjaso jan an, tsetuan an sen kuinche e ja anta ixi satsji sen tjajna Jerusalén, ko xrokjin jan an naa xroon xrochronga ixi tsija onta tomi tsayé e sen kichuuna nti a.

⁴ Ko siá xrokonda kaxon jan an itsji.

Nge e xraxaon ndo Pablo

⁵ *Nchakon tsjaso ngajinnta xrokonda tsatsinga tjajna Macedonia, ko tjume e tsjaso tjajna Corinto tsjasotsja anta.

⁶ Nchéxin tsituna kaxin nchakon ngajinnta, kain nchakon tonkin. Ko jaña chao tsingijnaninta nchakon satsji íjngo tjajna.

⁷ Jai tjaun a tsjasotsja anta kaxion nchakon. Na i. Jan an tja on tsituna nti a ngajinnta itsjé nchakon siá Ncháina tsajon ndo juachaxin.

⁸ *Ko tsituna kaxin nchakon tjajna Éfeso tsijija kia Pentecostés,

⁹ ixi nti i chonda juachaxin sinta a ixrée Ncháina ko xrokonda jian tson en ixra me e maski ste kueya ni ningakonna.

¹⁰ *Ko siá tsiji ndo Timoteo tjajna nti a, jian nichje enta ndo ko juaxruxin tariku unta ndo ixi je e ndo jian nche e ndo xrée Ncháina xranchi jan an.

¹¹ Kainnta jian titikaonnta ndo ko tingijnanta ndo ixi jian tsii ndo tsitsjena ndo jan an ko kaxon ikaxin sen kichuuna.

¹² Ndo kichuuna Apolos tsango kuinóatáana ngajin ndo ixi xrokuijitsja anta ndo ko ikaxin sen kichuuna, ko jua i tsiji ndo jai. Tsiji ndo nchakon íxro an ixra xrochónda ndo.

Juexin nichja ndo Pablo

¹³ Jian xraxaonnta ko nchesoji asáanta. Tintue anta ti chuntianta Ncháina Jesús, xronka inta ko tsanga tinteenta.

¹⁴ Kain xra nche enta ngajin Ncháina, nche enta ixi tjue enta sen kichuunta.

¹⁵ *Ó no anta ixi sen ndo a ndo Estéfanos, je e sen me e ó sa ó kuitikaon sen chijnie ndo Dio nunte Acaya, ko jai je e sen tingijna sen sen kichuuna, sen titikaon Ncháina.

¹⁶ Tja on ixi tsitikaonnta sen me e ko kain sen nche e ixra ngajin Ncháina xranchi je e sen.

¹⁷ Tsango chá na ixi ndo Estéfanos ko ndo Fortunato ko ndo Acaico, kuij sen bingijnana sen ixi ja anta jua i bake enta nti i.

¹⁸ Ko bake é juaxruxin ixi jian nichja na sen ko kaxon ja anta bake enta juaxruxin ko sen nche e xranchi nche e je e sen xrokonda tsajonni juasieni ngajin sen.

¹⁹ *Sen xra o ni ngo nunte Asia xruan annta sen juajna. Kaxon ndo Aquila ko jan Priscila ko sen xra o ndo a sen xruan annta sen juajna ixi juachaxien Ncháina.

²⁰ Kain sen kichuuna xruan annta sen juajna. Ko ndako nichje é kichuunta ko tjáanta chjéexin kichuunta juajna.

²¹ Jan an Pablo xruan annta juajna ko ixí tjáana ikjin xroon xruan annta.

²² Ngisen tjaun a Ncháina Jesucristo tangi tson en sen. Ko jaina, ndachrona: “¡Ncháina tuinxin tsji inta!”

²³ Juachaxien Ncháina Jesucristo sintanchaonnta.

²⁴ Tjua anta kainnta ixí kaina titika onna ndo Cristo Jesús. Jaña tson en.

Xroon yuxin tsikjin ndo Pablo xruen en ndo sen ste tjajna Corinto

Ndo Pablo kjin ndo xroon ngajin sen tjajna Corinto

¹ *Jan an, Pablo, apóstol nche e xrée ndo Dio, kuinchena ndo ixi sinta a ixra ngajin Ncháina Jesucristo, jan an ko ndo ndo kichuuna Timoteo ikjinna xroon ji i, xruan anna ngajinnta ti stenta ningue ndo Dio tjajna Corinto ko kaxon kain sen kichuuna titikaon Ncháina Jesucristo ste nchijí nunte Acaya.

² Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Ndo Dio tingijnana ndo nchakon tangi tatsingana

³ Juasie ndo Dio, Ndotée Ncháina Jesucristo, tikonóaina ndo ko kain nchakon tingijnana ndo ixi juaxruxin tsinteena.

⁴ Je e ndo tingijnana ndo nchakon tatsingana juachjaon, ixi jaña kaxon tsingijnana ikaxin sen kichuuna, nchakon xrojan juachjaon xrochónnda sen.

⁵ Jan anna tsango ijié juachjaon chondana xranchi juachjaon kuichónnda ndo Cristo, ko jaña kaxon ixi je e ndo jaña chondana juaxruxin.

⁶ Jan anna tangi stena ixi ja anta xrobake enta juaxruxin. Ndo Dio tingijnana ndo ixi jan anna tsjachana tsingijnananta kaxon, ko jaña ja anta chao tsatsinganta nge e tangi tson annta xranchi ti tangi tatsinga jan anna.

⁷ Ko nónana ixi nduaxin titikaonnta Ncháina Jesucristo, méxin siá jai tangi chondanta juachjaon xranchi jan anna, nónana kaxon ndo Dio tsingijnanta ndo xranchi bingijnana ndo jan anna.

⁸ *Kichuuna, tja onna tsono anta kain nge e tangi kuatsingana ti kuinteena nunte Asia. Tsango ijié juachjaon kuachondana, méxin xraxa onna ndaxrokuen enna.

⁹ Jan anna konónana xranchi ndaxrokuen enna nti a. Ti tangi kónana me e juakonana ixi xrochuntia ina ngajin jan onna, xrokonda xrochuntiana ngajin ndo Dio, ndo nchexechón ni tsiken en.

¹⁰ Je e ndo bingijnana ndo kuatsingana kain juachjaon ko ngajin je e ndo chuntiana ko nónana kaxon ixi xratsingijnana ndo.

¹¹ Ja anta tingijnananta ti nichje enta ndo Dio ixi je e ndo tsingijnana ndo. Ko siá itsjé sen xronichje e sen ndo Dio, jaña kaxon itsjé sen tsajon sen juasaya ngajin ndo ixi je e ndo kuingijnana ndo.

Sonda jui a ndo Pablo tjajna Corinto

¹² Juaxruxin stena ixi nónana ndako junta ana ko xro an ngisen juntaya ana, kaxon ndako junta ana ngajinnta. Ko je a ixi juachaxinnana junta ana jaña. Na i. Juachaxien ndo Dio me e ti bingijnana junta ana jian.

¹³ Jan anna stekjinna xroon tsaye enta ko ti ikjinna tangi a tsienxinnta ko tja onna ixi tsienxinnta jian

¹⁴ ixi jai ja anta ó tienxinnta naanchichjaon, ko nchakon xrokjan Ncháina Jesús tsake enta juaxruxin ixi jan anna jian juntakuan annanta, ko kaxon jan anna juaxruxin stena ixi ja anta jian kuitikaonnta.

¹⁵ Jan an xraxa on ixi sa ó xrojuasótsja anta ixi juaxruxin xrokuinteenta ixi ó yuxin xrobikon kichuuna.

¹⁶ *Méxin xraxa on xrojuasótsja anta nchakon saxrokjui nunte Macedonia ko kaxon nchakon xrokjanxinna nti a. Ko jaña ja anta xrobingijnantana saxrokjui nunte Judea.

17 ¿Á xraxaonnta ixi je a jian xraxa on nchakon ndachrjan sa ó ixi xrojuasó nti a? ¿Á xraxaonnta ixi jan an nta a xranchi ngixe i naa chujni ixi sa ó ndachrjan xrojuasó ko tjume e ína i?

18 Ndo Dio no e ixi je a jaña xraxa on xrojuanta a. Nchakon ndachrjan jaán, jaña tson en, ko nchakon ndachrjan na i, jaña tson en kaxon.

19 *Ixi ndo Silvano ko ndo Timoteo ko jan an juako ananta chijnie ndo Cristo Jesús, chjen en ndo Dio, nchakon bake ena nti a; ko je e ndo Cristo ncheya i ndo; ixi ti ndachro ndo me e nche e ndo.

20 Ixi kain nge e tsichronga ndo Dio sinche e ndo, ndo Cristo kuitikaon ndo ko jaán nche e ndo kain. Méxin, nchakon nichjana ngajin ndo Dio ndachrona “Jaña tson en”, ixi juachaxien ndo Cristo Jesús.

21 Ndo Dio tingijnana ndo jan anna ko ja anta ixi tsitikaonna ndo, ko je e ndo kuiya ina ndo ixi tjúá tsintee aséeina,

22 ko me e juako ndo ixi jaina tikinixin enna ndo, méxin, baxe e ndo chji e ndo ngajin jaina, me e Espíritue ndo chóna aséeina ixi jaña tsonoina nduaxin tsayé ena ti ndachro ndo tsajon ndo.

23 Siá xrata i cha o ixi tjasotsja anta tjajna Corinto xranchi xraxa on, ndo Dio no e ndo ixi je a ixi tjaun a tsjaso. Na i, xrasatji a ixi tjaun a sintani a asáanta ixi tuinxin tjaso.

24 Je a ixi xrokuetuan annta xranchi xrochuntianta Ncháina. Na i, ixi ó nóna ixi jian chuntianta ndo. Je o tja onna ixi tsingijnana ícha tsake enta juaxruxin.

2

1 Tjaun a tsoni e asáanta, méxin, ndajuaso a ngajinnta.

2 Ixi siá tsoni e asáanta, ¿tjume e ngisen xrochjana juaxruxin? ¿Xronkanta ti kondanaxin jan an koni e asáanta?

3 Méxin, ikjin xroon xruan annta ko juaso a ngajinnta ixi tjaun a xrojuinchení enta aséenna. Jan an tja on ixi nchakon xrojuasó ja anta ko jan anna xrobake ena juaxruxin.

4 Ko nchakon ikjinna xroon xruan ananta, tsango jítóni e aséenna ko tsjanga kaxon. Ko je a ikjin xroon ixi kaxon xrokoni e asáanta. Na i, jaña junta a ixi tja on xrokono anta ixi tsango tjua anta.

Ndo Pablo íxraxaon a ndo nge e juinche e naa xi

5 Tjaun a ícha xronichja ixi xi juincheni e aséenna, ixi je e xa je a jan on juinchenina xa. Na i. Kaxon juincheni e xa aséen kain ja anta.

6 Kueyanta nichje enta xa ko koyakutéenta xa, ó chao, íxro an nge e ndachenta xa.

7 Jai ó nchemé enta ngaya asáanta ti ndako a juinche e xa ko tingijnanta xa, ixi ba kondeexin juachjaon me e tsitjáña aséen xa.

8 Tinóatána ngajinnta, tjako enta xa ixi nduaxin tjue enta xa.

9 Xroon sa ó kjin annta ixi tja on tsonóna á nduaxin kuitikaonnta nge e kuetuan annta.

10 Ko siá ja anta tjáña anta ti ndako a juinche e xa, kaxon jan an ó tjáñana nge e juinche e xa. Méxin, siá xrojan ti ndako a juinche e xa, jan an ó tjáñana me e, ixi ja anta jian tsinteenta. Ko ndo Cristo no e ndo ixi ndatjáñana nge e juinche e xa.

11 Ko jaña Xixron anxrée xro an nge e sinche e xa ngajin jaina ixi jaina ó noina xranchi nche e xa.

Ndo Pablo bake e ndo tjajna Troas

12 *Nchakon ikjui tjajna Troas ixi xrojuako chijnie Ncháina Cristo, konóna ixi je e ndo kuajon ndo juachaxin xrojuako chijnie ndo nti a.

13 Ko maski jii juachaxin, jii juachjaon ixi kuitja i ndo kichuuna Tito. Méxin, tuinxin ntatjan sen ste nti a satji nunte Macedonia ko tjume e sakjui.

Ndo Pablo tajon ndo juasaya ngajin ndo Dio

¹⁴ Juasie ndo Dio ixi je e ndo tingijnana ndo ko chondana juachaxien ndo Cristo Jesús. Ko kain ti no tjakona chijnie ndo, ixi ti tjakona xranchi naa nge e chaxro xraxe.

¹⁵ Ixi kain jaina chaxro xraxena xranchi naa tsjoxraxé tajon ndo Cristo tayé e ndo Dio ixi jaina tjakona chijni jian ngajin sen chóna juachaxin tsechón kain nchakon ko ngajin ni xratayé a juachaxin kaxon.

¹⁶ Ngajin ni chóna i juachaxin tsechón, ti chaxro xraxe me e xranchi xrokuenxin na. Ko sen chóna juachaxin tsechón, ti chaxro xraxe me e xranchi tajon juachaxin tsechón sen. ¿Ngisen chao tsjacha sinche e ixra kuetuaina ndo Dio?

¹⁷ Ko jan anna tjancha ina tomi ixi tjakona chijnie ndo Dio xranchi nche e ikaxin na. Na i. Jan anna ixi nchiji aséena tjakona chijnie ndo ixi je e ndo kuinchanana ndo sinta ana ixra ngajin ndo Cristo.

3

Natjúá cha o tsonchjiñe eni ngajin ndo Dio

¹ Ti ndachrijanna ixi jan anna jian tjakona, ¿á xraxaonnta ixi jan anna tsango ntajié aséena?, o, ¿á xraxaonnta xrokondanana naa xroon xronichja ixi jian jan anna?, o, ¿á xrokonda tjancha ananta naa xroon xrondachro ixi jian nta ana ixra, xranchi tjanchia ikaxin na?

² Na i, ja anta xrokjuinta xranchi xroon me e, jitjixin ngajin aséena ko me e tsichuxin chujni ko tsonoexin chujni ti jian nta ana.

³ Me e tsikonxinni ixi ja anta xrokjuinta xranchi naa xroon chrjiki anna tsikjin Nchána Jesucristo tsonoexin chujni ixi ixra jian nta ana. Ko je a ixi ndana ó tsikjinxin ndo xroon me e. Na i. Je e ndo kuajon ndo Espíritue ndo ti jichón kuaye enta. Ko je a ngata a naa xro tsikjin ndo. Na i. Je e ndo tsikjin ndo ngaya aséen chujni.

⁴ Ko kain ji i noina ixi nduaxin titika onna ndo Dio ko ndo Cristo tingijnana ndo.

⁵ Ko jua i xrondachrona ixi je o jaina chao sintu una naa ixra. Na i. Ndo Dio, me e ndo tingijnana ko chjaina ndo juachaxin, méxin, chao nche ena xra kuituan an ndo.

⁶ Je e ndo chjaina ndo juachaxin ixi sinche ena ixra ngajin ndo ko xra me e naa chijni natjúá juinchéna ndo. Ko chijni ji i je a naa ley jitaxin. Na i. Ji i naa juachaxin kuajon Espíritue ndo Dio. Ixi ley me e teenxin chujni, ko Espíritue ndo tajon juachaxin stechón chujni kain nchakon.

⁷ Kondeexin ley bakeenxin chujni ko ley me e jitaxin ngata a naa ixro ko tsango ijié chjiixro bika o ley me e, méxin sen israelita jua i tsje e sen ngaya ikon ndo Moisés ixi tsango tóngíxin. Ko ti tóngíxin me e jitjixin.

⁸ Siá jaña bikon sen chjiixro me e, jai ícha tóngíxin chijni natjúá kuaye ena ixi juachaxien Espíritue ndo Dio.

⁹ Ko ley tsango tóngíxin me e banchekama ijié tsenxin chujni; jai ícha jian ko ícha chaxro chijni ne e ndo Dio tsontjúáxin aséina ko tsumé e ijié chondana.

¹⁰ Méxin, ti ijié juachaxin kuachóna ley íxro an tjintee xranchi ijié juachaxin chóna chijni natjúá jai.

¹¹ Siá ley sa ó kuachóna ijié juachaxin ko juachaxin me e yao juexin, jai ícha chóna ijié juachaxin chijni natjúá tsake e kain nchakon.

¹² Ko jaina stechon enna nge e tsjexin a, méxin, xroxrakon ana xronichjana kain ji i.

¹³ Ko nta ina xranchi juinche e ndo Moisés, bijeexin ndo naa manta ngaya ikon ndo ixi tsikon a sen israelita ixi jitjixin ti jitóngíxin.

¹⁴ Ko sen israelita kuienxin a sen chijni me e ko hasta ti jai ti xranchekuanxin sen nge e kuetuen en sen ó sa ó, xranchi xrochonda sen manta jijeexin ngaya ikon sen ko tienxin a sen ti nchekuanxin sen. Ko je e sen tsienxin sen chijnie ndo Dio je o siá tsitikaon sen ndo Cristo, me e tsitjáña manta tsijijeexin ngaya ikon sen.

¹⁵ Ko ti nchakon jai ti nchekuanxin sen xroon tsikjin ndo Moisés tienxin a sen ixi xrajijexin manta गया ikon sen.

¹⁶ Ko nchakon naa ngisen taxi titikaon sen Ncháina Jesús, manta me e ítsingakuen a manta.

¹⁷ Ncháina* Jesús me e Espiritu ne e ndo Dio. Ko ti no jii Espiritue ndo Dio, xro an nge e tije e.

¹⁸ Ko kain jaina íxro an manta jijeexin ikonna; jaina stena xranchi naa xrosenda tóngíxin ixi tjakona juachaxien Ncháina, ko je e ndo tindoxin ndo ti xraxaonna. Kain ji i ton en ixi ixra nche e Espiritue ndo Dio गया aséeina, ko jaña ícha ko ícha stena xranchi jii je e ndo.

4

Sen chronga chijnie ndo Cristo

¹ Ixi ndo Dio tsango bikonóa nana ndo ko chjánana ndo juachaxin sinta ana xrée ndo; méxin, tonchrje ana ko ícha nta ana xrée ndo.

² Xro an nge e imao nta ana, méxin tosuana ina, ko ntaya ina chujni ko tindoxin ana chijnie ndo Dio. Ndo Dio jian no e ndo ixi jan anna nichjana nge e nduaxin, méxin chao xrochuntia sen ngajinna.

³ Ko ni tienxin a chijnie Ncháina ti tjakona, ni me e tsitjáña na méxin tienxin a na.

⁴ Ko ni me e tienxin a na ixi xiña i tetuan an nunte xasintajni tsijije e xa ikon na ixi tsiexin a na ko tsikon a na xranchi tingasáña chijnie ndo Cristo ixi Ndo Cristo naxraje o xranchi ndo Dio xexi ndo.

⁵ Nchakon tjakona, je a tjakona ti xraxa on jan anna. Jan anna tjakona ixi tsitikaonnta ndo Jesucristo xranchi Ncháanta, ko jan anna nta ana ixra ixi tsingijnananta ixi tjua ana ndo Jesucristo.

⁶ Ko ndo Dio kuetuan an ndo ixi xro i tsingasáñaxin ti naxixe e, kaxon je e ndo juinchengasáña ndo गया aséeina ixi jaña xrochuxinna juachaxin ijié chóna ndo Dio, juachaxin tingasáñaxin गया ikon Cristo.

Ixi chuntiana Ncháina Jesucristo me e jian tsojuna

⁷ Ko cuerponana jii xranchi naa ichi tsikóñaxin ncheta o tjinga nge e tsango tjintee, ixi jaña tsjakoxinna ijié juachaxin chjaina ndo Dio ko je a juachaxinnana.

⁸ Maski xrojan nge e tangi tsatsingana, tonchrje ana. Maski xrochondana juachjaon, jan anna chuntiana ngajin ndo Dio.

⁹ Maski tengina na, ndo Dio tintuna ina ndo. Maski itsjé nge e nchenana na ixi tjaunna tsjánkana na, jua i sinchetjáña na.

¹⁰ Ngixe i ti no itjina, tjakona ti tangi tatsingana xranchi tangi juinchekao na Ncháina Jesús ti kuen en ndo, ko ti titika onna ndo jai tjakoxinna ixi je e ndo jichón ndo गया aséeina.

¹¹ Ixi jaina ti stechónna, kain nchakon chondana juaxrakon ixi tsen enna ixi titika onna ndo Jesús, ko kaxon jaña tsjakoxinna ti ijié juachaxin chóna ndo.

¹² Méxin, jan anna steten enna ko ja anta xrochondanta juachaxin tsarichonnta.

¹³ Ixi jan anna xraje o chuntiana xranchi ndachro xroon chijnie ndo Dio tsikjin sen ó sa ó: “Kuitika on méxin, nichja”, ko kaxon jan anna kuitikaonna, méxin, nichjana.

¹⁴ Méxin, nojna ixi ndo Dio, ndo juinchexechón Ncháina Jesús, kaxon sinchexechónna ndo jaina, ko tjume e ja anta ko jan anna satsiku una ndo ti tituan an ndo.

¹⁵ Kain ji i kon en ixi jaña jian tsintee ja anta. Ixi siá ícha kueya sen tsayé e sen juachaxien ndo Dio, jaña kaxon ícha itsjé sen tsajon sen juasaya* ngajin ndo ixi je e ndo chóna ndo kain juachaxin.

* **3:17 Ncháina** Señor Ncháina Jesús o Ncháina Dio * **4:15 juasaya** respeto, honor

¹⁶ Méxin, tonchrje a aséenana maski jitjexin cuerponana, ndo Dio ícha sinchesoji ndo aséenana ngujngu nchakon.

¹⁷ Ko maski tangi tatsingana ngata a nunte nti i, ji i tsonchrjen a, tuinxin tsatsinga juachjaon ko kondeexin me e, ndo Dio xrochjaina ndo ijié juachaxin ti nai a tsjexin.

¹⁸ Méxin, ta ina juachjaon ixi nge e tangi tatsingana nunte xasintajni, ixi kain me e tuinxin tsatsinga. Ko xraxaonna nge e xratikon ana ixi ti tikonna tuinxin tsjexin ko ti nge e jian xratikon ana nai a tsjexin.

5

Nchia xrochondana ngajní

¹ Nojna ixi cuerpojna jii xranchi naa nchia, ko cuerpojna me e tsjexin naa nchakon. Ko ndo Dio juinchekonchjian ndo naa nchia natjúá jii ngajní tsayé ena, ko nchia me e nai a tsjexin nchia ixi je a itja chujni tsikonchjianxin nchia.

² Ti xrastena nti i, tsango taabana ixi tjaunna xrochondana cuerpo natjúá jii ngajní.

³ Ko nduaxin xrochondana naa cuerpo natjúá ko jian sinchekitsáana ndo, je a turuchuna tsinteena nti a.

⁴ Ti xrochondana cuerpojna ji i, tsango taabana ko toni e aséeina ko je a ixi tjaunna tsintu ena cuerpo ntaxi. Na í, jaina tjaunna xrochondana naa cuerpo tsen a ixi tsehónna kain nchakon.

⁵ Ko je e Ndo Dio juinchéñana ndo ixi tjaun ndo tsayé ena inaa cuerpo natjúá, méxin kuajon ndo Espíritue ndo kuaye ena ixi jaña tsonojna ixi nduaxin tsayé ena nge e tsajon ndo.

⁶ Méxin jian chuntiana ko juaxruxin tsinteena ti xrochondana cuerpojna nunte nti i, maski xrasatsji ana ngajin Ncháina.

⁷ Ko maski jua i tikonna ndo, jaina chuntiana ngajin ndo.

⁸ Ko jaña chuntiana ndo, ícha jian xrokuintu ena cuerpojna ixi saxrokjuina ti jii Ncháina Jesucristo.

⁹ Méxin xrokonda ícha sinche ena ti tjaun Ncháina, siá xrastena nti i o na i,

¹⁰*ixi kaina xrokonda tsonchjiñe ena ti sinchéñaxin ndo Cristo ijié ixi jaña ngujnguna tsayé ena nge e tixinixinna ixi á jian juinche ena o na i ti xrastena ngata a nunte nti i.

Chijni tajon juaxruxin tsinteena ngajin ndo Dio

¹¹ Ko jaina ó nojna ixi xrokonda xrochonde ena ndo Dio juasaya, méxin ndachena chujni chijnie ndo ixi jaña je e na tsitikaon na ndo kaxon. Ko ndo Dio ó chuxinna ndo ko kaxon ja anta tja onna jian tsichuxinninta.

¹² Tjaun ana ixi xroxaxaon ja anta ixi tsango jian jan anna. Na i. Je o ndachrjanna ji i ixi jaña tsake enta juaxruxin ixi jan anna jian nta ana ko jaña xrochondanta nge e tsjate enta ngajin ni ndachro tsango jian nche e na ko je a nduaxin.

¹³ Ixi siá ndachro na tsijinchetjáña janana, jan anna je o tja onna tsajonna juasaya ngajin ndo Dio. Ko siá je a nduaxin tsijinchetjáñana janana, méxin tja onna tsingijnananta ícha tsitikaonnta.

¹⁴ Ti tsango tjua ana ndo Cristo, me e tituen en aséenana ko nónana jian ixi je o je e ndo kuen en ndo ixi ti ndako a juinche e kain chujni, méxin jaina xranchi xrokue enna kaxon.

¹⁵ Ko ndo Cristo kuenxin ndo ixi jaina, ixi jaina ti xrostechónna ísinche ana ti tjaunna. Xrokonda sinche ena nge e tjaun ndo ixi je e ndo kuen en ndo ko xechón ndo ixi jaina xrochondana juachaxin tsehónna kain nchakon.

¹⁶ Jai jaina íroxraxaon ana á tjintee o na i inaa chujni xranchi kuaxraxaonna sa ó. Ko sa ó kuachuxinna ndo Cristo xranchi ngixe i naa chujni, ko jai í je a jaña chuxinna ndo.

¹⁷ Ixi ngisen titikaon ndo Cristo ikjan sen xranchi naa chujni natjúá ixi kain nge e jointu una sa ó ó komé e ko jai kain nge e ikjan natjúá.

¹⁸ Kain ji i ndo Dio juinche e ndo ixi kuajon ndo chjen en ndo xjan Cristo kuenxin xjan ixi jaina, ko jaña chao tsonchjiñe ena ti jii ndo ko kaxon chjaina ndo ixra ixi xronichje ena chujni chijnie ndo ko jaña tsonchjiñe e ícha chujni ngajin ndo.

¹⁹ Ixi ndo Dio xruan an ndo ndo Cristo kuenxin ndo ixi jaina, ko jaña komé e ti ndako a juinche e kain chujni ko kotuajina ndo ixi jaina tsjakona chijnie ndo ngajin chujni nunte xasintajni ko jaña chao tsonchjiñe e na ngajin ndo.

²⁰ Jaina chondana juachaxien ndo Cristo ixi xronichjana chijnie ndo ko je e ndo tjanča anta ndo ixi tsitikaonnta chijni tjako annanta. Ko ixi juachaxien ndo Cristo tjanča ananta tonchjiñe enta ngajin ndo Dio.

²¹ Ndo Cristo xro an nge e ndako a juinche e ndo, ko ndo Dio bikon ndo xranchi ndo Cristo chóna ndo ijie, ixi jaña xrokomé e kain ijie kuachóna chujni ko jaña íxro an nge e sínká na.

6

¹ Jan anna xro nta a xrée ndo Dio, tjanča ananta ixi tjáña inta ti jian tjáanta ndo ko ti tsango tjua anta ndo.

² Tsindachro ndo Dio jitaxin chijnie ndo:
Nchakon kuincha anta ja anta, kuin an ti juanchianta.
Ko nchakon kuajon juachaxin tsechón chujni,
nchakon me e kuingijnanta.

Ko nchakon me e jai,
jai nchakon ndo Dio sinchemé e ndo ti ndako a nche e chujni
ko tsajon ndo juachaxin tsechón na kain nchakon.

³ Tjaun ana ixi xrojan ngisen xrondachro ndakua i nta ana xra, méxin, ndakoa nta ana kain nge e.

⁴ Kain ixra nta ana tjakoxinna ixi xrée ndo Dio nta ana, maski tangi tatsingana ko jan anna tokuaxinnana, maski itsjé juachjaon tatsingana ko chonda ina nge e xrokondanana,

⁵ *ko kóñana na ko xraxin inna na ndo achjiso ko tsango itsjé ixra junta ana, ko ste kaxin nchakon juine ana ko kuarichrin ana.

⁶ Ko maski kain ña juinchenana na, xro an ngisen xrondachro ixi ndakua i junta ana ixi nóñana nge e nduaxin, taka i chjánana juaño, ko jian nichja ana na ixi Espíritue ndo Dio jii ngajinna, ko nduaxin tjua ana chujni,

⁷ ko ixi juachaxien ndo Dio nichjana chijni nduaxin ne e ndo, ko nchakon tangi tatsingana, jian nichjana ixi jaña tjakoxinna nta ana ti jian.

⁸ Kaxin nchakon jian nichja nana na ko ikaxin nchakon na i. Kaxin nchakon nichja na kontranana ko ikaxin nchakon na i. Ko maski nichjana nge e nduaxin, je e na ndachro na ixi ntayana.

⁹ Ko maski kaxin nchakon chuxin ana na ko ikaxin nchakon jian chuxinna na. Ko kaxin nchakon tangi tatsingana ixi tjaun na tsóñana na ko xrastechónna. Tjaya na ngajinna ko xratjacha i na naatsóñaxónna na.

¹⁰ Maski jitoni e aséñana, jan anna juaxruxin stena. Xranchi ni nóa stena, ko tjá ana chujni naa chijni tsango tjintee, ko xranchi xro an nge e xrochondana, ko jan anna chondana kain nge e.

¹¹ Kichuuna ti stenta tjajna Corinto, jian nichja ananta ko ntatjunanta ti nduaxin nge e jii ngaya aséñana.

¹² Jan anna tsango tjua ananta. Ko ja anta je a nduaxin tjaunnanta.

¹³ Tinóatáana ngajinnta, xranchi naa ndotata tinóatée ndo ngajin chjen en ndo, tjeñauninta xranchi jan an tjua anta.

Jaina ningue ndo Dio, ndo jichón

¹⁴ Titexin anta ngajin naa ni titikaon a Ncháina Jesucristo ixi je a naxraje o xraxaonna. Me e jii xranchi kuxinta je a nataonxin nche e ba ixra nchakon ti te ba. Ko jaña kaxon je a naxraje o naa nge e jian ko naa nge e ña i. Ko je a xraje o ti tingasáña ko ti naxixe e.

¹⁵ Jua i tsjento ndo Cristo ngajin Xixron anxrée ko jua i tsekao kichuu naa ni titikaon ndo Cristo ko naa ni titikaon a ndo.

¹⁶ *Jaina ningue ndo Dio, ndo jichón, ko siá ndo Dio jii ngajinna, jua i tsitikaonna ngajin naa ídolo, jaina tixinixinna ningue ndo Dio ko je e ndo tsindachro ndo:

Jan an tsake é ko tsajiki an sen,

ko jan an ndo Dio ne e sen

ko je e sen tsikinixin en sen tjajnána.

¹⁷ Méxin, kaxon jaña tsindachro Ncháina:

Tachrjexinnta ti ste ni titikaon a na najan an

ko xro an nge e tjúa i itsenta,

me e tsake enta ngajin.

¹⁸ Ko jan an Ndotánta,

ko ja anta chjan na, xjan xi ko xjan nchri,

jaña ndachro Ncháina Dio, ndo chóna kain juachaxin.

7

¹ Kichuuna tsango tjua anta, ko noina ixi tsayé ena naa nge e tsajon ndo Dio, méxin, xrokonda tjúa xrochondana cuerpoína ko aséina, ko tsintu ena kain nge e sinchekitjana, ko jaña xrochonde ena ndo Dio juasaya ko tsitikaonna ndo.

Sen kichuuna ste Corinto ó kuindoxin sen

² Taya nananta ngaya asáanta ixi xro an ngisen juintani ana, ko xro an ngisen juintaya ana.

³ Ndachrjan i ji i ixi sintakamanta ijie. Na i. Ó sa ó ntatjunanta ixi tsango tjua ananta, jai ti xrastechónna hasta tsijija nchakon tsen enna.

⁴ Tsango chuntia ngajinnta ko tsango stena juaxruxin ixi nge e nche enta, ko tsango chá nana maski tangi stena ngata a nunte xasintajni.

⁵ *Xra nchakon juasona nunte Macedonia tjokéna ina ixi nti i, nda a jii chujni ningakonna ko tsango xronkana.

⁶ Ko ndo Dio, ndo tajon juaxruxin tsake e aséenna, kuajon ndo juaxruxin bake e aséenana ixi kujj ndo Tito.

⁷ Ko je a je o ixi kujj ndo Tito bake ena juaxruxin. Na i. Kaxon ixi konónana ixi juaxruxin bake e ndo ngajinnta ko ndo Tito ndachijina ndo ixi tsango tjaunnta tsikonnanta ko chronga ndo ixi tsango stehínta ixi nge e juinche enta ko tsango taanta juachjaon ixi jan an. Hora kuin an ji i, tsango bake é juaxruxin.

⁸ Ko xroon kjin annta sa ó me e juincheni e asáanta ko jai ya i juachjaon. Ko sa ó jan an kua juachjaon ixi nge e kjin annta ixi konóna ixi nge e ndachrjan juincheni e asáanta kaxin nchakon.

⁹ Ko jai ritjén juaxruxin, je a ixi ja anta koni e asáanta. Na i, juaxruxin ritjén ixi ti koni e asáanta me e kuindoxin nge e xraxaonnta ko ti kokuaxin annta ti koni e asáanta me e juinchexruxin en ndo Dio. Méxin, ti kjin annta xroon, xro an ti ndako a junta anta.

¹⁰ Ixi ti toni e aséenni xranchi tjaun ndo Dio me e tindoxin aséenni ko jaña tomé e ijie chónani, ko ti ncheni e aséen chujni kondeexin nge e jii ngata a nunte xasintajni me e tjacha tóna chujni.

¹¹ Ja anta kukuaxi annta juachjaon tjáanta ndo Dio, me e juinche e ndo juaxruxin ko jai jian stenta ko jian xraxaonnta ixi jan an xro an ijie chónnda, me e ja anta kuingijnaninta ixi tsango tjaanta juaña ko xronkanta ixi xrojan nge e xrokon en. Méxin tjaunnta xrobikonninta ko xrojuinchejenganta na ngisen ndako a juinche e ko jaña ja anta juakoxinnta ixi xro an ijie chondanta kondee nge e kon en.

¹² Nchakon kjin annta xroon, je a ixi rixraxa on ngisen ndako a juinche e, ko je a ixi rixraxa on ngisen koni e aséen. Na i. Jaña junta a ixi ja anta xrojuakoxinnta ngajin ndo Dio ixi tsango kuaanta juachjaon ixi jan anna.

¹³ Ko jaña juinche enta, méxin, juaxruxin stena.

Ko ícha bake ena juaxruxin ixi tsango jian bake e ndo Tito ngajinnta ixi ja anta bingijnanta ndo.

¹⁴ Jan an ntatjan ndo Tito ixi juaxruxin stena ixi ja anta juinche enta ti jian, méxin tosuana ina kain nge e ntatjanna ndo Tito. Ko kaxon kain ntatjanna ndo Tito nduaxin me e ko kaxon kain nge e ntatjunanta nduaxin ko jaña stena juaxruxin.

¹⁵ Ndo Tito tsango juaxruxin jii ndo ixi ja anta tsango kuitikaonnta ndo ko kuaye enta ndo jian, méxin ícha tjua anta ndo.

¹⁶ Tsango juaxruxin ritjén ixi nóna chao xrochuntia ngajinnta.

8

Jian tsingijna kichuuna

¹*Kichuuna, tja onna tsono anta xranchi sen titikaon Ncháina nunte Macedonia juako sen xranchi ndo Dio bingijna ndo sen.

² Maski itsjé juachjaon kuatsinga sen, ko maski nóa sen, juaxruxin bake e sen ko bingijna sen xranchi nduaxin xrochónnda sen itsjé tomi.

³ Jan an nóna ixi nduaxin kuajon sen ti chónnda sen ko hasta ti chónnda i sen kuajon sen ixi jaña kuachrxexin aséen sen.

⁴ Ko kuinóatée sen ngajinna ixi tsajonna juachaxin tsingijna sen sen titikaon ndo Dio.

⁵ Ko ícha tsango bingijna sen; je a xranchi jan anna xraxa onna; sa ó kuitikaon sen ixi nchijí aséen sen ngajin Ncháina Jesucristo, ko tjume e kuitikaon sen ngajinna xranchi tjaun ndo Dio.

⁶ Méxin, kuinóatánana ngajin ndo Tito ixi tsja o ndo tomi ngajinnta xranchi juangíxin ndo juinche e ndo ó sa ó.

⁷ Jian nóna ixi tsango jian nche enta kain nge e: jian chuntianta Ncháina Jesucristo, jian nchekuen ennta sen chijnie ndo Dio, ícha no anta chijnie ndo, ko tsango chá anta ko tjaunninta. Ko jai ícha jian tingijnanta sen kichuuna.

⁸ Je a ritituan annta sinche enta ji i. Na i. Je o tja on tsono anta xranchi tingijna sen kichuuna ngajin ikaxin sen kichuuna, sen ícha nóa, ixi jaña ja anta kaxon ícha tsanginta tsingijnanta ko xrotjue enta sen.

⁹ Ja anta no anta ixi Ncháina Jesucristo, je e ndo kuachónnda ndo kain ti tjintee, ko ixi tsango tjua anta ndo, méxin, kuii ndo nunte xasintajni ko ikjan ndo xranchi naa ni nóa ixi jaña ja anta xrochondanta kain ti tjintee.

¹⁰ Ja in xrontatjunta nge e xraxa on ixi ji in. Nano kuatsinga ja anta sa ó kuaxi kuajonnta, ko tsango juaxruxin bake enta ixi kuajonnta.

¹¹ Jai xratajonta xranchi juangíxixín kuajonnta ó sa ó; juaxruxin tájonnta ti chondanta.

¹² Siá tjaunnta tsingijnanta sen kichuuna ixi jaña bake enta ngaya asáanta, ndo Dio take e ndo juaxruxin siá tájonnta nge e chondanta ixi ndo Dio tjancha i ndo nge e chónnda i chujni.

¹³ Tjaun ana ixi tsingijnanta inaa sen ixi ícha xrochonda sen ko ja anta xrochonda inta. Jan anna tja onna ixi nataonxin xrochondanta.

¹⁴ Jai ja anta chondanta, méxin chao tsingijnanta sen chónnda i. Nchéxin tsii nchakon je e sen xrochónnda sen ko tsingijnanta sen kaxon, ko jaña nataonxin tsingijna kichuunta.

¹⁵ Xranchi ndachro xroon chijnie ndo Dio: “Sen jua o kueya nge e, xro an nge e ti jua o sen xe e, ko sen xro an itsjé jua o, xro an nge e titjáñe e sen.”

Ndo Tito ko sen chrikao ndo

¹⁶ Ko juasie ndo Dio ixi je e ndo bake e ndo ngaya aséen ndo Tito yaa ndo juachjaon ixi tsingijnanta ndo xranchi jan an kaxon yaa juachjaon ixi ja anta.

¹⁷ Ko je e ndo bake e ndo juaxruxin ixi sinche e ndo ti kuetuan anna ndo, ko jai je e ndo tjaun ndo tsiji ndo, tsitsja anta ndo.

¹⁸ Kaxon ndo Tito tsijikao ndo naa ndo kichuuna, ko kain sen titikaon Ncháina chúxin sen ndo ixi jian juinche e ndo ixra ti tjako chijnie ndo Dio.

¹⁹ Ko kain ni ngo kuinche e sen ndo ixi kaxon tsiki anna ndo nchakon tsjasokianna tomi juakana. Kainna xronta ana ixra ji in, titika onna ko chonda ana ndo Dio juasaya ko tja onna tsono anta ixi nduaxin sinta ana ji i.

²⁰ Ko tjaun ana ixi xrojan ngisen xronichja ixi ndakua i junta ana ixi tomi xraka.

²¹ Ko je o tja onna sinta ana nge e jian, ixi jaña Ncháina tsake e ndo juaxruxin ko kaxon jaña tsikon chujni ixi jian nta ana ixra.

²² Kaxon xruan anna inaa ndo kichuuna tsijikao sen. Je e ndo jian juinche e ndo itsjé ixra. Ko jai ícha tjaun ndo tsingijna ndo ixi tsango chuntia* ndo ngajinnta.

²³ Xraxaonnta ixi ndo Tito, ndo tjento, tingijnana ndo ixra nta ana ngajinnta. Ko sen yuu tsijikao ndo, sen ni ngo kuinche e sen ixi tjaun sen tsiji sen ngajinnta ko jaña tsajon sen juasaya ngajin ndo Cristo.

²⁴ Méxin, nche enta nge e jian ngajin sen xruan annta ixi jaña tsikon sen ni ngo kuinche e sen ixi nduaxin tjue é kichuunta ko tsono e sen ixi nduaxin nge e nichjana ixi ja anta.

9

Tomi xra o tsingijna sen kichuuna

¹ Ti xra o tomi ixi tsingijnanta sen kichuuna titikaon Ncháina, íxrokonda i xrokjin anta ícha,

² ixi sa ó konóna ixi ja anta tjaunnta xrobingijnanta sen, méxin chá na ko ntatjan sen kichuuna ste nunte Macedonia ixi ja anta, sen nunte Acaya, xra nano kuatsinga tjaunnta xrobingijnanta sen nóa. Ko sen kichuuna nunte Macedonia tsango tjaun sen tsingijna sen kaxon ixi ja anta sa ó juako enta sen.

³ Méxin, xruan an kaxin sen kichuuna tsiji sen ixi tja on tsikon sen ixi nduaxin ja anta ó stechon ennta ixi tsajonnta nge e tsingijnaxinnta chujni ixi jaña beki a sen.

⁴ Nchéxin xrojan sen kichuuna nunte Macedonia tjaun sen tsjasokianna sen ko ja anta xra tjao anta tomi. Ko me e tsosua nana ixi sa ó ndachrjanna ixi ja anta tsango tjaunnta tsingijnanta ko jan anna chuntiana ixi jaña sinche enta.

⁵ Méxin, xraxa on ícha jian sa ó xroxruan an sen kichuuna ngajinnta ixi tsingijnanta sen ti xroxra o tomi tsindachronta. Ko jaña tsikonni ixi ja anta tsango tjaunnta tsingijnanta sen nóa ixi tjue enta sen ko je a ixi jan anna tetuan anna sinche enta me e.

⁶ Xraxaonnta ixi ngisen tajon a itsjé, kaxon xro an itsjé tayé e sen, ko sen tajon kueya, kaxon kueya tayé e sen.

⁷ Méxin, ngujngu ja anta tájonnta nge e xraxaon asáanta, ko sincheníe a asáanta nge e tájonnta ko je a ixi xrokonda tsajonnta, ixi ndo Dio tjue e ndo sen juaxruxin tajon xrojan nge e.

⁸ Ixi jaña Ndo Dio ícha sinchenaonnta ndo ko tsajon ndo kain nge e xrokonda anta ixi jaña kaxon chao tsingijnanta ikaxin chujni.

* 8:22 *chuntia* tener fe

⁹ Xranchi ndachro xroon chijnie ndo Dio:

Sen tonchjeya nge e chónnda sen ngajin ni nóa, kain nchakon xroxraxaon chujni ti jian juinche e sen me e.

¹⁰ Ixi ndo Dio tajon ndo tsee tengani ko tajon ndo nge e sineni, ko je e ndo xrotjáanta ndo kain nge e xrokonda anta ko je e ndo ícha tsajon ndo, me e xrochondanta itsjé nge e ko jaña tsingijnanta ni nóa.

¹¹ Ndo Dio xrotjáanta ndo kain nge e tjintee xrochondanta, jaña ja anta kaxon chao itsjé nge e tsajonnta. Ko jan anna tsiki anna tomi me e ko jaña ícha itsjé sen kichuuna tsajon sen juasaya ngajin ndo Dio ixi tomi tsajonnta.

¹² Ixi tomi tsingijnaxinnta sen kichuuna, je a je o ixi sen kichuuna xrochónnda sen nge e xrokonde e sen. Na i, kaxon ixi jaña ícha tsajon sen juasaya ngajin ndo Dio.

¹³ Ko kaxon je e sen ícha tsajon sen juasaya ngajin ndo Dio ixi nge e kuajonnta ixi jaña tjakonta nduaxin titikaonnta chijnie ndo Cristo. Jaña kaxon ícha ijíé juasaya xrochónde e sen ndo Dio ixi ja anta bingijnanta sen ko ikaxin chujni.

¹⁴ Ko je e sen xronichje e sen ndo Dio ixi ja anta ixi je e sen tjua anta sen ko ixi tikon sen ixi ndo Dio jian tingijna ndo ngajinnta.

¹⁵ Juasie ndo Dio ixi juinчекitojna ndo naa nge e tsango tjintee, me e ti tomé e jíeeni, ko tsikixian ina tsekina kain ti chjajna ndo.

10

Juachaxin kuajon ndo Dio ngajin ndo Pablo

¹ Jan an Pablo tinóatáana ngajinnta ixi ndo Cristo, ndo tsango jian ko tsango tjuajna ndo, ste kaxin na ndachro na ixi nchakon ritjén ngajinnta je a ntajíé aséenna, ko nchakon ritjén ikjín, tsango tojiena.

² Méxin, nchakon tsjasotsja anta tjancha anta nche anta ixi tsojiéna ngajin kaxin ni ndachro ixi jan anna tja onna tsjachana xrojan nge e, xranchi nche e ni nunte xasintajni.

³ Nduaxin jan anna stena nti i nunte xasintajni, ko maski jaña, ntai ana ti nge e ndako a xranchi nche e ni titikaon a ndo Dio.

⁴ Ko tjaya ina ixi chika, chika tj yaxin chujni nunte nti i. Na i. Jan anna nta ana xrojan nge e ixi juachaxien ndo Dio, ko juachaxin me e chao tjankaxinna kain xra nche e Xixron anxrée.

⁵ Ko jaña kaxon tjankana ixra nche e ni tjaun a ixi íkaxin chujni tsichuxin na ndo Dio. Ko ixra nta ana ixi kain ni chónnda ijie tsindoxin na ti ndakua i xraxaon na ko tsitikaon na ndo Cristo.

⁶ Ko jan anna tsuyakutéena chujni tsitikaon a ndo Cristo ixi jaña tsitikaon na ndo, ko jaña kainnta jian tsitikaonnta kaxon.

⁷ Ja anta je o titikaonnta nge e tikonnta. Ko ngisen xraxaon ixi nduaxin tikinixin ndo Cristo, tsono e sen ixi kaxon jan anna tikinixinnana ndo xranchi sen me e.

⁸ Siá tsango nichja ixi richonda juachaxin tsituan an, tosuana i. Ncháina Jesucristo chjána juachaxin me e ixi jaña ícha xrochuntianta ndo, ko je a ixi me e tsitjáñaxinnta.

⁹ Ko ti kjin annta xroon xruan annta, tjaun a xroxraxaonnta ixi me e xroxronkanta,

¹⁰ ixi ste kaxin sen ndachro sen ixi ti ikjin xroon tsango toña o ngajinnta, ko nchakon ritjén ngajinnta xronkana ko kain ti nichja tjinte a.

¹¹ Ko ngisen jaña nichja, tsono e sen ixi ti nchakon ikjin xroon xruan annta ko ritjén a ngajinnta, jaña kaxon tsjasotsja anta naxraje o xronichja anta xranchi ikjin xroon xruan annta.

¹² Nai a xroxraxa onna ixi tsango jian nichjana xranchi ste ikaxin na jaña nche e na. Kaxin chujni xraxaon na ixi je e na tsango tjintee na ko ikaxin na noe a na, ni me e tsango ninta xraxaon na.

¹³ Kaxon jua i sintajié aséenana ixi nge e nta ana. Ndo Dio me e ndo xrondachro nge e sintana ko ngajin ja anta sintana ixra me e.

¹⁴ Jua i ntaxruantana ixi ícha tituan anna, ko chao xrondachrjan ixi jan an sa ó juaso ngajinnta ko juako anta chijnie Ncháina.

¹⁵ Ko jua i sintaxruanta ixi jan an junta a ixra juinche e inaa ngisen. Jan anna tja onna ixi ícha xrochuntianta Ncháina, jaña jan anna ícha sintana ixra ngajinnta ko je o ti tsituannana.

¹⁶ Kaxon tja onna tsjakona chijni jian ne e Ncháina Jesucristo íkaxin tjajna ti xraxro an ngisen itji tjako ixi jaña xro an ngisen xrondachro ixi jan anna ntaxruantana naa xra tsijinche e inaa ngisen.

¹⁷ Ko siá xrojan ngisen tjaun sinchejié aséen, chao sinchejié aséen sen je o ixi titikaon sen Ncháina Jesucristo.

¹⁸ Ixi ndo Dio nichja ndo jian ixi naa ngisen ndako juinche e ko chao a ixi xrojan ngisen je o sen sinchejié aséen sen ixi ndachro sen jian nche e sen.

11

Ndo Pablo ko sen nduaxin a apóstol

¹ Tja on tsin ennta nge e xrondachrjan maski xronichja xranchi naa sen ninta.

² Ndo Dio nchenóna ixi tsaxinta juachjaon ixi tja on tsintue anta ndo Cristo. Jan an ó ntatjan ndo Cristo ixi tsaya anta ndo xranchi naa nchrichajan tsixranchia ixi tsute e ko tjúá aséen ko cuerpoe nchrichan ixi tsij nchakon tsute e nchrichan ngajin naakua naa ndoxi e nchrichjan.

³ Ko xronkana ixi xranchi kunchee tsango ña i juincheye e ba jan Eva; ko ba jaña sinchekachruenta ba ti xraxaonnta ko ti jian titikaonnta ndo Cristo.

⁴ Ixi siá tsij xrojan ngisen tjako inaa ndo Cristo, ko inaa espíritu ko inaa chijni ti je a juako jan anna, ja anta tintu enta ni me e nche e na ti tjaun na ko me e ja anta nta anta juaxruxin.

⁵ Ko jan an je a ícha nuntena ixi ni ndachro apóstol na, ni nandá kuij, ni ndachro ícha tjintee, ni rué e ja anta.

⁶ Ko maski je a ícha jian nichja jan an, nduaxin ícha nóna chijnie ndo Dio ko ó itsjé vez juako anta ixi ícha nóna.

⁷ ¿Á ndako a junta a jan an nchakon juako chijnie ndo Dio ngajinnta ko juanchia i ninaa tomi ngajinnta?, ko juntajié a aséenna ixi jaña ja anta ícha xrokuiteenta.

⁸ Ko jan an kuayá a tomi chjana sen kichuuna, sen jii ikaxin ni ngo, ko tomi me e kondana ixi juntakuan an ja anta.

⁹ *Ko nchakon bake e ngajinnta, xrokondana tomi, ko xro an nge e juanchia anta. Ko kain nge e kondana, sen kichuuna nunte Macedonia chjana sen ixi tjaun a kuajondaxin ixra ngajinnta ko jaña jai tsajonndaxin a xra ngajinnta.

¹⁰ Ko jian nóna ixi chuxin chijni nduaxin ne e ndo Cristo, ko xro an ngisen nchijí nunte Acaya tsantsjena juaxruxin chonda.

¹¹ ¿Sonda ndachrjan ja in? ¿Á ixi tjaun anta? Ndo Dio no e ndo ixi tsango tjua anta.

¹² Ko xrajaña sintana tsanchia i tomi ngajinnta ixi tjaun a ixi jaña ni nduaxin a apóstol sinchejié aséen na ixi stencheye e na chujni ixi je e na ndachro na tikinixin en na ndo Cristo ko xraje o ixra nche e na xranchi jan anna.

¹³ Ni me e je a nduaxin apóstol na. Je e na stencheya na ixi ndachro na tikinixien en na ndo Cristo.

¹⁴ Ko kain ji i sinchexronka ina ixi nojna ixi kaxon Xixron anxrée ndachro xa ixi je e xa naa ángel tingasña ko je a nduaxin.

¹⁵ Jaña kaxon ni nche e xrée Xixron anxrée ncheya nā ixi ndachro nā jian xrā nche e nā. Ko nchakon tsjexin kain nge e, tangi tson en nā ixi ndakua i juinche e nā.

Tangi ton en ndo Pablo ixi ixrā apóstol nche e ndo

¹⁶ Íjngo ntatjunta: Tjaun a xrondachronta ixi juintatjáña jáana, ko maski jaña xrokron en, tintunanta xronichja ixi jaña chao sintajié aséenna naa nchíín.

¹⁷ Siá jaña ntajié aséenna naa nchíín, ndachrjan i ji i ixi juachaxien Ncháina. Na i. Jaña jan an ndachrjan xranchi xrokjui nduaxin xrojuinchetjáña jáana.

¹⁸ Ste itsjé ni nchejié aséen ixi nge e no e nā, ¿sonda jua i kaxon jan an sintajié aséenna?

¹⁹ Ko ja anta ndachronta ixi no anta ko juaxruxin taye énta ni nduaxin tsijinchetjáña jaa.

²⁰ Ko ja anta tokuaxinnta tituan annta nā ko ntajinta anta nā ixrā ko tjenga inta nā nā, tantsja anta nā nge e chondanta, ntaya anta nā, ko tande e nā itun ngaya ikonnta.

²¹ Maski tosua na jan an xrondachrjan ixi jan anna junta ina jaña.

Ko ti nchejié aséen nā, jan an kaxon chao sintajié aséenna, ko ndachrjan ji i xranchi naa ni tsijinchetjáña jaa.

²² Je e nā chujni hebreo nā. Kaxon jan an. Je e nā chujni israelita nā. Kaxon jan an. Je e nā kuachrjenixin nā ndo Abraham. Kaxon jan an kuachrjenixin ndo Abraham.

²³ *¿Á je e nā nche e nā ixrā ngajin ndo Cristo? Jan an nduaxin nta a ixrā ngajin ndo Cristo, maski je a jian jan an xrondachrjan. Jan an ícha junta a ixrā, jan an ícha bija na nā ndo achjiso, jan an ícha bikaon nā ko itsjé vez ndáxrokron enna.

²⁴ Na ó vez ni judío juaya nā ngajin; ikántena kóñana nā ixi ino.

²⁵ *Níi vez ni tituan an tjajna Roma juaya nā ngajin ixi ntasé, naa vez kuaxina nā ixro. Níi vez konunte ntábarco ngangí nda, ntábarco ritiki an, naa vez naa tiie ko naa nchakon bake é jan on ngusine ndachaon.

²⁶ *Íkjín no kuaji. Tangi kuatsingatu a ndajitinga, ko naa nchakon ngakona xiche e. Kuatsinga itsjé juachjaon ngajin ni tjajnána ko kaxon ni je a tjajnána, ko kaxon ti bakji tjajna, ntajie ko ndachaon ko kaxon xrokóñana nā, ni nduaxin a titikaon Ncháina Jesucristo.

²⁷ Tsango junta a ixrā ko itsjé nge e tangi kónna. Itsjé tiie kuarichrin a jian ko itsjé nchakon kuatse jinta, kuen enna inda ko kuachóna i itsjé manta tsaria, méxin tsango bakongína.

²⁸ Ko maski kain ji i kónna, nai a tjáñana ixi kain ni ngo ko ngujngu nchakon tsango kua juachjaon ixi kain sen xra o ni ngo.

²⁹ Ngisen toni e, ko, ¿á jan an tonina í? Nchakon xrojan ngisen nche e naa nge e ti ndakua i ngajin sen kichuu sen, taa juachjaon ko toña o.

³⁰ Siá chao sintajié aséenna, sintajié aséenna ixi soji ana.

³¹ Ndo Dio, Ndotée Ncháina Jesucristo, ngisen tikinixin en kain juasaya, * no e ndo ixi nduaxin nge e ndachrjan.

³² *Nchakon bake é tjajna Damasco, xi baketuen en nti a, xi rey Aretas, kuetuan an xa ixi xrotséna nā hora tsachrjexin tjajna ko xrobikaana nā ndo achjiso.

³³ Ko sen kichuuna juankayana sen ngaya naa ntaxrakaxro ko juinchingajinxinna sen ti jii naa ventana jichóna tjatu o jii ngandajin tjajna, ko jaña sabinga ko ítsé ana nā.

12

Nge e ijié bikon ndo Pablo

¹ Xro an nge e tjachani xronichjani ixi jian je eni. Maski, xrokonda xronichja ko tseki anta nge e bikon ko nge e juinchenóna Ncháina Jesucristo.

² Chuxin naa xi titikaon Ncháina ko chónnda tenoó nano ikjui xa ti nínxin ngajní. Nóna i á cuerpoe xa o aséen xa bikon ko ixi juachaxien espíritue ndo Dio. Je o ndo Dio no e nge e nduaxin kon en.

³ Ko nóna ixi xi me e ikjui xa; nóna i á ixi cuerpoe xa o na i; je o ndo Dio no e ndo.

⁴ Ndo Dio bikao ndo xa ngajní, nti a kuin en xa kaxin nge e tienxin ani ko xro an ngisen chónnda juachaxin xronichja me e.

⁵ Jan an xrojuintajié aséenna ixi chuxin xi me e, a kondee nge e junta a jan an, jua i sintajié aséenna, je o chao xrondachrjan kondee nge e tangi kónna.

⁶ Siá xrojuintajié aséenna je a ixi jintatjáña jáana. Na i. Ixi nduaxin nge e jian junta a ko sinta i me e ixi tjaun a xroxraxaon sen ixi ícha nóna. Na i. Cháña je o sintaxraxa on sen nge e nta a ko nge e tin en sen ti junta a.

⁷ Ixi ti bikon, ti juakona ndo Dio, tsango chaxro me e, méxin tsango xrojuintajiéxin aséenna. Ko sinta i me e, ixi kuayá a naa ichin ntau na ko xinchexrée Xixron anxrée tsango ncheni e xa ntau na ixi jáña sintajié a aséenna.

⁸ Méxin ó ní juanchia a Ncháina Jesucristo tsantsjena ndo ichin me e,

⁹ ko Ncháina ja in ndachijina ndo: “Xro an nge e ícha xrokonda a; je o ti tsango tjua a, ixi ti tsango ijié juachaxin chonda jan an, ícha tonoxin juachaxin nchakon naa chujni ícha soji a. Juachaxin chónnda jan an tonoxin nchakon jua i nche e naa nge e ja ua.” Méxin, juaxruxin tsake é nchakon soji ana ixi jáña ícha juasaya tsayé e Nhána Jesucristo.

¹⁰ Ko méxin, ícha juaxruxin ritjén nchakon soji ana, nchakon chujni tjakaxin na ngajin, nchakon xro an nge e chonda, nchakon tengina na, nchakon yaa juachjaon ixi kondee Nhána Cristo; nchakon soji ana, nchakon me e ícha tonsoji aséenna.

Ndo Pablo taa ndo juachjaon ixi sen kichuuna tjajna Corinto

¹¹ Ndako tsijintatjáña janáa nchín ixi nichja nge e jian junta a. Ja anta chondanta ijie ixi ja anta xrokonda jian xronichjanta ixi najan an. Ko jan an je a ícha nuntena ixi xi apóstol kuintekij, xi ja anta nta anta juaxruxin rue énta, maski jan an xro an tjinteena.

¹² Ti konchrje ana junta a ixra ngakjen ennta ko kain ixra ijié ko kain ixra chaxro junta a ixi juachaxien ndo Dio ixi jan an nduaxin naa apóstolna.

¹³ Ko kain ja anta nge e ti ícha juntanuntenta ixi íkaxin sen kichuuna jii ikaxin ni ngo, ixi sen jaán bingijnanana sen. Ko jan an tjaun a bingijnaninta ixi tjaun a xrokuajon-ntaxin xra ngajinnta. Tjáña anta ti ndako a junta a ixi juanchia inta xrobingijnaninta.

¹⁴ Jai ó richon an ixi tsjasotsja anta nínxin vez ko jai kaxon tsajonndaxin a xra ngajin-nta ixi jan an tjée a tsayá a tomianta. Na i. Jan an tjée ja anta ixi ja anta ícha tjinteenta. Ixi je a ichjan tjatsin in xjan tomi tsayé e ndotée xjan. Na i. Ndotata me e ndo xrokonda tsjatsi in ndo tomi tsayé e xjan.

¹⁵ Ko jan an tsango ijié juaxruxin chonda ixi sintexianxin tomina ixi ja anta, ko jan an kaxon, maski ícha taka tsondaxína, ixi sinta a ixra ngajinnta ixi jan an tsango tjua a asáanta, ko maski jan an ngujngu nchakon ícha tjua anta ko ja anta ícha tjaun antana.

¹⁶ Ko maski kaxin sen ndachro sen ko titikaon sen ixi jan an kuajondaxin a xra ngajinnta ko ikaxin sen me e kaxon ndachro sen ixi jan an tsango nóna ntaya me e imao kuantsja anta tomianta.

¹⁷ ¿Á juntaya anta nchakon xruan annta xrojan ngisen tingijnana?

¹⁸ Nchakon ntatjan ndo Tito xrokuijitsja anta ndo, je e ndo ko inaa ndo kichuuna, ndo Tito, ¿á juntaya anta ndo? ¿Á nduaxin a ixi kayui jan anna xraje o jian ixra nta ana ko xraje o Espíritue ndo Dio nta axinna xra?

¹⁹ Ja anta stexraxaonnta ixi jan anna nichjana ja in ixi tja onna ja anta xroxraxaonnta ixi jian jan anna, ko je a nduaxin me e. Na i. Jan anna ja in nichjana ko ixra rinta ana jitikon ndo Dio ko Ncháina Cristo, kain me e nta ana ixi tja onna ícha tsitikaonnta Ncháina Cristo ixi tsango tjua ananta.

²⁰ Jixronkana ixi nchéxin nchakon tsjasotsja anta, stence anta xranchi jan an tja on ko kaxon ja anta já sinta inta juaxruxin xranchi xronichja jan an. Nchéxin stete-toku u kichuunta, tochjuya anta nge e chóna inaa sen kichuunta, stetoñao e kichuunta, stenchejié asáanta, stetjakaxin kichuunta ko stenceke to kichuunta.

²¹ Jixronkana ixi nchakon tsjasotsja anta, jan an tsango tsosua na ngajinxin* ndo Dio ko xrotsjanga ixi kondaxin ja anta ixi xratintue anta kain ti ndako a kuanche enta, ti chondanta nchri je a janchri anta ko xi je a ndoxi anta.

13

Juexin kuetuan an ndo Pablo

¹ Jai ó nínxin vez tsjasotsja anta. Xraxaonnta nge e ndachro chijnie ndo Dio: Kain nge e tsochjian xrokonda tsake e yuu o ní sen bikon nge e kon en.

² Ó sa ó ntatjunta ko jai íjngo ntatjunta maski ritjén a ngajinnta, ja in tsikjin ngajin sen ndako a nche e ko sen kaxin ixi ti nínxin tsjaso jai tsango tsoñao a sen ndako a nche e.

³ Ko nduaxin ja anta tjaunnta tsono anta á nduaxin nichja jan an ixi juachaxien ndo Cristo. Je e ndo nduaxin tsoñao ndo ko nduaxin sintaña anta ndo ijie.

⁴ Je e ndo juako a ndo juachaxien ndo ti kuen en ndo nganito ntacru, ko je e ndo jichón ndo ixi juachaxien ndo Dio, jaña kaxon jaina kuasoji a aséeina, ko jai juasie ndo Dio ixi juachaxien ndo, kainna stechónna ko nta ana ixra ngajinnta.

⁵ Xraxaonnta, ¿á chao stenta?, ko, ¿á nchiji asáanta chuntianta Ncháina Jesucristo? O, ¿á tonoa inta ixi ndo Jesucristo jii ndo ngajinnta?, o, ¿á nduaxin a kuaye enta ndo ngaya asáanta?

⁶ Ko tja on tsono anta ixi nduaxin jan anna titika onna Ncháina Jesucristo.

⁷ Tjanca ana ndo Dio ixi xro an nge e ndakua i stence enta ko tjaun ana ixi xron-dachrjanna ixi jian juentakuan annanta. Na i, jaña ndachrjanna ixi tja onna sinche enta ti jian maski xron-dachro ikaxin na ixi jan anna je a jian juakona.

⁸ Jan anna xro an sinta ana ixi tso mé e ti nduaxin. Ko kain nge e sinta ana me e ícha tsichuxinnta ti nduaxin.

⁹ Tsango chá nana ixi ja anta xraxaonnta ixi jan anna soji ana, ko ja anta tsango sojinta. Ko jan anna tjanca ana ndo Dio ixi ja anta ngujngu nchakon ícha jian tsitikaonnta ndo.

¹⁰ Méxin, ja in kjin annta jai ti ritjén ikjín ixi nchakon tsjasotsja anta xrokonda i ícha tsuyakutéenta. Ixi jan an chonda juachaxin, juachaxin chjana Ncháina, ko juachaxin me e xrokonda tsingijnaxinnta ixi ícha tsitikaonnta ndo ko je a ixi sincheni e asáanta.

¹¹ Jai kichuuna, take énta juaxruxin, tingijna kichuunta ixi jian tsinteenta, naxraje o xraxaonnta, tetokui a kichuunta ko ndo Dio, ndo tsango tjaunna ko chjaina juaxruxin, tsake e ndo ngajinnta.

¹² Chje é kichuunta juajna ko kainnta chonde enta kichuunta juasaya.

¹³ Kain sen titikaon Ncháina ste nti i xruan annta sen juajna.

¹⁴ Juachaxien Ncháina Jesucristo, ti tjua anta ndo Dio ko juachaxien Espíritue ndo tsake e ngaya asáanta kainnta. Jaña tson en.

* 12:21 ngajinxin delante de

Xroon tsikjin ndo Pablo xruen en ndo sen ste tjajna Galacia

Ndo Pablo ikjin ndo xroon kuayé e ni ngo nunte Galacia

¹ Jan an, Pablo, Ncháina Jesucristo kuinche ena ndo nta a xrée ndo Dio ko je a chujni nunte nti i kuinche ena. Na i. Jan an kuinche ena ndo Jesucristo ko Ndotáina Dio, ndo juinchexechón ndo Jesús.

² Jan an ko kain sen kichuuna steki an nti i xruan anna juajna ngajin sen ni ngo nunte Galacia.

³ Ndotáina Dio ko Ncháina Jesucristo sinchenchaonnta ndo ko juaxruxin tsake enta.

⁴ Ndo Jesucristo kuenxin ndo xixi jajna xixi xrokuitjáñaxin ana kondeexin nge e ña i jii nunte xasintajni xixi jaña jueña Ndotáina Dio.

⁵ Ndotáina Dio tikinixin en ndo kain juasaya kain nchakon. Jaña tson en.

Naáko naa chijni nduaxin, tsechonxinni

⁶ Jan an tsango chonda juachjaon xixi ja anta taka jitjáña anta ti kuetuan an ndo Dio, ndo kuiya anta xixi tsango tjua anta ndo Cristo, ko jai ja anta rirue énta inaa chijni ti xraxaonnta tsoméxin jíanta.

⁷ Ko je a nduaxin jii inaa chijni tajon juachaxin tsechónna kain nchakon. Na i. Jan an ndachrjan xixi kaxin na tjau na sintaya antana ko jaña tsindoxinnta chijni tjintee ne e ndo Cristo, chijni tajon juachaxin tsechónxinni kain nchakon.

⁸ Ko siá xrojan ngisen o jan anna o naa sen ángel tsi xin ngajni sintakuan annta inaa chijni xrondachro sen tsachrjengíexin ti ndakua i juinche enta, ko je a xraje o ti jintakuan annanta, sen me e tsitsingata a sen nchiji jíe ndo Dio.

⁹ Ko ó sa ó ndachrjan ko jai íjngo: Siá naa chujni sintakuan annta naa chijni je a xraje o chijni tachrjengíexin ti jie sinkani, ti ja anta ó kuaye enta, ni me e ndo Dio tsjankata a ndo na ijie kain nchakon.

¹⁰ Ko jai, ¿á tja on jan an xixi chujni tsitikaon na nge e nta a o ndo Dio tsitikaon ndo?, o, ¿á tja on xixi chujni sinche e juaxruxin nge e nta a? Siá me e xrojuinta a jan an, í je a naa nchexrée ndo Cristo jan an.

Ndo Dio kuinche e ndo ndo Pablo

¹¹ Kichuuna, jan an ntano anta xixi chijni tajon juachaxin toméexin ti sínká chujni ti jintakuan annta, chijni me e je a naa chujni juinchéña chijni.

¹² Ko jan an xro an chujni chjána chijni ko xro an ngisen juinchekuanna. Na i, Ndo Jesucristo juinchenóna ndo chijnie ndo.

¹³ *Ja anta ó kuin ennta nge e junta a ó seno, ti jan an batitika on ley ne e sen judío, méxin kuarua a ko bakon ín sen bakitikaon chijnie ndo Cristo ko tja on xrokuitjáña sen.

¹⁴ *Ko jan an nchakon bakitika on ley ne e sen judío, jan an ícha bakitika on xixi kain sen tjajnána, sen yaxinki an nano, ko ícha banta a nge e tsiketuan an sen tachrína xranchrjen.

¹⁵ *Ko nchakon jueña ndo Dio, je e ndo kuinche ena ndo ti xrariao tse e janána ko tsango jueñaona ndo méxin kuiya na ndo.

¹⁶ Ko je e ndo Dio juakona ndo Chjen en ndo xixi jan an xrojuintekuan an chijnie xjan ngajin chujni je a judío. Ko nchakon me e jan an xro an chujni juanchangi a á sinta a xrée ndo o na i.

¹⁷ Ko juí a ngajin sen sa ó banche e ixra xranchi apóstol, sen jii tjajna Jerusalén. Jan on tuinxin sakjui nunte Arabia, ko tjume e íkjanna tjajna Damasco.

18 *Ko kuatsinga ní nano, tjume e sakjui Jerusalén ixi tsichuxin ndo Pedro ko nti a bake e tena ó nchakon.

19 Ko bikon a ikaxin sen apóstol; je o bikon ndo Jacobo, ndo kichuu Ncháina.

20 Ndo Dio jitsje e ndo ixi nduaxin nge e ikjin.

21 Tjume e sakjui no tjajna Siria ko tjajna Cilicia.

22 Ko sen kichuuna titikaon Ndo Cristo ste ni ngo Judea xranai a chuxinna sen.

23 Je o tsikin en sen ixi ngisen tjaun sa ó xrokóñaxón sen ko barué e sen ko tjaun naaxrokuitjáñaxón chijni me e, jai je e ndo tjako ndo chijni tajon juachaxin tsechónxinni, ko chronga ndo ixi xrochúntiani Ncháina.

24 Ko kuajon sen juasaya ngajin ndo Dio ixi jan an ó titika on Ncháina Jesucristo.

2

Sen sa ó kuayé e ixra apóstol kuayé e sen ndo Pablo

1 *Kuatsinga tenoó nano, tjume e íjngo sakjui tjajna Jerusalén ko sabiki an ndo Bernabé ko kaxon ndo Tito.

2 Jan an ikjui nti a ixi ndo Dio juako na ndo ixi xrokonda itsji tjajna Jerusalén, ko imao juao je o sen ícha tituan an, sen tjako chijnie Ncháina ko ntatjan sen nge e tjako a sen je a judío. Jaña nichja ixi tjaun a xrondachro sen xruenxon junta a ixra ko jaña tsikonni ixi naakua naa nge e tjakona.

3 Ko ndo Tito, ndo chrjiki an, je e ndo tjajna griego ndo, juinchekateya i sen ndo ixi xrokua ndo chji e ni judío.

4 Maski kaxin sen ndachro ixi kichuuna sen ko je a nduaxin. Ni me e imao tsijike e na ngakjen en sen kichuuna ixi stesaya na xranchi tajonni juasaya* ngajin ndo Cristo ko ti tjaun na íjngo xrokjanna tsitikaonna ley. Ni me e tjaun na xrokua sen kichuuna chji e ni judío.

5 Ko ninaa nchín kuitikaon ana sinta ana ti ndachro na ixi tjaun ana tsintu enta chijni tajon juachaxin tsechónni kain nchakon.

6 Ko sen ni ngo titaon en sen kichuuna, xro an nge e natjúá juako na sen. Ko jan an kondana i á nduaxin tituan an sen o na i ixi jan an nóa ixi ndo Dio tinche a ndo kaxion chujni ixi á no e o á noe a.

7 Ko sen tituan an, je e sen kuitikaon sen ixi jan an kuetuanna ndo Dio sintakuan an chijni jian ni je a judío, xranchi kaxon ndo Pedro kuituen en ndo sinchekuen en ndo ni judío.

8 Ko ndo Dio xruan an ndo ndo Pedro xranchi apóstol sinchekuen en ndo sen judío, ko je e ndo Dio kaxon xruan anna ndo xranchi apóstol ne e ni je a judío.

9 Méxin, ndo Jacobo, ndo Pedro ko ndo Juan, sen me e tituan an sen kichuuna, kuitikaon sen ixi ndo Dio chjana ndo ijié juachaxin tsjako chijnie ndo. Ko chjana sen itjáa sen ko juinche e sen juaxroxin ixi jan an ko ndo Bernabé itsjina sintakuan anna ni je a judío ko je e sen sinchekuen en sen ni judío.

10 Je o juanchiana sen xrotjáñana ina ixi tsingijna sen nóa, ko me e ícha nta ana, kain nchakon tjingijnana sen nóa.

Ndo Pablo kuyakutee ndo ndo Pedro

11 Ko nchakon kuiji ndo Pedro tjajna Antioquía, jan an kuyakutee ndo ixi je a jian jinche e ndo.

12 Ixi ícha sa ó banekao ndo ikaxin sen kichuuna, sen je a judío, ko nchakon kuiji kaxin sen kichuuna xruan an ndo Jacobo, sen judío, ndo Pedro ó konchjino ndo ko í bajinekao a ndo sen je a judío ixi xrakon en ndo sen kichuuna judío, sen titikaon ixi xrokonda tsaani chji eni.

13 Ko sen kichuuna judío kaxon juinche e sen xranchi ndo Pedro, ko kaxon ndo Bernabé jaña juinche e ndo.

14 Ko nchakon bikon jan an ixi stenche a sen xranchi nchekuainana chijni jian ne e Ncháina, ntatjan ndo Pedro ko stetin en kain sen ni ngo: “Ja a judíoa, ko rinche e xranchi nche e ni je a judío ko kaxon nche a xranchi sen judío. ¿Xranchi tjauan sinchekateya sen je a judío sinche e sen xranchi sen judío?”

Tsechonna siá je o xrochuntiana ngajin Ncháina

15 Jaina xra jungíexonnna judíoa, je a xranchi ikaxin ni tjajna jii ngata a xasintajni, ni je a judío, ni ndako a nche e.

16 *Ko noina ixi chujni jua i tsomé e jíee nã siá tjaun nã sinche e nã kaxin xra xranchi ndachro ley. Na i. Je o tsomé e ijie siá xrochuntiana ndo Jesucristo. Kaxon jaina titika onna ndo Jesucristo, jaña me e tsomé e jíeina ixi chuntiana ndo Jesucristo ko je a ixi sinche ena ixra ndachro ley ixi siá tsitikaonna ley, jua i tsomé e jíee chujni.

17 Siá tjaunna ixi Ndotáina Dio sinchemé e ndo jíeena ixi titika onna ndo Cristo, ko tjume e tikonni ixi chondana ijie. A me e xrondachro ixi ndo Cristo nchekateyana ndo sinche ena ti ndako a. Na i, je a jaña.

18 Siá ó kuintu ena ti tetuan an ley ko tjume e ikjan tsitika onna ley, me e ché nduaxin tsamana ijie.

19 Ko jan an ixi ti tituan an ley ndakuen enna ko jai ley í jua i tsituanna ixi jai tsaríchon ixi juachaxien ndo Dio.

20 Ixi kuen enna xranchi kuen en ndo Cristo nganito ntacru ko jai jan an í tetuan i ngaya aséenna. Na i, jai ndo Cristo tituan an ndo. Ko jai ti nta a, nta a xranchi chujni stechón, ixi chuntia ngajin chjen en ndo Dio, ndo Cristo, ixi je e ndo tjua na ndo ko kutuexin ndo kuen en ndo ixi jan an.

21 Ko jan an jua i xrondachrjan ixi xro an tjintee juachaxien ndo Dio, ko jan an titika on ixi juachaxien ndo Dio bingijnana, ixi siá kondeexin ti tetuan an ley xrokoméexin ijie, me e íxro an tjintee ti kuen en ndo Cristo ixi jaina.

3

Tsitikaonni ley o xrochúntiani ndo Cristo

1 Kichuuna tjajna Gálatas, tsango nintana. ¿Ngisen juintaya anta ixi í tsitikakon anta chijni nduaxin? Jan anna juako ananta jian xranchi kuenxin ndo Cristo nganito ntacru.

2 Tjate enta, ¿á kuayéexinnta Espíritue ndo Dio ixi kuitikaonnta ley tsiketuan an ndo Moisés?, o, ¿á kuaye enta Espiritu ixi kuitikaonnta chijni jian kuin ennta?

3 ¿Sonda tsango nintana? Siá ó kuitikaonnta chijnie ndo Dio ixi juachaxien Espíritue ndo, ¿sonda jai tjaunnta xrochuntianta nge e xraxaon ja anta, a me e sinchemé e ti ndakua i juinche enta?

4 ¿Á xro an junta anta ti tangi kon annta nchakon kuitikaonnta chijni jian ne e ndo Cristo? Xrokonda xraxaonnta ixi je a xruxon.

5 Nchakon ndo Dio kuajon ndo Espíritue ndo ko juinche e ndo itsjé nge e jian bikonta, ¿sonda jaña juinche e ndo? Juinche e ndo ji i, je a ixi tsango kuitikaonnta ley. Na i. Jaña juinche e ndo ixi chuntianta chijni jian kuin ennta.

6 *Ndo Abraham chuntia ndo ndo Dio, méxin ndo Dio ndachro ndo jian ndo Abraham.

7 *Méxin, xrokonda tsono anta ixi sen nduaxin chuntia ndo Dio, sen me e nduaxin chjen en ndo Abraham.

8 Xroon jitaxin chijnie ndo Dio tsichronga ó seno ixi ndo Dio kaxon xrojuinchemé e ndo jíee sen, sen je a judío ixi chuntia sen ndo Dio. Jaña sa ó ndo Dio tsindache ndo ndo Abraham: “Kainxin chujni tjajna tsonchaonxin nã ixi ja a chuntiana.”

⁹ Méxin, kain sen chuntia ndo Dio xraje o tsonchaonxin sen xranchi ndo Abraham ixi chuntia ndo.

¹⁰ Kain sen xraxaon ixi tsoMéxin jíee sen ixi tsitikaon sen ley tsikjin ndo Moisés, sen me e ndo Dio tjankata a ndo sen ijie ixi ndachro xroon chijnie ndo Dio: “Kain ni tsitikaon a kain nge e jitaxin ley, ni me e tsjankata a ndo Dio ijie.”

¹¹ Méxin, ngisen tjaun tsitikaon ley jua i tomé e ti ndako a nche e sen ngajin ndo Dio ixi nduaxin ndachro xroon jitaxin chijnie ndo Dio: “Sen tsontjúá aséen ixi chuntia* sen ndo Dio, sen me e tsechón sen kain nchakon.”

¹² Ko ley ndachro a ixi xrochúntiani ndo Dio. Ndachro xroon chijnie ndo Dio: “Ni titikaon ley ixi ley me e tsechónxin na.”

¹³ Ndo Cristo kuantsjexinna ndo ti xrobikaonxinna kondee ley. Ndo Cristo kuenito na ndo ntacru kondeexin jíeina. Ixi ndachro xroon chijnie ndo Dio: “Ndo Dio tsjankata a ndo ijie kain ni tenito naa ntaa.”

¹⁴ Jaña kon en ixi ti tsindachro ndo Dio, tsonchaon ndo Abraham, ko kaxon tsjacha ni je a judío tsonchaon na ixi je e na kuenxin ndo Cristo Jesús. Ko jaña kaina tsayé ena Espíritue ndo Dio ixi chuntiana ndo ixi jaña tsindachro ndo.

Ley ko nge e ndachro ndo Dio xrokuayé e chujni

¹⁵ Kichuuna, ndachrjan naa nge e xranchi naa chujni. Nchakon naa chujni tsi-jinchekonchjian naa xroon ndachro ngisen tsayé e kain nge e chóna na, ko xroon me e siá chóna firme na, í jua i tsoMé e o tsindoxin.

¹⁶ Méxin, ndo Dio tsindache ndo ndo Abraham ixi tsajon ndo naa nge e tsayé e chujni juachaxin tsachrjenixin ndo. Ko xroon chijnie ndo Dio nichja i ixi kain chujni tsayé e na me e. Na i. Ndachro ixi naa ndo tsachrjenixin ndo Abraham tsayé e juachaxin me e, ko me e, ndo Cristo.

¹⁷ Ti ndachrjan me e: Ndo Dio tsindache ndo ndo Abraham naa nge e nduaxin tsayé e ndo, ko ji i xranchi naa xroon chóna firme ndo Dio. Ko kuatsinga noó ciento ko ikánte nano ko tjume e kujj ley ne e ndo Moisés. Ko ley me e jua i sinchemé e nge e tsindachro ndo Dio ó sa ó ko xrondachro a ixi tjinte a.

¹⁸ *Ko siá xrokuitikaonna ley me e, ixi xrokuajon ndo Dio nge e ndachro ndo, me e í tjinte a nge e tsindachro ndo ó sa ó. Ko ndo Dio tsindache ndo ndo Abraham ixi nduaxin tsayé e ndo naa nge e ixi je e ndo Abraham chuntia ndo ndo Dio ko me e xro an nge e xroxenka na.

¹⁹ Méxin, ¿nge e tsonda ley tsikjin ndo Moisés? Ndo Dio tsikajon ndo ley me e ixi tsonoexin na ti ndako a kuanche e na. Ji in tsochrje en tsija ngisen tsachrjenixin ndo Abraham, naa sen tsikinche e ndo Dio, ko jaña xroxetja ti tsindachro ndo Dio. Ko ley me e tsichronga sen ángel ko ndo Moisés je o tsikjin ndo.

²⁰ Ko xro an ngisen nichjaxin ndo Dio ngajin ndo Abraham ixi ndo Dio je o ndo nichje e ndo ndo Abraham.

Sonda bake e ley

²¹ Ko, ¿á ley tingakuenxin ti nge e ndachro ndo Dio tsajon ndo? Na i. Siá xrobake e naa ley xrokuajon juachaxin tsechónxinni kain nchakon, ko me e xrokoméexin jíeina siá xrokuitikaonna nge e tetuan an ley me e.

²² Ko xroon jitaxin chijnie ndo Dio ndachro ixi ti ndako a nche e chujni me e tituan an ngaya aséen. Ko jaña je o sen chuntia ndo Jesucristo, sen me e tsayé e sen ti ndachro ndo Dio tsajon ndo.

²³ Ko ti xrachonda ina ndo Cristo, ley baketuaina stechuenjana xrokonoxin ti xrochuntiana Ncháina Jesucristo.

* **3:11 chuntia** tener fe **3:18** Ro. 4:14.

²⁴ Ko ley me e baketuaina xranchi naa chujni tetuen en ichjan ti tsija Ncháina Cristo. Ko jaña chuntiana ndo Cristo me e chao tsonchjiñe ena ngajin ndo Dio.

²⁵ Ko jai ó kuij ndo Cristo ko jaina chuntiana ndo, méxin ley ínai a tsetuajina.

²⁶ Méxin jai kainnta chuntianta ndo Jesucristo, jai kainnta ó chjen en ndo Dio ja anta.

²⁷ Ko kainnta ti bikitéexinta nombre ndo Cristo, jai nche enta xranchi nche e je e ndo.

²⁸ Méxin jai, í tjinte a á ni judío o ni je a judío, o á ni nche e ixra o á ni tetuan an o á ni xi o ni nchri. Kainna chjen en ndo Diona íxi naakua ndo Cristo tikinixinna.

²⁹ *Ko ti tikinixin enna ndo Cristo, me e nduaxin tsikachrjenixinna ndo Abraham ko tsayé ena nge e tsindachro ndo Dio tsajon ndo.

4

¹ Ti tja on xrondachrjan me e ji i. Naa chjan nchakon tsikitu e xjan nge e kuachónnda ndotée xjan, xjan me e xranchi naa ni nche e ixra jii xjan, íxi xrachjan xjan, maski nduaxin je e xjan tituen en xjan kain nge e.

² Ste ni tayakon en xjan ko tayakon en na ixra ne e xjan tsitjaja nchakon tsindachro ndotée xjan tsayé e xjan kain nge e tikinixin en xjan.

³ Ko jaña bakon en ngajinna kaxon nchakon xrakuichuxin ana ndo Cristo, jaina batitikaona kain nge e tajon nunte xasintajni.*

⁴ Ko kuitjaja nchakon tsindachro ndo Dio, xruan an ndo Chjen en ndo kuij xjan, jongíexin xjan naa nchri, ko je e xjan kuitikaon xjan kain nge e tituan an ley kuayé e ndo Moisés.

⁵ *Jaña kuij xjan íxi sinchemé e xjan ti ndako a juuntu una íxi baketuaina ley me e. Ko jaña ndo Dio kuayeina ndo xranchi chjen en ndo.

⁶ Méxin, ndo Dio íxi tsjakoxin ndo íxi jaina chjen en ndo, xruan an ndo Espíritue Chjen en ndo, ndo Jesucristo, íxi xrochondana Espiritu ngaya aséeina, ko Espiritu me e tiyexinna ndo: “Ndotána ja anta.”

⁷ Méxin ja anta chjen en ndo Dio, je a naa xi nche e xra tetuan i ko ja anta ó chjen en ndo Dio méxin tikinixin annta tsaye enta kain ti chonda ndo Dio íxi titikaonnta ndo Jesucristo.

Ndo Pablo yaa ndo juachjaon íxi sen titikaon Ncháina

⁸ Ja anta sa ó kuachuxin anta ndo Dio, méxin baktikaonta naa dio je a nduaxin dio.

⁹ Ko jai ó kuichuxinnta ndo Dio, o ícha jian xrondachroni íxi je e ndo chúxinnta ndo. ¿Xranchi íjngo xrokjannta xroxraonnta ti kuanche enta ko me e íjngo tsindoxin ti xraonnta?, me e jaña xrokjannta xranchi naa xi nche e xra tituen en na.

¹⁰ Ja anta xrotjaunnta titikaonnta nchakon ko nchanitjao ko nano ko kiée ngujngu nchakon.

¹¹ Jan an ríaa juachjaon ko rixraxa on íxi ti juuntakuan annta xro an konda.

¹² Kichuuna, nche enta xranchi jan an jian titika on Ncháina íxi jan an jian jui i ngajinnta ko nta a xranchi ja anta ko ti kuanche enta, xro an ti me e juinchenina.

¹³ Ko ja anta ó no anta íxi nchakon ntatjunta chijni tajon juachaxin tsechónni, jan an ríaa naa chin nchakon me e.

¹⁴ Ko ichin kuachonda tsango tangi bake é ko ja anta kuinduna ininta. Na i. Ja anta jian kuiyananinta xranchi xrokuij naa sen ángel ne e ndo Dio o xranchi xrokuij ndo Jesucristo.

¹⁵ Ko jai, ¿no jii ti juaxruxin kuachondanta? Ko chao xrondachrjan íxi nchakon me e ja anta xrokuantsjengínta naa ikonnta ko xrochjánanta.

¹⁶ Ko jai, ¿á ikjanna naa xi ningakon ennta íxi ntatjunta nge e xrondachro chijni jian?

¹⁷ Ni ntakateyánta tsitikaonnta ley íjngo, je e na tsango jian nichja anta na. Ko je a nduaxin me e íxi je e na tjaun na tsantsjendantana, ko tjume e ja anta xrorué enta na.

¹⁸ Ko chao tsiye eni kaxin sen kichuuni siá je o sinche eni ti jian ngajin sen. Ko nduaxin nichje enta sen kichuuna kain nchakon; je a je o nchakon ritjén jan an.

¹⁹ Chjan na, íjngo jinchenína ixi ja anta xranchi naa nchri jinchejongí e chjen en, ko jaña tson en hasta ti jian tsitikaonnta ndo Cristo ngaya asáanta.

²⁰ Jai tuinxin xrojueña o xrobake é ngajinnta ko chaxro xronichja anta, ko jai nóna i nge e ícha xrondachrjan.

Juakoxin ndo Pablo ixi nchri Agar ko jan Sara

²¹ Ja anta ti tjaunnta tsitikaonnta ley chronga ndo Moisés, ndachijininta, ¿nge e ndachro chijnie ndo Dio ixi ndo Abraham?

²² Ko ja in ndachro ixi ndo Abraham kuichónnda ndo yuu chjan. Naa xjan ngajin nchri nchexra ko naa xjan ngajin janchri e ndo.

²³ Chjen en nchri nchexra jongí e xjan xranchi tjongí e kain chjan. Ko chjen en janchri e ndo jongí e xjan ixi jaña xrokon en nge e tsindachro ndo Dio xrokuajon ndo.

²⁴ Chijni ji i tjako ixi yuu nchri tjakoxin yuu chijni tsindachro ndo Dio. Naa chijni konchjianxin ijna Sinaí; chijni me e xrondachro ixi nchri Agar, me e kuachrjenixin sen nche e xra, sen tituan i.

²⁵ Ixi nchri Agar xranchi xrokjui ijna Sinaí jii nunte Arabia ko jna ji i xranchi xrokjui tjajna Jerusalén, ko tjajna me e kain chujni ste nti i ko xrokonda titikaon na ley, je e na ko chjen en na.

²⁶ Ko tjajna Jerusalén jii ngajni ti no tituan i ley, me e tjajnaina.

²⁷ Ko ndachro xroon chijnie ndo Dio:

Take é juaxruxin ja a nchri ti jua i nchejongí e ichjan.

Tuyakua ixi tsango chá a ixi ja a kuichuxin a ti tangi tiín nchri nchejongí e ichjan.

Ixi nchri tsikintu e ndoxi e, ícha itsjé chjen en nchra

ixi nchri chónnda ndoxi e.

²⁸ Kichuuna, jaina stena xranchi ndo Isaac ixi kain jaina chjen en ndo Dio ixi jaña tsindachro ndo tson en.

²⁹ Ko xranchi sa ó chjen en nchri Agar, baningakon en xjan, xjan jongíexin ixi juachaxien Espíritue ndo Dio, xjan ndatin in Isaac, chjen en jan Sara. Ko jaña jiton en jai.

³⁰ Ko ndachro xroon chijnie ndo Dio tsindachro ndo ndo Abraham: “Tengia nchri nche e xra, satsji nchra ko kao chjen en nchra, ixi chjen en nchra jua i tsayé e xjan nge e tkinixin en chjen en jan chónnda ndoxi e.”

³¹ Méxin, kichuuna, jaina je ana xranchi chjen en nchri Agar nche e xra. Na i. Jaina stena xranchi chjen en jan Sara chónnda ndoxi e.

5

Ndo Cristo juinchemé e ndo ti ndako a juinche enta

¹ Ndo Cristo juinchemé e ndo ti ndako a juinche ena ko jai ley í jua i tetuaina. Méxin, jian titikaonnta ndo Cristo ko tintue anta ixi ley tsetuan annta íjngo.

² Tin ennta, jan an Pablo, ndachrjan ixi siá xrokuaanta chji e ni judío, me e íxro an xrokuite ti tsitikaonnta ndo Cristo.

³ Tja on xrondachrjan íjngo ixi siá xrojan chujni tsa chji e ni judío, ni me e xrokonda tsitikaon na kaxon kain nge e tituan an ley kuayé e ndo Moisés.

⁴ Ko ja anta ti xra xraxaonnta ixi siá titikaonnta ley me e tsoMéxin jíanta, ja anta xranchi ó xrokuintu enta ndo Cristo ko ti tjua anta ndo Dio.

⁵ Ko jaina ixi juasie Espíritue ndo Dio ko ti chuntiana ndo, me e, noina ixi tsechónna kain nchakon* ixi ó komé e jéina.

* 5:5 tsechónna kain nchakon vida eterna

⁶ Ko siá jaina chuntiana ndo Jesucristo, í tjin̄te a siá chondana o chonda ina chji e ni judío. Ko ti ícha tjin̄tee, me e ti xrochuntiana Ncháina Jesucristo, ko ti chuntiana me e tsingijnana tsinteena jian ko xrotjue e kichuuna.

⁷ Ja anta ó jian stetitikaonnta. Ko jai, ¿ngisen juintakateyanta ixi ísitikaon anta chijni nduaxin?

⁸ Ji í je a nge e tjaun ndo Dio, ixi je e ndo kuiya anta ndo.

⁹ *Jian xraxaonnta ixi naa nchichjaon ti nchetja in chu u, me e nchetja in kain chu u.

¹⁰ Jan an chuntia ixi Ncháina tsingijnanta ixi tsindoxin anta nge e xraxaonnta. Ko ndo Dio tsjankata a ndo ijie ngajin ngixe i ni ntekateyanta tsitikaon anta jian.

¹¹ Kichuuna, siá jan an xrondachrjan ixi xrokonda xrokuaanta chji e ni judío, ni judío xroningakona ina na. Ko kaxon xroningakuen a na chijni jian juako anta chronga xranchi kuen en ndo Cristo nganito ntacru.

¹² Ko ni ntakateyanta tsaanta chji e ni judío, cháña je e na naa xrochrijinxón nchijí ne e na.

¹³ Ja anta kichuuna, ndo Dio kuincha anta ndo ixi ítsama inta ijie. Méxin, nchekateya i asáanta siche enta ti ña i. Cháña tingijnanta ko tjue enta sen kichuunta.

¹⁴ Ixi kain ti tituan an ley, me e xrondachro naakua nge e tsitikaonnta: “Xrotjue enta sen kichuunta xranchi tjue enta asáanta.”

¹⁵ Ko siá ja anta to in kichuunta ko ningakon en kichuunta, jian xraxaonnta ixi basinchetjáña ngujngu asáanta.

Xranchi titikaonni Espíritue ndo Dio

¹⁶ Jan an ntatjunta ji i: Nche enta xranchi tjaun Espíritue ndo Dio, ko jaña tsitikaon anta nge e tjaun cuerpoanta ko sinche anta ti ña i.

¹⁷ *Ixi nge e ña i tjaun cuerpoanta sinche e, tətoka o Espíritue ndo Dio, ko nge e tjaun Espíritue ndo Dio sinche enta tətoka o nge e ña i xraxaonnta. Ko kayui, me e tintekę to kichuu. Méxin, ja anta jua i nche enta nge e ti jian.

¹⁸ Ko siá tsitikaonnta ti nge e tjaun Espíritue ndo Dio, ítsetuan i ley ngajinnta.

¹⁹ Tuinxin tikonni kain nge e ña i nche e chujni: ti tjaun na xrochónda na inaa nchri o inaa xi ti je a tsikute e na, ko ti sinche e na ti ña i, ko xraxaon na ti ndako a,

²⁰ ko ti chónde e na juasaya ídolo, ko itji na ngajin ni tuso, ko ningakon en na inaa chujni, ko tochjio na, ko tuinxin toñaao na, ko tjaun na je o na xrochónda na itsjé nge e, ko nchekateya kichuu na ixi tsachrjendaa na,

²¹ ko chjuye e na, ko ni naatóñaxón kichuu, ko ni kuan, ko ni tsango xengo, ko ikaxin nge e nche e na. Ko ó sa ó ndachrjan ko jai íjngo ntatjunta ixi ngisen jaña nche e, sen me e tsayé a sen juachaxin tsake e sen ti no tetuan an ndo Dio.

²² Ko Espíritue ndo Dio tajon ixi xrotjue e kichuuna, ko juaxruxin tsojuna, ko tseto ana, ko taka i xrochjaina juañaao, ko jian nichje e kichuuna, ko tjaunna tsingijnana inaa chujni ko nche ena kain nge e ndachrona,

²³ ko nchejié a aséeina, ko jian tsetuen en aséeina sinche ana ti ndako a. Siá sinche ena jaña, xro an ijie tsamana.

²⁴ Ixi ngisen ó tikinixin en Ncháina Cristo, í jua i sinche e sen nge e ndachro cuerpoe sen ko kain nge e ti ndako a xraxaon sen.

²⁵ Ixi siá sinche ena nge e tjaun Espíritue ndo Dio, xrokonda tsintu ena ixi Espíritue ndo Dio tsitauina nti a.

²⁶ Xrokonda sinchejié a aséeina ko sincheñaao a kichuuna ko tsochjuye ana ngajin kaxin sen kichuuna.

6

Tingijna kichuunta

¹ Kichuuna, siá tsikonta xrojan ngisen ndako a jinche e, ja anta ti chondanta Espíritue ndo Dio, xrokonda tsingijnanta sen ko jian nichje enta sen ixi í sinche a sen ti ndako a. Ko tsje enta jian xranchi nche e ja anta, nchéxin ja anta sinche enta ti ndako a kaxon.

² Tingijna kichuunta nchakon chondanta xrojan juachjaon, ko jaña tsitikaonnta ti tetuan an ndo Cristo.

³ Ko siá xrojan ngisen ndachro ixi je e sen tsango no e sen ko nduaxin a, sen me e je o sen jincheye e aséen sen.

⁴ Ngujngu ngisen xrokonda sa ó xrotsje e sen á jian jinche e sen. Ko siá nduaxin chao jinche e sen, me e chao xroché e sen ixi no e sen ixi jian jinche e sen, ko xrotsje a sen xranchi nche e inaa chujni.

⁵ Ixi ngujngu sen xrokonda sinche e sen nge e tikinixin en sen.

⁶ Ngisen jitangi chijni jian, xrokonda tsingijna sen ngisen juinchekuen en sen, ko tsajon sen nge e jian chóna sen.

⁷ Ja anta ncheye anta asáanta ixi xro an ngisen ncheye e ndo Dio ixi ti tenga chujni, me e tsandáa sen.

⁸ Ixi siá tenga sen nge e ña i xraxaon aséen sen, kaxon tsandáa sen nge e ti ña i kuenga sen, ko me e tsenxin sen. Ko sen tenga nge e tjaun Espíritue ndo Dio, tsandáa sen nge e tajon Espíritue ndo, me e tsehón sen kain nchakon.

⁹ Méxin, xrokonda tsonchrjen ana sinche ena nge e jian, ko siá nduaxin sinche ena jaña, tsjachana tsayé ena nge e jian.

¹⁰ Méxin xrokonda ngujngu nchakon tsingijnana kain chujni ko ícha jian tsingijnana sen kichuuna, sen chuntia Ncháina Jesucristo.

Ndo Pablo juexin nichja ndo

¹¹ Tsje enta ixi tsango ijié letra rikjianxinnta tjáana.

¹² Ko ni ntakateyanta ixi tsaanta chji e ni judío, ni me e je o tjaun na ixi xrondachro chujni ixi jian nche e na ko tjaun a na tangi tson en na kondeexin ti ntacru kuenito ndo Jesucristo.

¹³ Ko ni tsikaa chji e, je e na nche a na kain nge e tituan an ley. Ko je e na tjaun na tsaanta chji e ni judío ixi me e sinchejiéxin aséen na ixi juacha na juinchekateyanta na tsaanta chji e.

¹⁴ Ko jan an ninaa nge e tjaun a sintajiéxin aséenna. Jan an je o tja on sintajié aséenna ixi ndo Cristo kuenxin ndo ixi jan an nganito ntacru. Ko ixi je e ndo kuen en ndo ti ntacru, méxin, jan an í xro an nge e tja on kondee nunte xasintajni ixi jan an kaxon xranchi ó xrokuen enna.

¹⁵ Ko siá titika onna ndo Jesucristo, í xro an tjintee á yaana chji e o na i. Ti ícha tjintee, jaina chujni natjúána.

¹⁶ Ko kain sen nche e jaña tsayé e sen juaxruxin ko ndo Dio tsikonóe e ndo sen.

¹⁷ Ko jai tjaun a ixi xrojan ngisen sincheni e aséenna ixi jan an ó tsikoni e cuerpona me e chronga ixi jan an nta a xrée Ncháina Jesucristo.

¹⁸ Kichuuna, Ncháina Jesucristo sintanchaonnta ndo kainnta. Jaña tson en.

Xroon tsikjin ndo Pablo xruen en ndo sen ste tjajna Éfeso

Ndo Pablo ikjin ndo xroon kuayé e sen ni ngo tjajna Éfeso

¹ *Jan an, Pablo, apóstol tikinixinna ndo Jesucristo ixi jaña jueñaño ndo Dio kjin annta ja anta titikaonnta ndo Dio ko titikaonnta Ncháina Jesucristo, ja anta ti stenta ni ngo tjajna Éfeso.

² Ndotáina Dio ko Ncháina Jesucristo sintanchaonnta ndo ko tsajon ndo juaxruxin ngajinnta.

Tsayé ena nge e jian kondee ndo Cristo

³ Tajonna juasaya ngajin ndo Dio, Ndotée Ncháina Jesucristo, ixi je e ndo juinche e ndo ixi titika onna Ncháina Jesucristo ko kuajon ndo kain nge e jian kui x̄in ngajní.

⁴ Ndo Dio kuinchajina ndo ixi tsitikaonna ndo Cristo ti xrako a nunte xasintajni ko juinchemé e ndo ijiē kuachondana ko kontjúá aséeina ixi jaña chao tsake ena ngajin je e ndo.

⁵ Tsango tjuajina ndo Dio, méxin kuinchajina ndo me e xrokjanna chjen en ndo ixi titika onna ndo Jesucristo, ko jaña jueñaño ndo Dio.

⁶ Méxin kain nchakon tsajonna juasaya ngajin ndo Dio ixi ijié juachaxin kuajon ndo ti juinchenchaonna ndo ixi tsitikaonna chjen en ndo, xjan tsango tjue e ndo.

⁷ *Ndo Dio tsango tjuajina ndo, méxin, kuajon ndo Chjen en ndo, ndo Jesucristo kuen en ndo, ko jaña juenga ndo n̄a ti sinkana.

⁸ Ndo Dio tsango tjuajina ndo méxin kuajon ndo juachaxin tsienxinna ko tsonoina kain nge e jian.

⁹ Ko jai juinchenoina ndo nge e je o je e ndo kuano e ndo, nge e tsixraxaon ndo ó sa ó ixi xrokonoxin ndo Cristo.

¹⁰ Ko kain nge e ti tsixraxaon ndo me e tson en tsitjaja nchakon tsindachro ndo. Ko nchakon me e ndo Dio tsajon ndo juachaxin ixi ndo Jesucristo tsetuen en ndo kain nge e jii ngajní ko nge e jii nunte nti i.

¹¹ Ixi nduaxin titika onna ngajin ndo Cristo, ndo Dio ó sa ó kuinchajina ndo ixi tsayé ena nge e tsajon ndo. Kain ji i jaña tson en xranchi xraxaon ndo Dio.

¹² Jaña juinche e ndo ixi kain jaina ti sa ó kuitikaonna ndo Cristo, tsajonna juasaya ngajin ndo Dio ixi ijié juachaxin chónnda ndo.

¹³ Ko kaxon ja anta, ti ó kuin ennta chijni jian, chijni me e juinchemé e jíanta, me e kuitikaonnta ndo Cristo, méxin ikjannta sen tikinixin en ndo Dio ixi kuaye enta Espíritue ndo ko jaña kon en xranchi tsindachro ndo.

¹⁴ Ti kuaye ena Espíritue ndo Dio, me e nduaxin noina ixi tsayé ena kain ti ndachro ndo tsajon ndo nchakon naa tsantsjexon ndo kain ti ndako a ngajin sen tikinixin en ndo. Méxin, je o je e ndo tsayé e ndo juasaya ixi ijié juachaxin chónnda ndo.

Ndo Pablo tjanchia ndo ixi sen titikaon Ncháina

¹⁵ Méxin, ó kuin an ixi ja anta tsango chuntianta Ncháina Jesús ko tsango tjue enta kain sen titikaon ndo Dio

¹⁶ ko jan an kain nchakon nichja a ndo Dio ixi ja anta ko tajon juasaya ngajin ndo.

¹⁷ Kuinóatána ngajin ndo Dio, Ndotée Ncháina Jesucristo, Ndotáina tsango chónnda ndo kain juachaxin, ixi Espíritue ndo sintanchaonnta ixi jaña tsienxinnta jian chijnie ndo ko ícha xrochuntianta ndo.

¹⁸ Méxin, tjánchá a ndo Dio ixi jian xroxraonnta ixi jaña xrochon éntta ti ndachro ndo tsajon ndo ixi kuincha anta ndo ixi tsango tjintee nge e sinchekiton en ndo sen tikinixin en ndo.

¹⁹ Ko kaxon tja on tsono anta ixi juachaxien ndo tsango ijié ko me e jua i tsjexin. Juachaxin me e nche e ixra ngaya aséeina ixi jaina titika onna ndo. Ji i xraje o juachaxin juako ndo Dio

²⁰ nchakon juinhexechón ndo ndo Cristo. Tjume e kuajon ndo juachaxin tsake e ndo Cristo ndatsjonxin jian ti jii je e ndo Dio ngajní.

²¹ Ko kuayé e ndo juachaxin tsetuen en ndo kain nge e ko kain juachaxin jii ngajní ko nunte xasintajni jai ko kain nchakon.

²² *Ndo Dio kuajon ndo juachaxin ixi ndo Cristo tsetuen en ndo kain nge e jii, ko kuajon ndo juachaxin ixi ndo Cristo xranchi xrokjui jáa ni ngo tsetuen en ndo kain sen tikinixin en ningue ndo.

²³ Ixi ni ngo me e cuerpoe ndo Cristo, ko je o je e ndo tetuen en ndo kain nge e ko kain nge e tikinixin en ndo.

2

Kuayena juachaxien ndo Dio ixi tsechónna

¹ *Ndo Dio kuajon ndo juachaxin tsarichonnta nchakon ja anta bake enta xranchi tsiken ennta ixi kuanche enta ti ña i ko ti ndako a.

² Ko sa ó jaña kuanche enta ixi kuarue enta ti kuanche e chujni ña i jii ngata a xasintajni ko baktikaonta Xixron anxrée, ichrji ngataon chrinto, xi tetuen en ikaxin espíritu ña i nchekateya chujni titikaon a ndo Dio.

³ Ko kain jaina sa ó jaña kuanche ena, ko ti ndako a nche e juaxruxin cuerpojna me e kuanche ena. Ti ndako a nche ena ko ti ndako a xraxaonna me e baktikaona, méxin jaina tikinixinna ijié juachjaon tsaana xranchi ni chúxin a ndo Dio.

⁴ Ko kuen a jaña ixi Ndo Dio tsango bikonóa ina ndo ko tsango tjuaina ndo.

⁵ Ko maski jaina ndatsiken enna kondeexin ti ndako a juinche ena, je e ndo Dio juinhexechónna ndo nganii ndo Cristo ko me e kon en ixi juasie ndo Dio, me e komé e jieina.

⁶ Ndo Dio juinhexechónna ndo nganii ndo Cristo Jesús ko jaña bake ena ndo ti jii ndo Cristo ngajní.

⁷ Jaña juako ndo ixi tsango tjuaina ndo jai ko kain nano tsii ko bingijnana ndo ixi titika onna ndo Cristo Jesús.

⁸ Ixi juasie ndo Dio juinhekitojna ndo ti tsechónna kain nchakon* ixi chuntiana ndo Cristo. Je a ixi xrojan nge e jian juinche ena. Na i. Juasie ndo Dio ixi je e ndo juinhekitojna ndo juachaxin ji i.

⁹ Je a ixi naa nge e jian juinche ena nti i, ko jua i sinchejié aséeina.

¹⁰ Ndo Dio juinchéñana ndo ixi sinche ena ti jian ixi titika onna ndo Jesús, jaña kon en ixi jaña tsixraon ndo ó sa ó.

Juaxruxin tsinteena ixi titika onna ndo Cristo

¹¹ Méxin, xraxaonnta xranchi bake enta sa ó. Ja anta je a chujni judíonta, ko ni judío bakaa na chji e na ko ndachro na ixi ja anta je a chjen en ndo Dio ixi baka inta chji e na.

¹² Sa ó ja anta kuachuxin anta ndo Cristo ko kuajento anta ni tjajna Israel ko kuachuxin anta ti ley tsiketuan an ndo Dio ko ti ndachro ndo tsajon ndo tsayé e chujni. Ko jaña bake enta ngata a nunte xasintajni ko kuachuxin anta ndo Dio, méxin jua i chon éntta nge e tsajon ndo.

¹³ Ko jai steniinta ndo Jesucristo ixi ja anta sa ó bake enta ikjín ixi kuachuxin anta ndo Dio. Ko jai ixi kuen en ndo Cristo Jesús, me e chao konchjiñe enta ngajin ndo Dio.

¹⁴ Ndo Cristo chjajna ndo juaxruxin ixi sen judío ko chujni je a judío ikjan sen naakua tjajna ko jai ndo Cristo kuantsje ndo juañao kuachóna sen, ixi me e xranchi naa tjatu o bakingakon en.

¹⁵ *Ndo Cristo, ti kuen en ndo, me e juinchejexin ndo ti baketuan an ley xranchi xrokuunteena. Ko ti yuu tjajna juinchéña ndo naakua tjajna natjúá tikinixin en je e ndo ko jaña bake e ndo juaxruxin.

¹⁶ *Ixi kuenxin ndo Cristo nganito ntacru, me e juinchejexin ndo juañao kuachóna yui tjajna, ko bake e ndo juaxruxin ngajin je e sen ko ndo Dio ko jaña yui tjajna kóna xranchi xrokui naakua chujni.

¹⁷ Ndo Cristo kuij ndo ko chronga ndo chijni tajon juaxruxin ngajin ja anta ti xrachuxin anta ndo Dio, ko sen judío, sen ste tjenka ndo.

¹⁸ Ko ixi juachaxien ndo Cristo, kainna, sen judío o sen je a judío, chao tsonchjiñe ena ngajin Ndotáina Dio ixi xraje o Espíritue ndo kuaye ena.

¹⁹ Méxin, ja anta í je a chujni tsiki xín tjajna jii ikjín. Ko jai kainna ikjanna chujni ste naa tjajna tjúá tikinixin en ndo Dio.

²⁰ Ja anta stenta xranchi naa nchia tsango ijié jita a naa ixro ijié ti tsikake e sen apóstol ko sen kuachronga chijnie ndo Dio ó sa ó. Ko Ncháina† Jesucristo, je e ndo nduaxin ixro ícha tjintee kónaxin nchia me e.

²¹ Ko Ncháina Cristo je e ndo nchesoji nchijí nchia, jaña chao ícha tsajin in nchia xranchi naa ni ngo tjúá tikinixin en Ncháina Jesucristo.

²² Jaña ja anta kaxon ti titikaonnta ndo Cristo, kaxon chao tikinixin anta tsoñanta nchia me e, ko ngaxin in nchia me e tsake e Espíritue ndo Dio.

3

Ndo Pablo kuayé e ndo ixra tsjako ndo ngajin ni je a judío

¹ Jan an rixin in ndo achjiso kondeexin tjako chijnie ndo Cristo Jesús ixi jaña jian tsitikaonnta ndo maski je a judío ja anta, ko ritinoatána ngajin ndo Dio ixi ja anta.

² Ko ja anta ó jian xrokono anta ixi juasie ndo Dio kuajon ndo ixra kuayá a ixi sintakuan annta ixi jian tsake enta.

³ Ndo Dio juinchenóna ndo ti xra xro an ngisen no e; me e ó sa ó kjin annta naa nchíin.

⁴ *Ko siá xrotsje enta xroon ji i, tsono anta xranchi jan an ó kuianxin nge e tjauñ ndo Cristo, ti xro an ngisen kuano e.

⁵ Ndo Dio xruan an ngisen juincheno e ndo chijni ji i, sen kuintee ó sa ó. Ko jai ixi juachaxien Espíritue ndo, ndo Dio juincheno e ndo sen apóstol ko sen profeta, sen tjúá aséen.

⁶ Ko sen je a judío ko sen judío xraje o tsayé e sen nge e tsindachro ndo Dio ko jaña tsóña sen xranchi xrokjui naakua cuerpo, ko kaxon tsikinixin en sen tsayé e sen kain nge e tsindachro ndo Dio tsajon ndo ixi tsitikaon sen chijni jian ne e ndo Cristo Jesús.

⁷ Ko maski jan an tikinixinna i, kuayá a ixra ji in ixi juasie ndo Dio ixi tsango ijié juachaxin chóna ndo.

⁸ Ko jan an tjinte ana xranchi ikaxin sen kuinche e Ncháina ko juasie ndo Dio chjána ndo ixra sinta a ixi sintakuan an ni je a judío chijni jian ne e ndo Jesucristo, ko chijni me e ícha tjintee ixi ikaxin nge e.

⁹ Ko kuetuanna ndo sintano a kain chujni ti sa ó xro an ngisen kuano e ti tsixraxaon ndo Dio, ndo juinchekonchjian kain nge e jii nunte xasintajni.

¹⁰ Ko jai sen ni ngo xrokonda tsjako sen ngajin sen ángel ko sen tituan an ste ngajní ixi ndo Dio tsango no e ndo kainxin nge e.

¹¹ Ko Ncháina Jesucristo juinche e ndo kain nge e tsindachro ndo Dio ti xrangíxixión kain nge e.

¹² Juasie ndo Cristo kuajon ndo juachaxin chao tsonchjiñe ena ngajin ndo Dio ko xroxronka i ixi jaína chuntiana ndo.

¹³ Méxin, tinóatáana tsonchrjen anta tsitikaonnta Ncháina Jesucristo maski kuin ennta ixi ngaxin in nduachjiso ritjén, ko ja anta ícha sinchesoji asáanta.

Ndo Cristo tsango tjuajina ndo

¹⁴ Méxin, jan an take exin ntatuchi in ngajin Ndotée Ncháina Jesucristo,

¹⁵ ndo juinchéña kain nge e jii ngajní ko nunte xasintajni* ko je e ndo tikinixin en ndo kain chujni.

¹⁶ Tjánchá a Ndotáina Dio, ndo chóna kain juachaxin ko ti tjintee, ixi Espíritue ndo xrotjáaxinnta ndo juachaxin ko sinchesoji ndo asáanta.

¹⁷ Ko ixi chuntia Ncháina Cristo, me e tsake e ndo ngaya asáanta ko jaña tsango soji titikaonnta ndo, ko tsango xrotjue enta kain chujni.

¹⁸ Ko jaña ja anta ko kain sen kichuunta, sen tjúa aséen, tsienxinnta xranchi tsango ijié ko iton, noi ko yaso e ti tjuajina ndo Cristo.

¹⁹ Tjánchá a ndo Dio ixi ja anta ícha tsichuxinnta ti tsango ijié tjuajina ndo Dio, ko ji i jua i tsienxin chujni. Jaña xrochondana kain juachaxin tsajon ndo Dio.

²⁰ Ndo Dio chóna ndo kain juachaxin, ko je e ndo tsajon ndo nge e tsjanche ena ndo ko ícha ixi juachaxien ndo nche e ixra ngaya aséeina.

²¹ Sen tikinixin en ningue ndo Cristo xrokonda tsajon sen juasaya ngajin ndo Dio kain nchakon. Jaña tson en.

4

Kainna steku u kichuuna ixi Espíritue ndo Dio

¹ Ritjén nti i ngaxin in ndo achjiso kondeexin ixra ne e Ncháina Jesucristo, méxin tinóatáana ngajinnta ixi nduaxin tsitikaonnta xranchi tjaun ndo Dio, xranchi xrokonda xrojuinche e kain sen kuinche e ndo ixi jaña tikinixin sinche enta.

² *Nchejié anta asáanta ko jian nichje é kichuunta ko tətə a ngajin sen kichuunta; tingijna kichuunta, me e nduaxin xrotjue é kichuunta.

³ Nduaxin jian tinteku u kichuunta ko jaña tsitikaonnta Ncháina Jesús ixi Espíritue ndo Dio tsajon juaxruxin tsake enta.

⁴ Jii naakua ni ngo ko naakua Espíritue ndo Dio, naakua nge e tsechónxinni kain nchakon jaña tjaun ndo Dio.

⁵ Jii naakua Ncháina ko naakua nge e chuntiana ko naakua nombre tsiki texin chujni.

⁶ Ko jii naakua ndo Dio, Ndotée kain chujni. Je e ndo tayakon en ndo kain nge e ko tetuen en ndo kain nge e ko kain chujni ko je e ndo jii ndo ngajin kain chujni.

⁷ Ko ngujnguna chjajina ndo Cristo juachaxin sinche ena xra xranchi je e ndo tjaun ndo.

⁸ Jaña jitaxin xroon chijnie ndo Dio:
Nchakon kuajin in ndo ngajní sabikao ndo ni jichroá
ko kuajon ndo juachaxin ngixe e ixra sinche e chujni.

⁹ ¿Ko nge e xrondachro ixi kuajin in ndo? Xrondachro sa ó je e ndo xingajin ndo ti ícha yaso e.

¹⁰ Ko ndo xingajinxin ngajní xraje o je e ndo bajin in ndo íjngo ti ícha noi ngajní ixi je e ndo tsetuen en ndo kain nge e jii.

* 3:15 xasintajni mundo 4:2 Col. 3:12, 13.

11 Je e ndo kuajon ndo juachaxin ngajin kaxin sen sinche e xra apóstol ko kaxin sen xrochronga nge e tjaun ndo Dio, ko kaxin sen xrochronga sen chijni natjúá ne e ndo Jesucristo ko kaxin sen pastor tsendáa ningue ndo ko ikaxin sen tsjako sen chijnie ndo.

12 Jaña kuinche e ndo sen sinche e ixra, ixi jaña ícha sinchekangi sen ko tsosoji ningue ndo Cristo.

13 Ko jaña kainna naakua xrochuntiana Chjen en ndo Dio ko xrochuxinna ndo ícha jian ixi jaña xrokjanna naa chjen en ndo ixi ícha chuntiana ndo ko jaña xrochondana juachaxin xranchi ndo Cristo ícha ijié juachaxin chónnda ndo.

14 Ko jaña jaina ísinche ana xranchi xjan nchínchín, xjan jaiko tindoxin nge e xraxaon xranchi chrinto itji nango ko nango, ko méxin titikaon xjan nge e tjako ikaxin chujni ña i ncheye e na xjan ko jaña taxi titikaon xjan kaxin chijni ndako a jii.

15 Cháña chaxro xrotjue e kichuuna ko xronichjana kain nge e nduaxin, me e jaña sintu una xranchi tjaun ndo Cristo ixi je e ndo nduaxin tetuan an ndo nchijí ningue ndo.

16 *Ko nduaxin Ndo Cristo tingijnana ndo naxraje o xroxraxaonna ko jaña ícha tsosoji ko tsangi ningue ndo ixi ícha xrotjue e kichuuna.

Ícha tsontjúá aséjina ixi chuntiana ndo Cristo

17 Ko ixi juachaxien Ncháina Jesucristo tetuan annta í nche anta xranchi nche e ni chúxin a ndo Dio ixi ni me e ndako a xraxaon na.

18 Ni me e ndako naxixe e ichrji na ixi chúxin a na juachaxin tajon ndo Dio ti tsechónni kain nchakon ixi tsijinchecha aséen na méxin tienxin a na.

19 Je e na ítosue a na ko je o tjaun na sinche e na kain nge e ña i ko juaxruxin take e na sinche e na kain ti ndako a.

20 Ko ja anta je a ji i kuitjanta ixi chijnie ndo Cristo,

21 siá nduaxin kuin ennta chijnie ndo ko kuanginta nge e jian juako ndo.

22 *Méxin tintu enta kain nge e ndako a kuanche enta sa ó ixi me e naa nge e ña i juintaya anta.

23 Méxin ja anta xrokonda tsindoxinnta ti xraxaonnta ko tsontjúá kain nge e jii गया asáanta.

24 *Ko nche enta xranchi naa chujni natjúá juinchéña ndo Dio, naa chujni jian ko nduaxin tjúá aséen.

25 Méxin íncheye a kichuunta. Kainnta ti nduaxin ndache kichuunta ixi kainna naakua cuerpoe Ncháina tikinixianna.

26 Siá tsoñao e kichuunta, tama anta ijié ixi me e, ko ti koñaonta tsonchrjen a nguixin nchakon

27 ko chje anta juachaxin ixi Xixron anxrée tsetuen enni xa asáanta.

28 Ko ngisen sa ó bakee, í sinche a sen jaña. Cháña itja sen sinche exin sen ixra ixi jaña xrochónnda sen nge e tsingijnaxin sen xrojan chujni nóa.

29 Tenga inta teka. Cháña xronichjanta nge e jian ixi me e tsingijna kain sen jitin en.

30 Ncheníe anta Espíritue ndo Dio ixi Espíritu kuayé eni tjakoxin ixi ja anta tikinixi ennta ndo ko nchakon tsii ndo tsaye enta juachaxin tsarichonnta kain nchakon.

31 Tantsjenta kain juañao jii गया asáanta ko ti tuyakuté kichuunta ko ti nich-jangí enta kichuunta ko í xraxaon anta ti ña i.

32 *Cháña jian nichje enta kichuunta ko tikonóe énta kichuunta ko tjáña anta xrojan nge e ndako a juincheko kichuunta, ixi jaña kaxon ndo Dio tjáñe e ndo ijié juinche enta ixi Chjen en ndo kuenxin xjan ixi ijié kuachónnda kain chujni.

5

Jian tinteenta xranchi ngisen ichrji ti tingasáña xro i

¹ Ja anta ó ikjannta chjen en ndo Dio ko je e ndo tjua anta ndo. Méxin, nche enta xranchi nche e je e ndo.

² Ko tjue enta kichuunta xranchi ndo Cristo tjuajna ndo ko je e ndo kuenxin ndo ixi jjeina, ko juinchekao na ndo xranchi naa kutuchjon naakóñaxón na ko nchechján na ko ti chaxro xraxe ba me e tayé e ndo Dio.

³ Ja anta ó tikinixin enta ndo Dio, méxin í xro an nge e ña i xroxraxaonnta o xronichjanta ixi ngixe i naa nchri o naa xi ixi kain ji i ije ko xro an nge e ña i xroxraxaonnta ko í tjiakuenxin anta ícha itsjé nge e xrochondanta.

⁴ Ko xro an chijni ndako a xrokuachrxjin ro anta ko nichja inta ti ninta, ko teki anta chijni ndako a ixi ji i íxrokonda i xronichja ja anta. Cháña tájonnta juasianta ngajin ndo Dio.

⁵ Ja anta ó no anta ixi ngisen tsejuakao naa nchri je a janchri e o naa xi je a ndoxi e ko ngisen nche e nge e ña i ko ngisen tjiakuenxin xrochóna itsjé nge e, ji i xrokjui xranchi xrokuitikaon na naa ídolo, ko ni nche e kain me e tikinixien a na tixin in na ti tetuan an ndo Cristo ko ndo Dio.

⁶ Méxin, tintue anta ixi xrojan ngisen sintaya anta ixi chijni ninta nichja na ixi kondeexin me e tsoñao ndo Dio, méxin tsjankata a ndo ije ngajin na ixi titikaon a na ndo.

⁷ Ko tjento anta chujni jaña nche e.

⁸ Ja anta sa ó bakajinta ti naxixe e. Ko jai stenta ti tingasáña ixi titikaonnta Ncháina Jesucristo. Méxin, tjakonta ixi nduaxin stenta ti tingasáña.

⁹ Ixi xro i tingasáña tsingijnana nche ena ti jian ngajin chujni ko xronichjana ti nduaxin.

¹⁰ Méxin, nduaxin tanginta sinche enta nge e tjaun Ncháina.

¹¹ Ko tjento anta ti ña i nche e ni titikaon a ndo Dio, ni ste ti naxixe e. Cháña ndachenta na ixi ndakua i stenche e na,

¹² ixi tosue eni tekini nge e imao nche e ni ña i.

¹³ Kain nge e ndako a tsonoxixin ixi xro i tsingasáña ixi kondeexin xro i chao tsono eni á jian o na i.

¹⁴ Méxin, ja in tsikjin sen:

Xingama anta ja anta ti xrastechrinnta;
tayanta ja anta ti stenta ngakjen en ni tsiken en
ixi je e ndo Cristo xranchi xro i tsingasáña anta.

¹⁵ Tsje enta jian xranchi tajinta; nche anta xranchi chujni ninta; xraxaonnta jian. Nche enta xranchi naa ngisen jian no e nge e nche e.

¹⁶ *Méxin, chjakon annta ixi sinche enta xranchi tjaun Ncháina Jesucristo ixi nchakon stetjina jai steton en itsjé nge e ña i.

¹⁷ Méxin, nche anta xranchi nche e chujni ninta. Ja anta tjéenta ixi tsienxinnta nge e tjaun Ncháina.

¹⁸ Ko kuan inta, ixi ixran sinchetjáñanta ko tsonoa inta nge e nche enta. Cháña tájonnta juachaxin ixi Espíritue ndo Dio tsetuan an asáanta.

¹⁹ *Ko tsjoxin kichuunta ixi salmo ko himno, ko ja in sinche enta ixi nchijí asáanta ko tsajonnta juasaya ngajin Ncháina Jesucristo.

²⁰ Kainxin nchakon tsajonnta juasaya ngajin Ndotáina Dio ixi juachaxien Ncháina Jesucristo kuaye enta kain nge e.

Jian tingijna kichuunta ixi titikaonnta Ncháina

²¹ Xrokuitikaon kichuunta ixi ó titikaonnta Ncháina Jesucristo.

²² *Méxin, nchri ó tsikute e xrokuitikaon nchra ndoxi e nchra xranchi xrokuitikaon nchra Ncháina.

²³ Ko chujni xi chónnda janchri e chónnda xa juachaxin tsetuan an xa xranchi ndo Cristo tituen en ndo ni ngo, ixi je e ndo jaa ni ngo, ko je e ndo tajon ndo juachaxin tsechónni kain nchakon. Jaña ndo Cristo kuenxin ndo ixi sen ni ngo, ixi sen ni ngo cuerpoe ndo.

²⁴ Méxin, xranchi sen ni ngo titikaon sen ndo Cristo, jaña kaxon sen nchri, sen tsikute e, xrokuitikaon sen ndoxi e sen nge e tsetuan an ndo.

²⁵ *Ko sen xi xrotjue e sen janchri e sen xranchi ndo Cristo tjue e ndo sen ningue ndo ko kuenxin ndo ixi je e sen.

²⁶ Ko kuen en ndo ixi juinchetjúá ndo ningue ndo, me e jaña juinchetjúá ndo aséen sen ningue ndo ixi chijnie ndo ko inda bikitéexin sen.

²⁷ Ko jaña tsikon ndo ningue ndo tsango tjúá ko tsango chaxro ko xro an kitja xrochónnda ko tikinixin en je e ndo.

²⁸ Jaña kaxon sen chónnda janchri e xrokonda xrotjue e sen jan xranchi tjue e sen aséen sen ixi sen tjue e janchri e, je e sen kaxon tjue e sen aséen sen.

²⁹ Ixi xro an ngisen ningakon en cuerpoe sen ko aséen sen. Na i. Je e sen tsango tayakon en sen cuerpoe sen ixi jaña nche e ndo Cristo ngajin ningue ndo.

³⁰ Ixi jaina ikjanna ningue ndo me e xranchi xrokjui cuerpoe ndo.

³¹ “Méxin xi xrokonda tsintu e xa ndotée xa ko janée xa ixi ó kuitja xa janchri e xa ko jaña xrokjan sen naakua cuerpo.”

³² Ji i naa chijni tsango ijié tienxin a kain chujni ko jan an ndachrjan ixi jaña tjakoxin ndo Cristo ko ningue ndo.

³³ Ko kaxon xrondachro ixi ngujngu ja anta xrokonda xrotjue e janchri anta xranchi xrojueñaonta asáanta, ko kaxon sen nchri tsikute e xrokonda tsitikaon sen ndoxi e sen.

6

¹ *Ko ichjan, xrokonda tsitikaonnta ndotánta ko janáanta ixi jaña tjaun Ncháina Jesucristo sinche enta ixi me e naa nge e jian.

² Chijni ji i sa ó tsiketuan an ndo Dio ixi chujni tsitikaon chijni tsayé e sen naa juachaxin tsajon ndo Dio ko chijni ji i ndachro: “Chonde enta juasianta ngajin ndotánta ko ngajin janáanta,

³ ixi jaña jian tsinteenta ko itsjé nchakon tsarichonnta ngata a nunte xasintajni.”

⁴ *Ko ja anta ndotata, ncheña o anta chjan anta. Cháña jian nichje enta xjan ixi jaña jian sinche e xjan kaxon ko nchekuen ennta xjan chijnie Ncháina Jesús.

⁵ *Ko ja anta ti nche enta ixra ngajin ncháanta jii ngata a nunte, titikaonnta ko chonde enta juasaya ngajin na xranchi xrojuinche enta xrée Ncháina Cristo Jesús.

⁶ Ko je a je o jian nche enta hora stetsje e na ixi jaña xraxaonnta ixi je e na tsikon na tsango chjakon annta. Na i. Ja anta maski tsikon a na, jian nche enta ixra xranchi xrojuinche enta xrée ndo Cristo, ixi jaña tjaun ndo Dio sinche enta.

⁷ Ja anta ixi nchijí asáanta nche enta ixra xranchi xrojuinche enta xrée Ncháina Jesucristo, ko je a xranchi xrokui je o xrée naa chujni.

⁸ Ko ja anta ó no anta ixi Ncháina tsjengaina ndo na ngujnguna ixi ti ixra jian juinche ena, maski á sen nchenche e na ixra* o na i.

⁹ *Ko ja anta ti tájonnta ixra, jian tetuen ennta chujni nche e xráanta ko tuyakuen anta sen. Xraxaonnta ixi ja anta ko je e sen xraje o titikaonnta Ncháina jii ngajni ixi ndo Dio xraje o tjue e ndo kain chujni.

Ti xrokondaina tseto xinna ngajin espíritu ña i

¹⁰ Ko jai kichuuna, tonsojinta, ixi juachaxin ijié tajon Ncháina.

¹¹ Ko tjanchianta kain juachaxin tajon ndo Dio nchesoji asáanta ixi jaña soji tsake enta nchakon Xixron anxrée tjaun xa sintaya anta xa.

¹² Ixi jaina je a tsetoku una chujni. Na i. Jaina tsetoku una espíritue Xixron anxrée chóna juachaxin ko ichrji ngata a chrinto ko ngajní. Xixron anxrée tituen en kain espíritu ña i ichrji ngata a nunte ti naxixe e.

¹³ Méxin, tjanche enta kain juachaxien ndo Dio ixi jaña soji tsake enta nchakon tsetoku unta ti ña i, ko nchakon tsjexin tsetoku unta, ícha soji tsake e asáanta.

¹⁴ Soji take énta ko titikaonnta chijnie ndo Dio xranchi naa nge e tingatóxin xi soldado ti jitikao kain nge e tsjayaxin xa ko jian sinche enta, xranchi naa xi soldado jiyá xa chika tsingakuenxin ixi jaña sincheníe a na xa.

¹⁵ Ko jian tanginta ixi xronichjanta chijnie ndo Jesucristo tajon juaxruxin, xranchi xi soldado jian ka te take e xa.

¹⁶ Ko ícha soji chuntianta Ncháina Jesucristo xranchi xi soldado tikao xa chika tingakuenxin xa flecha tikao xro i ne e Xixron anxrée.

¹⁷ Ko jian titikaonnta ti juachaxin kuaye enta ixi tsarichonnta kain nchakon, jaña xranchi chika teya jáa xi soldado ixi tsen a xa, ko jian nichjanta chijnie ndo Dio, me e xranchi xrokjui chika espada tajon Espíritue ndo Dio.

¹⁸ Ko tjáña inta nichje enta ndo Dio, kain nchakon tinóatáanta ngajin ndo ko tjanche enta Espíritue ndo ixi tsingijnanta. Ko tonchrje anta nichje enta ndo Dio ko tjanchianta ixi tsingijna ndo kain sen titikaon ndo.

¹⁹ Kaxon tjanche enta ndo Dio ixi tsingijnana ndo, tsake e ndo chijnie ndo ngaya ro a ixi jaña jian xronichja chijnie ndo ko tsin en chujni nge e kuanoe a na.

²⁰ Ndo Dio chjána ixra ji i ixi xronichja chijnie ndo, méxin, ritjén ngaxin in ndo achjiso ko tjanche enta ndo Dio ixi jian xronichja chijnie ndo.

Juexin nichja ndo Pablo

²¹ *Ndo Tíquico, ndo kichuuna, je e ndo jitingijna ndo ixra rinta a kondee Ncháina Jesucristo, ko je e ndo xrochronga ndo xranchi ritjén ko xranchi ti ixra rinta a.

²² Méxin, jan an xruan an ndo tsitsja anta ndo ixi xrochronga ndo xranchi stena nti i ko jaña ícha soji tsitikaonnta.

²³ Ndotáina Dio ko Ncháina Jesucristo tsajon sen juaxruxin tsaye enta kainnta kichuuna ixi ícha xrotjue e kichuunta ko ícha soji xrochuntianta ndo.

²⁴ Juasie ndo Dio, je e ndo sinchenchaon† ndo kain sen tjue e Ncháina Jesucristo. Jaña tson en.

Xroon tsikjin ndo Pablo xrueen en ndo sen ste tjajna Filipos

Ndo Pablo tsikjin xroon kuayé e sen ni ngo Filipenses

¹*Jan an, Pablo, ko ndo Timoteo, ngisen nche e xrée Ncháina Jesucristo, ikjinna xroon ji i xii kainnta kichuuna steniinta ndo Cristo Jesús ko stenta tjajna Filipos, ko sen tetuan an ni ngo ko sen tingijna ixra ni ngo nti a.

²Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Ndo Pablo tjanche e ndo ndo Dio xii sen titikaon ndo Jesús

³Nchakon xraxa on ja anta tajon juasiana ngajin Ndotáina Dio,

⁴ko nchakon nichja a ndo Dio, tsango ché e aséenna xii tjanche a ndo xii ja anta

⁵xii xraje o nche ena xrée Ncháina, ti nchakon kuaxi kuin ennta chijnie ndo Dio ko hasta ti jai.

⁶Jan an nóna xii ndo Dio juangíxin ndo naa ixra jian ngaya asáanta xii kuitikaonnta ndo, ko jaña sinche e ndo kain nchakon ti xrokjanjan ndo Jesucristo.

⁷Méxin, jian xraxa on ja in xii ja anta xii tsango tjua anta, ko xraje o kuaye ena juachaxien ndo Dio. Siá jan an ritjén ngaxin in ndo achjiso o ritjén ti ste ni tetuan an, nduaxin nichja chijni jian.

⁸Ndo Dio no e xii tsango tjua anta kainnta xranchi ndo Cristo tjuajina ndo.

⁹Tjánchá a ndo Dio tsingijnanta ndo xii ícha xrotjue enta ndo ko ícha jian tsono anta ko tsienxinnta kain nge e.

¹⁰Jaña tsono anta nge e ícha jian sinche enta nge e ti jian ko jaña tjúá tsinteenta xii xro an ngisen tsjankata anta ijie nchakon xrokjan Ncháina Jesucristo.

¹¹Jian nche enta xii jaña tsjakoxinnta ti titikaonnta ndo Jesucristo, ko jaña ja anta ko kain jajina tsajonna juasaya ngajin ndo Dio.

Ti nche eni xrée ndo Cristo me e ícha jian ko ícha tjintee

¹²Kichuuna, tja on tsono anta xii kain nge e tangi kuatsinga jan an me e bingijna juakoxin ngajin chujni chijni jian tajon juachaxin tsechónni kain nchakon.

¹³*Jaña kain xi soldado jii nchia tituanxin na ko ikaxin ni ste nti i no e na xii jan an jija na ndo achjiso xii jan an chuntia ndo Jesucristo.

¹⁴Nchakon bikon sen kichuuna jija na, itsjé sen ícha chjée sen juaxruxin chronga sen chijnie ndo Dio ko í xrakon a sen ko ícha chuntia sen Ncháina.

¹⁵Nduaxin, jii kaxin sen tjako chijnie ndo Cristo xii tochjuye e sen kondeexin ixra tjakona chijnie ndo Dio. Ko jii ikaxin sen xii nduaxin nchijí aséen sen tjako sen chijnie ndo Dio.

¹⁶Ko jii kaxin chujni nichja chijnie ndo Cristo xii tjaun na nchejié aséen na ko je a xii nduaxin xrokuachrjexin aséen na. Jaña nche e na xii tjaun na sincheni e na aséenna xii xrajija na nti i.

¹⁷Ko ikaxin sen nduaxin stenichja sen chijnie ndo Dio xii no e sen ritjén nti i xii rindachrjan chijnie ndo me e nduaxin.

¹⁸Ko maski á nduaxin xii nchijí aséen sen nichja sen o na i, jan an ritjén juaxruxin xii je e sen chronga sen chijnie ndo Cristo.

¹⁹Ko nóna xii jian tsachrje kain ji i xii rinichje enta ndo Dio xii jan an ko Espíritue ndo Jesucristo jitingijnana.

²⁰ Jan an tja on ixi tsosuana i nchakon nichja chijnie ndo Dio ixi tja on jan an tsjákoxin juachaxin ijié chjána ndo Cristo, maski á ríchon o ndatsiken enna.

²¹ Jan an ríchon ixi juachaxien ndo Cristo, ko siá tsen enna naa nge e ícha jian tsjácha.

²² Ko siá xratsake é ngata a nunte xasintajni, ícha sinta a xrée Ncháina Jesucristo. Méxin, nóna i nge e ícha jian tsincha a.

²³ Méxin, nóna i nge e ícha jian tsincha a ixi tja on ndaxrokuen enna ixi jaña xrobake é ngajin ndo Cristo ko me e ícha jian.

²⁴ Ko ixi kondaxin ja anta, cháña tsen ana ixi jaña chao tsingijnanta.

²⁵ Ko jan an jitonóna ixi xratsake é ngajinnta kaxin nchakon, me e tsingijnanta ixi ícha jian tsono anta ko juaxruxin tsake enta ixi ícha xrochuntianta Ncháina Jesucristo.

²⁶ Ko íjngo tsake e ngajinnta me e tsake enta juaxruxin ko jaña tsajonnta juasianta ngajin ndo Jesucristo.

²⁷ Xrokonda tsjakoxinnta ixi jian stenche enta xranchi nichja chijnie Ncháina Jesucristo. Jaña siá tsjasotsja anta o na i, jan an tja on tsonóna ixi jian stenche enta ko jian steku u kichuunta ko nduaxin stechuntianta chijni tajon juachaxin tsechónni kain nchakon.

²⁸ Ko xrakuen anta chujni ningakon annta. Ja anta soji tinteenta, jaña tsjakonta ixi chujni me e tsitjáña na, ko jaña tjako kaxon ixi ja anta tsarichonnta kain nchakon ixi me e ti tajon ndo Dio.

²⁹ Ixi juachaxien ndo Cristo ja anta titikaonnta ndo ko je a je o titikaonnta ndo. Na i, kaxon ja anta juaxruxin tsaye enta nchakon tangi tson annta kondeexin ti chuntianta ndo.

³⁰ *Ja anta ko jan an xraje o tsango tangi stena ixi stechrongana chijnie ndo Jesucristo. Ja anta ó bikonta xranchi tsango tangi bake é ko stetono anta ixi tangi ritjén jai.

2

Sintu una xranchi juinche e ndo Cristo

¹ Méxin, siá ndo Cristo tjingijnanta ndo ko siá ti tjua anta ndo me e juaxruxin take e asáanta ko siá espíritue ndo jii ngajinnta ko siá já tjue e kichuunta ko tikonóe énta chujni;

² me e jan an tsake e juaxruxin ixi nóna ixi jian steku u kichuunta ko kainnta tjue enta kichuunta ixi chondanta espíritue ndo Dio ko naakua xra sinche enta.

³ Xro an nge e nche enta ixi tjaunnta tsjachanta xrojan nge e ko jaña sinchejié asáanta. Na i. Cháña xraxaonnta ixi ikaxin na ícha tjintee na ixi ja anta.

⁴ Ninaa ja anta tjé anta je o jian xrokuake enta. Cháña tingijnanta ikaxin chujni tsake e jian.

⁵ Ja anta xraxaonnta xranchi xraxaon ndo Cristo Jesús.

⁶ Maski je e ndo chónnda ndo kain juachaxin xranchi ndo Dio, tjaun a ndo juachaxin me e ixi tjaun a ndo xrobikonni xranchi ndo Dio.

⁷ Ko kuintu e ndo nge e kuachónnda ndo, ko kuji ndo nti i nunte xasintajni xranchi ngixe i inaa chujni.

⁸ Ko kuake e ndo xranchi naa xi ko je e ndo juinchenóa aséen ndo kuitikaon ndo kain nge e kuetuan an ndo Dio ko kuen en ndo nganito ntacru xranchi naa chujni yama ijie.

⁹ Méxin, ndo Dio tsango ijié juachaxin kuajon ndo ngajin ndo Jesús ko chjée ndo ndo naa nombrée ícha tetuan an, ti chónnda i ninaa chujni.

¹⁰ Ko nchakon tsin en na nombrée ndo Jesús kain na tsake exin na ntatuchi in na, sen ste ngajni ko ni ste nunte xasintajni ko ni ste chringi inche,

¹¹ ko kain na xrondachro na ixi ndo Jesucristo me e Nchéeni ko jaña tsajon na juasaya* ngajin Ndotáina Dio.

Sen titikaon ndo Cristo xranchi xro i tingasáña sen

¹² Kichuuna, kain nchakon bake é ngajinnta kuitikaonninta, ko jai ikjín ritjén, ícha jian titikaonninta ko jian xrotsje enta xranchi tsake enta ixi sinchetjáña inta juachaxin tsarichonnta kain nchakon ko tájonnta juasianta ngajin ndo Dio,

¹³ ixi ndo Dio ntaxraxaonnta ndo ko tingijnanta ndo sinche enta ti jian ixi jaña tjaun ndo.

¹⁴ Kain ji in xrokonda sinche enta ko nichjangé a kichuunta ko tetó anta,

¹⁵ ko jaña xro an ngisen xrondachro ixi chondanta ijie o nge e ndako a juinche enta. Jian nche enta xranchi chjen en ndo Dio, xjan chóna i ijie, maski stenta ngakjen en chujni ña i ko ndako a nche e. Ja anta ti nche enta me e, tsingasáña xranchi xro i ngakjen en chujni ste ti naxixe e.

¹⁶ Ko tjako enta na chijni jian tajon juachaxin tsechónni kain nchakon. Ixi jaña nchakon xrokjan Ncháina Cristo, jan an tsake e juaxruxin ixi ja anta kuitikaonnta ti juntakuan annta ko nchakon me e tsonóna ixi jian ixra junta a ko je a xruenxon.

¹⁷ Ko maski ndaxrokuen enna ixi ti xra junta a, jan an juaxruxin tsake é ixi bingijnanta chuntianta ndo Dio ko ji i xroxetjaxin xranchi naa nge e tsajonnta tsayé e ndo ko tja on ixi ja anta kaxon tsake enta juaxruxin xranchi jan an.

¹⁸ Chá anta ko juaxruxin take énta xranchi jan an.

Ndo Timoteo ko ndo Epafrodito

¹⁹ Ko siá Ncháina tsajon juachaxin, tuinxin xroxruan anta ndo Timoteo tsjikitsja anta ndo ixi jaña tsonóna xranchi stenta ko juaxruxin tsake e tsin an me e.

²⁰ Ko xro an ngisen xraxaon ko taa juachjaon ixi ja anta xranchi ndo Timoteo.

²¹ Ixi ikaxin sen je o tjaun sen jian tsintee sen ko nche a sen nge e tjaun ndo Jesucristo.

²² Ko ja anta ó chuxinnta ndo Timoteo ko bikonta ixi jian nche e ndo ko tingijnana ndo chronga ndo chijni jian xranchi naa chjan tingijna ndotée xjan.

²³ Tja on xroxruan an ndo tsijitsja anta ndo, je o tsonóna xranchi tsonchjian konde-exin jija na.

²⁴ Ko chuntia ngajin Ncháina ixi tuinxin tsjasotsja anta.

²⁵ Ko kaxon xraxa on xrokonda xroxruan anta ndo kichuuna, ndo Epafrodito. Je e ndo kaxon tingijnana ndo nta ana xra ko kayuina tsango tangi bake ena. Je e ndo xruan annta ndo ixi tsingijnana ndo kain nge e xrokondaina.

²⁶ Tsango tjaun ndo tsikitsja anta ndo kainnta ko yaa ndo juachjaon ixi kono e ndo kuin ennta koni e ndo.

²⁷ Ko nduaxin koni e ndo ko bananchichjaon ndaxrokuen en ndo ko ndo Dio bikonóe e ndo. Ko je a je o ndo, kaxon jan an bikonóa na ndo Dio ixi íxrokua i ícha juachjaon.

²⁸ Méxin, ícha tja on xroxruan an ndo tsijitsja anta ndo ixi jaña juaxruxin tsake enta tsikonnta ndo íjngo ko jaña jan an kaxon tsa i juachjaon.

²⁹ Juaxruxin taye énta xranchi naa sen kichuunta titikaon Ncháina, ko tjue enta ndo xranchi tjue enta ikaxin sen nche e xrée Ncháina.

³⁰ Ixi je e ndo koni e ndo nchakon jinche e ndo xrée ndo Cristo ko ixi tsango bingijnana ndo ixi ja anta ikjín stenta ko jua i xrobingijnaninta ja anta, ko méxin ndaxrokuen en ndo.

3

Nge e nduaxin tjintee ixi rué eni ndo Cristo

¹ Jai, kichuuna, take énta juaxruxin ixi titikaonnta Ncháina Jesús ko jan an tonchrje ana xrokjin íjngo ixi ti ikjin jian xrokonda a ja anta.

² Tsje enta jian ixi ste chujni ña i xranchi xrokjui kunia, tjaun na tsonchrijin na ntau eni ixi jaña tsaani chji e ni judío.

³ Sen nduaxin chónḁa chji e ndo Dio, sen me e jaina ixi jaina nduaxin tajonna juasaya ngajin ndo Dio ixi tingijnana Espiritue ndo, ko tsango chajna ixi jaina tikinixin enna Nchána Jesucristo. Méxin, chuntia ina ti taani chji e ni judío.

⁴ Jan an kaxon chao xrochuntia ti taani chji eni ko ikaxin nge e, jan an ícha tikinixinna xrochuntia ji i ixi ikaxin na

⁵ *ixi jan an kua chji e ni judío ti kuachonda ijní nchakon, ko jan an tjajna israelita ko tsikachrjenixin sen tjajna tikinixin en ndo Benjamín ko kaxon jan an nduaxin hebreona. Ko jan an sa ó kaxon ikjui fariseo ko bakitika on ley ne e ni judío.

⁶ *Ko jan an tsango bakitika on ti tjako ni fariseo, méxin kuaningakon an ni titikaon ndo Cristo ko jan an tsango bakitika on ley ko xro an ngisen xrondachro ixi nduaxin a junta a me e.

⁷ Kain me e sa ó ti bakitika on jan an, ndachrjan ixi tsango tjintee. Ko jai ndachrjan íxro an tjintee kain me e ixi jai jan an titika on ndo Cristo.

⁸ Ko kain nge e kuanóna ko kuachonda, tikon jai íxro an nge e tjintee, ixi ícha tjintee chúxin Nchána Jesucristo. Kain nge e kuachonda, kain me e kuitjáña ko ikjan xineno kondeexin ndo Cristo ixi jai juácha titika on ndo

⁹ ko chao tsake é ngajin ndo. Je a ixi jan an tsango jianna ixi xrokuitika on ley ne e ndo Moisés. Na i. Ndo Dio sinchetjúá ndo aséenna ixi chuntia ndo Cristo.

¹⁰ Ti jan an tja on: nduaxin xrochuxin ndo Cristo ko xrochonda juachaxin xranchi nchakon xechón ndo, ko tja on tangi tsónna xranchi tangi kon en ndo ko xrokue enna xranchi kuen en je e ndo,

¹¹ ko tjume e jaña kaxon jan an chao xroxechónna íjngo.

Ndo Pablo tjaun ndo jian sinchejexin ndo ti jitinga ndo

¹² Ndachrjan i ixi ó juácha jan an kain ji in ko ndachrjan i ixi ó tsango jianna. Na i. Jan an tja on ícha xrorua a ndo Cristo Jesús, ixi tsjácha tsjaso ti tjaun ndo ixi je e ndo kuinche ena ndo ó sa ó.

¹³ Kichuuna, jan an ndachrjan i ixi ó juácha kain ji i. Jan an tja on xrotjáñana kain nge e ó junta a ko jai xrorua a ícha nge e titjáña sinta a.

¹⁴ Ixi jaña tsjácha sintajexin xřana, ko me e tsjácha tsayá a nge e tsajon ndo Dio jii ngajní ixi je e ndo ndachro ndo tsayá a naa nge e tsajon ndo ixi chuntia ndo Jesucristo.

¹⁵ Ko kaina ti nduaxin chuntiana ndo Jesús xrokonda jaña xroxaxaonna. Ko siá xrojan ja anta xraxaonnta inaa nge e, ndo Dio sintaxraxaonnta ndo ixi jian sinche enta.

¹⁶ Ko xrokonda kaina jaña xroxaxaonna ko jaña sinche ena nge e ó kuangina.

¹⁷ *Kichuuna, nche enta xranchi nta a jan anna, ko kaxon tsje enta xranchi nche e ikaxin sen kichuuna, xranchi jan anna juntakuan annta.

¹⁸ Ó itsjé vez ntatjunta ko jai ritsjanga ntatjunta ixi ste kueya na ndachro na ixi tjinte a ti kuen en ndo Cristo nganito ntacru.

¹⁹ Ko ni me e tsii nchakon tsitjáña na ixi je e na je o xraxaonna ti sine na ko ti tsitsáa na ko nchejié aséen na ixi ti ndako a nche e na ko xraxaon na nge e jii ngata a xasintajni. Kain ji in xrokjui xranchi naa dio ne e na.

²⁰ Ko kain jaina tikinixinna tsojuna ngajní ko jai stchon enna Nchána Jesucristo tsj xin ndo ngajní, tsajon ndo juachaxin tsechónna nti a

²¹ ixi je e ndo tsindoxin ndo cuerpoina ti toni e ko je e ndo tsajon ndo naa cuerpo tsango chaxro xranchi chónḁa je e ndo. Ko kain ji i tson en ixi je e ndo chónḁa ndo ijié juachaxin ko tituen en ndo kain nge e.

4

Juaxruxin tinteenta ixi titikaonnta Nchána Jesucristo

¹ Méxin, kichuuna, tsango tjua anta ko tsango jitiye e ña o ixi ja anta ko juaxruxin ritjén ixi ja anta xrokjui xranchi naa nge e tsango tjintee juácha; méxin soji titikaonnta Ncháina Jesucristo.

² Jan an tinóatáana ngajin jan Evodia ko jan Síntique ixi xraje o xroxraxaon sen xranchi kichuu sen titikaon Ncháina Jesucristo.

³ Ko ja anta kichuuna, ti kuingijnanta juinche ena xra, tja on tsingijnanta yui jan kichuuna, sen juinche e ixra kaxon tjako sen chijnie Ncháina Jesucristo, kao ndo Clemente ko ikaxin sen juinche e ixra ngajin. Ko nombrée sen ó jitaxin xroon ti no stetaxin nombrée kain sen tsechón kain nchakon.

⁴ Take énta juaxruxin kain nchakon ixi titikaonnta Ncháina Jesucristo; íjngo ntatjunta, take énta juaxruxin.

⁵ Ko kain chujni tsikon na ixi ja anta nduaxin tingijnanta chujni, ko jaña xrokonda sinche enta ixi Ncháina Jesucristo ó tuinxin tsijí ndo.

⁶ Méxin, xro an nge e taxinta juachjaon. Cháña tjanche enta ndo Dio nge e xrokonda anta ko kaxon tájonnta juasianta ngajin ndo.

⁷ Ko ndo Dio xrotjáanta ndo juaxruxin, ko juaxruxin me e xro an chujni tienxin. Juaxruxin me e tayakon en asáanta ko tsingijna jian xroxraxaonnta ixi stehuntianta ndo Cristo Jesús.

Xraxaonnta nge e ti jian

⁸ Méxin, tsjexixin tjanča anta, kichuuna, xrokonda xroxraxaonnta kain nge e ti nduaxin, kain nge e ti tikinixin juasaya, ko kain nge e ti ndako jii ko kain nge e jian ko nge e chaxro ko kain nge e jian tsayéxinni juasaya. Kain ji i xrokonda xroxraxaonnta.

⁹ Xrotjáña inta kain nge e juako anta ko nge e kuin ennta nichja ko nge e kuetuan annta ko kain ixra bikonta junta a. Jaña nche enta ko jaña ndo Dio, ndo tajon juaxruxin, tsake e ndo ngajinnta.

Tomi kuajon sen filipenses kuayé e ndo Pablo

¹⁰ Tsango juaxruxin ritjén ixi Ncháina bingijnanta ndo íjngo xraxaonninta. Ndachrjan i ixi í xraxaon antana. Na i. Je o jua i bingijnaninta ó sa ó.

¹¹ Ko ndachrjan i ixi xrojan nge e xrokondana. Jan an ó juikuana take é juaxruxin ixi je o nge e chonda.

¹² Jan an ó nóna nge e xrondachro chóna ini ninaa nge e, ko kaxon nóna nge e xrondachro chónani kueya nge e. Jan an ó juikuanna á juiné o juine a jian, o á chonda itsjé nge e o xro an nge e chonda.

¹³ Kain ixra chao sinta a ixi ndo Cristo tingijnana ndo ko nchesojina ndo.

¹⁴ Ko méxin, jian juinche enta ixi bingijnaninta, kuajonnta nge e xrokondana.

¹⁵ Ja anta ni tjajna Filipos, ó no anta jian ixi nchakonjuangínin juntakuan annta chijnie ndo Dio, ko nchakon sajuixin tjajna Macedonia, ja onta ni ni ngo Filipos xruan annta tomi kuayá a ixi kuinteenta juaxruxin.

¹⁶ *Méxin, nchakon bake é tjajna Tesalónica je a naakua xruannaninta tomi xra o ni ngo bingijnaxinninta ixi nge e xrokondana.

¹⁷ Je a ixi tja on je o tsayá a nge e xruannaninta. Na i Jan an tja on ixi ícha xrochondanta nge e tajon ndo Dio.

¹⁸ Ko jan an kuayá a kain nge e tsixruan annta ko jai ícha chonda. Ko kuayá a nge e tsixruan annta bikao ndo Epafrodito, ko ó jian ritjén. Ti xruannaninta xranchi naa nge e chaxro xraxe tayé eni ko ndo Dio nche e ndo juaxruxin me e.

¹⁹ Ndotána Dio xrotjáanta ndo kain nge e titjáña xrochondanta ixi je e ndo chóna ndo kain nge e tsango chaxro tsayé e kain sen titikaon Ncháina Cristo Jesús.

²⁰ Ndotána Dio tsayé e ndo juasaya tsajon kain chujni kain nchakon. Jaña tson en.

Juexin nichja ndo Pablo

²¹ Tájonnta juajna ngajin kain sen titikaon ndo Jesucristo ste nti a. Sen kichuuna steki an nti i, xruan annta sen juajna.

²² Jaña kain sen ste nti i titikaon ndo Dio ko sen kichuuna nche e xrée xi tetuan an Roma, xruan annta sen juajna.

²³ Ncháina Jesucristo sintanchaonnta ndo kainnta. Jaña tson en.

Xroon tsikjin ndo Pablo xrúen en ndo sen ste tjajna Colosas

Ndo Pablo ikjin ndo ngajin sen tjajna Colosas

¹ Jan an, Pablo, Ncháina Jesucristo kuinche ena ndo ixi sinta a xrée ndo, xra apóstol, ixi jaña tjaun ndo Dio, ko kao kuinche e ndo ndo kichuuna Timoteo,

² ikjin xroon ji i tsayé e sen kichuuna tjajna Colosas, sen titikaon ndo Cristo ko tikinixin en sen ndo Dio. Ndotáina Dio ko Ncháina Jesucristo sintanchaonnta ndo ko xrotjá anta ndo juaxruxin.

Ndo Pablo tjanchia ixi kain sen titikaon Ncháina

³ Kain nchakon tajonna juasaya* ngajin ndo Dio, Ndotée Ncháina Jesucristo, nchakon nichja ana ndo tjancha ana ndo ixi ja anta

⁴ ixi kuin anna ixi ja anta jian chuntianta Ncháina Jesucristo ko tjue enta kain sen titikaon ndo Dio,

⁵ ixi stechon ennta tsaye enta nge e tsajon ndo Dio ti jii ngajní. Ja anta jaña stechon ennta ixi kuin ennta chijni jian nduaxin ó kuajon ndo Dio.

⁶ Méxin, chijni kuin ennta, chijni me e stetin en kueya chujni nchijí nunte xasintajni, ko jaña ó jitinga ko jitonkueya ni titikaon ixi juachaxin tajon ndo Dio. Jaña kon en kaxon nchakon kuin ennta ko kuitikaonnta ixi nduaxin tjua anta ndo Dio.

⁷ *Ji i juako anta ndo kichuuna Epafras, ndo kuingijnana junta ana ixra, ko jai jii ndo ngajinnta ko jian nche e ndo xrée ndo Cristo.

⁸ Je e ndo bikaonana ndo juajna xranchi tjue é kichuunta ixi Espíritue ndo Dio tingijnanta.

⁹ Méxin, jan anna, nchakon kuin anna xranchi stenta, kain nchakon tjancha ana ndo Dio tsiingijnanta ndo ixi jian tsono anta nge e tjaun ndo, ko tjanchiana ixi tsajon ndo juachaxin tsienxinnta kain nge e tjaun ndo.

¹⁰ Jaña chao tsinteenta xranchi tjaun Ncháina Jesucristo ko jian sinche enta xrée ndo ko jaña ícha jian xrochuxinnta ndo.

¹¹ Ko tjanchiana ixi je e ndo sintasojinta ndo asáanta ixi juachaxin ijié chónnda ndo ko xrotjáanta ndo juaxruxin, ko soji tsake enta maski tsij juachjaon ngata anta.

¹² Ko tájonnta juasianta ngajin ndo Ndotáina Dio ixi jian jinche e ndo xra ngaya asáanta, me e tsayé ena nge e ti jii ngajní ti tingasáña, ko ji i tsajon ndo ngajin kain sen titikaon ndo.

¹³ Je e ndo kuakintsjexinna ndo ti naxixe e ko chjaina ndo juachaxin tsinteena ti tetuan an Chjen en ndo, xjan ícha tjue e ndo, ko jai ti naxixe e ítetuan i ngaya aséeina

¹⁴ *ixi je e ndo kuen en ndo ixi jaina ko kuajon ndo jnié ndo kontjúáxin aséeina.

Chondana juaxruxin ixi ndo Cristo kuen en ndo ixi jaina

¹⁵ Ndo Dio jua i tikonni ko Chjen en ndo, je e xjan juakoxin xjan xranchi jii Ndotée xjan. Ko je e xjan ó sa ó bake e xjan nchakon xrangíxixín konchjian kain nge e jii.

¹⁶ Ko ndo Dio chjée ndo Chjen en ndo juachaxin sinchekonchjian xjan kain nge e jii ngajní ko ngata a nunte xasintajni, ko kain nge e tikonni ko ti tikon ani. Kaxon kain nge e tetuan an jii ngata a chrinto ko kain juachaxin jii ngajní, kain me e juinchéña ndo ixi ji i sinche e ixra ngajin ndo.

¹⁷ Ndo Cristo ó bake e ndo ti xro an nge e jii, ko ixi je e ndo chjée ndo juachaxin kain nge e jii ixi chónnda ndo kain juachaxin.

* **1:3 juasaya** respeto, honor **1:7** Col. 4:12; Flm. 1:23. **1:14** Ef. 1:7.

18 *Kaxon je e ndo jaa ningue ndo, ko ningue ndo me e cuerpoe ndo, ko je e ndo tetuen en ndo cuerpoe ndo ixi je e ndo ícha sa ó xechón ndo ngakjen en ni tsiken en ko méxin je e ndo tetuen en ndo kain nge e.

19 Méxin, ndo Dio bake e ndo juaxruxin ko jaña chjée ndo Chjen en ndo kain juachaxin chónnda je e ndo.

20 *Ko kaxon tjaun ndo Dio ixi juachaxien ndo Cristo xrobake e juaxruxin nunte xasintajni ko nchijí ngajní ixi ti kuenxin ndo Cristo nganito ntaçru.

21 Sa ó ja anta kuachuxin anta ndo Dio ko baningakon enta ndo ngaya asáanta konde-exin ti ña i kuaxraxaonnta ko kuanche enta. Ko jai juasie ndo Dio kuajon ndo juachaxin ixi juaxruxin tsinteku unta ndo ixi titikaonnta ndo.

22 Ko ti bikaon cuerpoe ndo Cristo ko kuen en ndo ixi jaina, jaña kon en ndo ixi tjaun ndo ja anta tsontjúá asáanta ko xro an ijie xrochondanta, jaña tjaun ndo tsake enta ngajin ndo.

23 Méxin, xrokonda ícha xrochuntianta Ncháina, ko tsake enta xranchi naa ntaç soji ixi yaso e jii nue e ntaç, ko tintue anta ti jian stechon ennta ixi kuin ennta chijnie ndo Dio. Chijni me e stetin en chujni nchijí nunte xasintajni, ko jan an Pablo tjako chijni me e.

Ndo Pablo nche e ndo xré ni ngo

24 Jan an ritjén juaxruxin maski ritatsinga juachjaon ixi ja anta, ixi jaña ntaxetaxin ngajin cuerpona ti xranchi tangi kon en ndo Cristo ixi kain sen ningue ndo, sen ikjan cuerpoe ndo.

25 Ndo Dio kuinche ena ndo ixi sinta a ixra ngajin sen ningue ndo, ixi ixra me e kuetuanna ndo ixi jian tsinteenta ko tjako chijni jian kuajon ndo Dio.

26 Chijni me e sa ó ninaa chujni banoe a, ko jai ndo Dio juincheno e ndo kain sen titikaon ndo.

27 Ko ndo Dio tjaun ndo tsono e sen je a judío ti tjintee kuanoe a sen ó sa ó, méxin Ndo Dio xruan an ndo ndo Cristo ixi tsake e ndo ngajinnta, ko je e ndo tajon ndo juachaxin ixi tsaye enta kain juachaxin ijie chónnda ndo.

28 Jan anna nichjana ngajin kain chujni chijnie ndo Cristo, ko juachaxien ndo Cristo jian ntaxraxa onna chujni ko ntakuan ana na ixi tsienxin na jian. Ko jaña ngujngu sen tsitikaon sen ko tsontjúá aséen sen ngajin ndo Cristo.

29 Méxin, jan an soji nta a ixra ixi juachaxin jie chjana ndo Cristo.

2

1 Tja on tsono anta ixi tsango taa juachjaon ixi ja anta ko sen ste tjajna Laodicea ko kain sen xra chuxin ana.

2 Tja on ixi tsake e juaxruxin ngaya aséen sen, ko xraje o xroxraxaon sen ko xrotjue e kichuu sen. Jaña tsienxin sen jian ko jaña tsono e sen nge e ninaa ngisen kuanoa a ti xraxaon Ndotáina Dio, me e ti kují Ncháina, ndo Jesucristo.

3 Ko je e ndo no e ndo kain nge e no e ndo Dio, me e ti ícha tjintee.

4 Kain ji i ntatjunta ixi xro an ngisen sintaya anta maski chaxro xronichja na.

5 Ko maski ritjén a ngajinnta, jan an kain nchakon xraxaonnta ko chjana juaxruxin ixi tsango jian stenta ko nduaxin stechuntianta ndo Cristo.

6 Méxin, xranchi kuaye enta Ncháina Jesucristo, jaña jian nche enta.

7 Xranchi naa ntaç yaso e jii nue e ntaç, jaña jian nche enta ko jian chuntianta ndo Jesucristo xranchi juincheckua annta sen, ko tájonnta juasianta ngajin ndo Dio kain nchakon.

Ndo Cristo tajon juachaxin ixi natjúá tsojuna

8 Jian tsje enta ixi xro an ngisen sintaya anta ixi je e na je o tjako na ti xraxaon na ko ti xraxaon chujni nunte xasintajni, ko tjako a na ti tjaun ndo Cristo.

⁹ Ixi kain juachaxin chónnda ndo Dio, me e chónnda ndo Cristo nchakon bake e ndo nunte xasintajni.

¹⁰ Ja anta chondanta juachaxien ndo Dio ixi titikaonnta ndo Cristo. Ko je e ndo tetuen en ndo kain juachaxin jii ngajní ko nunte xasintajni.

¹¹ Kaxon nchakon kuaxinta kuitikaonnta ndo Cristo, je e ndo tjáanta ndo naa nge e tsichuxixinnta ndo, ko me e je a itja chujni kóñaxin. Na i. Je e ndo ixi juinchemé e ndo ijië kuanche enta, méxin jai tikinixin ennta ndo Cristo.

¹² *Ja anta nchakon bikitéenta, kaxon xranchi ja anta xroxrabaaku unta ndo Cristo. Ko jaña kaxon xrokjui xranchi xroxechónnta xranchi je e ndo xechón ndo ixi chuntianta juachaxien ndo Dio ixi ndo Dio juinche xechón ndo ndo Cristo.

¹³ *Ja anta sa ó xranchi naa ni tsiken en jaña bake enta kondeexin ijië kuachondanta, ko kuachonda inta chji e ndo Dio. Ko jai komé e kain ijië me e, ko ndo Dio tjáanta juachaxin tsechonnta kain nchakon.

¹⁴ *Ndo Dio juinchemé e ndo kain nge e tsiketuan an sa ó, ti jua i kuitikaonna, ko je e ndo kuantsje ndo kain ijië kuachondana ixi ndo Cristo kuen en ndo nganito ntacru.

¹⁵ Ndo Cristo nchakon kuen en ndo nganito ntacru juacha ndo ko kuantsje e ndo Xixron anxrée kain juachaxin kuachónnda xa ti baketuan an xa, ko jaña juinche e ndo ixi xrokosue e xa ko juinche katsinga ndo kain ti ña i ngatoxin* ikon itsjé nã, ixi xrobikonni íxro an juachaxin chónnda xa, ko jaña juacha ndo.

¹⁶ *Méxin, xro an ngisen xronichjangí anta ixi ti nge e intenta o nge e tin innta o á titikaonnta nchakon kia o nchakon nchanitjao natjúá o nchakon tjoké eni.

¹⁷ Kain nge e ji i me e tsa on kain nge e tsii. Ko ti tsii me e ndo Cristo.

¹⁸ Tintue anta ixi xrojan ngisen sintaya anta ixi nche e nã xranchi xrokjui nã jian nã ko tajon nã juasie nã ngajin sen ángel. Ni me e ndachro nã ixi kuxienxin nã naa nge e ijié ko méxin nchejié nã aséen nã ixi nge e xraxaon nã.

¹⁹ *Ko je e nã nduaxin a titikaon nã ndo Cristo ixi je e ndo jaa ni ngo ko me e cuerpoe ndo, ko je e ndo tayakon en ndo ni ngo ko nchesoji ndo sen ni ngo, ko jaña nche e ndo ixi naakua xroxraxonna ixi jaña tjaun ndo Dio.

²⁰ Ja anta ó kuen ennta kao ndo Cristo ko kuintu enta nge e xraxaon chujni xasintajni.† ¿Méxin, sonda xranche enta xranchi je e nã ko titikaonnta nge e tetuan an nã?

²¹ Xranchi ndachro nã: “Tsé anta ji i, nte anta me e ko tséxin anta tjáanta xrojan nge e.”

²² Kain nge e tetuan an nã me e kondee nge e tsjexin, ko ji i naa nge e je o xraxaon chujni.

²³ Nge e titikaon nã nche e nã xranchi naa nge e nduaxin ixi nchejié a aséen nã, ko kaxon ncheni e nã ntau e nã, ko ixi ti nche e nã me e jua i tsintu e nã xroxraxon nã nge e ña i.

3

¹ Méxin, ja anta ó tsixechónku unta ndo Cristo. Méxin, tjéenta nge e jii ngajní ti no jii ndo Cristo ndatsjonxin jian ti jii ndo Dio.

² Xroxraxonnta nge e jii ngajní ko je a nge e jii nunte xasintajni.

³ Ixi ja anta ó kuen ennta kao ndo Cristo ko jai stchon ennta xrochondanta juachaxin tsarichonnta ko tsinteenta kain nchakon ngajní ti jii ndo Dio.

⁴ Ixi ndo Cristo chondaxina juachaxin stchónna ko nchakon xrokjan je e ndo, ja anta kaxon tsake enta ngajin ndo ko tsikonnta juachaxin ijié chónnda ndo.

Xranchi konjóna sa ó ko xranchi stena jai

⁵ Méxin, tintu enta kain nge e ndako a xraxaonnta nti i nunte xasintajni. Ninaánta tarichrinko inta inaa ngisen je a sen tsikuta anta, ko nche anta nge e ña i, ko nche anta

^{2:12} Ro. 6:4. ^{2:13} Ef. 2:1-5. ^{2:14} Ef. 2:15. * ^{2:15} ngatoxin delante de ^{2:16} Ro. 14:1-6. ^{2:19} Ef. 4:16.
† ^{2:20} xasintajni mundo

ti ndako a xraxaon asáanta, ko kaxon take anta juaxruxin ixi xrochondanta kueya nge e ixi me e xrokjui kaxon xranchi xrokuitikaonnta naa ídolo.

⁶ *Kondeexin ji i toñaao ndo Dio, ko me e ti x̄in ti tangi ton enni ixi titikaon ani nge e tituan an ndo.

⁷ Ko kain ji i kuanche enta sa ó.

⁸ Méxin, jai tintu enta kain nge e ña i, ko tintu enta kain juañaao, ko nge e ndako a tjaun asáanta, ko ti nichjangí enta kichuunta ko nge e ndako a tachrxexin ro anta.

⁹ *Ncheye a kichuunta ixi ó sa ó jaña kuanche enta, ko jai ína i ixi ja anta ínche anta nge e juinche enta sa ó.

¹⁰ *Me e jai ó tsikjannta chujni natjúá ko Ndo Dio tajon ndo juachaxin ixi xrokjannta xranchi je e ndo, ixi je e ndo juinchekonchjiannta ndo ko tjaun ndo xrochuxinnta ndo ícha jian.

¹¹ Ítjinte a á ni judío o á ni griego o á ni tsikaa chji e o á ni tsiki x̄in ikjín o á ni no e o á ni noe a o á ni tituen en sinche e ixr̄a o á ni tituan an. Ti ícha tjintee me e ti titika onna ndo Cristo ixi je e ndo tituen en ndo kain nge e.

¹² *Ndo Dio tjua anta ndo ko tsikinja anta ndo ixi xrokjannta ni tikinixin en ndo. Ko ja anta ó kjannta ni natjúá, méxin, tikonóe e kichuunta ko jian tinteenta ko nchejié a asáanta ko taka i toñaonta.

¹³ *Ningakuen a kichuunta, ko tjáña anta xrojan nge e ndako a junta anta chujni, ixi ndo Cristo jaña kaxon je e ndo juinchemé e ndo ijje juinche enta, méxin jaña nche enta kaxon.

¹⁴ Ko ti ícha tjintee ti xrotjue e kichuunta ko naakua xroxraxaonnta ixi ña jian ko ña nche e ixi kain nge e ndako tsake e.

¹⁵ Ti juaxruxin tajon ndo Cristo tsetuen en asáanta ixi ña kuiyaxinnta ndo Dio ixi xrokjannta xranchi naakua cuerpoe ndo ko jaña tsajonnta juasianta ngajin ndo.

¹⁶ *Chijnie ndo Cristo xrokuetuen en asáanta. Méxin, nchekuen en kichuunta ko nichje e kichuunta jian ko jian xraxaonnta. Itsjenta salmo ko himno ko itsjenta ngajin ndo Dio, ko tájonnta juasianta ngajin ndo ngaya asáanta.

¹⁷ Kain ixr̄a nche enta ko kain nge e xrondachronta, kain me e tjanchiixinnta juachaxien nombrée Ncháina Jesús, ko tájonnta juasianta ngajin Ndotáina Dio ixi titikaonnta ndo Jesucristo.

Tikinixin sinche e sen ti jian, sen titikaon ndo Cristo

¹⁸ *Ja anta sen nchri tsikuta anta, tsitikaonnta ndoxi anta xranchi tikinixin sinche enta ixi ó titikaonnta Ncháina Jesucristo.

¹⁹ *Ja anta sen xi, xrotjue enta janchri anta ko ningakuen anta jan.

²⁰ *Ja anta chjan, titikaonnta kain nge e tetuan an ndotáanta ko janáanta ixi jaña tjaun Ncháina Jesucristo.

²¹ *Ja anta ndotée ichjan, ncheñaao anta chjan anta ixi tsoníe a aséen xjan.

²² *Ja anta ni nche e ixr̄a, titikaonnta ni xrée rinche enta nti i nunte xasintajni. Ko je a je o nchakon jitsje e xi xrée. Na i. Nche anta me e. Cháña ixi nchijíi asáanta nche enta ixr̄a ixi titikaonnta ndo Dio.

²³ Kain ixr̄a sinche enta, nche enta ixr̄a ixi nchijíi asáanta xranchi titikaonnta Ncháina Jesucristo, je a ixi titikaonnta chujni.

²⁴ Ó no anta ixi Ncháina Jesucristo sintakiton annta ndo nge e chónnda ndo ixi nche enta xrée ndo, ko je e ndo nduaxin Ncháina.

²⁵ *Ko ni nche e nge e ña i tangi tson en na kondeexin ti ña i juinche e na ixi ndo Dio naxraje o tikon ndo kain na, á tituan an na o na i.

4

¹*Ja anta ti chondanta ni nche e xra kain nchakon, jian nche enta ko jian tetuen ennta ninchexraanta. Xroxraonnta ixi kaxon ja anta chondanta Ncháanta jii ngajní.

²Tintue anta nichje enta ndo Dio ko jian xraonnta ti ó nichje enta ndo, ko kain nchakon tájonnta juasianta ngajin ndo.

³Kaxon tjanche enta ndo Dio tsingijnana ndo ixi tsajon Ncháina Jesucristo juachaxin xronichjana nge e banoe a na kondee ndo Cristo. Kondeexin ji i jija na nti i ndo achjiso.

⁴Tjanche enta ndo Dio ixi tsingijnana ndo ixi jian sintakuan an na xranchi tikinixin sintana.

⁵*Jian nichje enta ni titikaon a ndo Cristo ko jian nche enta ixi jaña tsikon ni xraticatikaon a ndo, ko siá chao xronichjanta ngajin na, nichjanta ixi je e na xrochuxin na ndo.

⁶Nichje entana jian kain nchakon ko xraonnta jian xranchi tsjate enta ixi nge e tsjanchangi ngujngu na.

Juexin nichja ndo Pablo

⁷*Ndo kichuuna Tíquico, ndo tsango tjue ena, je e ndo jian tingijnana ndo xree Ncháina Jesucristo, ko tsiji ndo xrontatjunta ndo xranchi ritjén jan an.

⁸Méxin, xruan an ndo tsiji ndo ti stenta ixi tsono anta xranchi stena ko kaxon ixi tsake enta juaxruxin.

⁹*Kaxon xroxruan an ndo Onésimo, naa ndo kichuuna tjua a ixi jian nche e ndo ixra ngajin Ncháina, ndo me e ndo tjajnánta kaxon. Kayui sen tsikitsja anta sen ko tseki anta sen kain nge e jiton en nti i.

¹⁰*Ndo Aristarco, ndo riki an ndo achjiso, xruan annta ndo juajna ko kaxon ndo Marcos, ndo me e xrakichuu ndo ndo Bernabé. Ó ntatjunta ixi nchakon tsiji ndo Marcos tsikitsja anta ndo, taye énta ndo jian.

¹¹Kaxon xruan annta ndo Jesús juajna, je e ndo kaxon ndatin in ndo Justo. Je o je e sen ji i, sen judío titikaon Ncháina tingijnana ixra rinta a, ti nichjana kondee ti tetuan an ndo Dio. Ko je e sen tingijnana sen ixi juaxruxin tsake e.

¹²*Ndo Epafra xruan annta ndo juajna. Je e ndo nche e ndo xree ndo Cristo xranchi ja anta. Je e ndo kain nchakon tinóatée ndo ngajin ndo Dio ixi ndako tsake enta tsitikaonnta xranchi tjaun ndo Dio.

¹³Jan an bikon ixi ndo Epafra tsango yaa ndo juachjaon ixi ja anta ko ixi kain sen ste tjajna Laodicea ko Hierápolis.

¹⁴*Ndo Lucas, ndo nchéña xraan, ndo tjua a,* xruan annta ndo juajna ko kaxon ndo Demas.

¹⁵Tájonnta juajna ngajin sen kichuuna ste tjajna Laodicea ko kaxon ngajin jan Ninfas ko sen xra o ndo a jan.

¹⁶Nchakon tsjexin sinchekuanxinnta xroon ji i, xruan annta xroon ngajin sen ste ni ngo tjajna Laodicea sinchekuanxin sen xroon ko kaxon nchekuanxinnta xroon kuayé e je e sen nchakon tsiji xroon ti stenta.

¹⁷*Ndachenta ndo Arquipo ixi tsitikaon ndo jian ixra tsikajon Ncháina sinche e ndo.

¹⁸Jan an Pablo tjáana kjinxin chijni ji i, chijni nichja anta. Xraonnta ixi jan an ritjén ngaxin in ndo achjiso, ko tja on ixi ndo Dio sintanchaonnta ndo. Jaña tson en.

4:1 Ef. 6:9. **4:5** Ef. 5:16. **4:7** Hch. 20:4; 2Ti. 4:12. **4:7** Ef. 6:21, 22. **4:9** Flm. 1:10-12. **4:10** Hch. 19:29; 27:2; Flm. 1:24; Hch. 12:12, 25; 13:13; 15:37-39. **4:12** Col. 1:7; Flm. 1:23. **4:14** 2Ti. 4:11; Flm. 1:24; 2Ti. 4:10; Flm. 1:24. * **4:14 tjua a** yo te amo **4:17** Flm. 1:2.

Xroon sa ó tsikjin ndo Pablo xruen en ndo sen ste tjajna Tesalonicenses

Ndo Pablo nichje e ndo sen Tesalónica

¹ *Jan an, Pablo, ko ndo Silvano ko ndo Timoteo ikjinna xroon ji i, xruan anna ngajinnta ja anta kichuuna stenta ni ngo tjajna Tesalónica ixi naakua titika onna Ndotáina Dio ko Ncháina Jesucristo. Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

Sen Tesalónica chaxro titikaon sen ko jian nche e sen

² Nanaó tajonna juasianana ngajin ndo Dio ixi kain ja anta ko xraxa onnanta.

³ Nchakon nichja ana Ndotáina Dio xraxa onnanta ixi jian tjakonta ko nchijíi asáanta chuntianta Ncháina Jesús ko rinche enta xrée ndo Dio ixi ícha tjue enta ndo ko soji stenta ixi stechon ennta xrokjan Ncháina* Jesucristo.

⁴ Kichuuna, ndo Dio tsango tjua anta ndo ko nónana ixi je e ndo ó kuincha anta ndo.

⁵ Nchakon juasona tjajnánta juentakuan annanta chijni jian tajon juachaxin tsechónni, méxin nge e nichjana je a je o chijni. Na i. Kaxon ixi juachaxien Espíritue ndo Dio nichjaxinna ko Espíritue ndo Dio juinchenónana ixi chijni nichjana me e chijni nduaxin. Ó no anta ixi jian juakoxinna ngajinnta ixi jian tsake enta.

⁶ *Ko ja anta juinche enta xranchi junta a jan anna ko kaxon juinche enta xranchi juinche e Ncháina Jesucristo. Ko nchakon kuin ennta chijnie ndo Dio, ixi nchijíi asáanta kuitikaonnta ndo ko stenta juaxruxin ixi Espíritue ndo Dio bingijnanta maski kueya nge e tangi kuatsinganta.

⁷ Jaña ja anta jian juakoxinnta ngajin kain sen titikaon Ncháina nunte Macedonia ko nunte Acaya.

⁸ Ixi ja anta itsjé chujni kono e na chijnie ndo Dio, je a je o nunte Macedonia ko nunte Acaya. Na i. Kaxon kain tjajna stetjenka nti a kuin en na xranchi chuntianta ndo Dio, ko jan anna íxrokonda i inaa nge e xronichjana,

⁹ ixi jai je e na chronga na xranchi juasona tjajnánta, ko kainnta kuajonnta juachaxin kuinteena nti a ko tjume e kuintu enta kain ídolo ixi kuaxinta kuitikaonnta ndo Dio, ndo nduaxin jichón.

¹⁰ Ko kaxon ndachro na ixi ja anta stechon ennta xrokjanxin ngajní Chjen en ndo Dio, me e ndo Jesús, ngisen ndo Dio juinchehexechón, ko je e ndo tsingijnana ndo ixi xro an nge e tsojna nchakon tsii ijié juachjaon xroxruan an ndo Dio ngataon nunte nti i.

2

Ixrā tsijinche e ndo Pablo tjajna Tesalónica

¹ Kichuuna, kainnta no anta jian ixi je a xruenxon juasona tjajnánta.

² *Ó no anta ixi sa ó chujni tjajna Filipos chinga juinchenana na ko nichjanganana na. Ko maski jaña kon en, ndo Dio bingijnanana ko íxronka ina juakona chijnie ndo, chijni tajon juachaxin tsechónna kain nchakon.

³ Je a naa nge e ndako a juakona ko je a ndako a nichjana ixi tja onna xrojuintaya ana chujni.

⁴ Ndo Dio ndachro ndo ixi jian junta ana, me e chjánana ndo ixrā ixi sintakuan anna chujni chijnie ndo, chijni tajon juachaxin tsechón na kain nchakon, méxin, ndako

nichjana. Tjaun ana ixi je o chujni sinche e juaxruxin ixra nta ana. Na i. Tja onna ixi ndo Dio sinche e ndo juaxruxin, ko je e ndo no e ndo kain nge e xraxaon aséeina.

⁵ Ja anta ó no anta ixi nichja ina chijni ícha chaxro ixi jaña xrojuintaya ananta ko xrojuachana kueya tomi. Na i. Ndo Dio no e ndo junta ina jaña.

⁶ Tjé ana ixi chujni xrochjana na juasaya, kaxon tjaun ana ixi ja anta ko ikaxin na tsajonnta juasaya ngajinna. Nta ina jaña, maski chondana juachaxin xrojuanchiana jaña ixi ndo Cristo xruan anna.

⁷ Jian kuanichja ananta xranchi naa janána jian tayakon en jan chjen en jan.

⁸ Tsango tjua ananta ko je a je o chijnie ndo Dio xrotjá ananta. Na i. Kaxon naaxrokuenxónna ixi ja anta ixi tsango tjua ananta.

⁹ Kichuuna, xraxaonnta ixi nchakon bake ena tjajnánta tsango junta ana ixra tiie ko nchakon ixi jaña juachana tomi sinexinna ixi tjaun ana xrokuajontaxinna ixra ngajinnta ixi nge e sinena nchakon nichja ananta chijnie ndo Dio.

¹⁰ Ja anta no anta ko no e ndo Dio ixi jian kuinteena ngajinnta ja anta chujni titikaon Ncháina Jesucristo ko xro an ngisen tsjankata ana ijie ixi xrojan nge e ndako a junta ana.

¹¹ Ja anta no anta ixi jian nichja ananta ixi ícha tsitikaonnta, méxin, nichjana xranchi naa ndotata nichja ngajin chjen en ndo.

¹² Ko ntatjunanta ixi jian sinche enta xranchi tjaun ndo Dio sinche e kain chjen en ndo ixi kuincha anta ndo ixi tsaye enta juachaxien ndo ko tsake enta ti jii je e ndo.

¹³ Méxin, kain nchakon tajonna juasaya ngajin ndo Dio ixi nchakon kuin ennta chijnie ndo, chijni jian, me e nichjana ko kuaye enta chijni xranchi chijnie ndo Dio, je a xranchi chijnie chujni. Ko ji i nduaxin chijnie ndo Dio, chijni nche e ixra ngaya asáanta, ja anta ti titikaonnta ndo.

¹⁴ *Kichuuna, nchakon chjinga junta anta ni tjajnánta, jaña kon en xranchi kon en sen ningue ndo Dio titikaon Ncháina Cristo Jesús ste nunte Judea, ixi nchakon kuaxi kuitikaon sen ndo, ni judío, ni tjajnee sen, kuaxi na kuaningakon en na sen ko bengi na sen.

¹⁵ *Ko ni judío naakóñaxón na Ncháina Jesús ko jaña kaxon naakóñaxón na sen kuachronga chijnie ndo Dio ó sa ó, ko jan anna bengina na. Ko ningakon en na kain chujni, ko ti nche e na nche a ndo Dio juaxruxin.

¹⁶ Méxin, nchakon tja onna xronichja ana chujni je a judío chijnie ndo Dio, chijni tajon juachaxin tsechónni kain nchakon, ni judío kuintuna ina na tsjakona. Jaña ícha tsama na ijie. Ko jai tangi tson en na ixi ó tsii juañaue ndo Dio ngata a na.

Ndo Pablo tjaun ndo saxrokuitsje e ndo sen tjajna Tesalónica íjngo

¹⁷ Kichuuna, maski sakjuixinna ngajinnta kaxin nchakon ko í bikon a kichuuna, xraxa onnanta ngaya aséenana ko tsango tja onna xrokuitsja ananta íjngo.

¹⁸ Tja onna xrojuasótsja ananta; jan an Pablo itsjé tja on xrojuasótsja anta, ko Xixron anxrée bingako na xa ko jua i juasona.

¹⁹ ¿Nge e stechon enna ko nge e stencheháxinna?, ko, ¿sonda juaxruxin stena? Ja anta stexin jan anna juaxruxin nchakon tsii Ncháina Jesucristo ixi kuitikaonnta ndo.

²⁰ Méxin, jan anna stena juaxruxin ixi ja anta kuitikaonnta.

3

¹ *Ko tsango koni e aséenana ixi jua i juasona, méxin xraxa onna cháña kuituna jan on tjajna Atenas,

² méxin xruan anna ndo kichuuna Timoteo tsijitsja anta ndo. Je e ndo naxraje o nche e ndo xrée ndo Dio ko tjako ndo chijnie ndo Cristo. Je e ndo syntaxraxaonnta ndo chijnie Ncháina Jesús, me e soji tsake e asáanta,

³ ko jaña ninaáanta tsonchrjen a asáanta ixi nge e tangi stetatsinganta. Ko ó no anta ixi xrokonda tsatsinganta juachjaon.

⁴ Ko ti xrobake ena ngajinnta, xrja ngana ixi kaina xrokonda tsatsingana juachjaon, ko jai jaña stetatsinganta.

⁵ Méxin, jan an ícha yaa juachjaon ixi ja anta ko xruan an ndo Timoteo tsijitsja anta ndo xranchi stenta, ixi, ¿á xrastechuntianta Ncháina?, ixi jixronkana ba Xixron anxrée sinchengachruenta xa ko tsintu enta chijnie Ncháina. Ixi siá jaña xrokon en, xruenxon junta ana xra ngajinnta.

⁶ *Ko jai ó kjanxin ndo Timoteo tjajnánta Tesalónica ko ndachro ndo ixi jian stenta ko chuntianta Ncháina, ko tsango tjue e kichuunta, ko ndachro ndo ixi tsango xraxaon-nanta ko tjaunnta xrobikonnanta xranchi jan anna tja onna tsikonnanta kaxon.

⁷ Méxin, kichuuna, maski tsango tangi stena nti i, tsango ché e aséenana ixi kuin anna ixi xranchijí asáanta chuntianta Ncháina Jesús.

⁸ Ko kuin anna xranchi stenta, me e ícha ijíe juaxruxin kuayé e aséenana ixi konónana soji stenta ko titikaonnta Ncháina Jesús.

⁹ ¡Ko xranchi tsjenga ana na ndo Dio ixi tsango ijíe juaxruxin kuayé e aséenana ixi ja anta titikaonnta ndo!

¹⁰ Méxin, tiie, nchakon tinóatánana ngajin ndo ixi tuinxin tsajon ndo juachaxin tsjasotsja ananta íjngo, ko me e tsingijnananta ícha xrochuntianta Ncháina.

¹¹ Tjanča ana ndo Dio, Ndotáina, ko Ncháina Jesucristo ixi tsingijnana ndo tuinxin tsjasotsja ananta,

¹² ko tjanča ana Ncháina ixi tsingijnanta ndo ícha xrotjue e kichuunta ko xrotjue enta kain chujni xranchi jan anna tjua ananta.

¹³ Ko tjanča ana ndo ixi sintasojinta ndo ixi nchijí asáanta tsitikaonnta ndo ko jaña xro an ijíe xrochondanta ngajin Ndotáina Dio nchakon xrokjan Ncháina Jesús ko tsika o ndo kain sen tjúa aséen.

4

Ndo Dio tjaun ndo jian tsinteena

¹ Jai kichuuna, tinóatánana ko ntaxraxaonnanta ixi juachaxien nombrée Ncháina Jesús ixi jian tsinteenta ko tsitikaonnta Ncháina Jesús xranchi juntakuan annanta ko jaña nche enta ngujngu nchakon ícha titikaonnta Ncháina.

² Ko ó no anta kain ti kuetuan annanta ixi juachaxien Ncháina Jesús.

³ Ko ndo Dio tjaun ndo ixi tjúa tsake enta ko xrochonda inta nge e xrotsje enta ngajin naa chujni je a janchri anta o ndoxi anta.

⁴ Ko ngujngu ja anta xrochondanta janchri anta ko jian tsakeku u kichuunta ko xrotjue e kichuunta.

⁵ Je a xrotjaunnta nge e ndako a sinche enta xranchi nche e chujni chúxin a ndo Dio.

⁶ Ninaáanta xrojuinckekao a kichuunta ti ndako a ixi Ncháina sincheni e ndo chujni jaña nche e, ó juntaxraxaonnta sa ó ji i.

⁷ Ixi ndo Dio kuiyana ina ndo ixi ti kitja tsojuna. Na i. Je e ndo kueya ndo ixi tjaun ndo tsontjúá aséeina ngajin ndo.

⁸ Ko sen titikaon a nge e tjakona, je a titikaon a sen ngajin naa chujni. Na i. Je e sen titikaon a sen ngajin ndo Dio, ndo kuajon Espíritu chondana.

⁹ Ko ti xrotjue e kichuuna, íxrokonda i xrokjinna ícha xroon ixi je e ndo Dio ó juintakuan anna ndo xranchi xrotjue enta kain chujni.

¹⁰ Ja anta kain nchakon jaña nche enta, tjue enta kain sen kichuuna ste nunte Macedonia. Ko tinóatánana ixi ícha xrotjue enta kain chujni.

¹¹ Xraxaonnta juaxruxin tinteenta. Ko ngujngunta xrokonda sinche enta ixra ixi tjáanta xranchi kuituan annta.

¹² Jaña tsikon chujni chúxin a ndo Dio ixi jian nche enta, me e jian xronichja anta na kaxon ko jaña tsjanchia inta xrojan nge e ngajin inaa na.

Nchakon tsij Ncháina Jesucristo

¹³ Kichuuna, tjaun ana ixi ja anta tsonoa inta nge e tson en chujni tsen en. Tjaun ana ixi tsoni e asáanta xranchi ni chuntia i ndo Dio.

¹⁴ Ko jaina titika onna ixi kuen en Ncháina Jesús ko xechón ndo, ko kaxon titika onna ixi ndo Dio juinchexechón ndo ndo Jesús, ko nchakon xrokjan ndo Jesús, tjume e sinchexechón ndo Dio kain sen tsiken en, sen chuntia ndo.

¹⁵ *Méxin, ntatjunanta xranchi juako nana Ncháina Jesús ixi siá stechónna nchakon tsij ndo, sa ó xroxechón sen tsiken en ko tjume e jaina satsjina ngajin ndo.

¹⁶ Ncháina Jesús tsi xin ndo ngajni ko séen xronichja ndo ixi ijié juachaxin chónnda ndo, ko séen tsin enni xronichja ndo ángel tetuan an, ko kaxon séen tsin enni xrondachro tjao ne e ndo Dio. Ko tjume e kain sen tsiken en, sen kuitikaon Ncháina Jesucristo, xroxechón sen.

¹⁷ Tjume e jaina xrastechónna ko kain sen tsixechón, kainna satsjina ngakjen en tjuj tsutaxinna ndo Jesús. Jaña tsojuna ngajin ndo kain nchakon.

¹⁸ Méxin, chijni ji i nichjaxinnanta ixi juaxruxin tsinteenta.

5

¹ Kichuuna, nchakon tson en ji i, íxrokonda i xrokjinna.

² *Ja anta no anta jian ixi nchakon xrokjan Ncháina, tson en xranchi naa nchakon noe ani xrokui naa xiche e tiie, tsee xa.

³ Nchakon xrondachro na ixi jai juaxruxin ste na ko xro an nge e tson en na, nchakon me e tsij juachjaon ijié ko ijié juaxrakon. Tson en xranchi naa nchri yaa ichjan noe ani ngiora tsoni e nchra, jaña tson en chujni, jua i satsinga na.

⁴ Méxin, ja anta kichuuna, je a naxixe e stenta méxin xroxrakon anta nchakon tsij Ncháina Jesucristo ixi je a xranchi xrokuji naa xiche e sintaxronkanta xa.

⁵ Jai ja anta stenta ti tingasáña. Jaina je a tiie tikinixinna ko ste ana ti naxixe e.

⁶ Méxin, cháña tarichrin anta xranchi stejua ikaxin na; jaina xrokonda jian xrotsje ena ko jian xroxraxaonna.

⁷ Ixi, ni tejua, tiie tejua na, ko ni kuan, tiie kuan na.

⁸ *Ko jaina stena ngajin ndo Dio, ndo nchengasáña; méxin, xrokonda jian tsojuna ko xrotjue e kichuuna ko xrochuntiana Ncháina xranchi naa xi soldado teya xa chika ixi tsonie a ntakuin xa ko take e xa naa chika tseyá jaa xa ixi xro an nge e tson en xa, jaña jaina xrochon enna tsij Ncháina tsajon juachaxin tsechónna.

⁹ Ko Ndo Dio je a kuiya ina ndo ixi tsikaonna. Na i. Kuiye e ndo jaina ixi tsechónna kain nchakon* ixi juasie ndo Jesucristo.

¹⁰ Ndo Jesucristo kuen en ndo ixi jaina ixi jaña tsojuna ngajin ndo kain nchakon, á stechónna o tsike enna nchakon xrokjan ndo.

¹¹ Méxin, tingijna ko jian nichje e kichuunta xranchi ó stenze enta.

Ndo Pablo nhexraxaon ndo sen titikaon ndo Cristo

¹² Kichuuna, tinóatánana ixi tsitikaonnta sen stenze e xrée ndo Dio ngajinnta ko chronga sen chijnie Ncháina Jesús.

¹³ Chonde enta sen juasaya ko tjue enta sen ixi ixra jian nche e sen. Ko ja anta jian tinteku u kichuunta.

¹⁴ Kaxon tetuan annta ixi tuyakutéenta sen se e, tjaun a sinche e xra ko tingijnanta sen stenciin aséen, ko tingijnanta sen soji a, ko tuyakute anta chujni.

¹⁵ Jian tsje enta xro an ngisen tsjenge e ngajin sen kichuu ixi ndako a juinchekao kichuu sen. Cháña jian nche enta ngajin sen kichuunta ko ngajin kain chujni.

¹⁶ Kain nchakon juaxruxin tinteenta,

¹⁷ ko nichje enta ndo Dio kain nchakon.

¹⁸ Tájonnta juasianta ngajin ndo Dio maski tangi ritjennta ixi jaña tjaun ndo sinche enta ixi ja anta tikinixin ennta Ncháina Cristo Jesús.

¹⁹ Nchekanga inta juachaxin chóna Espíritue ndo Dio jii ngajinnta.

²⁰ Nichjangie anta sen kichuuna; chronga nge e tjaun ndo Dio.

²¹ Jian tsje enta nge e chro sen. Ko siá ti ndachro sen me e jian, titikaonnta.

²² Tintu enta kain ti ndako a.

²³ Ko ndo Dio, ndo tajon kain juaxruxin, je e ndo sinchetjúá ndo asáanta ko tsingijna ndo asáanta ko cuerpoanta ko tsingijna ndo xrochonda inta xrojan ijię nchakon xrokjan Ncháina Jesucristo.

²⁴ Ndo Dio, ndo kuiya anta, je e ndo nduaxin nche e ndo ti ndachro ndo.

Ndo Pablo juexin nichje e ndo sen

²⁵ Kichuuna, tjanche enta ndo Dio ixi tsingijnana ndo.

²⁶ Ko tájonnta juajna ngajin kain sen kichuuna nti a.

²⁷ Tituan annta ixi juachaxien Ncháina Jesús xrondachenta sen kichuuna nge e ichro xroon xruan annta.

²⁸ Ncháina Jesucristo sintanchaonnta ndo. Jaña tson en.

Xroon yuxin tsikjin ndo Pablo xruen en ndo sen ste tjajna Tesalónica

¹ *Jan an, Pablo, ndo Silvano ko ndo Timoteo xruan anna xroon ngajinnta ja anta kichuuna ni ngo tjajna Tesalónica ti steniinta Ndotáina Dio ko Ncháina Jesucristo.

² Ndotáina Dio ko Ncháina Jesucristo, sintanchaonnta ndo ko xrotjáanta ndo juaxruxin.

Ndo Dio sinchéña ndo ijie ti xrokjan ndo Cristo

³ Kichuuna, kain nchakon xrokonda tsajonna juasiaina ixi ja anta ngajin ndo Dio. Me e tikinixin sinta ana, ixi ja anta kain nchakon ícha chuntianta Ncháina ko ícha tjue e kichuunta.

⁴ Méxin jan anna jian nichjana ixi ja anta ngajin sen kichuuna, sen ningue ndo Dio, ixi juaxruxin stena ixi ja anta ícha soji chuntianta Ncháina Jesús, maski stetatsinganta juachjaon ixi jii chujni ningakon annta.

⁵ Ji i tjako ixi nduaxin ndo Dio jian nchéña ndo ijie ngajinnta ixi juachjaon stetatsinganta, me e xrondachro ixi tikinixin tsixin innta ti tetuan an ndo Dio.

⁶ Kaxon ndo Dio sinchéña ndo ijie ngajin ni ndako a junta anta; je e na tsayé e na ijie juachjaon.

⁷ Ko ja anta ti xrastechondanta juachjaon, tsjoka anta xranchi jan anna. Jaña tson en nchakon tsj xín Ncháina Jesús ngajni ko ngusine xro i tsonoxin ndo ko tsika o ndo kain sen ángel, sen chóna juachxin.

⁸ Tsij ndo Jesucristo ixi sinchéña ndo ijie ngajin kain chujni kuitikaon a ndo Dio ni ko kuitikaon a chijni jian nichja Ncháina Jesucristo.

⁹ Chujni ji i ijie juachjaon ko tangi tsikon na kain nchakon ko nai a tsjexin ti tsikaon na, ko je e ndo tsengi ndo na satsji na ntá a ko ítsikon a na ti ijie juachxin chóna ndo.

¹⁰ Jaña tson en nchakon tsij Ncháina Jesús ixi kain sen tjúa aséen ko kain sen kuitikaon chijnie ndo, sen me e tsajon sen juasaya* ngajin ndo ko kao ja anta ixi kuitikaonnta ti nichjana.

¹¹ Méxin, kain nchakon tjanca ana ndo Dio ixi jian tsake enta xranchi tikinixin tsake e sen kuinche e ndo; ko tsingijnanta ndo ixi nduaxin tsjachanta sinche enta kain ixra jian tjaunnta sinche enta ixi chuntianta ndo.

¹² Jaña ja anta tsajonnta kain juasaya ngajin Ncháina Jesucristo ko kaxon je e ndo jian xronichja ndo ixi ja anta ixi titikaonnta ndo. Jaña tson en ixi juachaxien ndo Dio ko Ncháina Jesucristo ixi tsango jian ndo.

2

Tsonoxin xi ña i

¹ *Jai kichuuna, xronichjana ixi nchakon tsij Ncháina Jesucristo ko tsetanna ndo, tinóatánana ngajinnta

² ixi tindoxin anta chijni jian kuaye enta ko ó kuitikaonnta, ko tintue anta ixi ngixeko chujni xrondachro ixi ó juexin kuitja nchakon tsij Ncháina Jesús, ko tien anta ni ndachro ixi kuayé e na naa xroon xranchi naa xroon xruan an jan anna ti xrondachro ixi ó kujj nchakon me e.

³ Tintue anta ixi xro an chujni sintaya anta jaña, ixi nchakon tsij Ncháina Jesucristo xrokonda sa ó itsjé chujni tsetoka o kichuu na xroningakon en na ndo Dio, ko tsonoxin naa xi tsango ña i, xi me e xrokonda tsitjáña xa.

⁴ Xi ji i, xi ningakon en kain nge e ne e ndo Dio, xroxraxaon xa ixi ícha chóna xa juachaxin ixi ndo Dio ko kain nge e tikinixin en ndo, ko xi me e tsjacha xa tsake e xa ngaxin in ningue ndo Dio ko xrondachro xa ixi je e xa ndo Dio xa.

⁵ ¿Á xraxaon anta ixi jan an ó ntatjunta nchakon bake e ngajinnta ixi jaña xrokon en?

⁶ Ko jai ja anta ó no anta nge e tingakon en ixi xrati a nchakon tsonoxin xi me e.

⁷ Ko kain ti ña i ó imao jiton en. Je o titjáña satsji ngisen jitingakon en xa.

⁸ Tjume e xiña i tsonoxin xa ko Ncháina Jesús ixi chrinto tsachrjexin ro a ndo tsóñaxin ndo xa, ko jaña tsitjáña xa ixi chjiixro ijié tsika o ndo Jesús tsoenxin ji i.

⁹ *Ko xiña i me e tsika o xa ijié juachaxin tsajon Xixron anxrée, ko me e tsjakoxin xa ixi sinchexrjuen en xa chujni ko ikaxin ixra ijié sinche e xa, kain ji i je a nduaxin, je o sincheye e xa chujni.

¹⁰ Ko kain chijni ña i sincheyexin xa kain chujni tikinixin tsitjáña ixi ni me e tjaun a na kuitikaon na chijnie ndo Dio, chijni tingijna tsachrjengi e na ije ko tsechón na kain nchakon.

¹¹ Méxin, ndo Dio tsintu e ndo na tsitikaon na kain nge e nduaxin a ko kain juancheya tsin en na.

¹² Ko jaña tsama na ije kain ni kuitikaon a chijni nduaxin ixi ícha juinche e na juaxruxin kain ti ndako a tjako Xixron anxrée.

Sen kuinche e ndo me e sen tsechón

¹³ Kichuuna jan anna kain nchakon xrokonda tsajonna juasianana ixi ja anta ngajin ndo Dio. Ko Ncháina Jesús tjua anta ndo ixi ndo Dio kuincha anta ndo, ixi je e ndo xraxrangixixión kuincha anta ndo ixi xrokomé e jíanta ko jaña tsarichonnta kain nchakon, ixi juasie Ncháina Jesús ko Espíritue ndo tsingijna tsontjúá asáanta ixi chuntianta chijnie ndo.

¹⁴ Je e ndo Dio kuiya anta ndo ixi xrochondanta juachaxin tsarichonnta kain nchakon ixi kuitikaonnta chijnie ndo, chijni juako ananta. Jaña tsaye enta juachaxin tajon Ncháina Jesucristo.

¹⁵ Méxin, kichuuna, soji take énta, ko tjáña inta chijni juntakuan anntana nchakon bake ena ngajinnta ko ti chronga xroon kjin annanta.

¹⁶ Ncháina Jesucristo ko Ndotáina Dio jian ndo ixi tjaunna ndo, ko tajon ndo juachaxin ixi juaxruxin tsake e aséina ko xrochuntiana ixi kain nchakon tsojuna ngajin ndo.

¹⁷ Ko je e ndo sinchesoji ndo asáanta ko jaña soji tsake enta kain nchakon, ko je e ndo tsajon ndo juachaxin ixi xronichjanta ti nduaxin ko sinche enta kain ixra jian.

3

Tjanche enta ndo Dio ixi jan anna

¹ Ko jai tjanche ananta, nichje enta ndo Dio tsingijnana ndo ixi kain tjajna ngata a nunte taka tsayé e na chijnie Ncháina, ko chujni ji i jian tsayé e na chijni ngaya aséen na, xranchi kon en ngajinnta.

² Ko kaxon tjanche enta ndo Dio ixi tsingijnana ndo ixi ni ningakon en chijni jian, tsingakóna ina na ixi ste kaxin ni chúntia i Ncháina Jesucristo.

³ Ko Ncháina nduaxin jian ndo, je e ndo tsingijnanta ndo ixi soji tsake enta, ko je e ndo tsintue a ndo ixi xiña i sinta anta xa xrojan nge e.

⁴ Ko jan anna chuntiana ixi Ncháina tsingijnanta ndo ixi stenche enta ko sinche enta kain ti jian xranchi kuetuan annanta.

⁵ Ko Ncháina tsingijnanta ndo xrotjue enta chujni xranchi je e ndo juakoxin ndo tjaunna ndo, ko tsingijnanta ndo Cristo ixi soji tsinteenta maski tangi tsatsinganta.

Sen titikaon ndo Cristo xrokonda sinche e sen ixra

⁶ Kichuuna, tetuan ananta ixi juachaxien Ncháina Jesucristo, tjento anta íkaxin sen kichuuna, sen tjaun a nche e ixra ko nche a sen xranchi juntakuan annanta.

⁷ Ja anta ó no anta xranchi sinche enta ti juako ananta nchakon bake ena ngajinnta, ixi jan anna nai a kuintu ana junta ana ixra.

⁸ Ko kain nchakon juengana na ti juinena. Ko junta ana ixra tiie, nchakon ixi jaña kuajondaxin ana ixra ngajinnta ixi ti sinena.

⁹ Maski kuachondana juachaxin xrojuanchia ananta xrobingijnananta, ko junta ina jaña. Jan anna junta ana ixra ixi jaña juako ananta xranchi sinche enta.

¹⁰ Méxin, nchakon bake ena ngajinnta kuetuan annanta ixi: Ngisen tjaun a sinche e ixra, sine a sen.

¹¹ Ó konónana ixi kaxin ja anta nche anta ixra, ko tjikekanta nge e ti konda inta ko nche anta xra.

¹² Méxin, ni me e ntatjanna na ixi juachaxien Ncháina Jesucristo ixi xrokonda sinche e na ixra tsjachaxin na ti sine na.

¹³ Ko ja anta, kichuuna, tonchrje anta nche enta ti jian.

¹⁴ Ko siá xrojan ngisen titikaon a nge e ikjinna ngaya xroon ji i, tsje enta jian ngisen me e, ko tjeto anta sen ixi jaña tsosue e sen.

¹⁵ Ko ningakuen anta sen me e. Cháña nichje enta sen xranchi naa sen kichuunta ixi í sinche a sen jaña.

Juexin nichja ndo Pablo

¹⁶ Ko Ncháina, ndo tajon juaxruxin, je e ndo tsajon ndo juaxruxin ngajinnta kain nchakon ko je e ndo tayakon annta ndo kainnta.

¹⁷ Jan an Pablo, tjáana kjinxin juajna ji i. Jaña tsatsuan xinnta kain xroon ikjin jan an.

¹⁸ Ncháina Jesucristo sintanchaonnta ndo kainnta ixi juachaxien ndo. Jaña tson en.

Xroon sa ó tsikjin ndo Pablo xrúen en ndo ndo Timoteo

Ndo Pablo kjin en ndo ndo Timoteo

¹ Jan an, Pablo, nta a xrée Ncháina Jesucristo ixi jaña tjaun ndo Dio, ndo tajon juachaxin tsechón chujni kain nchakon, ko ndo Jesucristo, ndo chon enna tsii íjngo.

² *Ja a Timoteo kjin an xroon ji i ko xrúan an juajna, ja a chjan na, xjan nduaxin chuntia* Ndotáina Dio ko Ncháina Cristo Jesús. Je e ndo tsikonóa a ndo ko sintanchaoan ndo ko xrotjáa ndo juaxruxin.

Tsii chujni ndako a tsjako chijnie ndo Dio

³ Xranchi kuinóatáana ngajian nchakon sakjuí tjajna Macedonia, ja a titu a tjajna Éfeso ixi tsetuen en kaxin ni ste nti a, ni ndako a tjako chijnie ndo Dio, ítsjako a nā jaña,

⁴ ko tetuen en nā tsitikaon a nā chijni xro an xrée, chijnie ni bake e sa ó. Chijni me e je o ncheke to nā ko tjakaxin kichuu nā ko xro an xrée chijnie me e, ixi kain me e tingijna i tsichuxin nā nge e tjaun ndo Dio ixi je e ndo tjaun ndo ícha xrochúntiani ngajin ndo.

⁵ Jan an tetuan an ji i ixi kain sen ícha xrotjue e kichuu sen ixi ti xrotjue e kichuu sen me e ícha tsontjúá aséen sen ko ti jian xraxaon sen ko me e tsjako ixi nduaxin chuntia sen Ncháina Jesús.

⁶ Ko ikaxin sen tjáñe e sen ixi xrotjue e kichuu sen, je o tjakaxin sen ko ji i tingijna i sen.

⁷ Je o tjaun sen xrokjan sen xranchi ni tjako ley ko tienxin a sen me e, ko tienxin sen nge e tjako sen xranchi xrokjui chijni jian.

⁸ Ko jajna nojna ixi nge e kuetuan an ndo Dio me e jian, siá jajna nduaxin sinchekuen enna chujni xranchi tjaun je e ndo.

⁹ Ó nojna ixi ley kuetuan an Ncháina, je a jii kondeexin ni jian nche e. Ley kuetuan an ndo Dio jii ley kondeexin ni ña i ko ni titikaon a, ni yama ijie, ni nichjangí e ndo Dio ko ni titikaon a ti nichja ndo ko ni naatóñaxón ndotée ko janée ko ikaxin chujni,

¹⁰ ko kaxon ni chóna inaa chujni je a janchri e ko je a ndoxi e, ko xi tejuakao xi, ko nchri tejuakao nchri, ni tee ko ni nchekji chujni, ko ni ncheya, ko ni nichjaxin ndo Dio ixi je e nā nche e nā ti jian ko nduaxin a me e. Méxin ley kuetuan an ndo Dio jii ley ixi tsingijna kain ni titikaon a chijni jian.

¹¹ Ixi ji i chijni nduaxin ko jian tajon juachaxin tsechón chujni, ko ji i ti kuetuanna ndo Dio, ndo tjúá, tsjako anta.

Nge e jian juinche e ndo Dio ngajin ndo Pablo

¹² Tajon juasiana ngajin Ncháina Jesucristo ixi juinchesojina ndo ko bikon ndo ixi jian titika on ndo, me e chjána ndo ixra sinta a ngajin ndo.

¹³ *Maski seno kuanichjangí a ndo ko bakitikaon a ndo ko bakengi sen titikaon ndo ko chinga banichja kondee je e ndo, ko maski jaña junta a, ndo Dio tsango bikonóa na ndo ixi nchakon me e nóna i nge e junta a ko kuichuxin a ndo.

¹⁴ Ko Ncháina Jesús tsango juinchenchaonna ndo ixi kuajon ndo juachaxin tsitika on ndo, ko jaña chuntia ngajin ndo ko tjua a† sen kichuuna ixi titika on ndo.

¹⁵ Ji i ti nduaxin ko xrokonda ixi kaina tsitikaonna ixi ndo Jesucristo kujj ndo ngata a nunte ixi tsantsje ndo ijie chóna kain chujni. Ko jan an ícha ndako a junta a.

¹⁶ Ko maski jaña junta a, ndo Dio ícha bikonóa na ndo ixi jaña juakoxin Ncháina Jesucristo ixi je e ndo tsango jian ndo ko kuindoxinna ndo me e jan an juakoxin ngajin kain chujni ixi sen tsitikaon ndo xrochóna sen juachaxin tsechón sen kain nchakon.

¹⁷ Méxin xrokonda tsajonna kain juasiaina ngajin ndo Rey tsake e kain nchakon, ndo nai a tsen en ko chujni jua i tsikon na ndo. Ko je o je e ndo Dio tituan an ndo, ndo tsango no e kain nge e. Jaña tson en.

¹⁸ Timoteo, ja a chjan na, ko tetuan an ixi tsjacha tsetua ngajin ni ndako a tjako chijni ixi chuntia Ncháina ko jian xraxaoan. Ko ja a sinche e ti jian xranchi nichja sen kichuuna nchakon kuaye é xrée Ncháina, sen nichjaxin ixi juachaxien ndo Dio.

¹⁹ Ixi kaxin sen ndako a xraxaon sen, méxin juinchetjáña sen ti jian bakitikaon sen Ncháina.

²⁰ Jaña konen xi Himeneo ko xi Alejandro, méxin jan an kuajon xa ngajin Xixron anxrée ixi tsikaa jaa xa ko tsono e xa ixi jua i xronichjangí eni ndo Dio.

2

Xranchi xronichje ena ndo Dio

¹ Titikaonnta nge e tetuan annta ixi xronichje enta ndo Dio, ko tinóatáanta ngajin ndo, ko tájonnta juasianta ngajin ndo ixi chao tsintee kain chujni.

² Xrokonda tsjanche enta ndo Dio ixi tsingijna ndo kain ni tetuan an ixi jaña ícha jian tsojuna, me e tsinteketo a chujni ko tsitikaonna ndo Dio ko jian sinche ena.

³ Kain ji i jian ixi jaña tjaun ndo Dio, ndo tajon juachaxin tsechónna kain nchakon.

⁴ Ixi je e ndo tjaun ndo tsechón kain chujni kain nchakon ko tjaun ndo ixi tsono e na chijnie ndo, chijni nduaxin.

⁵ Naakua ndo Dio jii ko naakua ngisen nichjaxin chujni ngajin ndo Dio, me e ndo Jesucristo, ndo konoxin xranchi chujni ngata a nunte xasintajni.

⁶ Je e Ncháina Jesucristo kuajon ndo aséen ndo ko kuen en ndo, me e jaña juenga ndo na jíee chujni. Ji i kon en xranchi ti tsindachro ndo Dio.

⁷ *Ndo Dio tjaun ndo tsono e chujni kain ji i, méxin kuiya na ndo ko kuayá a ixra sintano a chujni, ni je a judío, ixi tsitikaon na Ncháina Jesucristo, ko tsono e na nge e ti nduaxin. Ko jan an ti nduaxin nichja ixi titika on ndo Cristo.

⁸ Tja on ixi kain sen xi xronichje e sen ndo Dio ngixe i ti no ste sen, ko tsjatsi in itja sen ixi tjúa aséen sen, ko tsjakaxin a kichuu sen, ni tsoñao a kichuu sen.

⁹ *Ko tja on ixi kain nchri ndako tsintetsáa nchra ko tsake a nchra manta ntarichi ti ícha sinchexroan ni xi, ko tsite a jaa nchra ixi tsikonni tsango tsoxruinta kui te jaa nchra, ko tsake a nchra ntachika oro o ixro tjintee.

¹⁰ Jaña sinche e sen nchra ti jian xranchi tikinixin nche e kain nchri tajon juasie ngajin ndo Dio.

¹¹ Ko nchakon tsin en sen nchri chijnie ndo Dio xrotenko sen ko tsitikaon sen kain nge e.

¹² Ko tajon a jan an juachaxin ixi sen nchri xronichja sen ti jii kueya chujni ko je e sen tsetuan a sen ngajin ndoxi e sen ko xrokonda xrotenko sen,

¹³ ixi ndo Dio sa ó juinchéña ndo ndo Adán ko tjume e jan Eva.

¹⁴ Ko je a ndo Adán kuitikaon ndo juancheya tsindachro Xixron anxrée. Je e jan Eva kuitikaon jan nge e nichja Xixron anxrée, me e kuama jan ijie.

¹⁵ Ko nchri xro an tson en nchra siá sinchejongí e nchra chjen en nchra ko sinchekangi nchra xjan, ko siá tsitikaon nchra ndo Dio ko siá xrochuntia nchra ndo ko xrotjue e nchra ndo ko jian xroxaxaon nchra.

3

Xrokonda jian sinche e sen tjaun tsituan an ni ngo

¹ Nduaxin ji i: siá xrojan ngisen tjaun ícha tsituan an sen ni ngo, jian ixra tjaun sen.

² *Méxin ngisen tjaun sinche e ixra ji i ko ícha tsituan an sen, xrokonda jian tsake e sen, jaña xro an chujni xronichjangí e sen ko tsjankata i na sen xrojan ijie, ko kaxon xrochóna sen naakua janchri e sen, ko jian xroxraxaon sen nge e sinche e sen, jaña chujni jian xronichja na ixi je e sen, ko jian xronichje e sen ni tsiji ndo a sen, ko jian tsono e sen nge e sinchekuen en sen chujni.

³ Ko xrokonda xrokuan i sen ko tsetokao a sen chujni. Xrokonda tsingijna sen chujni ko jian xronichje e sen chujni ko xrotjue a sen tomi.

⁴ Ko jian tsetuen en sen ndo a sen ko tsetuen en sen chjen en sen ixi tsitikaon xjan ko xrochóna xjan juasaya.

⁵ Ixi ngisen noe a tituan an ndo a, ¿xranchi tsituen en sen sen ningue ndo Dio?

⁶ Ko ngisen tjaun sinche e ixra ji i, je a naa sen nandá kuaxi kuitikaon ndo Dio, ixi ngisen nandá titikaon ndo ba sinchejie aséen sen ko tsama sen ijie xranchi kon en Xixron anxrée.

⁷ Kaxon xrokonda jian sinche e sen ixi jaña chujni chúxin a chijnie ndo Dio jian xronichja na ixi je e sen, ko jaña sinche a sen ti ndako a tjaun Xixron anxrée.

Xranchi sinche e sen chóna ixra diácono ngaxin in ni ngo

⁸ Kaxon sen kuayé e ixra diácono, xrokonda jian xronichja na ixi je e sen, ko xrokonda nduaxin sinche e sen ti ndachro sen, ko xrokuan i sen, ko tsayé a sen tomi ixi tson en naa ixra ndako a.

⁹ Jaña kaxon chijni jian kuayé e sen xrokonda jian tsitikaon sen ko jian xroxraxaon sen.

¹⁰ Sen tjaun sinche e ixra diácono sa ó tsatsinga kaxin nchakon tsjakoxin sen ixi nduaxin jian titikaon sen, ko tjume e chao sinche e sen ixra me e.

¹¹ Jaña kaxon sen nchri xrokonda jian xronichja na ixi je e sen ko xronichja i sen ti juancheya ko ti ndachro sen xrokonda nduaxin sinche e sen.

¹² Sen diácono je o naa janchri e sen xrochóna sen ko jian tsetuen en sen chjen en sen ko sen ndo a sen.

¹³ Ixi sen jian sinche e ixra, chujni xrochónde e na sen juasaya ko tsosue a sen xronichja sen xranchi kuaxi kuitikaon sen Ncháina Jesucristo.

Chijni nduaxin titika onna

¹⁴ Maski tja on tuinxin tsjasotsja a, jai kjin an xroon ji i

¹⁵ ixi siá tsonchrjenna, ja a tsono a xranchi sinche e ixra ngajin sen kichuuna, sen tikinixin en ndo a ndo Dio, ndo jichón. Sen ni ngo xrokonda jian tsitikaon sen chijni nduaxin.

¹⁶ Ko ti chijni nduaxin kuaye ena me e chijni ícha tjintee ko chujni kuachúxin a na chijni ji i ko nduaxin nge e titika onna:

Ndo Jesucristo jongí e ndo nti i nunte xasintajni* xranchi naa chujni;

Ko Espíritue ndo Dio juakoxin ixi ndo Jesucristo jian ndo.

Ko sen ángel bikon sen ndo

ko kaxon nchijí nunte xasintajni kuin en na nge e kuanichja ndo

ko kueya chujni jii ngata a nunte stetitikaon na ndo.

Ko tjume e ndo Dio kuayé e ndo ndo Jesucristo ti jii ngajní.

4

Ni tsitikaon a ndo Dio

¹ Ndachro Espíritue ndo Dio nchakon tsaxi tsjexin nunte xasintajni, kaxin sen kuitikaon ndo Dio tsachrjendáa sen ixi xrorué e sen espíritue xi ña i, xi ncheya, ko tsitikaon sen nge e tjako xi nche e xrée Xixron anxrée.

² Je e sen tsin en sen nge e ndachro chujni ncheya, chujni xraxaon a ndako, ni tosue a nche e ti ña i.

³ Ko ni ji i tsituan an ña ixi tsute a sen ko sine a sen kain nge e ti ineni juinchéña Ndo Dio, ko ti juinchéña ndo Dio chao sine sen titikaon ndo ko chúxin chijni nduaxin, me e tsajon sen juasaya ngajin ndo.

⁴ Ixi jian kain nge e juinchéña ndo Dio ko jua i xrondachrona je a jian; ko hora sinena xrokonda tsajonna juasaya ngajin ndo,

⁵ ixi chijnie ndo ko ti nichje ena ndo, me e sinchenchaonxin ndo kain nge e sintena.

Naa sen jian nche e xrée ndo Jesucristo

⁶ Ko siá ja in sinchekuen én sen kichuuna, me e ja a naa xi jian nche é xrée Ncháina Jesucristo, ko kain nchakon tangia chijnie Ncháina ko chuntia ngajin ndo.

⁷ Titikaon a ngixeko chijni tseki a ña ixi xro an xrée me e. Ja a titikáon Ncháina ko ja a nche e nge e tjaun ndo Dio.

⁸ Ko maski chujni tinga o ngixe i ejercicio nche e ña ixi cuerpoena ixi jaña tingijna tsonié a ña ko ícha tjintee ti tsitikaonni ndo Dio, ixi ji i tsingijna tsjachani jian tsake eni jai ko ti tsechónni kain nchakon.

⁹ Chijni ji i, chijni nduaxin ko chijni ji i xrokonda tsayé e kain chujni.

¹⁰ Méxin jaina nche ena xrée ndo Dio maski chinga ncheina chujni ixi titika onna ko stechon ena tsij ndo Dio, ndo jichón, ixi je e ndo nduaxin tsingijna ndo chujni ko jaina ícha ixi jaina titika onna ndo.

¹¹ Kain ji i tjakua ko tetuen én sen sinche e sen.

¹² Jian nche e ixi jaña tsjakua ngajin sen titikaon Ncháina Jesús. Ja a jian tsje e nge e nichja, ko chónde e sen juasaya,* jian tsje e xranchi tjue e sen kichuua ko xranchi chuntia ndo Dio, xranchi jian tsajia. Ja in sinche e, me e tsjanoai a sen maski tsango chajan ja a.

¹³ Ti xratjaso a jan an, ja a nichja chijnie ndo Dio ixi tsin en kain chujni ko nchexraxaon sen kichuuna xranchi sinche e sen, ko nchekuen én sen chijnie ndo Dio.

¹⁴ Nchetjáña ia juachaxin tjáa ndo Dio nchakon sen tetuan an ni ngo bake e itja sen ngata a jáa. Me e kuaye é ixi juachaxien ndo Dio.

¹⁵ Jian nche é ixra ji i ixi jaña kain chujni xrotsje e ña ixi jian rirue é ndo Jesucristo.

¹⁶ Jian tsje e xranchi nche e ko ti nchekuen én sen kichuuna chijni nduaxin, jian titikáon, ko siá jaña sinche é, me e tsarichuan kain nchakon ja a ko kaxon kain sen sinchekuen en.

5

Xranchi xronichje ena sen titikaon ndo Cristo

¹ Chaxro nichje é sen tachrí; tuyakute a sen. Ko ti xrondache sen, nichje é sen xranchi xronichje é ndotáa. Ko kain chajan nichje é chán xranchi naa xjan kichuua.

² Sen nachrí nichje é sen kaxon xranchi xrokjui janáa. Ko nchrichajan, nichje é nchrichan xranchi nichje é naa nchrichan kichuua; kain sen, jian nichje e sen.

³ Ko tingijna nchri ka an siá nduaxin xro an sen ndo a nchra chónda nchra.

⁴ Ko siá xrojan nchri ka an chónda chjen en nchra o xjantié nchra, je e sen me e tikinixin en sen tsingijna sen nchra ko kaxon xrokonda tayakon en sen sen ndo a sen, janée sen o Ndotée sen, ixi kain ji i nche e ndo Dio juaxruxin.

* 4:12 juasaya respeto, honor

⁵ Sen nchri nduaxin ka an ko je o sen tsikitu e sen, ícha xrochuntia sen ndo Dio ko ícha tinóatée sen ngajin ndo ko nichje e sen ndo tiie, nchakon.

⁶ Ko sen nchri, sen ka an, ndako a nche e, sen nchri me e xranchi tsiken en sen jii sen maski jichón sen.

⁷ Tetuen én kain sen tsitikaon sen ti nchekuen en sen, ixi jaña xro an chujni xronichja ndako a ixi je e sen.

⁸ Ko siá xrojan ngisen tsingijna i sen kichuu sen ko sen ndo a sen, sen me e tjako sen ixi nduaxin a titikaon sen ndo Dio ko ícha ña i sen ixi ni chúxin a ndo Dio.

⁹ Ko ti tsixintaxin xroon sen nchri, sen ka an, je o tsixintaxin sen chóna ní ti ikán* o ícha nano, ko je o tsixintaxin sen nchri kuachóna naakua ndoxi e.

¹⁰ Kaxon xrokonda tsichuxin na sen nchri, sen ka an ixi ndako nche e sen, xranchi tjaun ndo Dio: sen nchri ka an chaxro juinчекangi sen chjen en sen ko sen ka an jian nichje e sen kichuu sen ko jian kuiye e sen ni kuiji ndo e sen, ko jian bingijna sen sen titikaon ndo Cristo, ko bingijna sen ni ni e, ko kaxon bingijna sen ngajin ni chóna juachjaon, ko juinche e sen kain ixra jian.

¹¹ Ko tasintaxin anta nchri, sen ka an, xranrichájan, ixi ba sinche e sen juaxruxin tsute e sen íjngo ko tsintu e sen ti ndachro sen xrojuinche e sen ixra ngajin Ncháina Jesucristo.

¹² Kondeexin me e tsama sen ijie ixi sinchejexin a sen ixra xrojuinche e sen ngajin Ncháina.

¹³ Ko kaxon sen nchri, sen ka an, xranrichájan chrijiko sen nchia ko nchia, ko se e sen ko je a je o me e; kaxon teki sen chijni konde a sen ko tajon ro a sen ko nichja sen chijni ndako a.

¹⁴ Méxin tja on ixi sen nchri, sen ka an xranrichájan cháña tsute e sen íjngo ko xrochóna sen chjen en sen ko jian tayakon en sen ndo a sen. Ko jaña tsajon a sen juachaxin ngajin Xiña i ixi tsjangí e xa sen.

¹⁵ Ixi kaxin sen nchri, sen ka an ó ngaxiton sen ko sterué e sen nge e tjaun Xiña i.

¹⁶ Siá xrojan sen kichuuna, chóna sen nchri ka an, xrokonda tayakon en sen sen ka an ixi jaña sen ni ngo ísingijna i sen nchri ka an me e, ixi ícha jian tsingijna sen nchri ka an nduaxin xrokonde e.

¹⁷ Ko xronichjana jian ixi sen tituan an ni ngo ko xrokonda xroxenge e sen na ko ícha jian tson en ji i ngajin kain sen nchekuaína ko tjakoína chijnie ndo Dio.

¹⁸ *Ixi chijnie ndo Dio ndachro: “Take anta ino ro a kuxinta nche e ixra”, ko kaxon ndachro: “Sen nche e ixra tikinixin en sen xroxenge e sen na.”

¹⁹ Tian a siá xrojan ngisen tjankata a ijie ngajin sen tetuan an ni ngo siá ko a yuu o ní sen xrochronga nge e nduaxin kon en.

²⁰ Ko sen nduaxin chóna ijie, nichje é sen ngataoxin ikon kain sen ni ngo ixi jaña sen ikaxin jian xroxraxaon sen ko ísinche a sen ti ndako a.

²¹ Tjanča a ngajin ikon ndo Dio ko Ncháina Jesucristo ko sen ángel kuinche e ndo ixi titikáoan kain ji i ko xraje o nche e ngajin kain chujni á chuxian sen o na i.

²² Ko tinche a jaña ngisen sinche e ixra ni ngo, ícha jian xrotsje e nge e tjakoxin sen, ba kaxon ja a tsama ijie xranchi je e sen. Ko ja a tsje e ixi xro an ijie tsama.

²³ Ko ja a nanaó toni a ixi tíin tsée, ti a je o inda. Cháña ti ia nchíin xranvino.

²⁴ Jíee kaxin chujni sa ó tonoxin ti xratóñe a na ijie. Ko jíee ikaxin sen ícha taka i tonoxin.

²⁵ Jaña ton en kaxon kaxin chujni nche e ixra jian taka tonoxin, ko ikaxin maski jai tonoxin a, íjngo nchakon xrokonda tonoxin.

* 5:9 ikán veinte 5:18 Mt. 10:10; Lc. 10:7.

6

¹ Ko ngisen nche e ixra xrokonda tsitikaon sen ngajin ni xree nche e sen, ko jaña xro an ngisen xronichjangí e nombrée ndo Dio ko xronichjangíe a na chijni nichjana, chijnie ndo Dio.

² Ko sen nche e ixra ngajin sen titikaon ndo Cristo, tsintue a sen tsitikaon sen ngajin sen kichuu sen. Ko ícha jian xrojuinche e sen ixra ixi ó no e sen ixi sen tajon ixra, je e sen naa sen titikaon Ncháina ko xrotjue e kichuu sen. Ja a nchekuen én sen kain ji i.

Ixi nge e titika onna tsake exinna juaxruxin

³ Siá xrojan na tjako na nge e ndako a ko take a na juaxruxin ixi chijnie Ncháina Jesucristo ko kaxon nge e titika onna,

⁴ ni me e je o nchejié aséen ko xro an nge e no e na. Nichjako na nge e ninta, ko ji i xranchi naa ichin ixi ji i ti xin ti tochjio chujni ko te to na, ko ti nichjangí e kichuu na ko ti tjue a kichuuna kaxon.

⁵ Chujni jaña nche e chaxro a xraxaon na, kain nchakon te to na ko noe a na ti nduaxin. Xraxaon na ixi ti tsitikaon na Ncháina jaña tsjacha na kueya tomi. Méxin tingaxintuan ngajin chujni jaña xraxaon.

⁶ Ti titika onna Ncháina Jesucristo tsango tjintee, je o ixi siá juaxruxin tsake eni ixi je o nge e chóndani.

⁷ Ixi nchakon jaina jongíina, xro an nge e bikuuna xasintajni ko kaxon nchakon tsen en na, xro an nge e satsiku una.

⁸ Méxin siá chondana nge e inena ko chondana manta stetsáana ixi me ó xrokujuna juaxruxin.

⁹ Ko sen tjaun kueya nge e xrochóna, jua i tsjacha sen tsatsinga sen nge e tangi, ko me e nchengachrue sen; ixi kueya nge e tjaun sen ko je a jian nge e xraxaon sen, ko me e tsj xin ti tsitjáñaxin sen.

¹⁰ Ko ti ícha tjue eni tomi, me e nue e kain nge e ña i, ko xrojan sen xraxaon sen xrochóna sen kueya tomi, me e nchengachrue sen ko titikaon a sen Ncháina* Jesucristo, me e tangi tson en sen.

Nge e kuetuan an ndo Pablo ngajin ndo Timoteo

¹¹ Méxin ja a chujni nche e xree ndo Dio, tintu é kain nge e ndako a ko rué e ti nduaxin ko ixi kain asáan xroxaxaon ndo Dio ko titikáon ndo ko tjue é ndo ko xrokonda ningakuen a chujni ko nchejié a asáan.

¹² Tetua ngajin kain nge e ña i ixi titika onna nge e jian ko ixi nichijí asáan titikáon Ncháina ko jaña tsjacha tsarichuan kain nchakon ixi ndo Dio kuiya a ndo ko jian juinche e nti i nge e kuetuan an ko kuitikaoan Ncháina Jesucristo ko kuin en ko bikon kueya chujni.

¹³ *Ngatoxin† ikon ndo Dio, ndo tajon juachaxin jichón kain nge e, ko ndo Jesucristo, ndo juako ngajin xi Poncio Pilato ixi titikaon ndo ndo Dio, tjancha a

¹⁴ ixi tsitikaoan ko tatsían kain nge e kuetuan an ndo Dio ko tindoxin a nge e no a, ixi jaña xro an chujni tsjankata a ijie tsitjaja nchakon xrokjan Ncháina Jesucristo.

¹⁵ Tsitjaja nchakon kuinche e ndo Dio, ndo chóna juachaxin tetuan an, ndo Rey tetuen en kain ni rey ko Nchée kain chujni, je e ndo sinche e ndo kain ji i.

¹⁶ Je e ndo Dio nai a tsen en ndo ko ti jii ndo tsango tingasáña ko jua i tsonchjiñe e ninaa chujni ti jii ndo. Ko xro an ngisen bikon ndo ko jua i tsikon sen ndo. Je e ndo tayé e ndo kain juasaya ixi je e ndo chóna ndo kain juachaxin tetuan an ndo kain nchakon. Jaña tson en.

¹⁷ Ko ni chóna kueya nge e nti i nunte xasintajni, ndache na ixi sinchejié a aséen na ko tetuen en na ixi xrochúntia i na nge e chóna na ixi kain a nchakon xrochóna na ti

* 6:10 Ncháina Señor Ncháina Jesús o Ncháina Dio 6:13 Jn. 18:37. † 6:13 Ngatoxin delante de

tjintee. Cháña tsitikaon n̄a ndo Dio, ndo jichón, ixi je e ndo tsajon ndo kain nge e ixi je e ndo tjaun ndo juaxruxin tsintee n̄a.

¹⁸ Ndache n̄a sinche e n̄a ti jian ko tsingijna n̄a ngisen xro an nge e chónda ko tsonchjeya n̄a nge e chónda n̄a.

¹⁹ Jaña xrochónda n̄a nge e tjintee jii ngajní ko tsjacha n̄a tsechón n̄a kain nchakon.

Juexin kuetuan an ndo Pablo ngajin ndo Timoteo

²⁰ Ja a Timoteo, tayakon en ixr̄a tjáa ndo Dio ko tintu e ko tien a nge e nduaxin a nichja chujni. Ndachro n̄a ixi ícha no e n̄a ko tjinte a ti no e n̄a.

²¹ Jaña xraxaon n̄a ixi noe a n̄a ko tjume e tsingachrue n̄a ko í chúntia a n̄a ngajin Ncháina Jesucristo. Ndo Dio sintanchaoan ndo. Jaña tson en.

Xroon yuxin tsikjin ndo Pablo xrue en ndo ndo Timoteo

Ndo Pablo nichje e ndo ndo Timoteo

¹ Jan an, Pablo, ndo kuinche e ndo Jesucristo ixi sinta a xrée ndo ixi jaña tjaun ndo Dio, xronichja a chujni xranchi tsitikaon na ndo Jesucristo ko me e nai a tsen en na,

² *ikjin xroon ji i xrue an kichian Timoteo. Ja a xranchi xrokjui chjan na ko tsango tjua a. Ndotáina Dio ko Ncháina Jesucristo sintanchaoan ndo ko tsikonóa a ndo ko xrotjáa ndo juaxruxin tsake é.

Chijni tsintua a titikaon ndo Timoteo

³ Ti nichja a ndo Dio tiie nchakon, xraxa on ixi ja a ko tajon juasiana ngajin ndo. Ko ixi aséenna tjúá nta a xrée Ncháina Jesucristo xranchi ixra bajinche e sen tachrí ina xranchrjen ó sa ó.

⁴ Ko xraxa on jan an nchakon tsjanga ja a ixi jan an, tja on tsikuan íjngo me e jaña tsake e juaxruxin aséenna.

⁵ *Ó nóna ixi jian chuntia Ncháina Jesucristo xranchi sa ó juinche e janachri a Loida ko janáa Eunice ti kuitikaon sen Ncháina Jesús, ko nóna ixi kaxon ja a jaña titikáon ndo.

⁶ Méxin, jai ntaxraxaoan ixi nchekangia juachaxin tjáa ndo Dio nchakon bakée tjána ngata a jáa.

⁷ Ndo Dio kuajon a ndo Espíritue ndo ixi xroxronkana. Na i. Kuajon ndo Espíritue ndo ixi xrochondana juachaxin ko xrotjue ena chujni ko jian xroxraonna.

⁸ Méxin tosua ia chronga titikáon Ncháina Jesús ko tosua ia ixi jan an jija na ndo a chjiso ixi tjako chijnie ndo. Tosua ia, cháña chon én ti tangi tson an ixi tjakoa chijni tingijna chujni tsechón na kain nchakon ixi kuaye é juachaxin kuajon ndo Dio.

⁹ Ndo Dio kuajon ndo juachaxin tsechónna kain nchakon* ko kuinche e ndo jaina ixi jian tsojuna. Je a ixi jian juntu una me e tsechónna kain nchakon. Na i. Ixi juasie ndo Dio kuinche e ndo jaina tsitikaonna ndo Jesucristo; ti xrako a nunte xasintajni ó tsixraxaon ndo jaña tson en ixi tsango tjuajna ndo.

¹⁰ Jai ó juako ndo Dio ixi tjuajna ndo ixi jii ngisen tajon juachaxin tsechónna, ndo Jesucristo. Je e ndo juinchetjáña ndo juachaxin kuachóna ti tsen en chujni ixi xechón ndo íjngo. Ixi chijnie ndo konojna xranchi tayé ena juachaxin tsechónna kain nchakon ko nojna ixi ti tsechónna jua i tsitjáña.

¹¹ *Ndo Dio kuetuanna ndo tsjako chijnie ndo ko xrue anna ndo sintakuan an chijnie ndo chujni ste kain tjajna.

¹² Méxin tangi ritjén ko tosua na i ixi chuxin jian ngisen titika on. Nóna chóna ndo juachaxin tsayakonna ndo tsitjaja nchakon xrokjan ndo íjngo.

¹³ Xranchi jian juako a, jaña nche e kain nge e jian ko tjue é kichuuna ixi chuntia Ncháina Cristo Jesús.

¹⁴ Ixi juachaxien Espíritue ndo Dio jii ngajian, tintue a tsindoxin na chijni tjáa ndo Dio ko jaña tsitjáñai a.

¹⁵ Ja a ó no a ixi kain sen nunte Asia kuintuna sen ko kaxon ndo Figelo ko ndo Hermógenes.

¹⁶ Tjánchá a Ncháina ixi tsikonóe e ndo sen ste ndo a ndo Onesíforo ixi je e ndo nanaunka bingijnana ndo, ko kosue a ndo maski jan an rixin in ndo achjiso.

¹⁷ Tjume e kuiji ndo tjajna Roma ko juéna ndo ti kuitjajana ndo.

¹⁸ Tjáanchá a Ncháina ixi tsikonóe e ndo ndo Onesíforo nchakon xrokjan ndo, ixi ó no a jian xranchi bingijnana ndo ti bake e tjajna Éfeso.

2

Tsujuna xranchi naa soldado jian kondee ndo Jesucristo

¹ Ja a chjan na soji take é ixi juachaxin tjáa ndo Jesucristo ixi titikáoan ndo.

² Ti kuin en juntakuan an kuin en kueya chujni, ji i tetuen én sen jian tsitikaon Ncháina ko jaña tsjako sen ngajin kaxin chujni.

³ Ja a maski kueya nge e tangi tsatsinga, soji take é xranchi naa xi soldado ne e ndo Jesucristo.

⁴ Xro an xi soldado tjaun xa sinche e xa inaa ixra ixi je e xa tjaun xa sinche e xa naa ixra jian ixi jaña nchée xa, ti tetuen en xa, juaxruxin tsake e xa.

⁵ Jaña xranchi naa ngisen tinga, jua i tsayé e sen nge e tikinixin tsjacha sen siá tsitikaon a sen nge e kuituen en sen.

⁶ Kaxon xranchi ngisen tenga chjaka xrokonda sinche e sen ixra ko jaña je e sen ícha sa ó tsayé e sen nge e kóña ngata a nunte e sen.

⁷ Xraxaoan jian kain nge e ntatjua ko Ncháina tsingijna ndo tsienxian kain nge e.

⁸ Kain nchakon xraxaoan ndo Jesucristo, je e ndo xechón ndo ko kuachrjenixin ndo sen ndo a ndo rey David. Ji i chijni jian tjako jan an.

⁹ Ixi tjako chijni jian, méxin tangi ritjén ko xrxin inna na ndo a chjiso xranchi naa xi ndako a nche e ko chijnie ndo Dio je a jije e chijni xranchi jan an.

¹⁰ Ko tokuaxina kain nge e tangi tatsinga ixi jaña ikaxin sen kuinche e ndo Dio xrochóna sen juachaxin tsechón sen kain nchakon ixi tsitikaon sen ndo Jesucristo.

¹¹ Chijni nduaxin ji i:

Siá jaina kuen enna xranchi je e ndo, kaxon tsechónna ko kain nchakon tsojonna ngajin ndo.

¹² *Siá tangi tsojuna xranchi juinchekaon na je e ndo, kaxon tsayé ena juachaxin tsojuna ti tetuan an ndo.

Ko siá xrondachrona chuxin ana ndo, kaxon je e ndo xrondachro ndo ixi chuxin a ndo jaina.

¹³ Maski ítsitikaon ana ngajin ndo, je e ndo tsintuna ina ndo ixi je e ndo ncheya i ndo.

Naa ngisen nche e ixra jian

¹⁴ Nchexraxaoan sen kain ji i. Ko ndache sen ngajin ikon Ndo Dio ko tsjakaxin a kichuu sen ixi ngixe i chijni ixi tjinte a me e; je o nchetjáñajin chujni tin en.

¹⁵ Nche é jian xranchi naa ngisen chóna i nge e tsosuxin ngajin ndo Dio ixi ndako tjakoa chijnie ndo.

¹⁶ Nichja ia ngixeko nge e ti nichja ngixeko chujni, ixi ni nichja jaña ícha taka tsitjáña na.

¹⁷ Ko ti ndako a tjako na me e xranchi naa ichin renga. Jaña kon en xi Himeneo ko xi Fileto.

¹⁸ Je e xa kuintu e xa chijni jian ixi ndachro xa ó kuatsinga nchakon xechón chujni. Ko jaña ncheya xa ngajin ikaxin sen ó tsikitikaon ndo Cristo.

¹⁹ Ko sen jian titikaon ndo Dio, je e sen ste sen xranchi naa ixro jua i tontengi ko chóna sen chji e ndo Dio, ko chijnie ndo Dio ndachro: “Ncháina chúxin ndo ngisen titikaon ndo”, ko kaxon: “Kain sen titikaon ndo Cristo xrokonda tsintu e sen kain nge e ti ndako a.”

²⁰ Ko ngaxin in naa nchia ijié, chóna na itsjé traste, kaxin tsikóñaxin chika oro ko ikaxin chika plata. Kaxon ikaxin tsikoña ixi ntaa ko ikaxin tsikoña ixi inche, ko kaxin tunda nchakon jii kia ko ikaxin ngixe i nchakon tunda.

²¹ Méxin xrokonda tsintu e sen kain nge e ndako a, jaña jaina kaxon xrokonda tsontjúá aséenna, me e chao sinche ena xrée Ncháina Jesucristo.

²² Méxin ja a tintu é kain ti ndako a nche e ikaxin chajan titikaon a Ncháina. Nche é kain nge e jian ko chuntia ndo Cristo ko tjue é kain chujni ko juaxruxin take é ngajin kain sen tjúa aséen titikaon Ncháina.

²³ Ja a nichja ia chijni xro an xrée ixi ó no a chijni me e ncheketoni.

²⁴ Ixi sen nchexrée Ncháina tetokao a sen sen kichuu sen. Na i. Jian nche e sen ngajin kain chujni. Jian sinchekuen en sen chujni ko xroningakuen a sen chujni.

²⁵ Jian xronichje ena chujni titikaon a ixi jian sinche e na, xrochon enna ixi nchéxin ndo Dio tsingijna ndo tsindoxin na ti ndako a xraxaon na ko jaña xrochuxin na chijni nduaxin.

²⁶ Jaña tsantje e ikon na ko tsienxin na, me e satsinge e na ti tjaun Xixron anxrée sinche e na.

3

Xranchi sinche e ni nunte xasintajni nchakon tsjexixin

¹ Xrokonda tsono a ixi tsaxi tsij juachjaon nchakon tsjexin nunte xasintajni.

² Tsake e itsjé chujni, ni titikaon a Ncháina, je o xrotjue e na nge e tjaun na, ko xrotjue e na tomi, ko sinchejié na aséen na ko xronichjangí e na ndo Dio. Tsitikaon a na ndotée na ko janée na, ko tsajon a na juasaya ngajin sen, ko tsajon a na juasie na ngajin chujni nichja chijnie ndo Dio.

³ Xrotjue a na ni kichuu na, ko tsikonóe a na ni kichuu na, ko tsango xronichja na je a ti nduaxin kondee inaa na, ko jua i tsetuen en na aséen na, ko tsango changa na ko tsango ningakon en na kain nge e jian.

⁴ Jii chujni jua i chúntiani ngajin na, ko tosue a na nge e nche e na, ko tsango nchejié aséen na, ko tjue e na kain nge e ndachro aséen na ko titikaon a na ndo Dio.

⁵ Je e na sinche e na xranchi sen titikaon ndo Dio ko je a nduaxin me e. Titikaon a na juachaxien ndo Dio.

Méxin ja a tingaxintuan ngajin ni jaña nche e.

⁶ Ko ste kaxin na nche e na juaxruxin tixin in na ndo a chujni ko ncheye e na nchri ninta, nchri yama ijie, nchri nche e kain ti ndako a.

⁷ Kain nchakon tjaun nchra tsangi nchra naa nge e natjúá, ko nai a titikaon nchra chijni nduaxin.

⁸ Ko xranchi xi Janes ko xi Jambres batingakon en xa ndo Moisés, ti baketuan an ndo, jaña jai ni me e ningakon en na chijni nduaxin. Tsango ña i xraxaon na ko titikaon a na nge e ti jian.

⁹ Ko tsjacha i na sincheya na ixi kain chujni ó tsono e na ixi ni ña ninta na; jaña kon en kaxon kayui ni batingakon en xrée ndo Moisés.

Juexin kuetuan an ndo Pablo ngajin ndo Timoteo

¹⁰ Méxin ja a ó kuangia nge e juntakuan an. Ó no a xranchi bake é ko ó no a ixra junta a. Ó no a xranchi titika on Ncháina ko no a ixi taka i toña o ko no a xranchi tjua a chujni. Ko no a ixi maski ningakonna na, kuíntua i xrée Ncháina,

¹¹ *maski bengina na ko tangi bake é ko kain nge e tangi kuatsinga tjajna Antioquía ko Iconio ko Listra ko ó xrokóñana na ko tangi bake é, ko jaña Ncháina bingijnana ndo kuatsinga kain ji i.

¹² Kain sen tjaun tsitikaon ndo Cristo Jesús ko tjúa aséen sen, xrokonda tangi tson en sen kaxon.

¹³ Tjume e ni ña i ko ni ncheya, ni me e ícha ndako a sinche e na ko ícha sincheya na ko kaxon chujni sincheya ngajin je e na.

¹⁴ Ja a jian xraxaoan ko tindoxin a nge e juntakuan an. Ja a ó chuxian ngisen juntakuan an.

¹⁵ Xranchioan ó kuano a xranchi ndachro chijnie ndo Dio, ko me e noaxian ixi ndo Cristo Jesús tsajon ndo juachaxin tsarichuan kain nchakon.

¹⁶ Kain xroon chijnie ndo Dio tsikóñaxin ixi juachaxien ndo, ko me e tsondaina ixi tsjakona chijni jian, ko ji i tsonóñaxinna xranchi xroxraxaonna ko jian tsjakona chijni nduaxin,

¹⁷ ixi ngisen titikaon ndo Dio jian tsono e sen ko jian sinche e sen kain ixra.

4

¹ Ngatoxin* ikon ndo Dio ko Ncháina Jesucristo, ndo tsii xranchi rey sinchéña ijie ngajin kain chujni stechón ko chujni tsiken en, tetuan an

² ko ntatsa añaoan tsjakoa chijnie ndo Dio ixi nchijí asáan, maski á tsin en na o na i. Nichje é na jian ixi tsitikaon na ko nchexraxaoan na jian. Chon én indao tsienxin na ko jian tjakoa chijni.

³ Ixi tsii nchakon ítjaun a na tsin en na chijni jian. Tsjée na itsjé ni sinchekuen en na ko xrondache na ni me e je o tsjako na nge e tjaun na tsin en na.

⁴ Tsintu e na chijni nduaxin ko tsitikaon na ngixe i nge e tseki e na chujni, ti nduaxin a.

⁵ Méxin ja a jian xraxaoan ko soji take é nchakon tangi sinta a na. Nchekuen én na chijnie ndo Dio, ndo tajon juachaxin tsechónna; jian nche é ixra chonda.

⁶ Ó tsiji nchakon jan an tangi sinchena na ko ó tuinxin tsii nchakon tsen enna jan an.

⁷ Jan an juácha kuatsinga kain juachjaon ko juntajexin xra, ko jian chuntia Ncháina Jesús.

⁸ Ko jai je o richon an tsayá a naa corona ixi jian bake é nti i. Ji i tsajon Ncháina nchakon tsii ndo. Je e ndo ndako sinchéña ndo ijie. Ko je a jan on tsayá a corona me e. Na i, kaxon kain sen tjue e ndo ko stechón en sen nchakon tsii ndo.

Ndo Pablo kuetuan an ndo tsitsje e sen ndo

⁹ Chjakon annta ixi taka tsji inta, tsitsjenaninta,

¹⁰ *ixi xi Demas kuintuna xa ixi ícha tjue e xa nge e jii nunte xasintajni ko satsikji xa tjajna Tesalónica. Ndo Crescente sakjui ndo tjajna Galacia ko ndo Tito sakjui ndo tjajna Dalmacia.

¹¹ *Je o ndo Lucas riki an nti i. Tijée ndo Marcos ko tsikua ndo ixi je e ndo chao tsingijnana ndo ixra chonda nti i.

¹² *Ndo Tíquico xruan an ndo sakjui ndo tjajna Éfeso.

¹³ *Nchakon tsji ia, tsikua manta tsaritsa a kuintu a tjajna Troas ndo a ndo Carpo ko kaxon librona ko kaxin xroon ícha xrokondana.

¹⁴ *Xi Alejandro, xi nche e ixra chika, tsango itsjé nge e ndako a juinchena xa. Ko Ncháina tsetuan an ndo tsjenga xa na kain nge e ti ndako a juinchena xa.

¹⁵ Ja a jian tsje é ba xrojan nge e sinta a xa, ixi je e xa tsango ningakon en xa chijnie ndo Dio tjakona.

¹⁶ Nchakon ikjui ngajin ni nchéña ijie ko ntatjan na ixi jan an xro an nge e ndako a junta a, xro an ngisen bingijnana. Kain sen kuintuna sen jan on. Ko jai tjánchá a ndo Dio ixi tsjankata i ndo sen ijie ixi jan on kuintuna sen.

* **4:1 Ngatoxin** delante de **4:10** Col. 4:14; Flm. 1:24; 2Co. 8:23; Gá. 2:3; Tit. 1:4. **4:11** Col. 4:14; Flm. 1:24; Hch. 12:12, 25; 13:13; 15:37-39; Col. 4:10; Flm. 1:24. **4:12** Hch. 20:4; Ef. 6:21, 22; Col. 4:7, 8. **4:13** Hch. 20:6. **4:14** 1Ti. 1:20; Ro. 2:6.

¹⁷ Ko Ncháina bingijnana ndo kuajon ndo juachaxin ixi jian sintakuan an chujni chijnie ndo tajon juachaxin nai a tsen en na. Kaxon kuin en kain chujni je a judío. Jaña Ncháina bingijnana ndo ixi juine ana kujenda.†

¹⁸ Ko Ncháina xratsingijnana ndo ixi xro an nge e tsónna. Je e ndo tsyakonna ndo ko chao tixin in ti tetuan an ndo ngajní. Je e ndo tsayé e ndo juasaya kain nchakon. Jaña tson en.

Ndo Pablo juexin nichja ndo

¹⁹ *Tájuan juajna ngajin jan Priscila ko ndo Aquila ko sen ndo a ndo Onesíforo.

²⁰ *Ndo Erasto kuitu e ndo tjajna Corinto ko ndo Trófimo kuitu e ndo tjajna Mileto ixi koni e ndo.

²¹ Chjakon an tuinxin tsji ia ixi xrati a nchakon tonkin. Ndo Eubulo ko ndo Pudente ko ndo Lino ko jan Claudia ko kain sen kichuuna xruan an sen juajna.

²² Ncháina Jesucristo tsake e ngajian, ko ndo Dio sintanchaonnta ndo kainnta. Jaña tson en.

† **4:17 kujenda** león **4:19** Hch. 18:2; 2Ti. 1:16, 17. **4:20** Hch. 19:22; Ro. 16:23; Hch. 20:4; 21:29.

Xroon tsikjin ndo Pablo xrúen en ndo ndo Tito

Ndo Pablo nichje e ndo ndo Tito

¹ Jan an, Pablo, nta a xrée ndo Dio ko ndo Jesucristo kuinche ena ndo ixi sintakuan an kain sen kuinche e ndo Dio ko kaxon ixi xrochuxin sen nge e chuntiana ko me e ti chijni nduaxin,

² ko xrochon en sen ti tsechón sen kain nchakon. Ndo Dio, ndo ncheya i, tsindachro ndo nduaxin jaña tson en ti xrako a nunte xasintajni.

³ Ko nchakon tsindachro ndo Dio ixi jaña tson en, je e ndo juinchenoina ndo chijnie ndo ixi ikaxin sen juakoina sen. Ko ndo Dio, ndo nchemé e jíeina, kuetuan an ndo ixi sinta a xrée ndo ko tsjako chijnie ndo.

⁴ *Kjin an xroon ji i, Tito. Jan an tikuan xranchi chjan na ixi kayuina chuntiana ndo Jesús. Juasie Ndotáina Dio ko ndo Jesucristo, ndo nchemé e jíeina, je e ndo sintanchaoan ndo ko tsikonóa a ndo ko xrotjáa ndo juaxruxin.

Ixrā sinche e ndo Tito tjajna Creta

⁵ Nchakon kuintu a nunte jii ngusine ndachaon* ndatin in Creta ixi xrokuuetuen én sen jii nti a xranchi sinche e sen ko xrojuinchejexian ixrā titjáña ko xrondachrua ngisen tsetuan an ngujngu ni ngo jii tjajna xranchi kuetuan an jan an.

⁶ *Xrokonda ixi ngisen jitao en ni ngo jian sinche e sen ixi jaña xro an ngisen tsjankata a nā sen ijie, ko xrochóna sen naakua janchri e sen, ko chjen en sen xrokonda tsitikaon xjan Ncháina Jesucristo, ko jaña xro an chujni tsjankata a xjan ijie ko jian tsitikaon xjan.

⁷ Jaña sen jitao en ni ngo, sen me e tixinixin en sen xrondachro sen xranchi tson en xrée ndo Dio, xrokonda naa ngisen jian tsake e ixi jaña tsjankata i nā sen ijie. Ko sinchejie a sen aséen sen, ko taka i xrochjée sen juaña. Ko xrokuan i sen, ko tseto a sen ngajin chujni ko sincheya i sen ixi jaña xrotsé sen tomi tjúa i.

⁸ Ko jian tsayé e sen xrojan ngisen tsiji ndo a sen; xrokonda sinche e sen ti jian; jian xroxraon sen ko ndako sinche e sen ngajin ngixe i chujni. Ko nchijí aséen sen tsake e sen ngajin ndo Dio ko ixi nchijí aséen sen sinche e sen xrée nchée sen.

⁹ Ko kaxon xrokonda tsintue a sen chijni jian kuayé e sen ixi jaña tsjako e sen ikaxin sen kichuu sen chijni jian, ko kaxon jaña sinchenda sen aséen ni ndachro je a nduaxin nge e tjakona.

¹⁰ Ixi jii itsjé ni titikaon a, ni me e ste ngakjen en ni judío, ni nichja xranchi naa ni ninta ko ncheye e nā ikaxin chujni.

¹¹ Ni me e xrokonda tsije eni ro a nā ixi nchetjáñajin nā kain sen ste naa nchia ixi je o tjako nā nge e nduaxin a ko je a jian, ixi jaña tsjacha nā kueya tomi.

¹² Naa xi tjajné sen, tjajna Creta, tsindachro xa: “Kain chujni tjajnána tsango ncheya nā ko tsango jie e nā ko tsango ine nā ko tsango se e nā.”

¹³ Ti tsindachro xa nduaxin me e. Méxin, Tito, soji nichje é sen kichuuna ixi jian xrochuntia sen ndo Dio.

¹⁴ Nichje é sen ixi tsien a sen kain nge e teki ni judío, ko tsitikaon a sen nge e tetuan an ni ningakon en chijnie ndo Dio, chijni nduaxin.

¹⁵ Ni jian xraxaon, kain nge e nche e nā tjúa kaxon. Ko ngisen ndako a xraxaon, xro an nge e jian xraxaon nā ko kain nge e xraxaon nā, tjúa i.

¹⁶ Ndachro nā ixi chúxin nā ndo Dio, ko ti nche e nā, me e tjakoxinna ixi je a nduaxin ti nichja nā. Je e nā tsango ña i nā ko titikaon a nā, méxin jua i nche e nā naa nge e jian.

2

Tsjako ndo Tito chijni jian

¹ Kain nge e tsjako xrokonda jian sinchekuen en sen xranchi jitaxin chijnie ndo Dio.

² Nchekuen én sen tachríi xrokuan i sen, jian sinche e sen ko jian xronichja sen ngajin kain chujni. Xroxraxaon sen jian, ko jian xrochuntia sen, ko xrotjue e sen sen kichuu sen ko taka i xrochjée sen juaña.

³ Ko kaxon jaña janachri jian sinche e jan ko xronichja i jan juancheya ko xrokuan i jan. Jian tsjakoxin jan xixi titikaon jan Ncháina,

⁴ xixi jaña tsjako e jan nchrichajan xranchi xrotjue e nchra ndoxi e nchra ko xranchi xrotjue e nchra chjen en nchra,

⁵ ko jian xroxraxaon nchra, ko tjuá aséen nchra tayakon en nchra ndo a nchra ko tsingijna nchra kain chujni, ko tsitikaon nchra ndoxi e nchra xixi jaña xro an ngijni xronichjangí e chijnie ndo Dio titika onna.

⁶ Kaxon nchexraxaoan sen chajan xixi jian sinche e chán ko jian xroxraxaon chán.

⁷ Ja a jian nche e kain nge e xixi jaña tsjakoxian ngajin kain sen xixi ja a jian. Ko nchakon tsjako, chjente a ko tjako ti nduaxin.

⁸ Nichja nge e nduaxin xixi xro an chujni tsjankata a na ijie, ko jaña tsosue e ni ningakon en chijni, ko xro an nge e ti ña i xrondachro na kondee jaina.

⁹ Tetuen én ni nche e ixra xixi tsitikaon na nchée na xixi jian sinche e na ti kuetuen en na ko xronichjangí a na,

¹⁰ ko xrotsee a na nge e je a ne e na. Ko jaña kain na tsikon na xixi chijnie ndo Dio tsango chaxro chijni ko tajon ndo juachaxin tsechónni kain nchakon.

¹¹ Xixi ndo Dio juakoina ndo xranchi tjuaina ndo xixi je e ndo sinchemé e ndo jíee kain chujni sínká.

¹² Ti tjuaina ndo Dio nchekuaina xixi tsintu ena kain ti ndako a ko kain nge e ña i xraxaonna. Ko jian tsake ena nunte xasintajni ko ndako xroxraxaonna ko tsitikaonna ndo Dio.

¹³ Kaxon tjakoina ndo xranchi xrochon enna nchakon tsij ndo Dio na ina, ndo Jesu-cristo, ndo chóna kain juachaxin ko tajon ndo juachaxin tsechónna kain nchakon.*

¹⁴ *Je e ndo kuen en ndo xixi jaina xixi tjaun ndo tsajon ndo juachaxin tsechónna kain nchakon xixi kuantsje ndo kain ti ndako a chondana, ko tjume e tsayé ena ndo xranchi naa chujnie ndo ko juaxruxin sintu una kain nge e tjaun ndo.

¹⁵ Tito, ji i tjako é sen ko nchexraxaoan sen ko tetuen én sen xixi juachaxien ndo Dio. Tintue a xixi xrojan ngisen xronichjangí a ko tsjanao sen xixi nge e tjako.

3

Nge e sinche e sen titikaon ndo Cristo

¹ Nchexraxaoan sen tsitikaon sen ni tituan an, ko tuinxin sinche e sen kain ixra jian.

² Ko xronichja i sen ninna nge e ti ndako a xixi sen kichuu sen, ko taka i tsoña sen, ko xrotjue e sen sen kichuu sen xixi jaña tsjakoxin sen nge e jian chóna sen ngaya aséen sen, ko jian xronichje e sen kain chujni.

³ Xixi jaina kaxon sa ó juinche ena xranchi ni ninta, ko baktikaon ana ndo Dio. Ndako a juinche ena, bakojuna juaxruxin xixi kain nge e ña i banche ena ko bakochjuyeina, ko baningakoina na, ko jaina kaxon baningakon ena chujni.

⁴ Tjume e ndo Dio, ndo tantsjengí e kain ti ndako a juinche ena, juakoina ndo xixi jian ndo ko tjue e ndo kain chujni.

⁵ Je e ndo juinchemé e ndo ti ndako a kuachondana, je a xixi jaina xrojan nge e jian juinche ena. Na i, xixi je e ndo bikonóina ndo ko juinchemé e ndo ti ndako a juinche ena

* **2:13 tsechónna kain nchakon** vida eterna **2:14** 1Pe. 2:9.

ko juinchetjúá ndo aséeina. Jaña jongíexinna íjngo ixi Espíritue ndo ko jai natjúá stechónna.

⁶ Ixi ndo Jesucristo, ndo juinchemé e ti ndako a juinche ena, méxin ndo Dio kuajon ndo Espíritue ndo.

⁷ Ko juasie ndo, juinchemé e ndo jíeina ko jaña tsayé ena juachaxin tsechónna kain nchakon.

⁸ Nduaxin chijni ji i, ko tja on ixi tsjakoá kain ji i ixi kain sen titikaon ndo Dio sinche e sen kain nge e jian. Kain ji i jian ko tingijna kain chujni.

⁹ Ko ndache sen xronichja i sen xrojan chijni ninta, ko tien a chijni teki sen ti juinche e sen tachrí ina, ko tintue a sintaketo xin sen ti ley kuajon ndo Moisés. Ti tjakaxin kichuu sen tjinte a ko xro an juachaxin chónnda.

¹⁰ Siá kondeexin xrojan ngisen tjaun xrojan sen ni ngo tsinkaxinton sen, nichje é sen kondeexin me e naa o yuu vez ixi ndako sinche e sen ko siá tsienxin a sen, ndache sen satsjixin sen ni ngo,

¹¹ ixi ja a ó no a ixi sen jaña nche e ndako a xraxaon sen ko ti nche e sen jaña ícha nchekangi sen ijie chónnda sen.

Nge e kuetuan an ndo Pablo

¹² *Nchakon xroxruan an ndo Artemas ko ndo Tíquico tsiji sen. Chjakon an tuinxin tsji ia tsitsjenana tjajna Nicópolis ixi nti a tsake é tsatsingaja nchakon ikin.

¹³ *Ja a jian tingijna ndo Zenas, ndo abogadoe chujni, ko ndo Apolos, ko chje é sen ti xrokonde e sen nchakon satsji sen ixi xro an nge e tsitjáñe e sen.

¹⁴ Ko sen kichuuna xrokonda tsitja sen sinche e sen nge e jian ko tsingijna sen sen kichuu sen nchakon tsake e na juachjaon, jaña tsjakoxin sen ixi tjintee nge e nche e sen.

Juexin nichja ndo Pablo

¹⁵ Kain sen riki an nti i xruan an sen juajna. Ko ja a tájuan juajna ngajin kain sen chuntia Ncháina nti a, kain sen tsango tjuajna. Ndo Dio sintanchaonnta ndo kainnta. Jaña tson en.

Xroon tsikjin ndo Pablo xrúen en ndo ndo Filemón

Ndo Pablo nichje e ndo ndo Filemón

¹ Jan an, Pablo, jija na ndo achjiso ixi nta a xrée Ncháina Cristo Jesús, kjin an xroon ji i, ko kao ndo kichuuna Timoteo ixi ja a Filemón tsaye é xroon. Ja a ngisen tjua ana ixi nche ena xrée ndo Dio.

²*Kaxon nichja a kain sen titikaon Ncháina, sen xra o ndúia ko kao jan kichuuna Apia ko ndo kichuuna ndo Arquipo, ndo nche e xrée ndo Dio xranchi jaina.

³Taye énta juaxruxin tajon Ndotáina Dio ko Ncháina Jesucristo ko je e sen sintanchaonta sen.

Tjue e Ndo Filemón chujni ko chuntia ndo ndo Jesús

⁴Kain nchakon tajon juasiana ngajin ndo Dio, nchakon xraxa on ixi ja a hora nichja a ndo,

⁵ixi kujn an xranchi tjue é ko chuntia Ncháina Jesús ko kaxon kain sen tikinixin en ndo.

⁶Tjanča a ndo Dio ixi ti chuntia ja a ko jan anna me e sinche e ixi ícha tsienxinna kain nge e jian ti kuajon Ncháina Cristo Jesús.

⁷Kichian, juaxruxin ritjén ixi nóna ixi ja a tjue é kain sen ko ixi ja a me e juaxruxin ste aséen sen kichuua.

Ndo Pablo nichjixin ndo ndo Onésimo

⁸Ixi jan an nta a xrée ndo Jesucristo chao tsituan an nge e xrokonda sinche e,

⁹ko ícha jian je o tinóatána sinche e ti ntatjua ixi tjua a. Jan an Pablo ó tachrína ko jai rixin in ndo achjiso ixi nta a xrée ndo Cristo Jesús,

¹⁰*ntatsa ñaoan ixi ndo Onésimo, ngisen tja on xranchi chjan na jii ngaxin in ndo achjiso kaxon.

¹¹Ó seno, ndo Onésimo xro an ixra jian juinche e ndo ngajian. Ko jai nóna ixi kuindoxin ndo ko chao tsingijnana ndo yuina.

¹²Jai xrúan an ndo íjngo, taye é ndo xranchi xrokjui jan an.

¹³Jan an tja on cháña xrokuitu e ndo ngajin xrojuinche e ndo ixra, ti xrojuinche e ja a ti xra ritjén ngaxin in ndo achjiso ixi nichja chijnie ndo Dio.

¹⁴Ko tjaun a sinta a nge e xrojuinta ia juaxruxin ixi ti juintatsan an ñaoa tjaun a sinche é ixi kuetuan an. Na i, tja on ixi ja a juaxruxin sinche é me e.

¹⁵Nchéxin ndo Onésimo sajuixin ndo ngajian kaxin nchakon, ixi jai tsitu e ndo ngajian kain nchakon.

¹⁶Jai í je a tsitu e ndo ngajian xranchi naa chujni xrokonda sinchenche e ixra. Na i. Jai xranchi naa chujni jian nche e ixra, xranchi naa ndo kichuua. Jan an tsango tjua a* ndo ko ja a xrokonda ícha xrotjue é ndo. Je a je o xranchi naa chujni. Na i, kaxon xranchi naa ndo kichuua ixi kao ndo titikaon ndo Ncháina.

¹⁷Méxin, siá nduaxin tjentona, taye é ndo xranchi xrokjui jan an.

¹⁸Ko siá xrojan nge e juinta a ndo o xrojan nge e sinka a ndo, jan an tsjenga a na.

¹⁹Jan an Pablo ikjin ji i ixi tjána ko jan an tsjenga a na, maski jan an chao sin-taxraxaoan ixi ja a tasinkanana jan an ixi ja a kuichuxian chijni jian ne e Ncháina.

²⁰Kichuuna, nche é ti juintatsan an ñaoa ji i ixi titikáoan Ncháina Jesucristo, ko jaña tsake e juaxruxin aséenna ixi titika onna Ncháina.

²¹Kjin an xroon ji i ixi nóna tsitikaoan nge e kuituan an ko ja a ícha sinche é.

²²Ko kaxon tjée no tsituna ixi chon an tuinxin tsjaso ixi ja anta ritjanche enta ndo Dio.

Juexixin nichja ndo Pablo

²³*Ndo Epafra xruan an ndo juajna, ndo tjento nti i ngaxin in ndo achjiso ixi nta ana xrée ndo Cristo Jesús.

²⁴*Ko ndo Marcos ko ndo Aristarco ko ndo Demas ko ndo Lucas, sen tingijnana ixra, kaxon xruan an sen juajna.

²⁵Ncháina Jesucristo sintanchaonnta ndo. Jaña tson en.

Xroon kuayé e sen Hebreo

Ndo Dio nichja ina ndo ixi Chjen en ndo

¹ Ó seno ndo Dio nanaó nichje e ndo sen tachrí ina xranchrjen ixi sen kuanichjixin chijnie ndo Dio ko itsjé nge e juako ndo.

² Ko nchakon tsaxi tsjexixin kain nge e ndo Dio nichjixin ndo Chjen en ndo, xjan Jesucristo. Ndo Dio chjée ndo Jesucristo juachaxin juinchekonchjian ndo kain nge e jii xasintajni ko ngajní, ko je e ndo Jesucristo kuayé e ndo juachaxin ixi tsetuan an ndo kain nge e.

³ Ko ndo Jesucristo xraje o chjiixro chónnda ndo xranchi chjiixro chónnda ndo Dio, ko je e ndo naxraje o ndo xranchi ndotée ndo ko ixi juachaxin chonda ndo me e jichón kain nge e. Ko ixi ndo Jesucristo kuen en ndo, méxin juinchemé e ndo kain jéina, ko tjume e bake e ndo ndatsjonxin jian ti jitetuan an Ndotée ndo.

Chjen en ndo Dio ícha tetuan an ixi sen ángel

⁴ Chjen en ndo Dio, kuayé e juachaxin ixi ícha tsetuan an ndo ixi sen ángel ixi je e ndo tikinixin en ndo xrochónnda ndo ícha juachaxin.

⁵ Méxin, ndo Dio ndache a ndo ninaa sen ángel:

Ja a Chjan na,
ko jan an ndachrjan ixi jan an Ndotáa.

Ko kaxon ndachro ndo:
Jan an xrokjanna Ndotáa,
ko ja a chjan na.

⁶ Ko nchakon xruan an ndo Dio chjen en ndo, xjan naakuaxon, ngata a nunte xasintajni, ndachro ndo Dio:
Kain sen ángel na na tsajon sen juasaya ngajin chjan na.

⁷ Ko ndachro ndo Dio ixi sen ángel:
Sen ángel juntáña jan an xranchi chrinto, je e sen,
ko sen nche e xrana xranchi xro i tjama, me e je e sen.

⁸ Ko ndo Dio ndache ndo Chjen en ndo:
Ja a ndo Dio tsetuan an kain nchakon
ko ja a jian tsetuan an.

⁹ Ja a tjue e kain ti jian,
ko ningakon en ti ndako a jii.
Méxin, ndo Dio kuincha a ndo ja a, ndo Dio na a.

Ícha ijié juaxruxin tjáa ndo
ixi ikaxin sen kuajiku a.

¹⁰ Kaxon ndachro ndo:
Ja a Ncháina, juinchekonchjian nunte xasintajni* ti xraxrangíxixión konchjian kain
nge e,

ko kaxon juinchekonchjian ngajní,
kain me e tjáa juincheñaxian.

¹¹ Kain ji in tsjexin ko tsontaxi xranchi manta tetsáani,
je o ja a tsarichuan kain nchakon.

¹² Kain ji in xranchi naa manta tetsáani ó tjoké e ko ndá a tjankani,
xranchi chujni tindoxin en manta jíá,
kain me e tsjexin.

Je o ja a kain nchakon tsarichuan

* **1:10 xasintajni** mundo

ixi ja a tsjexin a.

¹³ Ndo Dio ndache a ndo ninaa sen ángel ja in:

Take é ndatsjonxin jian ti ritjén jan an, tsakeja jan an ni ningakon an ngangí tutáa.

¹⁴ Kain sen ángel me e espíritu tikon ani nche e ixra ngajin ndo Dio ixi je e sen kuituen en sen tsingijna sen chujni tsitjáña i aséen ko tsechón kain nchakon.

2

Nchetjáña inta juachaxin kuaye enta

¹ Méxin, xrokonda tsienxinna ícha jian chijni kuaye ena ixi jaña tsintue ana cha o jian.

² Chijnie ndo Dio tsichronga sen ángel ó sa ó me e chijni nduaxin. Ko sen kuin en chijni ko kuitikaon a sen, kuama sen ijie, ko tangi kon en sen ixi jaña bikinixin en sen.

³ Méxin, ¿xranchi satsinge ena nchakon sinchéña ndo Dio ijie, siá je e ndo ó juinchemé e ndo jieina ko kuajon ndo juachaxin tsen ana ko jaina tsintu ena me e? Chijni ó sa ó tsichronga Nchána* Jesucristo, ko sen kuin en chijni chronga sen ixi chijni me e nduaxin chijni, ko tjume e jaina kuaye ena chijni.

⁴ Ko ndo Dio juako ndo ixi nduaxin chijni me e ko juinche e ndo itsjé ixra ijié ko chjaina ndo juachaxin tajon Espíritue ndo ko kain ji i kon en xranchi je e ndo tjaun ndo.

Ndo Jesucristo tajon ndo juachaxin tsechón chujni

⁵ Ndo Dio chjé a ndo sen ángel juachaxin ixi je e sen tsetuan an sen nunte natjúá, nandá tsii, ti stetjoina jai.

⁶ Xroon chijnie ndo Dio ndachro xroon:

¿Nge e tjintee chujni, ixi ja anta Ndotáina Dio tsango xraxaonnta ixi je e chujni?

Ko, ¿nge e tjintee chujni ixi ja anta tsango taxinta chujni juachjaon?

⁷ Ko ja anta juinche enta kaxin nchakon ixi ícha tjinte a chujni ixi sen ángel, ko tjume e kuajonnta ijié juachaxin ngajin chujni ko tsetuan an na ngajin kain nge e juincheñanta.

⁸ Kain nge e juincheñanta bakéenta ngangí tutée chujni ixi tsetuen en kain nge e. Méxin, chónnda ndo juachaxin tsituan an ndo ko jai xratikon ani me e.

⁹ Ko noina ixi ndo Jesús, ndo ikjan ícha tjinte a ixi sen ángel kaxin nchakon, ko ndo Dio ixi tjaunna ndo xruan an ndo ndo Jesucristo kuen en ndo kondeexin kain ijie kuachonda jaina ko jai je e ndo ijié juachaxin chónnda ndo ko kain chujni tsajon na juasaya† ngajin ndo ixi ti tsango tangi kon en ndo.

¹⁰ Ko kain tixinixin en ndo Dio ko kain nge e jii je e ndo juinchéña ndo, ko je e ndo tjaun ndo ixi kain chjen en ndo xrochónnda xjan juachaxin tsintee xjan ti tetuan an ndo. Méxin, ndo Dio kuajon ndo juachaxin ixi kuen en ndo Jesús, ixi jaña kuayé e ndo ícha ijie juachaxin, ko jaña kuantsjengí e ndo ijie sínká kain chujni.

¹¹ Ko ndo Jesús tsango tjúá ndo, ko je e ndo nchetjúá ndo aséen sen titikaon ndo, sen me e ko je e ndo, xraje o ndo Dio, Ndotée sen. Méxin, ndo Jesús tosue a ndo ndachro ndo ixi sen titikaon ndo, sen kichuu ndo sen me e.

¹² Ko je e ndo ndache ndo ndo Dio:

Sintano a sen kichian ixi ja anta;

ko kaxon jan an xrotsje,

tsajon juasiana ngajinnta ngusine ti ste sen kichian.

¹³ Kaxon ndachro ndo Jesús:

Jan an chuntia ngajin ndo Dio.

Ko íjngo ndachro ndo:

Nti i ritjén ngajin chjen en ndo Dio, xjan chjána ndo.

* **2:3 Nchána** Señor *Nchána Jesús o Nchána Dio* † **2:9 juasaya** respeto, honor

¹⁴ Kain chujni ste ngata a nunte xasintajni chónnda nã ntao ko ijni; jaña ndo Jesús nchakon jongí e ndo kaxon kuachónnda ndo ntao ko ijni xranchi chujni, me e chao kuen en ndo ixi juinchejexin ndo juachaxin kuachónnda Xixron anxrée, xi tituen en ti ten en chujni.

¹⁵ Ko ndo Jesús kuen en ndo me e kuantstjengí e ndo ti kuaxrakon en chujni ti tsen en nã ixi baxronka nã kain nchakon ixi bakintee nã xranchi naa ni stechrúa aséen.

¹⁶ Ndo Jesús kui a ndo ixi tsingijna ndo sen ángel. Je e ndo kuii ndo ixi tsingijna ndo chujni kuachrjenixin ndo Abraham.

¹⁷ Méxin, je e ndo Jesús jongí e ndo xranchi naa chujni, kuitikaon ndo kain nge e ixi jaña tsingijna ndo sen kichuu ndo, ko jaña ikjan ndo naa taana ícha tetuan an ngajinxin‡ ndo Dio, jaña juacha ndo juenga ndo nã ti sínká kain chujni ixi kuen en ndo.

¹⁸ Xranchi ndo Jesús tangi kon en ndo ko Xixron anxrée tjaun xa xrojuincheye e xa ndo ixi xrojuinche e ndo xrojan nge e ndako a, méxin jai nchakon Xixron anxrée tjaun xa ixi sincheyajna xa jajna ixi sinche ena ti ndako a, ndo Jesús chao tsingijnana ndo ixi sinche ana me e.

3

Ndo Jesús ícha tetuan an ndo ixi ndo Moisés

¹ Méxin, kichuuna, ja anta ti kontjúá asáanta, ja anta ti kuiya anta ndo Dio ixi xrokjannta chujnie ndo ko jian tsje enta ndo Jesús ixi je e ndo kóna ndo Ndotánajna ícha tetuan an; juasiexin je e ndo, chuntiana ngajin ndo Dio.

² Ndo Jesús tsango kuitikaon ndo ndo Dio, méxin, ndo Dio chjée ndo ndo Jesús naa ixra tsango tjintee, xranchi kaxon ndo Moisés jian kuitikaon ndo ti ixra juinche e ndo ndo a ndo Dio.

³ Ko ndo Jesús ícha ijié juachaxin kuayé e ndo ixi ndo Moisés, xranchi naa sen juinchekonchjian naa nchia, ícha tjintee je e sen ixi je e nchia.

⁴ Ngujngu nchia xrojan chujni juinchekonchjian nchia, ko je e ndo Dio ixi juachaxien ndo konchjian kain nge e jii.

⁵ Je e ndo Moisés tsango jian kuitikaon ndo ko jian ixra juinche e ndo ngajin ndo Dio. Ko ti ixra juinche e ndo Moisés me e chronga nge e xrojuinche e ndo Dio ikaxin nano tjume e.

⁶ Ko ndo Cristo, Chjen en ndo Dio, tsango tayakon en ndo ndo a ndo Dio ko nchia me e jajna, siá nduaxin tsitikaonna ndo, xroché e aséeina ko xrochuntiana ixi tsayé ena ti nge e tsajon ndo tsijja nchakon tsjexin kain nge e.

Ti jii ndo Dio, nti a tsjoké e tjajné ndo

⁷ Méxin, ndachro Espíritue ndo Dio jitaxin xroon: Siá jai tsin ennta nge e ndachro ndo Dio,

⁸ nchecha i asáanta xranchi juinche e sen tachrí anta ó sa ó, sen juincheña ndo Dio ti ntajie nchese.

⁹ Ti ndachro sen tachrí anta xranchrjen:

“Tsikonna á nduaxin ndo Dio chónnda ndo ijié juachaxin o na i”, ko kuitikaon a sen ixi je e ndo naa ndo Dio nduaxin, maski yuukan nano bikon sen ijié nge e juinche e ndo.

¹⁰ Méxin, jan an ndo Dio koña o ngajin kain sen kuintee nchakon me e, ko ndachrjan:

“Ja anta tsango juinchengachroe asáanta, ko kuitikaon anta chijnina kuetuan annta.”

¹¹ Méxin, nchakon koña o ngajin sen, xraxa on:

“Tsájon a juachaxin tsatsinga sen ti juintakonchjian naa tjajna tsjoké e sen.”

‡ 2:17 ngajinxin delante de

¹² Kichuuna, tsje enta jian, ixi ninaa ja anta xrochonda inta naa asáanta ña i, ko tsachrendáanta ko tsitikaon anta nge e tetuan an ndo Dio, ndo jichón.

¹³ Na i, cháña nichje é kichuunta ngujngu nchakon, jai ti xrají juachaxin tsarichonnta, jaña sintaya inta Xixron anxrée ixi sinchecha asáanta ko xronichjangí enta ndo Dio.

¹⁴ Ko siá soji xrochuntiana kain nchakon xranchi ti xrangíixión kuaxi kuitikaonna chijnie ndo, me e tsikinixina tsojuna ngajin ndo Cristo.

¹⁵ Ja in jindachro chijnie ndo Dio:
Siá jai tsin ennta ti ndachro ndo Dio,
nchecha i asáanta xranchi juinche e sen tachrí anta nchakon juincheña sen ndo Dio ixi nichjangí e sen ndo.

¹⁶ Sen me e ó kuin en sen tée ndo Dio ko xrajaña nichjangí sen, kain sen kuantsjexin ndo Moisés nunte Egipto.

¹⁷ Méxin, koña ndo Dio ngajin sen, yuukan nano, sen me e kuama sen ijie, méxin, kuinteken en sen ti ntajie nchese.

¹⁸ Ndo Dio ndache ndo sen me e: “Ja anta tikinixian inta tsixin innta ti tjajna juin-takonchjian ti tsjoké eni.” Sen ndache ndo me e, sen nichjangí ko kuitikaon a sen ndo.

¹⁹ Ko nojna nduaxin kuixin a sen ti tjajna tsjoké eni ixi kuitikaon a sen ndo Dio, ndo nduaxin.

4

¹ Méxin, siá ndo Dio xrajitajon ndo juachaxin tsatsingana ti tsjoké eni ti tetuan an je e ndo, xrokonda jian xrotsje ena xranchi tsojuna ixi ba xrojan jaina tsixin ana ti juinchekonchjian ndo Dio tsjoké eni.

² Kao jaina kuin enna chijnie ndo, chijni jian xranchi kuin en sen tachrí ina, ko je e sen maski kuin en sen chijni jian, xro an konde e sen chijni ixi chúntia i sen.

³ Ko jaina ti kuitikaonna chijnie ndo, me e tsixin inna tsjokeina nti a. Ixi ja in tsindachro ndo Dio:

Ixi juincheñaona sen,
méxin, ndachrjan tsixin a sen tsjoké e sen ti ritjén jan an.
Jaña ndachro ndo ixi maski ó no e ndo ixi jaña xrojuinche e sen ti nchakon xrangíixión kóña kain nge e ko nunte xasintajni.

⁴ Ja in nichja xroon chijnie ndo Dio ti joke e ndo nchakon yato:

Juexin juinche e ndo Dio kain xrée ndo,
tjume e joke e ndo ti nchakon yato.

⁵ Ko íjngo ndachro xroon chijnie ndo Dio:

Tsajon a juachaxin tixin in sen tsjoké e sen ti ritjén jan an.

⁶ Ko xratitjáña tsayé e ikaxin chujni juachaxin tsatsinga sen tsjoké e sen nti a. Ixi sen sa ó kuin en chijni jian, kuayé a sen juachaxin kuatsinga sen ti tsjoké eni ixi kuitikaon a sen chijnie ndo.

⁷ Méxin, ndo Dio íjngo kuajon ndo inaa nchakon, me e jai, ko chijnie ndo ja in ndachro ti tsikjin ndo David ícha tjume e ti ó kuin enna ícha seno:

Siá jai tsin ennta chijni tsinichja ndo Dio
nchecha i asáanta.

⁸ Siá ndo Josué xrokuajon ndo ti xrojuke e sen israelita, sen tjajnée ndo Dio, íxrondachro a ndo Dio ixi xrokuajon ndo inaa nchakon xrochonda sen juachaxin tsitikaon sen.

⁹ Ko jai xra jii inaa juachaxin tixin in sen titikaon ndo Dio tsjoké e sen ti no jii je e ndo;

¹⁰ ixi sen tsayé e juachaxin tixin in sen tsjoké e sen ti jii ndo Dio, sen me e ó tsjoké e sen ti ixra kuanche e sen, xranchi ndo Dio joke e ndo ti ixra juinche e ndo.

¹¹ Méxin xrokonda jaina soji tsitikaonna ndo Dio ko jaña tsayé ena juachaxin tsixin inna tsjokeina ti jii ndo, ko sinche ana xranchi juinche e sen tachrí ina, ti kuitikaon a sen ndo.

¹² Ixi chijnie ndo Dio, jichón chijni ko chóna chijni ijié juachaxin ko ícha yao chijni ixi chika espada yaoxin yuxin lado, ko tito o chijni ícha ngaxin in aséeina ko espírituina. Ko jian nhexraxaonni chijni ko nduaxin no e chijni kain ti nge e tjaun sinche e aséeina.

¹³ Xro an nge e ti juinchéña ndo Dio tsjacha tsemá ngajin ndo, ixi je e ndo chúxin ndo kain nge e, ko kain nge e ti ndako a nche e na maski xroxrabaatja, je e ndo chao tikon ndo, ko ngajin ndo xrokonda xrondachrona kain nge e sinkana.

Ndo Jesús me e ndotaana tsango tituan an

¹⁴ Ndo Jesús, Chjen en ndo Dio, me e ndotánaina ícha tetuan an; je e ndo kuixin in ndo ngajni ti jii ndo Dio. Méxin, jaina xrokonda soji tsojuna ko tsintue ana nge e ti kuin enna ko kuitikaonna.

¹⁵ Ko ndotánaina, ndo ícha tetuan an, chao tsikonóa ina ndo nchakon Xixron anxrée tjaun xa sincheyaina xa xranchi tjaun xa xrojuincheye e xa ndo Jesús ko je e ndo juacha ndo ko xro an ijié kuama ndo.

¹⁶ Méxin, chao tsonchjiñe ena ti tetuan an ndo Dio ixi je e ndo tsango tjuaina ndo, ko tsikonóa ina ndo ko tsingijnana ndo nchakon xrokondaina xrojan nge e.

5

¹ Chujni bakayé e ixra ndotaana ícha tsituan an, ndo Dio tinche e ndo sen ngakjen en sen xi, ixi xronichjaxin ndo ixi je e sen ngajin ndo Dio. Ixi je e ndotaana tsikao ndo ti tajon tjajnée ndo tsayé e ndo Dio, kaxon je e ndotaana tsikao ndo iko, ko iko me e tsen en ba ixi jaña tsumé e ijié chóna chujni.

² Ko ndotaana me e kaxon no e ndo ixi tangi tsitikaonni ndo Dio, méxin je e ndo chao tsikono e ndo chujni noe a ko ndako a nche e.

³ Je e ndotaana kaxon chóna ndo ijié, méxin, xrokonda tsóña ndo iko tsajon ndo ixi jaña tsumé e jíee ndo, ko tsóña ndo iko ixi tsuméxin jíee chujni.

⁴ Ko xro an ngisen je o sen xrondachro sen ixi je e sen ndotaana ícha tetuan an. Na i, ndo Dio xrokonda tsinche e ndo sen ko je e ndo tajon ndo juachaxin ngajin sen, jaña juinche e ndo nchakon kuinche e ndo ndo Aarón.

⁵ Jaña ndo Cristo, je a je o ndo ndachro ndo ixi je e ndo ndotaana ícha tetuan an. Na i, Ndo Dio kuajon ndo juachaxin me e, méxin, tsindachro ndo:

Ja a chjan na;

ko xrondachrjan jan an jai jan an ndotáa.

⁶ Kaxon ja in jitaxin xroon chijnie ndo Dio:

Ja a naa ndotaana tsake e kainxin nchakon, xranchi bake e ndo Melquisedec.

⁷ *Nchakon bake e ndo Cristo ngata a nunte xasintajni tsango soji kuinóatée ndo ko kuintji ndakon ndo ngajin ndo Dio, ndo chóna ijié juachaxin tsingijna ndo ndo Cristo ixi tsen a ndo. Je e ndo Cristo tsango kuitikaon ndo, méxin kuin en ndo Dio ti juanchia ndo.

⁸ Maski ndo Cristo, Chjen en ndo Dio, chinga juinchekao na ndo, je e ndo kuitikaon ndo ndotée ndo.

⁹ Je e ndo tsango tjuá aséen ndo ko kuitikaon ndo kain nge e kuituen en ndo; méxin, je e ndo chóna ndo ijié juachaxin ko tsajon ndo juachaxin me e ngajin sen titikaon ndo ko tsehón sen kain nchakon.

¹⁰ Méxin, ndachro ndo Dio je e ndo Jesús ndotaana ícha tetuan an xranchi bake e ndo Melquisedec.

Tintue anta chijnie ndo Dio

¹¹ Jan anna chondana itsjé nge e sintakuan annanta ixi chijni ji i, ko tsango tangi xrontatjunanta ixi ja anta tsango indao tienxinnta.

¹² *Ja anta ó chao xrojuinchekuen ennta ikaxin sen ixi ja anta ó sée no anta chijni ji i. Ko jai xrokonda íjngo tsaxi tsokuan annta chijnie ndo Dio. Ja anta stenta xranchi naa xjan nchíín ne a xjan ti ine sen cha, xrokonda tsi i xjan itsjin.

¹³ Ko sen ti i itsjin, sen me e ste sen xranchi naa xjan nandá tsijongí e, tienxin a sen chijnie ndo Dio, méxin, jua i nche e sen ti jian.

¹⁴ Ko sen tienxin ko no e nge e ti jian ko ti ndako a, sen me e ó ine sen nge e ine ti sen ícha.

6

¹ Xrokonda ícha tsonojna chijnie ndo Dio ixi jaña ícha jian sintu una ko soji tsitikaonna Ncháina. Ko je a je o sinchekuanxinna ti juinchekuaína sen nchakon nandá kuaye ena chijnie ndo Cristo ko íxrokjan ina xroxaxaonna je o xranchi tsintu ena ti ndako a jintu una sa ó ko sinchekuen a kichuuna íjngo xranchi xrochuntiana ndo Dio,

² ko kaxon ti juinchekuaína sen xranchi tsikitéeni, kaxon xranchi tsake e itjani ngata a jaa sen titikaon ndo Dio, xranchi xroxechón sen tsiken en, ko xranchi tsij nchakon ndo Dio sinchéña ndo ijie ngata a kain chujni.

³ Ko chao tjume e ícha tsjakona chijnie ndo Dio siá je e ndo tsajon ndo juachaxin.

⁴ Ixi sen ó kuayé e xro i tingasáña ko juinche e sen juaxruxin nge e kuitun en sen ti kuajon ndo Dio, ko sen me e kaxon tsikayé e sen Espíritue ndo,

⁵ sen ó juinche e juaxruxin tin en chijnie ndo Dio, ko no e sen ixi ijie juachaxin tsake e nchakon tsij nunte natjúá

⁶ ko siá sen me e ikjan sen sinche e sen ti ndako a, sen me e í jua i sinche eni ixi xrokjan tsitikaon sen ndo Dio ixi xranchi je e sen íjngo xrokuasintjian sen chjen en ndo Dio, ndo Jesús, nganito ntaa ko íjngo tsjanao sen ndo.

⁷ Ko sen kuayé e chijnie ndo, sen me e ste sen xranchi inche ti i inda nchakon soji tij ichrin ko chaxro tangi ino ko ika ti tenga chujni ko kueya tsee xejo ixi juinchenchaon ndo Dio nunte me e.

⁸ Ko siá nunte me e je o chá a tsangi, ti binga nti a xro an tjintee, ko chá a me e tsayé e cha juañaue ndo Dio, ko je o jichón en cha xroche cha.

Soji titikaonna ndo Dio

⁹ Maski ja in soji stenichjana, ja anta kichuuna, nókana ixi ja anta tikinixinnta ndo Dio ixi kuantsjengí e ndo ijie kuachóna asáanta.

¹⁰ Ixi ndo Dio tsango jian ndo, me e xrotjáñe a ndo ti jian stenze enta ko ti tingijnanta sen kichuunta, sen tjúá aséen, jaña tjakoxinnta ixi nduaxin tjue enta ndo Dio.

¹¹ Ko tja onna ixi ngujngu ja anta tsjákoxinnta ixi juaxruxin nche enta kain me e, jaña tsjakonta ixi stechon ennta nge e ndachro ndo Dio tsajon ndo.

¹² Ko tjaun ana tsaxi tsosa anta. Jan anna tja onna sinche enta xranchi sen nduaxin chuntia ndo Dio, ko sen me e stetayé e sen nge e tsindachro ndo Dio tsitun en sen.

Ti ndachro ndo Dio tsitun en sen

¹³ Nchakon ndo Dio tsindache ndo ndo Abraham ixi tsajon ndo naa nge e tsitun en ndo Abraham méxin je o je e ndo Dio tsinichjaxin aséen ndo ixi xro an ngisen ícha ijie ixi je e ndo, ko ndachro ndo nduaxin tsajon ndo nge e ndachro ndo.

¹⁴ Ko ja in tsindachro ndo Dio: “Nduaxin jan an sintanchaoan, ko kueya ichjan tsachrjenixian ja a.”

¹⁵ Ko ndo Abraham nduaxin chón en ndo, me e kuayé e ndo ti tsindachro ndo Dio tsitun en ndo.

¹⁶ Nchakon naa ngisen nichjaxin inaa ngisen ixi nduaxin sinche e sen ti ndachro sen, xrokonda sen me e ícha ijie sen o ícha tituan an sen ixi jaña sincheye a kichuu sen ko í tsjakaxin a sen.

¹⁷ Ndo Dio tjaun ndo juako e ndo chujni ixi je e ndo nduaxin tsajon ndo ti ndachro ndo, méxin, je o je e ndo nichjaxin aséen ndo, ko ti ndachro ndo xro an nge e tsindoxin ixi je e ndo noe a ndo ncheya ndo.

¹⁸ Jii yuu nge e tsinichja ndo Dio me e jua i tsindoxin: ti je o je e ndo nichjaxin aséen ndo ko ti tsindachro ndo tsitun en sen titikaon ndo, ko ndo Dio jua i sincheya ndo; ko me e ícha sinchesojina ixi xrochuntiana ixi je e ndo xrochjaina ndo ti tsindachro ndo.

¹⁹ Ko ti stechuntiana ndo, me e sinchesoji aséeina xranchi chika stechruaxin ntábarco, ko xranchi chika me e jaña jaina chondana nge e stechruaxinna tsatsingatu e tuenxin velo jii ni ngo ti jii ngajni, ko me e nchenoina ixi tsayé ena ti tsajon ndo Dio.

²⁰ Nti a kuixin in ndo Jesús, me e kuantje e ndo cha o tsixin in jaina, me e je e ndo ikjan ndo naa ndotaana ícha tetuan an, ko je e ndo ndotaana tsake e ndo kainxin nchakon xranchi bake e ndo Melquisedec.

7

Ndo Jesús naa ndotaana xranchi ndo Melquisedec

¹ Ndo Melquisedec naa rey kuetuan an tjajna Salem ko ndotaana ne e ndo Dio jii ngajni, kuachrje ndo kuayé e ndo ndo Abraham nchakon kjanxin ndo Abraham ti kuetoka o ndo ikaxin xi rey ko juacha ndo, ko ndotaana Melquisedec juinchenchaon ndo ndo Abraham.

² Jaña kaxon ndo Abraham kuajon ndo ngajin ndo Melquisedec itexin ti kainxin nge e tsijacha ndo ti ikjui ndo kué to ndo ko juacha ndo ngajin ikaxin xi rey. Ko nombrée ndo Melquisedec xrondachro “naa rey tsango jian nchéña ijie”; ko ti rey ne e tjajna Salem, me e xrondachro “naa rey tjaun a tsetoni.”

³ Noe ani ngisen ikjui ndotée ndo Melquisedec ko ngisen ikjui janée ndo ko ngisen ikjui sen tachrí e ndo; ko noe ani ngixe e nchakon tsijongi e ndo ko noe ani nchakon tsiken en ndo. Méxin, je e ndo xraje o ndo xranchi Chjen en ndo Dio, ko je e ndo naa ndotaana tsake e kainxin nchakon.

⁴ Jian tsje enta ixi ndo Melquisedec ícha baketuan an ndo, méxin, ndo Abraham, ndo tachrí ina xranchrjen, tsichjée ndo ndo Melquisedec ti texin ti kain nge e tsijacha ndo nchakon tsike to ndo ngajin ikaxin xi rey ko chujnie xa.

⁵ Ko ley tsikjin ndo Moisés ixi sen taana, sen tsikachrjenixin ndo taana Leví, je e sen tikinixin en sen tsayé e sen ti texin ti kain nge e chóna chujni, maski kichuu sen, ixi kain sen tsikachrjenixin sen ndo Abraham.

⁶ Ko ndo Melquisedec, maski kuachrjenixin a ndo ndotaana Leví, kuayé e ndo ti texin nge e kuajon ndo Abraham, ko juinchenchaon ndo ndo Abraham, ndo kuitun en nge e ti tsindachro ndo Dio.

⁷ Ko kainna noina ixi naa sen ícha ijie ko ícha tetuan an, me e sen tikinixin en sinchenchaon* inaa sen.

⁸ Kain sen taana tayé e ti itexin nge e tajon chujni, sen taana me e chujni jii ngata a nunte ko xranchi kain chujni, ten en sen kaxon. Ko xroon chijnie ndo Dio nichja xroon ixi ndo Melquisedec xrajii ndo xranchi naa sen jichón.

⁹ Ko chao xrondachroni ixi ndo Leví ko kain sen taana tachrjenixin ndo, sen stetayé e ti texin nge e tikinixin en sen, kaxon je e sen ó juenga sen na ngajin ndo Melquisedec nchakon juenga ndo Abraham na ti texin nge e ngajin ndo Melquisedec ixi je e sen Leví kuachrjenixin sen ndo Abraham.

¹⁰ Ko chao xrondachrona ixi Ndotáina Abraham ó jitika o ndo sen tsachrjenixin ndo ngaxin in aséen ndo, nchakon kuachrje ndo Melquisedec ko kuetan kichuu sen ko juinchenchaon ndo Melquisedec ndo Abraham.

Ndo Jesús xranchi ndo Melquisedec ndo

* 7:7 *sinchenchaon* bendecir

11 Chujni tjanya Israel kuayé e ley juako sen taana levita, sen kuachrjenixin ndo Aarón, ko siá nduaxin ley me e xrokontjuáxin aséen sen, íxrokonda i xrokonoxin inaa ndotaana; ndotaana me e kuachrjenixin a ndo ndo Aarón, je e ndo xrobake e ndo xranchi ndo Melquisedec.

12 Ixi xranchi kuij inaa ndotaana ícha ijié, jaña xrokonda tsindoxin ley kaxon.

13 Ko ti nichja xroon chijnie ndo Dio ixi Ncháina, je e ndo kuachrjenixin ndo inaa tjanya tikinixin en tjanya Israel, ko tjanya me e ninaa sen juinche a sen xra nche e ndotaana.

14 Ko jaina jian noina ixi Ncháina tsikachrjexin ndo tjanya Judá, ko ndo Moisés tsichronga i ndo ixi tjanya me e xrokuachrjenixin naa ndotaana.

15 Ko ícha jian tienxinna ixi ndotaana natjúá tsij me e naa ndotaana tonoxin xranchi ndo Melquisedec.

16 Ko je e ndo je a ikjan ndo naa taana xranchi nichja ley ixi xrokonda tsinche e sen ngisen tsíxin naa sen tsikachrjenixin naa sen tsango jian. Ko je e ndo Jesús naa ndotaana ícha tetuan an ixi nai a tsitjáña ndo.

17 Ko ja in nichja ndo Dio ixi Ncháina:

Ja a naa ndotaana tsake e kain nchakon,

ko xrochonda juachaxin xranchi ndo Melquisedec.

18 Méxin, ti baketuan an ley sa ó, jai ó komé e ley me e, ixi ítunda i ko íxro an xrée ley me e.

19 Ti ley kuajon ndo Moisés jua i kuindoxin ti ndako a kuanche e chujni. Ko jai kuaxi inaa ley ícha jian, ko ley me e ícha tsingijnana tsonchjiñe ena ngajin ndo Dio.

20 Ko ndo Dio je o ndo nichjixin aséen ndo ixi ndo Jesucristo nduaxin naa ndotaana chóna ijié juachaxin

21 ixi kaxin sen kuayé e sen xrée taana ko ndo Dio nichjixin a ndo sen taana. Ko ndotaana ji i, ndo Cristo, ndo Dio nichjixin ndo ixi aséen ndo ixi je e ndo Cristo xrokjui naa ndotaana, xranchi jitaxin xroon chijnie ndo Dio:

Ncháina Dio je e ndo nichjixin ndo aséen ndo

ko ti nichja ndo me e tsindoxin a:

Ja a naa ndotaana tsake e kainxin nchakon,

ko xrochonda juachaxin xranchi ndo Melquisedec.

22 Méxin, ndo Jesús je e ndo ndachro ndo ixi juachaxin jii jai ícha tjintee ixi juachaxin bake e sa ó.

23 Bake e kueya sen juinche e sen ixra taana ko bakinteken en sen, méxin í jua i juinche e sen ixra me e.

24 Ndo Jesús ti kuayé e ndo ixra me e ne e taana ícha tetuan an, í jua i inaa na tsayé e na ixra me e ixi je e ndo tsechón ndo kain nchakon.

25 Je e ndo chóna ndo ijié juachaxin, ixi chujni tsonchjiñe e ngajin ndo Dio, je e ndo Jesús chao tsantsjengí e ndo ti ndako a nche e sen, ixi je e ndo tsechón ndo kain nchakon ko je e ndo kain nchakon tinóatée ndo ngajin ndo Dio ixi chujnie ndo.

26 Je e ndo Jesús ndotaana ícha tetuan an, me e ndo xrokondajina ixi tsango tjúá aséen ndo ixi xro an ijié sínká ndo ko tonchjiñe a ndo ngajin chujni ndakua i nche e, méxin ndo Dio kuajon ndo juachaxin kuajin in ndo Jesús ngajní ko kuayé e ndo juachaxin ícha tsetuan an ndo.

27 Je e ndo xrokonde a ndo tsóña ndo iko xranchi ikaxin sen taana, sen xrokonda tsóña sen iko ngujngu nchakon tsoméxin jíee sen ko tjume e tsóña sen iko tsoméxin jíee chujni tjanée sen. Ndotánajina je e ndo je o naa nchakon kuajon ndo jnié ndo ko kuen en ndo ixi jaina.

28 Ley kuajon ndo Moisés, ley me e chronga xranchi bajinche e sen taana ícha tetuan an, ko sen taana me e naa chujni yama ijié xranchi ngixe i chujni. Ko tjume e je o ndo Dio nichjixin ndo aséen ndo ko ndache ndo Chjen en ndo ixi je e xjan xrokjan xjan

naa taana ícha tetuan an ko je e xjan xro an ijië chónða xjan ixi tsango jian xjan, ko jaña tsake e xjan kain nchakon.

8

Ixi ndo Jesús ti xín naa juachaxin natjúá

¹ Ti ícha tjintee stenichjana ixi ndotánajna, ndo ícha tetuan an, jii ndo ngajní, ndat-sjonxin jian ti tetuan an ndo Dio,

² ko je e ndo nche e ndo ixra ngaxin in ni ngo tsijincheckonchjian ndo Dio, ni ngo nduaxin; je a ni ngo juincheckonchjian chujni.

³ Kain ndotaana ícha tetuan an tsikayé e ndo ixra ixi tsajon ndo nge e tsayé e ndo Dio ko tsóña ndo iko tsoMéxin jíee ni tjajnéé ndo. Méxin, ndo Jesucristo kaxon xrokonda tsajon ndo xrojan nge e.

⁴ Siá je e ndo xrobake e ndo ngata a nunte xasintajni, je e ndo xrojuinche a ndo xrée naa ndotaana, ixi nti i ó jii ndotaana tajon nge e xranchi tsiketuan an ley kuajon ndo Moisés.

⁵ Sen taana, sen ste nti i nche e sen xra ko stetanseya sen xranchi nge e jiton en ngajní. Ko nojna kaxon ixi me e kuituen en ndo Moisés ixi xrojuinchéña ndo ni ngo manta xranchi ndo Dio tsindachro ndo: “Jian tsje e kain nge e xranchi jii ni ngo juako a ngata a ijna.”

⁶ Ko ndotánajna, Jesús, ndo ícha tetuan an, je e ndo kuayé e ndo naa ixra ícha jian me e je e ndo tinóatée ndo ixi jajna, ko me e juinchéña ndo naa juachaxin natjúá ko tsajon ndo ícha jian nge e tsayé ena.

Juachaxin sa ó ítunda i jai

⁷ Siá juachaxin sa ó nduaxin xrokuindoxin ti ndako a kuanche e chujni, íxrokonda i xroknoxin juachaxin yuxin.

⁸ Je e ndo Dio bikon ndo ixi juachaxin sa ó kuitikaon a na ko kuindoxin a ti kuanche e na, méxin, ndachro xroon chijnie ndo Dio:

Ncháina Dio ndachro:

Tsij nchakon jan an tsajon inaa juachaxin natjúá ngajin ni tjajna Israel ko ni tjajna Judá.

⁹ Juachaxin ji i je a xranchi juachaxin sa ó kuajon ngajin sen tachrí anta xranchrjen, nchakon jan an kuantsjexin sen tjajna Egipto;

ko je e sen kuitikaon a sen ti juachaxin kuetuan an sen,

méxin, jan an kuintu a sen, ichro Ncháina Dio.

¹⁰ Juachaxin sintaña ngajin tjajna Israel ti tsatsingaja kaxin nano, ja in tson en, ichro Ncháina Dio:

Jan an syntaxraxa on sen ley tsitikaon sen,

ko xrokjin ley me e ngaya aséen sen.

Jan an xrokjanna ndo Dio ne e sen,

ko je e sen, sen tjajnána.

¹¹ Ko íxrokonda i ixi ikaxin sen sinchekuen en kichuu sen

xranchi xrochuntia sen Ncháina,

ixi nchakon me e kain ichjan nchínchín ko kain sen ícha icha xrochuxinna sen jan an.

¹² Ko jan an sintama a kain ti ndako a juinche e sen

ko jan an íxroxraxaon a ijië kuachónða sen.

¹³ Ti ndachro ndo Dio ixi ti juachaxin natjúá me e xrondachro ixi juachaxin sa ó ó jitjexin juachaxin ko íse a tsitjáña juachaxin me e.

9

Ni ngo jii ngata a nunte xasintajni

¹ Juachaxin sa ó baketuan an xranchi xronichje eni ndo Dio ngaxin in ni ngo jii ngata a nunte xasintajni.

² Ni ngo manta ja in konchjian: sa ó jii luga ndatin in Luga Tjúá ko nti a jii lugee chika candelero ko mesa ti no jita a nutja tsikonchaon tikinixin en ndo Dio.

³ Tuenxin velo bake e luga yuxin, ti ndatin in Luga Tsango Tjúá.

⁴ Nti a bake e naa altar tsikonchjianxon jeoxón chika oro ko ngata a nti a bachexin tsjoxraxé ko nti a bake e kaxon arca ne e juachaxin ko nchijí arca me e jitsáa jeoxón chika oro. Nti a jixin in naa ichi jichóna nutja ndatin in maná kuixin ngajní. Nti a jii kaxon ntakuto e ndo Aarón, ntaá tsixechji; ko jii ixrotabla jitaxin ley tsikajon ndo Dio ngajin chujni.

⁵ Ngata a arca bake e yuu sen ángel tsikóñaxin chika oro ndatin in querubin, ko ti ste sen querubin me e xrondachro nti i tetuan an ndo Dio, ko sen querubin ixi nene e sen jitabatjaxin sen ntachja tijexin arca ti bakoméexin jíee sen. Ko jai xrokonda i tseki anta ícha kondee ji i.

⁶ Ko tsikonchjian kain jii, ko tjume e sen taana nanaó tixin in sen ni ngo tsikonchjianxin manta, ti luga tjúá ixi tajon sen juasaya ngajin ndo Dio.

⁷ Ko ti luga yuxin, ti ícha tjúá, je o ndotaana ícha tetuan an tixin in nti a, je o naa nchakon ngujngu nano; ko nchakon tixin in ndo xrokonda tsixin inkao ndo jnié iko, tsoméxin ti ndako a juinche e ndo ko tsoméxin ti ndako a juinche e ni tjajnée ndo.

⁸ Me e Espíritue ndo Dio ícha tjúá nchenoína ixi siá xrají luga tjúá, ko nti a bakayéexin ndo Dio juasaya, méxin, jua i xrokuixin in ngixe i ngisen ti luga ícha tjúá.

⁹ Kain ji in je o jitjakoxin nge e noína jai, ixi kain nge e ti bakajon chujni ko ti iko ten en chóna i juachaxin ixi tsindoxin ko tsontjúá aséen chujni tajon juasaya ngajin ndo.

¹⁰ Ixi jii je o tajon juachaxin nge e sineni ko tsiini o nge e sinche ani ixi jaña tsachrje eni ti ndako a. Kain ji i bingijna tsitjaja nchakon ndo Dio kuindoxin ndo kain nge e ko kuajon ndo naa nge e ícha jian.

Ndo Cristo kuajon ndo jnié ndo ko kuen en ndo ixi chujni

¹¹ Ko ndo Cristo ó kuíi ndo, ko jai je e ndo ndotaana ícha tetuan an ko je e ndo chóna ndo nge e ícha jian ti nandá tsií. Ko ti ni ngo nche e ndo ixra, ni ngo ícha jian ixi ni ngo me e je a konchjianxin itja chujni, ni ngo me e tikinixin a nunte xasintajni.

¹² Ndo Cristo ó kuixin in ndo ti luga ícha Tjúá, ko íkuajon a ndo jnié kubitó o jnié kuxintachjan. Na i. Je e ndo kuajon ndo jnié ndo, naakuaxixion naa nchakon kuixin in ndo nti a, ixi me e juenga ndo na ko me e naakuaxon kuantsje ndo ijie kuachóna chujni, me e kuayé e jaina tsechónna kain nchakon.*

¹³ Siá nduaxin jnié kuxinta ko jnié kubitó ko nteso e kuxintachjan kunchri, tsichexin ngata a altar, nteso me e tsikitée kain chujni tjúá i, nteso ko jnié iko chóna juachaxin sinchetjúá je o cuerpoe na.

¹⁴ Siá me e chóna juachaxin, jnié ndo Cristo ícha chóna juachaxin, ixi juachaxien Espíritue ndo Dio jichón kain nchakon, ndo Cristo kuen en ndo ixi chujni, ko kuen en ndo ixi jaña ndo Dio xrokuayé e ndo ndo Cristo xranchi naa nge e tayé e ndo, ko je e ndo Cristo xro an ijie chóna ndo. Méxin, jnié ndo ícha sinchetjúá aséeina ko kain ti ndako a juintu una, me e jai chao sinche ena ixra ngajin ndo Dio, ndo jichón.

¹⁵ Méxin, ndo Jesucristo, je e ndo nichjaxinna ndo ixi naa juachaxin natjúá. Ixi je e ndo Cristo kuen en ndo ixi chujni, me e komé e ti ndako a juinche e sen ixi batitikaon a sen ley sa ó; ko sen tsikiye e ndo Dio jai chao tsayé e sen ti tsindachro ndo tsitun en sen, naa nge e nai a tsjexin.

¹⁶ Méxin, siá jii naa xroon jitaxin ixi xrojan ngisen tsayé e naa herencia, xroon me e tsaxi tsitee xroon nchakon tsen en ngisen ti tsajon herencia me e.

* **9:12 tsechónna kain nchakon** vida eterna

¹⁷ Xroon xrochjeyaxin herencia, xroon me e tjinte a xroon siá xrajichón ngisen kuituan an konchjian xroon; je o nchakon tsenjan sen, me e tsaxi tsitee xroon.

¹⁸ Méxin, juachaxin xrangíxixión tsiketuan an ndo Dio kuaxi kuitee nchakon kuaxi kuintjí jnié iko.

¹⁹ Ndo Moisés tsichronga ndo kain nge e ti tsindachro ley jitaxin ixrotabla kuin en kain ni tjajna; ko tjume e kua ndo chjuen kutuchjon, chjon játse, ko kaxon tu o ntaa hisopo, ko tjume e kuataxin jnié kuxintachjan ko jnié kubito ko kuintekjaxin inda, tjume e kuintjitée ndo xroon jitaxin ley kuituan an ndo Dio ko kuintjitée ndo kain chujni tjajna.

²⁰ Ko ndo Moisés ndachro ndo: “Ijñi ji i tsjakoxin ti juachaxin kuetuan an ndo Dio tsitikaonnta.”

²¹ Ndo Moisés bikitée ndo ijñi ni ngo ko kain nge e ti tunda ngaxin in ni ngo.

²² Ja in ndachro ley ixi kain nge e xrokonda tsontjúáxin ixi ijñi; ko jua i tsomé e ti ndako a juinche e chujni siá tsintji a jnié iko.

Ti kuen en ndo Cristo me e tsoméxin ti ndako a

²³ Méxin, xrokonda tsen en iko ixi tsontjúáxin kain nge e ti jii nti i ngata a nunte xasintajni, kain ji i tjakoxin nge e jii ngajni; ko ti nge e jii ngajni xrokonda naa nge e ti ícha tjintee tsen en ixi jnié iko jii ngata a nunte.

Ti kuen en ndo Cristo me e chao tsantsje jíee kain chujni

²⁴ Ixi ndo Cristo kuixin a ndo ni ngo tsikonchjianxin itja chujni, ko me e je o tjako ixi jii naa ni ngo ngajni, nduaxin tjintee. Me e je e ndo kuixin in ndo ngajni ko jai jii ndo ti jii ndo Dio ko nti a jinichjixin ndo ixi jaina.

²⁵ Ko je e ndo je a kuen en ndo itsjé vez xranchi nche e Ndotaaana judío, ndo ícha tetuan an, ixi tixin in ndo luga tsango tjúa ngujngu nano me e tsajon ndo jnié iko, ijñi je a jnié je e ndo.

²⁶ Siá jaña xrojuinche e ndo Cristo xrokonda xrokuen en ndo itsjé vez ti xrangíxixión kóña nunte xasintajni. Ko jai ó tuinxin tsjexin nunte xasintajni, me e ndo Cristo konoxin ndo ko kuen en ndo naakua vez ixi sinchemé e ndo ti ndako a juinche e chujni.

²⁷ Méxin, jaña xrokonda tsen en chujni ste ngata a nunte naakua vez, ko tjume e ngajni tsóñexin na ijñe ti nge e juinche e ngujngu chujni.

²⁸ Jaña kaxon ndo Cristo naakua vez kuen en ndo ixi tsoméxin jíee kueya chujni. Ko tjume e tsii ndo íjngo, ko nchakon me e ísinchemé a ndo ti ndako a juinche e chujni. Je e ndo tsii ndo tsajon ndo juachaxin stechón kain chujni stechón en xrokjan ndo.

10

¹ Ixi ley kuetuan an ndo Moisés je o tjakoxin inaa juachaxin ícha jian tsii, ko ti kuetuan an ndo me e, je o konoxin xranchi naa tsa on ko jua i kuantsje ti ndako a kuachónnda chujni. Méxin, ngujngu nano bakonchjiñe e sen ngajin ndo Dio ixi bakajon sen jnié iko tsiken en.

² Ko siá ley me e nduaxin xrojuinchemé e ti ndako a kuanche e sen, íxroxraaon a sen nge e ti ña i juinche e sen ko íxrokuajon a sen iko xrokuen en.

³ Ko ti tóña sen iko ngujngu nano je o nchexraaon sen ti ndako a juinche e sen,

⁴ ixi jnié kuxinta ko jnié kubito jua i juinchemé e ti ndako a juinche e chujni.

Ti kuen en ndo Cristo ixi jaina

⁵ Méxin, nchakon ndo Cristo kujñi ndo ngata a nunte xasintajni ndache ndo ndo Dio:

Ja anta tjaun anta iko tsen en
ko tjaun anta ninaa nge e tsaye enta.

Na i.

Ja anta juincheñaninta xranchi naa chujni

⁶ixi ja anta nta inta juaxruxin jnié iko ko ikaxin nge e xrokuajon chujnianta, ixi me e xrokoméexin ti ndako a juinche e na.

⁷Méxin, ja in ndachrjan: “Nti i ritjén jan an xranchi nichja xroon jitaxin chijnie ndo Dio ko jan an tsitika on ti tjaun ja anta, Dio.”

⁸Ndachro ndo Dio sa ó ixi tjaun a ndo ko nche a ndo juaxruxin iko tsen en ko xro an nge e ti jii ngata a nunte xasintajni tsoméxin ti ndako a juinche e chujni, maski jaña kuituan an ley kuajon ndo Moisés.

⁹Tjume e ndachro ndo Cristo: “Nti i jui i ixi sinta a ti ja anta tjaunnta, Dio.” Me e xrondachro ndá a tsakéenta ti xrajon jnié iko tsoméxin ti ndako a ixi jai kuii inaa ijni ícha tjintee.

¹⁰Ndo Dio juinchetjúá ndo aséeina ixi ndo Jesucristo kuitikaon ndo xranchi tjaun ndo Dio ko je e ndo kuen en ndo ixi jaina naakua naa vez, ko me e kuitee kain nchakon.

¹¹Kain ndotaana judío tonchjiñe e ndo ngajin ndo Dio ngujngu nchakon ko tóña ndo iko tsoméxin ti ndako a juinche e ni tjajnée ndo, ko ijni me e chóna i juachaxin tsoméxin ti ndako a juinche e na.

¹²Ko ndo Jesucristo naakua naa vez kuen en ndo ixi jaina ko tjume e bake e ndo ndatsjonxin jian ti jii ndo Dio.

¹³Ko nti a jichón en ndo tsjexinja kain ni ningakon en ndo tsake e na ngangí tutée ndo.

¹⁴Méxin, jaña naakua naa vez xrajon ndo, xranchi naa nge e tjintee kuayé e ndo Dio, ixi jaña ícha juinchejian ndo chujni tikinixin en ndo.

¹⁵Ko Espíritue ndo Dio nduaxin nchenoina ji i, me e tsindachro ndo:

¹⁶Jan an sintaña naa juachaxin ngajin chujnina tsatsingaja nchakon ji i, ichro Ncháina. Tsakée chijnina ngaya aséen na, ko kaxon xrokjin chijni ngaya jaa na.

¹⁷Ko kaxon ndachro:

Íxroxaxaon a jan an ti ndako a ko ti ña i juinche e na.

¹⁸Jaña siá ó komé e ti ndako a juuntu una, íxrokonda i xroxrajon ícha ijni tsoméxin ti ndako a juuntu una.

Xrokonda xrochuntiana ngajin ndo Dio

¹⁹Kichuuna, jai íxro an nge e tingakoina, ó chao tsixin inna ndo a ndo Dio, nchia ícha Tjúá, juasiexin jnié ndo Jesucristo,

²⁰ixi je e ndo kuantje e ndo naa cha o natjúá tsayéxinna juachaxin tsechónna kain nchakon; cha o me e tsatsingatu e velo ko me e xrondachro ixi je e ndo kuen en ndo ixi jaina.

²¹Ndo Jesús, Ndotánajna ícha tetuan an, je e ndo tetuan an ndo ndo a ndo Dio.

²²Méxin, chao tsonchjiñe ena ngajin ndo Dio ixi jaina chuntiana ndo ixi je e ndo ó juinchetjúá ndo aséeina, ko xrokjui xranchi inda tjúá junemáxin ndo cuerpoina, ko me e aséeina ísinchexaxaon ana ti ndako a juuntu una.

²³Soji chuntiana ko jian tsitikaonna ixi nduaxin tsayé ena ti tsajon ndo ixi je e ndo nduaxin nche e ndo ti ndachro ndo.

²⁴Jian tsje ena xranchi tsingijna kichuuna, xranchi xrotjue e kichuuna ko je o ti jian sintu una.

²⁵Ko tsintue ana xroxra una nchakon xra oni ti xrotsjeni ngajin ndo Dio xranchi nche e ikaxin sen. Jaina chaxro xronichje e kichuuna, ixi ó jitonchjiñe e nchakon xrokjan Ncháina Jesucristo.

²⁶Siá ó kuichuxinna chijni jian ko xrastenche ena ti ndako a, ko ó noina ixi xrojuinche ana me e, í xro an nge e jii tsayé e ndo Dio ixi sinchemé e ndo ti ndako a juuntu una,

²⁷ko jaña je o xrochon enna tsoña ijie, ko xrochena xranchi xroche chujni ningakon en ndo Dio.

²⁸ Sa ó siá xrojan ngisen baktikaon a ley kuetuan an ndo Moisés, ko siá jii yuu o ní sen bikon nge e kon en, í jua i tsikonóeni chujni me e, xrokonda tsen en chujni.

²⁹ Xraxaonnta xranchi ícha tangi tson en ni xronichja kontree Chjen en ndo Dio, ko ni titikaon a juachaxin chóna jnié xjan. Ni xraxaon jaña kaxon nichjangí e na Espíritue ndo Dio, ndo tjaunna, ko titikaon a na jnié ndo Cristo kuixin juachaxin natjúá, ko ijni me e juinchetjúáxin ndo Dio aséen sen titikaon chjen en ndo.

³⁰ Nojna ixi tsindachro Ncháina: “Jan an tikinixinna sintaña ijie, jan an xrotjá a na ti tikinixin en na ixi ti ndako a juinche e na.” Kaxon tsindachro: “Ncháina sinchéña ndo ijie ngajin ni tjajnee ndo.”

³¹ Tsango tangi tson enni siá tsitikaon ani ndo Dio, ndo jichón.

³² Ko ja anta xraxaonnta xranchi tangi junta anta na nchakon kuaye enta xro i tingasáña ne e ndo Dio, ko soji kuinteenta nchakon me e.

³³ Kaxin ja anta tsango chinga ntatjunta na ko kain ni tjajna bikon na bikaonta ko kaxinnta jaña junta anta na kaxon.

³⁴ Ko ja anta bikonóe enta kaxon kain sen xraxin in na ngaxin in ndo achjiso, ko tsjangaxin anta ti kuantjsa anta na kain nge e tjintee kuachondanta, ixi no anta ixi ngajni xrochondanta naa nge e ícha jian ko nai a tsjexin.

³⁵ Méxin tintue anta ti chuntianta Ncháina ixi me e tsayéxinnta naa nge e ícha tjintee.

³⁶ Nchakon tsikaonnta ko ti tsuyaku anta na, me e xrokonda soji tsinteenta ko tsitikaonnta ti tjaun ndo Dio, me e tsaye enta ti tsindachro ndo.

³⁷ Ixi jaña ndachro xroon chijnie ndo Dio:

Tuinxin, tsango tuinxin tsij ngisen ndachro xroon xrokjan, ko ítsonchrjen a tsij ndo Jesús.

³⁸ Sen chuntiana jan an ko tjúa aséen sen,

me e sen tsechón kain nchakon;

ko siá xrokjan sen sinche e sen ti ndako a, jan an tsake a juaxruxin ngajin sen.

³⁹ Ko jaina je a xranchi chujni ikjan nche e ti ndako a ko ni me e itsji na ti jii xro i chexin ni ndako a nche e. Jaina tsjachana itsjina ngajin ndo Dio ixi jaina chuntiana ngajin Ncháina.

11

Ti chúntiani

¹ Ti nduaxin chuntiana ndo Dio me e nojna ixi tsayé ena nge e stechon enna, ko nduaxin nojna ixi jii nge e tsayé ena, maski tikon ana.

² Ndo Dio jian kuayé e ndo sen tachrí ina ixi je e sen nduaxin chuntia sen ngajin ndo.

³ *Ti chuntiana ngajin ndo Dio me e nojna ixi je e ndo tsijinchekonchjian ndo nunte xasintajni ko ngajni ko ti tikonni kóñaxin ti tikon ana.

⁴ Ko ti kuachúntia ndo Abel, me e kuajon ndo naa nge e ícha jian kuayé e ndo Dio, ko ndo Caín, na i. Ko ndo Dio jian nichja ndo ixi ndo Abel ixi tsango jian kuanche e ndo, méxin kuayé e ndo nge e kuajon ndo Abel, ko maski ó sée kuen en ndo Abel, ti kuachúntia ndo ndo Dio, me e xrajnichja jai.

⁵ Ixi ti kuachúntia ndo Enoc ngajin ndo Dio, je e ndo kuen a ndo ixi ndo Dio sabikao ndo ndo Enoc ngajni, ko ndakuitja i na ndo ixi sakjui ndo ngajni. Xroon chijnie ndo Dio ndachro ixi ndo Enoc nchakon bake e ndo nti i tsango kuachúntia ndo, méxin, ndo Dio bake e ndo juaxruxin.

⁶ Ko ndo Dio take a ndo juaxruxin ngajinna siá jaina chuntia ina ngajin ndo ixi siá tsonchjiñe ena ngajin ndo xrokonda tsitikaonna ixi je e ndo nduaxin jii ndo, ko tsajon ndo nge e tsayé e sen nduaxin rué e ndo.

⁷ Ti chuntia ndo Noé ngajin ndo Dio, nchakon ndo Dio ndachro ndo nge e xrokon en, ndo Noé maski xratikon a ndo nge e me e, kuitikaon ndo, méxin juinchekonchjian ndo naa ntabarco ixi jaña xrokuitjáña i sen ndo a ndo. Ko ixi ti chuntia* ndo Noé ngajin ndo Dio, je e ndo kuayé e ndo nge e jian tajon ndo Dio ngajin ni nduaxin chuntia ndo, ko ndo Noé nichje e ndo chujni ko je e na kuitikaon a na, méxin, kuitjáña na.

⁸ Ko ti kuachúntia ndo Abraham ngajin ndo Dio, nchakon kuiye e ndo ndo Abraham, je e ndo kuitikaon ndo, ko kuachrjexin ndo tjañée ndo ko sakjui ndo ti nunte xrokuajon ndo Dio, maski noe a ndo no jii nunte me e.

⁹ Ko ti chuntia ndo Abraham ngajin ndo Dio, méxin, bake e ndo ti nunte kuajon ndo Dio, ko bake e ndo nti a xranchi naa ni tsiki x̄in ikjín. Ko ndo a ndo naa nchia tsikóñaxin manta, ko kaxon jaña bake e ndo Isaac ko ndo Jacob, ko je e sen kaxon kuayé e sen nge e tsindachro ndo Dio tsajon ndo ngajin sen.

¹⁰ Ko ndo Abraham chón en ndo naa tjanya tsajon ndo Dio, ko tjanya me e tsitjáña i tjanya ixi ndo Dio juinchekonchjian ndo tjanya.

¹¹ Ko jan Sara, janchri e ndo Abraham, kuachúntia jan ndo Dio, ko maski jua i banchejongi e jan ichjan, ko je e ndo Abraham ko jan Sara yui sen ó tachríi sen, je e sen kuayé e sen juachaxin ixi je e jan Sara juinchejongí e jan naa xjan xi, ixi chuntia jan ti ndachro ndo Dio jaña xrokon en.

¹² Kaxon ndo Abraham, maski ó tsango tachríi ndo ko ó mero tsen en ndo, xrabikon ndo ixi tsango kueya chujni tsachrjenixin ndo, ko kain sen ndo a ndo me e tsango kueya sen xranchi nchanotsé jii ngajní o xranchi nchese jii ngande e ndachaon, ko jua i tsekini sen.

¹³ Ko kain sen me e ó kuen en sen ko íkuayé a sen ti tsindachro ndo Dio xrokuajon ndo, ko ixi chuntia sen ngajin ndo, maski bikon a sen ti xrokuajon ndo, je e sen kuitikaon sen, méxin, ché e sen ko kuandachro sen ixi nunte xasintajni je a ndo a sen ixi nti i nchion tinteeni xranchi ngisen t̄i x̄in ikjín.

¹⁴ Ko sen jaña nichja ixi nduaxin je a nía sen nti i ngata a nunte xasintajni, méxin ndachroxin xrastetjée sen ti no jii tjañée sen.

¹⁵ Ko siá tjaun sen xrokjan sen tjanya tsikachrjenixin sen, chao xrokjan sen nti a íjngo.

¹⁶ Ko na i. Je e sen tjaun sen naa tjanya ícha jian, tjanya me e jii ngajní. Ko ndo Dio to-sue a ndo ixi xrojuinchekin in sen ndo, ndo Dio ne e sen, ko je e ndo ó juinchekonchjian ndo naa tjanya tsayé e sen.

¹⁷ Ndo Abraham nduaxin chuntia ndo ngajin ndo Dio ko kuayé e ndo nge e kuajon ndo Dio, ko ndo Dio tjaun ndo xrokono e ndo á nduaxin chuntia ndo Abraham ngajin ndo, méxin, ndo Abraham kuajon ndo chjen en ndo, xjan Isaac, xranchi naa nge e tsayé e ndo Dio, maski chjen en ndo, xjan naakuaxixion kuachónnda ndo, ko maski tsindachro ndo Dio:

¹⁸ “Xjan Isaac tsachrjenixian itsjé chujni.”

¹⁹ Ko ndo Abraham no e ndo ixi ndo Dio nduaxin chónnda ndo ijié juachaxin sinchex-echón ndo chujni tsiken en. Ixi kuachúntia ndo Abraham, méxin ndakuen a chjen en ndo ko xranchi íjngo xrokuayé e ndo xjan Isaac, ko jaña kon en xranchi xroxechón xjan Isaac.

²⁰ Ko ixi chuntia ndo Isaac ngajin ndo Dio, me e juinchenchaon ndo kayui chjen en ndo, xjan Jacob ko xjan Esaú, ixi xrokuayé e xjan naa nge e jian ts̄ii kaxin nano tjume e.

²¹ Ko ndo Jacob chuntia ndo ngajin ndo Dio, méxin, nchakon ó xrokuen en ndo, xrachao juinchenchaon ndo ngujngu chjen en ndo José, ko kuajon ndo juasaya ngajin ndo Dio, nchakon me e ntakuto e ndo jitosojixin ndo.

²² Ko ixi chuntia ndo José ngajin ndo Dio, nchakon ó xrokuen en ndo, ndachro ndo ixi ts̄ii naa nchakon sen israelita tsachrjexin sen tjanya Egipto, ko kuetuan an ndo ixi nchakon satsjixin sen tjanya me e satsikao sen kain nte e ndo.

* **11:7 chuntia** tener fe

²³ Ndotée ndo Moisés ko janée ndo nduaxin chuntia sen ngajin ndo Dio, méxin, nchakon jongí e ndo Moisés, je e sen kuemá sen ndo ní nchanitjao ixi bikon sen ixi je e ndo naa ichjan tsango chaxro jitsje e xjan ko xrakuen a sen nge e tsiketuan an xi rey ixi je e xa tjaun xa xrokuen en kain xjan xi, xjan israelita.

²⁴ Ixi ti chuntia ndo Moisés ngajin ndo Dio, me e nchakon ó bangi ndo, chro a ndo xronache na ndo ixi je e ndo chjen en nchrichje en xi rey ne e tjajna Egipto.

²⁵ Je e ndo xraxaon ndo ixi maski chjinga xrojuinçekao na ndo xranchi nchekao na sen tjajnée ndo, ícha jian me e ixi xroché e ndo xrojuinche e ndo ti ndako a nche e ni tjajna Egipto.

²⁶ Ko xraxaon ndo ixi ícha tjintee tangi xrokuatsinga ndo xranchi tangi xrokuatsinga ndo Cristo ícha tjume e ixi xrochóna ndo kain nge e tjintee jii tjajna Egipto, ixi je e ndo jichúntia ndo tsayé e ndo ti tjintee xrokuajon ndo Dio.

²⁷ Ko ixi ti chuntia ndo Moisés, me e sajuixin ndo tjajna Egipto, ko xronka i ndo xrokoñao xi rey ngajin ndo. Je e ndo cháña chuntia ndo ndo Dio, ko jaña juinche e ndo xranchi xrobikon ndo ndo Dio, ndo jua i tikonna.

²⁸ Ko ixi ti chuntia ndo Moisés, me e kuaxi juinchéña ndo kia pascua, ko kuetuan an ndo ixi xrobingaxin ntachja ixi ijni, ixi jaña ndo ángel tóña chujni, jua i naaxrokóñaxón ninaa xjan sa ó, chjen en sen israelita.

²⁹ Ko ixi ti chuntia sen israelita ngajin ndo Dio, me e chao kuatsingatu e sen Ndachaon† Játse, xranchi xrokjui sen ngata a inche xema, ko kaxon ni tjajna Egipto tjaun na xrokuatsinga na, ko je e na kjun en na inda ko kuen en na.

³⁰ Ko ixi chuntia sen israelita ngajin ndo Dio me e jamangi naa tjatu o ijié jingakuenxin tjajna Jericó, ti je e sen kuaji sen ngandajin tjatu o yaato nchakon.

³¹ Ixi nchri Rahab, nchri bikitéexin itsjé xi, je e nchra kuen a nchra xranchi kon en ni kuitikaon a ndo Dio, ixi je e nchra juakoxin nchra ixi chuntia nchra ndo Dio nchakon jian kuayé e nchra sen tjajna Israel, sen tsikii kuitsjáyá tjajnée nchra Jericó.

³² ¿Ko nge e ícha xrontatjunta? Tsitja i nchakon ixi tseki anta ixi ndo Gedeón, ndo Barac, ndo Sansón, ndo Jefté, ndo David, ndo Samuel, ko sen kuanichjaxin chijnie ndo Dio ó sa ó.

³³ Je e sen chuntia sen ngajin ndo Dio, me e juacha sen kuetuen en sen ikaxin tjajna ijié, ko jian juinchéña sen ijié ngajin chujni me e, ko kuayé e sen nge e tsindachro ndo Dio xrokuajon ndo, ko kuije e sen ro a kujenda,‡

³⁴ ko juinchekanga sen xro i xrohexin sen, ko juacha sabinga sen ixi tjaun na naaxrokóñaxón na sen ixi chika espada. Ko sen konchrje, chao juinchesoji aséen sen, ko juacha sen juaya sen ixi tsango konsoji sen, ko juacha sen ngajin kain ni kuaningakon en sen.

³⁵ Ko bake e kaxin nchri chúntia nchra ndo Dio me e íjngo kuayé e nchra sen ndo a nchra, sen tsiken en ixi sen me e xechón sen.

Ko ikaxin sen cháña kuen en sen ixi je e sen tjaun a sen xrokuintu e sen ti chuntia sen ndo Dio ixi kono e sen ixi xroxechón sen inaa nchakon ko nti a ícha jian tsake e sen.

³⁶ Ikaxin sen kuaxi na sen ntaa, ikaxin sen juanoa na sen, ko ikaxin sen kuinchruxin na sen nochika ngaxin in ndo achjiso.

³⁷ Ikaxin sen ixro kóñaxin na sen, ko ikaxin sen konchrinjindunga na sen ixi chika sierra, ko ikaxin sen kóñaxin na sen chika espada ko ikaxin sen chrikao na sen nti i, nda a, ko baketsaa sen ixi tjue é kutuchjon ko tjue é kubito ixi tsango nóa sen, juaxruxin a bake e sen ixi tsango chinga juinchekao na sen.

³⁸ Ko ni nunte xasintajni tikinixien a na xrobikon na sen. Je e sen kuachóna i sen tjajna, ntajie nti a bakintee sen ko ijna nti a bakaji sen, ko ngaxin in itjao§ ko गया yaso e kóña ndo a sen.

† 11:29 *Ndachaon* mar ‡ 11:33 *Kujenda* león § 11:38 *Itjao* cueva

³⁹ Ko ninaa sen kuayé a sen ti tsindachro ndo Dio xrokuayé e sen ko je e ndo juinche e ndo juaxruxin ixi nduaxin kuitikaon sen ndo,

⁴⁰ ixi ndo Dio ó tsixraxaon ndo tsajon ndo naa nge e ícha jian ngajin jaina ti xrastechónna ko kain sen chuntia ndo ó seno, sen chinga juinchekaon na, ixi jaña nguñguna tsayé ena naa juachaxin natjúá ko jaña tsontjúá aséeina.

12

Je o ndo Cristo tsitikaonna

¹ Ko jaina noina ixi chondana ngandajinna kueya sen tjakoxin ixi nduaxin kuachúntia sen ndo Dio, sen kuintee seno, méxin ndá a tsintu ena kain nge e ti ndako a tingakoina ko jaña chao tsingana, xrorué ena ti nge e chuntiana.

² Me e jian tsitikaonna Ncháina Jesús ixi je e ndo tingijnana ndo xrochuntiana ngajin ndo ícha jian, ko je e ndo tjakoina ndo ixi kosue a ndo nchakon kuenito na ndo ntacru ko kuen en ndo ixi je e ndo no e ndo, maski chinga xrojuinchekao na ndo, je e ndo juaxruxin xrobake e ndo ngajin ndo Dio, ko jai ndatsjonxin jian jii ndo ti tetuan an ndo Dio.

³ Méxin, xraxaonnta ti juakoina Ncháina Jesús, itsjé chujni chinga juinchekaon na ndo, ni ndako a nche e, ko juacha ndo kuatsinga ndo kain ti tangi juinchekao na ndo; méxin, ja anta tonchrje anta ko tintue anta ti chuntianta ndo Dio.

⁴ Ixi jai ja anta xraritétoku unta kain ti ndako a ko xratiji a nchakon tsen ennta xranchi kuen en Ncháina.

⁵ Ja anta á ó tjáña anta chijni tjáanta ndo Dio ixi je e ndo nichja anta ndo xranchi chjen en ndo ixi ja in ndachro xroon chijnie ndo Dio:

Chjan na, ja anta toña anta xranchi nichja anta Ncháina nge e sinche enta, ko tsonié a asáanta nchakon tuyakutéenta Ncháina.

⁶ Ixi Ncháina tuyakuté e ndo kain sen tjue e ndo

ko tajon ndo juachaxin tangi tatsinga sen tayé e ndo xranchi chjen en ndo.

⁷ Tokuaxin anta nge e soji nichja anta ndo Dio ixi je e ndo nichja anta ndo xranchi chjen en ndo. ¿Á xrojan ndotée naa ichjan xrokuyakuté a ndo xjan nchakon ndakua i jinche e xjan?

⁸ Siá ndo Dio tsuyakute anta ndo xranchi chjen en ndo, me e xrondachro ixi je a nduaxin chjen en ndo ja anta, je a xjan tsikachrjenixin ndo.

⁹ Jaina ti xranchinchina, Ndotáina bakuyakutéena sen ixi baktikaon ana sen, ixi ndako xrojuintu una nge e ko jaña batitikaona sen. Méxin, ¿xranchi xrokuitikaon ana Ndotáina jii ngajni?*, ndo chjaina juachaxin tsehónna kain nchakon.

¹⁰ Sen ndotáina bakuyakutéena sen ixi tjaun sen ndako tsitikaonna nge e jian baketuaina sen ti xrastena kaxion nchakon nti i ngata a nunte xasintajni. Ko ícha Ndo Dio, je e ndo nduaxin nchekuaina ndo nge e jian tikinixin sinche ena ko me e tsjachana tsontjúá aséeina xranchi je e ndo tjúá ndo.

¹¹ Ko nduaxin ninaa jaina tjaun ana tsikaonna kondeexin ti ndakua i tsijintu una ko take ana xraxaonna ixi ti tsikaonna me e tsingijnana ixi juaxruxin tsinteena ko jaña sinche ena ti jian.

Tsango tangi ton en chujni titikaon ani ti nichja ndo Dio

¹² Méxin, ícha nchesoji tjáanta tsikonchrje ko nchesoji ntatuchi innta ísoji a,

¹³ ko tjéenta cha o jian ko nao itji. Me e tsoxruen en tutéanta ni e ko ítsitaon a tutáanta.

¹⁴ Chaxro ko juaxruxin tinteenta ko jian tjentonta kain chujni, ko nchetjúá asáanta ixi siá sinchetjúá i asáanta jua i tsikonnta Ncháina Jesucristo.

* 12:9 ngajni cielo

¹⁵ Jian tsje enta ixi kain sen tsayé e sen ti nchekitun enni ndo Dio, ixi siá na i, tson en xranchi naa ika itsjá, ko siá xrojan sen xrokui i ti itsjá me e, tsontsjá aséen sen ko sincheni e sen ikaxin chujni.

¹⁶ Ninna ja anta tsarichriko inta inaa chujni je a xixi anta o je a nchrinchri anta, ko tintue anta ti jian tjáanta ndo Dio ixi jaña juinche e ndo Esaú, juinчекji ndo juachaxin tikinixin en ndo ixi je e ndo xjan sa ó ndo, ko juasingíxin ndo juachaxin me e ixi naa laato ndaxrée jma.

¹⁷ Ko ja anta ó no anta ixi nchakon ndo Esaú tjaun ndo xrokuayé e ndo juachaxien ndotée ndo, jua i kuayé e ndo juachaxin me e, maski tsango tsjanga ndo, í jua i kuindoxin ndo ti juinche e ndo.

¹⁸ Ja anta konchjiñe anta ti ijna bake e ndo Dio xranchi konchjiñe e sen israelita, ijna jitjama xro i ko chao xrotséni ijna me e, ko konchjiñe anta ti naxixe e ko ti no jii ichrin ko chrinto soji.

¹⁹ Ko ja anta kaxon kuien anta ndachro itjao,† ko kuien anta nichja ndo Dio, jaña sen israelita, sen kuin en nichja ndo Dio, kuinóatée sen ixi íxronichja i ndo,

²⁰ ixi tjaun a sen tsin en sen ti ndachro ndo Dio: “Xrokonda tsen en ngisen tsake e tutée ngata a ijna. Ji i xronachro naatsenxón iko o chujni ixi ntayao o ixro.”

²¹ Tsango ijié juaxrakon me e, méxin, ndo Moisés ndachro ndo: “Jan an tsango xronkana, méxin rixranga.”

²² Ko je a xranchi konchjiñe e sen israelita, ja anta nduaxin konchjiñe enta ngajin ijna Sión, tjajnée ndo Dio, ndo jichón kain nchakon, tjajna me e tjajna Jerusalén jii ngajni, ko nti a ste itsjé sen ángel, stetajon sen juasaya ngajin ndo Dio,

²³ ko kaxon nti a ste kain chjen en ndo Dio, xjan jitaxin xroon jii ngajni. Ja anta tsikonchjiñe enta ngajin ndo Dio, ndo nchéña ijie ngajin kain chujni, ko konchjiñe enta ngajin espíritue sen jian juinche e, sen ó tjúa aséen,

²⁴ ko tsikonchjiñe enta ngajin ndo Jesús, ndo nichjaxinna ixi inaa juachaxin natjúá ko jnié ndo, ijni kuintji kuijmaxinna. Ko ijni me e ícha jian nichjaxin ijni, je a xranchi jnié ndo Abel.

²⁵ Méxin, jian tsje enta ngisen jinichja anta ko titikaonnta ndo Dio, ixi sen tjajnée ndo, sen kuitikaon a nchakon kuyakutee ndo sen ngata a ijna jua i sabinge e sen ndo. Méxin, jaina ícha jua i satsinge ena ndo siá sintu una ti ndako a ko tsitikaon ana ndo, ixi je e ndo jinichjaina ndo ko tée ndo jiti xin ngajni.

²⁶ Nchakon me e, nchakon nichja ndo Dio, kontengí nunte. Ko jai ndachro ndo: “Chao íjngo tsontengi nunte ko je a je o nunte, kao ngajni tsontengi.”

²⁷ Ko ti ndachro ndo “íjngo”, tienxinni ixi tsitjáña kain nge e ti tsikonchjian, kain nge e ti tontengi, ko je o tsitu e kain nge e ti tontengi a.

²⁸ Juasie ndo Dio ixi juachaxin chjaina ndo, jua i tsontengi juachaxin me e. Ko tsakexinna ntatuchi inna ko xrokonda tsajonna juasaya ngajin ndo ko xrotjue ena ndo ngaya aséeina xranchi je e ndo nche e ndo juaxruxin,

²⁹ ixi ndo Dio na ina, xranchi naa xro i ndo, xro i tjaaka kain nge e ko xro an nge e titu e.

13

Ti jian sinche ena me e sinche e ndo Dio juaxruxin

¹ Ngujngu ja anta tintue anta ti tjue enta kichuunta xranchi xrokonda sinche e ngujngu chujni titikaon ndo Jesús.

² Chaxro nichje enta sen tsiji ndointa ko tsitu e sen nti a ixi jaña tsijinche e kaxin sen, noe a sen ixi kaxin sen ángel tsichjée sen juachaxin tsikitu e ndo a sen.

† 12:19 *itjao* trompeta

³ Xraxaonnta ixi sen steje e ndo achjiso, xranchi ja anta steku unta sen nti a. Xraxaonnta ixi kain sen chinga nchekao nã, xranchi ja anta jaña xrojuinta anta nã kaxon.

⁴ Xraxaonnta ixi ti kuta anta tsango jian ko tsango tjintee me e, méxin ncheye anta ndoxi anta o janchri anta, ixi ndo Dio sinchéña ndo ijie ngajin ni ndako a nche e, xranchi ni tejuakao ni je a ndoxi e o janchri e.

⁵ Tjue anta tomi, take énta juaxruxin ixi je o ti richondanta; ixi tsindachro ndo Dio: “Jan an tsintua inta ko xrotjáñana i ixi ja anta.”

⁶ Méxin, chao xrondachrona: Nchána, je e ndo tingijnana ndo, méxin, xro an nge e xrakon ana ixi chujni jua i sinchenínana.

⁷ Xraxaonnta ngisen juako anta ko nichja anta sen chijnie ndo Dio; take énta xraxaonnta xranchi jian juinche e sen ngata a nunte nti i ko nche enta xranchi juakoxin sen, xranchi je e sen tsango chuntia sen ndo Dio.

⁸ Ndo Jesucristo, je e ndo xraje o ndo najna, jai ko kainxin nchakon.

⁹ Tintue anta ixi sintakuan annta nã ikaxin chijni, chijni je a chijnie ndo Dio ixi je e nã tjakona kaxon ley kondee ti sineni ko me e xro an tunda. Cháña nchesoji aséejna ixi ndo Dio tjaunna ndo.

¹⁰ Jaina kuaye ena inaa altar kueta a nge e xrajon ngajin ndo Dio ti tso méxin nge e ndako a juinche e chujni, ko me e jua i kuayé e sen taana kuanche e ixrã ó sée ngaxin in nchia tsango tjúa.

¹¹ Ko ndotaana ícha tetuan an ndo bakikao ndo jnié iku ngaxin in Nchia ícha Tjúá ixi ijni me e xrajon ixi jaña tso mé e ti ndako a kuanche e chujni. Ko ntau e iku me e kuache ngande e tjajné nã.

¹² Jaña kaxon Ncháina Jesús bikaon ndo kuenxin ndo ngande e tjajna Jerusalén, ko jnié ndo me e kuijmaxin ti ndako a kuanche e chujni.

¹³ Tsachrjena ko rué ena Ncháina Jesús ngande e tjajna, ko xranchi kain ti chinga juinчекao nã ndo, jaña tsituexinna sinchejna nã kaxon.

¹⁴ Ixi ngata a nunte xasintajni nti i chonda ina ninaa tjajna tsake e kainxin nchakon; méxin, stetjéena inaa tjajna, naa tjajna nandá tsii.

¹⁵ Ixi juasie Ncháina Jesucristo me e chao tsajonna juasaya ngajin ndo Dio kainxin nchakon. Ixi juasaya* me e naa nge e tayé e ndo Dio, xrokonda tsajonna juasaya ngajin ndo ixi je e ndo tsango jian ndo.

¹⁶ Tjáña inta ixi xrokonda sinche enta ti jian ko tingijnanta chujni chóna i nge e. Jaña nche enta ixi me e nche e ndo Dio juaxruxin.

¹⁷ Titikaonnta sen tituan an ngaxin in ni ngo, ixi je e sen tayakon en sen asáanta ko nojna ixi je e sen xrochronga sen ngajin ndo Dio ti ixrã juinche e sen ngajinnta. Kaxon ncheña o anta sen ixi jaña ícha juaxruxin sinche e sen ixrã ti kuetuan an ndo Dio; jaña ja anta kaxon juaxruxin tsake enta.

¹⁸ Nichje enta ndo Dio ixi jan ana, jian stenta ana ixrã kuituannana ko xro an nge e stencheni e aséenana ixi tja onna sinta ana jian kain nge e.

¹⁹ Ko jan an tjanča anta ixi xronichje enta ndo Dio ixi tsajon ndo juachaxin tuinxin xrokjanna ngajinnta.

Ndo Dio sintanchaonnta ndo

²⁰ Ndo Dio, ndo tajon juaxruxin, ndo ncheketo a chujni, ndo juinchehexochón Ncháina Jesucristo, ko je e ndo Jesucristo, ndo tingatjana xranchi kutuchjon, ko ixi jnié ndo me e kuitee juachaxin natjúá tsake e kain nchakon,

²¹ je e ndo sinchetjúá ndo asáanta, me e jian sinche enta kain nge e ko tsitikaonnta ti tjaun je e ndo; ko je e ndo sinche e ndo ngajin jaina ti je e ndo tjaun ndo ixi juachaxien ndo Jesucristo. Ko kain nchakon ndo Jesucristo tsayé e ndo juasaya. Jaña tson en.

* 13:15 *juasaya* respeto, honor

²² Kichuuna, tinóatáana ixi tsaye enta kaxion chijni kjin annta, ko chijni me e tsingijnanta ixi ícha tsitikaonnta.

²³ Ntano anta ixi ndo kichuuna Timoteo ó kuachrjexin ndo ndo achjiso. Siá tuinxin tsii ndo tsjasokian ndo nchakon tsjasotsja anta.

²⁴ Tájonnta juajnana ngajin kain sen titaon anta nti a ko kain sen tjajna chuntia ndo Jesucristo ko taye énta juajna xruan annta sen tjajna Italia.

²⁵ Ko Ndo Dio sintanchaonnta ndo. Jaña tson en.

Xroon tsikjin ndo Santiago

Ndo Santiago tsikjin ndo xroon tsayé e kain sen tsichjeke e ngata a nunte xasintajni

¹ *Jan an Santiago, nta a ixra ngajin ndo Dio ko ngajin Ncháina Jesucristo, tjá anta juajna kain ja anta ti tsikachrjenixinnta ti teyuu chjen en ndo Israel ko tsichjeke enta ngata a nunte xasintajni.

Ndo Dio tajon ndo ti jian xraxaon chujni

² Ja anta kichuuna, maski tangi stetatsinganta ngata a nunte nti i, ja anta take énta juaxruxin.

³ Ó no anta ixi siá xrojan nge e tangi tintekon annta, me e tsono anta siá nduaxin ja anta chuntianta Ncháina Jesucristo ko me e ritanginta ko soji tsinteenta.

⁴ Ko chon énta ixi ti tangi me e sinche e ixra ngaya asáanta. Me e ícha tsontjúá asáanta, ko jian sinche enta ko xro an nge e tsitjáñe e asáanta.

⁵ Ko siá xrojan ja anta titjáña tsono anta nge e ti jian, ja anta tjanche enta ndo Dio, ko je e ndo xrotjáanta ndo tsienxinnta jian, ko je e ndo tjenge a ndo nge e tajon ndo.

⁶ Ja anta nchakon tjanche enta ndo Dio naa nge e, chuntianta ixi nduaxin tsaye enta nge e juanchianta, ixi ngisen titikaon a tsayé e sen xrojan nge e tjanchia sen, sen me e ton en sen xranchi ndachaon toncheka chrinto nango ko nango.

⁷ Ixi sen titikaon a, tsono e sen ixi Ncháina Jesucristo tsajon a ndo nge e juanchia sen

⁸ ixi jai xraxaon sen naa nge e ko ndúya íjngo nge e xraxaon sen, sen me e je a jian nche e sen.

⁹ Sen kichuuna, sen chóna i kueya nge e, sen me e ícha xroché e sen ixi ícha tjintee sen ngajin ndo Dio.

¹⁰ Sen chóna kueya nge e, sen me e juaxruxin tsake e sen kaxon nchakon ndo Dio tsajon ndo juachaxin xro an nge e xrochóna sen, ixi kain ni kueya chóna, ni me e tson en na xranchi tsjo e ika.

¹¹ Hora xrochrin in nchakon ko tsango tsania chjiixro, ika xroxema ka, ko tsjo e ka xrochjejin tsjo, ko tsitjáña ti chaxro bakikoni ka. Jaña tson en ni chóna kueya nge e ko itsjé tomi, tsen en na ko tsitjáña kain ti ixra juinche e na.

Sen chúxin ndo Dio chao tsatsinga sen ti tangi tsji

¹² Juaxruxin tsake e sen kichuuna nchakon tsii juachjaon ngata a sen ko soji tsake e sen, ixi sen me e tsayé e sen juachaxin tsechón sen kain nchakon, jaña tsindachro ndo Dio tsayé e kain sen nduaxin tjue e ndo.

¹³ Nchakon xrojan ja anta tjaunnta sinche enta ti ndako a, ndachro anta ixi ndo Dio tsikake e ndo me e. Ndo Dio jian ndo ko je e ndo nche a ndo ti ndako a jii, ko ni ña i chóna i juachaxin tsakaon na ndo, ko je e ndo take a ndo ngaya aséenni ti ndako a sinche eni,

¹⁴ ixi nchakon xrojan chujni tjaun na sinche e na ti ndako a, je o na take e na ngaya aséen na ti ndako a sinche e na.

¹⁵ Ko ti ña i xraxaon chujni tjongíexin ti ndako a, ko ti ndako a ícha tangi ngaya aséen na, kondeexin me e teenxin chujni.

¹⁶ Jan an tjua anta kichuuna, xraxaon anta ti ndako a.

¹⁷ Kain nge e jian ko kain nge e chaxro tayé ena, kain me e ti xin ngajni ti jii Ndotáina Dio, ndo tsijinchekonchjian kain xro i jii ngajni. Ko je e ndo, ti ndachro ndo ko ti xraxaon ndo tindoxin a, ko xro an tsa on jii ngajin ndo.

¹⁸ Jain̄a jongíexinna íjngo ixi ti chijni chjain̄a je e ndo ixi jaña jueñaο ndo ko jain̄a ikjanna xranchi naa nge e ícha sa ó juinchéña je e ndo.

Chujni sinche e ti ndachro chijnie ndo

¹⁹ Méxin, ja anta kichuuna, kainnta jian tin ennta ko taka i xronichjanta ko taka i tsoñaonta.

²⁰ Ixi sen taka toñaο jua i nche e sen xranchi tjaun ndo Dio.

²¹ Ko xrokonda tintu enta kain ti ña i ko ti ndako a nche e íkaxin chujni ko ja anta tsitikaonxinnta ixi nchijí asáanta chijnie ndo Dio kuaye enta, ixi chijni me e xrotjáanta juachaxin tsarichonnta kain nchakon.

²² Ko xrokonda sinche enta ti ndachro chijnie ndo Dio. Je a je o tsin ennta ixi siá je o tsin ennta ko sinche anta, ja onta rincheye é asáanta.

²³ Méxin, sen tin en chijnie ndo ko nche a sen ti ndachro chijni, sen me e nche e sen xranchi naa chujni jitsjexin xrosenda ikon sen,

²⁴ me e tsje e sen ikon sen ko hora satji sen, taka tjáñe e sen xranchi bikon sen ikon sen.

²⁵ Ko sen tjáñe a nge e kuin en ko jian jitsje e sen nge e ichro chijnie ndo ixi chijni me e tsingijna sen tsintu e sen kain nge e ti ndako a kuanche e sen, ko soji tsintee sen, sen me e juaxruxin tsake e sen kain nchakon.

²⁶ Siá xrojan ngisen ndachro ixi tsango titikaon sen ndo Dio, ko ndako a nichja sen, sen me e ncheye e sen aséen sen, ko xro an xrée ti ndachro sen titikaon sen.

²⁷ Ngisen nduaxin jian titikaon ndo Dio ko xro an nge e sínká sen ngajin Ndo, sen me e xrokonda jaña sinche e sen: tsingijna sen xjan nóa ko kaxon sen ka an, sen jitatsinga juachjaon, ko sinchekitja i aséen sen ixi kain ti ndako a jii ngata a nunte xasintajni.

2

Xrokonda xraje o xrotjue eni kain chujni

¹ Kichianna, ja anta ti chuntianta Ncháina Jesucristo, ndo tayé e kain juasaya, xrokonda ja anta xraje o xrotjue enta kain chujni ko tinche anta chujni xrotjue enta.

² Nchakon xroxra unta ixi tsajonnta juasaya ngajin ndo Dio ko tsij̄ naa xi, xi chón̄da kueya tomi ko jian jitsáa xa ko jiá kuchaningo itja xa, ko hora me e kaxon tsij̄ naa xi nóa ko chaxro a jitsáa xa.

³ Ko siá ja anta chaxro xronichje enta xi jitsáa jian ko xrondachenta xa: “Nti i chaxro take énta”, ko xi nóa xronichje anta xa ndako ixi xrondachenta xa: “Ja a tjasían o take é nunte no ndá a.”

⁴ Ja anta me e índako a stenchē enta ixi je a xraje o kuiye enta kayui chujni.

⁵ Ja anta kichuuna tsango tjua anta, tin ennta ji i: Ndo Dio tsikinche e ndo sen nóa jii ngata a nunte nti i ixi je e sen ícha tjintee sen ixi chuntia sen ndo Dio, ko sen me e jai tsayé e sen juachaxien ndo ko tsij̄ nchakon tsayé e sen juachaxin tixin in sen ti tetuan an je e ndo ixi jaña tsindachro ndo tsayé e kain sen tjue e ndo.

⁶ Ko ja anta chinga nchekuunta sen nóa ixi tjue anta sen. Ko ni chón̄da itsjé tomi, ni me e tjenga i n̄a n̄a jian ixr̄a nche enta ko tingakjinnta n̄a ngajin xi tetuan an ixi titikaonnta ndo Dio.

⁷ Ixi ni chón̄da kueya tomi, ni me e ícha chinga nichjangí e n̄a ndo Jesús, ndo tituan an ja anta.

⁸ Ja anta siá nduaxin titikaonnta ti tetuan an ndo Dio xranchi nichja xroon: “Xrokonda xrotjue enta ni kichuunta xranchi tjue enta asáanta”, me e jian nche enta.

⁹ Ko siá je a xraje o tjue enta ni kichuunta ko tinche enta ngisen tjue enta, me e tamanta ijie ko titikaon anta chijnie ndo Dio.

¹⁰ Siá jii naa sen titikaon kain ti kuetuan an ndo Dio ko naakua nge e kuitikaon a sen, ixi me ó tama sen ijie ixi nche a sen kain nge e kuetuan an ndo Dio.

¹¹ Ixi je e ndo Dio ndachro ndo: “Ja anta sen nchri ko sen xi ti ó tsikuta anta xrochonda inta inaa nchri o inaa xi, nchri je a janchri anta o xi je a ndoxi anta”, ko kaxon tsindachro ndo: “Jua i naatóñaxónnta ni kichuunta.” Ko siá ja anta chonda inta inaa nchri o inaa xi, ko naakóñaxónnta naa chujni, me e ó kuamanta ijie.

¹² Méxin, xrokonda jian nichjanta ko jian nche enta ixi tsij nchakon sinchéña ndo Dio ijie ngajinnta xranchi nichja chijni chónnda ijié juachaxin sinchemé e kain ijie.

¹³ Méxin, sen bikonóe a sen kichuu, sen me e kaxon nchakon tsoña ijie, ndo Dio tsikonóe a ndo sen. Ko sen tikonóe e sen kichuu sen, sen me e kaxon ndo Dio tsikonóe e ndo sen nchakon sinchéña ndo ijie.

Ti chuntiana ngajin ndo Dio, xrokonda sinche ena ti jian

¹⁴ Ja anta kichuuna, xro an tjintee siá xrondachrona ixi tsango chuntianta Ndotáina Dio ko tingijna inta ni kichuunta. Xrokonda nduaxin tsingijnanta ni kichuunta, je a je o xronichjanta. Siá sinche anta jaña, ti ndachrona chuntianta Ncháina, ¿á me e tsingijna inta tsachrje ijie chondana?

¹⁵ Siá naa sen kichuuna, sen xi o sen nchri, xro an nge e chónnda sen tsetsáa sen ko xro an nge e chónnda sen sine sen ngujngu nchakon,

¹⁶ ko jaina xrondachena sen: “Itjinta jian ko intenta ko tin innta ko jian taritsíinta”, ko siá jaina tajon ana nge e xrokonde e sen, ti nichjana me e tjinte a.

¹⁷ Ixi ti xrondachrona chuntiana ndo Dio xrokonda tsingijnana ni kichuuna. Siá sinche ana jaña, ti ndachrona chuntiana ndo Dio xro an tjintee.

¹⁸ Ko siá xrojan ngisen ndachro: “Ja a chuntia ndo Dio, ko jan an ícha tingijna chujni.” Ja a ndachjijiana xranchi chuntia ndo Dio, ko tingijna ia chujni xrokonde e, ko jan an tsjáko a xranchi nduaxin chuntia ndo Dio ixi tingijna chujni.

¹⁹ Ja a titikáoaan ixi je o naa ndo Dio jii ko jaña jian xraxaoan, ko kaxon espíritue Xixron anxrée jaña titikaon ko xraga ixi xronka.

²⁰ Ja a tóña ñia ninta, titikáoaan ixi ti chuntiana ndo Dio xrokonda tsingijnana ni kichuuna, ko siá sinche ana jaña, ti ndachrona chuntiana, tjinte a.

²¹ Ndotáina Dio ndachro ndo ixi jian juinche e ndotáchri ina Abraham, nchakon kuitikaon ndo, xrokuajon ndo chjen en ndo, xjan Isaac, xrokuen en xjan ngata a ixro xrokuayé e ndo Dio.

²² Méxin, ja anta tienxinnta jian ti juakoxin ndo Abraham, je e ndo chuntia ndo ndo Dio ko kuitikaon ndo ixi xrokuajon ndo chjen en ndo, ko méxin, ti chuntia ndo ícha tjintee.

²³ Jaña kon en xranchi jitaxin xroon chijnie ndo Dio: “Je e ndo Abraham soji chuntia* ndo ndo Dio, méxin, ndachro ndo Dio ixi komé e jíee ndo Abraham”, méxin ndachro ndo Dio ixi je e ndo tjento ndo ndo Abraham.

²⁴ Xrokonda jian tsienxinnta ixi ndo Dio tsayé e ndo chujni ixi ti jian nche e ko je a je o ndachro sen ixi chuntia sen ndo.

²⁵ Jaña kaxon nchri Rahab, maski sa ó kuachónnda nchra itsjé xi, nchakon kuiji sen israelita tjajnée nchra, je e nchra kuajon nchra juachaxin kuitu e sen ndo a nchra ko bingijna nchra sen sajuixin sen inaa cha o ixi tjaun ni tjajnée nchra naaxrokóñaxón na sen, méxin, ndo Dio jian kuayé e ndo nge e juinche e nchra nchakon je e nchra bingijna nchra sen.

²⁶ Jaña ti cuerpoe chujni siá chónnda i aséen, me e xrondachro ixi ó tsiken en, ko jaña kaxon siá chuntiana ndo Dio ko tingijna ina ni kichuuna, ti ndachrona ixi chuntiana ndo Dio, tjinte a.

3

Ro anta ndako xronichja

* 2:23 *chuntia* tener fe

¹ Kichuuna, kueya i ja anta tsingakuenxinnta sinchekuen ennta chujni chijnie ndo Dio ixi siá ndako a sinchekuen ennta chujni, me e ja anta ícha soji tsóña anta ijie.

² Kainna ndako a nichjana, ko siá jii ngisen jian nichje e sen sen kichuu sen ko xro an chijni ndako a tachrjexin ro a sen, sen me e ícha tjúá aséen sen ko chao tetuen en sen nchijí cuerpoe sen.

³ Ji i jii xranchi naa kunxin, tsake e na chika ngaya ro a ba ixi jaña chao tsitikaon ba ko ndako itsji ba.

⁴ Tsje enta kaxon xranchi ste ntábarco: maski tsango ijie ntáa ko tsango soji chrinto toncheka ntáa, xi teka ntáa chao tituen en xa ntáa ixi chóna ntáa naa ntáa nchíin tekáxinni ntáa.

⁵ Jaña nejenni kaxon. Maski tsango nchíin, nchakon nichja tsango nchejié nge e nichja, ko ti nichja me e xranchi naa xro i nchíin nchekakiin nchijí naa ijna.

⁶ Jaña nejenni jii xranchi naa xro i ko hora nichja ti ndako a, me e ncheni e nchijí aséenni ko cuerpoeni. Nge e ndako a nichjani me e tsitjáñaxin kain nge e jian jii ngaya aséenni, ko tsitjáñaxin kain chujni tin en nge e nichjani ixi Xixron anxrée nchekateya xa ixi ndako a xronichjani.

⁷ Chujni chao sinchesancho kain iko jie e jii ntajie, ko kain iko tjanga ko kunchee ko iko jingangi ndachaon,* kain iko me e chao tsetuen enni ba.

⁸ Ko nejenni jua i tsetuen enni ixi ti nichja chóna xranchi xrokjui xroanyua tsenxin aséen chujni.

⁹ Ro ana tajonxinna juasaya ngajin Ndotáina Dio ko kaxon ro ana tengexinna teka chujni, chujni juinchéña ndo Dio xranchi je e ndo.

¹⁰ Kaxon ixi ro ana tajonxinna juasaya ngajin ndo Dio ko kaxon ro ana tjankataxinna ijie ngajin ni kichuuna. Kichuuna, nche anta jaña ixi ndako a me e.

¹¹ Ti no tachrjetóxin inda, tachrje a inda tsjen ko kaxon nda tsjá.

¹² Kichuuna, ¿á chao naa ntáa tu higo tsajon ntáa kaxon tu aceituna o ntáa tajon tu uva tsajon ntáa kaxon tu higo? Kaxon jua i ti no tachrjetóxin nda tsjen tachrjexin nda tsjá.

Ti nduaxin xraxaonna jian ti xin ti jii ndo Dio

¹³ Siá jii xrojan ngisen ngakjen ennta, sen tsango no e ko tienxin jian, sen me e xrokonda sinche e sen jian ko xronichja sen jian ko sinchejié a aséen sen ixi ti tsango jian no e sen.

¹⁴ Ko siá ja anta tochjuya anta me e sinchetsjá asáanta, ko siá ja onta tjaunnta sinche enta kain nge e, me e sinchejié a asáanta ixi nge e ti no anta ixi me e xrokjui xranchi xrojuincheyanta ko ndachro anta ti nduaxin.

¹⁵ Siá jaña nche enta, ti no anta me e je a ndo Dio kuajon, me e tsijinchiinta ixi chujni jii ngata a nunte, chujni titikaon a ndo Dio ko me e ti tajon Xixron anxrée.

¹⁶ Ti no jii chujni chjuye e ko ti tjaun je o tsetuan an, nti a jii ti ncheketoni ko kain ti ndako a.

¹⁷ Ko sen jian tsienxin ko jian xraxaon ti me e ti xin ngajin ndo Dio: sen me e xrokonda tsjako sen ixi jian aséen sen ko tseto a sen ko tsingijna sen chujni ko tsitikaon sen ti jian ndachro sen kichuu sen, ko tsikonóe e sen chujni ko jian sinche e sen, ko xronichja sen ti nduaxin.

¹⁸ Ko sen tjaun tsake e juaxruxin xrokonda tsingijna sen sen kichuu sen kaxon tsake e sen juaxruxin, ko jaña tsintee sen juaxruxin xranchi tjaun ndo Dio.

4

Sen ícha tjaun nge e jii nunte xasintajni

* 3:7 ndachaon mar

¹ ¿Ti no t̄i x̄in ti ncheke to kichuu t̄ajna ko ti no t̄i x̄in ti t̄et̄oku u kichuunta? Kain ji i tachr̄jexin ngaya asáanta.

² Ja anta tsango t̄jaunnta xrochondanta xrojan nge e, ko jua i te nanta, me e toñaonta ko t̄jaunnta naatsóñaxónnta chujni. Tochjuya anta ixi jua i chondanta nge e t̄jaunnta, méxin, t̄et̄oku unta chujni. Ko jua i taye énta nge e t̄jaunnta ixi ja anta tjanche anta ndo Dio.

³ Tjanchianta ko jua i taye énta nge e t̄jaunnta ixi ndako a tjanchianta, ko ti tjanchianta tayé anta ixi je o t̄jaunnta sinchecháxin asáanta.

⁴ Méxin ja anta ikjannta chujni titikaon a ndo Dio. ¿Á noa i ja anta ixi siá tsango t̄jue enta kain ti ndako a jii ngata a nunte xasintajni,* méxin ikjannta xranchi ni ningakon en ndo Dio? Ngisen tjento nge e ndako a ton en ngata a nunte, sen me e jua i tsjento sen ndo Dio.

⁵ Á xraxaonnta ixi ti nge e ndachro xroon chijnie ndo Dio tjinte a ixi ja in ndachro: “Ixi Espiritue ndo Dio kuaye ena me e xrondachro ixi je o ngajin ndo xrochuntiana.”

⁶ Ndo Dio tsango tingijnana ndo, ko xroon chijnie ndo ndachro: “Ndo Dio ningakon en ndo kain chujni tsango nchejié aséen, ixi je e ndo t̄jue e ndo kain chujni nchejié a aséen.”

⁷ Tintu enta ndo Dio tsetuan annta ndo. Titikaon anta ti ndachro Xixron anxrée ko je e xa satsjixin xa ti ste ja anta.

⁸ Tonchjiñe e ja anta ngajin ndo Dio, ko kaxon je e ndo tsonchjiñe e ndo ngajinnta. Nchetjúá asáanta kain ja anta ti t̄jue enta nge e ndako a jii ngata a nunte ko kaxon t̄jaunnta xrot̄jue enta ndo Dio.

⁹ Tsjanganta ko tuyakonta ko ncheni e asáanta. Ko tindoxinnta ti tjanonta ko jai tsjanganta, ko ti chá anta jai tsoni e asáanta.

¹⁰ Nchenchíin asáanta ngajin ndo Dio ko je e ndo jian xronichja ndo ixi ja anta.

Chungie anta ni kichuunta

¹¹ Kichuuna, nichja inta kontree sen kichuunta ixi kain sen nichja kontree sen kichuu, xrokjui xranchi xronichja sen kontree chijnie ndo Dio. Ko siá jaña nichja sen ikjan sen xranchi naa xi nchéña ijie, ixi titikaon a sen ti tetuan an ndo Dio.

¹² Ixi je o je e ndo Dio kuajon ndo ley tsitikaon chujni, ko je o je e ndo tikinixin en ndo sinchéña ndo ijie o tsjankata a ndo chujni ijie, ko chónnda ndo juachaxin sinchemé e ndo ti ndako a juinche e chujni. Méxin, ¿sonda ja anta nichjanta kontree ni kichuunta?

Noa inta siá ndúya tsarichonnta

¹³ Ja anta ti ja in ndachronnta: “Jai o ndúya itsjina t̄ajna ijié ko nti a tsojuna nchijí nano ko sintu una ixr̄a ko tsjachana itsjé tomi.”

¹⁴ Ko ja anta noa inta nge e tson en ndúya, á xratsarichónnta o na i. Jainna stena nti i ngata a nunte xranchi naa t̄juinunte; tonoxin t̄juj naa nchion ko t̄jume e titjáña t̄juj.

¹⁵ Ja anta xrokonda ja in xrondachronnta: “Siá Ndotáina Dio tsajon ndo juachaxin tsechónna ndúya, me e sintu una ngixe i ixr̄a.”

¹⁶ Ko ja anta hora nichjanta tsango nchejié asáanta, ko ti ndachronnta me e ndako a jii.

¹⁷ Ixi ti sen no e nche e ti jian ko nche a sen, sen me e tama sen ijie.

5

Chijni nhexraxaon chujni chónnda itsjé nge e

¹ Tin ennta ja anta chujni chónnda itsjé tomi ko itsjé nge e, ja anta tsjanganta ko tuyakonta ixi ts̄ij juachjaon sincheni e asáanta

² *ixi kain ti tjintee chondanta, tsirenga; ko manta sterianta tsiki i kuch̄ji.

* 4:4 xasintajni mundo 5:2 Mt. 6:19.

³ Ko tsiki ixien kain chika oro ko kain chika plata richondanta, ko ti tsitjo me e tjakoxin ti ndako a nche enta, ko xro i chexin kain nge e, jaña tsitjáñaxin ja anta. Itsjé tomi ko itsjé nge e kuasintjanta kain nchakon ji i, ko noa inta ixi nchakon ji i ó tsjexin nunte xasintajni.

⁴ Sen juinche e xráanta nchakon kuandáanta, jitsjangaxin sen tomie sen tasinke enta sen, ko Ndo Dio, ndo chóna kain juachaxin, kuin en ndo ixi sen nche e ixra stetsjangaxin tomie sen.

⁵ Ngata a nunte nti i, ja anta tsango nchexruantanta, ko kain juaxruxin chondanta, ko xranchi iko tjontao, jaña stetjontao ja anta, ko tuinxin xranchi tsen en je e ba, jaña tsen en ja anta.

⁶ Ja anta juankata anta ijiē ko naa kónaxónnta chujni xro an ijiē chóna, ko chujni me e xro an nge e juinche e sen.

Nichje enta Ndo Dio ko chon énta tsjate e ndo

⁷ Kichuuna, take énta juaxruxin ixi ó tsji nchakon tsji Ncháina Jesús. Chon énta xranchi sen tenga nokéen, je e sen chón en sen tsji ichrin tsengaxin sen ko ichrin tsicháxin nge e bengá sen, ixi tsji nchakon tsandáa sen.

⁸ Jaña ja anta kaxon chon énta ko soji tinteenta ixi ó tsji nchakon xrokjan Ncháina Jesucristo.

⁹ Kichuuna, tjangíe a kichuunta ixi jaña ndo Dio tsjankata inta ndo ijiē ixi je e ndo, ndo nchéña ijiē, ó tuinxin tsji ndo.

¹⁰ Kichuuna, tsje enta xranchi tangi ko ijié juachjaon kuatsinga sen profeta ko je e sen juaxruxin bake e sen, sen kuachóna juachaxin nichjaxin sen nombrée Ndotáina Dio.

¹¹ Jaina ndachrona ixi je e sen juaxruxin bake e sen maski kuatsinga sen ijié juachjaon. Ja anta ó kuin ennta xranchi ndo Job bikixi en ndo kain nge e kon en ndo, ko xranchi ndo Dio bingijna ndo ti ó juexin kuatsinga ndo juachjaon ixi Ndotáina Dio tsango tjuajna ndo ko tsango tikonóa ina ndo.

¹² *Kichuuna, jan an ntatjunta ndachroxin anta nombrée ndo Dio jii ngajni o nunte nti i o ngixe i naa nge e jii ngata a nunte ixi nduaxin nge e ndachrona ixi nchakon xrondachrona jaán, jaña tson en, ko nchakon xrondachrona na i, jaña tson en kaxon, ko jaña ndo Dio tsjankata inta ndo ijiē.

¹³ Siá xrojan ja anta jitoni e asáanta, nichje enta ndo Dio. Siá xrojan ja anta juaxruxin stenta, itsjenta ko tájonnta juasianta ngajin ndo Dio.

¹⁴ *Siá xrojan ja anta ni anta, tiye enta sen stetaon annta, sen chóna sen juachaxin ngaxin in ni ngo, ko je e sen xronichje e sen ndo Dio ko ixi juachaxien Ncháina Jesús tsake e sen ndaxi e ngata a jaa sen ni e.

¹⁵ Nchakon nichje enta ndo Dio ko chuntianta ngajin ndo, me e sen ni e tsoxruen en sen ko je e ndo Dio sinchekaya ndo sen, ko siá xrojan ijiē yama sen, je e ndo sinchemé e ndo kain ti sínká sen.

¹⁶ Méxin, ja anta ndachenta sen kichuunta nge e ndako a juinche enta ixi jaña je e sen xronichje e sen ndo Dio, ko je e ndo sinchexruan anta ndo. Ixi sen ícha chuntia ndo Dio, je e sen nichje e sen ndo ko je e ndo tin en ndo nge e tjanchia sen.

¹⁷ Ndo profeta Elías, bake e ndo xranchi jaina, ko nchakon juanche e ndo ndo Dio ixi nichijí aséen ndo ixi xrokui a ichrin, jaña kon en ko nduaxin kui a ichrin ngata a nunte ní nano ko tu o.

¹⁸ Ko tjume e je e ndo Elías nichje e ndo ndo Dio íjngo ko ndo Dio xruan an ndo ichrin ngata a nunte ko inche kuajon nge e kuandáa sen.

¹⁹ Kichuuna, siá xrojan ja anta tsachrendáanta cha o jian ko inaa sen sinchekjannta sen,

²⁰*tono anta ixi sen juinçekjan kichuu cha o jian, sen me e bingijna sen ixi tsitjáña i aséen chujni me e, ko ndo Dio sinchemé e ndo itsjé ijie kuachón da sen.

Xroon sa ó tsikjin ndo Pedro

Ndo Pedro kjin en ndo xroon sen titikaon Ncháina, sen tsichjeke e ikaxin tjajna

¹ Jan an, Pedro, ndo Jesucristo kuinche ena ndo ko xruan anna ndo sinta a xrée ndo, me e ikjin xroon ji i ko xruan an xroon ngajinnta ti tsichjeke enta ikaxin tjajna xranchi nunte Ponto, Galacia, Capadocia, Asia, ko Bitinia.

² Ja anta, Ndotáina Dio tsikincha anta ndo ixi jaña tsixraxaon ndo ó sa ó, ko ixi juachaxien Espíritue ndo tsikincha anta ndo ixi tsitikaonnta ndo ko jaña tsontjúáxin asáanta ixi jnié ndo Jesucristo. Taye énta juaxruxin tajon ndo Dio ko je e ndo sintanchaonnta ndo.

Stechon enna naa nge e jian

³ Tajonna juasiaina ngajin ndo Dio, Ndotée Ncháina Jesucristo, ixi tsango tjaunna ndo ko bikonóina ndo me e jongí ena íjngo ixi xechón ndo Jesucristo. Ko méxin stechon enna nge e jian tsji,

⁴ tsaye enta nge e jian tsajon ndo Dio, ti chónnda ndo ngajní, naa nge e jua i tsitjáña, ko jua i tsonkitja, ko jua i xroxé nde xranchi itsjo.

⁵ Ko ixi chuntianta Ndo Dio, je e ndo tayakon annta ndo ko ixi juachaxien ndo chao tsarichonnta kain nchakon xranchi tsixraxaon ndo ó sa ó. Kain ji i tsonoxin nchakon tsjexin nunte xasintajni.

⁶ Méxin, ja anta tsango juaxruxin stenta maski xrojan nge e tangi tsatsinganta kaxin nchakon.

⁷ Ixi ti chuntianta Ncháina, me e xranchi chika oro xrokonda tsatsinga chika chringi xro i, ixi jaña tsonoxin á nduaxin jian chika o na i. Méxin, ícha tjintee xrochúntiani Ncháina, ixi chika oro ixi tjexin chika. Ixi siá titikaonnta Ncháina xrokonda tangi tsatsingaxinnta, ko jaña ndo Dio tsikon ndo á bikixi anta ti tangi, me e chao tsaye enta juachaxin ko jian xronichja ndo Jesucristo ixi ja anta nchakon tsji ndo.

⁸ Ja anta titikaonnta ndo Jesucristo ko tjue enta ndo maski tikon anta ndo ko tsango chá anta ko jua i xrondachronta ti tsango chaxro juaxruxin me e chondanta,

⁹ ixi ja anta ó chondanta juachaxin tsarichonnta kain nchakon, me e juachanta ixi chuntianta ndo Dio.

¹⁰ Nchakon ó sa ó sen kuachronga chijnie ndo Dio juanchangi sen xranchi xrokuechón chujni kain nchakon ko chronga sen ixi ndo Dio xrokuajon ndo juachaxin me e xrokuaye enta ixi tjua anta ndo ko jian ndo.

¹¹ Espíritue ndo Cristo juincheno e sen kuachronga chijnie ndo Dio ó sa ó ixi ndo Cristo tangi xrokon en ndo, ko tjume e tsayé e ndo juachaxin ijié. Ko je e sen tjaun sen tsono e sen ngisen me e ko ngisa xrokon en nge e ndachro Espíritue ndo Dio.

¹² Ko ndo Dio juincheno e ndo sen ixi nge e chronga sen je a xrokon en nchakon bake e sen. Kain ji i xrokon en nchakon stena jai. Ji i chijni juako anta sen bajako chijni jian ixi juachaxin Espíritue ndo Dio kuxin ngajní. Ko kain ji i sen ángel kaxon tjaun sen xrobikon sen kaxon.

Ndo Dio tjaun ndo ndako tsojuna

¹³ Méxin, jian xraxaonnta nge e sinche enta ko jian tsinteenta. Ko ixi tjua anta ndo Dio, méxin ixi nchijí asáanta chon énta nge e tsajon ndo nchakon xrokjan Ncháina Jesucristo.

¹⁴ Xranchi naa chjan titikaon ndotée, jaña nche enta, ko ínche anta xranchi banche enta sa ó ti kuachuxin anta ndo Dio.

¹⁵ Cháña tjúa ko ndako tsinteenta ixi ndo Dio, ndo kuiya anta, je e ndo tjúa ndo.

¹⁶ Ixi xroon chijnie ndo Dio ndachro: “Ja anta tjúa tinteenta xranchi jan an tjúána.”

¹⁷ Siá ndachronta ixi ndo Dio Ndotáanta, ndo jian nchéña ijje ngajin kain chujni ixi ti nge e juinche e na, ja anta xrokonda tsitikaonnta ndo ko tájonnta juasianta ngajin ndo kain nchakon tsinteenta nti i nunte xasintajni.

¹⁸ Ndo Dio bingijnanta ndo ixi ítsinte anta xranchi bake e sen tsikachrjenixinnta ó sa ó. Ja anta no anta jian nge e kuenaxinnta ndo, je a ixi naa nge e tsjexin xranchi chika oro o chika plata.

¹⁹ Kuenaxinnta ndo ixi jnié ndo Jesucristo, ijni tsango tjintee ko me e kuayé e ndo Dio, xranchi xrokjui naa kutuchjon xro an nge e xe e ba ko je a ni e ba.

²⁰ Ndo Dio ó sa ó kuinche e ndo ndo Cristo ti xrako a nunte xasintajni. Ko jai konoxin ndo ixi sen chuntia ndo jian tsintee sen.

²¹ Ixi kuen en ndo Cristo me e kuitikaonnta ndo Dio, ndo juinchexechón ndo Cristo nchakon kuen en ndo, ko je e ndo Dio kuajon ndo ijie juachaxin ngajin ndo Cristo. Ko méxin ja anta chuntianta ndo Dio ko stechon ennta tsarichonnta kain nchakon.

²² Ko jai ó kuitikaonnta chijni nduaxin ko ixi kuitikaonnta me e kontjúá asáanta, méxin tjue enta sen kichuunta ixi espíritue ndo Dio tingijnanta. Ko xrokonda xrotjue e kichuunta ixi nchijí asáanta.

²³ Ja anta ó jongí anta íjngo. Je a xranchi tjongí e naa chjen en chujni ten en. Ja anta íjngo jongí anta ixi kuitikaonnta chijnie ndo Dio, ndo jichón, ko xro an ngisen sinchetjáña chijni me e.

²⁴ Ixi ndachro xroon chijnie ndo Dio:

Kain chujni nunte xasintajni xranchi kayua ste na,
ko juachaxin chóna na me e xranchi tsjo e ka,
ixi ika xema ka ko itsjo chjenjin tsjo,

²⁵ ko chijnie Ncháina nai a tsitjáña chijni.

Ko chijni me e tajon juachaxin tsechónni kain nchakon, chijni, me e ó kuaye é ja anta.

2

¹ Méxin, tintu enta kain nge e ña i kuanche enta, Ndachro anta juancheya, tjanoa inta sen kichuunta, tochjuya inta nge e chóna inaa chujni ko nichja inta kontree chujni.

² Nche enta xranchi chjan nchínchín nandá tsijongí e jitayé e xjan itsjin tsi i xjan, jaña ja anta tikakuenxinta tsin ennta chijnie ndo Dio ixi jaña tsjangixinnta sinche enta ti jian ixi jaña tsarichonnta kain nchakon,

³ ixi ja anta ó chuxinnta ixi Ncháina tsango jian ndo.

Ndo Cristo ixro jichón

⁴ Méxin, tonchjiñe enta ngajin Ncháina Jesús, ixi je e ndo me e xranchi naa ixro jichón. Xro me e kuitikaon a chujni ko je e ndo Dio tsikinche e ndo ixro me e ixi ícha tjintee ixro.

⁵ Ja anta xranchi ixro tsonde e ndo Dio jitonchjianxin ningue ndo, ko ja anta xrok-jannta xranchi ndotaana tjúa aséen ndo ko ixi juachaxien Ncháina Jesucristo tájonnta juasianta ngajin ndo Dio.

⁶ Méxin xroon chijnie ndo Dio ndachro:

Jan an tsake é ngajin tjajna Jerusalén xranchi naa ixro tsango jian tsitexin nchia, naa ixro tsango tjintee.

Ko ngisen tsitikaon ixro me e, nai a tsosue e sen.

⁷ Ja anta ti titikaonnta Ncháina Jesucristo, no anta ixi je e ndo xranchi naa ixro tsango tjintee. Ko chujni kuitikaon a, tson en na xranchi jitaxin xroon chijnie ndo Dio:

Xro kuitikaon a chujni nchekonchjian nchia,

ko jai xro me e tsango tjintee xro.

⁸ Ko kaxon jitaxin xroon chijnie ndo Dio:

Xro me e tontengixin chujni ko texin na nunte.

Ko kontengíxin nã xro me e ixi kuitikaon a nã chijnie ndo Dio ko jaña tikinixin tson en nã.

Sen tjajnée ndo Dio

⁹ *Ko ja anta, ndo Dio tsikincha anta ndo me e tsikjannta ndotaana sinche e ixra ngajin ndo Rey, ko ja anta naa tjajnée ndo, naa tjajna tjuá. Ko ndo Dio kuantsjexinnta ndo ti naxixe e ko kuajon ndo juachaxin tsixin innta ti chaxro tingasáña, ko jaña xrochronganta nge e jian juinche e ndo Dio.

¹⁰ Ja anta seno tikinixian inta tjajnée ndo Dio, ko jai ó tikinixin annta tjajnée ndo. Seno ndo Dio bikonóa inta ndo ko jai je e ndo tsango tikonóa anta ndo.

Ndako sinche ena ixi jaña tsjakoxinna xrée ndo Dio

¹¹ Kichuuna, jan an tsango tjua anta, ko tinóatáana ngajinnta xranchi naa ngisen kuixin ikjín. Chje anta asáanta juachaxin xroxraxaon ti ndako a ko tsikakuenxin nge e jii nunte xasintajni, ixi ti ndako a me e tsetoka o asáanta.

¹² Jian nche enta ngajin chujni chúxin a ndo Dio, maski jai ndako a nichja nã ixi ja anta xranchi xrokjuinta naa ni ña i. Jaña je e nã tsikon nã ixi jian nche enta ko jaña tsajon nã juasaya ngajin ndo Dio nchakon je e ndo sinchéña ndo ijië ngajin chujni.

¹³ Ja anta ti titikaonnta ndo Dio, titikaonnta kain ni tetuan an ngujngu tjajna, ko kaxon xi ícha tituan an tjajnãnta,

¹⁴ ko kaxon titikaonnta kain xi tituan an ngujngu tjajna ijié ixi ndo Dio kuinche e ndo xa ixi je e xa sinchéña nã ijië ngajin chujni nche e ti ndako a ko xronichja xa jian ngajin sen nche e ti jian.

¹⁵ Ndo Dio tjaun ndo sinche enta ti jian ixi jaña tsikon kain chujni noe a ko ni ninta ixi jaña tsjankata inta nã ijië.

¹⁶ Nche enta xranchi xrochondanta juachaxin xro an ngisen xrokuituan annta, ko ndachro anta ixi juachaxin me e chao sinche enta nge e ndako a. Cháña nche enta xranchi naa sen nchexrée ndo Dio.

¹⁷ Jian nichje enta kain chujni. Tjue enta sen kichuunta, ko titikaonnta ndo Dio ko titikaonnta ngajin xi tituan an tjajna.

Nge e xrokonda sinche e ni nchexra

¹⁸ Ja anta ni nchexra, titikaonnta ni xrée nche enta ko nichje enta nã jian, ko je a je o ni jian nichja anta. Na i, kaxon titikaonnta ni ña i.

¹⁹ Ndo Dio nchenchaon ndo ngisen titikaon ko tokuaxin en sen tatsinga sen xrojan juachjaon, maski tikinixien a sen tsatsinga sen juachjaon me e.

²⁰ Siá ja anta nche enta naa nge e ndako a ko kondeexin me e tikaonnta, ¿á tjintee ti tokuaxin annta tikaonnta siá tikinixin annta me e? Ko siá nche enta naa nge e jian ko kondeexin me e tikaonnta ko tokuaxin anta, me e naa nge e jian tikon ndo Dio.

²¹ Méxin kuiya anta ndo Dio ixi ndo Cristo tsango tangi kon en ndo ixi jaina, ko jaña juakoina ndo ixi jaña xrokonda sinche e jaina.

²² Je e ndo xro an ti ndako a juinche e ndo ko nai a juincheya ndo.

²³ Nchakon koyaku e nã ndo, je a naxraje o juatingíexin ndo; ko nchakon chinga juinchekaon nã ndo, je e ndo juanchia i ndo ijië tsama nã. Je e ndo bake e ndo गया itja ndo Dio nge e jinchekaon nã ndo ixi ndo Dio nduaxin nchéña ndo ijië.

²⁴ Ndo Cristo bikao ndo jéina nchakon kuen en ndo nganito ntacru ixi jaina íxro an ti ndako a xrojuintu una, ko jian sinche ena. Je e ndo tangi juinchekao nã ndo ixi jaña jaina xrokoxruaina.

²⁵ Ixi jaina kuanche ena xranchi kutuchjon tsingachrue. Ko jai ó kjanna titika onna ndo Cristo, ndo tayakon en aséeina xranchi naa ngisen tayakon en kutuchjon.

3

Xranchi sinche e sen tsikute e

¹ *Jaña kaxon ja anta nchri ó tsikuta anta, titikaonnta ndoxi anta. Ko siá xrojan je e xa xratitikaon a xa chijnie ndo Dio, tsikon xa ixi ja anta jian titikaonnta ko íxrokonda i xrondachenta xa ixi tsitikaon xa; je o je e xa tsaxi tsitikaon xa

² ixi tsikon xa nge e jian ko ndako nche e ja anta.

³ *Ti tonchjian ja anta je a je o ixi tsikonni ti chaxro take énta, xranchi ti tsi te jáanta ko tsikakeenta nge e tsikóñaxin chika oro ko manta chaxro ko tsango tjintee.

⁴ Ko ti jian xroxaxaonnta me e tsixin ngaya asáanta ko ti jian xronichjanta. Ji i nai a tsjexin ixi ndo Dio me e nche e ndo juaxruxin.

⁵ Jaña kuanche e kaxin nchri ó seno, kuachúntia nchra ngajin ndo Dio ko kuakitikaon nchra ndoxi e nchra.

⁶ Jaña jan Sara kuitikaon jan ndoxi e jan, ndo Abraham, ko kuandache jan ndo “Ncháina”. Ko siá ja anta jian sinche enta ko xro an nge e xroxakon ennta, xrokjannta xranchi je e jan.

⁷ *Kaxon ja anta sen xi, jian tariku unta janchri anta. Nichje enta jan jian ko xraxaonnta ixi ícha soji a jan xranchi ja anta. Ixi kaxon ndo Dio chjée ndo jan juachaxin tsechón jan kain nchakon xranchi juachaxin kuajon ndo ngajinnta ixi tjua anta ndo. Ko siá jaña sinche enta, ndo Dio tsin en ndo nge e tsjanche enta ndo.

Ti xrokonda sinche e sen titikaon ndo Cristo

⁸ Méxin, xraje o xroxaxaon kainnta. Tikonóe é kichuunta, tjue é kichuunta, tingijna ko tjento kichuunta ko nchejié a asáanta.

⁹ Ko siá xrojan nge e ndako a junta anta xrojan ngisen, ncheku inta nã naxraje o. Siá koyaku anta nã, ja anta tuyakuen anta nã. Cháña tjanche enta ndo Dio sinchenchaon* ndo nã ixi ja anta no anta ndo Dio kuiya anta ndo ixi tsaye enta naa nge e jian tsajon ndo.

¹⁰ Ixi jitaxin xroon chijnie ndo Dio:
Ngisen xrotjue e aséen ko tjaun xrochónnda juaxruxin kain nchakon xrokonda xronichja i sen ti ndako a,
ko xronichja i sen juancheya.

¹¹ Tsingaxiton sen ti nge e ndako a
ko sinche e sen nge e jian,
ko tsjée sen juaxruxin tsintee sen
ko kain nchakon jaña sinche e sen.

¹² Ixi Ncháina tingijna ndo sen jian nche e
ko tin en ndo nge e nichja sen ngajin ndo,
ko Ncháina tingijna i ndo ni ndako a nche e.

¹³ ¿Méxin, ngisen sinta anta naa nge e ndako a siá ja anta kain nchakon nche enta ti jian?

¹⁴ *Ko maski tangi tsatsinganta kondeexin ti jian nche enta, juaxruxin tinteenta ko xrakuen anta ninna ngisen ko ta inta juachjaon.

¹⁵ Cháña tájonnta juasaya† ngajin ndo Cristo ixi je e ndo Ncháina ndo. Jian tjate enta nge e tsjanchangi anta nã ixi titikaonnta Ncháina. Ko nchejié a asáanta ko jian nche enta ngajin na.

¹⁶ Ko jian tjakoxinnta ixi jaña ni ningakon annta ko ndako a nichja nã ixi ti jian nche enta ixi ja anta titikaonnta ndo Cristo, me e tsikon nã ko jaña tsosue e nã.

¹⁷ Ixi cháña tangi tsatsinganta kondeexin ti jian nche enta ko me e tjaun ndo Dio, ko je a kondeexin ti ndako a.

3:1 Ef. 5:22; Col. 3:18. **3:3** 1Ti. 2:9. **3:7** Ef. 5:25; Col. 3:19. * **3:9** *sinchenchaon* bendecir **3:14** Mt. 5:10.
† **3:15** *juasaya* respeto, honor

¹⁸ Ixi kaxon ndo Cristo je o naa kuen en ndo ixi jéina. Je e ndo jian ndo ko kuenxin ndo ixi jaina ni ña i, ixi jaña tsjentona ngajin ndo Dio. Ndo Cristo kuen en cuerpoe ndo ko Espíritue ndo Dio juinhexechón ndo.

¹⁹ Jaña kaxon espíritue ndo juincheno e kain espíritu tsiken en ixi je e ndo xechón ndo,

²⁰ espíritue ni me e kuitikaon a nchakon bake e ndo Noé. Ndo Dio chón en ndo ña ixi xrokuitikaon ña nchakon konchjian ntaa tetaon inda ko je o ijní chujni kuitikaon ko sen me e kuitjáña i sen nchakon chrite e ña inda.

²¹ Inda me e xrokjui xranchi ti tikitée chujni ixi jaña tsjacha tsitjáña i. Ko ti tikitéeni je a je o tsijma ntau eni. Na i. Me e xrondachro ixi tsjanche eni ndo Dio sinchetjúá ndo aséenni ko jaña tsono eni ixi xro an ijie chón dani. Ko ti xechón Ncháina Jesucristo me e tsjachani tsechónni kain nchakon.

²² Je e ndo Cristo sakjui ndo ngajní ko jii ndo ndatsjonxin ti jian ti jii ndo Dio ko je e ndo tetuen en ndo kain sen ángel ko kain ti chón da juachaxin.

4

Tsinteena xranchi tjaun ndo Dio

¹ Tsango tangi kuatsinga ndo Cristo nchakon bake e ndo nunte nti i, jaña ja anta kaxon xrokonda tsituaxinta tangi tsatsinganta nchakon tsij juachjaon ixi, siá tangi tsatsinganta, jaña tsaxi tsintu enta ti ndako a kuanche enta,

² ko me e sinche enta xranchi tjaun ndo Dio, ko í je a xranchi kuaxraxaonnta sa ó, xranchi nche e ni ndako a xraxaon.

³ Ixi ó itsjé nano jaña kuanche enta. Nchakon me e ndakua i kuaxraxaonnta ko kuanche enta ti ndako a ko kuancheñanta kia ti bakoannta ko kuaketoku u chujni ko kuatjue enta ídolo, ti tjaun a ndo Dio sinche enta.

⁴ Jai ni chúntia i ndo Dio toñaon ña ixi ja anta í chrjiku anta ña cha o ña i ichrji je e ña. Méxin, chinga nichja ña kontraanta.

⁵ Ko je e ña xrokonda xrochronga kain ti ndako a juinche e ña nchakon tsij ña ngajin ngisen jichón en sinchéña ijie ngajin kain chujni jichón ko ni tsiken en.

⁶ Méxin, ni tsiken en kaxon kuin en ña chijni natjúá ixi espíritue ña tsjacha tsechón xranchi tjaun ndo Dio, maski koñe e ña ijie nchakon kuintee ña nti i nunte xasintajni xranchi toñe e ijie kain chujni ndako a nche e.

⁷ Ó tuinxin tsjexin nunte xasintajni, méxin, jian tinteenta ko nduaxin nichje enta ndo Dio.

⁸ Ko ti ícha tjintee me e xrotjue é kichuunta. Ko siá tjue é kichuunta me e xrotjáña anta ti ndako a juincheko kichuunta.

⁹ Jian taye énta sen kichuunta nchakon tsij sen ndointa ko tjakaxin a kichuunta.

¹⁰ Ngujngunta jian tingijnanta sen kichuunta xranchi juachaxin tjáanta ndo Dio ko ndako sinche enta ixra kuajon ndo Dio.

¹¹ Siá xrojan ja anta xronichjanta chijnie ndo Dio, nichjanta xranchi tjaun ndo Dio. Ko siá xrojan ja anta tsingijnanta xrojan ngisen, jian tingijnanta sen me e xranchi juachaxin tjáanta ndo Dio. Ixi kain ixra jian nche enta, me e je e ndo tsayé e ndo kain juasaya ixi je e ndo tikinixin en ndo kain juachaxin, kain nchakon. Jaña tson en.

Xrokonda tangi tson en sen titikaon ndo Cristo

¹² Kichuuna, tsango tjua anta, ko xronka inta nge e tangi tsatsinganta ko ndachro anta sonda jaña jiton en.

¹³ Cháña take énta juaxruxin maski jaña tangi tsatsinganta ixi jaña tangi kuatsinga ndo Cristo. Méxin jaña juaxruxin tsinteenta nchakon tsikonnta ijie juachaxin chón da Ncháina nchakon xrokjan ndo.

¹⁴ Juaxruxin take énta nchakon nichjangí anta na ixi titikaonnta ndo Cristo ixi Espíritue ndo Dio chónnda kain juachaxin ko tayakon annta kain nchakon. Je e na nichjangí e na Ncháina, a ja anta tájonnta juasianta ngajin ndo.

¹⁵ Ko siá xrojan ja anta tangi tson annta, je a ixi naakóñaxónnta naa chujni o kue enta xrojan nge e o xrojan nge e ndako a juinche enta, ko je a ixi juitexinnta naa nge e tikinixian inta.

¹⁶ Ko siá xrojan ja anta tangi tson annta ixi titikaonnta ndo Cristo, tosua inta. Cháña tájonnta juasianta ngajin ndo Dio.

¹⁷ Ó kuij nchakon tsaxi tsoña ijiē ko xrokonda xroxrangíxixín ngajin sen ikjan chjen en ndo Dio. Ko siá xroxrangíxixín tsoña ijiē ngajin jaina, ¿á je a ícha tangi tson en chujni titikaon a chijnie ndo Dio?

¹⁸ Ko siá sen jian nche e, tsango tangi tsixixin sen ti tetuan an ndo Dio, ícha tangi tson en ni ndako a nche e ko kuitikaon a chijnie ndo Dio.

¹⁹ Ko ngisen tangi stet atsinga xranchi tjaun ndo Dio, sen me e tsintue a sen sinche e sen ti jian ko tsake e sen aséen sen ngaya tja ndo Dio, ndo juinchéña kain chujni, ixi je e ndo nduaxin nche e ndo nge e ndachro ndo.

5

Nge e kuetuen en sen tetuan an ni ngo

¹ Ntaxraxa on sen titaon en sen ste ni ngo, ixi jan an kaxon titaon an sen ningona xranchi je e sen, ko kaxon jan an nóna ko bikon xranchi tangi bake e ndo Cristo, ko jan an kaxon tsayá a juachaxien ndo Dio xranchi juachaxin tsayé e je e sen nchakon tsii Ncháina.

² *Tayakon ennta jian sen ikjan xranchi kutuchjoen ndo Dio, sen tikinixin anta tayakon ennta ixi ji i ixra kuaye enta. Juaxruxin tingijnanta sen xranchi tjaun ndo Dio, ko je a ixi xrokonda sinche enta xra me e ko je a ixi tsjachanta tomi. Na i. Juaxruxin nche enta xra me e.

³ Ko nche anta xranchi ja anta tikinixin annta sen titikaon Ncháina. Na i. Tjue enta sen jaña tsjakoxinnta ixi ndako rinche enta.

⁴ Ko nchakon tsii ndo Cristo, ndo nduaxin jian tingatjia kutuchjoen, ja anta tsaye enta naa corona chaxro, ko corona me e nai a tsjexin.

⁵ Kaxon jaña, ja anta chajan, titikaonnta sen tituan annta ngaxin in ni ngo. Kainnta jian titikaon kichuunta ko nchejié a asáanta ixi:

Ndo Dio tjaun a ndo sen nchejié aséen,
ko sen nchejié a aséen, sen me e ndo Dio tingijna ndo sen.

⁶ *Méxin, nchejié a asáanta ngajin ndo Dio ixi je e ndo tsango chónnda ndo juachaxin, ko jaña tsii nchakon je e ndo ijié juachaxin xrotjáanta ndo.

⁷ Ko kain juachjaon chondanta takéenta ngaya itja ndo Dio ixi je e ndo nduaxin tayakon annta ndo.

⁸ Jian xraxaonnta ko kain nchakon tsje enta jian ixi Xixron anxrée, xi ningakon annta, ichrji xa xranchi naa kujenda tsango jie e ko tsango soji tuyako ba ko jitjee ba nge e chujni sine ba jaña nche e xi me e.

⁹ Jian chuntianta Ncháina. Tintue anta Xixron anxrée tsjacha xa tsetuan annta xa, ko jian xraxaonnta ixi kaxon sen kichuunta, sen chuntia Ncháina, ste nguixin nunte xasintajni tangi stetatsinga sen.

¹⁰ Ko siá ja anta ó tangi kuatsinganta kaxin nchakon, ndo Dio sinchemé e ndo ijié chondanta ko ícha tsingijnanta ndo ixi nai a tsintu enta ti chuntianta ndo. Je e ndo kuiya anta ndo ixi tsariku unta ndo kain nchakon ti no tetuan an ndo Jesucristo.

¹¹ Je e ndo tikinixin en ndo tsayé e ndo kain juasaya ixi chónnda ndo juachaxin tsetuan an ndo kain nchakon. Jaña tson en.

Juexin nichja ndo Pedro

¹² *Juasie ndo Silvano, ndo tikon xranchi ndo kichian, je e ndo jian bingijnana ndo ikjin xroon ji i, maski tsjé a nge e ikjin, ko je o ntaxraxa onnta ixi ndo Dio, ndo tjáanta ndo kain juachaxin ko jaña juako ndo ixi nduaxin tjua anta ndo. Ko nai a tjáña anta ixi ndo Dio tsango tjua anta ndo.

¹³ *Sen ni ngo jii tjajna Babilonia, sen kuinche e ndo Dio kaxon xranchi ja anta, xruan annta sen juajna ko kaxon xruan annta ndo Marcos juajna, ndo tikon xranchi chjan na.

¹⁴ Jian chje é kichuunta juajna ko tse e kichuunta tjáanta. Juaxruxin tinteenta ixi chuntianta ndo Jesucristo. Jaña tson en.

Xroon yuxin tsikjin ndo Pedro

Ndo Pedro xruan an ndo xroon ngajin sen titikaon ndo Cristo

¹ Jan an, Simón Pedro, kuincha na ndo Dio ixi sinta a xrée ndo Jesucristo. Ikjin xroon ji i tsayé e kain sen titikaon Ncháina, sen titikaon xranchi jan anna ixi jian ndo Dio ko ndo Jesucristo, ndo nchemé e jéina.

² Ndo Dio xrotjáanta ndo juaxruxin ko sintanchaonnta ndo ícha ixi chuxinnta ngisen ndo Dio ko ngisen Ncháina Jesucristo.

Jian tsintee sen titikaon ndo Jesús

³ Ixi juachaxin chónnda Ndo Dio, kuinchajina ndo ko chjajina ndo kain nge e xrokondajina ixi jaña tsojuna xranchi tjaun je e ndo. Kain ña chjajina ndo nchakon kuichuxinna ndo Jesucristo ixi juachaxin ijié chónnda ndo.

⁴ Ko ó chjajina ndo kain nge e jian ko ti nduaxin tjintee ko kaxon ti ndachro ndo tsayé ena tjume e ixi jaña tsake enta xranchi jii je e ndo ko tsintu enta nge e ndako a jii ngataon nunte xasintajni.

⁵ Méxin ti chuntianta Ncháina ko chjakon annta nche enta ti jian, ko ti chjakon annta me e, ícha jian xrochuxinnta ndo Dio.

⁶ Ko ti jian xrochuxinnta ndo Dio, me e tsinkakon en sinche anta kain nge e ti tjaunnta; ko ti tsinkakon en me e sinche anta nge e tjaunnta, me e sintakuan anta xrochon énta ko tjaka i xrotjáanta juañao ko xrochonde enta juasaya ndo Dio;

⁷ me e sintakuan annta xrotjue enta sen kichuunta ko ti xrotjue enta sen kichuunta, kaxon ícha xrotjue enta kain chujni.

⁸ Ko siá jaña sinche enta, je a xruenxon chuntianta Ncháina Jesucristo.

⁹ Ko ngisen nche a kain ji i, nche e sen xranchi naa ni tikon a ixi tjáñe e sen ixi Ncháina Jesús juinchemé e ndo kain ijié kuachónnda sen.

¹⁰ Méxin, kichuuna, jian nche enta ko soji titikaonnta, jaña xrotjáña inta nge e kuitikaonnta ko nai a tsachrendaxinnta cha o jian.

¹¹ Ko siá jaña sinche enta, ndo Dio xrotjáanta ndo juachaxin tsixin innta ti no tituan an Ncháina Jesucristo, ndo kuenxin ixi jéina.

¹² Méxin, jan an tsintua i syntaxraxa onnta kain ji i, maski ó no anta ko jian titikaonnta nge e nduaxin juntakuan anntana.

¹³ Ixi ti xrarichón tikinixinna syntaxraxa onnta kain ji i,

¹⁴ ixi Ncháina Jesucristo ó juinchenóna ndo íse a jii nchakon tsen enna.

¹⁵ Ko jan an syntaxraxa onnta ji i ixi maski tsen enna, ja anta xrotjáña inta nge e ntatjunta.

Sen bikon juachaxien ndo Cristo

¹⁶ Nchakon juntakuan annta juachaxin ijié chónnda Ncháina Jesucristo ko ti ndachrjanna íjngo xrokjan ndo, je a je o kuanichjana nge e bakii ngaya jáanana. Na i. Jan anna bikonxina ixi ikonna juachaxin ijié chónnda Ncháina.

¹⁷ *Bikona ji i nchakon Ndotáina Dio kuajon juachaxin ko juasaya ngajin Chjen en ndo, ko kuin anna ngajní* nichjaxin ndo ko ndachro ndo: “Ji in chjan na ícha tjua a. Tsango juaxruxin ritjén ngajin xjan.”

¹⁸ Jan anna kuin anna jaña ndachro ndo Dio, kuin anna nichjaxin ndo ngajní nchakon steki anna Ncháina Jesús ti ijna tjúa.

¹⁹ Ko nónana ixi chijni juako sen kuachronga chijnie ndo Dio ó sa ó, me e naa chijni nduaxin. Méxin, titikaonnta nge e kuandachro sen ixi chijni me e jii xranchi naa xro i tingasáñaxin ti naxixe e, tsija nchakon ícha tsingasáña ko tsij chjiixro, jaña tsingasáña asáanta.

²⁰ Ko tjintee tsono anta ji i: chijnie ndo Dio jitaxin xroon, jua i je o naa chujni tsienxin xranchi tjaun,

²¹ ixi sen kuachronga chijnie ndo Dio nichja i sen nge e je o je e sen xraxaon sen. Je e sen tsango kuitikaon sen ndo Dio ko Espíritue ndo bingijna sen kuanichja sen chijnie ndo.

2

Ni ndakua i kuachronga chijnie ndo Dio (Jud. 4-13)

¹ Sa ó bake e ni ndako a kuachronga chijnie ndo Dio tjajna Israel, ko jai ste ni jaña nche e. Je e na imao sintakuan annta na nge e nduaxin a ko me e tsitjáñaxin asáanta ixi xrondachro na ixi Ncháina* jua i sinchemé e ndo ijie chondana. Ko kondeexin me e, je e na naatsitjáñaxónna.

² Kueya na xrorué e na ti tjako ni me e ko kondeexin me e itsjé na ndakua i xronichja na ti chijni jian kuajon Ncháina.

³ Ni tjako jaña tjaun na xrochóna na itsjé tomi, ko tsjacha na tomi me e ixi tsjako na naa chijni nduaxin a. Ko me e tsamaxin na ijie ko jaña tsitjáña na.

⁴ Ndo Dio tjáñe a ndo nge e ndako a juinche e sen ángel ko maski ángel sen xruan an ndo sen ti naxixe e, steje e sen nti a ko jichroaxin sen chika cadena tsitjaja nchakon sinchéña ndo ijie ngajin sen.

⁵ Ko kaxon tjáñe a ndo Dio ti ndako a juinche e ni kuintee sa ó nchakon bake e ndo Noé. Je e ndo xruan an ndo naa ichrin soji ko kain na kuinteken en na. Je e ndo Noé kuanichje e ndo chujni xranchi jian xrojuinche e na, ko je e ndo ko íjngo yaato chujni xro an nge e kon en sen.

⁶ Kaxon ndo Dio juinchetjáña ndo ni tjajna Sodoma ko Gomorra, iche na ko kao kain nge e ikjan nteso, ixi jaña tsikon chujni ndakua i nche e jai siá tsintue a na ti ndako a nche e na.

⁷ Ko ndo Dio bingijna ndo ndo Lot ixi je e ndo naa ngisen jian ko tsango bakaa ndo juachjaon kondeexin ni tjajna me e ndako a kuanche e na.

⁸ Ndo Lot jian aséen ndo maski kao ndo bake e ndo tjajna me e, ko kain nchakon bakaa ndo juachjaon kondeexin ti ña i bakikon ndo ko baki en ndo ti kuanche e na.

⁹ Ndo Dio jaña tjakoina ndo tsingijna ndo sen titikaon ndo ixi nchijí aséen sen, maski kueya nge e tangi tsatsinga sen. Ko ni ña i, tangi tsintekon en na nchakon sinchéña ndo Dio ijie ngajin na.

¹⁰ Ko ícha tangi tson en ni titikaon a nge e tituan an Ncháina Jesús ko nche e na nge e ndako a xraxaon aséen na.

Titikaon a na ko xrakon a na, nichjangí e na sen ángel chóna juachaxin.

¹¹ Nchakon sinchéña ndo Dio ijie, sen ángel, maski chóna sen ícha juachaxin ixi ni ndako a tjako, tsondachro a sen xrojan nge e ndako a ngajin ni me e.

¹² Ni me e xranchi iko tienxin a ba, jaña ste je e na ko xranchi iko jaña tsen en na kaxon, ixi nichja na ti tienxin a na.

¹³ Juaxruxin tintee na ixi ti ndakua i nche e na ngujngu nchakon ko méxin tsikaon na kondeexin ti ndako a nche e na. Ko tosue eni nge e ndako a nche e na nchakon nteku unta na kia chondanta ixi nti a nche e ndako a nche e na ko stetsje e itsjé chujni.

* **2:1 Ncháina** Señor Ncháina Jesús o Ncháina Dio

¹⁴ Ni me e tikakuenxin na kain nchri ko tonchrje a na nche e na ti ndakua i. Ncheye e na ni nandá tjangíxin titikaon ndo Dio ko tjaun na xrochóna na kain nge e ndachro aséen na.

¹⁵ Kuintu e na cha o jian ko rué e na chaoé xi Balaam, chjen en xi Beor. Je e xa bake e xa juaxruxin ixi juacha xa kueya tomi kondeexin ti ña i kuanche e xa.

¹⁶ Ko kondeexin ti ndakua i juinche e xa, méxin, naa kuntajno, kunchri, nichje e ba xa xranchi nichja chujni, ko kuyakutee ba xa; méxin, jaña kuintu e xa nge e ña i kuanche e xa.

¹⁷ Ni ndako a tjako, ni me e ste na xranchi naa tuye yaso e jitjiá i inda, ko xranchi itjui tikao chrinto soji. Ndo Dio tsajon ndo juachaxin tsikaon na ko tsintee na ti naxixe e kain nchakon.

¹⁸ Ko je e na nichja na chijni chaxro ngajin kain chujni ko me e tjinte a. Je e na tjaun na xrochóna na itsjé nchri ko jaña nchekateyana sinche e chujni ti ndakua i, chujni nandá tjaun tsintu e nge e ndako a.

¹⁹ Ndachro na chao sinche eni nge e tjaunni, ko je e na jua i tintu e na ti ndako a nche e na; ixi ni nche e naa nge e ndako a, ti ndako a me e tituan an aséen na.

²⁰ Ko ni ó chúxin Ncháina Jesucristo, ndo nchemé e jíee na kuintu e na nge e ndako a jii ngata a nunte xasintajni. Ko siá tjume e tsajon na juachaxin ngajin xi ña i sincheye e xa na íjngo, jaña ti ndako a ícha tsituan an ngajin aséen na.

²¹ Cháña xrokuichuxin a na chijni jian juako ndo Dio, ke jai chúxin na chijni ko tsintu e na nge e kuetuan an ndo Dio.

²² Ni ña nduaxin nche e na xranchi ndachro naa chijni seno: “Kunia tonkjan ba ko tjume e ikjan ba ine ba ti konkjan ba”, ko kaxon jii naa chijni ndachro “Kuchinga nandá tsikjengi ba, ikjan ba ngangí nchita o.”

3

Nchakon tsij Ncháina Jesús

¹ Kichuuna tjua anta, ji i xroon yuxin ikjin. Ko kayuxin xroon ntatjunta ixi xrox-raxaonnta jian ko ti ndako sinche enta.

² Xraxaonnta nge e tsichronga sen kuachronga chijnie ndo Dio ó sa ó, ko chijni kuetuan an Ncháina Jesús, ndo juinchemé e jíeina, chijni me e juntakuan annta sen apóstol.

³ *Xrokonda xrokono anta ji i: ixi nchakon tsjexin xasintajni tsij chujni tsjanao na ti jian kuajon ndo Dio, ko je o tsitikaon na kain ti nge e ña i xraxaon na.

⁴ Je e na tsjanchangi na: “Nge e kon en ti tsindachro ndo Cristo ixi xrokjan ndo, ixi ó kuen en sen tachrí ina, sen bake e ó sa ó, ixi naxraje o jii kain nge e xranchi xrangíxin nunte xasintajni.”

⁵ Ko ni me e tjaun a na tsitikaon na ixi ti xrangíxixión ndo Dio juinchéña ndo ngajni ko nunte xasintajni, ko je e ndo je o kuituan an ndo ko inche kuachrjengíxin nche inda.

⁶ Ko kaxon inda juinchetjáñaxin ndo kain nge e bake e nunte xasintajni* nchakon me e.

⁷ Ko ndo Dio ndachro ndo ixi tsiji nchakon ngajni ko nunte xasintajni jii jai, tsitjáña ixi xro i, kain nge e xroche nchakon ndo Dio sinchéña ndo ijié ngajin kain chujni ko sinchetjáña ndo ni ndakua i nche e.

⁸ Méxin, kichuuna, tjáña inta ixi Ncháina Jesús tikon ndo naa nchakon xranchi mil nano ko mil nano tikon ndo xranchi xrokjui naa nchakon.

⁹ Je a ixi Ncháina jitonchrjen en ndo sinche e ndo nge e tsindachro ndo, xranchi jaña xraxaon kaxin na. Na i. Je e Ncháina jichón en ndo ixi xro an chujni tsitjáña, ixi tjaun ndo kain chujni xrochuntia na ngajin ndo.

¹⁰ *Ko nchakon xrokjan Ncháina Jesús, nchakon ninaa jaina xraxaonna tson en ji i, xranchi nche e naa xiche e tixin in xa naa nchia tsee xa. Nchakon me e, naa tsjatexon tsin enni ko ngajni tsatanka ko xroxronkana, ko kain nge e jii ngajni xroche ko kain nge e jii nunte xasintajni ko xasintajni naatsitjãñaxón.

¹¹ Jaña tsitjãña kain nge e, méxin, ja anta jian xraxaonnta ko titikaonnta ndo Dio.

¹² Ko chon énta nchakon tsii ndo Dio ko sinchéña ndo ijie, méxin chjakon annta nchetjúanta asáanta. Nchakon me e tsitjãña ngajni ko nchanotsé ko kain nge e jii noi ixi xro i tsatangaxin.

¹³ *Ko jaina stechon enna naa ngajni natjúá ko naa nunte natjúá, xranchi tsindachro ndo Dio tsajon ndo. Nti a tsango chaxro ko jian tsake e.

¹⁴ Méxin, kichuuna, ti xrastechon ennta tsii nchakon tson en kain me e, ixi nchiji asáanta tjéenta ixi jian nge e sinche enta, jaña tsikon ndo Dio juaxruxin stenta ko chonda inta ijie.

¹⁵ Sintaxiñaonta ixi Ncháina jichón en ndo ixi jaina tsitjãña ina. Ndo kichuuna Pablo kaxon ikjin ndo ji i ixi juachaxien ndo Dio kuayé e ndo.

¹⁶ Kain xroon tsikjin ndo ndachro ja in, maski jii naa chijni tienxin ani. Ko me e, ni noe a ko tienxin a na ko soji a chuntia na Ncháina méxin ndakua i tjako na, ko jaña kaxon ikaxin chijnie ndo Dio tienxin a na, méxin je o na tjée na nge e tsitjãñaxin aséen na.

¹⁷ Méxin, kichuuna, ó no anta kain ji i ko tsje enta jian xranchi nche enta ko jaña xro an chujni ña i sintaya anta, ko tintue anta tsitikaonnta ndo Dio.

¹⁸ Ko cháña nche enta jian, jaña ícha xrochuxinnta Ncháina Jesucristo, ndo nchemé e ijie chondana, ko je e ndo tsingijnanta ndo xrotjue enta kain chujni. Tajonna juasaya ngajin Ncháina jai ko kain nchakon. Jaña tson en.

Xroon sa ó tsikjin ndo Juan

Ndo tajon juachaxin ixi nduaxin tsechón chujni kain nchakon

¹ *Jan anna stekjinna xroon ji i nichja ti ndo bake e ó sa ó ti xraxro an nge e bake e ngata a nunte xasintajni. Je e ndo ikjan ndo chijni tajon juachaxin tsechón chujni kain nchakon, ko jan anna kuin anna nichja ndo ko bikonxina ndo ikonna. Ko nduaxin bikona ndo ko tséxinna ndo tjánaana.

² *Ko ixi je e ndo stechónxin chujni, konoxin ndo nunte nti i. Jan anna bikona ndo, méxin, jaña nichjana. Ko nteno ananta chijni ji i ixi je e ndo tsechónxin chujni kain nchakon. Je e ndo bake e ndo ngajin Ndotáina Dio, ko jai konoxin ndo ngajinna.

³ Ntatjunanta ti bikona ko ti kuin anna, ixi jan anna ko ja anta naakua nge e xrox-raxaonna xranchi jan anna nduaxin steniina ngajin Ndotáina Dio ko ngajin Chjen en ndo, xjan Jesucristo.

⁴ Méxin, jaña ikjinna ji i, ixi kainna ícha juaxruxin tsojuna.

Ndo Dio xro i tingasáña

⁵ Ji i chijnie Ncháina Jesucristo juako nana ndo, me e chijni tjako annanta ixi je e ndo Dio xro i tingasáña, ko ti no jii je e ndo je a naxixe e.

⁶ Siá ndachrona ixi steniina ngajin je e ndo, ko xrandako a nche ena, ncheyana, ko je a nduaxin nge e ndachrona.

⁷ Ko siá stena ti tingasáña xranchi ndo Dio jii ndo ti tingasáña, me e naakua nge e xrox-raxaonna, ko jnie Chjen en ndo, xjan Jesucristo, sinéma kain ijie chondana ko ti ndako a jointu una.

⁸ Ko siá ndachrona ixi xro an ijie chondana, jaiona ncheye ena aséina, ko je a nduaxin ti ndachrona.

⁹ Siá xrondachena ndo Dio kain ti ndako a jointu una, noina ixi je e ndo tsango jian ndo ko ndako nchéña ndo ijie, méxin sinchemé e ndo kain jéina ko sinchetjúá ndo aséina.

¹⁰ Ko siá xrondachrona xro an nge e ti ndako a jointu una, jaína tjakoxinna xranchi je e ndo xrojuincheya ndo, ko me e xrondachro ixi nduaxin a kuaye ena chijnie ndo.

2

Ndo Jesucristo nichjaxinna ndo

¹ Ja anta chjan na, rikji anta chijni ji i ixi sinche anta ti ndako a. Ko siá xrojan ja anta sinche enta ti ndako a, jaína chondana ngisen xronichjaxinna ngajin Ndotáina Dio jii ngajni, ndo me e ndo Jesucristo, ndo jian ko ndako nchéña ndo ijie.

² Ndo Jesucristo kuen en ndo ixi sinchemé e ndo kain ti ndako a jointu una ko je a je o jéina sinchemé e ndo, kaxon jíee kain chujni jii ngata a nunte xasintajni.

³ Siá tsitikaonna ti kuetuan an ndo Dio, me e chao xrondachrona ixi chuxinna ndo.

⁴ Ko siá xrojan ngisen xrondachro ixi chúxin sen Ndotáina Dio, ko titikaon a sen nge e kuetuan an ndo, sen me e ncheya sen ko ko a ti nduaxin ngaya aséen sen.

⁵ Ko ngisen titikaon chijni kuetuan an ndo, sen me e nduaxin tjaun sen ndo ko chúxin sen ndo. Jaña tsonojna ixi nduaxin steniina ngajin ndo.

⁶ Ko sen ndachro ixi nduaxin titikaon sen ndo Dio, xrokonda sinche e sen xranchi juinche e ndo Jesucristo nchakon bake e ndo ngata a nunte xasintajni.

Chijni natjúá kuetuan an ndo Dio

⁷ *Ja anta kichuuna, je a naa chijni natjúá rikjin. Chijni ji i ja anta ó kuaye enta ti xrangíxixión kuin ennta. Chijni ji i ó sée tsiketuan an ndo Dio, chijni ji i ó tsikin ennta.

⁸ Ko chijni ikjinna me e xranchi xrokjui naa chijni natjúá. Ko nduaxin ndo Jesucristo juakoxin ndo ji i xixi tjaunna ndo, ko jaña tjakoxinnta kaxon xixi ó jitatsinga ti naxixe e ko jai jitingasáña xro i nduaxin.

⁹ Ko siá xrojan sen titikaon sen ndo Jesús ndachro sen xixi ste sen ti jii xro i, ko xraningakon en sen sen kichuu sen, sen me e xraste sen ti naxixe e.

¹⁰ Ko sen tjaun sen kichuu, sen me e ste sen ti jii xro i tingasáña, ko xro an nge e tontengixin sen.

¹¹ Ko sen ningakon en sen kichuu sen, sen me e ste sen ko ichrji sen ti naxixe e, ko noe a sen no itji sen xixi ti naxixe e juinchentakontsin sen.

¹² Ja anta chjan na, jan an ikjin xroon ji i, xixi juasie ndo Jesucristo ndo Dio juinchemé e ndo kain ijie kuachondanta.

¹³ Kain ja anta ndotée chjan, kjin annta xroon xixi ó kuichuxinnta ngisen bake e ti xrangíxixión nunte xasintajni. Ko ja anta xrachájannta kjin annta xroon ji i xixi ja anta juache enta Xixron anxrée. Ja anta chjan na, kjin annta xroon xixi ja anta chuxinnta Ndotáina Dio.

¹⁴ Kjin annta xroon, ja anta ndotée chjan, xixi ja anta ó chuxinnta ngisen bake e ti xrangíxixión nunte xasintajni. Chajan, kjin annta xroon xixi sojinta ko kuaye enta chijnie ndo Dio ngaya asáanta ko juache enta Xixron anxrée.

¹⁵ Tjaun anta kain nge e tikonnta jii ngata a nunte xasintajni. Ko siá xrojan ja anta ícha tjue enta ko tikakuenxinta nge e jii ngata a nunte xasintajni, me e xrondachro tjue anta Ndotáina Dio.

¹⁶ Xixi kain nge e ndako a ton en ngata a nunte xasintajni tixin a ti jii Ndotáina Dio jii ngajní. Ji i kain ti ndako a nche e chujni: ti ngixeko nche e nã ti tjaun cuerpo e nã, ko tjaun nã kain nge e ti chaxro tikon nã, ko ti nchejié aséen nã xixi tjaun nã kain nge e ti tjintee.

¹⁷ Ko nunte xasintajni ó jitjexin nunte ko kaxon kain ti ndako a nche e chujni. Ko ngisen titikaon nge e tjaun ndo Dio, tsechón sen kain nchakon.

Ti nduaxin ko ti nduaxin a

¹⁸ Chjan na ó kuji nchakon tsjexin kain nge e. Ja anta ó kuin ennta xixi ó tsji naa xi ña i, xi xrondachro xixi je e xa ndo Cristo xa. Ko jai ó kueya nã ndachro nã xixi je e nã ndo Cristo, méxin, nónaxinna xixi ó kuji nchakon tsjexin kain nge e.

¹⁹ Je e nã kuachrxexin nã ti ste jaina; ko je a nduaxin tsikitikaon nã Ncháina Jesucristo, xixi siá nduaxin xrokuitikaon nã Ncháina, me e xrokuitu e nã nti i ngajin jaina. Ko jaña kon en, xixi tsikonxin ikonni ngisen je a titikaon xranchi jaina.

²⁰ Ko jai ja anta ndo Cristo ó tjáanta ndo Espíritu tjúá, me e chuxinnta ti nduaxin.

²¹ Kjin annta ji i xixi chuxinnta ti nduaxin, ko je a chuxin anta. Ko ó no anta kaxon xixi xro an ti juancheya ti xin ti nduaxin.

²² ¿Ngisen ncheya? Me e sen ndachro xixi ndo Jesús je a ndo Cristo tsixrua an ndo Dio. Me e xi ña i ningakon en xa ndo Cristo xixi titikaon a xa Ndotáina Dio ko Chjen en ndo.

²³ Sen titikaon a Chjen en ndo Dio kaxon chúxin a sen Ndotáina Dio, ko ngisen chronga xixi nduaxin ndo Cristo Chjen en ndo Dio, sen me e nduaxin chúxin sen Ndotáina Dio.

²⁴ Méxin, ja anta xrokonda tsjatsiinnta ngaya asáanta chijni kuaye enta ti xrangíxixión kuitikaonnta. Ko siá ti kuin ennta, juatsíinta ngaya asáanta, me e steniinta ngajin Chjen en ndo Dio ko ngajin je e ndo.

²⁵ Ko ndachro Ncháina Jesucristo xrochjaina ndo juachaxin tsechónna kain nchakon.

²⁶ Méxin, kjin annta xroon ji i xixi ste chujni tjaun sintaya anta.

²⁷ Ko ja anta chondanta Espíritu tjúá, tsitjáanta ndo Jesucristo, ko jai ja anta ó tikinixi ennta ndo, ko í xrokonda i xirojan ngisen sintakuan annta, xiri Espíritue ndo Dio sintakuan annta kain nge e, ko kain ti tjako ndo me e ti nduaxin ko xro an juancheya jii. Méxin, soji take énta ngajin Ndo Cristo xranchi juintakuan annta Espíritue ndo.

²⁸ Jai chjan na, soji tinteenta ngajin Ncháina Cristo xiri jaña xroxrakon anta nchakon tsonoxin ndo. Ko je a tsosua ina nchakon tsinteena tjenka ndo, nchakon xrokjan ndo íjngo.

²⁹ Ko ja anta ó no anta xiri ndo Cristo je e ndo ndako nchéña ndo ijie. Ko xrokonda tsono anta xiri kain ngisen titikaon ko ndako nche e sen, sen me e chjen en ndo Dio.

3

Sen chjen en ndo Dio

¹*Tsje enta xiri ndotáina Dio tsango tjuaina ndo, méxin nchekin inna ndo chjen en ndo, ko nduaxin jaina chjen en ndo. Ko kaxin chujni tjaun anana xiri je e na chúxin a na ndo Dio.

² Kichuuna, tsango tjua anta, xiri jaina ó ikjanna chjen en ndo Dio, ko xratjako a ndo Dio xranchi tsojuna nchakon tsjexixin kain nge e. Ko ó nojna xiri nchakon tsii Ncháina Jesucristo jaina xrokjanna xranchi je e ndo, xiri nchakon me e tsikonna Ndo xranchi jii je e ndo.

³ Ko kain sen nduaxin jichón en nchakon tsii ndo, xrokonda tsintu e sen kain ti ndako a ko jaña tsontjúá aséen sen xranchi je e ndo Jesucristo tsango tjúá ndo.

⁴ Kain sen ndako a nche e tama sen ijie ko kondeexin ti ndako a nche e sen, me e titikaon a sen ti tetuan an ndo Dio.

⁵*Ja anta ó no anta xiri ndo Cristo ó kuji ndo ngata a nunte xasintajni ko me e kuantsje ndo ijie kuachónnda chujni, ko je e ndo xro an ijie sínká ndo.

⁶ Ko kain sen soji stenii ngajin ndo, ínche a sen ti ndako a; ko ni ndako a nche e xratikon a na ndo ko chúxin a na ndo.

⁷ Chjan na, tájon anta juachaxin xiri xrojan chujni sintaya anta; xiri ngisen jian nche e, sen me e nduaxin jian sen, xranchi je e ndo Jesucristo nduaxin jian ndo.

⁸ Ko kain ni ndako a nche e, ni me e tikinixin en na Xixron anxrée; xiri Xixron anxrée chónnda xa ijie ti xraxrangíxixión kónna nunte xasintajni. Méxin, kuji Chjen en ndo Dio ngata a nunte xasintajni xiri sinchetjáña xjan kain ixra ndako a nche e Xixron anxrée.

⁹ Ninaa sen ikjan chjen en ndo Dio ínche a sen ti ndako a, xiri Ndo Dio ó kuajon Ndo juachaxin tsechón sen, méxin ínche a sen ti ndako a xiri je e sen ó ikjan sen chjen en ndo Dio.

¹⁰ Jaña tsonoñaxinna ngisen chjen en ndo Dio ko ngisen chjen en Xixron anxrée, xiri ni ndako a nche e ko tjaun a na ni kichuu na, ni me e je a chjen en ndo Dio na.

Xrotjue é kichuuna

¹¹ *Ji i chijni kuin ennta ti xrangíxixión kuitikaonnta Ndo Dio, xiri xrotjue ena sen kichuuna.

¹² Ko sinche ana xranchi juinche e xi Caín, xi me e ndako chjen en Xixron anxrée jii xa, xiri kónna xa xi kichuu xa, ndo Abel. ¿Ko sonda kónna xa ndo kichuu xa? Xiri xi Caín kain ti kuanche e xa ndako a jii, ko kain ti kuanche e ndo Abel, me e chao jii.

¹³ Kichuuna, xronka inta xiri ni ste ngata a nunte xasintajni, ni chúxin a ndo Dio ningakon annta na,

¹⁴ *xiri jaina ó kuatsingana ti tsen en aséeina, ko jai jichón aséeina. Jaña nónoxinna xiri nduaxin tjue ena sen kichuuna ko sen tjue a sen kichuu, sen me e xratsiken en aséen sen.

¹⁵ Kain sen ningakon en sen kichuu, sen me e ikjan sen xranchi naa xi naatóñaxón chujni, ko ja anta ó no anta ixi ninaa ni nche e jaña chóna i na juachaxin tsechón na kain nchakon.

¹⁶ Ó noina nge e xrondachro ti xrotjue e kichuuni, ixi Ncháina Jesucristo kuen en ndo ixi jaina; ko jaña kaxon xrokonda sintu u jaina, tsen enna ixi sen kichuuna.

¹⁷ Naa sen chóna kueya nge e ko tikon sen ixi naa sen kichuu sen xro an nge e chóna sen, ko xro an nge e tingijnaxin kichuu sen, ¿xranchi xrondachro sen ixi tjue e sen ndo Dio ngaya aséen sen ko tingijna i sen, sen kichuu sen?

¹⁸ Chjan na, ti ndachrona ixi tjue ena sen kichuuna, xrokonda ixi nduaxin jaña sintu una, je a je o xronichjana.

Chao tsonchjiñe ena ngajin ndo Dio

¹⁹ Jaña nduaxin noina ixi titika onna ndo Dio, ko no e aséeina ixi nduaxin steniina ngajin ndo.

²⁰ Ko siá aséeina tjangíina ixi xrojan nge e ndako a juntú una, Ndo Dio ícha no e nge e xraxaon aséeina ko nge e juntú una.

²¹ Kichuuna, siá tjangia ina aséeina, me e chao tsonchjiñe ena ngajin ndo Dio,

²² ko je e ndo tsajon ndo kain nge e tsjanche ena ndo, ixi titika onna ti kuetuajina ndo ko nche ena ti tjaun ndo.

²³ *Ko ndo Dio tsiketuan an ndo ixi tsitikaonna Chjen en ndo, xjan Jesucristo, ko xrotjue e kichuuna xranchi je e ndo kuetuan an ndo.

²⁴ Kain sen titikaon nge e kuetuan an ndo Dio, sen me e steni sen ngajin ndo, ko je e ndo jii ndo ti no ste je e sen. Jaña noina ixi je e ndo jii ndo ti no ste jaina ixi chjaina ndo Espiritue ndo.

4

Espiritue ndo Dio ko espíritue xi ningakon en ndo Cristo

¹ Ja anta kichuuna, titikaon anta kaxin ni ndachro ixi je e na nichjaxin na Espiritue ndo Dio. Ja anta tsje enta á nduaxin nichjaxin na Espiritue ndo Dio o na i. Ixi nti i ngata a nunte jii kueya ni ncheya ixi ndachro na je e na nichjaxin na espíritue ndo Dio ko nduaxin a me e.

² Ko ja anta ja in tsichuxixinnta ngisen chóna Espiritue ndo Dio; kain sen ndachro ixi ndo Jesucristo kuji ndo ngata a nunte xasintajni xranchi naa chujni, sen me e nduaxin chóna sen Espiritue ndo Dio.

³ Ko ni ndachro ixi ndo Jesús kui a ndo xranchi naa chujni, ni me e chóna i na Espiritue ndo Dio. Ko je e na chóna na espíritue xi ningakon en ndo Cristo. Ja anta ó kuin ennta ixi espíritu me e xrokuji ngata a nunte, ko jai ó kuji espíritu me e.

⁴ Chjan na, ja anta ó chjen en ndo Dio ntaa, ko ó juache enta ni ncheya ixi Espiritue ndo Dio jii ngajinnta ícha soji ixi espíritue Xixron anxrée jii ngata a nunte xasintajni soji a.

⁵ Ko ni me e titikaon a na ndo Dio, méxin nichja na ti ndako a. Ko chujnie na naxraje o nichja na méxin tienxin kichuu na.

⁶ Ko jaina tikinixin enna ndo Dio. Ko sen chuxin ndo Dio tin en sen nge e ndachena sen. Ko ni titikaon a ndo Dio, ni me e tjaun a na tsin en na chijnie ndo. Jaña tsichúxinna ngisen chóna Espiritue ndo Dio ko ni chóna espíritue juancheya.

Ndo Dio tjue e ndo chujni

⁷ Kichuuna, tsango tjua anta, xrokonda xrotjue e kichuuna, ixi ti tjue e kichuuni, ti me e ti xin ngajin ndo Dio. Ko ngisen tjue e kichuu, sen me e chjen en ndo Dio, ko nduaxin je e sen chuxin sen ndo Dio.

⁸ Ko ngisen tjue a ni kichuu, ni me e chúxin a na ndo Dio ixi je e ndo tsango tjue e ndo kain chujni.

⁹ Ndo Dio ja in juakoxin ndo ixi tjuajina ndo, méxin xruan an ndo Chjen en ndo, xjan naakuaxon, kuji xjan nti i nunte xasintajni ixi je e xjan tsajon xjan juachaxin tsechónna kain nchakon.

¹⁰ Ko ti tjuajina ndo Dio xrondachro ixi je a jaina tjue ena ndo Dio; je e ndo ícha sa ó tjuajina ndo, méxin xruan an ndo Chjen en ndo kuenxin xjan ixi jaina ko jaña kuantsje xjan ijie chondana.

¹¹ Ja anta kichuuna, siá ndo Dio ó tjuajina ndo, jaña kaxon xrokonda xrotjue ena sen kichuuna.

¹² *Xro an chujni bikon ndo Dio. Méxin, siá xrotjue ena ni kichuuna, me e ndo Dio jii ndo ngaya aséeina, ko me e nduaxin ícha xrotjue eni ni kichuuni ngujngu nchakon.

¹³ Ndo Dio kuajon ndo Espíritue ndo chondana, méxin, nónaxinna ixi soji steniina ngajin ndo Dio ko je e ndo jii ndo ngajin jaina.

¹⁴ Méxin, jaina bikona ko ndachrona ixi Ndotáina Dio xruan an ndo Chjen en ndo ixi sinchemé e xjan ijie sínká kain chujni jii ngata a nunte xasintajni.

¹⁵ Ngisen titikaon ixi ndo Jesús Chjen en ndo Dio, sen me e jii sen ngajin ndo Dio ko je e ndo jii ndo ngajin sen.

¹⁶ Ko jaña noina ko titika onna ixi ndo Dio tjuajina ndo. Ko je e ndo tsango tjue e ndo chujni, ko ngisen tjue e ndo Dio ko tjue e sen kichuu sen, sen me e steni sen ngajin ndo Dio ko ndo Dio jii ndo ngajin je e sen.

¹⁷ Jaña nduaxin jaina ícha jian tjue ena ndo Dio, ko nchakon sinchéña ndo Dio ijie xroxronka ina, ixi jaina ti stena ngata a nunte nti i tjue e kichuuna xranchi je e ndo Jesucristo tjue e ndo kain chujni.

¹⁸ Ngisen tachrxexin ñao tjue e ndo Dio, sen me e xrakon a sen ixi jian tjue e sen ndo Dio, me e satji kain juaxrakon ixi ti nchexronkani me e jitika o ijie, ixi sen xrakon xrachuxin a sen ti jian tjue eni ndo Dio.

¹⁹ Jaina tjue ena ndo Dio ixi je e ndo ícha sa ó tjaunna ndo.

²⁰ Siá xrojan ngisen ndachro: “Jan an tjua a* ndo Dio”, ko ningakon en sen sen kichuu sen, sen me e ncheya sen. Ixi siá chujni tikon sen ko jua i tjue e sen, xranchi xrotjue e sen Ndotáina Dio, ndo jua i tikon sen.

²¹ Ndo Jesús kuetuajina ndo ixi ngisen tjue e ndo Dio kaxon xrokonda xrotjue e sen, sen kichuu sen.

5

Ti chúntiani ndo Dio me e tjache e kain nge e

¹ Ngisen titikaon ixi ndo Jesucristo chjen en ndo Dio; sen me e chjen en ndo kaxon, ko ngisen tjue e ndotée xjan kaxon xrokonda xrotjue e sen chjen en ndo.

² Siá tjue ena ndo Dio ko titika onna ti tetuan an ndo, me e noina ixi kaxon xrotjue ena kain sen tsikjan chjen en ndo Dio.

³ *Ngisen tjue e ndo Dio xrokonda tsitikaon sen nge e tituan an ndo, ko kain chijni kuetuan an ndo je a tsango tangi tsitikaonni.

⁴ Ixi kain ngisen ikjan chjen en ndo Dio tjache e sen kain xrée xiña i. Ko ti chúntiani ndo Dio, me e juinchesoji aséeina ixi tsjache ena xiña i jii ngata a nunte xasintajni.

⁵ Ngisen titikaon ixi ndo Jesús me e chjen en ndo Dio, sen me e tsjache e sen xrée xiña i jii ngata a nunte.

Ti chronga nge e juinche e Chjen en ndo Dio

⁶ Nchakon kuji ndo Jesucristo bikitée ndo ixi inda ko nchakon kuen en ndo kuintji jnie ndo. Ko je a je o inda. Kaxon inda ko ijni. Ko Espiritue ndo Dio ndachro ixi nduaxin ji i. Ko Espiritue ndo ncheya i.

⁷ Ko jii ní nge e chronga ixi nduaxin: je e Ndotáina, ko Chjen en ndo, ko Espiritue ndo. Ji i ti ní sen chronga, ko ti ní sen me e naakuaxon je e sen.

⁸ Ko nti i ngata a nunte xasintajni jii ní nge e chronga, je e Espiritue ndo, ko inda ko ijni; ji i ti ní nge e chronga ko kaní ji i xraje o nichja.

⁹ Siá jaina titika onna nge e chronga chujni, ícha tjintee nge e nichja ndo Dio ixi chronga ndo inge e juinche e Chjen en ndo.

¹⁰ Ngisen titikaon Chjen en ndo Dio, sen me e no e sen ngaya aséen sen ixi nduaxin ji i. Ko ngisen titikaon a ndo Dio, sen me e nchéña sen ndo xranchi naa ngisen ncheya, ixi titikaon a sen nge e chronga ndo Dio ti juinche e Chjen en ndo.

¹¹ *Ko ji i ti ndachro ndo Dio ixi chjaina ndo juachaxin tsechónna kain nchakon,* ko juachaxin me e je e Chjen en ndo.

¹² Ngisen titikaon Chjen en ndo Dio, sen me e chónnda sen juachaxin tsechón sen kain nchakon; ko sen chónnda i ngaya aséen sen Chjen en ndo Dio, jua i tsechón sen kain nchakon.

Juexin ikjin ndo Juan

¹³ Jan an kjin annta ji i ixi ja anta ó titikaonnta Chjen en ndo Dio, ixi jaña tsono anta chondanta juachaxin tsarichonnta kain nchakon.

¹⁴ Jaina noina ko titika onna ixi siá tsjanche ena Ndotáina Dio xrojan nge e ko siá tsjanchiana xranchi je e ndo tjaun ndo, me e je e ndo tsin en ndo ti tjanche ena ndo.

¹⁵ Jaña ó noina ixi ndo Dio jitin en ndo ti juanche ena ndo, ko kaxon ó noina ixi tsayé ena nge e juanchiana ngajin ndo.

¹⁶ Ngisen jitsje e ixi naa sen kichuu sen ndako a jinche e sen, ko ijie me e je a ti tsenxin chujni, chao tsjanche e sen ndo Dio sinchemé e ndo ijie me e, ko je e ndo tsajon ndo juachaxin tsechón sen me e, ixi jii naa ijie tsenxin chujni ko ndachrjan jan an ixi tsjanche ani ndo Dio ixi sen me e.

¹⁷ Kain ti ndakoa nche e chujni me e ijie ko jii ijie tsenxin a chujni.

¹⁸ Ó noina ixi ngisen titikaon Ndotáina Dio ísinche a sen ti ndako a, ixi Chjen en ndo Dio tingijna sen, ko Xixron anxrée í sincheníe a xa sen.

¹⁹ Ó noina ixi tikinixin enna ndo Dio, ko kain nge e ti ndako a nche e chujni jii ngata a nunte xasintajni me e ti tetuan an Xixron anxrée.

²⁰ Kaxon noina ixi Chjen en ndo Dio kuji xjan ngata a nunte xasintajni ko juinchekuajina xjan xranchi tsichuxinna ndo Dio, ndo nduaxin ko steniina ngajin ngisen nduaxin, me e je e ndo Jesucristo, chjen en ndo Dio. Ji i Ndo Dio, ndo nduaxin, ko chjaina ndo juachaxin tsechónna kain nchakon.

²¹ Chjan na, tintu enta kain dio tjatu o ixi me e je a nduaxin ndo Dio. Jaña tson en.

Xroon yuxin tsikjin ndo Juan

¹ Jan an, ndo tachríi, ikjin xroon ji i tsayé e sen kuinche e ndo Dio, ko nduaxin jan an tjua a sen; ko je a je o jan an tjua a sen, kaxon kain sen ó chúxin chijni nduaxin.

² Tjua anta ixi ja anta ó kuaye enta ko titikaonnta chijni nduaxin, ko kain nchakon xrochondana chijni me e ngaya aséeina.

³ Ndotáina Dio ko Ncháina Jesucristo, Chjen en ndo Dio, sintanchaonnta ndo, ko tsikonóa anta Ndo ko tsingijnanta ndo ixi ícha tsichuxinnta chijni nduaxin ko xrotjáanta ndo juaxruxin ko xrotjua anta ndo kain nchakon.

⁴ Tsango juaxruxin ritjén ixi bikon kaxinnta stenché enta, xranchi tsiketuan an Ndotáina Dio.

⁵ *Ko jai, kichuuna, tinóatáana ngajinnta ixi xrotjue é kichuunta ko ti rikji anta je a naa chijni natjúá tsaxi tsitikaonnta. Na i. Ji i naa chijni ó kuaye ena ti xrangíxixión kuitikaonna ndo Dio.

⁶ Ko ti xrotjue e kichuuna, me e xrondachro titika onna nge e tsiketuan an ndo Dio, ko ó sa ó kuin enna ti xrotjue e kichuuna.

Tsje enta jian ngixe e chujni ncheya

⁷ Ngata a nunte nti i ste kueya chujni ncheya ko titikaon a na ixi ndo Jesucristo jongí e ndo ko bake e ndo nti i xranchi naa chujni. Ni jaña ndachro, ningakon en na ndo ko ncheya na.

⁸ Méxin tsje enta jian ixi sinchetjáña inta ti ó juachanta ixi ixra juinche enta ko jaña chao tsaye enta nge e ndachro Ncháina Jesucristo.

⁹ Ko chujni tintu e nge e juako ndo Cristo, ni me e tingachrue na, ko chóna i na ndo Dio; ko sen titikaon nge e juako ndo Cristo, Ndotáina Dio ko Chjen en ndo ste sen ngajin sen me e.

¹⁰ Siá xrojan ni me e tsitsja antana, ko tjako na naa chijni je a nduaxin, tájon anta juachaxin tixin in na ndointa ko chje anta na juajna.

¹¹ Ko ngisen xronichje e ni me e ko tsajon sen juajna ngajinna, me e xrondachro ixi kaxon je e sen tsama ijie xranchi je e na ixi ti ndako a tjako na.

Juexin nichja ndo Juan

¹² Jan an chonda ícha kueya nge e xrontatjunta, ko tjaun a xrontatjunta ixi xroon rikjin. Nchakon tsjasotsja anta me e xrontatjunta ko jaña ícha juaxruxin tsjoína.

¹³ Sen kichuunta tixinixin en ni ngo nti i, kaxon kuinche e ndo Dio sen, xruan annta sen juajna. Jaña tson en.

Xroon nínxin tsikjin ndo Juan

¹ *Jan an ndotáchrí tituen en sen ni ngo, ikjin xroon ji in tsayé e ndo Gayo, ndo tjua a ixi chuxin chijni nduaxin.

² Kichuuna, tjanča a ndo Dio ixi je e ndo sintanchaoan ndo, ko tsingijna ndo kain ixra nche e ko jian tsake e ko ícha tsitikaoan ndo Dio.

³ Tsango bake e jan an juaxruxin nchakon kuij kaxin sen kichuuna ko ndachijina sen ixi tsango jian titikáoan chijni nduaxin.

⁴ Jan an tsango chjána juaxruxin ixi kuin an ixi sen tja on xranči chjan na stetitikaon sen chijni nduaxin.

⁵ Kichian, ja a nduaxin jian rinche e ixra ixi tingijna sen kichuuna ko ícha tingijna sen ti xin jée tjajna.

⁶ Sen kuingijna ja a tsikeki e sen sen kichuuna, sen xra o ni ngo, xranči nduaxin tjue é sen. Ko jai tinóatána ngajian ixi tingijna sen kain nge e xrokonde e sen xranči tjaun ndo Dio ti tsaa sen cha o.

⁷ Je e sen kuachrje sen ixi xrochronga sen chijnie Ncháina ko je e sen kuayé a sen nge e xrokuajon chujni chúxin a ndo Dio.

⁸ Méxin, jaina xrokonda tsingijnana sen ixi jaña tsingijnana ícha tsjako sen chijni nduaxin.

Ndako a juinche e ndo Diótrefes

⁹ Jan an ikjin naa xroon kuayé e sen ni ngo xra o nti a. Ko ndo Diótrefes titikaon a ndo nge e kuetuan an sen ni ngo ixi je e ndo tjaun ndo je o ndo tsetuan an ndo.

¹⁰ Méxin, nchakon tsjaso jan an nti a tsoña o a ndo sonda jaña nche e ndo ko jincheya ndo. Ko je a je o me e nche e ndo. Kaxon tayé a ndo sen kichuuna tjako chijnie ndo Cristo; ko toña o e ndo sen tjaun tsingijna sen ko tajon a ndo juachaxin tsingijna sen, ko tengixin ndo sen ni ngo.

¹¹ Kichuuna, nche a xranči nche e chujni nche e nge e ndako a. Cháña nche e ko tjakoa nge e jian. Ixi ngisen nche e ti jian, sen me e chujnie ndo Dio sen. Ko chujni nche e ko tjako nge e ña i, chujni me e chúxin a ndo Dio.

Jian nche e ndo Demetrio

¹² Kain sen ndachro ixi jian nche e ndo Demetrio ko nduaxin me e. Kaxon jan anna ndachrjanna jaña ko ja a no a ixi jan anna ntaya ina.

Juexin nichja ndo Juan

¹³ Chonda itsjé nge e xrontatjua ko jai tjaun a xrokjin a me e

¹⁴ ixi tja on tuinxin tsikon kichuuna ko nchakon me e tsjoína.

¹⁵ Juaxruxin take é. Kain sen chuxian nti i xruan an sen juajna. Tjanča a kaxon ndache ngujngu sen chuxian nti a ixi jan an xruan an sen juajna.

Xroon tsikjin ndo Judas

¹ *Jan an, Judas, nta a xrée ndo Jesucristo, ko jan an ndo kichuu ndo Jacobo, ikjin xroon ji i tsayé e kain sen tjue e ko sen tsikinche e Ndotáina Dio ixi tsitikaon sen ko kaxon ndo Jesucristo tayakon en ndo sen.

² Tja on ixi ndo Dio tsikonóa anta ndo ko xrotjáanta ndo juaxruxin ko tsango xrotjua anta ndo.

*Sen ndako a tjako
(2Pe. 2:1-17)*

³ Kichuuna, tsango tja on xrokjin xroon ji i ixi naakua chondana juachaxin tsechónna kain nchakon. * Méxin, xrokonda xrokjinna xroon ji i ixi tinóatáana ngajinnta tintue anta tsitjáña ti chuntianta Ncháina Jesús. Ji i juachaxin kuajon ndo Dio ngajin kain sen titikaon ndo ko nai a tsitjáña juachaxin.

⁴ Richonda juachjaon ixi ste kaxin ni ncheya ti no stenta. Ó sa ó nichja xroon chijnie ndo Dio xranchi tangi tson en chujni me e. Je e nā titikaon a nā ndo Jesús, ndo naakua Ncháina, ko ndachro nā ixi ndo Dio tjaunna ndo, méxin, chao sintu una ngixe i nge e ndako a.

⁵ Ja anta maski ó no anta ji i, jai tja on syntaxraxa onnta íjngo ixi Ncháina ndo Dio kuantsjexin ndo sen tjajna Egipto sen israelita, ko tjume e je e ndo juinchetjáña ndo sen, sen kuitikaon a ndo.

⁶ Kaxon jaña kon en sen ángel, sen kuitikaon a ti kuetuan an ndo Dio ko kuintu e sen juachaxin tsikajon ndo Dio tsikayé e sen, ko kuintu e sen ti jian kuintee sen ko jai kuetuan an ndo ixi steje e sen ti naxixe e, stechón en sen tsijja nchakon tsoñe e sen ijie.

⁷ Kaxon jaña kon en ni tjajna Sodoma ko ni tjajna Gomorra ko ni tjajna tjenka nti a. Ni me e juinche e nā xranchi juinche e sen ángel, kuitikaon a nā kaxon, méxin kuama nā ijie ixi juinche e nā ti ndako a ngajin nchri je a janchri e nā ko juinche e nā kain ti ndako a, méxin bikaonxin nā ixi.

⁸ Ji i juako xranchi tson en ni titikaon a, méxin jaña tson en ni ña i, ni ntatjunta ndako a xraxaon. Ncheni e nā cuerpoe nā ko titikaon a nā juachaxien Ncháina ko nichjangí e nā sen ángel chónnda juachaxin tetuan an.

⁹ *Ndo arcángel Miguel kuyakutee ndo Xixron anxrée ko kuetoaka o ndo xa kondeexin cuerpoe ndo Moisés ixi Xixron anxrée tjaun xa xrobikao xa cuerpoe ndo. Je e ndo ángel maski jaña kon en, kuyakute a ndo xa. Je o ndache ndo xa: “Ncháina sinchéña ijie ngajian.”

¹⁰ Ko ni ncheya nichjangí e nā nge e tienxin a nā kaxon, ko nche e nā xranchi iko tienxin a, ko je o titikaon nā nge e ndachro aséen nā, méxin, ti nge e nche e nā tsitjáñaxin nā.

¹¹ ¡Lastu nā!, nche e nā xranchi juinche e xi Caín. Tjaun nā tsjacha nā tomi méxin juinche e nā xranchi nge e ndako a juinche e xi Balaam, ko tsen en nā xranchi kuen en xi Coré ixi nichjangí e xa sen tjajnéé xa.

¹² Tosue eni ixi ni ji i itji nā kia chaxro chondanta, ti no xraxaonxinnta Ncháina Jesús. Je e nā ine nā ko ti i nā ko take e nā juaxruxin maski xro an juasaya chónnda nā. Ste nā xranchi kaxin ni tetuan an; je o tjaun nā tayakon en nā aséen nā. Stena xranchi itjuí chónnda i inda ko nango tikao chrinto tjuí; ko xranchi naa ntaa tajon a itu maski nchakuen ntaa; naa tsikindeken enxon nā ko naa tsikachrjengíxin nue e nā.

¹³ Je e nã ste nã xranchi ndachaon jie e tsixrúji tuchrjo ixi ndako a nche e nã ko jii naa nge e tosue eni. Ko ste nã xranchi nchanotsé tsingachrue, itji nango ko nango ko tikinixin en satsji ti naxixe e.

¹⁴ Nchakon bake e ndo Adán, tjume e yatuxin ndo me e kuij ndo Enoc, ndo nichjaxin juachaxien ndo Dio ko ndachro ndo: “Jan an bikon Ncháina Dio bika o ndo itsjé mil sen ángel chóna ndo,

¹⁵ ixi sinchéña ndo ijię ngajin kain ni ndako a juinche e kondeexin kain nge e ña i kuanichjangí e nã ndo.”

¹⁶ Ni me e tjaun a nã kain nge e jiton en ko ichrji nã nichjangí e kichuu nã. Je o chrjitjée nã nge e je o je e nã tjaun nã. Ti nichja nã nchejié aséen nã ko jian tjao nã kondee chujni ixi tjaun nã ni me e tsingijna nã.

Nchexraxaon ndo sen titikaon ndo Cristo

¹⁷ Méxin, ja anta kichuuna, xraxaonnta nge e kuandachro sen kuinche e Ncháina Jesucristo,

¹⁸ *ti kuandachro sen ixi nchakon tsjexixin nunte xasintajni tsii ni tsitikaon a ko xronichjangí e nã nge e tjaun ndo Dio ko xrotjaun nã tsitikaon nã nge e ña i ndachro aséen nã.

¹⁹ Ni me e tjaun nã sintaketonta nã ixi je o tjaun nã sinche e nã nge e ndako a jii nunte xasintajni† ixi chóna i nã Espíritue ndo Dio.

²⁰ Méxin, kichuuna, kain nchakon chuntianta ko titikaonnta Ncháina Jesucristo ko xronichjaxinnta ngajin ndo Dio ixi juachaxien Espíritue ndo.

²¹ Jaña chuntianta ixi tjua anta ndo Dio ko chon énta nchakon xrokjan Ncháina Jesucristo ixi juasie ndo xrochjajna ndo juachaxin tsechónna kain nchakon.

²² Jian tingijnanta ni xratienxin a ixi tsienxin nã nchakon tsechónni kain nchakon.

²³ Tingijnanta ni titikaon a ixi tsji a nã ti xro i nai a tsanga,‡ ko tikonóe énta ni xrokonde e tsikonóe eni ko tsje enta jian ixi ja anta sinche anta ti ndako a nche e je e nã.

Juasaya tayé e ndo Dio

²⁴ Naakua ndo Dio jii ko tsango no e ndo kain nge e ko nchemé e ndo ijię chondana ko chóna ndo juachaxin tsayakuina ndo ixi sinche ana ti ndako a, ko nchakon tsjasona ti jii je e ndo xro an ijię xrochondana, ko tsango tsojuna juaxruxin ti jii ndo nti a.

²⁵ Juasie ndo Dio tsango chóna ndo juachaxin tetuan an ndo ko tsajon ndo juachaxin tsechónna ixi juachaxien Ncháina Jesucristo. Je e ndo kain nchakon jichón ndo ko chóna ndo kain juachaxin, juachaxin nai a tsjexin. Jaña tson en.

Nge e chronga ndo Jesucristo bikon ndo Juan

¹ Kain nge e jitaxin nti i ndo Dio juincheno e ndo Ncháina Jesucristo ixi sincheno e ndo kain sen nche e xrée ndo ixi kain ji i xrokonda tuinxin tson en. Ndo Jesucristo xruan an ndo naa ndo ángel ixi sincheno e ndo ndo Juan kain ji i ixi je e ndo Juan nche e ndo xrée ndo Jesucristo.

² Ndo Juan nduaxin chronga ndo nge e nduaxin tsindachro ndo Dio ko nge e chronga ndo Jesucristo ko kain nge e tsikikon ndo xranchi juako ndo Dio.

³ Juaxruxin tsake e sen sinchekuanxin xroon ji i ko tsin en sen chijni chronga nge e tson en, ko kaxon juaxruxin tsake e sen tsitikaon nge e nichja xroon ixi tuinxin tsii nchakon tson en ji i.

Ndo Juan ikjin ndo xroon tsayé e yaato ni ngo

⁴ *Jan an, Juan, ikjin xroon tsayé e yaato ni ngo ste nunte Asia. Ndo Dio tjua anta ndo ko tjáanta ndo juaxruxin. Je e ndo bake e ndo ti xraxro an nge e jii, ko ndo jai jichón ko ndo xrokjan tsii íjngo. Ko juaxruxin ji i tajon yaato espíritu jii ti tetuanxin ndo,

⁵ ko kaxon ndo Jesucristo tajon kain juaxruxin ji i. Je e ndo nduaxin chronga ndo kain nge e; je o je e ndo sa ó xechón ndo, ndo ícha tetuan an ixi kain xi rey ko ni tetuan an nunte xasintajni. Je e ndo tsango tjaunna ndo, méxin ixi jnié ndo kuijmaxin kain ijie sinkana.

⁶ *Je e ndo kuajon ndo juachaxin xrokjanna xranchi xitaana ixi sintu una ixra ngajin Ndotée ndo, Ndotáina Dio. Méxin je e ndo tsayé e ndo kain juasaya ko juachaxien ndo tsetuan an ndo kain nchakon. Jaña tson en.

⁷ *Tsje enta. Ndo Cristo tsii ndo ngakjen en itjuj. Ko kain na tsikon na ndo ko kaxon ni ningakon en ndo, ni naakónaxón ndo ko kain ni tjajna jii nunte xasintajni xrotsjanga na nchakon tsikon na tsii ndo. Jaña tson en.

⁸ *“Jan an ti xrangíxixión ritjén ko jan an tsake e ti tsjexixin kain nge e, xranchi letra Á xrangíxixión kain letra Zeta tjexixín”, jaña ichro Ncháina ndo Dio, ndo tsango tetuan an. Je e ndo jichón ndo jai ko ó bake e ndo sa ó ko ndo xrokjan tsii íjngo.

Ndo Cristo chóna ndo kain juachaxin

⁹ Jan an Juan ndo kichuunta ixi steniina ndo Jesús. Ja anta ko jan an xraje o tangi stetatsingana ko stechon enna tsojuna ti tetuan an ndo Jesús. Jan an bake e naa nche nchiín ngusine nda, nche ndatin in Patmos, kondeexin bajako chijnie ndo Dio ko kuanichja chijnie ndo Jesucristo.

¹⁰ Naa nchakon ritájon juasaya ngajin Ncháina, hora me e kuij juachaxien Espíritue ndo Dio ti ritjén jan an ko tuenxinna kuin an naa téé sen, soji xranchi ndachro naa itjao.*

¹¹ Ja in ndachro ndo:

—Jan an ti xrangíxixión ko ti tsjexixin xranchi letra á xrangíxixión ko letra zeta tsjexixin. Ja a ikjian xroon ji i xrochronga kain nge e tsikuan ixi xroxruen en yaato ni ngo ste nunte Asia: ni ngo tjajna Éfeso, Esmirna, Pérgamo, Tiatira, Sardis, Filadelfia, ko Laodicea.

¹² Tjume e ngatjia tsja a ixi tsikon ngisen jinichja na ko tuinxin bikon yaato candelero tsikónaxin chika oro.

¹³ Ko ngusine ti yaato candelero bikon naa ngisen jitsje e xranchi Chjen en ndo Dio tsijongí e xranchi chujni. Ko manta jiá ndo, me e naa manta jine jikaxin ti tutée ndo ko jiteya ndo naa cinturón tsikónaxin chika oro.

1:4 Ap. 4:5. **1:6** Ap. 5:10. **1:7** Mt. 24:30; Mr. 13:26; Lc. 21:27; 1Ts. 4:17; Jn. 19:34, 37; Mt. 24:30. **1:8** Ap. 22:13.

* **1:10 itjao** trompeta

¹⁴ Ko xrajaa ndo tjúá xranchi tikonni chjuen kutuchjon ko tjúá xranchi tikonni chrinta ko jmakon ndo tóngíxin xranchi xro i.

¹⁵ Ko tutée ndo xranchi chika bronce tóngíxin tsikachrjexin naa itja. Ko ti nichja ndo tin enni séen xranchi xroin yee nda jitinga.

¹⁶ Ko itja ndo ti jian, chóna ndo yaato nchanotsé. Ko ro a ndo jitachrjexin naa chika espada kayui yajin yauxin. Ko ngaya ikon ndo tsango tóngíxin xranchi tóngíxin chjiixro ngusine nchakon.

¹⁷ *Ko hora bikon ndo, xranchi xrokuen enna, kuaritsinga ti jii tutée ndo. Ko je e ndo bake e ndo itja ndo ti jian ngata ana ko ndachijina ndo:

—Xronka ia. Jan an ti xrangíxixión ko ti tsjexixin kain nge e.

¹⁸ Ko jan an ríchon. Jan an kuen enna, ko jai ríchon íjngo ko jan an tsarichón kain nchakon. Jaña tson en. Jan an tituan an ngajin juachaxin ti tsen en chujni ko richonda chika xitjeexin ti jii ni tsiken en.

¹⁹ Méxin ikjian nge e bikuan, ko nge e ritsje e jai ko nge e tson en tjume e.

²⁰ Ji i xrondachro ti yaato nchanotsé bikuan ngaya tjáana ti jian ko ti yaato candelero chika oro: Ti yaato nchanotsé me e sen ángel nichje e sen ti yaato ni ngo ko ti yaato candelero me e xrondachro yaato ni ngo.

2

Chijni kuayé e yaato ni ngo: Chijni kuayé e sen ni ngo tjajna Éfeso

¹ Ikjian xroon tsayé e ndo ángel jitayakon en aséen sen ni ngo Éfeso: “Ja in ndachro ndo chóna yaato nchanotsé ngaya itja ndo ti jian ko ichrji ndo ngakjen en yaato candelero tsikónaxin chika oro:

² Jan an nóna kain nge e nche enta ko nóna ixi jian nche enta ixra ko tintue anta ti titikaonnta, ko juaxruxin a stenta ixi chujni ndako a nche e. Jan an ó nóna ixi ja anta jian tsje enta á nduaxin chujni ndachro ixi je e na apóstol na ko je a nduaxin; ko juakonta ixi ni me e ncheya na.

³ Kueya nge e tangi kuatsinganta ixi titikaonntana ko kaxon tsango jian juinche enta ixra ko tuenxin a konchrjenta ko ngaxin a itonnta.

⁴ Ko jii naa nge e nchena i juaxruxin: ixi jai tjuana ininta xranchi sa ó.

⁵ Sintexiñaonta xranchi kuinteenta sa ó. Ikjannta titikaonnta ndo Dio íjngo. Tintu enta ti ndako a ko nche enta kain nge e jian ti kuanche enta nchakon nandá kuaxi kuitikaonnta, ixi siá sinche anta me e, jan an tsjaso ko nango tsake e candeleroanta.

⁶ Ko jii naa nge e nchéna juaxruxin nche enta me e ti ningakon ennta nge e nche e ni Nicolaítas ko jan an kaxon ningakon an nge e nche e na.

⁷ *Ngisen chao tin en, tsin en sen nge e ndachro Espíritue ndo Dio ngajin ngujngu ni ngo: Sen tsjacha tsatsinga kain nge e tangi ko tsintue a sen tsitikaonna sen, jan an xrotjá a sen juachaxin sine sen itu tajon ntaa tajon juachaxin tsechónni kain nchakon, ntaa me e jii ntaa ti tetuan an ndo Dio.”

Chijni kuayé e sen ni ngo tjajna Esmirna

⁸ *Ikjian xroon tsayé e ndo ángel jitayakon en aséen sen ni ngo tjajna Esmirna: “Ja in ndachro ngisen jii ti xrangíxixión ko tsake e ti tsjexixin kain nge e, ndo kuen en ko jai jichón:

⁹ Jan an chúxin kain nge e nche enta ko nóna xranchi tangi stenta ko nóanta maski ja anta chondanta itsje nge e jian ngaya asáanta, ko nóna kaxon ixi chinga nichja na ixi ja anta, ni ndachro judío na, je e na xraxaon na judío na ko je a nduaxin me e; je e na tikinixin en na ningue Xixron anxrée.

¹⁰ Xronka inta kondee ti tangi tsatsinganta ixi Xixron anxrée xroxraxin in xa kaxin ja anta ndo achjiso ixi jaña tsjakoxinnta á nduaxin titikaonntana ko tangi tsatsinganta ite nchakon. Ko tintue anta ti titikaonntana kain nchakon ti tsenjannta, ko jan an xrotjá anta juachaxin tsarichonnta kain nchakon.

¹¹ *Ngisen chao tin en, tsin en sen nge e ndachro Espíritue ndo Dio ngajin ngujngu ni ngo: Ngisen tsjacha tsatsinga kain nge e tangi ko tsitikaonna, xro an nge e tson en aséen sen ti yuxin tsen en chujni.”*

Chijni kuayé e sen ni ngo tjajna Pérgamo

¹² 'Ikjian xroon tsayé e ndo ángel jitayakon en aséen sen ni ngo tjajna Pérgamo: “Ja in ndachro ngisen chónnda espada kayui yajin yauxin:

¹³ Jan an chúxin kain nge e stenchenta ko nóna ixi stenta ti no tetuan an Xixron anxrée, ko ja anta xratitikaonninta. Ko kuintue anta chuntiantana maski nti a kóña nã ndo Antipas, ndo jian kuitikaonna jan an.

¹⁴ Ko jii naa nge e nchena i juaxruxin nche enta. Nti a tjajna Pérgamo chondanta kaxin ni chro a tintu e nge e juako xi Balaam, xi me e ndache xa xi Balac ixi sinchekateya xa sen Israelita sine sen nge e tsikajon nã ngajin ídolo e nã ko ti tjiakuenxin nã nchri.

¹⁵ Ko kaxon chondanta kaxin ni tjaun a tsintu e nã nge e tjako ni Nicolaítas, ni ningakon an jan an.

¹⁶ Méxin tintu enta ti ndako a ko titikaonnta ndo Dio. Ixi tuinxin tsji i jan an ti stenta ko tsetokianxin chujni ixi espada tachrxixin ro a.

¹⁷ *Ngisen chao tin en, tsin en nge e ndachro Espíritue ndo Dio ngajin ngujngu ni ngo: Ngisen tsjacha tsatsinga kain nge e tangi ko tsintuna i sen, sen me e xrotjá a sen juachaxin sine sen naa nutja jichjian ko xrotjá a sen naa ixro tjúá, ko ngata a xro me e jitaxin naa nombre natjúá ti chúxin a ninaa ngisen. Je o ngisen tsayé e ixro tsono e sen xranchi ndatin in sen.”

Chijni kuayé e sen ni ngo tjajna Tiatira

¹⁸ 'Ikjian xroon nge e tsayé e ndo ángel jitayakon en aséen sen ni ngo tjajna Tiatira: “Ja in ndachro Chjen en ndo Dio, ngisen chónnda jmakon xranchi xro i jiche ko tutée ndo tóngíxin xranchi chika sine jingi xro i.

¹⁹ Jan an nóna kain nge e nche enta ko nóna ixi tsango tjaunninta ko tsango chuntianinta ko nóna jian ixrã nche enta. Ko nóna ixi jai ícha nche enta ixrã.

²⁰ Jii kaxin nge e nchena i juaxruxin nche enta ixi ja anta tájonnta juachaxin tjako nchri Jezabel ko ndachro nchra ixi je e nchra nichja nchra chijnie ndo Dio, ko nduaxin a me e ixi je e nchra nchekateya nchra sen nche e ixrã ngajin, sine sen ti tsikajon nã ngajin ídolo e nã ko nchekateya nchra sen tsjiakuenxin sen kaxin nchri.

²¹ Jan an tjá a nchra kaxin nchakon ixi tsintu e nchra ti ndako a nche e nchra ko ti chónnda nchra itsjé xi, ko titikaon a nchra.

²² Ko jai tsajon juachaxin tsanga tsoni e nchra, tsitsingata a nchra kania ko tsango tangi tson en kain sen ndakua i juinche e nã ti kuejuakao nã nchra ko tsachrje a chin me e tsintueja sen ti ndakua i nche e sen.

²³ Ko chjen en nchri me e sintani a xjan ko tsen en xjan. Ko kain sen ni ngo tsono e sen ixi jan an chuxin nge e xraxaon aséen sen. Ko sintajenga sen nã kondee ngujngu ti ndako a juinche e sen.

²⁴ Ko ja anta ko ikaxin sen ste tjajna Tiatira, ja anta ti rue anta ti ndako a tjako nchra ko tjaun anta tsono anta nge e ndakua i kondee chijnie Xixron anxrée, ko ja anta í xrotjá inta inaa juachjaon.

²⁵ Ko nge e ti jian chondanta, tatsiinnta ngaya asáanta ko me e nche enta kain nchakon tsjija jan an.

²⁶ Ko sen tsjacha sinche e kain nge e tja on jan an kain nchakon ti tsjexinja kain nge e jii ngata a nunte xasintajni, xrotjá a sen juachaxin tsetuen en sen kain tjajna.

²⁷ Jaña Ndotána chjána ndo juachaxin tsetuan an, kaxon jaña je e sen tsetuen en sen tjajna ko xrochónnda sen naa ntakuto chika tsetuenxin sen tjajna ko xrochjeka tjajna xranchi taki naa ichi tjatu o jaña tson en chujni me e.

²⁸ Ko kaxon xrotjá a sen nchanotsé tingasáña ndúyo.

²⁹ Ngisen chao tin en, tsin en nge e ndachro Espíritue ndo Dio ngajin ngujngu ni ngo.”

3

Chijni kuayé e sen ni ngo tjajna Sardis

¹ 'Ikjian nge e tsayé e ndo ángel jitayakon en aséen sen ni ngo tjajna Sardis: “Ja in ndachro ndo chónnda yaato Espíritue ndo Dio ko chónnda yaato nchanotsé: Jan an nóna kain nge e nche enta, ko nóna ixi ndachro na stechonnta ko nduaxin a me e ixi ja anta ó tsikinteken ennta.

² Xingama anta ko nche enta ti jian ti xrachao sinche enta ixi ritsja a ti stenche enta ti ndakua i jii ngajinxin* ikon Ndotána Dio.

³ *Sintexiñaonta kain nge e jian kuaye enta ti kuajon ndo Dio, tindoxinnta kain ti ndako a kuanche enta ko titikaonnta kain ti jian. Siá sinche anta ti jian, tsjaso ngajinnta xranchi naa xiche e, ixi xi me e noe ani ngiora tsii xa.

⁴ Ko xraste kaxin sen nti a tjajna Sardis xranchekitja i sen manta stejá sen, me e tsetsáa sen manta tjúa ko jan an tsajiki an sen ixi jaña tikinixin en sen.

⁵ *Ko sen tsjacha tsatsinga kain nge e tangi ko tsitikaonna sen, sen me e tsayé e sen manta tjúa tsetsáa sen ko sintamá i xranchi tin in sen ti xroon jitaxin xranchi tin in kain sen tsechón kain nchakon ko jan an xrondachrjan ixi chuxin sen ngajinxin ikon Ndotána ko ngajinxin sen ángel chónnda ndo.

⁶ Ngisen chao tin en, tsin en sen nge e ndachro Espíritue ndo Dio ngajin ngujngu ni ngo.”

Chijni kuayé e sen ni ngo tjajna Filadelfia

⁷ 'Ikjian nge e tsayé e ndo ángel jitayakon en aséen sen ni ngo tjajna Filadelfia: “Ja in ndachro ndo tjúa, ndo nduaxin, ndo chónnda chika xitjeexin ntachja tikinixin en ndo rey David. Ixi nchakon tsantje e ndo ntachja xro an ngisen tsije e ntachja, ko nchakon tsije e ndo ntachja ko xro an ngisen tsantje e ntachja:

⁸ Jan an nóna kain nge e nche enta, ko ngajinxinnta bakée naa ntachja jixrange e ko xro an ngisen chónnda juachaxin tsije e ntachja. Nóna ixi maski jié a juachaxin chondanta, kuitikaonnta kain nge e tja on, ko nai a tosua anta ixi chuxinninta.

⁹ Jan an sinta a ixi ni tsikitikaon Xixron anxrée ko ndachro na ixi judío je e na ko nduaxin a me e, je e na tsakexin na ntatuchi in na ngajinxin ja anta ixi jaña tsikon na ixi jan an tsango tjua anta.

¹⁰ Ixi nduaxin kuitikaonnta nge e kuetuan annta, jan an tayakon annta nchakon tsii juachjaon ngata a kain chujni ste nunte xasintajni ixi jaña tsikon ndotána Dio á nduaxin tsikitikaon na chijnie ndo.

¹¹ Jan an tuinxin tsji i. Tatsiinnta ngaya asáanta chijni kuaye enta ixi jaña ninna ngisen tsantsja inta corona juachanta.

¹² *Sen tsjacha tsatsinga kain ti tangi, sen me e tsakée sen xranchi ntasiji jingi e ningue ndo Ndotána Dio ko í nai a tsachrjexin sen nti a. Ko jan an xrokjin ngata a sen xranchi tin in ndo Dio ko xranchi tin in tjajnee ndo, tjajna natjúá, tjajna Jerusalén, tsj xjn ngajní ti jii ndo Dio. Kaxon xrokjin xranchi natjúá tsi ina jan an.

* **3:2 ngajinxin** delante de **3:3** Mt. 24:43, 44; Lc. 12:39, 40; Ap. 16:15. **3:5** Ap. 20:12; Mt. 10:32; Lc. 12:8. **3:12** Ap. 21:2.

13 Ngisen chao tin en, tsin en sen nge e ndachro Espíritue ndo Dio ngajin ngujngu ni ngo.”

Chijni kuayé e sen ni ngo tjajna Laodicea

14 'Ikjian nge e tsayé e ndo ángel jitayakon en aséen sen ni ngo tjajna Laodicea: “Ja in ndachro ndo nduaxin, ndo chronga kain ti nduaxin. Jan an bake e ti xrangíxixín juinchéña ndo Dio kain nge e. Ndachrjan ja in:

15 Jan an nóna kain nge e nche enta. Ko nóna ixi je a kain ti ndachrjan titikaonntana, je o kaxion nge e titikaonnta. Xrokuitikaonnta kain nge e o cháña xro an nge e xrokuitikaonnta. Ja anta stenta xranchi inda yasondao; cháña xrokjuinta naa nda súa o cháña nda ikin.

16 Ixi kaxion nge e titikaonnta, me e ja anta xranchi naa inda yasondao itjennta, méxin tsantsjexinnta ro a.

17 Ko ndachronta ixi tsango itsjé nge e chondanta ko tsango jian stenta ko xro an nge e xrokonda anta. Ko ja anta noa inta ixi xro an juaxruxin chóna asáanta ko noa inta ixi turuchu asáanta ko ntakutsinnta.

18 Méxin jan an ntakateyanta te nanta ngajin jan an oro chaxro tsikachrjexin xro i ixi jaña xrochondanta nge e nduaxin tjintee ko kaxon manta tjúá tsarianta, ko jaña tsikon ani ti turuchunta ko te nanta ngajin jan an xroan colirio tsintjingi ikonnta ixi jaña chao tsikonnta.

19 *Ixi jan an toña o ko tetuan an tikaon kain sen tjuá a; méxin tintu enta kain ti ndako a ko ikjannta titikaonnta kain nge e tjaun ndo Dio.

20 Nti i ritjén ngandangí nduja, ritinga ntachja ko riteya. Siá xrojan ngisen jitin en téena ko tsantje e sen ntachja, jan an tixin in ndo a sen ko sineki an sen.

21 Ko ngisen tsjacha tsatsinga kain nge e tangi, jan an xrotjá a sen juachaxin tsake e sen ngajin ti ritetuan an; xranchi jan an juácha kuatsinga kain nge e tangi ko Ndotána chjána ndo juachaxin tsake e ti tetuan an je e ndo.

22 Ngisen chao tin en, tsin en sen nge e ndachro Espíritue ndo Dio ngajin ngujngu ni ngo.”

4

Sen tajon juasaya ngajin ndo Dio

1 Tjume e jan an bikon jixrange e naa ntachja jii ngajní.* Ko ti sen nichja kuin an sa ó, nichja sen séen xranchi naa itjao†, ndo me e nichja na ndo íjngo, ko ja in ndachijina ndo: —Tajian nti i ixi tsjako a kain nge e tson en ícha tjume e.

2 Tuinxin kujj juachaxien Espíritue ndo Dio ngajin ko bikon naa trono jii ngajní ko naa ngisen jita a trono me e.

3 Ko ndo jita a trono tsango jitóngíxin ndo xranchi naa ixro ndatin in jaspe o xro cornalina. Ko ngandajin trono me bikon naa kunchechá tsango chaxro tóngíxin xranchi naa ixro ndatin in esmeralda.

4 Ko kaxon ngande e trono me e bikon íjngo ikán noó trono ko nti a jita a ikán‡ noó ndo tachríi, ko manta tjúá steyá sen ko corona tsikóñaxin chika oro steta a jaa sen.

5 *Ko trono tixinixin en ndo Dio tin enni nichja sen, ko tjateé ko tóngíxin. Ko ngajinxin trono kaxon jiche yaato xro i ko me e ti yaato Espíritue ndo Dio.

6 Ko ngajinxin trono bikon xranchi xrokjuí naa ndachaon tóngíxin xranchi xroxrao.

Tjenka ko ngande e trono ste noó sen jichón ko chóna sen me e itsjé jmakon sen ngajinxin sen ko tuenxin sen.

⁷ Ko ti naa sen jichón tikonni xranchi naa kujenda, ko ti yuxin sen jichón tikonni xranchi naa kuxinta, ko ti nínxin sen jichón tikonni xranchi ikon chujni. Ko ti noóxin sen jichón tikonni xranchi naa kutachikjan jitjanga.

⁸ Ko ti noó sen jichón, ngujngu sen chónnda sen ikjaon nenechaan sen ko stechónnda sen itsjé jmakon sen ngandajin sen ko ngaxin in sen, ko tiie, nchakon stendachro sen:

Tjúá, tjúá, tjúá ja anta,

Ncháina ndo Dio, ja anta chondanta kain juachaxin.

Ja anta ndo ó ritjennta sa ó,

ko ríchonnta jai

ko ja anta xrokjannta tsji inta íjngo.

⁹ Sen noó sen jichón kain nchakon tajon sen juasaya, ko juasie sen ngajin ndo Dio, ndo jita a trono, ndo jichón kain nchakon

¹⁰ ko hora jaña nche e sen noó jichón, sen ikán noó tachríi take exin ntatuchi in sen ngajin ndo Dio ko tajon sen juasaya ngajin ndo jichón kain nchakon, ko tjanka sen corone sen ngajinxin trono ko ndachro sen:

¹¹ Ncháina ko ja anta ndo Dio na nana,

ja anta tikinixin annta tsaye enta kain juasaya

ko tikinixin annta xrontatjunanta ja anta tsango jiannta xixi kain juachaxin chondanta;

ko xixi ja anta juinçekochjiannta kain nge e xixi jaña jueñaonta.

5

Xroon ko Xjantuchjon

¹ Tjume e bikon ngaya tja ndo ti jian, ndo jita a trono, jitsé ndo naa xroon tsikjin sen ngaya ko tuenxin ko tsikijeexin xroon xixi yaato sello.

² Ko bikon naa ndo ángel chónnda juachaxin ko séen tjanchangi ndo ko ndachro ndo:

—¿Ngisen chónnda juachaxin tsintjian sen sello ko tsantje e xroon?

³ Ninaa ngisen jii ngajni ko nunte xasintajni ko chringi inche jua i tsantje e sen xroon ko jua i tsje e sen nge e ndachro xroon.

⁴ Ko jan an tsango tsjanga xixi kuichue a ninaa ngisen chónnda juachaxin chao xrokuan-tje e xroon o je o xrobikon sen nge e ndachro xroon.

⁵ Tjume e naa sen tachríi ndachijina:

—Ítsjanga ia, xixi nti i jii Kujenda kuachrjenixin tjajna Judá ko kuachrjenixin ndo Rey David. Ndo me e juacha ko chónnda ndo juachaxin chao tsantje e ndo ko tsintjian ndo ti yaato sello chónnda xroon.

⁶ Tjume e ngajinxin trono ko ti ste noó sen jichón ko ngusine ti ste sen tachríi, nti a siin naa ndo xrokjui xranchi Xjantuchjon,* tikonni xranchi naatsikónaxón na xjan ko chónnda xjan yaato nte e xjan ko yaato jmakon xjan. Me e xrondachro yaato Espíritue ndo Dio tsixruan an ndo itsji nchijí nunte xasintajni.

⁷ Ko Xjantuchjon konchjiñe e xjan ti jii ndo jita a trono ko itsé xjan xroon jiá itja ndo ti jian.

⁸ Ko nchakon itsé xjan xroon me e, ti noó sen stechón ko sen ikán no sen tachríi bake exin ntatuchi in sen ti jii tutée Xjantuchjon. Ko ngujngu sen chónnda sen naa arpa, ko copa tsikónaxin chika oro jichre inda chaxro xraxe. Me e xrondachro kain ti nichje e sen ndo Dio, kain sen tikinixin en tjajnee ndo.

⁹ Ko sen noó jichón ko sen ikán no sen tachríi itsje sen naa soon natjúá:

Je o ja anta tikinixin annta tsaye enta xroon

ko tsintjiannta ti sello chónnda libro;

xixi ja anta naakónaxónnta na

* **5:6 Xjantuchjon** Cordero de Dio; Jesús

ko jníanta kuenaxinnta chujni ste kain tjanya, sen nichja kain ngigua, tjanya nchínchín ko tjanya ndua ixi xrokuayé e ndo Dio sen.

¹⁰*Ja anta kuajonnta juachaxin ixi xrokjanna rey ko taana sinta ana ixra ngajin ndo Dio na nana,

ko kaxon kuajonnta juachaxin tsetuan anna nunte xasintajni.

¹¹ Tjume e tsja a ko kuin an tée itsjé sen ángel ste sen ngande e trono ko no sen jichón ko ikán no sen tachríi. Ko ste itsjé millones sen.

¹² Séen itsje sen:

Xjantuchjon, naakóñaxón na xjan,

méxin tikinixin xjan tsayé e xjan kain juachaxin tsetuan an xjan

ko tsayé e xjan kain ti tjintee,

ko kain nge e tsono e xjan,

kain juachaxin ko kain juasiaina.

¹³ Kaxon kuin an ixi kain nge e juinchéña ndo Dio jii ngajni, nunte xasintajni, jii chringi inche ko kain nge e jii chringi ndachaon ndachro:

Kain ja anta tájonnta juasaya ngajin ndo jita a trono ko ngajin Xjantuchjon

ixi tikinixin en sen kain juachaxin ko kain nge e jian ko kain juasaya kainxin nchakon.

¹⁴ Ko noó sen stechón ndachro sen:

—Jaña tson en.

Ko sen ikán no sen tachríi bake exin ntatuchi in sen, kuajon sen juasaya ngajin ngisen jichón kain nchakon.

6

Yaato sello

¹ Tjume e bikon ixi Xjantuchjon kuintjian xjan naa sello ti yaato sello ko kuin an nichja naa sen noó jichón ko nichja sen séen xranchi tjateé ko ndachro:

—Xrokuia ko tsje é.

² Ko jan an ritsja a ko bikon naa kunxin tjúa. Ko ndo jita a kunxin me e jichónnda ndo naa arco ngaya itja ndo ko tsikayé e ndo naa corona ko je e ndo juacha ndo ti kue to ndo ngajin kain ti ña i ko jaña sinche e ndo kain nchakon.

³ Ko Xjantuchjon hora kuintjian xjan sello yuxin, kuin an ti yuxin sen jichón ndachro sen:

—Xrokuia ko tsje é.

⁴ Ko kuachrje inaa kunxin játse. Ko ndo jita a ba kuayé e ndo juachaxin tsantsje ndo kain juaxruxin jii ngata a nunte xasintajni ko jaña tsóña kichuu ngujngu chujni, ko kuayé e ndo naa chika espada yao tsango ijié.

⁵ Ko Xjantuchjon kuintjian xjan ti nínxin sello ko kuin an nichja sen nínxin jichón ko ndachro sen:

—Xrokuia ko tsje é.

Ko ritsja a ko bikon naa kunxin tiie ko ndo jita a ba jichónnda ndo ngaya itja naa balanza.

⁶ Ko kuin an nichja naa sen ngusine ti ste ti noó sen jichón ndachro:

—Je o naa kilo trigo tsinaxin ixi naa tomi denario ko ní kilo cebada ixi naa tomi denario kaxon. Ko nchetjaña inta aceite ko vino.

⁷ Ko Xjantuchjon kuintjian xjan ti noóxin sello, tjume e kuin an nichja ti noóxin sen jichón ndachro:

—Xrokuia ko tsje é.

⁸ Ko ritsja a ko bikon naa kunxin sine ko ti jita a ba ndatin in Muerte. Ko tuenxin ti me e jirué e ti tetuan an ti no xrabaa ni tsiken en. Ko kayui me e kuayé e juachaxin

tsetuan an ti noóxin parte nunte xasintajni ixi tsóña nã chujni ixi chika yao ko tsenxin nã jinta, ko tsenxin nã ichin ko iku jie e tsóña chujni.

⁹ Ko Xjantuchjon kuintjian ti naoxin sello ko bikon chringi trono aséen sen tsiken en ixi kuanichja sen chijnie ndo Dio.

¹⁰ Ko séen ndachro sen:

—Ja anta Ncháina tjúanta ko jiannta ko kain nchakon ndachronta nge e nduaxin. ¿Ngisa sinchéñanta ijie ngajin ni kóñana, ni ste nunte xasintajni?

¹¹ Ko kuayé e sen manta tjúa ko kuetuen en sen ixi xrochon en sen ikaxin nchakon xroxetjaja sen kichuu sen, sen nche e xrã ngajin ndo Cristo, tsintekenjan sen me e xranchi kuinteken en je e sen.

¹² *Ko bikon Xjantuchjon kuintjian xjan ti ikjaon sello, ko tsango tsanga kontengí nunte. Ko chjiixro konaxixe e xranchi naa manta tiie. Ko nchanitjao konjátse xranchi ijni.

¹³ Ko nchanotsé jii ngajni kuitsinga ngata a inche xranchi ntaã tajon tu higo tintjí tuée ntaã, nchakon chrinto tontsjenga ntaã.

¹⁴ *Ko ngajni kuitjáña xranchi naa xroon xeeya. Ko kain ijna ko nunte nchínchin jii ngusine ndachaon kuindoxin no bake e.

¹⁵ Ko kain xi rey jii nunte xasintajni, ni tetuan an, ni chónnda itsjé tomi, xi tetuan an xi soldado, ni tsango chónnda juachaxin ko kain ni nchenche e nã ixrã ko ni na i, kuintekema nã ngaxin in itjao* ko ti ixro ntandoá ste ijna.

¹⁶ *Ko ndache nã ijna ko ixro ntandoá:

—Titsingata aninta ixi jaña tsikon ana ndo jita a trono ko Xjantuchjoen ndo Dio tsjankata ina ijie ixi tsango jitoña xjan,

¹⁷ ixi ó kuii nchakuen ndo Dio ko Xjantuchjoen ndo sinchéña sen ijie ko, ¿ngisen tsikixin en tsango ijie juachjaon tson en?

7

Sen israelita chónnda sello

¹ Tjume e bikon noó sen ángel stexin tutée sen, ngujngu sen stetsje e sen ngujngu ti noó lado chónnda nunte xasintajni: ku e, níjin, retuya ko chjuya, sen me e stetingakon en sen chrinto ixi tsonchikau a chrinto ngata a inche, ngata a ndachaon ko ngata a ntaã yua.

² Ko kaxon bikon inaa ndo ángel kuixin chjuya ko chónnda ndo sellue ndo Dio, ndo jichón kain nchakon. Ko ndo ángel me e séen kuyako ndo ngajin ti noó ángel kuayé e juachaxin sincheni e nunte xasintajni ko ndachaon,*

³ ko ndachro ndo:

—Nchenie anta inche, ndachaon, ko ntaã yua, tsjexinja tsakéena sello ntatjen sen nche e ixrã ngajin ndo Dio.

⁴ Ko kujn an ngijan in sen tsikaa sello, ko sen me e ciento yuu ikán ko no mil, sen tsikachrjenixin ndo Israel.

⁵ Teyuu mil sen tsikaa sello tsikachrjenixin ndo Judá ko teyuu mil sen tsikachrjenixin ndo Rubén ko teyuu mil sen tsikachrjenixin ndo Gad,

⁶ teyuu mil sen tsikachrjenixin ndo Aser, teyuu mil sen tsikachrjenixin ndo Neftalí ko teyuu mil sen tsikachrjenixin ndo Manasés,

⁷ teyuu mil sen tsikachrjenixin ndo Simeón ko teyuu mil sen tsikachrjenixin ndo Leví ko teyuu mil sen tsikachrjenixin ndo Isacar

⁸ ko teyuu mil sen tsikachrjenixin ndo Zabulón ko teyuu mil sen tsikachrjenixin ndo José ko teyuu mil sen tsikachrjenixin ndo Benjamín. Kain sen ji i tikinixin sen tjajné ndo Dio ko kuayé e sen sellue ndo.

6:12 Ap. 11:13; 16:18; Mt. 24:29; Mr. 13:24, 25; Lc. 21:25. **6:14** Ap. 16:20. * **6:15** Itjao Cueva **6:16** Lc. 23:30.

* **7:2** ndachaon mar

Kueya chujni steyá manta tjúa

⁹ Tjume e bikon kueya chujni tikinixin en nchijí nunte xasintajni, ko xro an ngisen chao tseki ngijan in sen me e. Kainko tjajna ndoa ko kain tjajna nchínchín, kain ngigua stexin sen tutée sen tjenka trono ko ngajin Xjantuchjon† ko steyá sen manta tjúa ko gaya itja sen stetsé sen kajne.

¹⁰ Ko kain sen séen stetoyako sen ko ndachro sen:

Ndo Dio chóna jaina,
ndo jita a ngata a trono
ko kaxon Xjantuchjon,
kuajon sen juachaxin tsechónna kain nchakon.

¹¹ Kain sen ángel stexin sen tutée sen ngandajin trono ko ngandajin sen tachríi ko ti noó sen stechón bake exin ntatuchi in sen ko kuisée sen ngata a inche ngajin trono ko kuajon sen juasaya ngajin ndo Dio

¹² ko ndachro sen:

Jaña tson en.
Tsajonna juasaya ngajin ndo Dio
ixi tsango no e ndo ko tsango tetuan an ndo
ko tikinixin tsajonna juasiaina ngajin ndo.
Ixi tikinixin xrochonde ena ndo juasaya ixi tsango chóna ndo juachaxin
ko tsango tituan an ndo,
jaña sintu una kain nchakon. Jaña tson en.

¹³ Tjume e naa sen tachríi juanchangina ko ndachro sen:

—Sen steyá manta tjúa, ¿ngisen ña?, ko, ¿tinó kui xin sen?

¹⁴*Ko jan an juata a:

—Nchána, ja anta no anta.

Ko je e ndo ndachro ndo:

—Sen ji i tsiki xin sen ti jii juachjaon ko tsango tangi kuatsinga sen, sen tsikijmáxin mantée ko tsikotjúaxin aséen sen ixi jnié Xjantuchjon.

¹⁵ Méxin jai ste sen tjenka trono ne e ndo Dio, ko tiie, nchakon stenze e sen ixra ngaxin in ningue ndo ko je e ndo tayakon en ndo sen ko xro an nge e tsintekon en sen.

¹⁶ Ko je e sen ítsen a sen jinta ko tsen a sen inda ko xrochján i sen ixi sué nchakon, ko chjiixro sinchechján i sen kaxon.

¹⁷ Ko Xjantuchjon jii ngusine trono tayakon en ndo sen xranchi xrokjui kutuchjoen ndo, ko tsajikao ndo sen ti no jitinga inda tajon juachaxin tsechón chujni ko ndo Dio sinchexémá ndo ndakon sen.

8*Yatuxin sello*

¹ Tjume e Xjantuchjon kuintjian yatuxin sello chóna xroon ko xro an nge e kuin enni ngajni xranchi tu o hora.

² Tjume e jan an bikon yaato sen ángel siin sen ngajinxin ndo Dio ko ngujngu sen kuayé e sen ngujngu itjao.

³ Ko kuij inaa ndo ángel jitsé ndo naa i nti tsikóñaxin chika oro, kuixin tjenka altar ko kuayé e ndo itsjé tsjoxraxé tsjaaka ndo ixi ji i tsikao oración ne e kain sen tsikjan chjen en ndo Dio ko tsake e ngata a altar tsikóñaxin oro ti jii ngajinxin trono.

⁴ Ko nchie tsjoxraxé bajinxin itja ndo ángel ikjui ti jii ndo Dio ko kao oración ne e chjen en ndo Dio.

† 7:9 Xjantuchjon Cordero de Dio; Jesús 7:14 Mt. 24:21; Mr. 13:19.

⁵ *Ko ndo ángel kua ndo i nti, nti me e juinchekaon ndo ixi xruitja jii ngata a altar ko juanka ndo i nti me e ngata a nunte xasintajni. Me e kuin enni juatee ko kongíxin ko tsango kontengí nunte.

Itjao

⁶ Tjume e sen yaato ángel, sen chónnda yaato itjao*, konchjiñe e sen ixi tsanoa sen itjao me e.

⁷ Ko ndo ángel sa ó kuanoa ndo itjao chónnda ndo ko kuaxi kuania ngata a nunte xasintajni tuni ko xro i tsikintekjanxin ijñi. Ko iche ti nínxin parte nunte ko ntaa ko iche kain kayua.

⁸ Tjume e ti yuxin ndo ángel kuanoa ndo itjao chónnda ndo ko naa nge e xranchi naa ijñá ijíe jiche kuitsinga ngangí ndachaon ko nínxin parte ndachaon ikjan ijñi.

⁹ Ko kuen en nínxin parte kain nge e jii ngangí ndachaon ko kaxon nínxin parte kain ntabarco kuitjáña.

¹⁰ Tjume e ti nínxin ndo ángel kuanoa ndo itjao chónnda ndo ko naa nchanotsé ijíe xingajinxin ngajñi jiche nchanotsé xranchi naa xro i ijíe kuitsinga ngata a nínxin parte ndajitinga ko ti no jitachrjetoxin inda.

¹¹ Ko nchanotsé me e ndatin in Itsjá, méxin ti nínxin parte inda kontsjá inda ko kueya chujni kuen en ixi ti kontsjá inda me e.

¹² Tjume e ti noóxin ndo ángel kuanoa ndo itjao chónnda ndo ko ti nínxin parte chjiixro, nínxin parte nchanitjao ko nínxin parte nchanotsé konaxixe e ko í bingasáña i. Méxin tingasáña i chjiixro ko nchanitjao ko nchanotsé nínxin parte nchakon ko tiie.

¹³ Tjume e bikon ko kuin an naa kutachikjan jitjanga ba ngusine ngajñi ko séen jitoyako ba:

—¡Lastu, lastu, lastu sen ste nunte xasintajni nchakon tsanoa íjngo ní sen ángel tjao e sen ko ó tsaxi tsanoa sen tjao e sen jai!

9

¹ Tjume e ti naoxin ndo ángel kuanoa ndo itjao* chónnda ndo ko jan an bikon naa nchanotsé kuitsingaxin ngajñi ngata a nunte xasintajni ko nchanotsé me e kuayé e chika xitjeexin tuye yaso e ko naxixe e.

² Ko nchanotsé me e kuantje e tuye yaso e ko kuachrje i nchi xranchi i nchi tachrxjexin naa itja ko i nchi me e juinchekonaxixe e chjiixro ko chrinto.

³ Ko kuachrjexin i nchi me e kuchjua ko kain ba bingó ba ngata a nunte ko kuayé e ba juachaxin xranchi juachaxin chónnda kulantajoon jii nunte xasintajni.

⁴ Kuetuen en ba ixi sincheníe a ba kayua jii nunte xasintajni ko ninaa nge e yua ko ninaa ntayua. Je o sincheni e ba ni chónnda i sellue ndo Dio ntatjen na.

⁵ Ko kuayé a ba juachaxin naatsónaxón ba chujni. Je o sincheni e ba na na ó nchanitjao, ko ti tsoni e na me e xranchi tsoni e ni tsijine e naa kulantajoon.

⁶ Nchakon me e chujni tsijine e ba, xrojueñaon na xrokuen en na ko jua i tsen en na ixi ti tsen en chujni satsinge e na.

⁷ Ko kuchjua me e ste ba xranchi kunxin tikao na nchakon te to na, ko ngata a jaa ba chónnda ba xranchi naa corona chika oro ko ikon ba tikonni xranchi ikon chujni.

⁸ Chónnda ba xrajaa ba xranchi xrajaa naa nchri, ko neno ba xranchi neno kujenda.

⁹ Ko je e ba chónnda ba naa chika tingakuenxin ixi xro an nge e tson en ba. Ko ti xroin nene e ba tin enni xranchi xroin itsjé carreta tingakjin itsjé kunxin nchakon itji na tinteke to na.

¹⁰ Ko ntané e ba chónnda ba chá a xranchi chónnda kulantajoon ko ixi ché ba sincheni e ba chujni nguixin na ó nchanitjao.

¹¹ Ko xi tetuen en kuchjua me e naa ángel tikinixin en tuye yaso e ko naxixe e. Ángel me e ngigua hebreo ndatin in Abadón ko ngigua griego ndatin in Apolión ko ji i xron-dachro sinchetjáña kain nge e.

¹² Ko me e juachjaon sa ó kuatsinga ko xratitjáña íjngo yuu juachjaon ijié.

¹³ Ko ti ikjaon ndo ángel kuanoa ndo itjao chónnda ndo ko kuin an naa tée sen nichja kuachrxexin ngusine ti noó nte e altar chika oro ti jii ndo Dio.

¹⁴ Ko ti tée sen nichja me e ndache ti ikjaon ángel kuanoa itjao chónnda ndo:

—Toxindange e ti noó sen ángel jixrite e ngande e inda jitinga tsango ijié ndatin in Eufrates.

¹⁵ Ko xindange e ti noó sen ángel ixi naatsóñaxón sen ti nínxin parte chujni jii nunte xasintajni ixi ndo Dio jaña juinchekonchjian ndo sen ixi sinche e sen nge e kuetuen en sen hora, nchakon, nchanitjao ko nano me e.

¹⁶ Ko kuin an ngijan in ni soldado jita a kunxin e na, ni tsé to, me e doscientos millones ni me e.

¹⁷ Ko jaña bikon konoxin itsjé kunxin ko ni steta a ba chónnda na naa chika ntakuin na tingakuenxin ixi xro an nge e tson en na, chika me e játse chika ko yua xranchi ngajní ko sine. Ko jaa kunxin tikonni xranchi jaa kujenda ko ro a ba tachrxexin i nchi ko xro i ko azufre.

¹⁸ Ko ti nínxin parte chujni kuinteken en na ixi kaní nge e kuachrxexin ro a kunxin me e xro i, i nchi ko azufre.

¹⁹ Ko juachaxin chónnda kunxin me e tachrxexin ro a ba ko ntané ba. Ko ntané ba jii xranchi kunchee chónnda jaa me e sincheníexin ba chujni.

²⁰ Ko chujni kuenxin a ixi i nchi, xro i ko azufre, ni me e kuintue a na juinche e na ti ndako a ko kuintue a na kuajon na juasaya ngajin Xixron anxrée ko tsango jueña na ídolo tsikóñaxin chika oro, chika plata, chika bronce, ixro ko ntaa, ídolo me e jua i tikon, tien a ko chrji a.

²¹ Ko ni me e kaxon kuintue a na ti ndako a kuanche e na, ti naabakóñaxón na chujni ko kuintue a na kuitikaon na ichin tuso ko ti chónnda na inaa nchri je a janchri e na ko ti te e kichuu na.

10

Ndo ángel ko naa xroon nchín

¹ Tjume e bikon inaa ndo ángel tsango chónnda ndo juachaxin xingajinxin ngajní, ndo me e jitsía ndo naa itjuj ko naa kunchechaj jii ngata a jaa ndo ko ikon ndo tóngíxin xranchi chjiixro ko tutée ndo jitsje e xranchi xro i jiche.

² Itja ndo jitséxin ndo naa xroon nchín jixrange e, ko tutée ndo ti jian bake e ndo ngata a ndachaon ko tutée ndo ti ikjon bake e ndo ngata a inche.

³ Ko séen kuyako ndo xranchi tojie e naa kujenda, ko ti juexin kuyako ndo, kuin enni té yaaato juatee.

⁴ Ko juexin ndachro ti yaaato juatee, jan an ó xrokjin nge e kuin an ko tuinxin kuin an naa sen nichja jii ngajní ko ndachro:

—Tasintaxin a nge e ndachro ti yaaato juatee, ja ua tsono a ji i ko xro an ngisen xron-dache.

⁵ Ko ndo ángel tsikake e naa tutée ngata a ndachaon ko naa tutée ndo ngata a inche juatsi in ndo itja ndo jian ngajní.

⁶ Ko nichjaxin ndo ixi ndo Dio, ndo jichón kain nchakon, ndo juinchekonchjian ngajní ko nunte xasintajni, ndachaon ko kain nge e jii ko ndachro ndo ángel:

—Í tsonchrjen a tson en kain ji i.

⁷ Nchakon xronichja yaatuxin ndo ángel ko tsanoa ndo tjao e ndo, ó tsikon en kain ti tsindachro ndo Dio sinche e ndo, ti xro an ngisen kuano e ko sinche e ndo kain ti tsindache ndo sen nche e xrée ndo, sen kuachronga chijnie ndo ó sa ó.

⁸ Ti tée sen ó kuin an kuixin ngajní, íjngo nichja na ko ja in ndachro:

—Itjia ko chijjá xroon nchíín jixrange e jiá itja ndo ángel kuixin ngata a ndachaon ko ngata a inche.

⁹ Tjume e ikjui ko juanchia a ndo ángel xroon nchíín ko je e ndo ndachro ndo:

—Itsé ko inte xron. Ngaya ro a tsojní xranchi tsjeen kunoa, ko ngaya tsee itsjá tsono a.

¹⁰ Jan an itsé xroon nchíín jii ngaya itja ndo ángel ko juiné xron, ko nduaxin ngaya ro a xe e xranchi tsjeen kunoa ko ngaya tse e kontsjá.

¹¹ Ko tuinxin kuituanna:

—Xrokonda xrochrja ngana íjngo nge e tson en, ti nge e sinche e ndo Dio ngajin kain tjajna, kain chujni, kain ngigua ko kain xi tetuan an.

11

Yuu sen xruan an ndo Dio xrochronga nge e tson en

¹ Tjume e kuayá a naa ntaa tjatichuaxinni ko kuituanna:

—Itjia ko tjatichu a ningue ndo Dio ko altar ne e ndo ko tsje e ngijan in sen ste nti a, sen stetajon sen juasie sen ngajin ndo.

² *Ko tjatichua ia ntasien ningue ndo Dio ixi nti a tsayé e ni je a tjajnée ndo Dio, ixi tsetuen en na tjajna Jerusalén ko xrochónde a na juasaya tjajna, níi nano ko tu o.

³ Jan an xroxruan an yuu sen nche e xraña, tseyá sen manta tiie, xrochronga sen chijnina, chijni nduaxin, níi nano ko tu o.

⁴ Kayui sen me e xrochronga chijnina, sen me e kayui ntaa olivo ko kayui candelero ste ngajin ndo Dio, ndo tetuan an nunte xasintajni.

⁵ Ko siá xrojan chujni tjaun sincheni e sen, je e sen tsantsjexin sen ro a sen xro i, xro i tsjaakaxin sen chujni tjaun sincheni e sen ko tsen en na.

⁶ Ko je e sen xrochónda sen juachaxin tsije e sen ngajní ixi tsania i ichrin nchakon xronichja sen chijnie ndo Dio ko xrochónda sen juachaxin ixi sinchekjan sen inda ijni ko sincheni e sen inche ixi itsjé ichin kain nchakon tjaun sen.

⁷ *Tjume e nchakon tsjexin xrochronga sen chijnina, chijni nduaxin, tjume e kuée Xixron anxrée tsachrjexin ba tuye yaso e ko tse to ba ngajin sen ko tsjacha ba naat-sóñaxón ba sen.

⁸ Ko cuerpoe sen tsitsinga ti chaoé tjajna ijié ti tsikoña na Ncháina Jesús nganito ntacru, ko nti a nchekin in na Sodoma ko Egipto.

⁹ Ko níi nchakon ko tu o, kain ni tsixin jée tjajna, ni nichja jée ngigua ko nación tsikonna sen tsiken en sen jitsinga sen ko tsintue a na sen xroxrabaa sen.

¹⁰ Ko ni nunte xasintajni juaxruxin tsintee na tsikon na tsiken en sen, ko sinchéña na kia ko sinchekiton en kichuu na itsjé nge e ixi juaxruxin ste na ixi tsiken en sen, sen tsixruan an ndo Dio, ixi nchakon kuintee je e sen tsango tangi kuintekatsinga na.

¹¹ Ko kuatsinga kaníi nchakon ko tu o, tjume e ndo Dio juinchexechón ndo kayui sen kuachronga chijnie ndo, ko bingatjen sen ko ni bikon tsango xronka na.

¹² Ko kayui sen kuin en sen séen nichja naa ngisen jii ngajní ko ndachro:

—Tajiinta nti i.

Ko je e sen kuajin in sen ngajní, naa itjui juinchengajin in sen. Ko kain ni kuaningakon en sen, bikon na sen.

¹³ *Ko hora me e tsango kontengí nunte, ko texin parte tjajna ijié chjenjin ko yaato mil chujni kuinteken en na. Ko kain ni jichón, ni kuitu e, tsango xronka na ko kuaxi na kuitikaon na ndo Dio jii ngajní ko kuajon na juasie na ngajin ndo.

14 Ña ti kon en yuxin juachjaon ko tuinxin tsii juachjaon nínxin.

Itjao yaatuxin

15 Tjume e yatuxin ángel kuanoa ndo itjao* chóna ndo ko ngajní kuin enni séen nichja itsjé ngisen ndachro:

Kain juachaxien nunte xasintajni tikinixin en ndo Dio ko ngisen kuinche e je e ndo, me e ndo Cristo,
ndo tsetuan an kain nchakon.

16 Ko ngujngu sen ikánoó tachríi ste ngata a ntachaon en sen ngajinxin ndo Dio kuisée sen ko kuajon sen juasie sen ngajin ndo Dio.

17 Ko ndachro sen:

Ncháina ndo Dio, tsango chondanta kain juachaxin.

Ja anta ti ó sa ó bake enta, ti richónnta jai

ko ja anta tsji inta íjngo.

Juasianta ixi juakonanta kain juachaxin chondanta

ko ó kuaxinta kuetuan annta nchijíi nunte xasintajni.

18 Kain chujni ste nunte xasintajni koñao na,

ixi ó kují nchakon ja anta sinchéñanta ijié ngajin na

ko ngajin ni tsiken en.

Ko nchakon me e tsajonnta nge e jian ngajin sen juinche e xráanta, sen kuachronga chijnianta

ko ngajin sen titikaonnta,

chujni tsango tituan an ko chujni na i.

Ko sinchetjáñanta ni juinchetjáña chujni bake e nunte xasintajni.

19 *Tjume e xitje e ntachja ningue ndo Dio ti jii ngajní, ko ngaxin in ni ngo tikonni ti jitjinga nge e tsiketuan an ndo Dio. Ko tsango kongíxin ko tsango juatee ko tsango kontengí nunte ko tsango kuania tuni.

12

Nchri ko kudragón

1 Tjume e konoxin ngajní naa nge e tsango ijié ti chuxin ani: konoxin naa nchri ko manta jiá nchra tóngíxin xranchi chjiixro ko chringi tutée nchra jii nchanitjao. Ko jaa nchra jita a naa corona chóna teyuu nchanotsé.

2 Ko je e nchra yaa nchra ichjan ko tuyako nchra ixi tsango tiín nchra ixi ó sinchejongí e nchra chjen en nchra.

3 Kaxon konoxin ngajní naa nge e ijié ti chuxin ani: naa kudragón játse ko chóna ba yaato jaa ba ko ite nte e ba ko naa corona jita a ngujngu jaa ba.

4 Ko ntané ba bingajinxin ba ti nínxin parte kain nchanotsé jii ngajní ko juanka ba nchanotsé ngata a nunte ko kuíxin ba ngajinxin je e nchra ixi sine ba chjen en nchra tuinxin tsjongí e xjan.

5 Ko je e nchra juinchejongí e nchra naa xjan xi, xjan me e tsetuen en xjan kain tjajna jii nunte xasintajni ixi naa ntakuto chika. Tjume e kuachrje e nchra chjen en nchra, sakjui xjan ngajin ndo Dio ti tetuan an ndo.

6 Tjume e je e nchra sabinga nchra ntajie ko nti a ndo Dio tsijikonchjian ndo no xrobake e nchra ko nti a tayakon en ndo nchra ní nano ko tu o.

7 *Tjume e kuinteke to sen ángel ngajní. Ndo ángel Miguel ko sen ángel tetuen en ndo kuinteke to sen ngajin kudragón ko ni ángel tetuen en ba.

8 Ko ixi juacha i ba íxro an juachaxin chóna ba tsitu e ba ngajní.

* 11:15 itjao Trompeta 11:19 Ap. 8:5; 16:18; Ap. 16:21. 12:7 Jud. 1:9.

⁹ *Méxin kuantsjexin ndo Dio kudragón ngajní, me e kunchee ntaxi nchekin in na Xixron anxrée. Je e xa ncheye e xa chujni ste nunte xasintajni. Je e xa ko kain ni ángel tetuen en xa kuitsinga ngata a nunte.

¹⁰ Tjume e kuin an naa sen séen nichja ngajní ndachro sen:

—Ó kuji juachaxien ndo Dio na ina tsantsje ndo ijiē ko kuji juachaxin tsetuan an ndo Cristo ixi ó kuachrjexin ngajní Xixron anxrée tjankata a ijiē ngajin sen kichuuna, tiie, nchakon, je e xa tankata a xa ijiē ngajin sen, ngajinxin ndo Dio na ina.

¹¹ Sen kichuuna juacha sen ngajin xi me e ixi jnié Xjantuchjon* ko ixi chronga sen chijni kuayé e sen ko xronka i sen maski xrokuen en sen.

¹² Méxin jai juaxruxin tsintee kain sen ste ngajní. Ko lastu sen ste ngata a nunte xasintajni ko kain ti jichón chringi ndachaon ixi Xixron anxrée tsango koñao xa ixi xingajinxin xa ngajní ixi ó no e xa íxro an itsjé nchakon chóna xa.

¹³ Ko ti kono e kudragón ixi ó kuitsinga ba ngata a inche, kuaxi ba rué e ba nchri tsijinchejongí e xjan xi.

¹⁴ Ko ndo Dio kuajon ndo yuu nenechaan kutachikjan ngajin nchra ixi chao tsjanga nchra satsinge e nchra kudragón, satsji nchra ntajie ti no tsikasinchjian ndo Dio ko ntí a tayakon en ndo nchra ní nano ko tu o.

¹⁵ Ko kudragón tsango yee inda kuantsjexin ro a ba ko juinchéña ba naa indajitinga ixi jaña tsingakjin inda nchri me e.

¹⁶ Ko inche bingijna nchra ixi xitje e nche, nti a bikia inda kuachrjexin ro a kudragón.

¹⁷ Tjume e tsango koñao kudragón ngajin nchra, méxin ikjui ba kuē tō ba ngajin ni kichuu nchra, ngajin sen titikaon nge e tsiketuan an ndo Dio ko xratitikaon sen chijnie ndo Jesucristo.

¹⁸ Ko ti kudragón chón en ba ngande e ndachaon.

13

Yuu iko jie e tsango chjinga ste

¹ *Hora juasin ngande e ndachaon, bikon kuachrjexin ndachaon naa iku tsango chjinga jii, iku me e chóna ba yaato jaa ba ko ite nte e ba, ko ngujngu nte e ba chóna naa corona ko ngujngu jaa ba chóna naa chijni nichjangí e ndo Dio.

² Iku tsango chjinga jii bikon jii ba xranchi naa kutigre ko tutée ba ste xranchi tutée kuoso ko ro a ba jii xranchi ro a kujenda. Ko kudragón kuajon ba kain juachaxien ba ngajin iku tsango chjinga jii.

³ Ko naa jaa iku tsango chjinga tsango tsikoni e, xraxrokuenxin ba ixi ti tsikoni e me e, ko ó tsikoxruen en ba. Ko kain chujni ste nunte xasintajni tsikikon na ixi tsikoxruen en ba, méxin juaxruxin rué e na ba.

⁴ Ko kuajon na juasaya ngajin kudragón ixi je e ba kuajon ba juachaxin ngajin iku tsango chjinga jii, ko kaxon kuajon na juasaya ngajin iku tsango chjinga jii ko ndachro na:

—¿Ngisen xrokjui xranchi iku tsango chjinga ko ngisen xrojuacha ngajin ba?

⁵ Ko iku tsango chjinga kuayé e ba juachaxin xronichjangí e ba ndo Dio ko kain nchakon tsetuan an ba yuu kán ko yuu nchanitjao.

⁶ Ko jaña juinche e ba, nichjangí e ba ndo Dio ko nichjangí e ba xranchi tin in ndo ko ti jii ndo ko kain sen ste ngajin ndo.

⁷ Kaxon tsikayé e ba juachaxin tsetoka o ba sen titikaon ndo Dio ko tsjacha ba tsetuen en ba sen, ko kuayé e ba juachaxin tsetuen en ba kain chujni, kain tjajna, kain ngigua ko kain nación.

⁸ Kain ni nunte xasintajni kuajon na juasaya ngajin iku tsango chjinga jii, kain ni jitaxin a xranchi tin in na ngaya xroon ti jitaxin kain sen tsechón kain nchakon ti xrako a nunte xasintajni, me e xroen Xjantuchjon, Xjantuchjon tsikajon ndo Dio kuen en.

⁹ Ngisen chao tsin en, xrokonda tsin en sen.

¹⁰ Ni tije e ndo achjiso inaa chujni, kaxon je e na tikinixin tsije e na ko ni naatóñaxón naa chujni ixi chika espada, kaxon je e na chika espada tsenxin na. Ji i xrondachro ixi sen tjajnée ndo Dio tsikixin en sen tsatsinga sen kain ti tangi ko tsintue a sen xrochuntia sen ndo Dio.

¹¹ Tjume e bikon kuachrjetaon inche inaa iku tsango chjinga jii, chóna ba yuu nte e ba xranchi nte e kutuchjon ko nichja ba xranchi nichja kudragón.

¹² Iku yuxin tsango chjinga jii chóna ba kain juachaxin xranchi juachaxin kuachóna iku sa ó ko kuanche e ba xrée iku chjinga jii sa ó. Nchekateya ba kain chujni jii ngata a nunte xasintajni xrokuajon na juasaya ngajin iku tsango chjinga jii sa ó, iku tsikoxruen en ti tsikoni e ba.

¹³ Kaxon juinche e ba itsjé ixra ijié xranchi ti xingajinxin ngajni xro i ngata a inche ngajinxin ikon kain chujni.

¹⁴ Iku yuxin tsango chjinga jii juincheye e ba itsjé chujni ixi ti ixra ijié juinche e ba ixi tsikayé e ba juachaxin tsikajon iku sa ó tsango chjinga jii, ko juincheateya ba chujni ixi sinchéña na naa tjatu o xrotsje e xranchi jii iku sa ó, iku tsikoni e ixi chika espada ko kuen a ba.

¹⁵ Ko iku yuxin tsango chjinga jii kuayé e ba juachaxin ixi tjatu o tikonni xranchi iku sa ó tsijinchekonchjian chujni, tsayé e juachaxin tsechón ixi jaña chao xronichja ba ko chao tsetuan an ba ixi tsen en kain ni tsajon a juasaya ngajin ba.

¹⁶ Kaxon kuetuan an ba ixi kain chujni xrochóna na naa chji e na, itja na ti jian o ntatjen na, kain chujni, ijié ko ichjan, ni chóna tomi, ni nóa ko ni nchejinche e na ixra, ko ni tetuan an, kain na xrochóna na chji e na.

¹⁷ Ko xro an ngisen chonda juachaxin tse na o sinchekji siá chóna i na chji e na, ti xrondachro xranchi tin in iku tsango chjinga jii o númeroe ba.

¹⁸ Ji i xrokonda ícha xrokuienxinnta. Ngisen tienxin chao xrokono e sen número chóna iku tsango chjinga jii ko número me e xrondachro xranchi tin in chujni, número me e ikjaon ciento sesenta y seis (666).

14

Soon xrotsje ciento cuarenta y cuatro mil chujni

¹ *Tjume e jan an bikon Xjantuchjon jixin tutée xjan ngata a ijna Sión. Nti a jikao ndo ciento cuarenta y cuatro mil chujni jitaxin ntatjen sen nombrée Xjantuchjon ko nombrée Ndotée ndo.

² Ko kuin an naa ngisen nichja, té sen kuixin ngajni, tin enni xranchi xroin yee inda jitinga o xranchi séen tjateé, ko xranchi tin enni ti ste kueya sen, sen stetinga sen arpa.

³ Ko stetsje sen naa soon natjúa tjenka trono, ti ste noó sen jichón ko sen ikán ko no tachríi. Xro an ngisen chóna juachaxin chao xrotsje soon me e; je o sen ciento cuarenta y cuatro mil, sen tsikayé e juachaxin tsechón kain nchakon ti xrabake e sen nunte xasintajni.

⁴ Sen ji i ó kuachóna i sen inaa nchri je a janchri e sen ko tsango tjúa aséen sen, ko kuarue e sen Xjantuchjon nguixin ti no bakaji ndo. Sen ji i kuinche e ndo Dio sen xranchi naa nge e sa ó xrokuayé e ndo ko Xjantuchjon.

⁵ Je e sen nai a juincheya sen ko xro an nge e ti ndako a juinche e sen, je e sen tjúa aséen sen.

Nge e chronga ní sen ángel

⁶ Tjume e bikon inaa ndo ángel jitjanga ngusine ngajní jichrónga ndo chijni jian, chijni nai a tsjexin, ti tsin en kain ni nunte xasintajni ko tsin en kain nación, kain chujni, kain ngigua ko kain tjajna.

⁷ Ndo ángel me e séen kuyako ndo ko ndachro ndo:

—Xrakuen anta ndo Dio ko tájonnta juasaya ngajin ndo ixi ó kuij nchakon sinchéña ndo ijie. Tájonnta juasaya* ngajin ndo, ndo juinchéña ngajní ko nunte xasintajni ko ndachaon ko no jitonoxixin inda.

⁸*Tjume e kuij inaa ndo ángel, ko ndachro ndo:

—Ó kuitjáña, ó kuitjáña tjajna Babilonia, tjajna ijié. Ni tjajna me e juincheKateya kain nación xrokui i na vino, ko tjume e juinche e na kain ti ndako a, ti chóna na inaa nchri je a janchri e na.

⁹ Tjume e konoxin ndo ángel nínxin ko séen nichja ndo:

—Siá xrojan ngisen tsajon juasaya ngajin iku sa ó tsango chjinga jii ko ngajin tjatu o tsikachrjeya ba o kaxon siá tsituexin na tsayé e na chji e ba ntatjen na o itja na,

¹⁰ méxin tsayé e na kain juañaue ndo Dio ko tsango tangi tson en na. Tsikaonxin na ngajinxin sen angéel ndo Dio ko ngajinxin Xjantuchjon ixi xro i ko ixi azufre jiche.

¹¹ Inchi tachrjexin xro i nai a tsjexin nchi. Kain nchakon tsajin in i nchi ko ni kuitikaon iku sa ó tsango chjinga jii ko tjatu o tsikachrjeya ba ko kaxon ni jitaxin ngata a xranchi tin in ba, tiie, nchakon jua i tsjoké e na.

¹² Méxin nchakon tsij ji i xrokonda sen titikaon ndo Dio tsikixin en sen tsatsinga sen kain ti tangi, ko tsintue a sen xrochuntia sen ndo ko tsitikaon sen nge e kuetuan an ndo ko xrokonda tsjako sen ixi chuntia sen ndo Jesús.

¹³ Tjume e kuin an naa téé sen nichja kuixin ngajní ko ndachro:

—Ikjian ji i: “Jai xrangíxin juaxruxin tsake e sen titikaon Ncháina ko tsen en sen.”

Jaán, ndachro Espíritue ndo Dio, ixi je e sen tsjoké e sen, ísinche a sen ixra tangi kuanche e sen ixi ndo Dio tsjenge e ndo sen na ixi ti jian ixra juinche e sen.

Xrangíxin xroxraka nge e kóna ngata a nche

¹⁴ Tjume e bikon naa itjuj tjúa ko nti a jita a naa ndo jitsje e xranchi Chjen en ndo Dio, xjan jongí e xranchi chujni, ko naa corona chika oro jita a jaa ndo ko yaa ndo naa joso tsango yao.

¹⁵ Tjume e inaa ndo ángel kuachrjexin ndo ni ngo ko séen nichje e ndo ngisen jita a itjuj ko ndachro ndo:

—Tjangíxian tonchrijian ixi joso ixi ó kuij nchakon tsandáa ixi ó tsicha nge e tsikoña nunte xasintajni.

¹⁶ Ko ndo jita a itjuj juincheKatsinga ndo joso nguixin nunte xasintajni ko juá ka ndo nge e tsikoña.

¹⁷ Tjume e inaa ndo ángel kuachrjexin ndo ni ngo jii ngajní ko kaxon tikao ndo naa joso tsango yao.

¹⁸ Ko ti altar kuachrjexin inaa ndo ángel, ndo me e tetuan an ndo xro i ko séen ndache ndo ndo ángel chóna joso yao:

—Tonchrijian ixi joso yao itsjé tu uva tsikoña nunte xasintajni ixi ó tsichje itu.

¹⁹ Ko ndo ángel juincheKatsinga ndo joso ngata a nunte ko konchrinjin ndo tu uva tsikoña nunte ko bengachjian ndo tu ti no tseeneni tu. Ji i xrondachro, ndo Dio toña ndo ngajin chujni.

²⁰ *Ko kuayáa na tu uva ngande e tjajna ko ti no kuenexin na tu kuachrjexin tsango yee ijni, kuiji ijni noi ti jikaxin chika teya ro a kunxin ko ní ciento kilómetro binga ijni.

* **14:7 juasaya** respeto, honor **14:8 Ap. 18:2.** **14:20 Ap. 19:15.**

15

Yaato ángel ko yaato ichin tsjexixin tsoníexin chujni

¹ Bikon ngajní inaa ixra ijié: yaato ndo ángel chóna ndo juachaxin ngajin yaato ichin tsoníexin chujni nunte xasintajni. Ji i xrondachro tsango jitoñaao ndo Dio.

² Kaxon bikon naa nge e xranchi naa ndachaon tsikjan xranchi xroxrao tsintekjanxin ixi xro i. Tjenka nti a siin sen juacha kuatsinga kain nge e juinche e iku tsango chjinga jii ko ti tsikachrjeya xranchi je e ba ko kaxon número xranchi tin in ba. Sen me e siin sen ngata a ndachaon ko stesé sen arpa tsikajon ndo Dio ngajin sen.

³ Ko itsje sen soon kuantsje ndo Moisés, ngisen juinche e xrée ndo Dio, ko sóen Xjantuchjon, ndachro:

Tsango ijié nge e nche enta

ko tsango jian kain nge e tsijinchéñanta.

Ja anta Nchána ndo Dio, ndo chóna kain juachaxin.

Ndako ko nduaxin chao nche enta kain nge e.

Ja anta Rey tetuan annta kain nchakon ngata a nunte xasintajni.

⁴ ¿Ngisen xroxrakon a ngajinnta, Nchána?

¿Ngisen tsajon a juasaya ngajin ja anta?

Je o ja anta tsango tjúanta.

Kain ni nchijí nunte xasintajni tsajon na juasaya ngajinnta

ixi bikon na kain ixra jian tsijinche enta.

⁵ Tjume e bikon ngajní ko nti a xitje e ni ngo ti jitinga nge e tsiketuan an ndo Dio.

⁶ Ko ni ngo kuachrjexin yaato ndo ángel tikao sen yaato ichin. Steyá ndo manta tjintee tjúa ko chaxro tóngíxin ko steteyá ndo cinta chika oro.

⁷ Naa sen noó stechón kuajon naa copa jitjiá vino kuayé e nguju yaato ndo ángel, ko yaato copa me e xrondachro ti toñaao ndo Dio, ndo jichón kain nchakon.

⁸ Ko ngaxin in ni ngo kaon i nchi ti ti xín ti ijié juachaxin chóna ndo Dio ko xro an ngisen chóna juachaxin tsatsinga ngaxin in ni ngo tsatsingaja ti yaato ichin tikao ti yaato ndo ángel.

16

Yaato copa tjinga juañaue ndo Dio

¹ Kuin an naa té sen nichja tsango séen kuixin ni ngo, ko ndache sen yaato ndo ángel: —Itjinta ko tjintjinta ngata a nunte xasintajni ti jitjiá yaato copa juañaue ndo Dio.

² Tjume e ndo ángel sa ó kuii ndo ko kuintjí ndo ti jitjiá copee ndo ngata a nunte xasintajni ko ngata a kain chujni chóna chji e ne e iku tsango chjinga jii, ko ni bakajon juasaya ngajin ti tjatu o tsikachrjeya ba, ko ti tjía copa me e naa ichin ña i ko tsango ixra chin.

³ Ndo ángel yuxin ikjui ndo ko kuintjí ndo ti jitjiá copee ndo, ngata a ndachaon ko ndachaon ikjan inda ijni, xranchi jnié naa ti tsiken en ko kain nge e jichón ngangí ndachaon nda kuen en.

⁴ Ko ndo ángel ninxin kuintjí ndo ti jitjiá copee ndo ngata a ndajitinga ko ngata a ti no jitonoxixin nda ko ikjan nda ijni.

⁵ Tjume e kuin an nichja ndo ángel tetuen en inda ko ndachro ndo:

—Ndo Dio jian ja anta. Ncháina tsango tjúa ja anta, ndo Dio, ndo jichón sa ó ko ndo jichón jai ko ndo jian nchéña ijie,

⁶ ixi ni ningakon annta kóna na sen kuachronga chijnianta ko sen tjúa aséen, méxin jai ja anta tájonnta ijni tsi i na ixi kondeexin ti ndako a juinche e na.

⁷ Kaxon kuin an té naa sen kuixin altar ko nichja sen:

—Ja anta nduaxin Ncháina, ndo Dio, ja anta chondanta kain juachaxin ko jian ko ndako nchéñanta ijie.

⁸ Tjume e ndo ángel noóxin kuintjí ndo nge e jitjiá copee ndo ngata a chjiixro, ko chjiixro kuayé e juachaxin sinchehján kain chujni ixi xro i.

⁹ Kain nā tsango ichján nā ko maski jaña kuintekon en nā, kuitikaon a nā ndo Dio ko kuajon a nā juasaya ngajin ndo; cháña nichjangí e nā xranchi tin in ndo, ndo chóna juachaxin ngata a kain ichin me e.

¹⁰ Tjume e ndo ángel na óxin kuintjí ndo ti jitjiá copee ndo ngata a trono ne e iku tsango chjinga jii. Tjume e ti no baketuanxin iku tsango chjinga jii, nti a konaxixe e. Ko chujni juinetja nā nejen nā ixi tsango tiín nā.

¹¹ Ko ixi tsango tiín nā ko tsango tangi kon en nā, ni me e kuintue a nā ti ndako a banche e nā ko ícha nichjangí e nā ndo Dio, ndo jii ngajní.

¹² Tjume e ndo ángel inkjaoxin kuintjí ndo ti jitjiá copee ndo ngata a ndajitinga ijié ndatin in Eufrates. Ko nda me e xema inda ixi chao tsintekatsinga xi rey tsí xín chjuya.

¹³ Ko bikon ixi ro a kudragón, ro a iku tsango chjinga jii ko ro a xi ndako a bajako kuachrjexin ní espíritu ña i tikonni xranchi kurrána.

¹⁴ Espíritu ji i, espíritue Xixron anxrée kuanche e ixra ijié. Kuintekachrje espíritu ji i ixi tsja o kain xi rey ste nunte xasintajni ixi tse tō xa nchakon ndo Dio sinchéña ndo ijié ngajin kain chujni, ni ste nunte xasintajni.

¹⁵ *Méxin ndo Dio ndachro ndo: “Jan an ó tuinxin tsji i xranchi naa xiche e. Juaxruxin tsintee sen tejua i ko stejá mantée sen ko je a turuchu ste sen, ixi jaña tsosue a sen ixi turuchu ste sen.”

¹⁶ Ko espíritu ña i jua o kain xi rey nunte ndatin in Armagedón, ngigua Hebreo xrondachro ji i.

¹⁷ Tjume e yatuxin ndo ángel kuintjí nge e jitjiá copee ndo ngataon chrinto, ko ngaxin in ni ngo jii ngajní kuin enni naa té sen nichja tsango séen ndachro:

—Ó juexin kon en kain nge e.

¹⁸ *Ko kongíxin ko kuin enni tsango séen juatee ko tsango kontengí nunte xranchi nai a bikon chujni kontengí nunte.

¹⁹ Ti tsango soji kontengí nunte ní xitje e inche tjajna Babilonia ko kain tjajna jié ste nunte xasintajni chjenjin tjajna. Ko ndo Dio xraxaon ndo ixi xrojuinchení e ndo ni tjajna Babilonia ko tsango juincheni e ndo nā ixi tsango koña ndo ngajin nā.

²⁰ *Ko kain nunte ste ngusine ndachaon ko ijna naakuitjáñaxón.

²¹ *Ko ngajní kuaniaxin tuni tsango ndantua, xranchi yuu kán kilo yexin ngujngu tuni. Ko chujni ícha nichjangí e nā ndo Dio ixi jaña kon en, ixi xratja nā tuni.

17

Tsikaon nchri chóna itsjé xi

¹ Ti yaṭo ndo ángel chóna yaṭo copa, naa ndo me e ndachro ndo:

—Xrokuia ko tsjako a xranchi tsikaon nchri chóna itsjé xi, nchri jii ngata a ndachaon.

² Xi rey tetuan an nunte xasintajni kuejuakao xa nchra, juinche e xa ti ndako a ko ni nunte xasintajni koanxin nā ixi vino tsikajon nchra ngajin nā ko ndakua i juinche e nā.

³ *Tjume e Espíritue ndo Dio juinchenoxin ndo naa nge e bikon ko ndo ángel biki an ndo ntajie ko bikon naa nchri jita a naa iku játse tsango chjinga jii, ko nchijí ba jitaxin chijni nichjangíexin nā ndo Dio ko chóna ba yaṭo jaa ba ko ite nte e ba.

⁴ Ko je e nchra jiá nchra manta tiie játse ko kaxon játse, ko tsikitsojin nchra kueya nge e tsikónaxin chika oro ko ixro chaxro tsango tjintee ko kaxon ixro perla. Ko ngaya itja nchra jiá naa copa chika oro jichrexin ijié ko ti ndako a ko kain ti ña i tsijinche e nchra.

⁵ Ko ntatjen nchra jitaxin naa chijni xro an ngisen tienxin ko ja in jitaxin: “Tjajna ijié ndatin in Babilonia, me e xrokjui xranchi janée kain nchri tejuakao itsjé xi ko kain ni nche e ti ndako a jii nunte xasintajni.”

⁶ Ko bikon ixi je e nchra tsikoan nchra ixi jnié kain sen titikaon ndo Dio ko sen tsiken en ixi kuachronga sen ti titikaon sen ndo Jesús. Ti bikon ji i tsango juinchexronkana.

⁷ Tjume e naa ndo ángel ndachijina ndo:

—¿Sonda xronka? Jan an xrontatjua nge e xrondachro ti nchri ji i ko ti iku tsango chjinga jii jita a nchra chóna ba yaato jaa ba ko ite nte e ba, ji i xro an ngisen no e.

⁸ *Iku tsango chjinga jii bikuan ó seno bake e ba ko jai íko a ba. Ko iku me e ó mero tsachrjexin ba tuye yaso e ko ti naxixe e ko je o tsachrje ba ixi ndo Dio sinchetjáña ndo ba. Ko ni ste nunte xasintajni, ni jitaxin a xranchi tin in na ngaya xroon, xroon ó jitaxin xranchi tin in sen tsechón kain nchakon, xroon me e ó jii xroon nchakon xro an nge e bake e ngata a nunte xasintajni, je e ni me e xroxronka na hora tsikon na ba íjngo iku tsango chjinga jii; iku me e ó seno bake e ba, ko jai ko a ba ko xrokjan tsij ba.

⁹ Ngisen chao tsienxin ji i xrokonda jian tsienxin sen: Ti yaato jaa ba xrondachro ti yaato ijna jita a nchri chóna itsjé xi.

¹⁰ Ko kaxon ti yaato jaa ba xrondachro yaato xi rey, ko na ó xi rey me e ndakuen en xa ko naa xi rey xrajitetua an xa ko í naa xi rey xrati a xa. Ko nchakon tsij xi rey me e, tsjé a nchakon tsetuan an xa.

¹¹ Ko iku tsango chjinga jii ó bake e ba seno ko jai tikon ani ba, me e ti jnixin xi rey; je e xa tikinixin en xa ti yaato xi rey ko xi me e tsitjáña xa.

¹² Ko ti ite nte e ba bikuan me e ite xi rey xrati a nchakon tsinteketuan an xa. Ko tjume e tsintekayé e xa juachaxin, xranchi naa hora tsetuan an xa ko kaxon tsetuan an iku tsango chjinga jii.

¹³ Kain ite xi rey ji i naakua naa nge e xrondachro xa ixi tsajon xa juachaxin ícha tsetuan an iku tsango chjinga jii.

¹⁴ Kain xi me e tseto xa ngajin Xjantuchjon ko Xjantuchjon* tsjacha xjan ngajin kain xi me e ixi je e ndo Nchéé kain chujni ko je e ndo naa Rey tetuen en kain xi rey. Ko sen ste ngajin ndo, ndo Dio tsikiye e ndo sen ko kuinche e ndo sen, ko sen me e jian chuntia† sen ngajin ndo.

¹⁵ Kaxon ndachijina ndo ángel:

—Ndachaon bikuan, nda jita a nchri chóna itsjé xi, me e xrondachro kueya tjajna, kueya chujni, kueya nación ko kueya ngigua.

¹⁶ Ko ti ite‡ nte e iku tsango chjinga jii bikuan ko je e ba xraningakon en ba nchri chóna itsjé xi, tsjánka ba nchra ko sinchetorucho ba nchra ko sine ba ntau e nchra ko tsjaaka ba nchra ixi xro i.

¹⁷ Ixi ndo Dio bake e ndo ngaya aséen kain xi rey me e sinche e xa ti tjaun je e ndo, jaña naakua nge e xrondachro xa ixi tsajon xa juachaxien xa ngajin iku tsango chjinga jii, ti xroxetjaja nchakon tson en kain nge e tsindachro ndo Dio.

¹⁸ Nchri bikuan, me e tjajna ijié tetuen en kain xi rey jii nunte xasintajni.

18

Kuitjáña nchijí tjajna Babilonia

¹ Tjume e bikon inaa ndo ángel xingajinxin ndo ngajni, je e ndo tsango chóna ndo juachaxin, ko nunte xasintajni tsango bingasáña ixi tóngixin ndo ángel me e.

² *Ko tsango séen kuyako ndo ángel ko ndachro ndo:

—Kuitjáña, ó kuitjáña tjanya ijié, tjanya Babilonia. Nti a ikjan ndo a ni ña i ko nti a jii kain espíritue Xixron anxrée. Nti a ste kakée iko ña i, iko tjanga ko tsango tonchi eni.

³ Kain tjanya koanxin nã ko juinchetjáñajin nã ixi vino ndakoa juinчекji nchra, ko kain xi rey nunte xasintajni kuejuakao nã nchra juinche e nã ti ndako a. Kain ni te na ko nчекji itsjé juacha nã me juinchetjáña aséen nã.

⁴ Tjume e kuin an inaa ngisen nichja téе kuixin ngajní ko ndachro:

—Tachrjexinnta ñã ixi ja anta titikaonntana ixi tsama inta jíee nã ko ja anta tsikaon anta ko xro an nge e tson annta xranchi tson en je e nã.

⁵ Ixi tsango itsjé ti ndakoa juinche e nchri me e, ko kuiji ijié me e ngajní. Kain ti ndako a kain ña i kuanche e nchra, méxin koñao ndo Dio ixi xraxaon ndo kain ji i.

⁶ Chjé énta nchra xranchi je e nchra juinche e nchra ngajin ikaxin nã. Kain ti juinche e nchra yuu tjenge enta nchra nã. Ko ti copa juinчекonchjian nchra ixi vino ndakoa, jaña yuu tikie enta nchra kaxon.

⁷ Je e nchra tsango juinchejié aséen nchra ixi kuachónда nchra kain nge e tjaun nchra, méxin jai ícha ijié juachjaon tsatsinga nchra ko tsango xrotsjanga nchra. Ixi je e nchra ndache aséen nchra: “Nti i ritjén xranchi naa nchri tsango tituan an, ixi je a kán ana ko nai a tsikon ti tangi.”

⁸ Méxin naakua nchakon tsji kain juachjaon ngata a nchra, ko tangi tson en nchra, juachjaon ko jinta tsatsinga nchra ko tjume e xro i xrohexin nchra ixi Ncháina ijié juachxin chonda ndo ko sinchéña ndo ijié ngajin nchra.

⁹ Kain xi rey ste nunte xasintajni, xi kuejuakao nchra ko kaxon juinche e xa ti ndako a xranchi je e nchra, chinga tsono e xa ko xrotsjanga xa ko tsuyako xa ixi tsikon xa i nchi jitachrje ti jichexin nchra.

¹⁰ Xroxronka xa méxin ikjín tsikonxin xa xranchi jitikaon nchra ko tsuyako xa ko xrondachro xa:

—Lastua ja a tjanya ijié, tjanya Babilonia, tjanya tsango baketuan an. Lastua ixi tsango taka kuitjáña juachxin kuachonda ja a, ixi naakua hora tsonchrjen en ti tsjenga nã ja a ixi nge e juinche e.

¹¹ Ko ni te na ko ni nчекji xrotsjanga nã ko tsuyako nã ixi tjanya me e, ixi xro an ngisen tse na nã nge e kuanчекji nã,

¹² chika oro, chika plata ko ixro tjintee ko chaxro tsje e, ixro perla, manta lino tsango chaxro, manta seda játse tiie ko kaxon kain ntaã, ntaã chaxro xraxe ko nge e tsikóñaxin neno kuelefante, chika ko chika bronce ko ixro mármol.

¹³ Kaxon ntaã canela ko xroan chaxro xraxe, tsjoxraxé, xroan mirra, vino, aceite, kueen jian tsikontsinga, ko noa trigo ko kutama, kutuchjon, kunxin, carreta, ko chujni nchenche e nã xra.

¹⁴ Ko xrondaché nã tjanya me e tjanya Babilonia:

—Í chonda ia kain nge e tjintee kuachonda ko kain ti icha tjakuenxian, ko juinchetjáña kain ti tjintee kuachonda, ko ínai a tsinchia.

¹⁵ Kain ni bakena a nge e kuachonda, ni juacha itsjé tomi ixi nge e bake na nã ko nge e banchekjina ngajin tjanya me e, ikjín tsikonxin nã kain juachjaon tson en tjanya me e ko xroxronka nã. Xrotsjanga nã ko tsuyako nã.

¹⁶ Ko ja in xrondachro nã:

—Lastu tjanya ijié. Tjanya bake e xranchi naa nchri tsikitsá ixi manta lino tsango chaxro, manta játse tiie ko tsikitsojin nchra ixi ntachika oro ko ixro tsango chaxro ko tsango tjintee ko xro perla.

¹⁷ Naakua hora kuitjáña kain nge e tjintee kuachónда nchra.

Ko kain ni teka ntabarco, ni bakjixin ntabarco ko ni nche e ixra ngaya ntaã me e, ikjin kuixin nã.

¹⁸ Ko nchakon bikon nã i nchi kitachrje ti jiche tjanya, kuyako nã:

—¿Ngixe e íjngo tjanya bake e xranchi tjanya ijié ji i?

¹⁹ Ko bikitée nã nteso ki i ngata a jaa nã ko tsango juincheni e nã, méxin tsango kuyako nã ko tsjanga nã ko ndachro nã:

—Lastu tjanya ijié tjanya Babilonia. Nti a chujni kuachóna ntãbarco tsango itsjé tomi juacha nã, ixi tjanya me e itsjé ti tjintee kuachonda tjanya ko jai naakua naa hora ó naajuexinxion kuitjáña kain nge e.

²⁰ Juaxruxin tinteenta ja anta ti tjúá asáanta ko sen ste ngajní sen kuarue e Ndo ko sen kuachronga chijnie ndo Dio ixi je e ndo ó juankata a ndo ijié ngajin tjanya me e, ixi jaña ó kóña anta ijié.

²¹ Tjume e naa ndo ángel chóna ijié juachaxin kua ndo naa ixro tsango ijié xranchi naa xrochri, ko juanka ndo xro chringi ndachaon ko ndachro ndo:

—Jaña naxrajeo tsitjáña tjanya Babilonia, tjanya ijié ko ínai a tsikon chujni tjanya me e.

²² Nai a tsin enni suen arpa, ko suen ntaxro, suen itjao* ngaya chaoa, ko nai a tsikonni chujni nche e xrã ngajian ko kaxon nai a tsin enni xranchi xroin xrochri nchetsinga ngajian.

²³ Ko ínai a tsingasáña xro i ngajian ko nai a tsin enni tsute e chujni nti a. Ixi ni bakena a nge e juinчекjia, ni tsango baketuan an nunte xasintajni ixi itsjé tomi juacha nã ko ixi ichin tuso juinчeyexin nã kain nación.

²⁴ Ko nti a kuchuexin jnié sen tsiken en, sen kuachronga chijnie ndo Dio, ko sen tjúá aséen ko sen kuarue e ndo ko kain ni kuinteken en kondeexin tjanya ji i, ni kuintee ngata a nunte xasintajni.

19

Itsje sen ngajní

¹ Ko kuatsinga ji i, tjume e kuin an nichja kueya chujni ste ngajní ko séen nichja sen, ndachro sen:

¡Juasaya!

Juasie ndo Dio ixi je e ndo kuajon ndo juachaxin stechónna ko je e ndo tsango tetuan an ndo.

² Ixi je e ndo tsango jian ndo

ko jian nchéña ndo ijié;

méxin juinчejenga ndo nchri kuejuakao kueya xi ixi tsango ndako a juinche e nchra,

ixi je e nchra juinчekateya nchra itsjé chujni nunte xasintajni,

méxin ndako a juinche e nã,

ko ndo Dio jai juenge e ndo

ixi kondeexin nchra kuen en sen kuanche e xrã ngajin ndo.

³ Ko íjngo ndachro sen:

—¡Juasaya! ¡Juasie ndo Dio! Ixi i nchi jitachrexin ti jiche nchra nai a tsjexin tsachrje nchi.

⁴ Tjume e sen ikán no tachríi ko sen noó stechón bake exin ntatuchi in sen ko kuisée sen, ko kuajon sen juasaya ngajin ndo ndo Dio ndo jita a trono ko ndachro sen:

—¡Jaña tson en! ¡Juasaya ko juasie ndo Dio!

⁵ Tjume e kuin an tée naa sen nichja kuixin ti jii trono ko ndachro:

Tájonnta juasaya ngajin Ndotáina Dio,

kain sen nche e xrée ndo,

kain sen jo on ko kain ichjan.

Kia ixi tsute e Xjantuchjon

⁶ Kuin an xranchi xronichja kueya chujni, xranchi tin enni xroin ye e inda jitinga ko xranchi ti séen tjateé jindachro:

* 18:22 itjao Trompeta

—¡Juasaya! Juasie Ncháina Dio,
ixi ó kuaxi tetuan an ndo,
ndo chónnda kain juachaxin.

⁷ Juaxruxin tsojuna,
ko xroché e aséeina
ko chaxro tsajonna juasaya ngajin ndo
ixi ó kuji nchakon tsute e Xjantuchjon.
Ko jan tsute e xjan ó tsikonchjian jan.

⁸ Ko je e jan kuayé e jan juachaxin tsitsáa jan manta lino chaxro tjúá ko chaxro tóngíxin.
Ko manta lino me e xrondachro ti jian juinche e sen tikinixin en ndo Dio.

⁹ *Tjume e ndo ángel ndachijina ndo:

—Ikjian ji i: “Juaxruxin tsintee sen kuayé e juachaxin tsake e sen ti kia tsute e Xjantuchjon.”

Ko ja in ndachro ndo ángel:

—Ji i ndachro ndo Dio, ko kain ti ndachro ndo me e nduaxin.

¹⁰ Tjume e jan an bake exin ntatuchi in tutée ndo ángel ixi tja on tsajon juasaya ngajin ndo, ko je e ndo ndachro ndo:

—Nche a jaña ixi jan an kaxon nta a xra ngajin ndo Dio xranchi ja a, ko xranchi sen kichuua sen kuintue a kuitikaon chijni jian chronga ndo Jesús. Je o tájuan juasaya ngajin ndo Dio.

Ixi je e ndo Jesús, me e xrondachro ti kuachronga sen kuanichja ó sa ó chijnie ndo Dio.

Ndo jita a naa kunxin tjúá

¹¹ Tjume e jan an bikon jixrange e ngajni ko nti a jii naa kunxin tjúá, ko ndo jita a ba ndatin in ndo tsango Jian ko Nduaxin, ixi je e ndo jian nchéña ndo ijie ngajin chujni ko te to ndo ngajin ti ña i.

¹² Ikon ndo jitóngíxin xranchi xro i, ko jaa ndo jita a kueya corona ko nti a jitaxin xranchi tin in ndo ko je o je e ndo tienxin ndo me e.

¹³ Jitsáa ndo naa manta yaa ijni ko ti xranchi tin in ndo me e xrondachro Chjen en ndo Dio.

¹⁴ Ko sen ángel te to ste ngajni tikinixin en ndo, sen me e stetsáa sen manta lino tjúá ko tsango tjúá manta me e ko sterué e sen ndo ko ngujngu sen steta a sen kunxin tjúá.

¹⁵ *Ko ro a ndo jitachrjexin naa chika espada tsango yao, ko chika me e sincheníexin ndo kain nación ko sincheñexin ndo na ijie ixi naa ntakuto chika, xranchi ngisen tene tu uva ixi tutée sen, ko sincheki i ndo na juañaue ndo Dio ndo chónnda kain juachaxin.

¹⁶ Ko manta jitsáa ndo jitaxin:

“Je e ndo Rey tetuen en kain xi rey ko je e ndo Nchée kain chujni.”

¹⁷ Tjume e bikon naa ndo ángel siin ndo ti jii chjiixro ko séen kuyaku e ndo kain kuxe jitjanga ngusine ngajni:

—Xrokuiinta ko xra onta ixi ndo Dio jai tsajon ndo sintenta.

¹⁸ Sintenta ntau e xi rey, ntau e xi tituan an chujni te to, ntau e ni jie e, ntau e kunxin ko ntau e ni jita a ba, ko ntau e kain chujni, chujni tetuan an ko chujni nchín nche e na xra ko kaxon ntau e ichjan ko ntau e ni tsicha.

¹⁹ Tjume e bikon iku tsango chjinga jii ko xi rey tintekitua an nunte xasintajni ko chujnie xa tsixra o ixi tsintekte to na ngajin ndo jita a kunxin ko ngajin chujnie ndo.

²⁰ *Ko itsé sen iku tsango chjinga jii ko kuintee sen ba ko kaxon xi ndako a bajako chijnie ndo Dio, ko bancheye e xa chujni ixi kaxin ixra ijie juinche e ngajinxin ikon iku tsango chjinga jii, jaña kuancheye e xa chujni tsikaa chji e ba, ni kuakajon juasaya ngajin tjatu o tsikachrjeya ba. Ko iku tsango chjinga jii ko xi ndako a bajako chijnie ndo Dio ngayui jichón juanka ngi sen ngangí nda jichexin ixi azufre.

²¹ Ko ikaxin chujni kuenxin nā ixi chika espada kuachrjexin ro a ndo jita a kunxin, ko kain kuxe, konkje e ba ixi juine ba ntau e chujni me e.

20

Naa mil nano

¹ Tjume e bikon naa ndo ángel xingajinxin ndo ngajní jitsé ndo chika xitjeexin ntachje e tuye yaso e ko naxixe e ko itja ndo jitjikaoxin ndo naa no chika ijié.

² Ko ndo ángel itsé ndo kudragón ko kaxon ndatin in ba kunchee ntaxi, me e Xixron anxrée, ko kuenchruaxin ndo xa ixi nochika naa mil nano.

³ Ko juankaya ndo xa ngaya tuye yaso e ko naxixe e ko bije e ndo xa ko kaxon bije e ndo tuye yaso e ko naxixe e ko bake e ndo chji e ndo ixi jaña ísincheye a xa kain nación xroxetjaja mil nano. Ko tsatsingaja mil nano, tjume e xroxindange e xa ikaxin nchakon.

⁴ Tjume e bikon kaxin trono ko ngujngu sen steta a sen trono tikinixin en sen, sen tsikayé e sen juachaxin sinchéña ijié. Ko kaxon bikon aséen sen tsikonchrijin nā jaa ixi tsichronga sen chijnie ndo Dio, chijni juako ndo Jesús. Sen me e kuajon a sen juasaya ngajin iku tsango chjinga jii ko ngajin tjatu o tsikachrjeya ba ko kaxon tsikintuexin a sen kuenito chji e ba ntatjen sen ko itja sen. Ko sen tsichrijin jaa ikjan xechón sen ko kuetuan an sen kao ndo Cristo naa mil nano.

⁵ Ko ikaxin ni tsiken en xechón a nā ti tsitjaja mil nano. Ji i ti sa ó xrangíxixión xroxechón chujni.

⁶ Juaxruxin tsake e sen tjúá aséen, sen sa ó xroxechón. Ko xichononte í chóna i xa juachaxin tsóña xa sen íjngo ixi je e sen xrokjan sen ndotaana tikinixin en ndo Dio ko ndo Cristo ko tsetuankao sen ndo naa mil nano.

⁷ Ko ti xroxetjaja mil nano, tjume e xi Xixron anxrée xroxindange e xa íjngo.

⁸ Ko sincheye e xa chujni ste ngata a inche. Ko sincheye e xa tjajna Gog ko tjajna Magog. Ixi nti a xroxra o xa ixi sindeke to xa ko xi tsinteke to jua i tsekini xa ixi tsango tsjé xa xranchi nchese chóna ndachaon.

⁹ Ko tsintekjixin xa nchijí nunte xasintajni ko tsingatjiandajin xa tjajnéé ndo Dio, tjajna tsango tjue e ndo. Ko tjume e ndo Dio xruan an ndo xro i tsí xín ngajní, jaña xroche kain ni ña i ko tsitjáña nā.

¹⁰ Ko Xixron anxrée, xi juincheye e chujni, juanka ndo xa ngaya tuye yaso e ti jii xro i, xro i jiche ixi azufre, kaxon nti a jii iku tsango chjinga jii ko xi ndako a bajako chijnie ndo Dio ko xro i me e nai a tsjanga xro i, tiie, nchakon xroche xa.

Tsóña ijié ti trono tjúá ngajin kain chujni

¹¹ Ko bikon naa trono tjúá, tsango ijié ko ndo jita a trono. Ngajinxin ndo kuitjáña nunte xasintajni ko ngajní ko í xruan an ngisen bikon.

¹² Tjume e bikon sen tsiken en, sen ndoa ko sen nchínchín, stexin tutée sen ngajinxin ndo Dio, ko xitje e kaxin xroon ko xitje e inaa xroon jitaxin xranchi tin in ngujngu sen komé e jíee. Nti a koñe e ijié kain sen tsiken en xranchi jitaxin xroon nge e ixra juinche e sen.

¹³ Ko ndachaon konkjan kain sen tsiken en kuachonda, ko kaxon xichononte* ko ti no stexrabaa chujni tsiken en konkjan xa chujni ko xra o chujni ti jii ndo Dio ixi kaxon tsoñe e nā ijié kondeexin kain nge e juinche e nā.

¹⁴ Tjume e juachaxin kuachóna xichononte ko ti no kuixrabaa chujni tsiken en juanka ngi ndo Dio ti jiche xro i, me e ti xrondachro ti yuxin tsen en chujni.†

¹⁵ Ko ni jitaxin a xranchi tin in nā ngaya xroon ti jitaxin sen tsechón kain nchakon, ni me e juanka ngi ndo nā ti jiche xro i.

* 20:13 *xichononte* muerte † 20:14 *ti yuxin tsen en chujni* segunda muerte

21

Ngajní natjúá ko nunte natjúá

¹ *Tjume e bikon naa ngajní ko naa nunte natjúá ixi ngajní ko nunte sa ó bake e ó tsikitjáña ko ndachaon íko a kaxon.

² *Jan an Juan bikon naa tjajna ijié ko tjúá, me e tjajna Jerusalén natjúá, xingajinxin ngajní kuixin ti jii ndo Dio, ko kain sen tjajna me e tsikonchjian sen xranchi naa nchrichajan tsute e, tsango chaxro tsikitsojin nchrichan ixi tsii ndo tsute e nchrichan.

³ Tjume e kuin an séen nichja naa tée sen kuixin ngajní ko ndachro:

—Ndo Dio jii ndo ti ste chujnie ndo, ko je e ndo tsekao ndo sen ko je e sen xrokjan sen tjajnée ndo ko je e ndo ndo Dio tikinixin en sen.

⁴ Je e ndo tsoni ndo ndakon sen ko nchakon me e xruan an ngisen tsen en, ko xruan an ngisen xrotsjanga, ko tsoníe a sen ko xruan an juachjaon xrochóna sen ixi kain nge e kon en sa ó ó juexin kuatsinga.

⁵ Ko ndo jita a trono ndachro ndo:

—Jan an ntakonchjian kain nge e natjúá.

Ko kaxon ndachro ndo:

—Ikjian ji i ixi ji i chijni nduaxin, chijni chao tsitikaon chujni.

⁶ Tjume e ndachro ndo:

—Kain nge e ó juexin kon en. Jan an ndo xrangíxixión kain nge e ko jan an ndo tsjexixin kain nge e, xranchi letra xrangíxixín letra Á ko letra tjexixín letra Zeta. Ngisen kuen en inda, jan an xrotjá a sen inda tsi i sen, ko inda tajon jan an me e tsechónxin sen ko xro an nge e tsjenga sen na.

⁷ Ngisen tsjacha tsindue a xrochuntiana, jan an xrotjá a sen kain ti jian, ko jan an xrokjanna ndo Dio tikinixin en sen, ko je e sen xrokjan sen chjan na.

⁸ Ko ni xronka, ni titikaon a, ni ndako a nche e, ni naatóñaxón chujni, ni chóna inaa nchri o inaa xi, je a janchri e o ndoxi e, ni tajon juasaya ngajin ídolo, ni tuso ko ni rué e chin tuso, ni ncheya, kain ni me e tikinixin en na itsji na ti jii xro i jichexin ixi azufre ko nai a tsjexin. Ji i xrondachro ti yuxin tsen en chujni.*

Jerusalén natjúá

⁹ Tjume e kuii ndo ángel yatuxin chóna copa yatuxin jikaon ixi ichin tsjexixin tsikaon chujni ko ja in ndachro ndo:

—Xrokuia tsjako a sen tsute e Xjantuchjon.

¹⁰ Tjume e bikon ixi Espíritue ndo Dio biki an naa ntajie ijié ko juako na ndo tjajna ijié, tjajna Jerusalén tjúá xingajinxin ngajní jiti xin ti jii ndo Dio.

¹¹ Ko tóngixin tjajna xranchi chjiixro nchengasáña ndo Dio, tsango tóngixin xranchi naa ixro tsango chaxro, xro jaspe chaxro tikonni xranchi xroxrao.

¹² Ngandajin tjajna tsikité naa tjatu o, tsango noi ko chóna teyuu ntachja ko ngujngu ntachja jii naa ndo ángel ko nti a jitaxin xranchi tin in ti teyuu sen tsikachrjenixin ndo Israel.

¹³ Níi ntachja jii ndatsjonxin chjuya ko níi ntachja jii ndatsjonxin ku e, níi ntachja jii ndatsjonxin retuya ko íjngo níi ntachja jii ndatsjonxin níjin.

¹⁴ Ko ngandajin tjatu o tsikité na chóna teyuu ixro jichroaxin tjatu o, ko ngata a ixro me e jitaxin xranchi tin in ti teyuu sen kuajikao Xjantuchjon.

¹⁵ Ko ndo ángel jinichjana chóna ndo naa ntakuto chika oro, jitjatichua xin ndo tjajna, ko ntachje e tjajna ko tjatuée tjajna.

¹⁶ Tjajna me e xraje o tonxin ko jinexin tjajna, ko ndo ángel juaticho a ndo tjajna ixi ntakuto ko chóna yuu mil ko yuu ciento kilómetro.

17 Ko juaticho a ndo tjatu o ní kán ko na ó metro noixin, xranchi tjatichu a ni nunte xasintajni, jaña juaticho a ndo ángel.

18 Ko ixro tsikóñaxin tjatu o me e ixro jaspe ko tjajna tsikóñaxin jeoxón chika oro jian, xroxrao tóngíxin oro me e.

19 Ko ixro tsiki texin tjatuée tjajna me e tsikitsojin ixi ixro tsango chaxro: ixro jaspe, ixro yuxin zafiro, ixro nínxin ágata ko ixro noóxin esmeralda,

20 ixro na óxin ixro mármol, ixro kjaunxin ixro cornalina, ko ixro yatuxin crisólito, ixro jníxin ixro berilo, ixro naxin topacio, ko ixro texin crisopraso, ko ixro tenaá jacinto, ko ixro teyuu amatista.

21 Ko ti teyuu ntachja me e teyuu perla kaxon, ko ngujngu ntachja tsikóñaxin naakua perla. Ko cha o ijié chóna tjajna tsikóñaxin jeoxón chika oro, xranchi xroxrao tikontu uni.

22 Ngaxin in tjajna me e bikon a ninaa ni ngo, ixi Ncháina ndo Dio, ndo chóna kain juachaxin, je e ndo ko Xjantuchjon je e sen me e ni ngo.

23 Ko tjajna xrokonde a tjajna chjiixro ko nchanitjao tsingasáñaxin. Ixi nti a tingasáña ndo Dio ko Xjantuchjon ixi je e sen xro i tingasáñaxin tjajna.

24 Ko chujnie kain nación, chujni kuayé e juachaxin tsechón kain nchakon, tsaji sen ti tingasáña tjajna me e, ko sen rey nunte xasintajni tsajon sen ti tjintee chóna sen.

25 Ko ntachje e tjajna nai a tsije e ntachja taa nchakon, ixi nti a nai a tsontie.

26 Ko kain sen kain nación nti a tsikaan sen nge e chaxro kuachóna sen nunte xasintajni.

27 Ko nti a jua i tixin in nge e tjúa i ko ti ncheya. Je o chao tixin in sen jitaxin xranchi tin in ngaya xroon jitaxin kain sen chóna juachaxin tsechón kain nchakon, me e xroon chóna Xjantuchjon.

22

Inda jitinga tajon juachaxin tsechónni

1 Tjume e ndo ángel juako na ndo naa inda jitinga, nda tjúa, ko nda me e tajon juachaxin tsechón chujni. Ko tikonni nda xranchi naa xroxrao, ko kuachrjexin inda ti jii ntachaon en ndo Dio ko Xjantuchjon.

2 Ko ngusine cha o ijié chóna tjajna ngujngu lado ti jitinga nda tjúa jii ntaja tajon juachaxin tsechón chujni ko ngujngu nchanitjao tajon ntaja itu, ko chaan ntaja me e xroan tsoxruxin chujni kain nación.

3 Ko nti a íxro an nge e ti ningakon en ndo Dio tsake e. Ko sen nche e xrée ndo Dio tsajon sen juasie sen ti jii ntachaon en ndo Dio ko tronoe Xjantuchjon* ti tjajna nti a.

4 Ko je e sen tsikon sen ikon ndo Dio ko tsenito ntatjen sen xranchi tin in ndo.

5 Ko nti a tsake a tiie ko í xrokonda i xruie naa foco ko xruie chjiixro tsingasáñaxin ixi Ncháina ndo Dio je e ndo tsingasáña ndo, ko je e sen tsetuan an sen kain nchakon.

Ko ndachro ndo Jesucristo ixi tuinxin tsji ndo

6 Ko ndo ángel ndachijina ndo:

—Chijni ji i, chijni nduaxin, chijni xrokonda tsitikaonnta. Ko je e Ncháina,† ndo Dio, ndo nhexraxaon sen nichja chijnie ndo, xruan an ndo ndo angéel ndo ixi tsjako ndo ngajin sen nche e xrée ndo Dio, nge e ó taka tson en.

7 —Jan an tuinxin tsji i!

Juaxruxin tsake e sen titikaon chijnie ndo Dio, chijni jitaxin xroon ji i ko chronga nge e xrokonda tuinxin tson en.

* 22:3 *Xjantuchjon* Cordero de Dio; Jesús † 22:6 *Ncháina* Señor *Ncháina Jesús o Ncháina Dio*

⁸ Jan an, Juan, kuin an ko bikon ji i. Ko juexin kuin an ko bikon, tjume e bake exin ntatuchi in tutée ndo ángel ixi xrokuajon juasaya ngajin ndo ixi je e ndo juako na ndo kain nge e bikon.

⁹ Tjume e je e ndo ndachro ndo:

—Nche a jaña, ixi jan an kaxon nta a xrée ndo Dio xranchi ja a ko xranchi sen kichuua, sen nichja chijnie ndo, ko kain sen nduaxin titikaon ti jitaxin xroon ji i. Je o ndo Dio tikinixin en ndo tsayé e ndo juasaya.

¹⁰ Kaxon ndachijina ndo:

—Tema ia kain ti bikuan ko kuin en, ti jitaxin xroon ji i, ixi chijni kuin en tuinxin tson en kain ji i.

¹¹ Tintu e ni nche e ti ña i, ndanche e na ti ña i ko ni ndako a nche e, ntanche e na ti ndako a, ko sen nche e ti jian, sinche e sen ícha jian, ko sen titikaon xranchi tjaun ndo Dio, ícha tsitikaon sen.

¹² —Jian tin ennta, jan an tuinxin tsji i ko tsikian kain ti tikinixin tsayé e ngujngu sen xranchi ixra juinche e sen.

¹³ *Jan an ngisen xrangixixín kain nge e ko ngisen tsjexixin kain nge e, xranchi letra Á xrangixixín ko xranchi letra Zeta xrangixixín.

¹⁴ Juaxruxin tsintee sen tsijinemá manta jitsáa sen ixi jaña xrochóna sen juachaxin tsonchjiñe e sen ngajin ntaa tajon juachaxin stechón chujni, ko kaxon chao tsixixin sen ntachje e tjajna tjúa.

¹⁵ Ko nduja tsitu e chujni ña i, ti nche e xranchi kunia, ko kain chujni rué e ichin tuso, ni chóna nchri o xi je a janchri e o ndoxi e, ni naatóñaxón chujni, ni tajon juasaya‡ ngajin ídolo ko kain ni ncheya.

¹⁶ —Jan an ndo Jesús xruan an ndo ángel tikinixinna ixi xrochronga ndo ngajin kain sen ni ngo kain ji i. Jan an kuachrjenixin ndo rey David ko jan an me e nchanotsé tingasáña ndúyo.

¹⁷ Espíritue ndo Dio ko sen titikaon Xjantuchjon ndachro sen:

—Xrokuiinta.

Ko sen tsin en kaxon xrondachro sen:

—Xrokuiinta.

Ko ngisen kuen en inda tsji sen ko tsi i sen inda tajon juachaxin tsechónni kain nchakon, ko sen tsji xro an nge e tsjenga sen na.

¹⁸ Kain sen tin en chijnie ndo Dio, chijni jitaxin xroon ji i ko chronga nge e tson en, sintano a sen: Siá xrojan ngisen tsasintaxin inaa nge e ti jitaxin a xroon ji i, ndo Dio sincheni e ndo sen xranchi jitaxin xroon ji i.

¹⁹ Ko siá xrojan ngisen tsantsjende e xrojan chijni jitaxin xroon ji i, ndo Dio sinchemé e ndo xranchi tin in sen jitaxin xroon chóna juachaxin tsechónni kain nchakon ko tsajon a ndo juachaxin tixin in sen tjajna natjúá xranchi jitaxin xroon ji i.

²⁰ Ko ndo chronga chijni ji i ndachro ndo:

—Ó tuinxin tsji i jan an.

Jaán, jaña tson en. ¡Tuinxin xrokjui inta, Ncháina Jesús!

²¹ Ncháina Jesucristo sintanchaonnta ndo kainnta. Jaña tson en.